

# **Ca Tisa gue Tata Jesucristuha**

NUEVO TESTAMENTO

Zapoteco de Aloápam



Primera edición  
El Nuevo Testamento  
Zapoteco de Aloápam  
zaq 19-016 3C

©2020 Wycliffe Bible Translators, Inc.

Versión electrónica ©Wycliffe Bible Translators, Inc. 2022

[www.scriptureearth.org](http://www.scriptureearth.org)

Licencia Creative Commons  
(Reconocimiento-NoComercial-SinObraDerivada 4.0  
Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

<https://creativecommons.org/licenses/by-nc-nd/4.0/deed.es>

## ÍNDICE

San Mateo.....	1
San Marcos.....	99
San Lucas.....	163
San Juan.....	264
Hechos.....	332
Romanos.....	421
1 Corintios.....	463
2 Corintios.....	499
Gálatas.....	524
Efesios.....	538
Filipenses.....	550
Colosenses.....	559
1 Tesalonicenses.....	568
2 Tesalonicenses.....	575
1 Timoteo.....	579
2 Timoteo.....	590
Tito.....	598
Filemón.....	603
Hebreos.....	605
Santiago.....	635
1 Pedro.....	645
2 Pedro.....	655
1 Juan.....	661
2 Juan.....	671
3 Juan.....	673
Judas.....	675
Apocalipsis.....	678



# Ca tisa rixxi'a gue Jesús ben Mateo lo sitsi-ni

Ni dia lá ca benni datía Jesucristu

(Lc. 3:23-38)

**1** Lo sitsi-ni dia lá ca benni datía Jesucristu. Lee anque benni datía David, benni datía Abraham lhe.

<sup>2</sup> Abraham ucabi tata gue Isaac.

Isaac ucabi tata gue Jacob.

Jacob ucabi tata gue Judá, adí ca betsibiha lhe.

<sup>3</sup> Judá ucabi tata gue Fares, Zara lhe.

Nan guecabi nna uca Tamar.

Fares ucabi tata gue Esrom.

Esrom ucabi tata gue Aram.

<sup>4</sup> Aram ucabi tata gue Aminadab.

Aminadab ucabi tata gue Naasón.

Naasón ucabi tata gue Salmón.

<sup>5</sup> Salmón ucabi tata gue Booz.

Nan gue Booz nna lábi Rahab.

Booz ucabi tata gue Obed.

Nan guenna lábi Rut. Obed ucabi tata gue Isaí.

<sup>6</sup> Isaí ucabi tata gue David bi'ini unnabia ca benni Israel.

David ucabi tata gue Salomón.

Nan gue Salomón nna ucabi nuila gue Urías.

<sup>7</sup> Salomón ucabi tata gue Roboam.

Roboam ucabi tata gue Abías.

Abías ucabi tata gue Asa.

<sup>8</sup> Asa ucabi tata gue Josafat.

Josafat ucabi tata gue Joram.

Joram ucabi tata gue Uzías.

<sup>9</sup> Uzías ucabi tata gue Jotam.

Jotam ucabi tata gue Acaz.

Acaz ucabi tata gue Ezequías.

<sup>10</sup> Ezequías ucabi tata gue Manasés.

Manasés ucabi tata gue Amón.

Amón ucabi tata gue Josías.

<sup>11</sup> Josías ucabi tata gue Jeconías tata gue ca betsi bi'iniha lhe.

La idaha nua atti bedaxxu ca nu Babilonia ca benni Israel

bechecan cabi daca lo yu guecaniha.

<sup>12</sup> Dequide chi bisíncabi Babilonia nna

Jeconías nna ucabi tata gue Salatiel.

Salatiel ucabi tata gue Zorobabel.

<sup>13</sup> Zorobabel ucabi tata gue Abiud.

Abiud ucabi tata gue Eliaquim.

Eliaquim ucabi tata gue Azor.

<sup>14</sup> Azor ucabi tata gue Sadoc.

Sadoc ucabi tata gue Aquim.

Aquim ucabi tata gue Eliud.

<sup>15</sup> Eliud ucabi tata gue Eleazar.

Eleazar ucabi tata gue Matán.

Matán ucabi tata gue Jacob.

<sup>16</sup> Jacob ucabi tata gue José bi'ini uca unbiyuu gue María,

nan gue Jesús, Benni anque Cristu.

<sup>17</sup> Larcala nna sitá (14) libixxi chi utee desdeba Abraham axta atti uli David. A sitá (14) libixxi chi ute ridú lori leni David axta atti beche ca nu Babilonia ca benni Israel daca lo yu guecaniha. A sitá (14) libixxi chi ute ridú lori desde lania axta atti bisía Benni anque Cristu.

### Aní uca atti uli Jesús

(Lc. 2:1-7)

<sup>18</sup> Aní uca atti uli Jesucristuha: María, nan gue Jesús, chiba du José rinnababi bi'iniha qui utsá nácabi, ttiaca antisla tse'e len loescabi nna beni Espíritu gue Tata Do Iyyabaaha bija xi'ini María.

<sup>19</sup> José bi'ini dhi María nna ancabi ttu benni du tsee lebi. Denuala nna bittu raca lebi inne güe benni gue María. Larcala nna belaba le José sigába uquiettabi lo bi'iniha. <sup>20</sup> Ttiaca laca rulaba lebi unbi anía, lo bisiela guebi nna bele'enbi ttu ingeli udhelha Tata Do Iyyabaaha, nianna rá ingeliha bi:

—José, bi'ini datía David, bittu gasinlu utsá nálu leni María-na, cumu Espíritu gue Tata Do Iyyabaahaba benie qui ujabi unto nujabi-na. <sup>21</sup> Labi nna cu'ubi ttu unbiyuuto. Benniha nna quixxalu

lee Jesús. Aná gatta lee cumu Ben-na odile ca benni guee lo nu lä anca tsee runcana.

<sup>22</sup>Iyába unní uca qui guaxxína nu chi rá Tata Do Iyyabaaha profeta Isaías. Bi'iniha nna utixxi'abi rábi:

<sup>23</sup>Ttu nu rbani uja xi'inbi,  
Labi nna cu'ubi ttu unbiyuuto.  
Untoha nna gatta lee Emanuel.

Emanuel nna dienna innána: Tata Do Iyyabaaha due len ri'i.<sup>a</sup>

<sup>24</sup>Atti bebani José nna benbabi nu beni ingeli gue Tata Do Iyyabaaha mandadu unbi, labi nna betsába nábi leni María.

<sup>25</sup>Ttiaca läga bisá loescabi, axta liba dequide chi uli untoha. Labi nna begüeebi lá untoha Jesús.

### Ca benni te elha rien guecani guanalhicana Jesús

**2** Atti rinnabia Herodes, lania nua uli Jesús lhe'esi lá Belén nu re lo yu te láni Judea. Lania nna bisína ttulhe ca benni te elha rieni guecani lhe'e yiesi Jerusalén, ca unnuha nna dacana daca atta riria tatubisa-na. <sup>2</sup>Lacana nna unnaba tisacana rácana:

—¿Na unto chi ulbaha, Benni aca nu innabia gue ca benni Israel-ni? Cumu ri'itu nna chi bilentu beli nu riguixxi'a gue Ben-na, biríana daca atta riria tatubisa-na. Denuala nna datu nii qui udú xibitu loe.

<sup>3</sup> Atti bienin Herodes nu rá ca nua nna attulade bichacha iquiní, anáguaba ca benni se'e Jerusalén lhe. <sup>4</sup>Laniala uxi Herodes iyába ca nu lo gue ca bixxudiha, ca nu rule'e nu rá lo ca ley boca'ana Moisés lhe qui unnaba tisana ca unnuha gue gaxa gali Benni anque Cristu. <sup>5</sup>Ca unnuha nna becabicana rácana:

—Lhe'esi lá Belén nu re lo yu gue Judea-ni, nía gali Benniha, cumu anába rá lo ca sitsi beni profeta gue Tata Do Iyyabaaha. Bi'iniha nna rábi:

<sup>6</sup> Lu, lhe'esi Belén, nu re lo yu gue Judá,  
tsa läga ancalu yiesi chica'aru re lagüi gue adí ca yiesi xeni  
se'e lo yu gue Judá,  
cumu lagüi gue ca benni guelha iría ttu Benni aque nu  
innabia.

Benniha nna nnerue lo ca benni quia anca benni Israel.<sup>b</sup>

---

<sup>a</sup> 1:23 Isaías 7:14    <sup>b</sup> 2:6 Miqueas 5:2

<sup>7</sup> Herodes nna uxttebana ca nu te elha rieni guecaniha ttu atta gatsi qui unnaba tisa tseena ca unnuha gue nucattiga ucaxxe beliha.

<sup>8</sup> Laniala udhelhana ca unnuha Belén, nianna rán ca unnuha:

—Gualtsia nna tsee tseeru gualinnaba tisa gue untoha. Gansi chi guatti'ale nua nna ettettixxi'enle neti qui anáguaba neti tsiguuba sadú xibia loni.

<sup>9</sup> Ca unnuha nna dequide chi ubienquinna nu rá Herodes, ulu'uttebacana neda diacana. Beli nu biláquinna ucaxxe daca atta riria tatubisa-na diabana neruna locani, axta liba bisínna lhixxa xequi atta te untoha, lania liba nna gualedana. <sup>10</sup> Atti biláni ca nu te elha rieni guecaniha chi gualheda beliha nna attulade be'o tsitsia lecani. <sup>11</sup> Atti uta'acana lhe'e yo'oha nna biláttebaquinna untoha lenie nan guee, María. Laniala nna bedú xibicani lo Benniha, ulequi xencane lhe. Nianna udhalttebacana ro'o ca nu nujacanaha, qui betecana len Benniha oro lhe yala lhe seti nu rure xixxi te láni mirra lhe. <sup>12</sup> Lenla nna bitsiattebaquinna yiela rá Tata Do Iyyabaaha cana, bitturu eyequicana etecana atta do Herodes. Larcala nna attu neda subiba bodaxxucana deyyacana lhe'e yies guecaniha.

### Ca tata nan gue Jesús bexunni lencabi Benniha diacabi Egipto

<sup>13</sup> Dequide chi deyya ca nu te elha rieni guecaniha nna bitsiattebani José ttu yiela. Lo yiela guebiha nna ucaxxe ttu ingeli gue Tata Do Iyyabaaha rábi:

—Guadha, bedaxxu unto-na lenie nan guee-na, bexunni lenque güia daca lo yu te láni Egipto. Níaba udo axta liba quixxi'atia lu nuçaxa edálu nía, cumu Herodes idhelhana ca nu eguilacana unto-na qui utticane.

<sup>14</sup> Laniala nna guadhatteba José lo rela lenbi María, bedaxxuttebacabi untoha dia lencabi Benniha Egipto. <sup>15</sup> Níaba use'ecabi axta liba utti Herodes. Aníaba uca qui guaxxína ca tisa betee Tata Do Iyyabaaha leni benni uca profeta guee. Bi'iniha nna unnebi rábi: “Egíptoli do Xi'iniha atti beaxie.”<sup>a</sup>

<sup>16</sup> Atti chi utedaani Herodes uxíyiaba ca benni te elha rieni guecaniha na, bisa'atsitsiabinna. Nianna benttebana mandadu utticana iyába ca unto chica'a anca unbiyuu, desdeba ca nu chi ulba axtaba ca nu chi ancáni chupa ida se'e lhe'esi Belén leni adí

---

<sup>a</sup> 2:15 Oseas 11:1

ca lhe'esi se'e sabi'aba nía. Lana nna bedaxxu ni'ani nu utixxi'a ca benni te elha rieni gueniha.<sup>17</sup> Lania guaxxína uca nu utixxi'a profeta Jeremías, atti rábi:

<sup>18</sup> Lhe'esi lá Ramá bieni ts'i'i ttu benni  
ribesi'ana, rixxaxxatta ro'oni lhe ribes güena lhe de  
relenixxattinna.

Raquelba nua ribesixxattana gue ca xi'inniha.  
Lana nna tsaba bittu raca leni edína elha xen lasi,  
cumu utti ca xi'iniha.<sup>a</sup>

### Ca tata nan gue Jesús besincabi lhe'esi Nazaret

<sup>19</sup> Dequide chi utti Herodes, atti sna doba José lo yu lá Egipto nna labi nna bitsienbi ttu yiela. Lo yiela guebiha nna ucaxxe ttu ingeli gue Tata Do Iyyabaaha.<sup>20</sup> Ingeliha nna rábi José:

—Guadha beche unto-na lanie nan guee-na, gualequi gualeyya lo yu gue ca benni Israel, cumu chiba utti ca nu rdacacana utticana unto-na.

<sup>21</sup> Lania nna guadha José lenbi María deyya lencabi untoha deca Israel.<sup>22</sup> Ttiaca atti bina José dequi xi'inbiyuu Herodes nu lá Arquelao, unnuhaba rinnabiana lo yu te láni Judea cuenta gue tata gueniha, labi nna usinbi eyyabi nía. Dequide utixxi'en Tata Do Iyyabaaha bi lo bisiela guebi bixaanca nu unbi nna deyyattebabí lo yu te láni Galilea.<sup>23</sup> Atti chi besinbi nía nna beyyattebabí guadobi lhe'e yiesi lá Nazaret. Anía uca qui guaxxína nu chi rá ca profeta gue Tata Do Iyyabaaha, atti rácabi: “Jesús gatta lee nazareno”.

### Juan bi'ini rugadi inda ridhalbi neda gue Jesús

(Mr. 1:1-8; Lc. 3:1-9, 15-17; Jn. 1:19-28)

**3** Bisíaba sá atti bele'e lo Juan bi'ini rugadi inda daca lo yu bisi gue Judea, rixxi'abi ca tisa gue Tata Do Iyyabaaha.<sup>2</sup> Labi nna rábi:

—¡Gualodú xiyyanle, gualodaxxutte neda gue Tata Do Iyyabaaha, cumu chi daa ribiga isía sá innabia Ben-na!<sup>3</sup> Gue Juan-ni nua utixxi'a profeta Isaías, atti rábi:

Lo yu bisiha rieni ts'i'i ttu benni ribesi'abi, rábi:

---

<sup>a</sup> 2:18 Jeremías 31:15

“Gualeguixxa tsee neda gue Benni bananie ri-na.  
Gualolixxa neda gue Ben-na.”<sup>a</sup>

<sup>4</sup> Ca xo Juan ancacana leni itsa xo nimala te láni camello. Nu ridhí lhe'ebi nna ancana ttu yieti. Elha go robi nna ancana nu xixxi i'liya, nu anca attiba uxxaru lána langosta lhe. <sup>5</sup> Ca benni se'e lhe'e yiesi Jerusalén lhe ca benni se'e lhe'e adí ca lhe'esi se'e itúba lo yu te láni Judea lhe ca benni se'e itúba atta te yoo lá Jordán lhe riacana qui rudá nagacani nu rá Juan. <sup>6</sup> Atti rixxua lopicana ca tulha guecani lo Tata Do Iyyabaaha nna rugaditteba Juan cana inda lhe'e yoo nu te láni Jordán.

<sup>7</sup> Ttiaca atti biláni Juan daa ixeru ca fariseo lencana ca saduceo lhe qui gadicana inda, ráttebabí cana:

—¡Lebi'i, ca nu datía belha! ¿Nú utixxi'enna le dequi gualábale lo elha disa nu chi dala uyúle? <sup>8</sup> Gualuni nu anca lhatsiru qui ule'e lo gualí chi bodú xiyyanle bodaxxule neda gue Tata Do Iyyabaaha. <sup>9</sup> Bittu aquinle ulaba lele innále: “Gualába ri'itu de ancatu benni datía Abraham”, cumu neti nna gualíbatia ria, axta ca iyya se'e-ni guacaba eyon Tata Do Iyyabaaha cana benni datía Abraham.

<sup>10</sup> Anáguba chiguaba du tsee ttu iyya ttee qui ichúna axta lhu ca yaga-na. Larcala nna iyába ca yaga bittu ribía nu anca tsee gueni nna irúbacana qui tsiacana lo gui. <sup>11</sup> Neti nna gualígala sunruba inda rugadia ca benni qui ule'e lo gualí chi bodú xiyyancana bodaxxucana neda gue Tata Do Iyyabaaha, ttiaca Benni daa dequide neti nna ixuunie Espíritu gue Tata Do Iyyabaaha lhe gui lhe qui ugadie le inda. Benniha ra xxenru lee atti neti, larcala nna nibala bi elha ralha uja ca guaracha guee. <sup>12</sup> Benniha nna chi den tsee barquilu qui untsee xuxtila, lee nna cuequiesie xuaha lhe'e teha. Xuaha nna egu'utsee benniha atta tuatsee, ttiaca teha nna uttebe nua lo gui nu tsa bittu reolana.

### Jesús udie inda

(Mr. 1:9-11; Lc. 3:21-22)

<sup>13</sup> Laniala nna udá Jesús lo yu te láni Galilea, die atta du Juan ro'o yoo Jordán qui ugadi Juan Benniha inda. <sup>14</sup> Ttiaca Juan nna udú disabi rábi Benniha:

---

<sup>a</sup> 3:3 Isaías 40:3

—Netiunní reasatia ugadilu inda, lu nna netila dalu rálu ugadia lu inda.

<sup>15</sup> Jesús becabie re:

—Uxielha nnanna cumu tseeba salánri udori tisa gue nu chi ga'anani Tata Do Iyyabaaha unri.

Anía liba uca nna uxielha Juan begadibi Jesús inda.

<sup>16</sup> Dequide chi udi Jesús inda nna beráttebe lhe'e indaha.

Snaba lania nna beali iyyabaaha, Benniha nna biláttebanie Espíritu gue Tata Do Iyyabaaha dee guadie attiba ttu becha udoe iqui Benniha. <sup>17</sup> Nianna bientteba ts'i'i ttu Benni iyyabaaha re:

—Benni anque xi'inia, Benni racatia guee, neti nna doa redaca lasia len lee.

### Nu xxegüiha runna dhi yiena Jesús

(*Mr. 1:12-13; Lc. 4:1-13*)

**4** Nianna uchetteba Espíritu gue Tata Do Iyyabaaha Jesús lo ttu yu bisi, qui un nu xxegüiha dhi yiena Benniha.

<sup>2</sup> Dequide chi bette ubina lhe'e Jesús chua (40) sá nna chua ela nna bisía utunie. <sup>3</sup> Nu xxegüiha nna ubigattebana rána Benniha:

—Gansi gualínlu ancalu xi'in Tata Do Iyyabaaha, gus ca iyya-ni eyacacana ttaxtila.

<sup>4</sup> Jesús becabie gueni re na:

—Lo ca sitsi gue Tata Do Iyyabaaha rá: “Läga sunru len ttaxtila aca ban ca benni, sinuqui lacana aca bancana leni iyába ca tisa rinne Tata Do Iyyabaaha.”<sup>a</sup>

<sup>5</sup> Laniala nna uche nu xxegüiha Jesús lhe'e yiesi anca le'aha, delába Jerusalén. Nía belhopina Benniha axta atta yadharu gue iqui yotuha. <sup>6</sup> Nianna rána Benniha:

—Gansi gualí ancalu xi'ini Tata Do Iyyabaaha, binna sanga axta lireeha, cumu lo ca sitsi gue Tata Do Iyyabaaha ga'ana rá:

Tata Do Iyyabaaha idhelhe ca ingeli guee qui uyúcabi lu.

Ca ingeliha nna güilhenbacabi lu qui bittu icheculu len ca iyya-na.<sup>b</sup>

---

<sup>a</sup> 4:4 Deuteronomio 8:3    <sup>b</sup> 4:6 Salmo 91:11-12

<sup>7</sup> Jesús becabie gueni re:

—Ga'anaguaba lo ca sitsi gue Tata Do Iyyabaaha: “Bittu cu'ubialu Tata Do Iyyabaaha Benni bananie lu.”<sup>a</sup>

<sup>8</sup> Nu xxegüiha nna uchettebana Benniha axta iqui ttu i'iya yadharu. Nía bele'enna Benniha iyába ca yiesi xxeni se'e yies lo yu-ni, nu ga'ana tsee te guecani lhe. <sup>9</sup> Nianna atti rá nu xxegüiha Benniha:

—Iyába unná utea guelu, gansi lu udú xibilu loa, cuequi xenlu neti lhe.

<sup>10</sup> Jesús becabie re na:

—Unreha güia, nu xxegüi, cumu lo ca yitsi gue Tata Do Iyyabaaha rá: “Suntteba lo Tata Do Iyyabaaha Benni bananie lu udú xibilu, suntteba Ben-na ixuuri lo sina guee lhe.”<sup>b</sup>

<sup>11</sup> Laniala güequi chiba nu xxegüiha. Nianna bisíntteba ca ingeli betecabi nu beasin Jesús.

### **Jesús riduloe rixxi'e ca tisa gue Tata Do Iyyabaaha**

(*Mr. 1:14-15; Lc. 4:14-15*)

<sup>12</sup> Atti chi bina Jesús lisiyyaba te Juan bi'ini rugadi indaha, bequittebe besine lo yu te láni Galilea. <sup>13</sup> Ttiaca lärga udoe lhe'esi Nazaret, lhe'esi Capernaum nu re ro'o indattooha liba udoe. Lhe'es-ni nua rena ro'o yu gue Zabulón lhe gue Neftalí lhe. <sup>14</sup> Anía liba uca nna qui guaxxína ca tisa utixxi'a profeta Isaías atti rábi:

<sup>15</sup> Ca benni se'e lo yu gue Zabulón lhe gue Neftalí lhe  
ca nu se'e ro'o neda nu dia daca ro'o indattoo-na,  
daca attu ladu gue yoo Jordán-na,  
delába ca benni se'e lo yu te láni Galilea atta se'e ixeru ca  
benni bittu anca benni Israel.

<sup>16</sup> Lacana nua ancacana attiba ca benni se'e lhe'e atta anca  
chulha.

Nnanna nna chi biláquinna ttu xieni xeni.<sup>c</sup>

Xieniha benniha udanie gue ca benni se'e atta ruxunnina  
guecani gatticana.

<sup>17</sup> Desdeba lania nna udulo Jesús utixxi'enie ca benni se'e nía re cana:

---

<sup>a</sup> **4:7** Deuteronomio 6:16    <sup>b</sup> **4:10** Deuteronomio 6:13    <sup>c</sup> **4:15-16** Isaías 9:1-2

—Gualodú xiyyanle, gualodaxxutte neda gue Tata Do Iyyabaaha, cumu chi daa ribiga isía sá innabia Benniha.

### **Jesús uxie ttapa ca benni yu'u güedaxxu belha**

(*Mr. 1:16-20; Lc. 5:1-11*)

<sup>18</sup> Atti dia Jesús yu'e neda ro'o indattoo gue Galilea, nía bilánie irupa betsiba Simón bi'ini teguuba lábi Pedro, lenbi Andrés. Ca bi'iniha nna yu'ucabi güedelha yexxa lhe'e indattooha cumu irupabacabi ancacabi benni rudaxxu belha. <sup>19</sup> Jesús ráttebe cabi:

—Gualtá gualetteno neti. Neti nna unia acale nu gaxi benni qui udaxxucana neda gue Tata Do Iyyabaaha.

<sup>20</sup> Snaba lania nna boca'an bixxicabi ca yexxa guecabiha nía. Nianna diattebacabi len Jesús.

<sup>21</sup> A saro'ogarba ude nna bedeláttebanie a chupa ca benni: Jacobo lenbi betsibi Juan, ca xi'ini bi'ini lá Zebedeo. Lacabi nna siacabi lencabi tata guecabiha lo barco guecabiha reoncabi atta chi bisú gue ca yexxa ca nu rixuincabi rudaxxucabi belha. Nianna uxtteba Jesús ca bi'iniha. <sup>22</sup> Ca bi'iniha nna níaba boca'ancabi barcoha, tata guecabiha lhe atti diattebacabi len Jesús.

### **Jesús reonie ca benni rani, rule'enie ca benni lhe**

(*Lc. 6:17-19*)

<sup>23</sup> Itúba Galilea güequi Jesús rule'enie ca benni lhe'e ca yo'o atta rudheti ca benni Israel ca tisa gue Tata Do Iyyabaaha, rixxi'anie ca benni ca tisa tsee gue gaxasná rinnabia Tata Do Iyyabaaha lhe reonie ca benni yu'u iyáloba isagüe cuerpu guecani lhe. <sup>24</sup> Iyába ca benni se'e itúba lo yu gue Siria binacana gue nu runi Jesús. Nianna uchettebacana iyába ca benni rani guecaniha lo Benniha: Ca benni yu'u ixeloba isagüe lhe ca benni yu'u be xxegüi lhe'e cuerpu guecani lhe ca benni retti xuecani lhe ca benni bittu ritá ni'a nácani lhe. Iyába ca unnuha beonie. <sup>25</sup> Ixeru ca benni denocana Benniha: ca benni beaca lascani ca lhe'esi se'e lo yu gue Galilea lhe ca benni se'e lhe'e yiesi Jerusalén lhe ca benni se'e lhe'e adírba ca lhe'esi se'e lo yu gue Judea lhe ca benni se'e lhe'e ca lhe'esi se'e lo yu nu te láni Decápolis lhe ca benni se'e lhe'e adírba ca lhe'esi se'e attu ladu gue yoo Jordán lhe.

**Jesús rixxi'e nuxa benni gualíga daca cana lo Tata Do Iyyabaaha**  
*(Lc. 6:20-23)*

**5** Atti biláni Jesús ixe tsitsiaba ca benni bitupa atta doe, gopittebe lo ttu lhilhi, nianna udottebe. Ca benni rudheti ca tisa rule'e Benniha nna ubigattebacabi atta do Benniha. <sup>2</sup>Lee nna udulottebe bele'enie ca bi'iniha re cabi:

<sup>3</sup>—Carbáru ca benni roquinna iquicani reasaquinna nu anca gue Tata Do Iyyabaaha, cumu lacana acacana benni innabia Ben-na.

<sup>4</sup>'Carbáru ca benni ribesi lo ni'a gue nu ratecana, cumu Tata Do Iyyabaaha utee elha xen lasi guecani.

<sup>5</sup>'Carbáru ca benni bittu ra xxeni lecani, cumu lacana ralhacana dhicana yiesi lo yu-ni attiba interés ute Tata Do Iyyabaaha.

<sup>6</sup>'Carbáru ca benni ridá lecani uncana nu anca tsee raca le Tata Do Iyyabaaha aca, cumu guasiaba sá aca nu ridá lecani aca.

<sup>7</sup>'Carbáru ca benni ratúa lecani ca benni, cumu guasatúuba le Tata Do Iyyabaaha cana.

<sup>8</sup>'Carbáru ca benni chi anca nari lastoocani de bitturu tulha bencana, cumu lacana iláquinna Tata Do Iyyabaaha.

<sup>9</sup>'Carbáru ca benni runi qui tse'e tsee len loes ca benni, cumu lacana gatta lácani xi'ini Tata Do Iyyabaaha.

<sup>10</sup>'Carbáru ca benni rate ruyúcana elha disa lo ni'a gue de runcana nu anca tsee, cumu lacana acacana benni innabia Tata Do Iyyabaaha.

<sup>11</sup>'Carbárule gansi de lo ni'a quia rusía le ca benni le, ruría lacan le lhe lacana nna run lecani runcana xiyya guele dequi runle iyáloba nu lä anca tsee. <sup>12</sup>Gualedacani lhe gualebequi itta lele lhe cumu xxeni anca nu tsee dhíle iyyabaaha. Ca unná nna anáguuba bedhacacana ca profeta use'e atti bittu chi bisíale yies lo yu-ni, tsa läga uca uyúcana ca bi'iniha.

**Ca benni ria lecani Jesús ancacana attiba deti-na lhe xieni-na lhe**  
*(Mr. 9:50; Lc. 14:34-35)*

<sup>13</sup>'Lebi'i ancale attiba deti se'ele lagüi gue ca benni se'e yies lo yu-ni, ttiaca gansi deti-na enitti ixe gueni, lärgaga aca eyona ixe attu libe. Lania nna tsa lärgabi ixuuna, iru'unabana ca lhe'eli'a-na, qui ulea benni iquini.

<sup>14</sup> 'Lebi'i ancale attiba ttu xieni gue yies lo yu-ni. Attiba ttu yiesi re lo ttu lhilhi läga aca igatsi nua. <sup>15</sup> Nuttuguuba nu benni te rugalhana ttu gui, nianna uttoddhina ttu lmoti iqui nua. Sinuqui uadolana unnuha ttu atta yadha qui udani nua gue iyába ca benni se'e lhe'e yo'oha. <sup>16</sup> Anáguaaba lebi'i, gualuni nu anca tsee, qui atti iláni ca benni nu anca tsee runleha nna lania nna cuequi xencana Tata gueri do iyyabaaha.

### **Jesús rixxi'e gue ca ley boca'an Tata Do Iyyabaaha len Moisés**

<sup>17</sup> 'Bittu aquinle ga delha yies lo yu-ni qui cuaya ca ley boca'an Tata Do Iyyabaaha len Moisés, niguuba ca tisa boca'an ca profeta gue Ben-na lo ca sitsi lhe. Läga delha neti güettua ca ben-na, daba neti qui unia saxxína aca nu rá ca tisa dia lo ca sitsi gue Ben-na. <sup>18</sup> Neti nna gualíbatia ria le, laca sna rerba yies lo yu-ni lhe iyyabaaha lhe ni ttu tisa chica'a lhe ni ttu letra lhe nu dia lo ca ley-na bittu ttua, axta qui saxxína aca iyá nu chi ga'ana lo ca ley-na aca. <sup>19</sup> Larcala nna benni bittu udonia tisa gue ttu ca tisa dia lo ca ley-na, masquiba ancana ttu tisa chica'aru, lana nna góna adí ca benni bittu udocana tisa gue nu rá Ben-na lhe unnuha nna acana nu xuna gue delo iyá ca benni rinnabia Tata Do Iyyabaaha. Ttiaca benni rudona tisa gue nu rá lo ca ley-na lhe rule'enna adí benni udocana tisa gue Ben-na lhe unnuha nna benni ra xxeni leni aca nua gue delo iyá ca benni rinnabia Tata Do Iyyabaaha.

<sup>20</sup> 'Cumu neti ria le, gansi bittuba unle adíru nu anca tsee atti ca fariseo-na lencana ca nu rule'e nu rá lo ca ley-na, tsa läga aca acale benni rinnabia Tata Do Iyyabaaha.

### **Jesús rixxi'e gue nu rutse'equi benni**

*(Lc. 12:57-59)*

<sup>21</sup> 'Lebi'i nna chiba yule gue nu bele'equinna ca benniola gueriha atti rácan: "Bittu uttile benni, cumu iyába nu runi elhutti labíaba aca elha uxtisi gue nua." <sup>22</sup> Ttiaca neti nna ria le, iyába nu ise'enna leni ttu betsi loesini, unba Tata Do Iyyabaaha elha uxtisi gue nua. Nuxaba usia leni ttu betsi loesni nna gutsaduba cana nua lo ca uxtisi qui uncana elha uxtisi gueni, nu quena iqui ttu betsi loesni nna ralhaba nua tsiana lo gui que atta lexúaha.

<sup>23</sup> 'Larcala nna gansi lu dialu qui cu'ulu úna lo becoa gue Tata Do Iyyabaaha, atti chi dulu nía nna exxa lelu ritolhaba lenlu ttu betsi loeslu, <sup>24</sup> lu nna nía tte bodha'an úna gueluha atta do becoha, atti bequitte beyya, primer xa beaca tsee len betsi loesluha, lania liba nna bequi beyya gualhu'u úna gueluha.

<sup>25</sup> Gansi nu ritolhaba lenluha saga'an lu lhe'e yo'o lagüi lo ca uxtisi, laca yu'u lenlu nua neda nna beni gaxasná eyaca tsee lenlu nua, qui bittu icheen lu sadún lu lo xueda, cumu xuedaha nna utten lu las ná güensina, güensinaha nna udelhan lu lisiyya. <sup>26</sup> Cumu neti ria nna läga eríalu lhe'e lisiyyaha axta liba quixalu iyárecha belhi nu innába ca nua.

**Jesús rixxi'e bittu anca tsee isá ttu  
benni ttu nu bittu anca latselani**

<sup>27</sup> 'Lebil'i nna chiguaba bieninle ca tisa ca nu rávana ca benniola gueriha, atti rávana cabi: "Bittu isálu nu bittu anca latselalu."

<sup>28</sup> Ttiaca neti nna rpeale, nuxaba benni dha leni ttu nuila atti ilenna nua, lana nna attisiba chiba bisána nua de belaba lhi'u leni isána nua.

<sup>29</sup> 'Larcala gansi iyya lo derechu guelha runna ixúyielu unlu nu lä anca tsee, uleana uru'una na idittu, cumu tseerla saliana lu unnittilu ttu lha'a iyya lolha, attichula itúbalu tsialu atta lexúáha. <sup>30</sup> Gansi ná derechu guelha runni ixúyielu unlu nu lä anca tsee, uchú na uru'una na idittu, cumu tseerla salianalu unnittilu ttu lha'a nálu attichula itúbalu tsialu atta lexúáha.

**Jesús rixxi'e bittu dica udhequi ttu unbiyuu nuila gueniha**

*(Mt. 19:9; Mr. 10:11-12; Lc. 16:18)*

<sup>31</sup> 'Ráguabacana ca benni uca benniola gueriha: "Nuxaba unbiyuu udhequini nuila gueniha, lana nna ugüena unnuha ttu sitsi nu rixxi'a loni dequi chiba bela'acana." <sup>32</sup> Ttiaca neti nna ria le, gansi cuentaba udhequi ttu unbiyuu nuila gueniha, gan läba de bisá nua attu unbiyuu subi, lana nna sunruba runna qui isá nua attu unbiyuu subi. Anáguaba unbiyuu nu edí nuila bedhá iquicaninha, ttu nu satsaba nua unna.

### **Jesús rixxi'e bi dica innári atti ugüeri tisa**

<sup>33</sup> 'Lebi'i nna chiguaba bieninle gue nu bele'equinna ca benniola gueriha: "Gansi ugüelu tisa lo Tata Do Iyyabaaha unlu ttu bixa, bittu aquinlu lä unbalu nu chi begüeelu tisa unluha." <sup>34</sup> Ttiaca neti nna ria le: Atti rugüele tisa nna tsa bittu udettile nuxa. Bittu udettile iyyabaaha, cumu anque atta do Tata Do Iyyabaaha rinnabie. <sup>35</sup> Lä udettiguale yies lo yu-ni lhe cumu ancana atta rudú ni'a Ben-na, lä udettiguale yiesi Jerusalén lhe cumu de ancana yiesi gue Tata Do Iyyabaaha Benni rinnabia ra xxeni lee. <sup>36</sup> Lä udettiguale iquile lhe cumu läga aca guele unle eyaca sitsi o yadhi ni ttu itsiquile. <sup>37</sup> Suntteba gualná: "O", gansi yule guacaba, gansi yubale bittuba aca nna suntteba gualná: "Bittu aca", cumu nu udianle uxxúale adí iqui tisa-ni nna gue nu lexúhaba chi anca nua.

### **Jesús rixxi'e bittu dica eyon nari**

(Lc. 6:29-30)

<sup>38</sup> 'Lebi'i nna chiguaba binale rávana: "Gansi ttu benni ugüena iyya lo attu benni, unnuha nna ralhaguaba nua ugüecana iyya loni, benni cueana laya ttu benni nna ralhaguaba nua cueacana layani." <sup>39</sup> Ttiaca neti nna ria le: Bittu edú disale lo nu lä duta leniha. Nu unlale nna gansi nuxa galhina gui xxaga derechu guele, odequilale attu ladu qui galhina gui. <sup>40</sup> Gansi nuxa salhu'una lu lo uxtisi de runna cuana mixa guelha, begüeela nua itupa gabana guelha. <sup>41</sup> Nuxaba unna duelha guelu ujalu yua gueniha ttu kilómetro, lu nna bijala nua chupa kilómetro. <sup>42</sup> Nuxaba bixa innában lu nna begüee nua nu rinnabana, nu innába ganna na ttu bixa len lu nna bete ganna gueni.

### **Aquinri gue ca nu lä raca uyúcan ri**

(Lc. 6:27-28, 32-36)

<sup>43</sup> 'Lebi'i nna chiguaba binale rávana: "Aquinle gue ca benni gueri-na, gualutía di lele ca nu lä raca uyúcan le-na." <sup>44</sup> Ttiaca neti nna ria le: Aquinle gue ca nu lä raca uyúcan le-na, gualnnaba len Tata Do Iyyabaaha aca lanie ca nu riguecana iquile na. <sup>45</sup> Análiba nna acale xi'ini Tata gueri do iyyabaaha. Cumu Benna runie riria

tatubisa-na qui rudanie gue ca nu du tsee lequinna lhe ca nu bittu du tsee lequinna lhe. Anáguaba runie raca iyya gue ca nu runi nu dica ixuu lhe ca nu runi nu lä dica ixuu lhe.<sup>46</sup> Cumu gansi sunruba ca nu racaquinna guele-na raquinle guecani, lania nna tsa lägabi nu tsee dhíle gue nu runle-na. ¿Läba ganna anáguaba run ca güequixa ridí belhi deyya Roma?<sup>47</sup> Gansi sunruba ca benni guele-na rále padiuxi, ¿bi nu tsee nua runle runle anía? ¿Läba ganna anáguaba run ca benni bittu anca biani Tata Do Iyyabaaha?<sup>48</sup> Larcala nna lebi'i acale benni runi nu anca tsee, attiba Tata gueri do iyyabaaha anque Benni runi nu anca tsee.

**Jesús rule'e bi dica unri atti edá leri uteri ttu  
bixa len ca benni bittu te gueni**

**6** 'Gualudo cuidadu, bittu unle nu anca tsee aní lo benni sunruba qui iláquinna dequi lebi'i ancale benni runi nu anca tsee. Gansi anía runle nna tsa läga ute Tata guele do iyyabaaha nu tsee ralhale dhíle gue nu runle.

<sup>2</sup>'Larcala nna gansi chi betele ttu bixa len ca benni bittu te gueni, bittu tsequile udále tisa lo ca neda-na lhe lhe'e ca yo'o atta rudheti ca benni Israel ca tisa gue Tata Do Iyyabaaha lhe attiba runi ca nu ni lo ni tisaba runcana dequi runcana nu anca tsee. Lacana runcana aná qui inne tsee benni guecani, ttiaca neti ria nna unnuharba anca nu tsee ralhacana dhicana. <sup>3</sup>Ttiaca lu nna atti utelu ttu bixa len ca benni bittu te gueni, bittu aquinlu quixxi'enlu ni benni do tseeru lenluha. <sup>4</sup>Sigába bete nu uteluha. Tata guele do iyyabaaha nna de rilánie nu run gatsiluha nna gutebe nu tsee ralhalu dhílu.

**Jesús rule'e gaxasná inne ca benni len Tata Do Iyyabaaha  
(Lc. 11:2-4)**

<sup>5</sup>'Lebi'i nna gansi chi rinnele len Tata Do Iyyabaaha, bittu unle atti runi ca nu ni lo ni tisaba runcana rinnecana len Ben-na. Lacana nna atti rinnecana len Tata Do Iyyabaaha, tsitsiba nu runcana rise'e ranicana lhe'e ca yo'o atta rudhetiri ca tisa gue Ben-na lhe ca xitsi neda-na lhe qui iláni benni nu runcana. Neti ria le nna unnuhaba anca nu tsee ralhacana dhicana. <sup>6</sup>Ttiaca lu nna atti innelu len Tata do Iyyabaaha, beta'ala lhe'e yo'o gueluhu nna bottotte-na, atti unne belisa Tata gueri do iyyabaaha Benni tturbe due len lu lhe'e yo'oha.

Benniha nna de rilánie nu run gatsiluha nna gutebe nu tsee ralhalu dhílu.

<sup>7</sup> Atti innele len Tata Do Iyyabaaha, bittu sattibelhaba eyequi dacabale odettile tisa nu chi unneleha, unle attiba run ca benni bittu ancabiaquinna Tata Do Iyyabaaha. Cumu lacana racaquinna dequi de rinnexxattacana nna iyienin Benniha guecani. <sup>8</sup> Bittu unle atti run ca unná, cumu Tata guele do iyyabaaha nna atti deobali innábale len Ben-na, chila yue bixa reasinle. <sup>9</sup> Lebi'i nna aní innále atti innele len Tata Do Iyyabaaha:

Tata guetu do iyyabaa,  
ribequi xentu cuinalu cumu anca cuinalu Dios.

<sup>10</sup> Utá innabialu ri'itu.

Beni qui nu runtu yies lo yu-ni acana nu raca lelu aca,  
attiba raca iyyabaaha.

<sup>11</sup> Bete nu reasintu gotu ttu ttu sá.

<sup>12</sup> Uxí elha xen lasi gue nu lä anca tsee runtu lolu,  
cumu anáguuba ri'itu ridítu elha xen lasi gue ca nu runi nu lä  
anca tsee len ri'itu.

<sup>13</sup> Bittu ugüelhalu ixúyietu untu nu lä anca tsee.

Bodilá ri'itu lo ná nu xxegüiha.

[Cumu cuinalu nna satíaba ancalu Benni rinnabia lhe  
Benni ra xxeni leni lhe Benni ralha cue xeni le ttu dia lii lhe.

Amén.]

<sup>14</sup> Cumu gansi lebi'i ridíle elha xen lasi gue nu rughaca benni le, anáguuba Tata gueri do iyyabaaha, guadíguabe elha xen lasi guele.

<sup>15</sup> Ttiaca gansi lebi'i bittuba ridíle elha xen lasi gue nu rughaca benni le, bittuguuba dhi Tata gueri do iyyabaaha elha xen lasi gue ca tulha guele.

### Jesús rule'e gaxasná dica unri atti utte ubina lhe'eri

<sup>16</sup> Lebi'i nna gansi chi rutte ubina lhe'ele, bittu unle qui tsanni lo nu runle, attiba run ca nu ni lo ni tisaba runcana dequi ancacana nu runi nu anca tsee. Lacana nna runcana aná qui ttedaani benni dequi rutte ubina lhe'ecani. Neti ria le nna unnuhaba anca nu tsee ralhacana dhicana. <sup>17</sup> Ttiaca lebi'i nna gansi chi rutte ubina lhe'ele, gualquí lole lhe te xearu olhí iquile lhe <sup>18</sup> qui bittu ttedaani ca benni lebi'i nna rutte ubina lhe'ele, sinuqui suntteba Tata guele do

iyyabaaha Benni tturbe due len lebi'i yue gue nu runle. Benniha nna de rilánie nu run gatsileha nna gutebe nu tsee ralhale dhíle.

### **Jesús rule'e gaxasná unri qui gatta elha tsee gueri iyyabaaha**

(Lc. 12:33-34)

<sup>19</sup>'Bittu uttupaxxattale elha tsee guele yies lo yu-ni, cumu ni nna ru'ubabacana lhe ri'iyabacana cheni lhe rita'aba ubana rilánan cana lhe. <sup>20</sup>Nu unlale nna gualcua tsee elha tsee guele iyyabaaha atta bittu tsu'ubacana, atta bittuguaba i'iya chenicana lhe bittuguuba aca ga'a ubana lhanan cana lhe. <sup>21</sup>Cumu atta tua tsee elha tsee gueleha nna gue níaguuba rulaba lele.

<sup>22</sup>'Ca iyya lolha ancacana xiani rudani gue itúba cuerpu guelu. Gansi ca iyya lolha ancacana tsee, lania nna itúba cuerpu guelha duna lhe'e xieni. <sup>23</sup>Ttiaca gansi ca iyya lolha bittu anca tseecana, lania nna itúba cuerpu guelha duna lhe'e chulha. Gansi nu dica aca xieni guelha nna chulhala ancana, titialiga chulha anca lhi'u lhe'e lastoolu.

<sup>24</sup>'Läganu benni te aca gueni unna sina gue chupa ca nu banquinna na, cumu ttu nua aquinna gueni, attu nua nna utía di leni, o si udon a tisa gue ttu nua, attu nua nna cu'u ni'ani. Larcala nna läga aca ixuule lo sina gue Tata Do Iyyabaaha nianna udogualele gattaxxatta guele.

### **Jesús rule'e bittu ichacha iquiri gue nu reasinri**

(Lc. 12:22-31)

<sup>25</sup>'Larcala nna rpea le: Bittu ichacha iquile gue nu gole lhe gue nu i'iyale lhe qui aca banle, niguuba gue nu ucule lhe. ¿Läba ganna dacarla elha nabán guele atti nu role, aníaguuba cuerpu guele dacarla na attichula nu rucule? <sup>26</sup>Gualgüia gue ca binni requi lo bea-na. Ca unná nna läga rigu'ucana xua, bittuguuba rolapacana lhe bittuguuba rigúa tsee guecani lhe. Läquiga de nua nna Tata gueri Benni do iyyabaaha gua rutebe nu ro ca unná. ¡Adílaba lebi'i dacarlale atti ca binni-na! <sup>27</sup>¿Núle de ichachaba iquile nna unle isárule attu ura iqui de nu chi anca aca banle yies lo yu-ni?

<sup>28</sup>'Lebi'i nna ¿biacala richacha iquile gue nu ucule? Gualgüia gaxasná rixen ca iyya daa lhe'e ca yu-na. Ca unná nna läga runcana

sina, lä runguacana lari lhe.<sup>29</sup> Ttiaca neti ria le, niba Salomón nu uca nu rinnabiah, masquiba chi uttavaxatta gueni, tsa bittu udána ucu xo rule'e tsee gueni qui ule'ena atti rule'e ca iyya-na.<sup>30</sup> Gansi análi tsee runi Tata Do Iyyabaaha rule'e ca iyya daa ca lo yu-na, ca nu nasá ralicana, uxxedilaba nna chi tsiacana lo gui, ¡läba ganna adírlaba tsee uni Ben-na len lebi'i, ca benni bittu chi ria tsee leni!<sup>31</sup> Larcala nna bittu ichacha iquile gue bixa gole, niguaba gue bixa i'iyale lhe niguaba gue bixa ucule lhe.<sup>32</sup> Cumu gue iyába unní richacha iqui ca benni bittu ancabiani Tata Do Iyyabaaha, ttiaca lebi'i nna gua doba Tata guele benni do iyyabaaha, lee nna guayuxeabe bixa reasinle.<sup>33</sup> Lebi'i nna primero gualudo lele gualuni nu run ca benni rinnabiah Tata Do Iyyabaaha. Benniha nna gutebe iyába nu reasinle.<sup>34</sup> Larcala nna bittu ichacha iquile gue uxxeha, cumu uxxeha nna guacaba ichacha iquile gue nua. Ttuttu sába te nu ichacha iqui benni gueni.

### **Jesús rixxi'e bittu dica inne güeri gue ca benni**

(Lc. 6:37-38, 41-42)

**7** 'Bittu oquinna iquile anca benni nu te tulha gueni, qui bittu oquinna iqui Tata Do Iyyabaaha ancale nu te tulha gueni.

<sup>2</sup> Cumu attiguaba oquinna iquile anca benni nu te tulha gueni, aníaguaba un Tata Do Iyyabaaha len lebi'i. Loesi nu rudhacale adí benni, loesi unnuhaguaba odequi Ben-na guele.<sup>3</sup> ¿Biaca ridolu rugüialu libitsu yu'u lhe'e iyya lo betsilha, nianna bittu retábinlu gue yaga yu'u lhe'e iyya lolha?<sup>4</sup> ¿Gasná gálú ttu betsí loeslu: "Begüelha cueaya libitsu yu'u lhe'e iyya lolha", inqui lu nna análi de anca yaga yu'u lhe'e iyya lolha nna?<sup>5</sup> ¡Lu ancalu nu ni lo ni tisaba runi dequi ancalu nu runi nu anca tsee! Ulequixa yaga yu'u lhe'e iyya lolha, qui ilá tseenlu cuequili libitsu yu'u lhe'e iyya lo betsilha.

<sup>6</sup> 'Bittu udelhale nu anca le'a lo ca becu-na qui lä eyequicana goya'acan le ttuttíru itsucan le, bittuguaba udelhale lo ca cutsi-na ca iyya racalaa te lidhacani te guele, qui lä eyequicana utsutsa uleabacana iqui ca unná.

## **Gualnnaba len Tata Do Iyyabaaha nu reasinle**

*(Lc. 11:9-13; 6:31)*

<sup>7</sup> 'Gualinnaba len Tata Do Iyyabaaha, Benniha nna gutebe nu reasinle. Gualeguile nna gunbe eselinle nu reguilaleha. Gualnne ro'o yo'o, lee nna gunbe idhalcana guele. <sup>8</sup> Cumu iyába ca benni rinnaba, gua ridíba ca nua nu rinnabacana. Ca nu reguilaha nna gua reselbaquin nua nu reguilacana. Ca nu rinne ro'o puertaha nna gua ridhalbacana gue ca nua.

<sup>9</sup> ¿Nú benni nua ancana tata, gansi innába xi'inniha ttu ttaxtila, lana nna ttu ca iyya du'uya lo neda-na la ugüena nua? <sup>10</sup> ¿O innába nua ttu belha raca lhe'e inda, lana nna belha ra'aya lhe'eni lo yu la ugüena nua? <sup>11</sup> Inqui lebi'i ancalale nu lä du tsee leni nna gua rutebale nu tsee len ca xi'inle-na, adíla Tata gueri do iyyabaaha, guteba Ben-na nu tsee len ca benni innábacana nu reasaquinna lenie.

<sup>12</sup> 'Larcala, gualun len ca benni gaxasná raca lele uncana len lebi'i, cumu aná rá lo ca ley gue Tata Do Iyyabaaha, lo ca sitsi boca'ana ca benni uca profeta gue Ben-na lhe.

## **Jesús re: Gualga'a ro'o puerta güexxa-na**

*(Lc. 13:24)*

<sup>13</sup> 'Gualga'a ro'o puerta güexxa-na. Cumu puerta xeni-na lhe neda bata-na lhe richecana ca benni atta tsia nitticana. Ixeba ca benni rita'acana na. <sup>14</sup> Ttiaca puerta nu cheena ca benni atta gatta elha naban guecani ttu tsaba nna güexxaba anca ro'oni lhe suniba anca lo neda gueni lhe. Larcala nna ttu chuparba benni guaratti'acan na.

## **Jesús rixxi'e re: Udori cuidadu gue ca nu run lecani requi-na**

*(Lc. 6:43-44)*

<sup>15</sup> 'Gualdo cuidadu gue ca nu güen lasi rácana dequi ancacana profeta. Lacana rule'ecana attiba ttu carne'e tana, ttiaca attiba du le sagueo lä duta leni du lecani. <sup>16</sup> Lebi'i nna güeyon biabale ca unná atti ilenle gaxasná du lecani. Cumu läga dica edíri besuli lo ca ya yitsi-na, bittuguuba aca utee ca xubaya-na igu lhe. <sup>17</sup> Anáguuba iyába ca yaga tsee-na ribía nu xixxi tsee guecani, ttiaca nu bittu

ancana yaga tseeha nna lägabi nu xixxi tsee ribía gueni.<sup>18</sup> Läga aca cuia nu xixxi tsee gue ttu yaga nu bittu ancana yaga tsee, bittuguaba aca cuia nu xixxi bittu anca tsee gue ttu yaga tsee lhe.<sup>19</sup> Iyába yaga nu bittu ribía nu tsee gueni nna irúba nua qui tsiana lo gui.<sup>20</sup> Larcala nna güeyon biabale ca unná atti ilenle gaxasná du lecani.

<sup>21</sup> 'Läga iyá ca benni rá dequi neti anca Benni banatia cana, eta'acana atta rinnabia Tata Do Iyyabaaha. Sunruba ca benni rudo tisa gue Tata quia do iyyabaaha aca eta'acana nía.<sup>22</sup> Gansi chi bisía sá aca elha uxtisi gue ca benni se'e yies lo yu-ni, ixerucana gácana neti lania: "Lu ancalu Benni baninlu ri'itu, lálu bedettitu atti utixxi'atu ca tisa gue Tata Do Iyyabaaha, láguabalu bedettitu atti bebeatu ca be xxegüi yu'u lhe'e cuerpu gue ca benni lhe láguabalu bedettitu qui uca ixe ca milagru lhe."<sup>23</sup> Ttiaca neti nna lixxaba ecabia guecani upea cana: "Tsa läganu le ancabiatia. ¡Gualbi'etta atta dua ni, lebi'i, ca nu runi nu lä anca tsee!"

### Jesús rixxi'e gue yo'o nu udo lo iyya tta'a lenna nu udo lo yuxi

(Lc. 6:47-49; Mr. 1:22)

<sup>24</sup> 'Larcala iyába ca benni rienquinna ca tisa quia-ni, nianna rudocana tisa runcana nu ria, lacana ancacana attiba ttu unbiyuu te elha rieni gueni bedo yo'o gueni lo ttu iyya tta'a.<sup>25</sup> Atti uca iyya nna bixentteba ca yoo se'e nía, biríatteba ttu be idí guatsu'una itú iqui itú leni cu'e yo'oha. Ttiaca läga udána urixxina nua, cumu tsitsiba anca cimientu gue yo'oha xua lo iyya tta'aha.<sup>26</sup> Ttiaca ca benni rienquinna nu ria-ni, nianna bittu rudocana tisa uncana nu rpea cana, lacana ancacana attiba ttu unbiyuu nu bittu elha rieni gueni te bedo yo'o gueni lo yuxi.<sup>27</sup> Atti bisía iyyaha nna bixentteba ca yooha, biríatteba ttu be idí guatsu'una itú iqui itú leni cu'e yo'oha. Unnuha nna ubixxi lobana, tsaba dia latti itúbana.

<sup>28</sup> Atti uluxa unne Jesús ca tisa-ni nna ca benni se'e nía nna reban tsitsiabaquinna gue nu rule'e Benniha.<sup>29</sup> Cumu rule'enie cana attiba rule'e ttu benni rinnabia, bittu atti runi ca nu rule'e nu rá lo ca ley boca'ana Moisés.

**Jesús beonie ttu benni raca cuerpu gueni yiesusu te láni lepra**  
*(Mr. 1:40-45; Lc. 5:12-16)*

**8** Atti beadi Jesús lo lhilhiha nna ixeru benni denocane.<sup>2</sup> Nianna ubiga ttu unbiyuu raca cuerpu gueni nu anca attiba yiesusu te láni lepra atta du Jesús. Atti bedútteba xibini lo Benniha ráne:

—Benni bananie neti, gansi cuinalu aca lelu nna guaguabalu isagüe quia-ni.

<sup>3</sup> Jesús becatteba nee utane cuerpu gue nua, atti ráttebe na:

—Guaracaba lasia. ¡Beacatte nnanna!

Snaba lania nna bitúa yiesusu lána lepra raca unbiyuuhá.

<sup>4</sup> Laniala rá Jesús unbiyuuhá:

—¡Binarga! Tsa nuttu nu quixxi'enlu. Nu unlalu nna güia guatsá du lo bixxudiha qui ugüiana lu nna chiba beacalu. Bijatte úna nu daa lolu utelu gue Tata Do Iyyabaaha, beni attiba rába lo ca ley boca'ana Moisés, qui ugüia ca benni lu nna chiba bitúa isagüe gueluha.

**Jesús reonie ttu nu riben sina gue soldado beaca lasni Roma**

*(Lc. 7:1-10; Jn. 4:43-54)*

<sup>5</sup> Atti uta'a Jesús lhe'esi Capernaum, ttu soldado beaca lasni Roma, nu baninna ttu gayua (100) ca soldado bisínna lo Jesús, udú ditibana unnabana lo Benniha ráne:

<sup>6</sup> —Xa Tata, uncuiti riben sina quiahá nna tsaba te nua lhe'e yo'o quiahá de daa yatti itúbana. Tsitsiba ratena de yatterba nu rdacana.

<sup>7</sup> Jesús becabie gueni re na:

—Neti nna guaya'aba qui eyonia nua.

<sup>8</sup> Soldadoha nna becabina rána:

—Xa Tata, neti nna lägabi elha ralha ga'alú lhe'e yo'o quiahá. Niba na dulu, care'aba ttu tisa unnee nna nu riben sina quiahá nna eyacabana. <sup>9</sup> Cumu neti nna ancaguaba nu rudo tisa gue ca nu rinnabiaciona neti, anágua ba rinnabiaguaba ca soldado quia-na lhe. Atti rpea ttu ca unná: "Güia nía", tsibunna. Atti rpea attuna: "Utá nii", gua ritabana. Atti runia mandadu nu riben lo sina quia-na bixa unna unba nua nu upea na.

<sup>10</sup> Atti bienin Jesús nu rá nua nna bebanbanie gue nua. Laniala bodequi loe re ca benni dia denalha:

—Neti nna gualíbatia ria: niba ttu ca benni quia anca benni Israel bittu chi guatt'iaya ria tsitsi leni atti ria le unbiyuu-ni.

<sup>11</sup> Neti unní ria le, ixeru benni dittu daa daca atta riria bisa-na, daca atta radi bisa-na lhe ebíacana ro'o mexa qui edí baacana ttu elha go tsee len Abraham lhe Isaac lhe Jacob lhe gansi chi bisía sá innabia Tata Do Iyyabaaha. <sup>12</sup> Ttiaca ca nu ralhacana cuiacana nía, ca benni chi ga'ana innabia Tata Do Iyyabaaha, cueabe cana udelhe cana lhe'e atta anca chulhaha, atta cuestanca lhe goni lo layacani lhe.

<sup>13</sup> Laniala rá Jesús soldado gue Romaha, nu banani adí ca soldadoha:

—Beyya. De güia lelu güeyacaba uncuitiha nna aníaba aca. Uncuiti riben sina gue soldadoha nna snatteba lania beacana.

### **Jesús beonie nan gue nuila gue Pedro**

(*Mr. 1:29-31; Lc. 4:38-39*)

<sup>14</sup> Jesús güiattebe lhe'e yo'o gue Pedro. Nía bilánie nan gue nuila gue Pedro tebi lo ta'a yu'ubi xilhá. <sup>15</sup> Lee nna utanattebe ná bi'iniha. Xilháha nna beríattebana latibi. Bi'iniha nna guadhattebabí, betebi nu go Benniha.

<sup>16</sup> Atti chi dia raquela nna uchetteba ca benni ixeru ca nu yu'u be xxegüi lhe'e cuerpu guecani lo Jesús. Benniha nna care'aba leni ttu tisa bebequie ca be xxegüiha, beonie iyába ca nu raniha lhe.

<sup>17</sup> Anía uca qui guaxxína nu rá ca tisa utixxi'a profeta Isaías atti rábi: “Bennihaba becxxúa cue'e ca isagüe gueriha, utúe iyába nu rateri loni lhe nu rdacari lhe.”<sup>a</sup>

### **Ca benni raca lecabí sanalhacabi Jesús**

(*Lc. 9:57-62*)

<sup>18</sup> Atti biláni Jesús attulade re ca benni chi bebi'a nocane, benttebe mandadu ca bi'ini rudheti ca tisa rule'e tsia lencabi Benniha attu ladu gue indattooha. <sup>19</sup> Ttu ca nu rule'e nu rá lo ca ley boca'ana Moisés, ubigana rána Jesús:

—Maestro, neti raca lasia etenalha lu gaxaba ladu tsialu.

---

<sup>a</sup> **8:17** Isaías 53:4

<sup>20</sup> Jesús becabie re na:

—Ca beda-na guasiaba liscani gaxa reta'acana, ca binni-na lhe gua siaba xcuadi guecani, ttiaca neti Benni unbiyuu daa iyyabaaha läga anca gaxa quixxa iquia.

<sup>21</sup> Attu ca nu rudheti ca tisa rule'e Benniha nna ráne:

—Benni banani neti, begüeelhaxa neti eyya'aya sacatsia tata quiahá, lenla nna etenalha lu.

<sup>22</sup> Jesús becabie re nua:

—Begüelha ca nu anca attiba nu yatti lo Tata Do Iyyabaaha ucatsicana ca nu yatti guequinna. Lu nna utá betteno neti.

### **Jesús benie bebe si beha lhe indattooha lhe**

(*Mr. 4:35-41; Lc. 8:22-25*)

<sup>23</sup> Laniala nna uta'a Jesús lhe'e barcoha. Ca bi'ini rudheti ca tisa rule'e nna diaguabacabi len Benniha. <sup>24</sup> Ttiaca tturba biríaru ttu iyya be idí uyu'uná lo indattooha. Indattooha nna udulítteba loni, tsaba chi ruttona iqui barcoha, ttiaca Jesús tebe ti'edhie. <sup>25</sup> Nianna güiatteba ca bi'ini rudheti ca tisa rule'e Jesús guadibáncane rácane:

—¡Benni banani ri'itu, bodilháchi ri'itu qui chi diari rettiri lhe'e inda-ni!

<sup>26</sup> Jesús becabie re:

—¿Biaca rasixxattinle? ¿Si itú ttuaba bittu chi ria tsitsi lele neti?

Laniala guadhattebe bedhaca dise beha lhe indattooha lhe. Nianna siba beacatteba lo indattooha. <sup>27</sup> Ca bi'iniha nna rebantsitsiabaquinbi rácabi:

—¿Nú benni bi'ini du-ni? Nuarca axtaba be-na lhe indattoo-na lhe rudocona tisa guee.

### **Jesús bebequie ca be xxegüi yu'u lati chupa ca unbiyuu**

(*Mr. 5:1-20; Lc. 8:26-39*)

<sup>28</sup> Atti bisína Jesús attu ladu gue indattooha daca lo yu gue yiesi te láni Gadara, lhe'e atta sia ca baaha biría chupa ca unbiyuu yu'u be xxegüi lhe'e cuerpu guecani guatsácana Jesús. Ca unnuha nna tsitsiba de nu runcana, larcal a tsa läganu ritena lo neda te nía.

<sup>29</sup> Lacana nna uresi'attebacana rácana:

—¿Bittu ettega'a guelu len ri'itu, Jesús, Xi'ini Tata Do Iyyabaaha?  
 ¿Si dachilu qui utelu elha disa guetu, inqui chi isíala sá atti dhítu  
 elha disa nna?

<sup>30</sup> Gaxxa gaba nía yu'u ixeru ca cutsi go. <sup>31</sup> Ca be xxegüiha nna  
 bencana ruegu lo Jesús rácane:

—Gansi ebeabalu ri'itu nna begüeelhachi tsiatu qui eta'atu lhe'e  
 ca cutsi-na.

<sup>32</sup> Jesús becabie re cana:

—Gualtsia.

Ca be xxegüiha nna beríattecacana lhe'e cuerpu gue ca  
 unbiyuuh, atti uta'attebacana lhe'e ca cutsiha. Iyába ca unnuha  
 nna bigaattebacana diacana bitoetticana ro'o ttu belha'a daa nía  
 biyinnacana lhe'e indattooha. Níaba utti ca nua de gopicana inda.

<sup>33</sup> Ca nu rapa ca cutsiha nna bigaattebacana deyyacana lhe'e  
 yiesiha. Atti chi besincana nna utixxi'attebacana gue iyába nu  
 chi uca, gue nu uca len ca benni uyu'u be xxegüi lhe'e cuerpu  
 guecaniha lhe. <sup>34</sup> Laniala nna iyába ca benni se'e lhe'e yiesiha  
 güiacana atta du Jesús. Atti biláquinna Benniha nna benttebacana  
 ruegu loe qui erié lo yu guecaniha.

### Jesús beonie ttu unbiyuu daa yatti ni'a náni

(Mr. 2:1-12; Lc. 5:17-26)

**9** Laniala beopi Jesús lhe'e barcoha, betee lo indattooha belhee  
 attu ladu, qui besine lhe'e yies guee. <sup>2</sup> Nía bisín lencana ttu  
 benni xua lo ttu breta daa yatti ni'a náni lo Jesús. Atti biláni Jesús  
 gua riaba le ca unnuha dequi guadábe eyonie nua, lania la re nu  
 daa yatti ni'a nániha:

—¡Tsitsi beni, xi'into! Chiba uxía elha xen lasi gue ca tulha  
 guelha.

<sup>3</sup> Nianna ttulhe ca nu rule'e nu rá lo ca ley boca'ana Moisés,  
 belabatteba lecani rácana: “Unbiyuu du-ni nna rinne güebunna gue  
 Tata Do Iyyabaaha rána aná.” <sup>4</sup> Ttiaca Jesús yuxabe nu rulaba le  
 ca nua, nianna re cana:

—¿Biaca rulaba lele nu bittu anca tsee? <sup>5</sup> ¿Bi nua nu sattiru  
 inne ttu benni? ¿Si innána: “Chiba uxía elha xen lasi gue ca tulha  
 guelha”, aca? ¿Si innána: “Guadha nna udátte”, aca? <sup>6</sup> Quitti uyúle

nna neti Benni unbiyuu daa iyyabaaha, te elha ra xxen le quia yies lo yu-ni qui dhia elha xen lasi gue ca tulha gue ca benni.

Nianna re nu daa yatti ni'a nániha:

—Guadha nna bodaxxutte breta xualu loenna beyyatte lhe'e yo'o gueluha.

<sup>7</sup> Nu daa yatti ni'a nániha nna guadhatteba nua deyyana lhe'e yo'o gueniha. <sup>8</sup> Atti bilen ca benni se'e nía nu ucaha nna bebanhabaquinna. Nianna ulequi xenttebacana Tata Do Iyyabaaha de bete Benniha elha rinnabia gue ca benni qui eyoncana ca nu rani.

### Jesús uxie Mateo qui sanone

(*Mr. 2:13-17; Lc. 5:27-32*)

<sup>9</sup> Atti chi deyya Jesús deyu'e neda nna biláttebanie neti, láya Mateo, doa atta ribía ca nu ruquixacana ca benni belhi nu deyya leni nu rinnabia do Roma. Jesús nna ráttebe neti:

—¡Utá, betteno neti!

Neti nna udulítteba diaya len Benniha.

<sup>10</sup> Atti do Jesús go etta lhe'e yo'o quia, níaguaba bisína ixeru ca güequixa lhe adírba ca nu daa tisa guecani ancacana nu runi nu lä anca tsee lhe usiacana ro'o mexa atta do Jesús lenie ca benni rudheti ca tisa rule'e. <sup>11</sup> Ttiaca atti biláni ca benni fariseo, unnaba tisattebacana ca benni rudheti ca tisa rule'e Benniha, rávana ca bi'iniha:

—¿Biaca ro Benni rule'enie le-na etta leni ca güequixa-na lhe len ca nu runi nu lä anca tsee-na lhe?

<sup>12</sup> Atti bienin Jesús nu rá ca nua nna ráttebe cana:

—Ca benni bittu rani-na, lägabi reasaquinna nuxa unna cana ramedi. Ca nu rani-na liba reasaquinna nu eyonna cana. <sup>13</sup> Nu unlale nna gualeyya gualuni qui ttedeenle bixa dia le Tata Do Iyyabaaha inne atti re: “Neti nna raca lasia satúa lele ca benni, läriga gualutti ca nimala qui utele úna lo becoa quia.”<sup>a</sup> Cumu neti nna läga delha yies lo yu-ni qui gaxia ca nu runi nu anca tsee qui odú xiyyancana. Ca nu runi nu lä anca tsee-na liba raxia qui odú xiyyancana odaxxucana neda gue Tata Do Iyyabaaha.

---

<sup>a</sup> 9:13 Oseas 6:6

## Rinnaba tisacana Jesús gue nu rutte ubina lhe'ecani

(Mr. 2:18-22; Lc. 5:33-39)

<sup>14</sup> Ca benni rudheti ca tisa rule'e Juan bi'ini rugadi indaha nna ubigacabi lo Jesús rácabi Benniha:

—Ri'itu nna lento ca benni fariseo-na, satíaba rutte ubina lhe'etu. ¿Biacala ca benni rudheti ca tisa rule'elu-na, bittu rutte ubina lhe'ecani?

<sup>15</sup> Jesús becabittebe guecani re:

—¿Si gua dica uxxúa lari yadhi iqui ca benni biyaxi tse'ecana atta aca laní gue ca nu utsá nácani, gansi níaba sna doba len lacana unbiyuu nu utsá nániha? Ttiaca chi isía sá atti itúa unbiyuu utsá nániha len lacana, laniarguaba nna cu'u ubina lhe'e ca nu se'e nía.

<sup>16</sup> 'Nuttuguaba nu benni te regu'una saro'o lari cubi atta bisú gue xo yaxxu gueniha. Cumu lari cubiha nna eyoba lo nua. Lania nna utse'e loba nua lari yaxxuha, atta bisúha nna adíla xxeni aca nua lania. <sup>17</sup> Nuttuguaba nu riga'ana vinu cubi lhe'e ttu yieti yaxxu nu rixuu attiba ttu re'e. Cumu vinu cubiha nna unba nua isú yieti yaxxuha gansi chi dia nua ralana. Lania nna ilalba vinuha, ise'eloguaba ca yietiha lhe. Larcala nna lhe'e yieti cubi liba tta'a vinu cubiha, lania nna läga tsia latti vinuha lhe yietiha lhe.

## Jesús beonie ttu nuila, benie beacani xi'iniunná Jairo lhe

(Mr. 5:21-43; Lc. 8:40-56)

<sup>18</sup> Laca du Jesús rinnee leni ca benni rudheti ca tisa rule'e Juan, bisíntteba ttu ca nu anca nu lo gue ca benni Israel bedú xibini lo Jesús. Nianna rána Benniha:

—Bechitte utti xi'iniunnáya. Ttiaca gansi lu italu uxxúa nálu iquini nna eyacabinna.

<sup>19</sup> Jesús udulíttebe die denoe unbiyuuh lenie ca benni rudheti ca tisa rule'e.

<sup>20</sup> Nianna ttu nuila chi uca ts'i'inu ida yu'una isagüe rulalna reni, ubigattebana daca cu'e Jesús qui uca bedaxxuna ro'o xo Benniha, <sup>21</sup> cumu belaba leni rána: “Gansi dhaba sattana ladiba ro'o xo Ben-na, lania nna güeyacaba.” <sup>22</sup> Jesús bequittebe begüie lo nuilaha, nianna re na:

—¡Tsitsi beni, xi'ini! Cumu de güia lelu guadába eyonia lu, nuarca beacalu.

La laniatteba nna beaca nuilaha.

<sup>23</sup> Atti bisíni Jesús lhe'e yo'o gue nu anca nu lo gue ca benni Israel nna biláttebanie ca benni chi se'e güecuesi lhe ca benni se'e ubesi lhe. <sup>24</sup> Nianna re ca nua:

—Gualbiatta nii, cumu läga utti uncuiti-na, suntteba ti'edhi unná.

Ca benni se'e nía nna bedacalaquinna gue Benniha. <sup>25</sup> Ttiaca dequide chi bebeacana ca benni se'e nía, uta'atteba Jesús atta te uncuitiha, atti bedaxuttebe ná nua. Uncuitiha nna guadhattebana. <sup>26</sup> Nianna itúba ca nía bina ca benni gue nu beni Benniha.

### **Jesús beonie chupa ca nu xua locani**

<sup>27</sup> Atti chi bería Jesús nía, chupa ca benni xua locani ribesi'acana denocana Benniha, rácana:

—¡Benni datía David, guatúachi lelu ri'itu!

<sup>28</sup> Atti chi besina Jesús lhe'e yo'oha nna ubigatteba ca nu xua loniha loe. Nianna unnaba tisattebe cana re cana:

—¿Si gua ria lele guadaya eyonia le?

Ca unnuha nna rácana:

—Guadábalu eyonlu ri'itu, xa tata.

<sup>29</sup> Laniala nna utane iyya lo ca nua, nianna re cana:

—Cumu de güia lele güeyocabale nuarca eyocabale.

<sup>30</sup> Ca iyya lo ca unnuha nna bealittebacana. Laniala nna tsitsiba belisa Jesús cana re cana:

—Gualun duelha qui tsa nuttu nu unana gue nu uca-ni.

<sup>31</sup> Ttiaca cuentusiba beríacana nía, utixxi'attebaquinna iyába ca benni se'e itúba lo yuha gue nu beni Jesús.

### **Jesús beonie ttu benni ancana biría**

<sup>32</sup> Sunruba chi bería ca benni uca nu xua loniha nía, attirba chi bisín leni ca benni ttu unbiyuu ancana biría de yu'u be xxegüi lhe'e cuerpu gueni. <sup>33</sup> Cuantusiba bebea Jesús be xxegüi yu'u lhe'e cuerpu gue unbiyuuhha nna unnettebana. Ca benni se'e nía nna tsitsiba rebanquinna nianna ráttebacana:

—Ni ttu libe bittu chi bilenri aca loesi nu uca-ni, lo yu gue Israel-ni.

<sup>34</sup>Ttiaca ca fariseo nna rácana:

—Nu rinnabia ca be xxegüi-nba begüeena unná derechu qui ebeana ca be xxegüi yu'u lhe'e cuerpu gue ca benni.

**Jesús rixxi'e ixeba ca benni se'e reasaquinna  
unacana ca tisa gue Tata Do Iyyabaaha**

<sup>35</sup>Iyába lhe'e ca yiesi xeni lhe lhe'e ca lhe'esi lhe requi Jesús rule'enie ca benni, lhe'e ca yo'o atta rudheti ca benni Israel ca tisa gue Tata Do Iyyabaaha lhe. Lee nna rixxi'enie ca benni se'e nía ca tisa tsee gue gaxasná rinnabia Tata Do Iyyabaaha, reonie ca benni yu'u iyáloba isagüe lhe. <sup>36</sup>Atti biláni Jesús ixeru ca benni se'e nía, lee nna besi'ittebanie cana cumu se'e si'icana de suntterba lacana se'e, attiba carne'e lä caa nuxa uyúncana. <sup>37</sup>Laniala re ca bi'ini rudheti ca tisa rule'e:

—Ixeба benni se'e reasaquinna unacana ca tisa gue Tata Do Iyyabaaha, ttiaca ttu chuparba benni se'e rixxi'acana ca tisa-na.

<sup>38</sup>Larcala nna gualinnaba len Tata Do Iyyabaaha Benni beaca guee sina-na, qui idhelhe benni tsia sattixxi'aquinbi ca benni ca tisa gue Ben-na.

**Jesús becuee ca benni tsí'inu udheti ca tisa rule'e**

(Mr. 3:13-19; Lc. 6:12-16)

**10** Laniala nna uxi Jesús ca bi'ini tsí'inu rudheti ca tisa rule'e. Lee nna begüee ca bi'iniha derechu qui ebeacabi ca be xxegüi yu'u lhe'e cuerpu gue ca benni, qui eyoncabí ca benni yu'u iyáloba isagüe lhe ca benni rilheni lhe. <sup>2</sup>Ni dia lá ca benni tsí'inu bedheti ca tisa bele'e Jesús:

Primertteba Simón bi'ini láguaba Pedro,

Andrés betsi bi'iniha lhe

Jacobo lenbi betsibi Juan ca bi'ini beaca xi'ini Zebedeo lhe

<sup>3</sup>Felipe lhe Bartolomé lhe

Tomás lhe

Mateo bi'ini uca güequixa lhe

Jacobo xi'ini bi'ini lá Alfeo lhe

Lebeo bi'ini láguaba Tadeo lhe

<sup>4</sup> Simón bi'ini nutsa ca nu te lácani Zelote<sup>a</sup> lhe  
Judas Iscariote nu betena Jesús las ná ca nu betticana  
Benniha lhe.

<sup>5</sup> Ca bi'ini ts'i'inu-ni (12) nua udhelha Jesús, nianna re ca bi'iniha:  
—Bittu tsiale atta se'e ca nu bittu anca benni Israel. Bittuguaba  
ga'ale lhe'e ca yiesi gue ca benni Samaria lhe. <sup>6</sup> Sinuqui gualtsiala  
atta se'e ca benni Israel, cumu lacana ancacana attiba carne'e  
biganna. <sup>7</sup> Gualtsia, gualquixxi'aquinna gualgás cana: “Chi daa  
ribiga isía sá innabia Tata Do Iyyabaaha.” <sup>8</sup> Eyonle ca benni rani lhe  
ca benni raca nu anca attiba yiesusu te láni lepra lhe unle eyacani  
ca benni chi utti lhe ebeale ca be xxegüi yu'u lhe'e cuerpu gue ca  
benni lhe. Lebi'i nna bittu uquixale gue nu unle, cumu neti nna  
cuentaba betea elha rinnabia quia-na len lebi'i, lägabi bequixale.

<sup>9</sup> Bittu ujale oro lhe plata lhe cobre lhe. <sup>10</sup> Bittuguaba ujale  
chuba yu'u yetta gue neda guele lhe niguaba attu cue xole lhe  
niguaba attu cue guaracha guele lhe niguaba garroti lhe. Cumu nu  
riben sinaha nna ralhaba nua utevana nu gona.

<sup>11</sup> Gansi chi uta'ale lhe'e ttu yiesi o lhe'e ttu lhe'esi, gualeguila  
gaxa do ttu benni nu dica uxten lele na, níaba gualtse'e lhe'e yo'o  
gue nua, axta liba gansi chi bedále eríale nía. <sup>12</sup> Atti ga'ale lhe'e  
yo'oha nna gualnnaba len Tata Do Iyyabaaha aca lanie ca benni se'e  
nía. <sup>13</sup> Gansi ca benni se'e nía ralhacana aca len Tata Do Iyyabaaha  
cana, acaba nu unnabaleha, ttiaca gansi bittuba ralhacana dhicana  
nu unnabaleha nna eyequiba elha tseeha len lebi'i. <sup>14</sup> Gansi se'e nu  
bittu ulabinle, nu bittu udo nagani guele lhe atti eríale lhe'e yo'oha  
o lhe'e yiesiha nna ucuibittele biste yu anca ni'aleha.<sup>b</sup> <sup>15</sup> Neti nna  
gualíbatia ria, gansi chi bisía sá uni Tata Do Iyyabaaha elha uxtisi  
gue ca benni se'e yies lo yu-ni, xxenirla anca elha disa utee gue ca  
benni se'e lhe'e ca yiesi atta bittu ulabican le attichula elha disa  
utee gue ca benni use'e lhe'e yiesi Sodoma len Gomorra.<sup>c</sup>

<sup>16</sup> Neti ridhelha le attiba ttu nu ridhelha carne'e lagüi ca sagueo.  
Denuala nna listu gualuni attiba ttu belha, ttiaca gualaca tana  
attiba ttu becha. <sup>17</sup> Tsitsi gualdo cuidadu, cumu udaxxu ca benni le  
sase'ecan le lo ca uxtisi-na. Ca unnná nna quincan le lhe'e ca yo'o

<sup>a</sup> **10:4** Zelote te láni ttu cue ca benni bittu uca uyúcana ca nu rinnabia lo yu atta  
use'e ca nu Israel, cumu ancacana benni dittu, delába ca nu beaca lascani yiesi te  
láni Roma.      <sup>b</sup> **10:14** Cumu unnuha ule'e lo läga be'o le Tata Do Iyyabaaha nu  
ben ca nua.      <sup>c</sup> **10:15** Génesis 19

atta rudheti ca benni Israel ca tisa gue Tata Do Iyyabaaha.<sup>18</sup> Lo ni'a quia nna ichecanle lo ca nu lo gue ca uxtisi-na lhe lo ca nu rinnabia xeni-na lhe. Aníaliba nna qui aca quixxi'enle ca nua ca tisa quia-ni, quixxi'aguabinle ca nu bittu anca benni Israel lhe.<sup>19</sup> Ttiaca gansi chi bedaxxu ca benni le qui sase'ecan le lo ca uxtisi-na, bittu ichacha iquile gue bixa innále lhe gue gaxasná ecabile lhe. Cumu gansi chi bisía ura innele nna guteba Tata Do Iyyabaaha tisa innele.<sup>20</sup> Cumu läga lebi'i nua innee, sinuqui Espíritu gue Tata guele do iyyabaaha, Benni yu'u lhe'e lastoole-nba, Benniha innee cuenta guele.

<sup>21</sup> 'Lania nua, la betsiba ttu benni utena attu betsiniha las ná ca nu uttican na, unnuhaguuba uni ca tata len ca xi'incani lhe ca xi'incaniha nna eyequicana usia lecani ca tata guecaniha, nianna uncana qui gatti ca nua.<sup>22</sup> Lebi'i nna iyába ca benni bitturu aca uyúcan le lo ni'a quia, ttiaca benni dhana dhu tsitsina lo neda quia axta atti isía sá gattina, unnuha liba lhána, bittu tsia nittina.<sup>23</sup> Gansi chi bería lacana le lhe'e ttu yiesi, gualuxxunni gualtsia lhe'e attu yiesi subi. Neti ria le nna läga chi bea ca yiesi se'e lo yu gue ca benni Israel tsiale lhe'ecani atti chi isía sá esíaya, neti Benni unbiyuu daa iyyabaaha.

<sup>24</sup> 'Nu rudhetiha nna läga ancana nu yuru atti benni anca maestro gueniha. Niguaba nu riben sinaha bittu ancana nu raru xxeni leni atti benni bananie na.<sup>25</sup> Care'aba e'eyu benni rudhetiha acana atti anca maestro gueniha. Anáguaba benni ren sina lhe care'aba e'eyuna acana atti anca benni bananie na. Inqui neti ancala tata nna rácan dequi anca nu xxegüi,<sup>a</sup> ¿titialiga lä innecana guele, lebi'i, ca benni anca xi'inia?

<sup>26</sup> 'Larcala nna tsa bittu gasinle ca benni. Cumu tsa lägabi te ttu bixa te gatsi, lä tsanni lobana, niguaba ttu nu raca sigá, lä unaba benni-na lhe.<sup>27</sup> Nu rixxi'aya suntteba len lebi'i nna gualquixxi'a na len adí benni, nu rixxi'atia le sigába ro'o nagale nna gualiría gualquixxi'a na idisa qui una benni-na.<sup>28</sup> Bittu gasinle ca nu utticana lebi'i yies lo yu-ni, cumu ca unná sunruba cuerpu guele-na dhacana utticana, ttiaca läga aca utticana alma guele-na. Gualgásini Benni aca guee utse'e loe cuerpu guele-na lhe alma guele-na lhe atta lexúaha.

---

<sup>a</sup> **10:25** Lo yitsi-ni rá nu xxegüi, lo adí ca yitsi nna rá Beelzebú.

<sup>29</sup> '¿Si läba ganna len tturba belhi nu bittu tte lidhacani te rito'o chupa ca binnito? Läquiga de nua nna ni ttu ca unná bittu rinnacana lo yu, gansi bittuba aca le Tata guele do iyyabaaha.

<sup>30</sup> Anáguba lebi'i, axta ca itsiquile-na coa ttuttucana babani Benniha. <sup>31</sup> Larcala nna bittu gasinle, cumu lebi'i nna dacarlale atti ixe tsitsia ca binni-na.

<sup>32</sup> 'Nuxaba benni dhi ro'oni gualíba ria leni neti aní lo benni, anáguba neti, dhíguaba ro'a aní lo Tata quia do iyyabaaha gualíba ria leni neti. <sup>33</sup> Ttiaca benni bittu dhi ro'oni aní lo benni gualíba ria leni neti nna anáguba neti bittuguaba dhi ro'a gualí ria leni neti lo Tata quia do iyyabaaha.

<sup>34</sup> 'Lebi'i nna bittu aquinle ga delha yies lo yu-ni qui tse'e tsee len loes ca benni. Läga delha neti qui tse'e tsee ca benni, daba neti qui lo ni'a quia nna itilha len loes ca benni. <sup>35</sup> Cumu delhaba qui utilha ca benni, unbiyuuh nna eyequinona tata gueniha, nulaha nna eyequinona nan gueniha, xolisihha nna ttilha lenna nan gue unbiyuu gueniha. <sup>36</sup> Larcala nna la ca nu se'e lhe'e lislehaba bittu aca uyúcan le.

<sup>37</sup> 'Benni racaruinna gue tata nan gueni attichula neti nna lägabi elha ralha nua acana benni quia. Nu racaruinna gue xi'in biyuuniha o gue xi'iniunnániha attichula neti nna lägabi elha ralha nua acana benni quia. <sup>38</sup> Benni bittu dhielhana uchíana lo nu satena lo ni'a quia, attiba ttu benni nuja crusi gueni diana atta ttána lo nua, unnuha nna bittuguaba bi elha ralhana acana benni quia. <sup>39</sup> Benni uni odilá elha nabani gueni nna unnittiba nua elha nabani gueni, benni unnitti elha nabani gueni lo ni'a quia nna aca banba nua ttu dia lii lo Tata Do Iyyabaaha.

<sup>40</sup> 'Benni ulabina lebi'i nna netiba nua rulabi nua, benni ulabina neti nna benni udhelhe netihaba benniha rulabina. <sup>41</sup> Benni ulabina ttu benni anca profeta, de anca bi'iniha profeta nna loesi nu tsee dhi bi'iniha guaba dhína. Benni ulabina ttu benni runi nu anca tsee, de anca bi'iniha benni runi nu anca tsee nna loesi nu tsee dhi bi'iniaguaba dhína. <sup>42</sup> Nuxaba benni utena masquiba ttu xigaru inda dilha len ca benni bittu ra xxeni leni se'e-ni nna de ancacana benni rudheti nu rule'a nna neti nna gualíbatia rpea le, unnuha nna guadíba na nu tsee ralhana dhína gue nu bennaha.

**11** Dequide ulhuxa utixxi'en Jesús ca bi'ini tsi'inu rudheti ca tisa rule'e gue bixa uncabi, bedáttebe nía die lhe'e adí ca

lhe'esi se'e itúba nía qui quixxi'e lhe ule'enie lhe ca benni ca tisa gue Tata Do Iyyabaaha.

**Juan bi'ini rugadi indaha udhelhabí  
ca benni sannaba tisacabi Jesús**

(Lc. 7:18-35)

<sup>2</sup>Juan bi'ini rugadi indaha nna lisiyyaba tebi, atti binabi gue iyába nu run Jesús. Laniala nna udhelhabí ca bi'ini rudheti ca tisa rule'ebi <sup>3</sup>qui tsiacabi sannaba tisacabi gácabi Benniha:

—¿Si cuinalu nua Cristu benni chi ga'ana isía? ¿Si cuedabatu attu benni subi, aca?

<sup>4</sup>Laniala becabí Jesús re ca bi'iniha:

—Gualeyya nna gualquixxi'ani Juan gue nu chi begüiale runia, gue nu chi bieninle lhe. <sup>5</sup>Gualgás na: ca nu xua loquinna riláquinna ca nu xi-na ridacana lhe ca nu raca cuerpu guecani nu anca attiba yiesusu te láni lepra reacacana lhe ca nu cuesu-na rienquinna lhe ca nu yatti-na reacaquinna lhe ca benni bittu te guecani chi runacana ca tisa tsee gue gaxasná rodilá Tata Do Iyyabaaha ca benni lhe.

<sup>6</sup>¡Carbáru ca benni bittu rudhequicani ria lecani neti lo ni'a gue nu riláquinna runia!

<sup>7</sup>Atti chi güequi ca benni udhelha Juan, udulotteba Jesús utixxi'enie ca benni se'e nía gue Juan. Nianna re:

—Atti biríale diale güegüia Juan lo yu bisiha, ¿gasná anca benni ribedale ilenle? ¿Si ribedabale ilenle ttu unbiyuu bittu du tsitsi len nu rulaba leni attiba ttu yittixtila dia dedaaba len be-na? <sup>8</sup>Gansi läba anía anca, ¿núla biríale begüiale? ¿Si biríale qui ugüiale ttu unbiyuu nucu xo tsee gueni ttu nu daca yaxi? Lebi'i nna gua yubale, ca nu nucu xo tsee guequinna lhe'e yo'o atta do nu rinnabia xenin liba se'ecana. <sup>9</sup>¿Núla nua biríale begüiale ganna? ¿Si ttu benni anca profeta? Neti ria le, gualíba. Juan ancabi bi'ini ra xxenru lebi atti ttu benni anca profeta. <sup>10</sup>Gue Juan-ni nua rinne Tata Do Iyyabaaha lo ca sitsi guee-na atta rulise Xi'linie re Benniha:

Neti idhelha ttu benni nneruna lolu qui quixxi'ana ca tisa quia-ni.

Bi'iniha idhalbi neda guelu.<sup>a</sup>

---

<sup>a</sup> 11:10 Malaquías 3:1

<sup>11</sup> Neti ria, delo iyá ca benni chi uli yies lo yu-ni, läga chi biría ttu benni ra xxenru leni atti Juan bi'ini rugadi inda-na. Ttiaca benni bittu anque nu ra xxeni leni sela ca benni rinnabia Tata Do Iyyabaaha, Benniha la anque nu ra xxenru le atti Juan.

<sup>12</sup> 'Desdeba atti udulo Juan bi'ini rugadi indaha rixxi'abi ca tisa gue Tata Do Iyyabaaha axta nnanna ixe ca benni runcabi duelha iselacabi ca benni rinnabia Tata Do Iyyabaaha, masquiba bicaxa ratecabi. Ttiaca sunruba ca benni re tsitsi lecabí gua ridacabi riselacabi ca bi'in-na. <sup>13</sup> Cumu iyába ca benni uca profeta lhe ca ley boca'ana Moisés lhe bedaa atti bisía Juanba, utixxi'acabi gue isía sá innabia Tata Do Iyyabaaha. <sup>14</sup> Gansi lebi'i raca lele tsia lele gue nu ria-ni nna Juanba bi'iniha ancabi Elías bi'ini chi ga'ana esía.<sup>a</sup>

<sup>15</sup> Atta gua rudo nagale gue nu ria, gualun duelha qui sadú lele.

<sup>16</sup> '¿Nú tua ttu innía anca attiba ca benni se'e nnanna? Lacana ancacana attiba ca unto ribía atta raca i'lya-na, ribesi'en loescani rácana: <sup>17</sup> "Chi becuestu ca pipi guetu-ni nna bittu beya'ale. Chiguaba bilhatu nu rulha ca benni gue ca nu yatti-na lebi'i nna bittuguuba uresle." <sup>18</sup> Ria aná cumu bisía Juan bi'ini bittu ri'a robi, lebi'i nna rálale: "Nu xxegüihaba du leni unná." <sup>19</sup> Bisíaya neti Benni unbiyuu daa iyyabaaha, ri'a roa nna lebi'i nna rálale: "Unbiyuu-ni nna ancana ttu nu ri'a roxxatta, ttu nu do tsee len ca güequixa-na lhe ca nu te tulha guecani lhe." Ttiaca atti rilenri gaxasná run ca xi'ini Tata Do Iyyabaaha, lania nna ritedeenri, elha rieni rapa Tata Do Iyyabaahaba nua rapa ca bi'iniha.

### Carusi'iru ca yiesi bittu rodú xiyyancana

(Lc. 10:13-15)

<sup>20</sup> Laniala nna udulo Jesús utise ca benni se'e lhe'e ca yiesi atta chi benie uca ixeru ca milagru, cumu ca unnuha nna tsa läga bodú xiyyancana gue nu lä anca tsee bencanaha qui odaxxucana neda gue Tata Do Iyyabaaha. Nianna re:

<sup>21</sup> —¡Carusi'irule, xa benni se'e lhe'e yiesi Corazín! ¡Carusi'irule, xa benni se'e lhe'e yiesi Betsaida! Cumu ttirca lhe'e yiesi Tiro lhe Sidón lhe chi uca ca milagru uca len lebi'ihha nna nucala chi bodú xiyyan ca nua bodaxxucana neda gue Tata Do Iyyabaaha qui dhie

---

<sup>a</sup> 11:14 Malaquías 4:5

elha xen lasi guecani. Chi ucucana ca lari ttipa lhe bedelha iquicani te gue gui lhe qui ule'e lo gualí re lenquinna gue nu bencana.

<sup>22</sup>Ttiaca neti nna ria le, gansi chi bisía sá un Tata Do Iyyabaaha elha uxtisi gue ca benni, xxenirla anca elha disa dhíle atti elha disa dhi ca benni se'e lhe'e yiesi Tiro lhe Sidón lhe. <sup>23</sup>Lebi'i nna ca benni se'e lhe'e yiesi Capernaum, ¿si rquinle dequi eyopile iyyabaaha? ¡Dica! Axta atta lexúaha la iyinnale. Cumu ttirca lhe'e yiesi Sodoma uca ca loesi milagru uca len lebi'i nna lania nna gua rerbana axta nnanna. <sup>24</sup>Larcala ria le, gansi chi bisía sá uni Tata Do Iyyabaaha elha uxtisi gue ca benni nna tsitsirla anca elha disa dhíle attichula elha disa dhi yiesi Sodoma.

### Jesús re: “Gualtá len neti qui edí lele”

(Lc. 10:21-22)

<sup>25</sup>Laniala nna unne Jesús re Tata Do Iyyabaaha:

—Tata, cuinalu ancalu Benni banani iyyabaaha lhe yies lo yu-ni lhe. Neti ribequi xenia lu de bittu begüeelhalu ttedaani ca nu rá ancacana nu yu te elha rien guequinna gue nu ria-ni, lu nna benlu ttedaaquin ca benni bittu ra xxeni leni gue unní. <sup>26</sup>Gualiba, Tata, cumu anába beda le cuinalu unlu.

<sup>27</sup>Tata quiaha nna iyába betee las náya. Tsa läganu yu gattigasná anca Xi'iní Tata Do Iyyabaaha, sunruba lee yue nuxa anca Xi'inie. Nuttuguuba yu gattigasná anca Tataha lhe sunruba neti Xi'inie-ni yua nuxa anque, ca benni raca lasia quixxi'atia cana gue Benniharba nna yucana nuxa anque. <sup>28</sup>Gualtá len neti, iyáxeale atta chi guatú lele lo nu ratele, atta chi guaxxaquinle loni lhe neti nna unia eyaca lele. <sup>29</sup>Gualoquinna iquile udole tisa gue nu runia mandadu unle, gualudheti unle atti runia lhe cumu neti anca Benni pasensi, nu bittu runi ttaba. Lania nna guasaxxacabale elha xen lasi reasani lastoole na. <sup>30</sup>Cumu nu runia le mandadu unle, läga anca unná ttu nu tsitsi bittu dhale unle, anca bunna ttu nu guadábale unle.

### Jesús anque Benni bananie sa redí le ca benni Israel

(Mr. 2:23-28; Lc. 6:1-5)

**12** La laniaguaba nua ute Jesús die yu'e neda lhe'e ca yu atta te ca xua xuxtila la sá redí le ca benni Israel. Ca benni rudheti

ca tisa rule'e nna bisía utuncabi. Lacabi nna uchecuttebacabi iqui ca xuaha, atti uxubitteba las nácabi benniha qui utocabi.<sup>2</sup> Atti biláni ca fariseo nu run ca bi'iniha nna ráttebacana Jesús:

—¡Begüiarga! Ca benni rudheti ca tisa rule'elu-na, runcana nu bittu ga'ana unri la sá redí leri ri'i ca benni Israel.

<sup>3</sup> Ttiaca Jesús nna ráttebe cana:

—¿Si bittuba chi belabale lo ca sitsi gue Tata Do Iyyabaaha, atta rixxi'a gue nu beni David ttu libe atti utunbi lenbi ca nu dia lenbiha?<sup>4</sup> David nna uta'abi lhe'e yotu gue Tata Do Iyyabaaha, guaxxíbi ca ttaxtila chi anca le'a gue Benniha sia nía, qui utobi lenbi ca benni dia lenbiha. Labi nna läga dica gobi ca ttaxtilaha, niguaba ca benni dia lenbiha lhe cumu sunruba ca bixxudiha ga'ana gocabi benniha.<sup>5</sup> ¿Si bittuguaba chi belabale lo ca ley gue Tata Do Iyyabaaha boca'ane len Moisés atta rá dequi bittu dica unri sina ca sá ga'ana edí leri? Ttiaca ca bixxudiha nna runbacana sina lhe'e yotu gue Benna la sáha. Lacana nna läga ancacana nu te tulha gueni gue nu runcana.<sup>6</sup> Neti ria le nna xxenirla ra le Benni du lenle-ni atti yotu-na.<sup>7</sup> Lebi'i nna läga ritedeenle gue nu rá lo ca yitsi gue Tata Do Iyyabaaha atta rá: “Neti nna raca lasia satúa lele ca benni, lä riga gualutti ca nimala qui utele úna lo becoa quia.”<sup>a</sup> Tirca ritedeenle gue unní nna lania nna läga udelha iyyale ca benni bittu tulha gueni te.<sup>8</sup> Cumu neti Benni unbiyuu daa iyyabaaha, anca Benni banani sá redí leri-ni.

<sup>9</sup> Dequide utee Jesús nía, uta'attebe lhe'e yo'o atta rudheti ca benni Israel se'e nía ca tisa gue Tata Do Iyyabaaha.<sup>10</sup> Nía du ttu unbiyuu xi ttu lha'a náni. Qui aca udelhiyyacana Benniha nna unnaba tisattebacane rácane:

—¿Si gua dica eyonri ttu benni rani sá redí leri?

<sup>11</sup> Jesús becabie re cana:

—Gansi ttu carne'e guele iyinnina lhe'e ttu pozo sá redí leri, ¿läba ganna saleattebale nua nía?<sup>12</sup> ¿Si läba dacarla ttu benni atti ttu carne'e? Larcala nna guaga'anaba uni benni nu anca tsee sá redí leri.

<sup>13</sup> Laniala nna re unbiyuuh:

—¡Belhí nálu!

Unbiyuuh nna belhítteba náni. Nániha nna beacattebana attiba ancaba attu lha'a nániha.<sup>14</sup> Ttiaca ca fariseo se'e nía, cuantusiba

---

<sup>a</sup> 12:7 Oseas 6:6

beríacana lhe'e yo'oha, udulottebacana beguila lecani gaxasná uncana utticana Jesús.

**Jesús anque Benni becue Tata Do  
Iyyabaaha qui ixúe lo sina guee**

<sup>15</sup> Atti chi bina Jesús gue nu rele ca nua uncana nna bedáttebe nía. Ixeru benni denocane. Lee nna iyába ca nu raniha beonie.

<sup>16</sup> Nianna tsitsiba belise ca nua qui bittu quixxi'acana gue nuxa anque. <sup>17</sup> Anía uca qui guaxxína ca tisa bete Tata Do Iyyabaaha utixxi'a profeta Isaías atti rábi:

<sup>18</sup> Nii du Ben-ni ixuu lo sina quia.

Ben-na chi becueea.

Lee racatia guee, len lee do tseea lhe.

Neti nna unia qui tsu'u Espíritu quia lhe'e cuerpu guee.

Lee nna tsequie quixxi'anie iyárechaba benni gue gaxasná unia qui salía tseen cana.

<sup>19</sup> Läga itilha tisa Benniha nuxa leni, bittuguaba tsequie ubesi'a lhe.

Nuttuguaba nu iyieninna ts'i'e lo ca neda-na lhe.

<sup>20</sup> Benniha nna läga ulhuxe ca benni bittu ra xxeni lecani, bittuguaba bi udhaque ca benni chi ratu lecani lhe.

Axta qui dhee unie aca nu tsee itúba yies lo yu-ni.

<sup>21</sup> Lania nna iyáxeaba ca benni se'e yies lo yu-ni uxten lecani Ben-na.

**Ca benni rinne güecana gue Jesús**

*(Mr. 3:19-30; Lc. 11:14-23; 12:10)*

<sup>22</sup> Nianna ca benni nna uchecana ttu benni yu'u be xxegüi lhe'e cuerpu gueni lo Jesús. Unnuha nna ancana biría, xua loni lhe. Jesús beonbe nua, larcala nna bennebana lhe belábinna lhe. <sup>23</sup> Iyába ca benni bebanquinna gue nu ben Jesús, nianna rácana:

—¿Si läba Benniba nua anque Benni datía David?

<sup>24</sup> Ttiaca atti bienin ca fariseo nu rá ca nua nna ráttebacana:

—Nu rinnabia ca be xxegüi-nba<sup>a</sup> begüeena unná derechu qui ebeana ca be xxegüi yu'u lhe'e cuerpu gue ca benni.

---

<sup>a</sup> **12:24** Leni tisa griego nu rinnabia ca be xxegüi ancana Beelzebú.

<sup>25</sup> Jesú斯 yuxabe nu rulaba le ca nua, nianna ráttebe cana:

—Gansi ca benni se'e lhe'e ttu yiesi rinnabia xeni ila'a lhe'e loescani de ritilhacana, yiesi rinnabia xeniha nna lhuxabana.

Anáguaba gansi ca benni se'e lhe'e ttu yiesi o lhe'e ttu yo'o ila'a lhe'e loescani de ritilhacana, ca unnuha nna lhuxabacana.

<sup>26</sup> Anáguaba gansi nu xxegüiha ebeana attu loesi xxegüi-ni, ca unnuha nna se'e la'aba len loescani ganniha. Gansi anía anca, ¿galasná run nu xxegüiha qui rusiguirna rinnabiana ganna? <sup>27</sup> Gansi neti rebeaya ca be xxegüi-na de rute Beelzebú-na derechu quia, ca benni rudheti ca tisa rule'ele-na nna ¿si nu xxegüiha guaba rutena derechu gue ca unná qui rebequicana ca be xxegüi-na? Larcala nna la ca benni rule'enlenba inná dequi lebi'i nna läga gualínle gue nu rále-na. <sup>28</sup> Ttiaca gansi neti rebeaya ca be xxegüi-na lhe'e ca benni cumu de raca len Espíritu gue Tata Do Iyyabaaha neti, lania nna unní rule'e lo chi udulo Tata Do Iyyabaaha rinnabie lebi'i.

<sup>29</sup> 'Nuttuguaba nu te dhana ga'ana lhe'e lisi ttu unbiyuu rea lasi qui sattúana bixa te gue nua, gansi bittuba iyaxxu lola unbiyuu rea lasiha qui ixxícana. Anía liba nna dhaa ubanaha lhanana nu te lhe'e lis nua.

<sup>30</sup> 'Nu bittu du len neti nna läga raca uyú nua neti. Nu bittu runna neti yuda gaxtu adí benni qui udaxxucana neda gue Tata Do Iyyabaaha nna ruríalala nua ca benni.

<sup>31</sup> 'Denuala nna ria le, guadíba Tata Do Iyyabaaha elha xen lasi gue iyába ca tulha gue ca benni, gue nu rinne güeecana lhe ttiaca gansi nuxa inne güena gue Espíritu guee, unnuha nna tsa lärgabi elha xen lasi gueni te. <sup>32</sup> Nuxaba benni gansi inne güena quia, neti Benni unbiyuu daa iyyabaaha, guadíba Tata Do Iyyabaaha elha xen lasi gueni, ttiaca gansi nuxa inne güena gue Espíritu guee, unnuha nna tsa lärgabi elha xen lasi gueni te, ni yies lo yu atta se'eri nnanna lhe ni atta esínriha lhe.

<sup>33</sup> 'Ttu ya xixxi tsee nna nu tseeguaba ribía gueni, nu bittu ancana yaga tsee nna lägabi nu tsee ribía gue nua. Larcala nna la nu ribía lo yagahaba rule'e lona bixa yaga nua. <sup>34</sup> ¡Lebi'i, ca nu datía belha! ¿Tti modu aca innele nu anca tsee, lebi'i nna ancabale nu runi nu lä anca tsee? Cumu nu re lhe'e lastoobale unnuhaba rinnele.

<sup>35</sup> Benni runi nu anca tseeha nna nu anca tsee re lhe'e lastoonihaba rinnena. Benni runi nu lä anca tseeha nna nu lä anca tsee re lhe'e lastoonihaba rinnena. <sup>36</sup> Ttiaca neti nna ria le, gansi chi bisía sá un

Tata Do Iyyabaaha elha uxtisi gue ca benni, iyábacana utsá ducana qui quixxi'acana gue iyába ca tisa lä dica ixuu unnecana.<sup>37</sup> Cumu la ca tisa biría ro'oluhaba udelha iyyacan lu, la ca unnuhaguuba uni exúlu lhe.

### Rinnabacana un Jesús ttu milagru

(*Mr. 8:12; Lc. 11:29-32*)

<sup>38</sup> Laniala nna ttulhe ca fariseo lencana ca nu rule'e nu rá lo ca ley boca'ana Moisés rácana Jesús:

—Maestro, raca letu ilentu unlu ttu milagru nu ule'e lo gansi gualí Tata Do Iyyabaaha udhelhe lu.

<sup>39</sup> Jesús becabie re:

—Lebi'i, ca benni runi nu lä anca tsee se'e nnanna nu chi bedhá iquini Tata Do Iyyabaaha lhe rinnabale unia ttu milagru nu ule'e lo gansi gualí Tata Do Iyyabaaha udhelhe neti, ttiaca bittu ule'etia le attu milagru subi gan läba loesi milagru uca len profeta Jonás.

<sup>40</sup> Cumu attiba Jonás uyu'ubi tsunna ubisa nna tsunna ela nna lhe'e ttu belha xxeni, aníaguaba neti Benni unbiyuu daa iyyabaaha, tsu'uguuba tsunna ubisa nna tsunna ela nna lhi'u yu.<sup>41</sup> Gansi chi beni Tata Do Iyyabaaha elha uxtisi gue ca benni se'e nnanna ca benni use'e lhe'e yiesi Nínive esíaguacana qui udelhiyyacana, lebi'i ca benni se'e nnanna. Cumu boduxiyyaban ca unnuha bodaxxucana neda gue Tata Do Iyyabaaha atti bienquinna ca tisa utixxi'a Jonás. Nnanna nna gualgüiarga, niba len lebi'i du ttu benni ra xxenru leni atti Jonás, lebi'i nna bittu roduxiyyanle.<sup>42</sup> Anáguuba nuila unnabia daca sur<sup>a</sup>, esíaguana gansi chi bisía sá un Tata Do Iyyabaaha elha uxtisi gue ca benni, qui udelhiyyana lebi'i ca benni se'e nnanna. Cumu nuilaha nna lhe'e yiesi nu reru idittuli udána güiana atta do Salomón qui bedo nagani gue elha rieni gue nua, nnanna nna gualgüiarga, niba du len lebi'i ttu benni ra xxenru leni atti Salomón, lebi'i nna bittu rudo nagale gue nu ria.

<sup>43</sup> Gansi chi rería ttu be xxegüi lhe'e cuerpu gue ttu benni, riattebana lo yu bisi atta nuttu benni se'e reguilana gaxa eta'ana qui edí leni, ttiaca tsa bittu ratí'ana.<sup>44</sup> Nianna innána: “Eyequibalha neti lisia atta beríaya.” Atti eyequina esínna lania nna satti'ana

---

<sup>a</sup> **12:42** Lana nua beaca lasni lhe'e yiesi lá Saba.

benni beríana lhe'eniha ancana attiba ttu yo'o chi luba lhe'eni lhe chi yapa te xea lhe'eni lhe.<sup>45</sup> Lana nna tsiattebana saxxína a gasi (7) ca be xxegüi runru adí nu lä anca tsee atti lana. Nianna ga'atteba iyábacana tse'ecana lhi'u lhe'e benni beríana lhe'eniha. Lania nna adíla satsa udú le nua attichula atti du leni primeroha. Aníaguuba satele, lebi'i, ca benni runi nu lä anca tsee se'e nnanna.

**Nan gue Jesús lenbi ca betsi benniha  
raca lecabí inne lencabi Benniha**

(Mr. 3:31-35; Lc. 8:19-21)

<sup>46</sup> Sna duba Jesús rinne lanie ca benni se'e nía, atti chi bisína nan gue Benniha lenbi ca betsi Benniha. Níaba use'ecabi lhe'eli'a gue yo'oha. Lacabi nna raca lecabí inne lencabi Benniha.<sup>47</sup> Ttu ca bi'ini se'e nía nna utixxi'aquinbi Jesús rácabi Benniha:

—Ni nan gueluha lenbi ca betsiluha lhe se'e lhe'eli'a gue yo'o-ni. Lacabi nna raca lecabí inne lencabi lu.

<sup>48</sup> Benniha nna becabittebe re benni utixxi'aha:

—¿Nú nua rálu dequi anca nan quia lhe betsia lhe?

<sup>49</sup> Nianna bedotteba xbiná Jesús ca benni rudheti ca tisa rule'e, atti re:

—Ca unní liba anca nan quia lhe betsia lhe<sup>50</sup> cumu iyába ca benni rudo tisa gue Tata quia do iyyabaaha, ancacana nan quia lhe betsia lhe dana lhe.

**Ejemplu gue ttu benni diana güedelha xua**

(Mr. 4:1-9; Lc. 8:4-8)

**13** La sáhaguuba biría Jesús lhe'e yo'oha güie guadhoe gaxxaba ro'o indattooha.<sup>2</sup> Cumu de yatterba de reru benni bisína nía, nuarca gopittebe udoe lo ttu barco xua lo indattooha. Ca benni se'e nía nna bedaa ro'o indahaba use'ecana.<sup>3</sup> Lee nna ixe loba nu utixxi'enie cana leni ca ejemplu. Nianna re cana:

—Ttu benni runi sina lo ca yu biríabi diabi güedelha xua xuxtila.

<sup>4</sup> Ttiaca atti diabi rudelhabi xuxtilaha nna ttulhe ca benniha nna binnaque lo nedaha, atti bisíntteba ca binni utocana ca benniha.

<sup>5</sup> Attu lheque nna biyinnaque lhe'e ttu ruya atta bittu tte xxeni yu re. Ca benniha nna sattiba be'eyuque cumu de bittu te xxeni yu re

nía.<sup>6</sup> Ttiaca atti biría tatubisa-na, bequexxuttebe ca benniha, cumu de bittu bedetti lhu benniha lhi'u, nuarcala nna ubisque.<sup>7</sup> Attu lhe ca benniha nna biyinnaque lhe'e atta daa ca ya yitsi, ttiaca atti bixen ca ya yitsiha nna betsenttebaquinna ca benniha.<sup>8</sup> Adí ca benniha nna biyinnaque ttu atta re yu bebi. Ca benniha nna tsapaba tsee lena beteque, ttulhe ca iquiha beteque axtaba ttu gayua (100) xua, attu lheque nna beteque gayuna (60) xua, adí ca iquiha nna beteque rerúa (30) xua.<sup>9</sup> Attu gua rudo nagale gue nu ria, gualun duelha qui sadú lele.

<sup>10</sup> Laniala nna ubiga ca benni rudheti ca tisa rule'e unnaba tisacabi Benniha bixa gue rulise ca benni leni ejemplu.<sup>11</sup> Lee nna becabie re cabi:

—Lebi'i nna guarunba Tata Do Iyyabaaha qui sadú lele gue gaxasná rinnabie, nu bittu ritedaani ca benni. Ttiaca adí ca benni nna bittu runie qui ttedaaquinna.<sup>12</sup> Cumu benni gua radú leniha nna dhirla nua elha rieni qui sadúchatti leni. Ttiaca nu bittu radú leniha nna axtala nu saro'o chi radú leniha, itúa.<sup>13</sup> Denua nna rulisa ca unná leni ejemplu, qui masquiba tticaxa rugüiacana, bittu iláquinna, masquiguaba tticaxa rudo nagacani, bittu iyienquinna lhe bittuguuba sadú lecani lhe.<sup>14</sup> Leni nu guate ca nua guaxxína ca tisa gue Tata Do Iyyabaaha unne profeta Isaías atti rábi:

Masquiba tticaxa iyienquinna bittu sadú lecani.

Masquiba tticaxa ugüiacana bittu iláquinna.

<sup>15</sup> Cumu lastoo ca benni se'e-ni nna chi beacana tsitsi,

Lacana nna chi bedhea nagacani lhe

chi bexxúa locani lhe,

qui bittu iyienquinna lhe bittu iláquinna lhe

aná nna qui bittu eyequicana odaxxucana neda quia,

neti nna eyonia cana.<sup>a</sup>

<sup>16</sup> Ttiaca lebi'i nna carbárule cumu gua ritedabinle gue nu rugüiale-ni lhe gue nu rieninle-ni lhe.<sup>17</sup> Neti nna gualíbatia ria, ixe tsitsia ca benni uca profeta lhe ca benni beni nu anca tsee lhe udá lecabí ugüiacabi nu rilenle nnanna ttiaca bittu biláquinbi na, uxacacabi iyienquinbi nu rieninle nnanna lhe ttiaca bittu bienquinbi na.

<sup>18</sup> 'Nnanna nna gualdo nagale bixa diani ejemplu gue benni ruelha xua xuxtilaha.<sup>19</sup> Atti rienini ttu benni ca tisa rixxi'a gue

---

<sup>a</sup> 13:15 Isaías 6:9-10

gaxasná rinnabia Tata Do Iyyabaaha, ttiaca bittu ritedeenna gue ca tisa-na, nianna risintteba nu xxegüiha rebeana ca tisa chi bienin nua lhe'e lastooni. Unní nua ancana attiba ca xuxtila binna lo nedaha.<sup>20</sup> Ca xuxtila biyinna lhe'e ruyaha nna ancaque attiba ca benni, atti rienquinna ca tisa-na attulade re'o lecani recabicana udaxxucana neda gue Tata Do Iyyabaaha,<sup>21</sup> ttiaca cumu läga be'an tsitsi ca tisaha lhe'e lastoocani, nuarca läga isá ria lecani. Larcala gansi chi bixa ratecana o nuxa rusía lencana lo ni'a gue ca tisa-na, ready gattebacana lo neda gue Tata Do Iyyabaaha.<sup>22</sup> Ca xua xuxtila biyinna lhe'e yitsiha nna ancaque attiba ca benni rienini ca tisa-ni, ttiaca nu richacha iquicani gue nu anca gue yies lo yu-ni lhe gue nu ridá lecani acacana nu gattaru gueni lhe rudheacana lo ca tisa-na, nuarca bittu raca un ca tisana sina lhe'e lastoocani.<sup>23</sup> Ttiaca xua xuxtila binna atta re yu bebiha nna anque attiba ca benni rienini ca tisa-na lhe radú lecani gue Ben-na lhe. Denua nna runcana nu anca tsee, attiba ca xuxtila biyinna atta re yu bebiha tseeba bixúe. Tu lheque betee ttu gayua (100) xua, a díque nna betee gayuna (60) xua, a ttu lheque nna betee rerúa (30) xua.

### Ejemplu gue xuxtilaha lenie ixxiha

<sup>24</sup> Utixxi'aguani Jesús ca benni attu ejemplu, nianna re cana:

—Gue gaxasná rinnabia Tata Do Iyyabaaha ca benni, raxxína len nu uca atti güia ttu unbiyuu guadelhana taga'a xua xuxtila lo yu gueniha.<sup>25</sup> Ttiaca laca tecana ti'edhicana, bisíntteba ttu nu bittu raca uyúna benni beaca gueni lo yuha, udana ixxi lhe'e xua xuxtilaha, atti deyyattebana.<sup>26</sup> Atti chi biyelha xuaha nna biríatteba iquie, ixxiha nna bixenguuba-na.<sup>27</sup> Ca benni riben sinaha nna güiattebacana guayúcana benni beaca guebi lo yuha, rácan bi: “Benni baninna ri'itu, ¿si läba taga'a xuxtila xa bedelhalu lo yu gueluha? ¿Gala biría ixxiha ganna?”<sup>28</sup> Benni beaca guebi lo yuha nna rábi: “Gaxa ttu nu bittu raca uyúna netiba beni unná.” Ca benni riben sinaha nna rávana: “¿Si guarca lelu tsiatu sattúpitu ixxiha?”<sup>29</sup>

Ttiaca benni beaca guebi lo yuha nna becabibi rábi: “Bittu. Cumu atti ilhupile ixxiha nna ilhupiguuba xuxtilaha.<sup>30</sup> Adíla tsee gualugüelhaba ixxi-na ixenna len xuxtila-na. Gansi chi liba bisía sá exú lena bani-na, lania liba nna idhelha ca benni tsia güitsela, neti nna gupeba ca nua echúcana lola ixxi-na qui uxxicacana lhe'eni,

uncan na xxia xxia qui dho gui lhe'eni. Lania liba nna edícana xuxtilaha qui cua tseecane lhe'e atta rigúa tseea lena bani quia."

### **Ejemplu gue bes coana murtasa lhe gue levadura lhe**

(*Mr. 4:30-32; Lc. 13:18-19*)

<sup>31</sup> Utixxi'aguani Jesús cana attu ejemplu, re cana:

—Gue gaxasná rinnabia Tata Do Iyyabaaha ca benni raxxína len nu raca atti rada ttu benni ttu besi gue coana murtasa lo yu gueniha. <sup>32</sup> Besiha nna masquiba ancana nu chica'aru gue delo iyá ca besi, ttiaca dequide chi bixenna xxenrula racana atti adí ca coana, attiba ttu yaga'a racana, larcala axtaba ca binni-na rusía xcudi guecani lo ca xiquini.

<sup>33</sup> Utixxi'aguani Jesús ca benni attu ejemplu nianna re cana:

—Gue gaxasná rinnabia Tata Do Iyyabaaha ca benni raxxína len nu uca len levadura nu bedaxxu ttu nuila betselana lhe'e tsunna ya yiedi qui ilhidhana lhe'e itúba cua gue ttaxtilaha.

<sup>34</sup> Iyába unní utixxi'eni Jesús ca benni len ca ejemplu. Lee nna sunruba leni ca ejemplu rule'enie ca benni. <sup>35</sup> Aníaba benie qui guaxxína ca tisa utixxi'a benni uca profeta gue Tata Do Iyyabaaha, atti rábi:

Leni ejemplu liba innea ulisa ca benni.

Neti nna quixxi'atia cana gue nu te gatsi bittu chi utedaani ca benni

desdeba atti ure yies lo yu-ni.<sup>a</sup>

### **Jesús rixxi'e bi dia le ejemplu gue ixxiha**

<sup>36</sup> Dequide bechú tisa Jesús ca benni se'e nía nna beta'attebe lhe'e yo'oha. Nianna ubigatteba ca benni rudheti ca tisa rule'e, rácabi Benniha:

—Utixxi'en ri'itu bixa dia le ejemplu gue ixxi be'eyu lhe'e xua xuxtilaha.

<sup>37</sup> Laniala nna rá Jesús ca bi'iniha:

—Neti Benni unbiyuu daa iyyabaaha anca Benni bedelha xua xuxtilaha. <sup>38</sup> Lo yu atta güia xuaha nna ancana yies lo yu-ni. Xuaha nna anque ca benni rinnabia Tata Do Iyyabaaha. Ixxi be'eyu lhe'e

---

<sup>a</sup> 13:35 Salmo 78:2

xuaha nna ancana ca benni rudo tisa gue nu xxegüiha.<sup>39</sup> Nu bittu raca uyúna benni beaca guebi lo yuha nna ancana nu xxegüiha. Lana nua udána ixxiha. Gütsela-na ancana atti lhuxa yies lo yu-ni. Ca benni echú xuaha nna ancacabi ca ingeli gue Tata Do Iyyabaaha.<sup>40</sup> Attiba guate ixxiha bilupina güiana lo gui, anáguuba sate ca benni gansi chi bisía sá lhuxa yies lo yu-ni.<sup>41</sup> Neti Benni unbiyuu daa iyyabaaha, idhelha ca ingeli quia atta se'e ca benni rinnabiaya qui cueacabi iyába ca benni runi nu lä anca tsee lhe ca nu runi richecu ca benni lo neda gue Tata Do Iyyabaaha lhe.<sup>42</sup> Lacabi nna udelhacabi cana lo gui gue atta lexúaha, atta cuestana lhe go lo layacani lhe.<sup>43</sup> Lania nna ca benni runi nu anca tsee-na tsu'u xieni guecabi attiba tatubisa-na atta innabia Tata gueri do iyyabaaha. Lebi'i atta guarudo nagale gue nu ria, gualun duelha qui sadú lele.

### **Ejemplu gue ttu nu texxatta lidhacani lhe gue ttu perla lhe**

<sup>44</sup> Atti rinnabia Tata Do Iyyabaaha ca benni raxxína ancana attiba ttu nu texxatta lidhacani guatti'a ttu benni yu'u gatsina lhe'e ttu yu. Benni guatti'ana unnuha nna bocatsi dacabana nua nía, nianna attulade re'o leni deyyana guatto'ona iyába nu te gueni qui uyo'ona lo yuha.

<sup>45</sup> Anáguuba atti rinnabia Tata Do Iyyabaaha ca benni, raxxína len nu guate ttu nu requi güetto'o, lana nna requina reguilana perla tsee.<sup>46</sup> Atti chi guatti'ana ttu perla nu dacaxxatta nna deyyattebana guatto'ona iyába nu te gueniha qui uyo'ona nua.

### **Ejemplu gue yexxa nu rudaxxu len benni belha**

<sup>47</sup> Anáguuba atti rinnabia Tata Do Iyyabaaha ca benni, raxxína len ttu yexxa nu rudaxxu len ca benni belha. Atti ruelha ca benni nua lhe'e inda nna rudaxxuttebana iyáloba belha.<sup>48</sup> Atti chi risá yexxaha nna rebeatteba ca benni na ro'o indaha. Nianna ribiattebacana rucuecana lhe'e nua. Ca belha tseeha nna regu'ucana lhe'e ca sumi, ca belha bittu diquixuuha nna rigu'unacana.<sup>49</sup> Anába aca atti isía sá lhuxa yies lo yu-ni. Lania nna iría ca ingeli-na cuequescana ca benni runi nu lä anca tsee-na lagüi ca benni runi nu anca tsee-na,<sup>50</sup> atti udelhacabi ca benni runi nu lä anca tsee-na lo gui gue atta lexúaha, nía nua atta cuestana lhe go lo layacani lhe.

<sup>51</sup> Laniala unnaba tisa Jesús ca benni rudheti ca tisa rule'e re cabi:  
—¿Si guadú lele iyá nu rpea le-ni?

Lacabi nna becabicabi rácabi:

—Agu, chi guadú letu.

<sup>52</sup> Benniha nna re cabi:

—Larcala iyába ca benni rule'e nu rá lo ca ley boca'ana Moisés chi yu gue gaxasná rinnabia Tata Do Iyyabaaha, ancacana attiba ttu benni beaca gueni ttu yo'o. Lana nna lhe'e ca nu tua tseennaha ribeana nu te lidhacani anca cubi lhe nu anca yaxxu lhe.

### Ca benni gue Nazaret rigu'u ni'acani Jesús

(*Mr. 6:1-6; Lc. 4:16-30*)

<sup>53</sup> Atti chi uluxa utixxi'a Jesús ca ejemplu-ni nna bedáttebe nía deyye. <sup>54</sup> Besinbe lo yu atta beaca lasie nna udulottebe bele'enie ca benni lhe'e yo'o atta rudheticana ca tisa gue Tata Do Iyyabaaha. Atti bienquin nua ca tisa rinne Benniha nna bebanbaquinna. Nianna unnaba tisa loescani rácana:

—¿Ga guaxxí unní elha rieni gueni? ¿Gasná runna raca gueni runna ca milagru-na lhe? <sup>55</sup> ¿Si läba xi'ini carpintero-naba unní nna? ¿Lä Maríaba lá nan gue unní lhe ca betsini nna lácana Jacobo lhe José lhe Simón lhe Judas lhe? <sup>56</sup> ¿Si läba niguuba se'e iyába ca dana unní len ri'i lhe'e yies-ni lhe? ¿Gala guaxxí unní iyába nu raca guen-ni ganna?

<sup>57</sup> Lo ni'a gue unnuha nna use'e dittibacana, bittu güia lecana Jesús. Ttiaca Benniha nna ráttebe cana:

—Gaxaba nua nna gua riaba lecani ttu benni ancabi profeta gue Tata Do Iyyabaaha, ttiaca lhe'e yiesi atta beaca lasbiha nna tsa lägra lecan bi, niguuba ca nu se'e lhe'e lisbiha lhe.

<sup>58</sup> Nioca nuarca bittu uca uni Jesús ixe ca milagru nía, lo ni'a gue de bittu güia le ca nua Benniha.

### Juan bi'ini rugadi ca benni inda uttibi

(*Mr. 6:14-29; Lc. 9:7-9*)

**14** Laniaguaba nua bina Herodes nu rinnabia lo yu gue Galilea gue nu rinne ca benni gue nu run Jesús. <sup>2</sup> Nianna rána ca benni run sina gueniha:

—Juan bi'ini begadi ca benni indaha bunna beaquinna attu libe, nuarca ridána runna ca milagru-na.

<sup>3</sup> Cumu Herodes benna mandadu ca nu güia guadaxxucana Juan, ca unnuha nna bexxicacan bi'iniha len cadena atti bedelhacan bi lisiyya. Lo ni'a gue nuila gueni lá Herodías nu uca nuila gue betsini Felipe, <sup>4</sup> de biaca rá Juan Herodes: “Bittu dica edo lenlu nuila gue betsilha.” <sup>5</sup> Herodes nna rdacana uttina Juan, ttiaca rasbinna lo ca benni, cumu iyábacana rácana anca Juan profeta gue Tata Do Iyyabaaha. <sup>6</sup> Ttiaca la sá atti raca laní de binna lá Herodes, xi'iniunná Herodías nna uta'attebana beya'ana lo iyába ca nu sia len Herodes nía. Herodes nna attulade be'o leni gue nua. <sup>7</sup> Denuala nna begüeena tisa aní lo iyá ca nu sia nía utena len uncuitiha bixaba innába nua. <sup>8</sup> Uncuitiha nna dequide chi ulu'u tisa nan gueniha na, ráttebana:

—Neti nna raca lasia utelu len neti choettuiqui Juan nu rugadi ca benni inda-na yu'uná lhe'e ttu platu.

<sup>9</sup> Herodes nna attulade si'irurba runna atti bieninna nu rá nua, ttiaca cumu chi begüeena tisa aníba lo ca nu sia lenna nía, nuarcala nna benna mandadu uteicana nu rinnaba uncuitiha. <sup>10</sup> Laniala nna benttebana mandadu sachecucana iqui Juan lhe'e lisiyyaha. <sup>11</sup> Nianna besintteba lencana choettuiqui bi'iniha deyu'una lhe'e ttu platu begüeeca uncuitiha. Uncuitiha nna begüeettebana nan gueniha nua. <sup>12</sup> Laniala nna güia ca benni bedheti nu bele'e Juan guaxícabi cuerpu gue bi'iniha qui guacatsicabi cuerpuha lhe'e baa, atti güiattebacabi guattixxi'aquinbi Jesús gue nu ucaha.

### Jesús begoe guatela gayu mil benni

(*Mr. 6:30-44; Lc. 9:10-17; Jn. 6:1-14*)

<sup>13</sup> Atti bina Jesús nu guate Juan, ubiattattebe nía. Ttube die lo ttu barco daca atta nuttu benni se'e. Ttiaca atti bina ca benni nna biríattebacana lhe'e ca lhe'esi guecaniha, ni'abacani diacana denocana Benniha. <sup>14</sup> Atti guadi Jesús lo barcoha nna biláttebanie ixeru benni chi se'e nía. Lee nna besi'ittebanie ca nua, nianna beonttebe ca benni yu'u isagüe dia len ca unnuha. <sup>15</sup> Daba raquela nna ubigatteba ca benni rudheti ca tisa rule'e Jesús, rácabi Benniha:

—Chiba ulha sá nna ni nna tsa lägabi yo'o sia. Larcala nna bechú tisa ca benni se'e-ni qui eyyacana ca lhe'esi-na sayo'ocana ttu bixa gocana.

<sup>16</sup> Jesús ráttebe cabi:

—Lägabi raca duelha eyya ca unná. Lebi'iba gualute nu gocana.

<sup>17</sup> Ca bi'iniha nna becabicabi rácabi:  
 —Tsa lägabi nu gori nuja ri'itu, sunruba gayu ttaxtila len chupa belha te-ni.

<sup>18</sup> Jesús re ca bi'iniha:  
 —Gualute ca ben-na nii.

<sup>19</sup> Laniala nna benie mandadu ebía ca benni lo ixxiha. Atti bedaxxuttebe gayu ca ttaxtilaha len irupaba ca belhaba, nianna ulhidhatteba loe begüie iyyabaaha, begüee xquixaru Tata Do Iyyabaaha, atti ulha'attebe lhe'e ca ttaxtilaha, begüee ca benni rudheti ca tisa rulhe'e. Ca bi'iniha nna utidhittebacabi benniha gue ca benni se'e nía. <sup>20</sup> Iyába ca benni se'e nía utocana bedaa belbaquinna. Bodaparlaçabi a tsilinu (12) sumi ca pedazu bexxa gue ca ttaxtilaha. <sup>21</sup> Attiba tu gayu mil ca benni uto ttaxtilaha, sunruba ca benni unbiyuu bibaba, bittu la bibaba ca benni nuila lencana ca unto.

### Jesús ridee lo indattooha

(Mr. 6:45-52; Jn. 6:16-21)

<sup>22</sup> Dequide unnuha nna bentteba Jesús mandadu eyopi ca benni rudheti ca tisa rule'e lo barcoha qui enerucabi elhácabi attu ladu gue indattooha, laca lee nna rechú tise ca benni se'e nía. <sup>23</sup> Dequide chi bechú tise ca benni se'e nía nna gopittebe lo lhilhi do nía qui uca ttube unne lenie Tata Do Iyyabaaha. Níaba du ttube atti chi uca ela, <sup>24</sup> laca barcoha nna rulha gue indattooha lí chi dia nua, cumu nu ridulí lo indattooha nna rigapaná nua de daa xxatta be daca atta diacabihá. <sup>25</sup> Atti chi daa raniha nna udátteba Jesús lo indattooha die daca atta se'e ca bi'ini rudheti ca tisa rule'e. <sup>26</sup> Atti biláquinbi Benniha die ridee lo indattooha nna usttebaquinbi, de rasbaquinbi nna uresi'acabi rácabi:

—¡Ni ttu nu i'iya!  
<sup>27</sup> Ttiaca Jesús unnettebe re ca bi'iniha:  
 —Neti bunni. ¡Tsitsi gualcuequi lele, bittu gasinle!  
<sup>28</sup> Laniala becabí Pedro rábi Benniha:  
 —Gansi luba unná, xa Benni banani neti, beni qui dhaya lo inda-na isíaya axta atta dulha.

<sup>29</sup> Benniha nna re Pedro:  
 —Utá ganna.

Laniala nna guadi Pedro lo barcoha udábi lo indaha diabi atta du Jesús.<sup>30</sup> Ttiaca atti bilenbi tsitsiba idí daa beha nna usttebinbi, atti xeaba diattebabí rettibi lhe'e indaha. Laniala nna uresi'abi rábi:

—¡Bodiláchi neti, Benni banani neti!

<sup>31</sup> Laniala nna becatteba ná Jesús bedaxxue ná Pedro, nianna re bi'iniha:

—¿Biaca bedú chupana lelu, xa nu lä ria tsitsi leni?

<sup>32</sup> Cuentusiba beopique lo barcoha nna bebe sitteba beha.

<sup>33</sup> Nianna ca benni sia lo barcoha nna ubigattebacabi bedú xibicabi lo Jesús rácabi Benniha:

—Gualíba ancalu xi'ini Tata Do Iyyabaaha.

### Jesús beonie ca nu rani

(Mr. 6:53-56)

<sup>34</sup> Dequide chi ulhácabi ttu ladu gue indattooha nna bisínttebacabi lo yu nu te láni Genesaret. <sup>35</sup> Quantusiba beonbia ca benni se'e nía Jesús, begunattebacana ca benni se'e lhe'e iyába ca yiesi se'e itúa nía. Ca unnuha nna uchettebacana iyába ca nu rani guecaniha lo Jesús. <sup>36</sup> Lacana nna benttebacana ruegu lo Benniha qui uguelhe ca nu raniha udaxxucana ladiba ro'o xoe. Iyába ca nu radaxxu ro'o xo Benniha nna reacattebacana.

### Nu runi raca ttu benni nu anca tsiga lo Tata Do Iyyabaaha

(Mr. 7:1-23)

**15** Nianna ttulhe ca fariseo lencana ttu chupa ca benni rule'e nu rá lo ca ley boca'ana Moisés daa lhe'e yiesi Jerusalén, ubigacana unnaba tisacana Jesús rácane:

<sup>2</sup> —¿Biaca bittu rudo ca benni rudheti nu rule'elha tisa gue nu bele'en ca benniola gueriha ri unri? Lacana läga rii nácani attiba chi labiri runri gansi chi rori etta.

<sup>3</sup> Jesús becabie guecani re cana:

—Lebi'i nna ¿biaca rigu'u ni'ale nu beni Tata Do Iyyabaaha mandadu unri, qui raca rudole tisa gue nu rá ca benniola gueriha unri? <sup>4</sup> Cumu Tata Do Iyyabaaha benie mandadu re: “Gapalu

respeto tata guelu lhe nan guelu lhe.”<sup>a</sup> Anáguaba re: “Nu quena iqui tata gueniha o nan gueniha nna ralhaba nua gattina.”<sup>b</sup> <sup>5</sup> Ttiaca lebi'i nna rálale dequi gua dicaba gá ttu benni tata gueniha o nan gueniha: “Bittu aca unna ttu bixa te quia guelu, cumu nu dica utea len luha nna chiba ancana úna gue Tata Do Iyyabaaha.” <sup>6</sup> Nianna nuxaba innána anía nna lärgaga daa loni utena nureasani tata gueniha lhe nan gueniha lhe. Atti runle aná nna rigu'uba ni'ale nu beni Tata Do Iyyabaaha mandadu unri, qui raca rusiguile rudole tisa gue nu labile runle bele'en ca benniola gueriha le. <sup>7</sup> ¡Lebi'i ca nu ni lo ni tisaba runle dequi ancale nu runi nu anca tsee! Gualíbani profeta Isaías atti unnebi utixxi'abi gue nu runle rábi:

<sup>8</sup> Ca benni se'e-ni nna cuentaba rinne ca unná rácana dequia  
ria lecani neti,  
ttiaca läga gualícani ca unná racaquinna quia itú iqui itú  
lecani.

<sup>9</sup> Cuentarba te la dequi rudú xibicani loa,  
cumu nu anca gue ca benni se'e yies lo yu-niba rule'equinna  
ca benni,  
läga rule'ecana nu ancatia mandadu ule'ecana.<sup>c</sup>

<sup>10</sup> Laniala nna uxi Jesús iyába ca benni se'e nía, nianna re cana:  
—Gualdo nagale quia, gualiyienini gue nu innía-ni lhe. <sup>11</sup> Läganu ro ca benni runna acacana nu anca tsiga lo Tata Do Iyyabaaha, sinuqui nu riría ro'o libácani runna acacana nu anca tsiga lo Ben-na.

<sup>12</sup> Laniala ubiga ca benni rudheti ca tisa rule'e rácabi Benniha:  
—¿Si gua yulu, udo díbani ca fariseo-na atti bienquinna ca tisa unnelha?

<sup>13</sup> Jesús becabie re:  
—Iyába yaga nu bittu uda Tata quia do iyyabaaha ilupibana itupa lhu-ni qui iru'unana. <sup>14</sup> Nanse'e gue ca unná. Nu xua loni neru lo attu nu xua loniba anca ca unná. Cumu gansi ttu nu xua loni nneruna lo attu nu xua loni nna irpaba ca nua itoetticana lhe'e belea.

<sup>15</sup> Pedro nna ráttebabí Jesús:  
—Utixxi'en ri'itu bixa dia le ejemplu-na. <sup>16</sup> Lee nna ráttebe cabi:  
—¿Si niguaba lebi'i lä radú lele gue nu ria-ni? <sup>17</sup> ¿Si bittuba yule, iyába nu rori, lhe'ebari diana? Lenla nna dia nua lhe'e atta

---

<sup>a</sup> 15:4 Éxodo 20:12    <sup>b</sup> 15:4 Éxodo 20:17    <sup>c</sup> 15:9 Isaías 29:13

ria benni güesaa. <sup>18</sup>Ttiaca ca tisa riría ro'ori, lhe'e lastoori riríana.

Unnáli bunna runna acari nu anca tsiga lo Tata Do Iyyabaaha.

<sup>19</sup>Cumu lhi'u lhe'e lastoo ca benni liba riría nu lä anca tsee rulaba lecani,

nu runi racacana nu runi elhutti lhe

nu runi racacana nu risá nu bittu anca latselani lhe

nu runi racacana nu rutsá ro'oni nutti nuttiba lhe

nu runi racacana ubana lhe

nu runi racacana nu run leni lhe

nu runi racacana nu rinne güee gue benni lhe.

<sup>20</sup>Ca unná libunna runcana aca benni nu anca tsiga lo Tata Do Iyyabaaha, läganu bittu eyari nári atti gori yetta runi acari nu anca tsiga lo Ben-na.

### **Jesús beonie xi'iniunná ttu nuila dittu**

*(Mr. 7:24-30)*

<sup>21</sup>Atti chi bedá Jesús nía, diattebe lo ca yu gue yiesi nu te láni Tiro leni yiesi nu te láni Sidón lhe. <sup>22</sup>Nía biría ttu nuila beaca lasni yiesi nu te láni Canaán, ribesi'anina rinnabana lo Benniha rána:

—¡Benni datía David, guatúachi lelu neti, xa tata! Xi'iniunnáya nna yu'u ttu be xxegüi lhe'e cuerpu gueni, tsitsiba nu rudhaca unnuha na.

<sup>23</sup>Ttiaca Jesús tsa läga becabie gue nuilaha. Ca benni rudheti ca tisa rule'e Benniha nna ubigattebacabi atta due qui unnabacabi loe rácabi Benniha:

—Gusi nuila-na eyyana, qui ribesi'ana dana denalhan ri.

<sup>24</sup>Lee nna becabie re:

—Tata Do Iyyabaaha nna sunruba atta se'e ca benni Israel-na udhelhe neti. <sup>25</sup>Laniala nna ubiga nuilaha bedú xibini lo Jesús, nianna rána Benniha:

—¡Ucachi len neti, xa tata!

<sup>26</sup>Ttiaca Benniha nna becabie gueni re na:

—Läga anca tsee cuaya ttaxtila ro ca xi'inia-na qui udelha lo ca becu-na.

<sup>27</sup>Nuilaha nna becabina rána:

—Gualíbinlu, xa tata, ttiiaca axta ca becu-na rocana nu riyinna xan mexa gue ca benni beaca guecani ca unná.

<sup>28</sup> Laniala becabí Jesús re:

—¡Cattipa sitsi ria lelu xa nuila! Acaba nu unnabalha.

Snaba lania beaca xi'iniunná nuilaha.

### Jesús begoe guatela ttapa mil benni

<sup>29</sup> Dequide bería Jesús nía, besinttebe ro'o indattoo gue Galilea. Nianna gopittebe lo lhilhi do nía, atti udottebe. <sup>30</sup> Ixeru ca benni bisína atta do Benniha. Ca unnuha nna checana ca benni xi lhe ca nu xua locani lhe ca biría lhe ca nu bittu ttu lha'a ni'acan o ttu lha'a nácani te lhe adírba ca nu rani lhe. Iyába ca unnuha bese'ecana lo Jesús. Lee nna beonttebe ca nua. <sup>31</sup> Iyába ca benni se'e nía bebanquinna atti biláquinna rinne ca nu uca biríaha, ca nu bittu ttu lha'a ni'acan o lha'a nácani te nna becacana ida'a, ca nu xiha nna raca ridacana, ca nu xua locaniha nna riláquinna. Lacana nna udulottebacana ulequi xencana Tata Do Iyyabaaha, Benni anque Dios gue ca benni Israel.

<sup>32</sup> Uxitteba Jesús ca benni rudheti ca tisa rule'e, nianna re ca bi'iniha:

—Resi'irutia ca benni se'e-ni, cumu chi uca tsunna ubisa se'ecana len neti, lacana nna tsa bittu te bixa gocana. Neti nna bittu raca lasia edhelha cana bittu chi utocana, qui cadirba satú lecani neda.

<sup>33</sup> Ca benni rudheti ca tisa rule'e nna ráttebacabi Benniha:

—Güelha, ¿ga saxtíri xxeni ttaxtila qui go ttonáli ca benni, inqui lo yu bisi bunni se'eri nna?

<sup>34</sup> Jesús unnaba tise re ca bi'iniha:

—¿Balha ttaxtila te guele?

Lacabi nna becabicabi rácabi:

—Gasirba ttaxtila te, a ttu chupa ca belha chica'a nna.

<sup>35</sup> Laniala nna benie mandadu bebía iyába ca benni se'e nía lo yu. <sup>36</sup> Lee nna bedaxxuttebe gasi ca ttaxtilaha len ca belhaba.

Dequide chi begüee xquixaru len Tata Do Iyyabaaha, ulha'attebe ca benniha begüee ca benni rudheti ca tisa rule'e. Ca bi'iniha nna utidhittebacabi benniha gue iyába ca benni se'e nía. <sup>37</sup> Iyába ca benni se'e nía utocana axta qui belquinna bodaparla ca benni rudheti ca tisa rule'e a gasi sumi ca pedazu bexxa uto ca nua.

<sup>38</sup> Attiba tu ttapa mil ca unbiyuu uto ttaxtilaha, bittu lä bibaba ca benni nuilaha len ca untoha. <sup>39</sup> Dequide bechú tisa Jesús ca benni se'e nía, beopittebe lo barcoha deyye daca lo yu te láni Magdala.

## Unnabacana un Jesús ttu milagru

*(Mr. 8:11-13; Lc. 12:54-56)*

**16** Laniala bisína ca fariseo lhe ca saduceo lhe atta du Jesús qui cu'u biacane. Lacana nna unnabattecacana unie ttu milagru nu ule'e lo gansi gualí Tata Do Iyyabaaha udhelhe Benniha.<sup>2</sup> Ttiaca lee nna becabie gue ca nua re:

—Ca ulha-na gansi chi radi tatubisa-na, lebi'i nna rále: “Yaniba uxsea, cumu de anca xinaa lo bea-na.”<sup>3</sup> Ca dila-na nna rále: “Nnanna nna iyya lhaba aca, cumu yu'u bea lhe anca xinaa lo bea-na lhe.” ¡Lebi'i, ca nu ni lo ni tisaba runle dequi ancale nu runi nu anca tsee! Gua ritedaabbinle gue nu raca lo bea-na. ¿Biacala nna bittu ritedeenle gue nu rilenle raca tiempu se'ele-ni?<sup>4</sup> Lebi'i, ca benni runi nu lä anca tsee se'e nnanna nu chi bedhá iquini Tata Do Iyyabaaha lhe rinnabale unia ttu milagru nu ule'e lo gansi gualí Tata Do Iyyabaaha udhelhe neti, ttaca bittu ule'etia le attu milagru subi gan läba loesi milagru uca len profeta Jonás.

Nianna níaba bese'e bixxie cana güequie deyye.

## Gualudo cuidadu len nu rule'e ca fariseo-na

*(Mr. 8:14-21)*

<sup>5</sup> Atti chi belhá Jesús attu ladu gue indattooha lenie ca benni rudheti nu rulhe'e, ca bi'iniha nna utedaaquinbi bittu nojacabi ttaxtila.<sup>6</sup> Nianna rá Jesús ca bi'iniha:

—Gualudo cuidadu len levadura gue ca fariseo-na len levadura gue ca saduceo-na lhe.

<sup>7</sup> Ca benni rudheti ca tisa rule'e nna rá loescabi:

—Anába rá Ben-na cumu de bittu nujari ttaxtila.

<sup>8</sup> Atti utedaani Jesús gue nu rá ca bi'iniha nna ráttebe cabi:

—¿Biaca rinnele rále dequi bittu ttaxtila te guele, lebi'i, ca nu bittu ria tsitsi leni?<sup>9</sup> ¿Si itú ttuhaba bittu radú lele? ¿Bittuguuba rexxa lele gue gayu ttaxtila utidhia len gayu mil benni lhe gue a balhaxa sumi bisá ca pedazu ttaxtila bottupaleha lhe?<sup>10</sup> ¿Si bittuguuba rexxa lele begoguuba ttapa mil benni len gasi ttaxtila lhe gue balhaxa sumi bisá ca pedazu ttaxtila bottupaleha lhe?

<sup>11</sup> ¿Biaca bittu radú lele, läga gue ttaxtila rinnea atti ria? Gualudo

cuidadu len levadura gue ca fariseo-na lhe len levadura gue ca saduceo-na lhe.

<sup>12</sup>Lania liba guadú lecabí, läga gue levadura ria lhe'e cua raca ttaxtila-na nua rinne Benniha atti re anía, sinuqui gue nu rulhe'e ca nu fariseo lencana ca nu saduceoba nua rinne Benniha.

### Pedro rixxi'abi Jesús anque Cristu

(*Mr. 8:27-30; Lc. 9:18-21*)

<sup>13</sup>Atti bisína Jesús lo yu gue yiesi nu te láni Cesarea gue Filipo, unnaba tisattebe ca benni rudheti ca tisa rule'e, re cabi:

—Neti Benni unbiyuu daa iyyabaaha, ¿nú rá ca benni dequi anca?

<sup>14</sup>Ca bi'iniha nna becabicabi rácabi:

—Ttulhe benni rácana lu ancalu Juan bi'ini begadi indaha. Adí benni nna rácana lu ancalu profeta Elías. Attu lhecaná nna rácana profeta Jeremíasba lu, o nuxaba attu ca benni uca profeta gue Tata Do Iyyabaaha lhe.

<sup>15</sup>Laniala nna rá Jesús ca bi'iniha:

—Lebi'i nna ¿núla rále anca?

<sup>16</sup>Simón bi'ini lágua Pedro, becabittebabí rábi:

—Lu ancalu Cristu xi'ini Tata Do Iyyabaaha, Benni doe anque Benni bani.

<sup>17</sup>Laniala nna rá Jesús bi'iniha:

—Carbárulu, xa Simón, xi'ini Jonás, cumu läga benni utixxi'enna lu nu unnelha, sinuqui Tata quia do iyyabaahaba utixxi'enie lu nu ralha. <sup>18</sup>Anáguaba neti upeguaba lu, lu ancalu Pedro.<sup>a</sup> Iqui iyya-ni nna dhuloa use'a ca benni tsia lecabí neti, ni elhuttiha bittu dhana locabi. <sup>19</sup>Neti utea derechu lenlu qui acalu nu banani ca benni innabia Tata Do Iyyabaaha, Larcala nna iyába nu innálú bittu dica un ca benni yies lo yu-ni nna chiba boquinna iqui Tata Do Iyyabaaha bittu aca nua atta doe. Nu innálú gua dicaba un ca benni yies lo yu-ni nna chiguuba boquinna iqui Tata Do Iyyabaaha aca nua atta doe.

<sup>20</sup>Laniala nna bentteba Jesús mandadu ca benni rudheti ca tisa rule'e qui tsa nuttu nu quixxi'encabi, labe nua Cristu.

---

<sup>a</sup> **16:18** Pedro dienna innána iyya.

### Jesús rixxi'e utticane

*(Mr. 8:31-9:1; Lc. 9:22-27)*

<sup>21</sup> Desdeba lania nna udulo Jesús utixxi'enie ca benni rudheti ca tisa rule'e, lee nna raca duelha tsie Jerusalén. Lhe'e yiesiha nna satexxatte lo ná ca benni teru elha rieni gueni gue ca benni Israel, lo ná ca nu lo gue ca bixxudiha lhe ca nu rule'e nu rá lo ca ley boca'ana Moisés lhe. Utixxi'aguabe re, ca unnuha nna utticane, ttiaca eyonna ubisa nna eyacanie. <sup>22</sup> Laniala nna ulequiesi Pedro Jesús attu atta subi, nianna utisabi Benniha rábi:

—¡Tata Do Iyyabaaha tsa läga ugüelha Benniha satelu aná, xa tata!

<sup>23</sup> Ttiaca Jesús bodequitteba loe begüie lo Pedro nianna re:

—¡Ubietta atta dua-ni, nu xxegüi! Rdacabalu ichecua lo neda gue Tata Do Iyyabaaha, cumu lu nna läga rulaba lelu atti rulaba le Tata Do Iyyabaaha. Attiba rulaba le ca benni se'e yies lo yu-ni rulaba lelu.

<sup>24</sup> Laniala nna rá Jesús ca benni rudheti ca tisa rule'e:

—Gansi nuxale raca lele acale benni udheti ca tisa quia-ni, raca duelha erú iqui erú le nua elha nabani gueni, uchíana lo iyába nu satena lhe attiba ttu benni diana noja crusi gueni atta utácan na lo nua, lana nna ettenobana neti, masquiba uttican na. <sup>25</sup> Cumu iyába ca benni rdaca odilá elha nabani guecani yies lo yu-ni, unnittiba elha nabani guecani, iyába ca benni erú iqui erú lecani gatticana lo ni'a quia nna aca banba ca nua ttu dia lii lo Tata Do Iyyabaaha. <sup>26</sup> Cumu tsa lägabi ixuu len ttu benni ganna e'eyuna acana nu banani iyá nu te yies lo yu-ni, elha nabani gueniha nna dia nittibana. Tsa lägabi te dacarna atti elha nabani gueri. <sup>27</sup> Cumu neti Benni unbiyuu daa iyyabaaha esíaya dedaaya lhe'e xieni ga'ana tsee gue Tata quia do iyyabaaha lenia ca ingeli gue Ben-na. Lania nna utea nu ralha ttu ttu benni dhína, gue cua nu benbacana. <sup>28</sup> Neti nna gualíbatia ria le, ttulhele ca nu se'e-ni nna läga gattixxile antisla ilenle neti Benni unbiyuu daa iyyabaaha dedaaya anca Benni rinnabia.

### Jesús botsía loe

(Mr. 9:2-13; Lc. 9:28-36)

**17** Dequide chi utee xxupa ubisa nna uchetteba Jesús Pedro lhe Jacobo lhe Juan betsi Jacobo lhe iqui ttu i'iya yadha atta suntteba laque use'e. <sup>2</sup>Nía nua botsía lo Jesús aníba lo ca bi'iniha. Loe nna uyu'u xieni guee attiba lo tatubisa-na, xoe nna beacana sitsi tuu attiba ttu xieni. <sup>3</sup>Nianna biláquinbi ucaxxe Moisés lenbi Elías, rinnecabi len Jesús. <sup>4</sup>Pedro nna ráttebabí Jesús:

—Benni bananie ri'itu, ¡tsee galá guaxxína se'etu nii! Gansi cuinalu raca lelu nna guacaba untu tsunna yo'o lhaga: ttu guelu nna ttu gue Moisés nna attu gue Elías nna.

<sup>5</sup>Laca sna rinneba Pedro nna ucaxxetteba ttu bea ru'u xieni gueni, uyu'una atta se'e ca benniha. Lhe'e beaha nna bientteba tsi'i ttu Benni unnee re:

—Benni anque xi'inia, Benni racaxxattatia guee. Len lee do tseea. Gue Ben-ni gualdo nagale.

<sup>6</sup>Atti bienini ca bi'ini rudheti ca tisa gue Jesús ca tisa-ni nna usttebaquinbi, atti bedútteba xibicabi axta liba binna lo xeacabi lo yu. <sup>7</sup>Laniala nna ubiga Jesús bennipe cabi, nianna re:

—Gualedulí. Bittu gasinle.

<sup>8</sup>Atti belhidha locabiha nna atturba Jesús biláquinbi due nía.

<sup>9</sup>Laca deyyacabi readicabi iqui i'iyaha nna bentteba Jesús ca bi'iniha mandadu re cabi:

—Tsa nuttu nu quixxi'enle gue nu bilenle, axta liba dequide gansi chi beacatia eríaya lhe'e baa atta yu'u ca nu yatti-na, neti Benni unbiyuu daa iyyabaaha.

<sup>10</sup>Ca benni rudheti ca tisa rule'e Jesús unnaba tisacabi Benniha, rácabi:

—¿Biaca rá ca nu rule'e nu rá lo ca ley boca'ana Moisés dequi primerla Elías esía, lenla nna isía benni anque Cristu?

<sup>11</sup>Jesús becabie re ca bi'iniha:

—Gualíba, primerla Elías esía, labi ose'e tseebi iyánea. <sup>12</sup>Ttiaca neti nna rpea le, chila beta Elías, ca benni nna läga beonbiacana bi'iniha, nu ucaba lecani bedhacacana bi'iniha. Anáguaba satea lo ná ca unná neti Benni unbiyuu daa iyyabaaha.

<sup>13</sup>Laniala nna guadú le ca bi'ini rudheti ca tisa rule'e, gue Juan bi'ini begadi indahaba nua rinne Benniha.

**Jesús beonie ttu uncuiti yu'u be xxegüi lhe'e cuerpu gueni***(Mr. 9:14-29; Lc. 9:37-43)*

<sup>14</sup> Atti besin Jesús lenie iyunnaba ca benni rudheti ca tisa rule'e atta se'e ixe tsitsiaba benni, ubigatteba ttu unbiyuu lo Jesús, nianna bedútteba xibini lo Benniha ráne:

<sup>15</sup> —Tata xisi, guatúachi lelu xi'inia-ni, cumu yu'u ttu be xxegüi lhe'e cuerpu gueni. Lana nna ratelhabana lo unná. Guadú rinnana lo gui, a guadú nna rinnana lhe'e inda. <sup>16</sup> Chi ucheana bisía lania na lo ca benni rudheti ca tisa rule'elha, ttiaca bittu udácabi eyoncabi na.

<sup>17</sup> Jesús becabie re:

—¡Lebi'i, ca benni bittu ria leni, nu lä du ta leni lhe!  
¿Núcachiarga neti dhoa uchíana lole? ¿Núcachiarga neti lania le?  
Gualsaxxí uncuitiha ni.

<sup>18</sup> Laniala nna bedhaca disa Jesús be xegüiha. Unnuha nna beríattebana lhe'e cuerpu gue uncuitiha. La uratteba nna beaca nua.

<sup>19</sup> Lenla nna suntteba ca benni rudheti ca tisa rulhe'e Jesús ubigacabi unnaba tisacabi Benniha rácabi:

—¿Biaca bittu udátu ebeatu be xxegüi-na?

<sup>20</sup> Jesús becabie re:

—Cumu lebi'i nna läga chi ria tsitsi lele. Gualíbatia ria, ttirca ria lele ladiba saro'oto attiba ttu besi gue coana murtasa, lania nna tsa lägabi tee ttu bixa nu bittu aca guele unle. Guacaba guele gále i'iya do-na: “Bitúa-ni nna güia guadho attu ladu-na.” I'iya-na nna tsia bunna sadhona nía. <sup>21</sup> [Ca loes be xegüi-ni, läga eríacana gansi bittuba inneri len Tata Do Iyyabaaha lhe utte ubina lhe'eri lhe.]

**Ni rerupa libe rixxi'a Jesús utticane***(Mr. 9:30-32; Lc. 9:43-45)*

<sup>22</sup> Atti requi Jesús daca Galilea lenie ca benni rudheti ca tisa rule'e, lee nna re ca bi'iniha:

—Neti, Benni unbiyuu daa iyyabaaha, labíaba utecana neti las ná ca benni. <sup>23</sup> Ca unnuha nna utticana neti, ttiaca dequide eyonna ubisa nna eyacatia.

Ca benni rudheti ca tisa rule'e nna si'irurba bese'ecabi.

### Ruquixacana Jesús belhiu gue yotuha

<sup>24</sup> Atti chi bisína Jesús lenie ca bi'ini rudheti ca tisa rule'e lhe'esi Capernaum. Ca benni ruquixa belhi gue yotuha nna guannaba tisacana Pedro, rácan bi:

—Maestro guele-na, ¿si biba rixa unná belhi ralhari uteri gue yotu-na?

<sup>25</sup> Pedro nna becabibi rábi:

—Gua rixaba Ben-na.

Atti uta'a Pedro lhe'e yo'oha nna lola Jesús unnaba tise bi'iniha re:

—Simóni, lu nna ¿bila rálú? Ca nu rinnabia se'e yies lo yu-ni, ¿nú benni ruquixacana? ¿Si ca benni lo yies guecani, aca? ¿Ca benni dittu, aca?

<sup>26</sup> Pedro becabibi rábi:

—Ca benni dittu-na.

Jesús rátteba bi'iniha:

—Anla gansi anía anca, lägabi ralha ca benni lo yies guequinna quixacana. <sup>27</sup> Ttiaca qui bittu unri isa'aquinna lu nna güia ro'o indattoo-na, bedelha nu rudaxxu belha-na lhe'e inda-na. Primerba belha nu udaxxuluha nna ixxálu ro'oni. Nía satti'alu ttu belhi ro'o nua. Lu nna udaxxulu nua qui tsialu satixalu nu anca quia lhe nu anca guelu lhe.

### Jesús rixxi'e gue gasná un ttu benni anca nu lo

(Mr. 9:33-37; Lc. 9:46-48)

**18** La laniatteguaba ubiga ca benni rudheti ca tisa rule'e Jesús lo Benniha, lacabi nna unnaba tisacabi rácabí:

—Delo iyá ca benni rinnabia Tata Do Iyyabaaha, ¿nú nua anca nu ra xxeniru leni?

<sup>2</sup> Jesús uxttebe ttu unto bedúe salhe guecabi, <sup>3</sup> nianna re:

—Gualíbatia rpea le, gansi bittuba otsiale elha run guele qui unle attiba ttu unto, tsa läga aca iselale ca benni rinnabia Tata Do Iyyabaaha. <sup>4</sup> Larcala benni rechidagaa leni runna ancana attiba unto du-ni nna unnuha acana nu ra xxenru leni guee delo iyá ca benni rinnabia Tata Do Iyyabaaha. <sup>5</sup> Anáguuba nuxaba benni de ria

leni neti nna ulabina ttu benni anca elha run gueni attiba unto-ni, netiba nua rulabi nua.

<sup>6</sup> 'Ttiaca gansi nuxa benni unna ixúyie ttu ca benni ria leni neti bittu chi se'e tsitsi lo neda gue Tata Do Iyyabaaha unna ttu nu lä anca tsee, tseerla salíana nua uxxicacana ttu iyya gue mulinu xení yienni atti udelhacan na lhe'e indattoo.

<sup>7</sup> '¡Gualichiaru le yies lo yu-ni! Satíaba tee nu runna un ca benni nu lä anca tsee, cumu anába te aca. ¡Ttiaca gualichiaru le benni unna ixúyie ca benni uncana nu lä anca tsee!

<sup>8</sup> 'Larcala gansi ni'altha o nálha runna ixúyielu unlu nu lä anca tsee, lu nna uchú na uru'una na, cumu tseerla salíana lu esínlu atta gatta elha nabani guelu ttu dia lii bittu ttu lha'a ni'alü o ttu lha'a nálü tee, attichula tsialu atta ttu dia liiba rite lo guiha leni irpa lha'a ni'a nálü. <sup>9</sup> Gansi ttu iyya lolha runna ixúyielu unlu nu lä anca tsee, lu nna ulequi na uru'una na, cumu tseerla salíana lu esínlu atta gatta elha nabani guelu ttu dia lii bittu ttu lha'a iyya lolu tee, attichula tsialu lo gui re atta lexúaha leni irpa lha'a ca iyya lolha.

<sup>10</sup> 'Gualdo cuidadu, bittu cu'u ni'ale nuxa ttu ca benni bittu ra xxeni leni se'e-ni. Cumu neti rpea le, ca ingeli gue ca unní nna satíaba se'ecabi lo Tata quia do iyyabaaha rinnabacabi aca len Bennä ca unní. <sup>11</sup> [Cumu neti Benni unbiyuu daa iyyabaaha delha eguila ca benni chi dia nitti qui odiláya cana.]

<sup>12</sup> '¿Birquinle uni ttu unbiyuu se'e ttu gayua (100) carne'e gueni, gansi iganna ttu nua? ¿Si läba oca'anbana a tta yu'u chennia (99) ca nua lo lhilhiha, nianna tsiana satilana carne'e bigannaha? <sup>13</sup> Gansi saxyána eselinna nua nna neti nna gualíbatia rpea le, edacarla leni gue nu beselaha attichula gue a tta yu'u chennia (99) ca carne'e ca nu bittu bigannaha. <sup>14</sup> Anáguba Tata gueri do iyyabaaha, bittuguuba raca lee tsia nitti ni ttu ca benni bittu ra xxeni leni se'e-ni.

**Jesús rixxi'e gasná dhíri elha xen lasi gue attu benni ria lenie  
(Lc. 17:3)**

<sup>15</sup> 'Gansi ttu benni ria leni neti udhacan lu ttu nu bittu anca tsee, güia guanne lenna ttubalu nna ttubana nna utixxi'enna gue nu bittu anca tsee benna. Gansi oquinnaba iquini gualíba benna nu bittu anca tsee, lania nna chiba událu beaca tseelu len lana. <sup>16</sup> Ttiaca

gansi bittuba udo nagani guelu, uchee attu benni o chupa benni. Anía nna tse'e chupa o tsunna ca benni una nagacani gue iyába nu inne lenlu nua. <sup>17</sup>Gansi bittuba udá naga nua gue ca benni icheeluhu nna utixxi'en adí ca benni ria le Tata Do Iyyabaaha. Gansi bittuguuba udá naga nua gue ca bi'iniha nna lania nna oquinnaba iquile unnuha nna ancabana attiba ttu nu bittu ria leni Tata Do Iyyabaaha o attiba ttu nu rudaxxu sigá belhi ancana nu ruquixa belhi deyya Roma.

<sup>18</sup>'Gualíbatia rpea le, iyába nu innále bittu dica un ca benni yies lo yu-ni nna chiba boquinna iqui Tata Do Iyyabaaha bittu aca nua atta doe. Nu innále gua dicaba un ca benni yies lo yu-ni nna chiguuba boquinna iqui Tata Do Iyyabaaha aca nua atta doe.

<sup>19</sup>'Attu libe rpea le, gansi ni yies lo yu-ni, ttuba ese'e chupale oquinna iquile innábale ttu bixa len Tata quia do iyyabaaha, Benniha nna utebe nu innábale. <sup>20</sup>Cumu atta rise'e chupa o tsunna benni de ria lecani neti, níaba dua lagüi guecani.

### Ejemplu gue ttu nu bittu uxí elha xen lasi

<sup>21</sup>Laniala nna ubiga Pedro unnaba tisabi Jesús, rábi:

—Benni bananie neti, ¿balha libe dica dhia elha xen lasi gue ttu betsi loesia gansi unna nu bittu anca tsee len neti? ¿Si gasi (7) libeli dhia elha xen lasi gueni?

<sup>22</sup>Jesús becabie re:

—Läriga neti gasi libe, sinuqui gasi libe gayuna yu'u tsii (70) libe.

<sup>23</sup>'Larcala nna atti rinnabia Tata Do Iyyabaaha ca benni, raxxína leni nu uca len ttu nu rinnabia gue ttu yiesi. Unnuha nna beaxina ca benni riben sina gueniha qui otecaná belhi uxí ganna canaha.

<sup>24</sup>Atti chi udulona rennabana ca unnuha belhiha nna bisíntteba lencana ttu nu daana xenlha xen tsitsiaba belhi. <sup>25</sup>Ttiaca unnuha nna läga udána quixana nu daanaha, larcala nna nu rinnabiahha nna benttebana mandadu utto'ocana nua, ttupa sela nuila gueniha lhe ca xi'inniha lhe iyába nu te gueni lhe anía liba nna gaxa gue nu daanaha. <sup>26</sup>Nu riben sina daa belhiahha nna bedútteba xibini bettoo loni lo yu lo nu rinnabiahha, lana nna unnabana lo nua rána: "Upachi pasensi quia, xa benni banani neti. Neti nna guaguixaba iyába nu daaya guelu." <sup>27</sup>Nu rinnabiahha nna guatúaba leni nu riben sina gueniha, uxíbana elha xen lasi gue belhi daa nua gueni, nianna bolhábana nua.

<sup>28</sup> "Ttiaca atti bería nua lisi nu rinnabiahha nna beti'attebana attu benni riben lenna sinaha. Unnuha nna saro'oru belhi daa nua gueni. Lana nna bedaxxuttebana lhe'e yien nua, atti rána nua: "¡Utixa belhiu daalu quia!" <sup>29</sup> Laniala nna bedú xibi nu daa belhiha bettoo loni lo yu, nianna unnabana lo nua rána: "Upachi pasensi quia, guaguixaba neti iyába nu daaya gueluha." <sup>30</sup> Ttiaca lana nna läga uca leni. Güialana guattixxana nua lisiyya axta qui biría lenna utixa nua iyába belhi nu daa nua gueniha. <sup>31</sup> Atti bilen adí ca benni riben sina gue nu rinnabiahha gue nu ben nua nna tsitsiba bedú si'lina lecani, atti güiattebacana guatixxi'aquinna nu rinnabiahha iyába nu ucaha. <sup>32</sup> Laniala nna uxi nu rinnabiahha nua, nianna rána nua: "¡Nu lä du ta leni! Neti uxiba elha xen lasi guelu gue iyába belhi daalu quia, cumu benlu ruegu loa, <sup>33</sup> lu nna ¿biacala bittu guatúa lelu nu daana belhi gueluha attiguuba guatúa lasia lu?" <sup>34</sup> Nu rinnabiahha nna de bisa'axxattabinna benttebana mandadu ca nu ugüecana nua axta liba quixana iyá belhi daanaha.

<sup>35</sup> —Aníaguuba udhaca Tata quia do iyyabaaha le, gansi bittuba dhíle elha xen lasi gue ttu betsi loesle itú iqui itú lele.

### Bittu dica udhá iqui ttu unbiyuu nuila gueni

(Mr. 10:1-12; Lc. 16:18)

**19** Atti uluxa unne Jesús ca tissa-ni nna biríattebe lo yu gue Galilea, die daca lo yu nu te láni Judea nu te attu ladu gue yoo Jordán. <sup>2</sup> Ixe tsitsia benni dia denocana Benniha. Lee nna beonbe ca benni rani se'e nía.

<sup>3</sup> Ttulhe ca fariseo ubigattecacana atta du Jesús, qui cu'ubiacana Benniha nna unnaba tisattecacane, rácane:

—¿Gua dica udhequi ttu unbiyuu nuila gueniha lo ni'a gue ttu bixaba?

<sup>4</sup> Lee nna becabie guecani, re:

—¿Si bittuba chi belabale lo ca sitsi gue Tata Do Iyyabaaha atta rá atti primerba ben Tata Do Iyyabaaha ca benni, "benie ttu unbiyuu nna ttu nuila nna"?<sup>a</sup> <sup>5</sup> Ráguate: "Denuala nna oca'ana unbiyuu-na tata nan gueni qui utsá náni leni nuila aca latselani. Lania nna irpabacana eyacacana attiba ttuba benni."<sup>b</sup> <sup>6</sup> Larcala nna

<sup>a</sup> 19:4 Génesis 1:27, 5:2    <sup>b</sup> 19:5 Génesis 2:24

lärga anca ca nua chupa benni, sinuqui ttuba benni chi beaca ca nua. Nuarcala nna läga dica elha'a ttu benni lhe'e loesi ca benni chi bequeti Tata Do Iyyabaaha.

<sup>7</sup> Ca fariseo nna becabicana rácana Benniha:

—¿Biacala rá lo ca ley boca'ana Moisés, dequi guadicaba ela'a ttu unbiyuu len nuila gueniha leni ttu sitsi ilhidhana utena len nua atta rixxi'a bixa lo ni'a gue ela'acana?

<sup>8</sup> Jesús becabie re cana:

—Uxielha galá Moisés udhequile ca nuila guele-na, cumu de yatterba de ditile. Ttiaca Tata Do Iyyabaaha desdeba atti bese'e ca primer benni, läga uca lee aca aná. <sup>9</sup> Neti nna ria le, unbiyuu nu cuentaba udhequini nuila gueniha qui aca edína attu nuila subi, gan läba de bisá nua attu unbiyuu subi, ttu nu satsaba nua uni unbiyuuh. Anáguaba unbiyuu nu edí nuila bedhá iquicaniha, ttu nu satsaba nua unna.

<sup>10</sup> Ca benni rudheti ca tisa rule'e nna ráttebacabi Benniha:

—Gansi anála rate ca benni rutsá nácani, tsa lägabi lheaca anca utsá ná benni.

<sup>11</sup> Jesús becabie re ca bi'iniha:

—Läga iyá benni ancacana nu dica sadú leni gue nu ria-ni, sunruba ca benni chi ancani Tata Do Iyyabaaha ttedaaquinna gue nu ria-ni gua radú lecani gue unni. <sup>12</sup> Se'e ca unbiyuu bittu rutsá nácani, cumu lhe'e nan guelicani chi ancacana nu bittu dica dho len nuila. Se'e adí ca unbiyuu bittu rutsá nácani cumu ca benni se'e yies lo yu-niba roquinna iquicani guecani. Se'eguaba ca unbiyuu ca nu la labacana roquinna iquicani bittu utsá nácani qui aca itú iqui itú lecani ixuucana lo sina gue Tata Do Iyyabaaha, anía nna qui tsani ca benni rinnabia Benna. Larcala nna benni rudhaca leni guadána unna nu ria-ni nna unbana aná.

### Jesús unnabe elha nabani gue ca unto lo Tata Do Iyyabaaha

(Mr. 10:13-16; Lc. 18:15-17)

<sup>13</sup> Nianna ca benni nna uchecana ttu lhe ca unto guecaniha lo Jesús qui uxxúa nee iquicani, innábe elha nabani guecani lo Tata Do Iyyabaaha, ttiaca ca benni rudheti ca tisa rule'e nna bedhaca disattebacabi ca benni che ca untoha. <sup>14</sup> Laniala nna rá Jesús:

—Gualgüelha ca unto-na itacana len neti, bittu usunale, cumu ca benni anca attiba ca unní liba ancacana benni rinnabia Tata Do Iyyabaaha.

<sup>15</sup> Dequide bexxúa nee iqui ca untoha nna deyyattebe.

### **Ttu uncuiti texxatta gueni unne lenna Jesús**

(*Mr. 10:17-31; Lc. 18:18-30*)

<sup>16</sup> Ttu uncuiti nna ubigana lo Jesús unnaba tisane ráne:

—Maestro, ¿bi nu tsee dica unia qui gatta elha nabani quia ttu tsaba?

<sup>17</sup> Lee nna becabie re:

—¿Biaca neti rálu benni tsee? Cumu tsa läganu te ancana benni tsee, sunruba Tata Do Iyyabaaha anque Benni tsee. Ttiaca gansi raca lelu gatta elha nabani guelu ttu tsaba, bedo tisa gue nu beni benna mandadu unri.

<sup>18</sup> Uncuitiha nna unnaba tisana rána:

—¿Nú ca na?

Jesús becabie re:

—Bittu utilu benni, bittu utsá ro'olu nu bittu anca latselalu lhe bittu lhanalu lhe bittu un lelu cuentaba unlu xiyya gue benni subi lhe <sup>19</sup>gapalu respeto tata nan guelu lhe aquinlu gue ca benni attiba raquinlu gue la luba lhe.

<sup>20</sup> Uncuitiha nna becabina rána:

—Iyába unní, atti ancalia güexxaha uduloa runia. ¿Biruha la reasa unia?

<sup>21</sup> Jesús becabie gueni re na:

—Gansi rdacalu acalu benni runi nu anca tsee, beyya guatto'o iyárecha nu te guelu. Belhi gue nua nna begüee ca benni bittu te guecani. Anía liba nna gatta elha tsee guelu iyyabaaha. Lania nna utátte betteno neti.

<sup>22</sup> Atti bienin uncuitiha nu rá Benniha na, si'irurba runna deyyana, cumu de ancana nu texxatta gueni.

<sup>23</sup> Laniala nna rá Jesús ca benni rudheti ca tisa rule'e:

—Neti nna gualibatia rpea le, tsitsi galá anca e'eyu ttu benni te gueni acana benni rinnabia Tata Do Iyyabaaha na. <sup>24</sup> Attu libe rpea le: Gaxa guaterla ttu nimala te láni camello lhe'e belea do xan ttu

tsioxa atti ttu benni te gueni e'eyuna acana benni rinnabia Tata Do Iyyabaaha.

<sup>25</sup> Atti bienini ca benni rudheti ca tisa rule'e iyába unní nna adílabo de bebanquinbi, nianna rá loescabi:

—Gansi anía anca, ¿núla guadána lhána qui bittu tsia nittina ganna?

<sup>26</sup> Begüiatteba Jesús locabi, nianna re:

—Ca benni se'e yies lo yu-niba bittu dhacana uncana unní, ttiaca Tata Do Iyyabaaha iyába raca guee runie.

<sup>27</sup> Laniala nna bequi Pedro rábi Benniha:

—R'ilitu nna iyába nu te guetu boca'antu, atti dattebatu len cuinalu. ¿Bi ralhatu dhítu?

<sup>28</sup> Jesús re cabi:

—Neti nna gualíbatia rpea le, gansi chi bisía sá ecubi yies lo yu-ni leni iyába nu se'e loni, lania nna neti Benni unbiyuu daa iyyabaaha dhoa lo xxila ga'ana tsee qui innabiaya. Anáguba lebi'i ca benni denoo neti, ebíaguabale lo tsi'inu (12) ca xxila qui unle elha uxtisi gue ca tsi'inu cue ca benni datía benni lá Israel.

<sup>29</sup> Nuxaba benni, gansi de lo ni'a quia chi bedhá iquini yo'o gueni lhe betsini lhe danni lhe tata gueni lhe nan gueni lhe nuila gueni lhe xi'inni lhe lo yu gueni lhe lana nna ttu gayua (100) libe tteba edína nu bennittinaha, dhína elha nabani gatta ttu tsaba gueni lhe.

<sup>30</sup> Ttiaca ixe ca nu runi ancacana nu ra xxeni leni nnanna eyacacana nu bittu ra xxeni leni, ixeguaba ca nu bittu ra xxeni leni nnanna eyacacana nu ra xxeni leni.

### Jesús rixxi'e ttu ejemplu gue ca benni uren sina lo yu atta yada ya besuli

**20** <sup>1</sup> Atti rinnabia Tata Do Iyyabaaha ca benni, raxxína leni nu beni ttu unbiyuu yadinna ya besuli lo yu gueniha.

Unbiyuuhha nna dilatteba biríana diana güetila ca benni qui cuencana sina lo yu atta yadinna ca ya besuliha. <sup>2</sup> Lana nna begüeena tisa quixana ca nu cuen sinaha nu raxa ttu benni gue ttu sá sina. Nianna udhelhattebana ca unnuha lo yu atta cuencana sina.

<sup>3</sup> Attiba tu retin jaa dila nna bederíana attu libe, lana nna bilenna adí ca unbiyuu guanattibaquinna siacana lhe'eli'a gue atta raca i'iyaha. <sup>4</sup> Nianna rán ca nua: “Lebi'i lhe gualtsiaguaba gualcuen sina lo yu quiah. Neti nna guaguixaba le nu ralhale dhíle.” Lacana nna

diattebacana.<sup>5</sup> Aníaguaba bedeoni unbiyuu beaca gueni lo yuha attiba tu retin ts'i'inu (12), attiba tu retin tsunnaha lhe.<sup>6</sup> Atti chi deoba ugiüena retin gayuha nna bedería dacabana attu libe. Nianna bilenna adí ca unbiyuu guanattibaquinna siacana nía. Lana nna unnaba tisan ca nua, rán cana: “¿Biaca cuentaba siale nii betú sába, lä ribenle sina?”<sup>7</sup> Ca unnuha nna becabicana rávana: “Cumu läganu bennana sina guetu.” Unbiyuuh nna rán ca nua: “Anáguba lebi'i, gualtsiaguuba gualsachen sina lo yu quiaha, neti nna guaguixaba le nu ralhale dhíle.”

<sup>8</sup> Atti chi ulha sá nna unbiyuu beaca gueni lo yuha nna rána nu banani sina gueniha: “Beaxi ca benni ren sina-na, begieecana lhiaxacani ralhacana dhicana. Lu nna udulo utixa ca benni bisía bitona, anála nna dialu len ca benni bisía dilatte baniha.”<sup>9</sup> Laniala nna ubiga ca benni uta'a sina attiba tu retin gayuha. Ca unnuha nna cua ttu ttubacana uxí lhiaxacani gue nu anca gue ttu sá.<sup>10</sup> Larcala nna atti chi ubiga ca nu uta'a sina dilatteha nna ucaquinna ga xenrula anca lhiaxacani dhicana, ttiaca iyábacana uxícana lhiaxa gue nu anca gue ttu sá sina.<sup>11</sup> Atti chi uxícana belhiha nna udulottebacana unne papabacana belisacana unbiyuu beaca gueni lo yuha, rácan na:<sup>12</sup> “Ca unní nna chiba dioraha bisíacana, a sunruba ttu ura urencana. Lu nna ttuba anca lhiaxa betelu guetu, ri'itu nna betu sába urentu sina, chi bechíatu uyu'utu lhe'e ubisa-na lhe.”<sup>13</sup> Ttiaca unbiyuu beaca gueni lo yuha nna becabina gue ttu ca nua, rána: “Xa benni raca betsi loesia, neti nna lägabi runia ni ttu nu lä anca tsee len lu. ¿Si läba chiba bodha'anri tisa quixa lu nu anca lhiaxa gue ttu sá sina?”<sup>14</sup> Larcala bedaxxu nu anca guelu nna beyyatte. Neti nna racaba lasia quixa ca nu uta'a sina bitona ttuba leni nu utixa lu-na.<sup>15</sup> Cumu neti nna guacaba unia len belhi quia-na nu racaba lasia. ¿Si rapabalú malisi anca benni tsee, aca?”

<sup>16</sup> Nianna rá Jesús:

—Larcala nna ixe ca nu anca nnanna nu ra xxeni leni eyacacana nu bittu ra xxeni leni, ixeguaba ca nu bittu ancacana nu ra xxeni leni nnanna eyacacana nu ra xxeni leni. Cumu ixeba benni raxi Tata Do Iyyabaaha, ttiaca babarba benni rucue qui acacana guee.

### Ni beyonna libe rixxi'a Jesús gattie

(Mr. 10:32-34; Lc. 18:31-34)

<sup>17</sup> Laca yu'u Jesús neda die lhe'e yiesi Jerusalén, uxttebe suntteba ca bi'ini tsi'inu rudheti ca tisa rule'e attu atta subi, nianna re ca bi'iniha:

<sup>18</sup> —Gualuyurga, niba diari lhe'e yiesi Jerusalén atta udaxxucana neti, Benni unbiyuu daa iyyabaaha, qui utecana neti las ná ca bixxudi anca nu lona leni ca nu rule'e nu rá lo ca ley boca'ana Moisés. Ca unná nna oquinna iquicani gattia. <sup>19</sup> Lacana nna utecana neti las ná ca benni dittu qui udhaca güecana neti, quincana neti lhe utácaná neti lo ya crusi lhe. Ttiaca eyonna ubisa nna eyacatia.

### Ttu nuila unnababi lo Jesús cuia ca xi'inbiyuubiha lhuitta Benniha iyyabaaha

(Mr. 10:35-45)

<sup>20</sup> Nan gue ca xi'ini Zebedeo lenbi irpaba ca xi'inbiha, ubigacabi lo Jesús. Atti bedútteba xibibi lo Benniha qui innábabi uni Benniha ttu nu raca lebi. <sup>21</sup> Jesús unnaba tise bi'iniha re:

—¿Bi raca lelu innábalu?

Bi'iniha nna becabibi rábi:

—Rinnaba lolu dhielhalu cuia irpa ca uncuiti quia-ni lhuittalú gansi chi rinnabialuhu, ttuna dhon daca derechu guelu, a ttuna nna dhon deca rabesa guelu.

<sup>22</sup> Laniala nna becabibi Jesús re:

—Lebi'i nna läga yule bixunna rinnabale. ¿Si guarudhaca lele guadále satele loesi nu satea? ¿Si guadále uchíale uyúle elha disa loesi elha disa uyúa?

Lacabi nna becabicabi rácabi:

—Guadábatu.

<sup>23</sup> Jesús becabie re ca bi'iniha:

—Gualíba, lebi'i nna guadábale uyúle loesi elha disa uyúa, guadábale satele loesi nu satea lhe ttiaca läga neti ralha unia qui dho ttule daca derechu quia attule nna daca rabesa quia. Tata quia do iyyabaaha liba innee nupaxa chi ga'ananie ralha cuia lhuitta.

<sup>24</sup> Atti bienini a tsii ca benni rudheti ca tisa rule'e Jesús nu rinnaba ca bi'iniha, bisa'attebaquinbi leni irpa betsiba ca bi'iniha.

<sup>25</sup> Jesús uxttebe iyába ca bi'iniha, nianna re:

—Lebi'i nna la gua yuxebale dequi ca nu rinnabia gue ca yiesi dittu-na, ritee lo bedábacana rinnabiaca na ca benni banquinna. Unnuhaguaba run ca nu lo ra xxeni lequinna lhe rite lo bedábacana nu runcana. <sup>26</sup> Ttiaca lebi'i nna läga dica udhaca loesle aná. Cumu nu rdacana acana nu ra xxeni leni guele nna unnuha udá náni lole. <sup>27</sup> Larcala nna nuxale rdacale acale nu lo, unnuha nna acana attiba ttu nu tto'o lo sina lole. <sup>28</sup> Attiba neti, Benni unbiyuu daa iyyabaaha, läga delha yies lo yu-ni qui udá ná ca benni loa, sinuqui delhaba qui udá náya lo ca benni, gattia utea elha nabani quia qui lhá ixeru ca benni qui bittu tsia nitticana lhe.

### Jesús beonie chupa ca benni xua locani

(Mr. 10:46-52; Lc. 18:35-43)

<sup>29</sup> Atti bería Jesús lenie ca bi'ini rudheti ca tisa rule'e lhe'e yiesi Jericó, ixe tsitsiaba benni denocane. <sup>30</sup> Chupa ca benni xua locani sia ro'o nedaha nna atti bienquinna dia Jesús ritee nía, lacana nna uresi'attebacana rávana:

—¡Benni datía David, guatúachi lelu ri'itu, xa Tata!

<sup>31</sup> Ca benni denalhaha nna rudhaca disacana ca nu xua locaniha qui eyaca sicana, ttiaca adíla idisa uresi'a ca nua rávana:

—¡Benni datía David, guatúachi lelu ri'itu, xa Tata!

<sup>32</sup> Laniala nna uleda Jesús, nianna uxie cana re cana:

—¿Bi raca lele unia guele?

<sup>33</sup> Lacana nna becabicana rávana:

—Xa Tata, raca letu ilentu.

<sup>34</sup> Lania nna guatúatteba le Jesús ca unnuha, atti utanattebe iyya locani. Snaba lania nna biláquinna. Nianna diattecacana denocana Benniha.

### Jesús ute'e lhe'e yiesi Jerusalén

(Mr. 11:1-11; Lc. 19:28-40; Jn. 12:12-19)

**21** Atti chi deoba isín Jesús lenie ca benni rudheti ca tisa rule'e lhe'e yiesi Jerusalén, bisínttebaque atta re lhe'esi te láni

Betfagé, lo lhilhi atta daa ca ya olivuha. Laniala nna udhelha Jesús chupa ca bi'ini rudheti ca tisa rule'e,<sup>2</sup> lee nna re ca bi'iniha:

—Gualtsia lhe'esi re ttu ladu-na. Na satti'ale ttu burru nná nalhana lenna ttu burru cuiti. Gualudhán na, atti gualetá tte lencana nii.<sup>3</sup> Gansi nuxa bixa innána, lebi'i nna gualgás na: “Benni bananie ri-naba reasanie ca unní, lenla nna güetteru'unttebe cana.”<sup>4</sup> Unní uca qui guaxxína nu chi rá benni uca profeta gue Tata Do Iyyabaaha atti rábi:

<sup>5</sup> Gualgás ca benni gue yiesi lá Sión:

“Gualugüiarga, ni Benni innabia gueleha chi dee atta se'ele-na.

Lee nna bittu runie anque benni ra xxeni leni,  
cu'e ttu burru cuiti xi'ini ttu burru ruja yuaba doe dee.”<sup>a</sup>

<sup>6</sup> Ca benni rudheti ca tisa rule'e Jesús, bedobacabi tisa güiacabi qui benbacabi nu rá Benniha uncabi.<sup>7</sup> Lacabi nna bechebacabi burru nnáha lenna xi'inniha, atti ulu'uttebacabi ca lari rucucabiha cu'e ca nua. Benniha nna udottebe cu'e burru cuitiha.<sup>8</sup> Attulade ixe tsitsia benni se'e nía. Ttulhecana nna ca lari nucucanaba ritsilacana lo neda atta dia Benniha, adícana nna lo ca yaga daa níaba ritsacana qui ritsilacana lo nedaha.<sup>9</sup> Ca nu denalha lhe ca nu dia neruha lhe ribesi'acana rávana:

—¡Xxeni ra lelu lu ancalu benni datía David! ¡Carbáru lu ancalu Benni udhelha Tata Do Iyyabaaha! ¡Xxeni ra le Benni do iyyabaaha!

<sup>10</sup> Atti uta'a Jesús lhe'e yiesi Jerusalén, iyába ca benni bisatsacana, rinnaba tisa loescani rávana:

—¿Nú benni unní?

<sup>11</sup> Ca benni denoha nna rávana:

—Jesús Benni anque profeta gue Tata Do Iyyabaahaba Ben-na, Benni beaca lasie lhe'esi Nazaret nu re lo yu gue Galilea.

**Jesús bería lee ca nu yu'u güetto'o lhe'eli'a gue yotuha**

(*Mr. 11:15-19; Lc. 19:45-48; Jn. 2:13-22*)

<sup>12</sup> Atti uta'a Jesús lhe'eli'a gue yotu gue Tata Do Iyyabaaha nna udulottebe bería lee ca nu yu'u güetto'o nía, ca nu ro'oha lhe.

---

<sup>a</sup> 21:5 Zacarías 9:9

Berixxi lottebe ca mexa gue ca nu rotsía belhiha lhe atta sia ca nu ruto'o becha lhe.<sup>13</sup> Nianna re cana:

—Lo ca sitsi atta dia ca tisa gue Tata Do Iyyabaaha rinne ben-na re: “Yo'o quia-ni ancana yo'o atta inne len ca benni neti”, ttiaca lebi'i nna attiba belea anca lisi ubana la chi beonle yotu-ni.<sup>a</sup>

<sup>14</sup> Ro'o yotuha nna ubigatteba ca nu xua locani lhe ca nu xi lhe lo Jesús. Benniha nna beonttebe cana. <sup>15</sup> Ttiaca ca nu lo gue ca bixxudiha lhe ca nu rule'e nu rá lo ca ley boca'ana Moisés lhe bisa'attebaquinna atti biláquinna ca milagru ben Benniha lhe atti bienquinna ribesi'a ca unto yu'u ro'o yotuha rácana: “¡Xxeni ra le Benni datía David!” <sup>16</sup> Nianna rácana Jesús:

—¿Si gua rieninlu nu rá ca unto-na?

Lee nna becabittebe re:

—Gua rienbati neti. ¿Si bittuba chi belabale lo ca sitsi gue Tata Do Iyyabaaha atta rá?:

Lu nna benlu qui iría ro'o ca unto-na lhe ro'o ca unto sna  
rasnaba lhe

ca tisa cuequi xencana lu.<sup>b</sup>

<sup>17</sup> Laniala nna bodha'ane cana nía, atti beríattebe lhe'e yiesi Jerusalén die lhe'e yiesi lá Betania. Níaba bea'ane la ela.

### Bibisba ya iguha

(Mr. 11:12-14, 20-26)

<sup>18</sup> Betteyú dila nna atti bequi Jesús deyye lhe'e yiesi Jerusalén, lee nna bisía bitunie. <sup>19</sup> Atti bilánie ttu ya igu ro'o nedaha nna ubigattebe atta du nua, ttiaca niba ttu igu bitti guati'e lo nua, sunruba lhaga gue nua sia. Laniala nna re ya iguha:

—¡Tsa bitturu cuia nu xixxi guelu!

Snaba lania nna ubisi yagaha. <sup>20</sup> Ca bi'ini rudheti ca tisa rule'e nna atti biláquinbi nu ucaha nna bebanbaquinbi, nianna unnaba tisacabi Benniha, rácabi:

—¿Biaca ttulharba ubisi ya igu-na?

21 Jesús becabie re:

—Neti nna gualíbatia rpea le, gansi lebi'i ria tsitsi lele Tata Do Iyyabaaha, bitti rudú chupan lele, lania nna läga sunru aca guele

<sup>a</sup> 21:13 Isaías 56:7    <sup>b</sup> 21:16 Salmo 8:2

unle loesi nu bedhaca ya igu-ni, sinuqui guacaguaba guele gále i'lya do-na: "Ubietta atta dolha nna güiatte bixudi lhe'e indattoo-na." Lania nna acaba nu chi ráleha.<sup>22</sup> Iyába nu innábale attiinnele len Tata Do Iyyabaaha, guadíbale nua ladiba ria tsitsi lele Ben-na.

### **Rinnaba tisacana Jesús ga guaxxíe elha rinnabia guee**

(*Mr. 11:27-33; Lc. 20:1-8*)

<sup>23</sup> Atti chi besina Jesús lhe'eli'a gue yotuha nna laca due nía rule'enie ca benni, ubigatteba ca nu lo gue ca bixxudiha lencana ca nu teru elha rieni guecani gue ca benni Israel, rácane:

—¿Bi elha rinnabia rapalu qui runlu aná? ¿Nú betena elha rinnabia lenlu qui unlu nu runlu-na?

<sup>24</sup> Jesús becabie re:

—Anáguaba neti lhe innába tisaguaba le ttu bixa, gansi güecabile quia nna anáguaba neti ecabiguaba guele quixxi'atia le nuxa betena elha rinnabia quia qui runia nu runia-ni.<sup>25</sup> ¿Nú udhelhana Juan qui ugadibi benni inda? ¿Si Tata Do Iyyabaaha, aca? ¿Si ca benni se'e yies lo yu-ni aca?

Lacana nna uyu'uttebacana unne len loescani, nianna rácana:

—Gansi ecabiri innári: "Tata Do Iyyabaahaba udhelhe bi'iniha", lania nna innáttebunna: "¿Biacala bittu güia lele gue nu rá bi'iniha ganna?"<sup>26</sup> Bittuguaba aca innári dequi ca benni se'e yies lo yu-niba udhelhacana bi'iniha, cumu ri'i nna rasbinri lo ca benni qui lä eyequi nocanri, de iyábacana rácana Juan ucabi ttu profeta gue Tata Do Iyyabaaha.

<sup>27</sup> Laniala nna becabicana gue Jesús rácane:

—Bittu yutu.

Benniha nna becabie re cana:

—Anáguaba neti, bittuguaba quixxi'aya nuxa betena elha rinnabia quia qui unia nu runia-ni.

### **Jesús rixxi'e ttu ejemplu gue chupa ca uncuiti**

<sup>28</sup> Ráguba Jesús ca nu lo gue ca bixxudiha lencana ca nu teru elha rieni gueni gue ca benni Israel:

—¿Bi raquinle gue nu upea le-ni? Udo ttu unbiyuu se'e chupa xi'in biyuubi. Labi nna ubigabi lo nu xenilha, nianna rábi na: "Xi'into, güia guacheni sina nasá lo yu quia atta daa ca ya besuliha."

<sup>29</sup> Unnuha nna becabina rána: “Bittu raca lasia tsiaya.” Ttiaca dequila nna bexiyyinna nianna güiabana. <sup>30</sup> Lenla nna ubigabi lo nu güexxaha. Labi nna aníaguuba rábi nua. Unnuha nna becabina rána: “O, tata, güeyyaba neti.” Ttiaca unnuha nna läga güiana.

<sup>31</sup> Laniala nna rá Jesús:

—Delo irupa ca nua, ¿nú ca nua raquinle bencana nu raca le tata guecaniha?

Ca bixxudiha nna becabicana rácana:

—Nu xeniha.

Jesús re cana:

—Neti nna gualíbatia rpea le, ca güequixa-na lhe ca nuila requi manni-na lhe sattirla dhielhacana acacana benni rinnabia Tata Do Iyyabaaha atti lebi'i. <sup>32</sup> Cumu bitaba Juan bi'ini rugadi indaha, betele'enbi le neda tsee, lebi'i nna läga güia lele gue bi'iniha, ttiaca ca güequixa-na lhe ca nuila requi manni-na lhe güiaba lecani gue bi'iniha. Lebi'i nna masquiba begüiale iyá nu benbi tsa läga bodú xiyyanle gue nu runle qui tsia lele guebi.

### Ejemplu gue ca unbiyuu lä duta lecani ureni sina lo ttu yu

(Mr. 12:1-12; Lc. 20:9-19)

<sup>33</sup> Gualudo nagale gue attu ejemplu upea le-ni: Udo ttu unbiyuu udabi ca ya besuli lo yu guebiha, atti benttebabí nua curralli. Nianna ulequittebabí ttu yieru atta idhícana ca besuliha, benguabi ttu nu yadha anca attiba yo'o qui tsopi nu gapa lo yuha iqui nua qui gapana ca ya besuliha. Bi'ini beaca guebi lo yuha nna betettebabí lo yuha leni ca nu cuencana nua umpanía. Labi nna biríattebabí diabi idittu lhe'e attu yiesi subi. <sup>34</sup> Atti chi bisía sá exuu besuli betee lo yuha nna udhelhatteba benni beaca guebi lo yuha ca benni riben sina guebiha tsiacana sayúcana ca nu reni umpanía lo yuha qui utecana nu ralha bi'iniha dhibi. <sup>35</sup> Ttiaca ca nu reni umpanía lo yuha nna bedaxxulacana ca benni udhelha bi'iniha: ttu nua begüeeca, attu nua nna betticana, attu nua nna besiacan na iyya. <sup>36</sup> Bi'ini beaca guebi lo yuha nna bededhelhattebabí adí ca benni riben sina guebiha, gueba nna ixerucana atti primeroha. Ca nu ribeni umpanía lo yuha nna aníaguuba bodidhacacana ca unnuha.

<sup>37</sup> Beda lania nna udhelhabí cuinaba xi'inbiaha, cumu belaba lebi uquinbi: “Xi'inia-ni liba gapa ca nua respeto.” <sup>38</sup> Ttiaca atti

bilen ca nu riben umpanía lo yuha xi'in bi'iniha nna rátteba loescani: "Unní ancana nu eya'anna lo yu-ni, udaxxuri na uttiri na qui eya'an lenri lo yu-ni." <sup>39</sup> Nianna bedaxxuttebacana uncuitiha uleacan na ro'o yu atta te besuliha atti bettittebacan na.

<sup>40</sup> 'Nnanna nna gansi chi besía Benni beaca guebi lo yuha nna ¿bi rquinle udhacabi ca nu reni umpanía lo yuha?

<sup>41</sup> Lacana nnabecabicanarácana:

—Bi'iniha nna tsa läga satúa lebi ca nu lä du ta lecaniha, ettelhuxababi ca unnuha. Lo yuha nna dhibi nua utebi umpanía len ca benni subi. Ca unnuha nna gutebacana nu ralha bi'iniha dhibi gansi chi bisía exuu nu xixxi utee ca yagaha.

<sup>42</sup> Jesús re cana:

—¿Si niba ttu libe bittu chi belabale lo ca sitsi gue Tata Do Iyyabaaha atta rá?:

Iyya nu ulu'u ni'a ca benni rucoa ca yo'o-na  
unnuha la beacana iyya nu ribe ride tsitsina yo'o.  
Benni bananie ri-naba benie raca aní.  
Unní ancana ttu nu runna eban leri.<sup>a</sup>

<sup>43</sup> De unnuha nna rpea le, lärga acale benni rinnabia Tata Do Iyyabaaha, ca benni uncana nu tsu'u le Ben-na liba acacana ca nu innabia Ben-na. <sup>44</sup> Larcala nuxaba iyinnana iqui iyya-ni nna tsaba iyuyana. Gansi iyya-ni iyinnana iqui nuxa nna tsaba eyonna nua biste.

<sup>45</sup> Atti bienin ca nu lo gue ca bixxudiha lencana ca fariseo ejemplu rixxi'a Jesús, guadútteba lecani labacana nua rutáni Benniha re anía. <sup>46</sup> Lacana nna uxacattebacana udaxxucane, ttiaca rasbaquinna lo ca benni, cumu iyába ca benni se'e nía racaquinna anca Benniha ttu profeta gue Tata Do Iyyabaaha.

### Ejemplu gue laní atta betsá ná ca benni

**22** Bodolisa dacaba Jesús ca nu lo gue ca bixxudiha lencana ca fariseo leni ejemplu, nianna re cana:

<sup>2</sup>—Atti rinnabia Tata Do Iyyabaaha ca benni raxxína leni nu beni ttu nu rinnabia gue ttu yiesi, unnuha nna benna ttu laní de betsá ná xi'in biyuuniha. <sup>3</sup> Lana nna udhelhattebana ca benni riben sina gueniha qui tsia ca nua salisacana ca benni biyaxi laníha. Ttiaca

---

<sup>a</sup> 21:42 Salmo 118:22

ca benni biyaxiha nna läga uca lecani tsiacana.<sup>4</sup> Nianna udhelha dacabana adí ca nu ribeni sina gueniha rán ca nua: “Gualgási ca benni raxia tse'e laní-na: neti nna chiba te tsetia elha go, cumu chi bettia ca u'una quia lhe ca nimala rixenruha lhe. Gaultá laní iyába chi se'e tsee.”<sup>5</sup> Ttiaca ca unnuha nna tsa läga betabiquinna. Birialacana diacana, ttu nua biríana diana güennalhi ca lo yu gueniha, attu nua nna diana lhe'e yo'o atta ruto'onaha,<sup>6</sup> adí ca nua nna bedaxxulacana ca nu riben sina gue nu rinnabiahaha, begüeecana, betticana ca unnuha lhe.<sup>7</sup> Nu rinnabiahaha nna bisa'attebinna nianna udhelhattebana ca soldado gueniha qui utticana ca nu ben elhuttiha, udocana gui yiesi gue ca nua lhe.<sup>8</sup> Laniala nna rána adí ca nu riben sina gueniha: “Chiba te tsee elha go gue laní-ni, ttiaca ca benni biyaxiha nna tsa lärgabi elha ralhacana itacana laní-ni.<sup>9</sup> Nnanna nna gualtsia dhuti ca atta resá lo loesi ca nedá-na, gualgási iyába ca benni etí'ale itacana laní.”<sup>10</sup> Ca nu riben sina gueniha nna biríattecacana lo ca nedaha, uxtebacana iyáloba benni guattí'acana, ca nu du tsee leni lhe ca nu bittu du tsee leni lhe. Lhe'e yo'o atta raca laníha nna bisatina benni.

<sup>11</sup> 'Atti uta'a benni rinnabiahaha qui ugúiana ca benni biyaxi laníha nna nía bilenna do ttu unbiyyu bittu nucu xoni atti nucu xo ca nu biaxi tsee laníha.<sup>12</sup> Lana nna rána nua: “Xa betsito, ¿gasná uca uta'alu ni nna läga nucu xolu atti nucu xo ca nu biaxi tsee laní-ni?” Ttiaca unbiyyuha nna tsa bittu unnena.<sup>13</sup> Nianna nu rinnabiahaha nna ráttebana ca nu riben sina gueniha: “Gualuxxica ni'a nonna. Atti gualudelha na atta anca chulha-na, na nua atta cuesna lhe go lo layani lhe.”<sup>14</sup> Cumu ixeba benni raxi Tata Do Iyyabaaha, ttiaca babarba benni rucue qui acacana guee.

### Rinnaba tisacana Jesús gansi gua dica quixacana belhi nu deyya Roma

(Mr. 12:13-17; Lc. 20:20-26)

<sup>15</sup> Nianna deyyatteba ca fariseo qui unnee len loescani gue gaxasná uncana ibixxi Jesús innee ttu tisa nu ixuuquinna qui udelhiyyacane.<sup>16</sup> Lacana nna udhelhacana ttu chupa ca benni rudheti ca tisa rule'ecanaha leni attu chupa ca benni denoo nu rinnabia lá Herodes, qui gácana Jesús:

—Maestro, ri'itu nna yutu, lu nna läga run lelu, rule'ebalu lhixxa suba gue gaxasná raca le Tata Do Iyyabaaha tse'e benni. Bittuguaba rasinlu gue cadiga bi inná benni lhe cumu lu nna läga rugüialu ttixa anca ttu ttu ca benni.<sup>17</sup> Utixxi'a sanguin ri'itu, ¿si guaga'ana quixari len güequixa belhi nu deyya atta do nu rinnabia do lhe'e yiesi Roma? ¿Si bittuba, aca?

<sup>18</sup> Ttiaca Jesús yuxeabe läga anca tsee nu rulaba le ca nua uncana, nianna re cana:

—Lebi'i, ca nu ni lo ni tisaba runi dequi ancale nu runi nu anca tsee, ¿biaca neti rdacale dhi yiele?<sup>19</sup> Gualule'en neti ttu belhi nu rixuinri rixari na.

Lacana nna bele'ettabaquinna Benniha belhiha.<sup>20</sup> Laniala nna unnaba tise cana re cana:

—¿Nú lo unná du lo belhi-na? ¿Nú beaca láni nu dia lo unná lhe?

<sup>21</sup> Lacana nna becabicana rávana:

—Gue César nu rinnabia do Roma.

Lania la rá Jesús cana:

—Gualugüeba nu rinnabia-na nu ralhana dhína. Gualugüeguaba Tata Do Iyyabaaha nu ralhe dhie lhe.

<sup>22</sup> Atti bienquinna nu rá Benniha nna bebanlhabaquinna. Níaba bedúcana Benniha deyyacana.

### Nu aca gansi chi beacani ca benni yatti-na

(Mr. 12:18-27; Lc. 20:27-40)

<sup>23</sup> La sáhaguuba nna bisína ca nu saduceo atta du Jesús. Ca unnuha nna rávana dequi läga gualí reacani ca nu yatti-na. Lacana nna unnaba tisacana Jesús, rávana:

<sup>24</sup> —Maestro, lo sitsi bodha'ana Moisés nna rá: “Gansi ttu unbiyuu chi betsá náni gattina, lana nna nuttu xi'inni use'e leni nuila gueniha, betsi unbiyuu uttiha nna daa loni edína nuila bidabiha qui anáchu nna ca xi'inni tse'e len nuilaha nna acacana attisiba xi'ini betsini chi uttiha.”<sup>25</sup> Ttu libe nna use'e gasi betsi ca unbiyuu. Betsi xen guecaniha nna betsátteba náni, ttiiaca uttittebana, niba ttu xi'inni bittu bisía, larcala nna be'anba nuila gueniha leni attu betsiniha.<sup>26</sup> Unnuhaguuba guate nu berupaha lhe nu beyonnaha lhe ni beaba gasi betsi ca nua utti.<sup>27</sup> Dequila nna uttiguuba nuilaha.<sup>28</sup> Gansi chi bisía sá eyacani ca benni yatti-na,

¿inúla delo gasi ca unbiyuuh aca nuilaha latselani? Cumu iyába gasicana betsá nácani len nuilaha.

<sup>29</sup> Laniala becabí Jesús re cana:

—Lebi'i nna läga gualínle gue nu rulaba lele-na, cumu läga radú lele gue nu rá lo ca sitsi gue Tata Do Iyyabaaha, niguuba gue elha ra xxen le gue Ben-na lhe. <sup>30</sup> Atti isía sá eyacani ca benni yatti-na, ca unbiyuu-na lhe ca nuila-na lhe lärga dica utsá nácani, lä uterguabacana ca xi'inquinna qui utsá nácani lhe cumu attiba anca ca ingeli se'e iyyabaaha, eyacacana. <sup>31</sup> Ttiaca gue gansi güeyacani ca benni yatti-na, ¿si littuba chi belabale lo ca sitsi gue Tata Do Iyyabaaha atta re?: <sup>32</sup> “Neti anca Tata Do Iyyabaa gue Abraham lhe gue Isaac lhe gue Jacob lhe.”<sup>a</sup> Tata Do Iyyabaaha läga anque Dios gue ca benni yatti-na, Ben-na anque Dios gue ca benni bani-na.

<sup>33</sup> Atti bienquin ca benni se'e nía iyába unní nna bebanbaquinna gue nu rule'e Benniha.

**Delo iyá ca ley bodha'ana Tata Do Iyyabaaha,  
¿nú ca nua racaru duelha dho tisa gueni?**

(Mr. 12:28-34)

<sup>34</sup> Atti ubina ca fariseo beni Jesús beaca si ca nu saduceo nna beaxitteba loescani. <sup>35</sup> Nianna ttu fariseo nu ancana nu rule'e nu rá lo ca ley boca'ana Moisés unnaba tisana Jesús, ulu'ubiana dhana lo Benniha nianna ráne:

<sup>36</sup> —Maestro, ¿nú ca tisa dia lo ca ley boca'ana Tata Do Iyyabaaha leni Moisés racaru duelha dho tisa guee?

<sup>37</sup> Jesús becabie re:

—“Aquinlu gue Tata Do Iyyabaaha Benni bananie lu itú iqui itú lelu, leni itúxea lastoolu lhe leni itú elha rieni guelu lhe.”<sup>b</sup>

<sup>38</sup> Ley-na anque nu primero, benni racaru duelha dho tisa guee.

<sup>39</sup> Ley berupaha nna anque attiba benni: “Aquinlu gue ca benni attiba raquinlu gue la luba.”<sup>c</sup> <sup>40</sup> Delo irupa ca ley-ni nna anque benni deni iyába ca ley gue Tata Do Iyyabaaha, ca tisa unne ca benni uca profeta gue Ben-na lhe.

<sup>a</sup> 22:32 Éxodo 3:6

<sup>b</sup> 22:37 Deuteronomio 6:5

<sup>c</sup> 22:39 Levítico 19:18

### Cristuha anque benni datía David

(Mr. 12:35-37; Lc. 20:41-44)

<sup>41</sup> Laca sna se'eba ca fariseo ttu reba nía, unnaba tisatteba Jesús ca nua re cana:

<sup>42</sup> —¿Bi rulaba lele gue Benni anque Cristuha? ¿Nú beaca benniola gue Benniha?

Lacana nna becabicana rávana:

—Davidba beaque benniola gue Benniha.

<sup>43</sup> Lee nna re cana:

—Gansi David ancabi benniola gue Cristuha nna ¿biacala, atti yu'u Espíritu gue Tata Do Iyyabaaha lhe'e cuerpu gue bi'iniha nna rábi Benniha: “Lu ancalu benni Baninlu neti”? Cumu David rábi:

<sup>44</sup> Tata Do Iyyabaaha re Cristu Benni bananie neti:

“Ni udo daca lhuitta derechu quia,

axta liba unia aca ca nu lä raca uyúcan lu na

nu udú ni'alu iquicani.”<sup>a</sup>

<sup>45</sup> ¿Gansi David rábi Cristuha: “Lu ancalu Benni baninlu neti”, gasná aca David benniola gue Cristuha?

<sup>46</sup> Tsaba niba ttucana bittu uca guecani ecabicana gue Jesús. Bedá laniaba nna niba ttucana bitturu beaxquinna innába tisacana Benniha adí.

### Jesús ru delhiyye ca fariseo lhe ca nu rule'e nu rá lo ca ley boca'ana Tata Do Iyyabaaha lhe

(Mr. 12:38-40; Lc. 11:37-54; 20:45-47)

**23** Laniala nna unne Jesús belise ca benni se'e nía, ca benni rudheti ca tisa rule'e lhe re:

<sup>2</sup> —Ca benni rule'e nu rá lo ca ley-na lhe ca fariseo-na lhe daba locani ule'ecana nu dia le ca ley boca'ana Moisés. <sup>3</sup> Larcala nna gualudo tisa guecani lhe gualuni iyá nu innávana lhe, ttiaca bittu unle nu run ca unná, cumu ca unná nna läga runcana nu rule'ecana.

<sup>4</sup> Lacana nna attiba ttu yua idi'i unná rujuacana ca benni atti runcana duelha dho tisa gue iyá nu rávana, ttiaca lacana niba saro'o bittu rudocana tisa gue nu rule'ecana. <sup>5</sup> Iyába nu runcana, runbacan

---

<sup>a</sup> 22:44 Salmo 110:1

nua qui ilen ca benni. Lacana nna atsacaba rodixxencana lo ca yieti ca nu ruxxicacana ca caja chica'a rutá lo xeacani, ca nu ruxxica lo xiquicani lhe lhe'e ca unnuha yu'u ca sitsi dia ttulhe ca tisa gue Tata Do Iyyabaaha locani. Re'oguaba lecani ruedhacana ca flecu bata ro'o ca xalhoocaniha lhe.<sup>a</sup> <sup>6</sup> Anáguauba runcana ca atta raca laní, tsitsiba ridá lecani cuiacana atta ga'anaru tsee. Anáguauba runcana lhe'e ca yo'o atta rudhetiri ca tisa gue Tata Do Iyyabaaha lhe tsitsiba ridá lecani cuiacana lo ca xxila ga'ana tseeru atta ribía ca nu lo. <sup>7</sup> Ridáguauba lecani gó benni cana paduixi len respeto lhe'e ca atta raca i'lya-na lhe gó benni cana: "Maestro" lhe.

<sup>8</sup> 'Ttiaca lebi'i nna bittu dhielale gócan le maestro, cumu tturba benni do anque Maestro guele, delába Cristuha. Iyábale ttuba ancale, betsi loesbale raca. <sup>9</sup> Bittuguaba góle Tata ca benni se'e yies lo yu-ni, cumu tturba ttu benni doe anque Tata gueri. Benniha nua doe iyyabaaha. <sup>10</sup> Bittuguaba ugüelhale gócan le maestro, cumu tturba ttu benni do anque Maestro guele, delába neti, benni anca Cristu. <sup>11</sup> Benni ancana nu ra xxeni leni guele nna acana nu ixuuna lo sina guele, <sup>12</sup> cumu nuxaba benni nu la labana runna dequi ancana nu ra xxeni leni, Tata Do Iyyabaaha unie eyadigaa leni, nu rechida gaa leniha nna uni Benniha acana nu ra xxeni leni.

<sup>13</sup> 'Ttiaca carusi'irule, lebi'i ca nu rule'e nu rá lo ca ley boca'ana Moisés, anáguauba ca fariseo-na lhe! ¡Ca nu ni lo ni tisaba runle dequi ancale benni runi nu anca tsee! Lebi'i nna chi rusunale udaxxu ca benni neda gue Tata Do Iyyabaaha qui acacana benni rinnabia benna. Lebi'i nna lä rita'aguale len benna lhe lä rugüelhaguale ga'a ca benni raca lecani ga'acana lhe.

<sup>14</sup> [¡Carusi'irule, ca nu rule'e nu rá lo ca ley boca'ana Moisés, anáguauba ca fariseo-na lhe! ¡Ca nu ni lo ni tisaba runle dequi ancale benni runi nu anca tsee! Lebi'i nna rigúale ca yo'o gue ca nuila bidabi-na, nianna ni lo ni tisaba isálhaba rise'ele runle dequi rinnele len Tata Do Iyyabaaha. Lo ni'a gue unní nna dhíle ttu elha disa xeni.]

<sup>15</sup> ¡Carusi'irule, ca nu rule'e nu rá lo ca ley boca'ana Moisés, anáguauba ca fariseo-na lhe ca nu ni lo ni tisaba runle dequi ancale benni runi nu anca tsee! Lebi'i nna diale lhe'e attu yiesi subi runle duelha reguilale ladiba ttu benni qui acana benni tsia leni attiba ria

lele, ttiaca atti chi biría lenle ria le nua attiba ria lele nna lebi'i nna runle aca nua nu ralhana dhína elha disa xenru atta lexúaha atti lebi'i.

<sup>16</sup> ;Carusi'irule, xa nu xua loni anca nu lo gue adí benni! Lebi'i nna rále: "Gansi nuxa benni udettina yotu-na atti ugüena tisa unna ttu bixa nna läga raca duelha unna nu chi bodha'anna tisa unna. Ttiaca gansi udettina oro sia lhe'e yotu-na atti ugüena tisa unna ttu bixa nna laniarguaba nna labíaba unna nu chi bodha'anna tisa unna." <sup>17</sup> ¡Lebi'i, ca nu lä caa elha rieni gueni lhe ca nu xua loni lhe! ¿Si bittuba yule dequi dacarla yotu-na atti oro-na? Cumu yotu-na runna reaca oro-na nu anca le'a. <sup>18</sup> Ráguaabale dequi gansi nuxa benni udettina becoa gue yotu-na atti ugüena tisa unna ttu bixa, läga raca duelha unna nu chi bodha'anna tisa unna. Ttiaca gansi nuxa udettina úna sia lo becoa-na atti ugüena tisa unna ttu bixa nna laniarguaba nna raca duelha unna nu chi bodha'anna tisa unna. <sup>19</sup> ¡Nu diti bittu rienini, nu xua loni lhe! ¿Si bittuba yule dequi dacarla becoa-na attichula úna nu rusíari lo unná? Cumu becoa-na runi reaca úna nu rusíari loni nu anca le'a. <sup>20</sup> Larcala nna nu rudettina becoa-na atti rugüena tisa unna ttu bixa nna läga sunru becoa-na nua rudettina, sinuqui selaguaba iyába nu sia loni. <sup>21</sup> Nu rudettina yotu-na atti rugüena tisa unna ttu bixa nna läga sunru yotu-na nua rudetti nua, sinuqui selaguaba Tata Do Iyyabaaha, Benni do lhe'e yotu-na. <sup>22</sup> Benni rudettina iyyabaaha atti rugüena tisa unna ttu bixa nna läga sunru iyyabaaha nua rudetti nua, sinuqui selaguaba Tata Do Iyyabaaha lhe xxila atta do Benniha lhe.

<sup>23</sup> ;Carusi'irule, ca nu rule'e nu rá lo ca ley boca'ana Moisés, anáguaba ca fariseo-na lhe ca nu ni lo ni tisaba runle dequi ancale benni runi nu anca tsee! Lebi'i nna rutsiattale tsii (10) gue lo ttu ttu gayua (100) nu anca gue ca coana radale-na, gue guadhi-na lhe anís-na lhe comino-na lhe qui rutele len Tata Do Iyyabaaha. Ttiaca bittu retábinle gue nu rá lo ca ley boca'ana Tata Do Iyyabaaha, nu racaru duelha udoles tisa gueni nna ancana, unle nu anca tsee len ca benni, satúa lele ca benni lhe tsia lele Tata Do Iyyabaaha itú iqui itú lele lhe. Lo unní dica unle, ttiaca bittu udhanle utele tsii gue lo ttu gayua gue nu te guele. <sup>24</sup> ¡Lebi'i, nu xua loni anca nu lo gue adí benni! Duelhaba runle dho tisa gue ttu nu güexxa dia lo ca ley-na, ttiaca bittu retábinle unle nu xxenru, nu racaru duelha unle. Runbale attiba runi ttu nu tsitsiba rugüiana qui bittu gabina ttu

be'eya chica'a, ttiaca niba lä ritedeenna rabina ttu nu xxeni anca attiba ttu camello.

<sup>25</sup> ¡Carusi'irule, ca nu rule'e nu rá lo ca ley boca'ana Moisés, anáguaba ca fariseo-na lhe ca nu ni lo ni tisaba runle dequi ancale benni runi nu anca tsee! Ancabale attiba ca taza-na lhe ca platu-na lhe lebi'i nna tsapaba riile cu'ecani, ttiaca lhi'u lhe'ecani nna attulade satsa anca. Aná bunna ancale, sunruba lolia guele nari, ttiaca lhi'u lhe'e lastoole nna attulade re nu satsa, nu ridá lele llanale lhe nu bittu anca tsee runle na lhe. <sup>26</sup> ¡Fariseo, xua loni! Primer xa gualquí deca lhi'u lhe'e taza-na lhe lhe'e platu-na lhe qui aníachu nna eyariguaba deca cu'e ca unná.

<sup>27</sup> ¡Carusi'irule, ca nu rule'e nu rá lo ca ley boca'ana Moisés, anáguaba ca fariseo-na lhe ca nu ni lo ni tisaba runle dequi ancale benni runi nu anca tsee! Cumu lebi'i ancale attiba ttu baa nu tsitsiba tsee rule'e lolia gueni, ttiaca lhi'u lhe'eni nna satíba sitta gue ca nu yatti lhe iyáloba nu yusu lhe. <sup>28</sup> Aníaguaba lebi'i, lo bennirba runle dequi ancale benni runi nu anca tsee, ttiaca lhi'u lhe'e lastoole nna satíba nu lä anca tsee runle na, nu ni lo ni tisaba runle dequi ancale benni runi nu anca tsee lhe.

<sup>29</sup> ¡Carusi'irule, ca nu rule'e nu rá lo ca ley boca'ana Moisés, anáguaba ca fariseo-na lhe ca nu ni lo ni tisaba runle dequi ancale benni runi nu anca tsee! Lebi'i nna rusíale ca baa gue ca bi'ini uca profeta, chi reonlhatsirule lo ca baa gue ca benni beni nu anca tsee lo Tata Do Iyyabaaha lhe. <sup>30</sup> Nianna rále: "Ttirca chi se'etu atti use'e ca benniola guetuha nna läga bisela ri'itu ca nu betticana ca benni uca profeta gue Tata Do Iyyabaaha." <sup>31</sup> Larcala nna leni nu rále-na rule'e lole lebi'i nna gualíba ancale nu datía ca nu betticana ca profetaha. <sup>32</sup> ¡Tsattela gualuluxa gualuni nu udulo ca benniola gueleha bencana!

<sup>33</sup> ¡Lebi'i, ca nu datía belha! ¡Cuinaba belha le! ¿Gasná lhále bittu tsiale atta lexúaha? <sup>34</sup> Denuala nna neti nna idhelha ca benni anca profeta atta se'ele-na, ca benni te elha rieni guecani lhe ca benni ule'equinna le lhe. Ttiaca lebi'i nna utálale ttulhe ca bi'iniha lo ya crusi qui uttile cabi, adí ca bi'iniha nna ugüeles cabi lhe'e ca yo'o atta rudheti ca benni Israel ca tisa gue Tata Do Iyyabaaha, lhe'e iyába ca yies-na tsequile uríalale ca bi'iniha lhe. <sup>35</sup> Larcala nna cu'ebale dia elhutti gue ca benni bittu tulha guecabí te, ca bi'ini xalhaba betti benni cana yies lo yu-ni, desdeba reni bilali gue

Abel, benni beni nu anca tsee lo Tata Do Iyyabaaha, axtaba reni bilali gue Zacarías, bi'ini uca xi'ini Berequías, bi'ini bettile lagüi gue lhe'eli'a gue yotuha atta do becoaha.<sup>36</sup> Neti nna gualíbatia rpea le, iyába ca benni se'e nnanna quixacana gue ca elhutti-ni.

<sup>37</sup> ¡Atturu gueni xa benni se'e Jerusalén! Lebi'i nna ruttile ca bi'ini anca profeta, rusíale iyya ca benni ridhelha Tata Do Iyyabaaha atta se'ele lhe. ¡Balhala libe benia ose'ale ttu reba attiba run ttu bera reaxina ca xi'inni regu'u lhe'e xxilani qui uyúncana, ttiaca bittu uca lele!<sup>38</sup> Gualgüia nnanna yies guele-ni nna atturbana eya'ana, tsa lärga nuruha benni tse'e lhe'eni.<sup>39</sup> Neti nna rpea le, lärga nuruha neti uyúle, axta liba isía sá innále: “¡Carbáru benni daa cuenta gue Tata Do Iyyabaaha!”

### Jesús rixxi'e nu aca atti chi deoba lhuxa yies lo yu-ni

(Mr. 13:1-2; Lc. 21:5-6)

**24** Atti chi bería Jesús lhe'eli'a gue yotuha nna. Laca deyu'e neda deyye, ubigatteba ca benni rudheti ca tisa rule'e qui bele'equinbi Benniha adí ca yo'o anca gue yotuha.<sup>2</sup> Jesús re cabi:  
—¿Gua rilenle iyába ca unní? Neti nna gualíbatia rpea le, niba ttu ca iyya coa-na bitturu eya'ana iqui loesni, cumu itúbana ittapa.

### Jesús riguixxi'e gasná aca atti lhuxa yiesi lo yu-ni

(Mr. 13:3-37; Lc. 21:7-36)

<sup>3</sup> Atti chi bisína Jesús lo lhilhi te láni Atta Daa Ca Ya Olivuha nna udottebe nía. Ca benni rudheti ca tisa rule'e nna suntteba lacabi ubigacabi qui unnaba tisacabi Benniha, rácabi:

—Utixxi'en ri'itu, ¿núca aca nu ralha, bi aca qui ule'e lo dequi chi deoba esíalu lhe chi deoba isía sá lhuxa yies lo yu-ni lhe?

<sup>4</sup> Jesús becabie re:

—Gualudo cuidadu qui nuttu nu dhana dhi yienle.<sup>5</sup> Cumu ixe ca nu isía uncana dequi ancacana neti, nianna innácan: “Neti nua Cristu.” Ixeru benni dha ca nua dhi yiecan. <sup>6</sup> Lebi'i nna atti unale chi ritilha len loesi ca yiesi, chi daa tisa itilha len loesi ca yiesi lhe bittu gasinle, cumu labíaba aca aná. Ttiaca läga chi bisía sá lhuxa yies lo yu-ni.<sup>7</sup> Cumu ttu yiesi xení len attu yiesi xení itilha len loescani, ttu nu rinnabia leni attu nu rinnabia itilha len loescani.

Gatti laduba gue yies lo yu-ni ixúxxatta, aca ubina lhe isíaguaba ixe lo isagüe gue ca benni lhe.<sup>8</sup> Ttiaca iyába unní ancana sunruba nu daneru gue elha disa nu chi daba uyú ca benni se'e yies lo yu-ni.

<sup>9</sup> 'Lania nna utecana le las ná ca nu udhaca güecan le, uttican le lhe. Iyába ca benni bitturu aca uyúcan le lo ni'a gue de ria lele neti.<sup>10</sup> Laniaguaba nua nna ixeru ca benni ria lecani neti bitturu tsia lecani neti, lacana nna bitturu aca uyú loescani, la labacana salhu'u loescani lo ca uxtisi-na lhe.<sup>11</sup> Ixe ca güenlasi isía innávana dequi ancacana profeta gue Tata Do Iyyabaaha, ixeru benni dhacana dhi yiecaná.<sup>12</sup> De yatterba de tsani nu lä anca tsee yies lo yu-ni nna ixeru benni bitturu aquin gue loescani.<sup>13</sup> Ttiaca benni dhana dhu tsitsina lo neda gue Tata Do Iyyabaaha axta atti isía sá gattina, unnuha liba lhána bittu tsia nittina.<sup>14</sup> Labíaba quixxi'a ca benni itúba yies lo yu-ni ca tisa tsee gue gaxasná rinnabia Tata Do Iyyabaaha, lania liba isía sá lhuxa yies lo yu-ni.

<sup>15</sup> 'Larcala nna ca nu ulabacana ca tisa dia lo sitsi-ni, uncana duelha qui sadú lecani bixa dia le atti re: "Atti ilenle aca ttu nu satsa lhi'u lhe'e yotu-na atta anca le'a-na, gue nu satsaha nua utixxi'a profeta Daniel."<sup>16</sup> Lania nna ca nu se'e lo yu nu te láni Judea-na, uxunnicana tsiacana ca i'iyattoo-na.<sup>17</sup> Nu do iqui yo'o gueniha nna bittu aquinna eyadina qui saleana bixa reasinna.<sup>18</sup> Nu requi ranchu nna bittu eyyana lhe'e lisniha qui saxína gabana gueniha.<sup>19</sup> ¡Carusil'iru ca nuila nuja xi'incani lania, ca nu deni unto rasi xisi lhe!<sup>20</sup> Gualnnaba lo Tata Do Iyyabaaha qui bittu saxxína isía sá atti uxunnileha tiempu ribe beyya, niguaba sá redí leri lhe<sup>21</sup> cumu ttu elha disa xeni nua uyú benni lania, desdeba atti ure yies lo yu-ni axta nnanna lägabi loesi elha disaha chi biyú benni, bitturguaba uyú benni attu elha disa loesi unnuha lhe.<sup>22</sup> Gansi Tata Do Iyyabaaha bittuba odatsie ca sá atti uyúxxatta benni elha disaha, ni ttu benni bittu dhana lhána lo elhuttiha. Ttiaca lo ni'a gue de runrube lha ca benni chi becuae anca guee, nuarca odatsie ca sáha.

<sup>23</sup> 'Laniaha nna gansi nuxa iríana gán le: "Gualgüiarga, ni Cristuha du-ni", o innána: "Gualgüiarga, ni Cristuha du-na", lebi'i nna bittu tsia lele gue nu inná anía.<sup>24</sup> Cumu ixe ca benni iríá innávana dequi labacana nua anca Cristu, iríá ca nu inná dequi ancacana profeta gue Tata Do Iyyabaaha lhe. Lacana nna uncana ixeru ca milagru, unguabacana ilen benni ca nu uni ebanin ca benni lhe. Leni ca unnuha nna dhi yiecaná ca benni. Axtaba ca

benni chi becuee Tata Do Iyyabaaha, un ca nua dhi yiecaná.

<sup>25</sup> Nnannali chi rixxi'atia le gue nu aca. <sup>26</sup> Larcala nna gansi gácan le: "Gualugüiarga, ni Benniha requi lo yu bisiha", bittu tsiale. O si gácan le: "Gualugüiarga, ni Benniha do gatsie lhe'e ttu yo'o", bittuguaba tsia lele gue ca nu inná anía. <sup>27</sup> Cumu attiba ganchi ropi edha-na rilá saba xieni gueni desdeba atta riria ubisa-na axtaba atta radi ubisa-na, aníaguaba ilá sába gansi chi besíaya neti, Benni unbiyuu daa iyyabaaha. <sup>28</sup> Iyábale yule, atta te ttu nu yatti nía ritupa ca chettu.

<sup>29</sup> 'Cuantusiba tte ca sá atti uyú ca benni se'e yies lo yu-ni elha disaha nna echulhatteba lo tatubisa-na, lo nanto beo-na lhe bitturu cu'una xieni. Ca beli-na iyinnabacana lo yu, iyába ca nu ra xxeni leni se'e lo bea-na ixidicana. <sup>30</sup> Nianna aca ttu nu aca lo bea-na, nu ule'e lona neti Benni unbiyuu daa iyyabaaha chi dedaaya. Lania nna iyárechaba ca benni se'e yies lo yu-ni elenquinna lhe cuescana lhe atti iláquinna neti dedaaya lhe'e ca bea-na anca benni ra xxeni leni, ru'u xieni ga'ana tsee quia lhe. <sup>31</sup> Atti ucues trompetaha idisa nna neti nna idhelhatteba ca ingeli quia-na tsiacabi saxícabi ca benni chi becuee Tata Do Iyyabaaha anca guee se'e ittapa laduba gue yies lo yu-ni, desdeba atta ridulo iyyabaaha axtaba atta riluxana.

<sup>32</sup> 'Gualudheti ejemplu gue ya igu-na: Atti rilenle chi re re'eni ca lo xiquini, chi re'eyu lhaga ga'a gueni lhe lebi'i nna ritedaattebinle chi dedaa tiempu iyya. <sup>33</sup> Anáguaba lebi'i, gansi chi bilenle aca iyába ca nu chi ria-ni, lania nna chi yule chi daa ribiga esíaya, neti Benni unbiyuu daa iyyabaaha. <sup>34</sup> Neti nna gualíbatia rpea le, iyába nu ria-ni aca, antisla lhuxa ca benni se'e-ni. <sup>35</sup> Lo bea-na lhe yies lo yu-ni lhe lhuxabacana, ttiaca labíaba saxxína aca nu rá ca tisa quia-ni.

<sup>36</sup> 'Ttiaca gue bixa sá lhe gue bixa ura aca unnuha lhe tsa läganu yu, ni ca ingeli se'e iyyabaaha lhe niguaba neti benni anca Xi'iní Tata Do Iyyabaaha lhe bittu yua, sunruba Tata quia do iyyabaaha yue.

<sup>37</sup> 'Attiba ucaba tiempu atti udo Noé, aníaguaba aca atti isía sá esíaya neti Benni unbiyuu daa iyyabaaha. <sup>38</sup> Cumu ca benni use'e atti bittu chi bodisá Tata Do Iyyabaaha yies lo yu-ni inda nna uyu'uba ca nua go lhe güe'eya lhe güetsaa ná lhe güequeti ca xi'incaniha lhe. Axta liba atti bisía sá uta'a Noé lhe'e barcoha. <sup>39</sup> Lacana nna läga guadú lecani gue bixa nua aca, larcala nna

iyyaba lecani bisía sá atti bisá inda yies lo yu-ni, nianna iyábacana uchée inda. Aníaguaba aca la sá atti esíaya, neti Benni unbiyuu daa iyyabaaha.<sup>40</sup> Lania nna atta se'e chupa ca unbiyuu lhe'e ca ranchu-na, tturba nua echea, attu nua nna eya'anbana.<sup>41</sup> Delo chupa ca nuila rencana güiettu, ttuna echea, attuna eya'ana.

<sup>42</sup> Lebi'i nna bittu tse'e xulhale, cumu läga yule bixa sá esíaya, neti benni bantia le.<sup>43</sup> Ttiaca Gualúnarga nu upea le-ni, ttirca benni beaca gueni ttu yo'o chi yuna bi ura lo relaha isína ubanaha, lana nna läga ga'adhina, qui bittu ugüelhana ga'a ubanaha lhanana nu te lhe'e yo'o gueniha.<sup>44</sup> Anágua lebi'i, gualtse'e ubeda, cumu neti Benni unbiyuu daa iyyabaaha esíaya atti bittu leda lele.

<sup>45</sup> ¿Nú nua ancana benni rudo tisa te elha rieni gueni bodú benni bananie-na qui gapana ca benni riben sina lhe'e yo'o guebiha, utena nu go ca nua ura guecani lhe?<sup>46</sup> Carbáru nu ren sina satti'a benni bananie na dana runna nu daa loni unna gansi chi besíabi.<sup>47</sup> Neti nna gualíbatia rpea le, bi'ini baninbi nua nna odúbi na qui acana nu gapa iyába nu te guebi.<sup>48</sup> Ttiaca gansi nu ren sinaha ancana ttu benni lä du ta leni, lana nna aquinna dequi bi'ini baninbi na isábabi atti esíabi,<sup>49</sup> Nianna dhulottebana ugüena adí ca benni riben sinaha, atti dhottebana gona lhe i'iyana lhe len ca nu dusi.<sup>50</sup> Ttiaca bi'ini baninbi-na, esíabi la sá atti bittu ribedana, la ura atti bittu leda leni esín bi'iniha lhe.<sup>51</sup> Bi'iniha nna ugüebi na ttu elha disa tsitsi. Atti udelhabi na atta tsia ca nu ni lo ni tisaba runcana dequi ancacana nu runi nu anca tsee. Nía nua atta cuescana lhe go lo layacani lhe.

### Jesús rixxi'e ejemplu gue tsii ca nurbani

**25** <sup>1</sup>Elha rinnabia gue Tata Do Iyyabaaha raxxína anque ttuba leni nu guate tsii (10) ca nuila rbani, ca unnuha nna bedaxxucana ca quinque guecaniha biríacana gualedacana unbiyuu utsá nániha.<sup>2</sup> Gayu ca nua nna ancacana nuila yan lee, a gayu ca nua nna ancacana nuila xulha lee.<sup>3</sup> Ca nurbani ancacana nu xulha leniha nna nujabacana ca quinque guecaniha, ttiaca läga nojacana seti qui ega'acana lhe'e ca nua.<sup>4</sup> Ca nurbani anca nu yan leniha nna nojaba ca nua ca bega ta'a seti lhe'ecani, nojaguuba ca nua ca quinque guecaniha lhe.<sup>5</sup> De bisába unbiyuu utsá nániha nna iyába ca nuilaha bita bisiela locani, nianna uta'adhibacana.<sup>6</sup> Atti chi deoba ugüena riloela nna bieni tsí'i ttu benni uresí'ana rána: “¡Ni

unbiyuu utsá nániha chi daa ni! ¡Gualiría, gualsatsá na!”<sup>7</sup> Nianna iyába ca nuila rbaniha guadhadacana, atti bose'e tseetebacana ca quinque guecaniha.<sup>8</sup> Ca nurbani se'e xulha leniha nna rávana ca nurbani se'e yan leeha: “Gualunnachi saro'o seti guele-na guetu qui chi reola ca quinque guetu-ni.”<sup>9</sup> Ttiaca ca nurbani se'e yan leeha nna becabicana rávana: “Bittu, cumu gansi utetu nu reasinle nna lärga acani seti guetu-na, lania nna eyasaguaba guetu lhe eyasaguaba guele lhe. Adíla tsee nna gualtsia atta rito'o seti-na gualsayo'o nu reasinle.”<sup>10</sup> Ttiaca ttu diaru ca nua güeyo'o seti nna bisína unbiyuu utsá nániha. Ca nurbani yan lee se'e tseeha nna uta'aba ca nua len unbiyuu nu utsá nániha atta raca laníha, nianna beayatteba yo'oha.<sup>11</sup> Dequilaha nna besina adí ca nuila rbaniha, nianna rávana: “¡Benni bananie ri'itu, udhalchi qui ga'atu!”<sup>12</sup> Ttiaca bi'iníha nna becabibi gue ca nua, rábi: “Bittu, cumu läga ancabiatia le.”

<sup>13</sup> Laniala nna rá Jesús:

—Larcala, lebi'i nna satía gaultse'e ubeda, cumu läga yule bittiga sá lhe bittiga ura lhe esíaya neti Benni unbiyuu daa iyyabaaha.

### Ejemplu gue nu beni tsunna ca unbiyuu uxí belhi

(Lc. 19:11-27)

<sup>14</sup> ’Gue gaxasná rinnabia Tata Do Iyyabaaha ca benni, raxxína ancana ttuba leni nu guate ttu unbiyuu. Unnuha nna atti chi ridána tsiana attu yiesi re idittu nna uxttebana ca benni riben sina gueniha, qui bodha'anna len ca nua belhi gueniha.

<sup>15</sup> Ttu nua begüeena gayu mil, attu nua nna begüeena chupa mil, nu beyonnaha nna begüeena nua ttu mil. Cua ttu ttuba ca nua begüeena nu rudhaca leni dha ca nua un lencana sina. Laniala nna biríana diana.<sup>16</sup> Nu uxí gayu miliha nna güiattebana benna sina len belhiha, nianna benba xi'ini belhiha a gayu mil.<sup>17</sup> Aníaguaba beni nu uxí chupa miliha. Bedíbana a chupa mil ben xi'ini belhiha.<sup>18</sup> Ttiaca nu ixí ttu miliha nna güialana guache'enna lhi'u yu, qui becatsina belhi gue benni baninna naha.

<sup>19</sup> Dequi de chi usá nna lania liba besina benni baninna canaha. Nianna uxna ca nua qui quixxi'acana bixa ben lencana ca belhiha.

<sup>20</sup> Nu uxí gayu miliha nna bisín lenna a gayu mil iqui de nu uxínaha, nianna rána: “Benni bananie neti, lu nna bodha'anlu gayu mil belhi

len neti, nnanna nna biyúrga, ni a gayu mil xi'in nua te-ni.”<sup>21</sup> Benni baninna nua nna becabina rána nua: “Tseeba benlu. Lu ancalu ttu benni riben tsee sina, ancalu ttu benni gua dica uxten leri lhe. Cumu de tsitsiba biyúlu saro'o nu betea len luha nna. Nnanna nna unia uyúlu ttu nu xxenrula. Larcala nna utá uta'a atta edaca lelu len neti.”<sup>22</sup> Bisínguaba nu uxí chupa miliha, nianna rána: “Benni banani neti, lu nna bodha'anlu chupa mil len neti. Nnanna nna biyúrga, ni a chupa mil nu ben xi'in nua te-ni.”<sup>23</sup> Benni baninna nua nna becabina rána: “Tseeba benlu. Lu ancalu ttu benni riben tsee sina, ancalu ttu benni gua dica uxten leri lhe. Cumu de tsitsiba biyúlu saro'o nu betea len luha nna. Nnanna nna xxenrula oca'ana las nálu qui un lenlu sina. Larcala nna utá uta'a atta edaca lelu len neti.”

<sup>24</sup> Ttiaca atti bisína nu uxí ttu miliha nna ráttebana: “Benni banani neti, neti nna gua yuba dequi ancalu ttu benni bittu ratúa leni, nu rolapa atta bittu udana lhe redíguabalu lena atta bittu bedelhalu xua lhe.<sup>25</sup> Denua nna ustia lu. Neti nna güiala guacatsia belhi guelu-ni lhi'u yu. Nnanna nna ni nu anca gueluha te-ni.”<sup>26</sup> Benni baninna nua nna becabina rána: “Lu ancalu ttu nu riben sina runi nu lä anca tsee, ancaguabalu ttu nu lea lhe. Yuxalu dequi rolapaba atta bittu rada lhe redíguaba lena atta bittu neti bedelha xua lhe<sup>27</sup> ¿biacala bittu guaca'anlu belhi quia-ni atta uncana xi'inni, qui nnanna besíaya nna edía na ittupa len xi'inni?”<sup>28</sup> Laniala rána adí ca nu se'e nía: “Gualcua ttu mili-na lo náni, gualute na len nu ulha tsii mili-na.”<sup>29</sup> Cumu nu te gueniha nna dhirla nua adí qui gatta chatti gueni, ttiaca nu bittu te gueniha nna axtala nu saro'o te gueniha itúa.<sup>30</sup> Unbiyuu nu bittu guacana un sina-ni nna gualudaxxu na gualudelhana atta anca chulha-na, na nua atta cuesna lhe go lo layani lhe.”

### Jesús unie elha uxtisi gue ca benni se'e yies lo yu-ni

<sup>31</sup> 'Gansi chi besíaya neti Benni unbiyuu daa iyyabaaha, dedaaya deyu'a lhe'e xieni ga'ana tsee quia, lenia iyácea ca ingeli quia-na, qui dhoa lo xxila ga'ana tsee quia innabiaya.<sup>32</sup> Lania nna iyárechaba ca benni se'e itúba yies lo yu-ni isíacana atta doa. Neti nna cuequiesia lhe'e loescani, attiba runi benni ruyú carne'e ribequiesna ca chivaha lhe'e ca carne'eha.<sup>33</sup> Ca benni beni nu anca tsee nna use'a cana daca ná derechu quia, ca benni beni nu lä anca

tsee nna use'acana daca ná rabesa quia.<sup>34</sup> Lania nna neti benni rinnabia xeni, upea ca nu se'e deca ná derechu quia: “Gualtá, lebi'i, ca nu raca len Tata quiaha, qui dhíle nu tsee chi ga'ananie dhi ca benni rinnabie. Unní nua nu chi ga'ananie dhíle desdeba atti chi cuela yies lo yu-ni.<sup>35</sup> Cumu atti utunia nna lebi'i nna bennabale nu utoa, atti bebisia nna bennaguabale inda u'uya, atti requiaanca attiba benni dittu nna bennabale atta be'ana,<sup>36</sup> atti beasa xoa nna bennabale nu ucua, atti unia nna biyúbale neti, atti utta lisiyya nna bettenalhibale neti.”<sup>37</sup> Ca benni runi nu anca tseeha nna ecabicana quia, innávana: “Tata, ¿nuca bilentu lu ritunlu, nianna bennatu nu utolu? ¿Nuca bilentu lu rebislú nna bennatu inda uya'alu?<sup>38</sup> ¿Nuca bilentu lu requilu ancalu attiba benni dittu, nianna bennatu atta eya'anlu? ¿Nuca bilentu lu requilu reasa xolu nna bennatu nu uculu?<sup>39</sup> ¿Nuca bilentu lu telu ranlu o telu lisiyya nianna bettenalhitu lu?”<sup>40</sup> Neti benni rinnabia xeni nna ecabia innía: “Gualíbatia rpea le, atti benle yuda ttu ca benni raca betsloesri-ni, masquiba ancacana nu bittu ra xxeni leni nna netiba nua benle yuda.”

<sup>41</sup> Nianna upea ca nu sia deca ná rabesa quia: “¡Lebi'i, ca nu ralha tsiale atta quixa guele! ¡Gualbietta atta dua-ni! Gualtsia lo gui nu ttu dia liiba ritena, atti chi anca tsia nu xxegüiha lenna ca ingeli gueniha.<sup>42</sup> Cumu atti bitunia nna läga bennale nu goa, atti bebisia nna bittuguuba bennale inda i'iya,<sup>43</sup> atti güequia uca attiba benni dittu nna lebi'i nna läga bennale atta eya'ana, atti güequia beasa xoa nna bittuguuba bennale nu ucua, atti unia lhe utta lisiyya lhe lebi'i nna läga bettenalhile neti.”<sup>44</sup> Lania nna ecabicana quia, innávana: “Tata xisi, ¿núca nua bilentu lu ritunlu lhe rebislú lhe requilu attiba benni dittu lhe requilu reasa xolu lhe o ranlu lhe o telu lisiyya lhe nianna bittu bentu lu yuda?”<sup>45</sup> Lania nna ecabia gue ca nua, innía: “Gualíbatia rpea le, atti bittu benle ttu ca benni bittu ra xxeni leni se'e-ni yuda nna netiba nua bittu benle yuda.”

<sup>46</sup> Nianna rá Jesús:

—Ca nu runi nu lä anca tsee-na nna tsiacanana atta ttu dia liiba uyúvana elha disa, ca nu runi nu anca tsee-na nna eyyabacana atta gatta elha nabani guecani ttu dia lii.

## Reguila le ca benni gaxasná uncana utticana Jesús

(*Mr. 14:1-2; Lc. 22:1-2; Jn. 11:45-53*)

**26** Atti uluxa unne Jesús iyába ca tisa-ni nna ráttebe ca benni rudheti ca tisa rule'e:

<sup>2</sup>—Lebi'i nna chiba yule, a chupa ubisarba reasa isía laní nu te láni Pascua. Lania nua utevana neti Benni unbiyuu daa iyyabaaha las ná ca nu utticana neti lo ya crusi.

<sup>3</sup> Ca nu lo gue ca bixxudiha lencana ca nu rule'e nu rá lo ca ley boca'ana Moisés, ca nu teru elha rieni gueni gue ca benni Israel lhe bitupacana lhe'eli'a gue yo'o lagüii atta do bixxudi xeni rinnabia lá Caifás. <sup>4</sup> Nía uyu'ucana beguila lecani gaxasná uncana qui udaxxucana Jesús. Lacana nna cuentaba uncana xiyya guee dequi benie ttu nu bittu dica unie qui aca utticane. <sup>5</sup> Ttiaca lacana nna rácana:

—Bittu unri aná lhe'e laní-ni qui bittu utsatsari benni.

## Ttu nuila rudona seti rure xixxi iqui Jesús

(*Mr. 14:3-9; Jn. 12:1-8*)

<sup>6</sup> Atti do Jesús lhe'e yiesi nu te láni Betania lisi Simón bi'ini teequinna lábi nu uca lepra. <sup>7</sup> Nía bisína ttu nuila nujana ttu cantito ancana leni ttu iyxa tsee nu te láni alabastro, ta'a seti rure xixxi daca yaxi lhe'eni. Laca do Jesús ro'o mexaha nna nuilaha nna bedottebana setiha iqui Benniha. <sup>8</sup> Atti biláni ca benni rudheti ca tisa rule'e Jesús nu ben nuilaha nna bisa'attebaquinbi, nianna rácabi:

—¿Biaca cuentaba bedelha lattina seti rure xixxi-na? <sup>9</sup> Tseerla ttirca betto'ona seti-na yaxi, belhi nu utixacana seti-na nna utena nua qui dhi ca benni bittu te guequinna.

<sup>10</sup> Atti utedaani Jesús nu rá ca bi'iniha nna ráttebe:

—¿Biaca rinnele gue nuila-ni? Nu beni unní, len neti nna ancana ttu nu tsee. <sup>11</sup> Cumu ca benni bittu te guequinna satíaba tse'e ca unná len lebi'i, ttiaca neti nna läga aní dhoa len lebi'i ttu dia lii. <sup>12</sup> Larcala nu beni nuila-ni bedona seti-na iquia nna bodútseeba unná neti qui chi do tseea igatsia gansi chi uttia. <sup>13</sup> Neti nna gualíbatia rpea le, gaxaba lhe'e ca yiesi se'e itúba yies lo yu-ni atta quixxi'a ca benni ca tisa quia-ni, quixxi'aguuba ca benni nu beni nuila-ni qui exxale benni nu benna.

## **Judas bodha'anna tisa utena Jesús las ná ca nu utticane**

(*Mr. 14:10-11; Lc. 22:3-6*)

<sup>14</sup> Judas Iscariote, ttu ca benni ts'i'inu rudheti ca tisa rule'e Jesús, güiattebana atta se'e ca nu lo gue ca bixxudiha. <sup>15</sup> Nianna rán ca nua:

—¿Tti quixale neti gansi utea Jesús-na las nále?

Ca unnuha nna begüeegan na rerúa (30) belhi plata. <sup>16</sup> Desdeba lania nna udulo Judas reguila leni gaxasná unna utena Benniha las ná ca bixxudiha.

## **Jesús uto rse lenie ca benni rudheti nu rulhe'e laní Pascua**

(*Mr. 14:12-25; Lc. 22:7-23; Jn. 13:21-30; 1 Co. 11:23-26*)

<sup>17</sup> Primerba sá gue laní nu te láni Pascua atti ro ca benni Israel ttaxtila nu bittu levadura dia lennaha, ubigatteba ca benni rudheti ca tisa rule'e Jesús loe, qui unnaba tisacabi Benniha rácabi:

—¿Gonni raca lelu tsiatu sasía tseetu nu go rseri laní Pascua-ni?

<sup>18</sup> Lee nna becabie re:

—Gualtsia lhe'e yies-na, gualgási unbiyuu do naa: “Aní rá Maestruha: Chiba dabiga ura quia. Larcala nna raca lasia ita lhe'e yo'o guelha qui uttea laní Pascua-ni len ca benni rudheti ca tisa rule'a.”

<sup>19</sup> Ca bi'iniha nna benbacabi attiba rába Jesús, güiabacabi güencabi rse gue laní Pascua nía.

<sup>20</sup> Atti chi ulha sá nna bedotteba Jesús ro'o mexaha lenie ca bi'ini ts'i'inu rudheti ca tisa rule'e. <sup>21</sup> Laca siaque go rse nna unnetteba Jesús re ca bi'iniha:

—Neti nna gualíbatia rpea le, nuxa ttule nna utele neti las ná ca nu utticana neti.

<sup>22</sup> Ca bi'iniha nna tsitsiba use'e si'icabi, nianna udulottebacabi ttuttu ttuttubacabi unnaba tisacabi rácabi Benniha:

—Benni bananie neti, ¿si läba netiba nua?

<sup>23</sup> Jesús becabie re:

—Nu ugutuna len neti lhe'e la ttuba platu-ni, unnuha nua utena neti las ná ca nua. <sup>24</sup> Neti Benni unbiyuu daa iyyabaaha nna labíaba satea iyába nu chi ga'ana lo ca sitsi gue Tata Do Iyyabaaha. Ttiaca,

¡carusi'iru nu utena neti las ná ca nu utticana neti! Tseerla saliana nua ttirca bittuba ulina.

<sup>25</sup> Laniala nna rá Judas nu utena Benniha las ná ca nu utticane:

—Maestro, ¿si läba netiba nua?

Lee nna becabie re:

—Luba chi biría ro'olu nua.

<sup>26</sup> Laca siacabi go nna bedaxxutteba Jesús ttu ttaxtila, dequide begüee xquixaru Tata Do Iyyabaaha nna ulha'attebe lhe'e benniha begüee ca bi'ini rudheti ca tisa rule'e. Nianna re ca bi'iniha:

—Gualudaxxu benni, atti gualgotte. Ben-ni anque cuerpu quia.

<sup>27</sup> Lenla nna bedaxxuttebe ttu copa ta'a vinu lhe'eni. Dequide begüee xquixaru Tata Do Iyyabaaha nna betettebe copaha len ca bi'ini rudheti ca tisa rule'e, nianna re:

—Iyáxeale guali'iya ben-ni, <sup>28</sup> cumu ben-ni anque reni quia. Len ben-ni eya'an tsitsi ca tisa cubi chi begüee Tata Do Iyyabaaha len ca benni. Reni quia-ni nua ilali lo ni'a gue ixe ca benni qui dhi Tata Do Iyyabaaha elha xen lasi gue ca tulha guecani. <sup>29</sup> Neti nna rpea le, bedá nnanna bitturu i'iya inda xixxi gue besuli-na attu libe, axta liba gansi chi bisía sá atti i'iya vinu cubi len lebi'i atta rinnabia Tata quiah.

<sup>30</sup> Dequide bilhaque ttu salmo nna diattebaque lo lhilhi Atta Daa Ca Ya Olivuha.

### **Jesús rixxi'e bittu dhi ro'o Pedro dequi ancabienbi benniha**

(*Mr. 14:26-31; Lc. 22:31-34; Jn. 13:36-38*)

<sup>31</sup> Atti bisíncabi lo lhilhiha nna rátteba Jesús ca benni rudheti ca tisa rule'e:

—Iyábale udhá iquile neti nnela, cumu anába chi dia lo ca sitsi gue Tata Do Iyyabaaha atta rinne Benniha re: “Neti nna uttia benni ruyú ca carne'eha, lania nna iyába ca carne'eha gatti laduba udaxxucana.”<sup>a</sup> <sup>32</sup> Ttiaca dequide eyacatia nna lola neti nnerua lole tsiaya daca lo yu te láni Galilea.

<sup>33</sup> Pedro nna rábi Benniha:

—Masquiba udhequi iyá ca benni se'e-ni lu, neti nna läga udhequia lu.

---

<sup>a</sup> **26:31** Zacarías 13:7

<sup>34</sup> Jesús becabie re Pedro:

—Neti nna gualíbatia rpea lu, nnela antisla cues berudi-na, lu nna chila beyonna libe bittu ridí ro'olu gualí anca bienlu neti.

<sup>35</sup> Pedro nna rábi:

—Masquiba gattia len cuinalu, ttiaca locachirba lä dhiba ro'a gualíba ancabiatiá lu.

Aníaguaba rá iyába ca bi'ini rudheti ca tisa rule'e.

### Jesús rinne lenie Tata Do Iyyabaaha

(*Mr. 14:32-42; Lc. 22:39-46*)

<sup>36</sup> Laniala nna dia Jesús lenie ca bi'ini rudheti ca tisa rule'e ttu re atta te láni Getsemaní. Nianna re ca bi'iniha:

—Ni tte gualcuia, laca neti nna tsiaya sannea len Tata Do Iyyabaaha.

<sup>37</sup> Atti diatteba lenie Pedro, a chupa ca xi'ini Zebedeo lhe. Lee nna udulottebe bedú si'ina lee, bedú guatexxattana lee lhe.

<sup>38</sup> Nianna re ca bi'iniha:

—Lastooa-ni nna chi rudú si'ixxattan nna guannalu chitteba daa elhuttia loa. Ni tte gualtse'e, bittu ga'adhile, gualtse'e tenná len neti.

<sup>39</sup> Nianna biriestteba Jesús ttu ro'o, atti bedútteba xibie axta liba binna loe lo yu. Lee nna unnetteba lenie Tata Do Iyyabaaha re Benniha:

—Tata quia, si bittuba dica betsiaattachi neti lo elha disa daa uyúa-ni. Ttiaca läga ria aca nu raca lasia, sinuqui nu innába cuinalu, unnuhaba aca.

<sup>40</sup> Atti bequittebe deyye atta se'e a tsunna ca benni rudheti ca tisa rule'e. Lee nna níaba guatti'e ca bi'iniha tecabi ti'edhicabi. Nianna ráttebe Pedro:

—¿Si niba ttu ura lä udále uchíale tse'ele tennále len neti?

<sup>41</sup> Gualebani, bittu ga'adhile, gualnne len Tata Do Iyyabaaha qui bittu dha nu xxegüiha dhi yien le. Lebi'i nna gua se'ebale uchíale, ttiaca cuerpu guele-na bittu rdana uchíana.

<sup>42</sup> Lee nna dedheyyattebe attu libe güenne len Tata Do Iyyabaaha, nianna redea dacabe Benniha:

—Tata quia, gansi bittuba aca utsiettalu neti lo elha disa daa uyúa-ni, acaba nu innába cuinalu aca.

<sup>43</sup> Atti bequie besine attu libe atta se'e ca bi'iniha, níaba guaditti'e ca bi'iniha dedeti'edhicabi, cumu de ta'axxatta bisiela locabi. <sup>44</sup> Níaba bese'e ca bi'iniha nna dedhia dacabe güenne len Tata Do Iyyabaaha. Ni beyonna libe rie güenne len Benniha, la ca tisa chi re Bennihaba bedenne dacabe attu libe. <sup>45</sup> Laniala nna bequie besine atta se'e ca bi'ini rudheti ca tisa rule'e, nianna ráttebe ca bi'iniha:

—¿Si sna tebale ti'edhile, redí lele lhe? Chi bisía ura atti utecana neti Benni unbiyuu daa iyyabaaha las ná ca nu runi nu lä anca tsee-na. <sup>46</sup> ¡Chinca gualchadha, gualtsá! ¡Gualgüia, ni nu utena neti las ná ca nu utticana netiha chi daa na!

### Bedaxxucana Jesús

(*Mr. 14:43-50; Lc. 22:47-53; Jn. 18:2-11*)

<sup>47</sup> Sna duba Jesús rinnee, atti chi bisína Judas ttu nu babaguuba len ca bi'ini tsil'inu (12) rudheti ca tisa rule'e Benniha. Len lana dia ixeru benni dencana espada lhe yaga lhe. Ca unnuha nua ca nu udhelha ca nu anca nu lo gue ca bixxudiha lencana ca nu teru elha rieni gueni gue ca benni Israel. <sup>48</sup> Judas nu utena Benniha las ná ca nua nna chila utixxi'enna ca nua gaxasná unna qui eyonbia ca nua Benniha. Lana nna rán ca nua:

—Benni utsá loa xxaganiha, unnuha nua, udaxxuttele na.

<sup>49</sup> Nianna ubigatteba Judas lo Jesús rána Benniha:

—¡Padiuxi, Maestro!

Atti betsátteba loni xxaga Benniha. <sup>50</sup> Laniala rá Jesús Judas:

—Betsito, ¡tsattela beni nu dalu unlu!

Atti ubigatteba ca nu daa leni Judas, bedaxxucana Benniha.

<sup>51</sup> Ttiaca ttu ca bi'ini du len Jesús nía, ulequittebabí espada guebiha uchúbi naga nu riben sina gue bixxudi xeni rinnabiahá. <sup>52</sup> Laniala rá Jesús bi'iniha:

—Begu'u espada guelha atta yu'una. Cumu iyába ca nu rutti leni espada, leni espadaguuba gatti ca nua. <sup>53</sup> ¿Si bittuba yulu, neti nna guacaba quia innába lo Tata quiaha qui idhelhe nnannatte la balhala mili ingeli qui odilácabi neti? <sup>54</sup> Ttiaca gansi neti unia anía, ¿galasná saxxína aca nu chi ga'ana lo ca sitsi gue Tata Do Iyyabaaha atta rixxi'a rá, neti nna labíaba satea aní?

<sup>55</sup> La laniatteba nna rá Jesús ca benni se'e nía:

—¿Biaca dale leni espada lhe leni yaga lhe güedaxxu neti attiba ttu ubana? Inqui ttu ttu sába udúa lhe'eli'a gue yotu-na güele'en le nna lebi'i nna bittu bedaxxule neti. <sup>56</sup> Ttiaca iyába unní raca qui saxxína aca nu chi utixxi'a ca benni uca profetaha dia lo ca sitsi gue Tata Do Iyyabaaha.

Lania nna iyába ca bi'ini rudheti ca tisa rule'e Jesús bexunnicabi, a tturba Benniha bodha'ancabi nía.

### Guatsá ducana Jesús lo ca uxtisi gue ca benni Israel

(*Mr. 14:53-65; Lc. 22:54-55,63-71; Jn. 18:12-14,19-24*)

<sup>57</sup> Ca nu bedaxxucana Jesús uchettebacana Benniha lo bixxudi xeni rinnabia lá Caifás, atta se'e ca nu rule'e nu rá lo ca ley boca'ana Moisés lhe ca nu teru elha rieni gueni gue ca benni Israel lhe. <sup>58</sup> Tiaca Pedro nna idittu liba denobi Benniha, ni uta'ababi lhe'eli'a gue yo'o lagüi atta do bixxudi xeni rinnabiaha. Uta'ababi nna udottebabí len ca nu rise'e rapa yo'o lagüiha qui ugüiabi bixa un lencana Jesús.

<sup>59</sup> Ca nu lo gue ca bixxudiha lencana ca nu teru elha rieni gueni gue ca benni Israel, iyába ca nu runi elha uxtisi gue ca benni Israel lhe reguilacana ca benni un lecani qui uncana xiyya gue Jesús, anía liba nna dhacana udelha iyyacane qui te ro'ocani utticana Benniha. <sup>60</sup> Ttiaca läga udácana iríali nu rácana, masquiba ticaxa re benni run leni use'e qui bedelha iyyacana Benniha. Lenla nna ucaxxe a chupa ca güen lasi, <sup>61</sup> ca nua nna rácana:

—Unbiyuu du-ni nna rána: “Neti nna guacaba quia uttapa yotu gue Tata Do Iyyabaaha, lhe'e tsunna ubisaba nna elhidhe attu libe.”

<sup>62</sup> Laniala nna udulí nu anca bixxudi xeni rinnabiaha unnaba tisana Jesús rána Benniha:

—¿Si bittuba ecabilu bixa innálú? ¿Bila rátticabalu gue nu run ca benni se'e-ni xiyya guelu dequi runlu?

<sup>63</sup> Ttiaca Jesús tsa läga becabie gueni. Lania la nna bedennaba tisa bixxudi xeni rinnabiaha Benniha attu libe ráne:

—Tata Do Iyyabaaha Benni doe anque Benni bani rudettia, rinnaba lolu quixxi'alu gansi lu nua Cristu, Xi'ini Tata Do Iyyabaaha.

<sup>64</sup> Jesús becabie re na:

—Luba chi rálu. Anáguaba neti, upeguaba le, lebi'i nna desde nnannali ilenle neti Benni unbiyuu daa iyyabaaha dhoa daca ladu

derechu gue Tata Do Iyyabaaha benni ra xxeni lee, iláguabinle neti dedaaya lhe'e ca bea daa iyyabaaha lhe.

<sup>65</sup> Lania nna uchedatteba xo bixxudi xeni rinnabiah de bisa'axxattinna. Atti ráttebana:

—¡Rigúabunna bala'ana gue Tata Do Iyyabaaha! Lärga nurua reasinri quixxi'enna ri gue bixa runi unní, cuinaba lebi'i chi bieninle rinne güena gue Tata Do Iyyabaaha. <sup>66</sup> Lebi'i nna ¿bila rále?

Ca unnuha nna becabicana rácana:

—Ralhaba unná gattina.

<sup>67</sup> Nianna udulottebacana bettuttu xxencani lo Benniha, begüeecane lhe ulhicana gui loe lhe. <sup>68</sup> Atti rácane:

—Cristu, unne ya'a sanga, ¿núnna begüeen lu?

### Pedro bittu ridí ro'obi anca bienbi Jesús

(*Mr. 14:66-72; Lc. 22:56-62; Jn. 18:15-18, 25-27*)

<sup>69</sup> Pedro nna níaba dobi lhe'eli'a gue yo'oha, nianna ubiga ttu nuila ren sina nía, rán bi:

—Lu lhe guanoguabalu Jesús nu beaca lasni lhe'esi nu te láni Galilea-na.

<sup>70</sup> Ttiaca Pedro nna läga uxí ro'obi ancabienbi Benniha lo iyába ca nu se'e nía, tse'e lolabi rábi:

—Läga yu neti gue bixunná rálu.

<sup>71</sup> Atti beríattebabu guadhúbi ro'o yo'oha, nía bilen attu nuila riben sina lhe'e yo'oha bi. Nuilaha nna rána adí ca nu se'e nía:

—Anáguuba unbiyuu du-ni lhe denoguabunna Jesús gue Nazaret.

<sup>72</sup> Ttiaca labi nna läga bededí ro'obi ancabienbi Jesús, axtaba bedú tsitsibi tisa, rábi:

—¡Tsa läga ancabiatia unbiyuu-na!

<sup>73</sup> Sattigaba uca nna atti chi bedebiga ca nu se'e nía atta du Pedro, ca unnuha nna rácan bi:

—Gaxa gualíba, lu nna ttu ca nu sela len Jesús-nabalu, cumu attiba rinne ca unná rinnelu.

<sup>74</sup> Labi nna utettebabu, bododú tsitsittebabu tisa lhe nianna rábi:

—Tsa läga ancabiatia unbiyuu-na.

Snaba lania nna uresi berudiha. <sup>75</sup> Nianna bexxatteba le Pedro gue ca tisa unne Jesús atti re: “Nnela antisla cuesi berudi-na, lu

nna chila beyonna libe bittu ridí ro'olu anca bienlu neti.” Atti beríattebabí nía, attula de uresi yielabi de relenxxattinbi.

### Guadúcana Jesús lo Pilato

(*Mr. 15:1; Lc. 23:1-2; Jn. 18:28-32*)

**27** Atti chi goaniha nna bitupatteba iyába ca nu lo gue ca bixxudiha lhe ca nu teru elha rieni gueni gue ca benni Israel lhe qui boquinna iquicani utticana Jesús.<sup>2</sup> Nianna bexxicattebacana Benniha, atti chettebacane guadúcane lo nu rinnabia lá Poncio Pilato.

### Judas ulu'u tuu yienni

<sup>3</sup> Nianna Judas nu betena Jesús las ná ca nu utticana Benniha nna atti binana chi boquinna iqui ca nua utticana Benniha nna bexiyyatteinna nianna güiattebana guaru'unna rerúa (30) belhi plataha len ca bixxudi rinnabiahha lhe len ca nu teru elha rieni gueni gue ca benni Israel lhe,<sup>4</sup> nianna rán ca nua:

—Neti nna chi benia ttu tulha xeni, cumu betea las nále ttu benni bittu chi beni ni ttu nu lä anca tsee.

Ttiaca ca unnuha nna becabicana rávana:

—¡Ri'itu nna tsa bittu yutu! ¡Nadi biyú!

<sup>5</sup> Laniala nna guachu'una na ca belhiha lhe'e yotuha, atti biríattebana güiana gualhu'u tuu yienni.

<sup>6</sup> Ca nu lo gue ca bixudiha nna bedigattebacana ca belhiha, nianna rávana:

—Läga anca tsee cu'uri ca belhi-ni lhe'e atta ru'u úna gue yotu-ni, cumu belhi-ni ancana nu utixari qui gatti ttu benni.

<sup>7</sup> Nioca nna boquinna iquicani ixuuquinna belhiha qui go'ocana ttu lo yu nu te láni Xulali Gue Benni Runi Ca Yedhu Yu, qui lo nua nna igatsi ca benni dittu. <sup>8</sup> Denuha nna axtaba nnanna lá xulaliha, Xulali Biyo'o len Reni. <sup>9</sup> Aníaba uca qui guaxxína leni ca tisa unne profeta Jeremías, atti rábi: “Bedaxxubacana rerua (30) belhi plata nu boquinna iqui ca benni Israel aca lidhaca benni gattiha. <sup>10</sup> Len belhiha nna uyo'ocana lo yu nu te láni: Xulali Gue Benni Runi Ca Yedhu Yu. Benbacana attiba rába Benni bananie ri-na neti.”<sup>a</sup>

---

<sup>a</sup> 27:9-10 Zacarías 11:12-13

### **Pilato rinnaba tisana Jesús bixa benie**

*(Mr. 15:2-5; Lc. 23:3-5; Jn. 18:33-38)*

<sup>11</sup> Atti chi duquinna Jesús lo Pilato nu anca nu rinnabiahha nna unnaba tisattebana Benniha ráne:

—¿Si lu ancalu nu rinnabia gue ca benni Israel-ni?

Jesús becabie re:

—Luba chi rálu.

<sup>12</sup> Ca bixxudi anca nu loha lencana ca nu teru elha rieni gueni gue ca benni Israel rudelhiyyacana Jesús, ttiaca Benniha nna tsa läga becabie guecani. <sup>13</sup> De nua nna rá Pilato Benniha:

—¿Si biba rieninlu análi de runcana xiyya guelu?

<sup>14</sup> Ttiaca Jesús, niba ttu tisa lä becabie gueni. Larcala tsitsiba bebanin nu rinnabiahha.

### **Utticana Jesús**

*(Mr. 15:6-20; Lc. 23:13-25; Jn. 18:38-19:16)*

<sup>15</sup> Atti risía laní nu te láni Pascua, nu rinnabiahha nna chi anca bienna rodilána ttu ca benni te lisiyya, rebeabana nu rucueba yiesiha. <sup>16</sup> Lania nua te ttu unbiyuu lisiyya nu lána Barrabás. Unnuha nna iyába benni yuna gue nu runna. <sup>17</sup> Atti chi se'e ttu reba iyá ca benni nna unnaba tisatteba Pilato rána:

—¿Nú raca lele odiláya? ¿Si Barrabás, aca? ¿Jesús benni rále anca Cristu, aca?

<sup>18</sup> Cumu chiba yu Pilato, de lä racaba uyú ca unnuha Jesús nuarca guatecana Benniha las náni.

<sup>19</sup> Laca do Pilato lo xxila atta rinnabianaha nna udhelhatteba nuila gueniha ttu rasona len lana, rán na: “Bittu bi udhaquinlu unbiyuu-na, cumu lägabi tulha gue unná te. Lo ni'a gue unná nna attulade elha disa biyúa bisiela de bitsiatia ttu yiela.”

<sup>20</sup> Ttiaca ca bixxudi anca nu loha lencana ca nu teru elha rieni gueni gue ca benni Israel, ulu'u tisattebacana ca benni se'e nía qui innába ca nua ería Barrabás, Jesús nna utticané. <sup>21</sup> Nu rinnabiahha nna unnaba tisana attu libe rána:

—De lo irpa ca unná, ¿nú cana raca lele odiláya?

Ca unnuha nna rácana:

—¡Barrabás-na bodilá!

<sup>22</sup>Pilato nna rána:

—¿Bila un lania Jesús, benni rále anca Cristu-na?

Iyábacana becabicana rácana:

—¡Betá na lo ya crusi!

<sup>23</sup>Pilato nna rán ca nua:

—¿Biaca nuarca? ¿Bi nu bittu anca tsee beni unní?

Ttiaca ca unnuha nna adílabu uresi'acana rácana:

—¡Betá unná lo ya crusi!

<sup>24</sup>Atti utedeen Pilato tsa läga rdana lo ca nua, cumu adílabu de risatsa ca nua, unnabattebana inda qui utí náni aníba lo iyába ca benni se'e nía. Nianna rána:

—Neti nna läga uxxúa cue'a elhutti gue unbiyuu-ni. Nadi gualyú.

<sup>25</sup>Iyába ca nu se'e nía becabicana rácana:

—Cu'ebatu lhe cu'e ca xi'intu-niba lhe tsia elhutti gue unní.

<sup>26</sup>Laniala nna bodilána Barrabás. Dequide chi benna mandadu utín ca soldadoha Jesús, botettebana Benniha las ná ca nu utácana Benniha lo ya crusi.

<sup>27</sup>Ca soldado gue nu rinnabiha nna uchettebacana Jesús lhe'eli'a gue yo'o lagüiiha atta rido nu rinnabiha runna elha uxtisi, atti beaxittebacana iyába adí ca soldadoha qui ese'ecana sabi'aba Benniha. <sup>28</sup>Lacana nna uleattebacana ca xo Benniha, atti begucuttebacana Benniha ttu lari xinaa chulha, <sup>29</sup>Nianna ulu'uttebacana iquie ttu corona ancana leni xiqui ya yitsi, las ná derechu guee nna ulu'ucana ttu iyyaxtila. Atti bedútteba xibicani loe, runcane burla rácane:

—¡Xxeni ra lelu, xa nu rinnabia gue ca benni Israel!

<sup>30</sup>Atti bettuttutteba xxencani loe, iyyaxtila den Benniha tteba nna utíncana iquie. <sup>31</sup>Dequide chi bencana Benniha burla nna utúattebacana lari xinaa chulha nucuquinna Benniha. Nianna bogucuttebacane ca xun gueeha, atti uchettebacane dia lencane qui utácane lo ya crusi.

### Rutácana Jesús lo ya crusi

(*Mr. 15:21-32; Lc. 23:26-43; Jn. 19:17-27*)

<sup>32</sup>Atti biría ca soldadoha dia lencana Jesús, nía besácana ttu unbiyuu lábi Simón, bi'ini beaca lasbi lhe'esi nu te láni Cirene. Bi'iniha nua bencana duelha guebi bijabi ya crusi gue Jesús. <sup>33</sup>Atti

bisíncabi ttu re atta te láni Gólgota, nu dienna innána: Bega Iqui Nu Yatti,<sup>34</sup> nía nua atta begüeecana Benniha vinu nu selana ttu coana ilhá. Ttiaca dequide benixxie nua nna läga uca lee i'iye nua.

<sup>35</sup> Atti chi betácana Benniha lo ya crusihha nna uyu'utteba ca soldadoha bencana ttu nu ule'e lo nuxa ca xo Benniha eyoja ttuttucana. Aníaba uca qui guaxxína ca tisa unnee benni uca profeta gue Tata Do Iyyabaaha atti rábi: "Belha'aba guecani ca xun quiaha, bencana ttu nu bele'e lo nuxa ca nua eyoja ttuttucana."<sup>36</sup> Lacana nna usiattebacana nía upacana Benniha.<sup>37</sup> Betáguaabacana ttu breta iqui crusihha ta Benniha, nu diaquinna loni bixa lo ni'a gue betácana Benniha lo ya crusihha. Lo bretaha nna rá: "Unní ancana Jesús, nu rinnabia gue ca benni Israel."

<sup>38</sup> Betáguaabacana a chupa ca ubana lo ca ya crusihha len Benniha, ttuna betácana lo ya crusihha du ladu derechu guee, attu nua nna betácana lo ya crusihha du ladu rabesa guee.<sup>39</sup> Ca nu ritee atta du ya crusihha ta Jesús nna rudhaca disacane, atti rutttáteba iquicani<sup>40</sup> rácana Benniha:

—¡Läba lu nua rálú dequi uttapalu yotu-na, nianna lhe'e tsunna ubisaba nna elhidhalue attu libe! ¡Gansi gualínlu, lu nua xi'ini Tata Do Iyyabaaha, la luba ben sanga gaxasná qui lhálu, beadi tte lo ya crusihha na lhe!

<sup>41</sup> Aníaguaba runi ca nu lo gue ca bixxudiha, ca nu rule'e nu rá lo ca ley boca'ana Moisés lhe ca nu fariseo lhe ca nu teru elha rieni gueni gue ca benni Israel lhe lacana nna runcana Benniha burla, rácana:

<sup>42</sup>—Güenba bodilána adí benni, ttiaca bittu raca gueni gaxasná uni la labana qui lhána. Gansi gualínna ancana nu rinnabia gueri ri'i ca benni Israel, ¡eyadi sanga-na lo ya crusihha aní lori qui tsia leri-na!<sup>43</sup> Lana nna Tata do Iyyabaahaba bexxen leni. Nnanna nna odilá sanga benna na gansi gualíga racanie gueni. Läba ráxa unná: "Neti anca xi'ini Tata Do Iyyabaaha."

<sup>44</sup> Axtaba ca ubana ta lo ca ya crusihha se'e daca lhuitta Benniha rudhaca disa cane.

### Utti Jesús lo ya crusihha

*(Mr. 15:33-41; Lc. 23:44-49; Jn. 19:28-30)*

<sup>45</sup> Desdeba retin tsí'inu (12) resá bechulha itúba yies lo yu, axtaba retin tsunna ulha.<sup>46</sup> Atti chi deoba ugüéna retin tsunna nna uresí'a Jesús re:

—Elí, Elí, ¿lama sabactani? —Ca tisa-ni nna diacanie innáque: Tata quia do iyyabaaha, Tata quia do iyyabaaha, ¿biaca neti rudhequilu?

<sup>47</sup> Atti bienin ttulhe ca nu se'e nía nu rá Benniha nna ráttebacana:

—Profeta Elíasba bi'in-na raxi unná.

<sup>48</sup> Loora lania tteba nna bigaatteba ttu ca nu se'e nía guadáxxuna ttu ti'a xila bedona vinu idí iqui nua. Atti bexxicattebana nua lo ttu iyyaxtila, nianna besigattebana nua ro'o Jesús qui i'eye nua.

<sup>49</sup> Ttiaca adí ca nu se'e nía nna rácana:

—Begüelha sanga-na, gansi güisía Elías ettedilabi na.

<sup>50</sup> Jesús uresi'attebe attu libe idisa, atti uttittebe. <sup>51</sup> Snaba lania nna biredatteba rulha xeaba lhe'e lari daa lhe'e yotuha, desdeba xequini axtaba xani'ani. Atti bixútteba yies lo yu-ni, ca iyyatoo-na nna bixátteba lhe'ecani. <sup>52</sup> Bealtteba ro'o ca baa-na, ixeru ca benni chi utti ca benni chi ulequiesi Tata Do Iyyabaaha aca guee beaquincabi. <sup>53</sup> Lacabi nna beríattebacabi lhe'e ca baa atta yu'ucabiah, dequide chi beacani Jesús, ca bi'iniha nna beta'attebacabi lhe'e yiesianca lhe'aha, unnuha nua yiesi Jerusalén, ixeru ca benni se'e nía biláquinbi ca bi'iniha.

<sup>54</sup> Atti biláni soldado gue Roma nu banani ca soldadoha lenna ca nu se'e rapa Jesús, rixú lhe iyába nu ucaha lhe attulade usquinna nianna rácana:

—¡Gualíba unbiyuu-naba Benniha anque Xi'ini Tata Do Iyyabaaha!

<sup>55</sup> Idittu liba se'e ixeru ca nuila rugüiacabi nu rate Jesús. Ca bi'iniha nua guanocabi Benniha, betecabi nu beasanie lhe desdeba Galilea. <sup>56</sup> Len ca nuilaha sela María Magdalena, María nan gue Jacobo lhe José lhe nan gue ca xi'ini Zebedeo lhe.

### Rucatsicana Jesús

(Mr. 15:42-47; Lc. 23:50-56; Jn. 19:38-42)

<sup>57</sup> Atti chi ulha sá nna bisína José, ttu unbiyuu te belhi guebi, bi'iniha nna beaca lasbi lhe'esi nu te láni Arimatea. Labi nna ucaguabi benni bedheti ca tisa bele'e Jesús. <sup>58</sup> José nna güiabi guayúbi Pilato, bennababi cuerpu gue Jesús qui ucatsibi Benniha. Pilato nna benttebana mandadu otecana Benniha len bi'iniha.

<sup>59</sup> José nna bodaxxuttebabí Benniha, nianna bottesttebabí Benniha

tu lari tsee narixuu. <sup>60</sup> Atti güiattebabí guacatsibi Benniha lhe'e ttu baa cubi beaca guebi nu utenbi lhe'e ttu iyyatoo. Dequide bettulhubi ttu iyya xení qui bedheabi ro'o belea nna güequittebabí deyyabi. <sup>61</sup> María Magdalena lenbi attu bi'ini láguaba María, níaba usiacabi ttu ladu gue atta te baaha.

### **Ca soldado se'e rapa ro'o baa**

<sup>62</sup> Betteyú dila, la sá atti redí le ca benni Israel, güiatteba ca nu lo gue ca bixxudiha lencana ca nu fariseo atta do Pilato. <sup>63</sup> Nianna rácana nua:

—Xa Tata, ri'itu nna bexxa letu gue nu unnee nu güenlasi Jesús, atti sna requi banbana, lana nna rána: “Dequide tsunna ubisa nna eyacatia.” <sup>64</sup> Larcala nna rinnabatu lolu idhelhalu ca soldado guelha qui gapacana baaha axta liba eyonna ubisa, qui lä tsia ca benni bedheti ca tisa bele'e unná salhanacana benni yatti-na. Atti tsequittebacana gácana benni dequi becabani Jesús, beríaba Benniha lhe'e baa atta yu'u ca nu yatti-na. Lania nna unnuha la aca elha güen lasi xenru attichula nu unne nu yatti-na atti do banina.

<sup>65</sup> Pilato nna ráttebana ca nua:

—Naba se'e ca soldado quia-na. Gualchecana gualsase'ecana atta te baaha qui gapa tsitsicana ro'o nua attiba rudhaca lele anca tsee.

<sup>66</sup> Lania nna güiattebacana gualhequi tsitsicana iyya nu yaya ro'o baaha, bese'eguabacana ca soldado qui uyú tsitsicana ro'o nua lhe.

### **Jesús beacanie**

*(Mr. 16:1-8; Lc. 24:1-12; Jn. 20:1-10)*

**28** Dequide chi ute sá redí le ca benni Israel, dilatte la sá atti redú lo xumanu, güiatteba María Magdalena lenbi attu bi'ini lá María guagüiacabi lo baaha. <sup>2</sup> Attirba ttu nnelaba idíru bixú, cumu ttu ingeli gue Benni bananie ri-naba bi'iniha guadibi dabi iyyabaaha, ingeliha nna ubigattebabí ro'o baaha, atti utúattebabí iyya yaya ro'o nua, nianna udottebabí iqui iyyaha. <sup>3</sup> Rigu'urubi xiení attiba xiení gue ttu edha, xobi nna ancana sitsi chabea ttonísha attiba beya. <sup>4</sup> Atti biláni ca soldadoha ingeliha nna attulade bixidicana de usixxattaquinna tsaba bechulhaquinna attiba ttu nu yatti ucacana. <sup>5</sup> Ingeliha nna rábi ca nuiila:

—Bittu gasinle. Neti nna guayúba, lebi'i nna reguilale Jesús Benni betácana lo ya crusiba.<sup>6</sup> Lärga nurua Benniha te-ni, chiba beacani Benniha attiba chi re. Gualtárqa gualugüia atta utixxacana Benniha.<sup>7</sup> Nnanna nna gualeyya dhuti gualsatixxi'ani ca bi'ini bedheti ca tisa bele'e Ben-na, Benniha nna chiba beacanie, lola lee chi nerue lole die lo yu nu te láni Galilea. Nía liba nna eti'a lee. Neti nna unníba daya güetixxi'en le.

<sup>8</sup> Nianna beríatteba ca nulaha lhe'e atta te baaha, rasbaquinibi lhe re'oba lecabí lhe atti bexunnittebacabi deyyacabi güetixxi'en ca benni bedheti ca tisa bele'e Jesús iyába nu uca.<sup>9</sup> Laca de yu'ucabi neda nna ucaxxetteba Jesús guatsee ca bi'iniha, nianna re cabi:

—¡Padiuxi!

Lacabi nna ubigattecababi guattescabi ca ni'e, atti ulequi xxenttebacabi Benniha.<sup>10</sup> Nianna rá Jesús cabi:

—Bittu gasinle. Gualtsia gualsatixxi'en ca betsi loesiha, ca benni bedheti ca tisa bele'a, qui tsiacabi daca Galilea. Nía eti'acabi neti.

### Nu rixi'a ca soldadoha

<sup>11</sup> Laca deyu'u ca nulaha neda deyyacabi, ttulhe ca soldadoha nna beyyattebacana lhe'e yiesiha, guatixxi'aquinna ca bixxudi anca nu loha iyába nu ucaha.<sup>12</sup> Ca bixxudi anca nu loha nna betupattebacana ttu reba len ca benni teru elha rieni gueni gue ca benni Israel, lacana nna ttuba bese'ecana boquinna iquicani ugüecana ca soldadoha xenru belhi.<sup>13</sup> Nianna rácana ca nua:

—Lebi'i nna innále: “Lo rela laca tetu ti'edhitu nna bisía ca benni bedheti ca tisa bele'e Jesúsbettelhánacana benni yattiha.”<sup>14</sup> Gansi eyona nu rinnabiha iyába unní nna ri'itu nna guanneba lento nua qui bittu bi udhaquinna le.

<sup>15</sup> Ca soldadoha nna bedaxxubacana belhiha, lacana nna benbacana attiba rába ca bixxudiha uncana. Larcala nna ca tisa unne ca soldadohaba sna rinneba ca benni Israel axtaba nnanna.

### Jesús ridhelhe ca benni ria lecanie tsiacabi quixxi'acabi ca tisa guee

(Mr. 16:14-18; Lc. 24:36-49; Jn. 20:19-23)

<sup>16</sup> Iyába sinía (11) ca bi'ini bedheti nu bele'e Jesús diacabi lhe'e yiesi te láni Galilea lo lhilhi atta benie ca bi'iniha mandadu

tsiacabi.<sup>17</sup> Atti biláquinbi Benniha nna bedútteba xibicabi loe, ttiaca se'eguaba ttlhecabi rulaba lecabí si gualíga Benniha nua.  
<sup>18</sup> Jesús ubigattebe atta se'e ca bi'iniha, nianna re cabi:

—Tata Do Iyyabaaha chi betee derechu len neti, qui innabiaya yies lo yu-ni lhe iyyabaaha lhe.<sup>19</sup> Larcala nna gualtsia lhe'e iyába ca yiesi se'e itúba yies lo yu-ni, gualuse'e ca benni udheti ca tisa quia-ni, gualugadicana inda lhe. Atti ugadile cana inda nna udettile lá Tata Do Iyyabaaha, lá Xi'ini Benniha lhe lá Espíritu gue Benniha lhe.<sup>20</sup> Gualulhe'equinna udocana tisa gue iyá nu chi benia le mandadu unle. Neti nna ttutu sába guadúba len lebi'i axta liba atti isía sá lhuxa yies lo yu-ni. [Amén].

# Ca tisa rixxi'a gue Jesús ben Marcos lo sitsi-ni

**Juan bi'ini rugadi indaha rixxi'abi chi daa Jesús**

(Mt. 3:1-12; Lc. 3:1-9,15-17; Jn. 1:19-28)

**1** Ni ridulo ca tisa tsee rixxi'a gue Jesucristu benni anque xi'ini Tata Do Iyyabaaha. <sup>2</sup>Lo ca sitsi gue profeta Isaías, rixxi'a nu rá Tata Do Iyyabaaha atti unnee rulise Jesús re Ben-na:

Neti idhelha ttu benni nneruna lolu.

Bi'iniha idhalbi neda guelu.<sup>a</sup>

<sup>3</sup> Bi'iniha nua ribesi'abi lo ttu yu bisi atta nuttu benni se'e,  
nianna rábi:

“Gualeon tsee neda gue Benni bananie ri-na.

Gualdhali ttu neda lhixxa suu guee lhe.”<sup>b</sup>

<sup>4</sup> Anía uca nna Juanba bi'iniha bisínbí lo yu bisiha. Labi nna rulisabi ca benni qui odú xiyyancana, eyadicana inda lhe qui dhi Tata Do Iyyabaaha elha xen lhasi gue ca tulha guecani.

<sup>5</sup> Iyába ca benni se'e lo yu nu te láni Judea, ca nu se'e lhe'e yiesi Jerusalén lhe riacana atta requi Juan. Atti ruxxúa lopicana ca tulha guecani lo Tata Do Iyyabaaha nna rugaditteba Juan cana inda lhe'e yoo nu te láni Jordán.

<sup>6</sup> Xo Juan ancana leni itsa xo nimala te láni camello. Nu ridhí lhe'ebi nna ancana ttu yieti. Elha go robi nna ancana nu xixxi i'iya lhe nu anca attiba uxxaru lána langosta lhe. <sup>7</sup> Labi nna riguixxi'enbi ca benni rábi cana:

—Dequide neti nna chi daa attu benni ra xxenru lee atti neti. Benniha nua niba läbi elha ralha iyachua idhasia lo guaracha guee. <sup>8</sup> Neti nna sunruba rugadia le inda, ttiaca benni chi dabaha nna ugadie le inda leni Espíritu gue Tata Do Iyyabaaha.

---

<sup>a</sup> **1:2** Malaquías 3:1    <sup>b</sup> **1:3** Isaías 40:3

### **Jesús radie inda**

(Mt. 3:13-17; Lc. 3:21-22)

<sup>9</sup> La laniaguaba nua biría Jesús lhe'e yiesi nu te láni Nazaret nu re lo yu nu te láni Galilea, die atta du Juan. Nianna Juan nna begadibi Benniha inda lhe'e yoo Jordán. <sup>10</sup> Lagüiba atti dia Jesús reríe lhe'e indaha nna biláttebanie beali iyyabaaha biría Espíritu gue Tata Do Iyyabaaha dee guadie, anque attiba ttu becha, udoe iqui Jesús. <sup>11</sup> Nianna bientteba tsi'i Tata Do Iyyabaaha re Jesús:

—Lu ancalu xi'inia Benni racatia gueni, neti doa redaca lasia len luu.

### **Nu xxegüiha runna dhi yiena Jesús**

(Mt. 4:1-11; Lc. 4:1-13)

<sup>12</sup> Nianna uchetteba Espíritu gue Tata Do Iyyabaaha Jesús lo ttu yu bisi. <sup>13</sup> Níaba udoe chua (40) sá atta beni nu xxegüiha dhi yiene. Leni ca nimala lisía requi níaba udoe. Ca ingeli gue Tata Do Iyyabaahaba biyúcabí Benniha.

### **Jesús riduloe rule'enie ca benni**

(Mt. 4:12-17; Lc. 4:14-15)

<sup>14</sup> Dequide chi utixxacana Juan lisiyya, diatteba Jesús lo yu nu te láni Galilea güettixxi'en ca benni se'e nía ca tisa tsee gue gaxasná rinnabia Tata Do Iyyabaaha. <sup>15</sup> Lee nna re ca benni se'e nía:

—Chi guadona gue sá ga'anani Tata Do Iyyabaaha. Chi daa ribiga aque Benni rinnabia guele. Larcala nna gualodú xiyyanle, gualtsia lele ca tisa tsee rixxi'a gue Ben-na lhe.

### **Jesús raxie ttapa ca benni yu'u güedaxxu belha**

(Mt. 4:18-22; Lc. 5:1-11)

<sup>16</sup> Atti dia Jesús yu'e neda ro'o indattoo gue Galilea, nía bilánie Simón lenbi betsibi Andrés yu'ucabi güedelha yexxa lhe'e indattooha cumu irupabacabi ancacabi benni rudaxxu belha.

<sup>17</sup> Jesús ráttebe cana:

—¡Gualtá gualetteno neti! Neti nna unia acale nu gaxi benni qui udaxxucana neda gue Tata Do Iyyabaaha.

<sup>18</sup> Snaba lania nna boca'an bixxicabi ca yexxa guecabiha nía. Nianna diattebacabi len Jesús.

<sup>19</sup> A saro'ogarba ude nna bedeláttebanie Jacobo lenbi betsibi Juan, ca xi'ini bi'ini lá Zebedeo siacabi lo barco guecabiha reoncabi atta chi bisú gue ca yexxa ca nu riuincabi rudaxxucabi belha. <sup>20</sup> Lee nna bedeaxissebe ca bi'iniha. Ca bi'iniha nna níaba boca'ancabi tata guecabi Zebedeo lo barcoha lenbi adí ca benni riben sina guecabiha, atti diattebacabi len Jesús.

### Jesús rebequie be xxegüi yu'u lhe'e cuerpu gue ttu unbiyuu

(Lc. 4:31-37)

<sup>21</sup> Atti chi bisína Jesús lenie ca benni rudheti ca tisa rule'e lhe'e yiesi Capernaum, la sá redí le ca benni Israel, uta'attebe lhe'e yo'o atta rudheti ca benni Israel ca tisa gue Tata Do Iyyabaaha. Nianna udulottebe bele'enie ca benni se'e nía. <sup>22</sup> Ca unnuha nna rebanbaquinna gue atti rule'e Benniha, cumu rinnee atti rinne ttu benni ra xxeni leni, läga atti rinne ca nu rule'e nu rá lo ca ley boca'ana Moisés. <sup>23</sup> Lhe'e yo'o atta rudheti ca benni Israel ca tisa gue Tata Do Iyyabaaha do lhe'e yiesiha, nía du ttu unbiyuu yu'u be xxegüi lhe'e cuerpu gueni. <sup>24</sup> Unnuha nna uresi'attebana rána:

—¿Biaca dalu ruga'a guelu len ri'itu, Jesús gue Nazaret? ¿Si dalu güelhuxa ri'itu, aca? Neti nna anca biabatia lu, larca yuba lu ancalu Benni do riesi anca gue Tata Do Iyyabaaha.

<sup>25</sup> Jesús bedhaca disattebe be xxegüiha re na:

—¡Bedhea ro'olu nna beríatte lhe'e unbiyuu-na!

<sup>26</sup> Be xxegüiha nna attulade becuibina unbiyuha. Nianna ribesi'l a layani-na beriana lhe'e nua. <sup>27</sup> Ca nu se'e nía nna iyábacana usquinna atti unnaba tisatteba loescani rácana:

—¿Biunni raca-ni? ¡Attu nu cubi bunni rule'eni benni du-ni ri! ¡Gualgüiarga, análí de elha rinnabia xeni rapana, lana nna rinnabiana ca be xxegüi-na, ca unná nna rudobacana tisa gueni!

<sup>28</sup> Sattitte bina iyába ca benni se'e itúba lo yu nu te láni Galilea gue nu runi Jesús.

**Jesús reonie ixeru ca benni rani***(Mt. 8:14-15; Lc. 4:38-39)*

<sup>29</sup> Dequide bería Jesús lhe'e yo'o atta rudheti ca benni Israel ca tisa gue Tata Do Iyyabaaha, diattebe leni Jacobo lhe Juan lhe lhe'e yo'o gue Simón lenbi Andrés. <sup>30</sup> Nan gue nuila gue Simón nna teba bi'iniha cumu yu'ubi xilhá. Ca benni se'e nía nna utixxi'attebaquinna Jesús, nuilaha nna ránbabí. <sup>31</sup> Lee nna ubigattebe bedaxxue ná bi'iniha qui ulhidhe bi. La laniatteba nna bería xilháha lati bi'iniha. Labi nna benttebabí nu uto ca benniha.

<sup>32</sup> Atti chi dia raca ela, dequide chi goadi tatubisa-na, uchetteba ca benni ca nu rani lhe ca nu yu'u be xxegüi lhe'e cuerpu guecani lhe lo Jesús. <sup>33</sup> Iyába ca benni se'e lhe'e yiesiha güiacana bitupacana ro'o yo'o atta do Benniha. <sup>34</sup> Jesús nna beonttebe ixeru ca benni rani ca nu ixe loba isagüe rdacacana, bebee ixeru ca be xxegüi yu'u lhe'e cuerpu guecani lhe. Lee nna tsa läga begüeelhe ca be xxegüiha innecana cumu guayúba ca nua nuxa anca Benniha.

**Jesús rixxi'e ca tisa gue Tata Do Iyyabaaha lo yu nu te láni Galilea***(Lc. 4:42-44)*

<sup>35</sup> Betteyú dila nna sna ancarla chulha, guadhatteba Jesús biríe lhe'e yiesiha qui isíne ttu re atta nuttu nu benni requi. Nía unne lenie Tata Do Iyyabaaha. <sup>36</sup> Simón lenbi ca benni se'e lenbi nía, güiattebacabi guatilacabi Jesús. <sup>37</sup> Atti guatti'acabi Benniha nna ráttebacabi Benniha:

—Iyába ca benni requicana reguilacan lu.

<sup>38</sup> Ttiaca lee nna ráttebe ca bi'iniha:

—Gualtsá tsíari lhe'e adí ca yiesi se'e gaxxaba na qui sattixxi'atia ca benni se'e na ca tisa gue Tata Do Iyyabaaha, cumu de unnuha xa nna nuarca bisíaya yies lo yu-ni.

<sup>39</sup> Larcala nna iyába lhe'e ca yiesi se'e lo yu nu te láni Galilea güia Jesús güettixxi'a ca tisa gue Tata Do Iyyabaaha lhe'e ca yo'o atta rudheti ca benni Israel ca tisa gue Benniha lhe bebequie ca be xxegüi yu'u lhe'e cuerpu gue ca benni lhe.

## Jesús reonie ttu unbiyuu rácana lepra

*(Mt. 8:1-4; Lc. 5:12-16)*

<sup>40</sup>Ttu unbiyuu raca cuerpu gueni nu anca attiba yiesusu te láni lepra, ubigattebana atta du Jesús. Nianna bedútteba xibini unnabana lo Benniha ráne:

—Gansi cuinalu aca lelu nna guaguabalu isagüe quia-ni.

<sup>41</sup>Jesús besi'ittebanie nua. Nianna becatteba nee utane cuerpu gue nua, atti ráttebe na:

—Guaracaba lasia. ¡Beacatte nnanna!

<sup>42</sup>Snaba lania bitúa nu anca attiba yiesusu lána lepra raca unbiyuuha. Unnuha nna beacattebana.

<sup>43</sup>Laniala bechú tisa Jesús unbiyuuha, tsitsiba belise na re na:

<sup>44</sup>—Biyúrga. Tsa nuttu nu quixxi'enlu, nu unlalu nna güia guatsá du lo bixxudiha qui ugüiana lu nna chiba beacalu. Bijatte úna nu daa lolu utelu gue Tata Do Iyyabaaha, beni attiba rába lo ca ley boca'ana Moisés, qui ugüia ca benni lu nna chiba bitúa isagüe gueluha.

<sup>45</sup>Ttiaca atti deyya unbiyuuha nna udulottebana utixxi'enna iyába benni gue nu ben Jesús len lana. Lo ni'a gue unnuha nna guayya lo neda gue Benniha, lärga uca gue'e lhe'e ca yiesi se'e nía. Níaba udoe lhe'e ca yu atta nuttu benni se'e, ttiaca riaba ca benni daa lhe'e iyába ca yiesiha atta do Benniha.

## Jesús beonie ttu unbiyuu daa yatti ni'a náni

*(Mt. 9:1-8; Lc. 5:17-26)*

**2** Dequide chi utee ttu chupa ubisa nna bedeta'atteba Jesús lhe'e yiesi nu te láni Capernaum. Ca benni se'e nía nna binattebacana níaba do Benniha lhe'e yo'o atta re'aneha. <sup>2</sup>Bisíntteba ixeru benni nía, axtaba ro'o puertaha bitturu ucani benni. Lee nna utixxi'attebanie cana ca tisa gue Tata Do Iyyabaaha. <sup>3</sup>Nianna bisíntteba ttapa ca unbiyuu nojacana ttu benni xua lo ttu breta daa yatti ni'a náni. <sup>4</sup>Ttiaca cumu de se'exxatta benni nía, nuarca bittu uca isíncana axta atta du Jesús. Laniala nna gopicana güetsaa qui uca udhalicana iqui yo'oha lhixxachiga daca atta du Benniha. Lhe'e belea bedocanaha nna ulhidattecana nu rani xua lo bretaha. <sup>5</sup>Atti

biláni Jesús gua riaba le ca unnuha guadábe eyonie nua, laniala re nu daa yatti ni'a nániha:

—Xi'into, chiba uxía elha xen lasi gue ca tulha guelha.

<sup>6</sup> Níaguaba sia ttulhe ca nu rule'e nu rá lo ca ley boca'ana Moisés. Lacana nna belabatteba lecani rácana: <sup>7</sup> “¿Biaca anála rinneonna? Lä rinne güe bunna gue Tata Do Iyyabaaha rána aná, cumu sunruba Benniha anque Benni guaca dhie elha xen lasi gue ca tulha gue ca benni.”

<sup>8</sup> Ttiaca Jesús yuxeabe nu rulaba le ca nua, nianna re cana:

—¿Biaca rulaba lele aná? <sup>9</sup> ¿Bi nua nu sattiru inne ttu benni gana nu daa yatti ni'a nee-na? ¿Si innána: “Gua teba elha xen lasi gue ca tulha guelha” aca? ¿Si innána: “Guadha nna bodaxxu breta xualu loen-na, udátte” aca? <sup>10</sup> Quitti uyúle nna neti Benni unbiyuu daa iyyabaaha te elha ra xxen le quia yies lo yu-ni qui dhia elha xen lasi gue ca tulha gue ca benni.

Nianna re nu daa yatti ni'a nániha:

<sup>11</sup> —Lu rulisa, guadha nna bodaxxutte breta xualu loen-na, beyyatte lhe'e yo'o gueluha.

<sup>12</sup> Nu daa yatti ni'a nániha nna guadhatteba nua, atti bodaxxuttebana breta uxúana loniha beriana deyyana aníba lo iyárechaba ca benni se'e nía. Larcala iyába ca nu se'e nía bebanxxattaquinna atti ráttebacana:

—¡Benni ra xxeni leni anca Tata Do Iyyabaaha! Itú tturba se'eri yies lo yu-ni, niba tsa lati ilenri ttu loesi nu uca-ni.

### Jesús raxie ttu benni anca güequixa

(Mt. 9:9-13; Lc. 5:27-32)

<sup>13</sup> Dequilaha nna bedeyyatteba Jesús ro'o indattooha. Iyába ca benni dacana atta du Benniha. Lee nna bele'ettebanie cana ca tisa gue Tata Do Iyyabaaha. <sup>14</sup> Atti die yu'e neda nna biláttebanie ttu unbiyuu lána Leví xi'ini ttu benni lá Alfeo, dona atta ribía ca nu ruquixacana ca benni belhi nu deyya leni nu rinnabia do Roma. Jesús nna ráttebe na:

—¡Utá, betteno neti!

Leví nna udulíttebabí diabi len Benniha.

<sup>15</sup> Aní uca nna güia Jesús güetto etta lhe'e yo'o gue Leví, lenie ca benni rudheti ca tisa rule'e. Ro'o mexaguaba sia ixeru ca güequixa

lhe adírba ca nu daa tisa guecani ancacana nu runi nu lä anca tsee lhe cumu ixeru ca unnuha chi sela ca benni denocana Benniha.

<sup>16</sup> Ca benni rule'e nu rá lo ca ley boca'ana Moisés, ca nu te lácani fariseo, atti biláquinna Jesús doe go etta leni iyába ca unnuha nna unnaba tisattebacana ca benni rudheti ca tisa rule'e Benniha rácana ca bi'iniha:

—¿Biaca ro Benni rule'enie le-na etta leni ca güequixa-na, len ca nu runi nu lä anca tsee-na lhe?

<sup>17</sup> Atti bienin Jesús nu rá ca nua nna ráttebe cana:

—Ca benni bittu rani-na, lägabi reasaquinna nuxa unna cana ramedi. Ca nu rani-na liba reasaquinna nu eyonna cana. Neti nna läga daya qui gaxia ca benni runi nu anca tsee. Daba neti qui gaxia ca benni runi nu lä anca tsee.

### Unnaba tisacana Jesús gue rutte ubina lhe'e benni

(Mt. 9:14-17; Lc. 5:33-39)

<sup>18</sup> Ttu sá nna ca benni rudheti ca tisa rule'e Juan bi'ini rugadi indaha lencabi ca benni fariseo rutte ubina lhe'ecani. Ttu chupa ca benni se'e nía nna ubigattebacana unnaba tisacana Jesús rácane:

—Ca benni rudheti ca tisa rule'e Juan, anáguaba ca benni fariseo-na lhe gua rutteba ubina lhe'ecani. ¿Biacala ca benni rudheti ca tisa rule'elu-na bittu rutte ubina lhe'ecani?

<sup>19</sup> Jesús becabittebe guecani re:

—¿Si gua dica uttee ubina lhe'e ca benni baxi tse'ecana atta aca laní gue ca nu utsá nácani, gansi níaba sna doba unbiyuu utsá nániha len lacana? Laca sna dorba unbiyuuhu len lacana, läga aca uttee ubina lhe'ecani. <sup>20</sup> Ttiaca chi isía sá atti itúa unbiyuu utsá nániha len lacana. Gansi chi bisía sáha nna laniarguuba nna cu'u ubina lhe'e ca nu se'e nía.

<sup>21</sup> 'Nuttuguuba nu benni te regu'una saro'o lari cubi atta bisú gue xo yaxxu gueniha. Cumu lari cubiha nna eyoba lo nua, lania nna utse'e loba nua lari yaxxuha, atta bisúha nna adíla xxeni aca nua lania. <sup>22</sup> Nuttuguuba nu riga'ana vinu cubi bittu chi ula lhe'e ttu yieti yaxxu nu rixuu attiba ttu re'e, cumu vinu cubiha nna unba nua isú yieti yaxxuha gansi chi dia nua ralana. Lania nna ilalba vinuha, ise'eloguuba ca yietiha lhe. Larcala nna lhe'e yieti cubi liba tta'a vinu cubiha.

**Ca benni rudheti ca tisa rule'e Jesús richecucabi iqui  
xuxtila la sá redí le ca benni Israel**

(Mt. 12:1-8; Lc. 6:1-5)

<sup>23</sup> Ttu sá atti redí le ca benni Israel, utee Jesús die yu'e neda lhe'e ca yu atta te ca xua xuxtila. Ca benni rudheti ca tisa rule'e nna uchecuttebacabi iqui ca xuaha. <sup>24</sup> Ca fariseo nna ráttebacana Jesús:

—¡Begüiarga! ¿Biaca run ca benni rudheti ca tisa rule'elu-na nu bittu ga'ana unri la sá redí leri ri'i ca benni Israel?

<sup>25</sup> Jesús nna ráttebe cana:

—¿Si bittuba chi belabale lo ca sitsi gue Tata Do Iyyabaaha atta rixxi'a gue nu beni David ttu libe atti nía? Labi nna bisíaru utunbi lenbi ca benni dia lenbiha. Nianna tsaba bittubabi te guecabi qui gocabi. <sup>26</sup> David nna uta'abi lhe'e yotu gue Tata Do Iyyabaaha, guatobi ca ttaxtila chi anca le'a gue Benniha qui utobi. Ca ttaxtilaha nna sunruba ca bixxudiha ga'ana gocabi benniha, ttiaca labi nna begüeeguabi adí ca benni dia lenbiha benniha utocana. Lania nua anca bi'ini lá Abiatar bixxudi xeni rinnabia.

<sup>27</sup> Ráguba Jesús cana:

—Sá redí leri-ni, boca'anaba Tata Do Iyyabaaha na lo ni'a gue ca benni qui edí baacan-na. Läga benie tse'e ca benni lo ni'a gue sá redí leri-ni. <sup>28</sup> Larcala nna neti Benni unbiyuu daa iyyabaaha, ancaguuba benni banani sá redí leri-ni.

**Jesús beonie ná xi gue ttu unbiyuu**

(Mt. 12:9-14; Lc. 6:6-11)

**3** Jesús nna bedeta'attebe attu libe lhe'e yo'o atta rudheti ca benni Israel ca tisa gue Tata Do Iyyabaaha. Nía do ttu unbiyuu xi ttu lha'a náni. <sup>2</sup> Ca benni fariseo se'e nía nna rulhatsicana gansi güeyon Jesús ná xi gue unbiyuuhá sá redí lecaniha qui te ro'ocani udelhiyyacane. <sup>3</sup> Jesús nna ráttebe unbiyuu xi nániha:

—Udú lii nna utá udú salhe gue ca benni se'e-ni.

<sup>4</sup> Nianna unnaba tisattebe ca benni se'e nía re cana:

—¿Bi ga'ana un ca benni sá redí leri ri'i ca benni Israel? ¿Si unri nu tsee, aca? ¿Si unri nu lä anca tsee, aca? ¿Si odilári ttu benni lo elhuttiha, aca? ¿Si uguelhari nua gattina, aca?

Ca unnuha nna tsa bittu becabicana, siba ucacana.<sup>5</sup> Jesús nna risa'abanie rugüie lo iyába ca nu se'e sabi'aba atta due. Si'irurba bedúe cumu de anca ca nua nu diti ancaxxatta tsitsi lastoocani. Laniala re unbiyuuh:

—Belhí nálu.

Unbiyuuh nna belhítteba náni. Nániha nna beacattebana.<sup>6</sup> Ttiaca ca fariseo se'e nía, cuantusiba beríacana lhe'e yo'oha, unnetteba lencana ca benni deno Herodes, gue gaxasná eguila lecani qui utticana Jesús.

### **Jesús rudhaca dise ca be xxegüi**

<sup>7</sup> Jesús nna güequittebe nía die ro'o indattooha len ca benni rudheti ca tisa rule'e. Aníaba deno ixeru ca benni beaca lascani Galilea. <sup>8</sup> Atti chi bina adí ca benni se'e lhe'e adí ca yiesi gue iyába nu reban leri runi Benniha nna güiatteba ixeru ca benni se'e lo yu nu te láni Judea atta du Benniha. Güaguaba ca benni se'e lhe'e yiesi Jerusalén lhe ca benni se'e lo yu nu te láni Idumea lhe ca benni se'e attu ladu gue yoo Jordán lhe ca benni se'e lhe'e yiesi nu te láni Tiro lhe ca benni se'e lhe'e yiesi nu te láni Sidón lhe. <sup>9</sup> Lo ni'a gue de se'exxatta benni nía, nuarca rátteba Jesús ca benni rudheti ca tisa rule'e udú tseecabi ttu barco qui tsopie lo nua. Anía liba nna bittu uquíxxatta ca benni Benniha. <sup>10</sup> Cumu de yarba de re ca nu rani chi beonie, nuarca iyába adí ca nu yu'u isagüe se'e nía, rixuua-ni cana iqui Jesús qui ttixaca galhacana canacana Benniha. <sup>11</sup> Gansi chi riláni ca be xxegüi yu'u lhe'e cuerpu gue ca nu se'e nía Jesús, rudútteba xibicani lo Benniha atti ribesi'ani cana rávana:

—¡Lu nua xi'ini Tata Do Iyyabaaha!

<sup>12</sup> Ttiaca lee nna bedhaca dise cana qui tsa bittu quixxi'acana aní lo benni nuxa anque.

### **Jesús rucue tsi'inu (12) ca benni aca apóstol guee**

*(Mt. 10:1-4; Lc. 6:12-16)*

<sup>13</sup> Dequilaha nna gopitteba Jesús lo ttu lhilhi. Lee nna uxttebe ca benni boquinna iquie gaxie. Atti chi ubiga ca bi'iniha atta due nna <sup>14</sup> bose'ettebe tsi'inu ca bi'iniha qui tsequicabi len lee, anáguuba qui idhelhe ca bi'iniha tsiacabi sattixxi'acabi ca tisa guee lhe. [Ca bi'iniha nua begüee lácabi apóstol.] <sup>15</sup> Begüeguabe ca bi'iniha

derechu qui eyoncabi ca benni rani lhe ebeacabi ca be xxegüi lhe.

<sup>16</sup> Aní lá ca bi'ini tsilinu bose'e Jesús:

Simón bi'ini begüee lábi Pedro,

<sup>17</sup> Jacobo lenbi betsibi Juan ca xi'ini bi'ini lá Zebedeo, ca  
bi'iniha nua begüee lácabi Boanerges nu dienna  
innána Xi'ini Ru'u Be.

<sup>18</sup> Selaguaba Andrés lhe

Felipe lhe

Bartolomé lhe

Mateo lhe

Tomás lhe

Jacobo xi'ini bi'ini lá Alfeo lhe

Tadeo lhe

Simón bi'ini te lábi Zelote lhe.

<sup>19</sup> Judas Iscariote nu betena Jesús las ná ca nu betticana  
Benniha lhe.

### Rácana dequi nu xxegüiba yu'u lhe'e cuerpu gue Jesús

(Mt. 12:22-32; Lc. 11:14-23; 12:10)

<sup>20</sup> Dequide chi besina Jesús lhe'e yo'o atta re'ane, bedesintteba ixeru ca benni nía. Larcala niba yetta lä ucaru goe lenie ca benni rudheti ca tisa rule'e.

<sup>21</sup> Atti bina ca benni datía Jesús gue nu run Benniha nna ulu'uttebacana neda diacana saxícana Benniha, cumu lacana nna racaquinna dequi iquia Benniha raca.

<sup>22</sup> Anágua ca nu rule'e nu rá lo ca ley boca'ana Moisés daa lhe'e yiesi Jerusalén, rácana:

—Beelzebú nu rinnabia ca be xxegüi-naba yu'u lhe'e cuerpu gue unná. Labana rugüena unná derechu qui ebeana ca be xxegüi yu'u lhe'e cuerpu gue ca benni.

<sup>23</sup> Jesús nna uxtebe cana, atti utixxi'attebanie cana ttu ejemplu, re cana:

—¿Tti modu uría la nu xxegüiha, cuinaga nu xxegüiha? <sup>24</sup> Gansi ca benni se'e lhe'e ttu yiesi ila'a lhe'e loescani de ritilha len loescani, yiesiha nna lärga isá uchía nua. <sup>25</sup> Gansi ca benni se'e lhe'e ttu yo'o ila'a lhe'e loescani de ritilhacana, ca unnuha nna lärga isá uchíacana atti lhuxacana. <sup>26</sup> Anágua gansi nu xxegüiha ila'a lhe'e

loesni, itilha len la loesi xxegüiba-ni, unnuha nna lärga isá uchíana, chiba bisía sá lhuxana.

<sup>27</sup> 'Nuttuguaba nu te dhana ga'ana lhe'e lisi ttu unbiyuu rea lasi qui sattúana bixa te gue nua, gansi littuba iyaxxu lola unbiyuu rea lasiha qui ixxícana. Anía liba nna dhaa ubanaha lhanana nu te lhe'e lis nua.

<sup>28</sup> 'Neti nna gualíbatia rpea le, Tata Do Iyyabaaha guadíbe elha xen lasi gue iyába ca tulha gue ca benni, gue nu rinne güecana lhe. <sup>29</sup> Ttiaca gansi nuxa inne güena gue Espíritu guee, unnuha nna lärgabi elha xen lasi gue nua te, sinuqui ttu tsaba tsia nittina.

<sup>30</sup> Aníaba rá Jesús ca benni cumu de rácana dequi be xxegüiba yu'u lhe'e cuerpu guee.

### Nan gue Jesús lenbi ca betsi benniha reguilacabi Jesús

(Mt. 12:46-50; Lc. 8:19-21)

<sup>31</sup> Laniaguaba nua bisína nan gue Jesús lenbi ca betsi Benniha atta do yo'o do Jesús güele'e. Ca unnuha nna níaba use'ecana lhe'eli'a gue yo'oha. Nianna udhelhattebacana nu güia gualisana Benniha. <sup>32</sup> Ca benni sia sabi'aba Jesús nna unnettebacana rácana Benniha:

—Ni nan gueluha lenbi ca betsiluha lhe se'e lhe'eli'a gue yo'o-ni. Lacana nna reguilacan lu.

<sup>33</sup> Benniha nna becabittebe re cana:

—¿Nú nua rále dequi anca nan quia lhe betsia lhe?

<sup>34</sup> Atti begüiattebe lo iyába ca nu sia sabi'aba atta doe, nianna ráttebe:

—Ca unní liba anca nan quia lhe betsia lhe <sup>35</sup> cumu ca benni rudo tisa gue Tata Do Iyyabaaha liba anca nan quia lhe betsia lhe dana lhe.

### Ejemplu gue ttu benni ruadelha xuxtila

(Mt. 13:1-9; Lc. 8:4-8)

**4** Jesús bededulottebe bodole'enie ca benni bisína atta doe gaxxaba ro'o indattooha. Ttiaca cumu de yatterba de reru benni bisína nía, nuarca gopittebe udoe lo ttu barco xua lo indattooha. Ca benni se'e nía nna bedaa ro'o indahaba use'ecana. <sup>2</sup> Nianna ixe loba nu utixxi'enie cana leni ca ejemplu, qui bele'enie cana nu raca lee unacana. Lee nna re cana:

<sup>3</sup>—Gualudo nagale gue nu upea le: Ttu benni runi sina lo ca yu biríabi diabi güedelha xua xuxtila. <sup>4</sup>Ttiaca atti diabi ruelhabi xuxtilaha nna ttulhe ca benniha nna binnaque lo nedaha, atti bisíntteba ca binni utocana ca benniha. <sup>5</sup>Attu lheque nna biyinnaque lhe'e ttu ruya atta bittu tte xxeni yu re. Ca benniha nna sattiba be'eyuque cumu de bittu tte xxeni yu re nía. <sup>6</sup>Ttiaca atti biría tatubisa-na bequexxuttebe ca benniha, cumu de bittu bedetti lhu ca benniha lhi'u, nuarcala nna ubisque. <sup>7</sup>Attu lhe ca benniha nna biyinnaque lhe'e atta daa ca ya yitsi, ttiaca atti bixin ca ya yitsiha nna betsenttebaquinna ca benniha. Larcala lägabi xua udo iqui ca benni be'eyuha. <sup>8</sup>Adí ca benniha nna biyinnaque ttu atta re yu bebi. Nianna be'eyuttebaque, biyelhattebaque lhe. Ca benniha nna tsapaba tsee lena beteque: ttulhe ca iquiha beteque rerúa (30) xua, attu lheque nna beteque gayuna (60) xua, adí ca iquiha nna beteque axtaba ttu gayua (100) xua.

<sup>9</sup>Ráguae cana:

—Atta gua rudo nagale gue nu ria, gualun duelha qui sadú lele.

<sup>10</sup>Dequila nna atti chi be'ana a suntteba Jesús. Ca benni ts'i'inu rudheti ca tisa rule'e, leni attu chupa ca benni se'e gaxxaba nna unnaba tisattebacabi bixa dia le ejempluha. <sup>11</sup>Lee nna becabie re cabi:

—Lebi'i nna guarunba Tata Do Iyyabaaha qui sadú lele gue gaxasná rinnabie, nu bittu ritedaani ca benni. Ttiaca adí ca benni bittu sela len ri'i nna leni ca ejemplu liba rule'etia cana:

<sup>12</sup>qui masquiba tticaxa rugüiacana, bittu iláquinna masquiguaba tticaxa rudo nagacani, bittu sadú lecani lhe qui bittu odaxxucana neda gue Tata Do Iyyabaaha, lee nna dhie elha xen lasi gue ca tulha guecani.<sup>a</sup>

<sup>13</sup>Laniala nna re ca bi'iniba:

—¿Si bittuba radú lele gue ejemplu gue benni ruelha xua xuxtila-na? ¿Galasná unle sadú lele gue adí ca ejemplu rixxi'aya na ganna? <sup>14</sup>Benni ruelha xuxtilaha nna ancabi attiba ttu benni rixxi'a ca tisa gue Tata Do Iyyabaaha. <sup>15</sup>Se'e lhe ca benni ancacana attiba ca xuxtila binna lo nedaha. Gua rudoba nagacani gansi chi nuxa rixxi'enna cana ca tisa gue Tata Do Iyyabaaha, ttiaca dequide chi binacana ca tisa-na, risintteba nu xxegüiha rebeana ca tisa-na lhe'e lastoocani. <sup>16</sup>Adí ca benni nna ancacana attiba ca xuxtila

---

<sup>a</sup> 4:12 Isaías 6:9-10

biyinna lhe'e ruyaha, atti rienquinna ca tisa-na attulade re'o lecani recabicana udaxxucana neda gue Tata Do Iyyabaaha.<sup>17</sup> Ttiaca cumu läga be'an tsitsi ca tisaha lhe'e lastoocani nuarca läga isá ria lecani. Larcala gansi chi bixa ratecana o nuxa rusía lencana lo ni'a gue ca tisa-na, readi gattebacana lo neda gue Tata Do Iyyabaaha.<sup>18</sup> Adí ca benni nna ancacana attiba ca xuxtila biyinna lhe'e sitsiha. Gua rudoba nagacani ca tisa-na.<sup>19</sup> Ttiaca rudolhaba lecani gue nu anca gue yies lo yu-ni, ru'u lecani gattaxxatta quecani lhe ridá lecani iyáloba nu te yies lo yu-ni lhe. Iyába unní yu'u lhe'e iquicani, larcala rixulhaquinna nu chi bienquinna. Denua nna nuarca bittu raca uncana nu anca tsee.<sup>20</sup> Ttiaca se'e adí ca benni atti rienquinna ca tisa gue Tata Do Iyyabaaha, riatteba lecani Ben-na. Denua nna runcana nu anca tsee attiba ca xuxtila biyinna atta re yu bebiha tseeba bixúe. Ttu lheque betee rerúa (30) xua, a díque nna betee gayuna (60) xua, a ttu lheque nna betee ttu gayua (100) xua.

### Ejemplu gue ttu gui rigu'u xieni

(Lc. 8:16-18)

<sup>21</sup> Ráguba Jesús cabi:

—¿Si gua dica saxxíri ttu gui rudani nía nna atti uttodhiri ttu lmoti iquini o si uga'ari na xana atta rattari? ¡Dica! Ttu gui nna ttu atta yadha liba dica dho nua qui cu'una xieni itúba lhe'e yo'o.<sup>22</sup> Larcala nna tsa lägabi te ttu bixa te gatsi, lä tsanni lobana, niguuba lä caa ttu nu raca sigá lä unaba benni-na lhe.<sup>23</sup> Atta gua rudá nagale, duelhaba gualuni qui sadú lele.

<sup>24</sup> Rágube cabi:

—Gualdo nagale gue nu ria-ni. Cumu attichuba rudo nagale gue nu rieninle, aníaguuba uni Tata Do Iyyabaaha sadúchattiru lele, axtala utee adí elha rieni guele lhe.<sup>25</sup> Cumu benni gua radú leniha nna dhirla nua elha rieni qui sadúchatti leni, ttiaca nu bittu radú leniha nna axtala saro'o nu chi radú leniha itúa.

### Ejemplu gue gaxasná raca rixen ttu xua

<sup>26</sup> Jesús rágube ca benni:

—Gue gaxasná rinnabia Tata Do Iyyabaaha ca benni, raxxína ancana attiba ttu unbiyuu bedelhana xua xuxtila lo yu gueniha.<sup>27</sup> Unbiyuuha nna ra'adhibana lo rela, gansi chi rani nna

rebanttebana. Laca xuaha nna gua re'eyue lhe die rixenie lhe lana nna niba lä ritedeenna gaxasná raca.<sup>28</sup> Cumu ca lo yu-na chiba ga'an ca unná e'eyu xua iyada locani. Lotteba beotsi re'eyu, atti rixenttebe axta liba risía rido iquie. Lenla nna coa coaba xua lhe'e iquie.<sup>29</sup> Gansi chi ula iqui xuaha nna rudaxxutteba unbiyuuhia iyarsela rechúna benniha. Cumu chiba bisía sá exuu lena baniha.

### **Jesús rixxi'e ttu ejemplu gue ttu besi coana**

(Mt. 13:31-32; Lc. 13:18-19)

<sup>30</sup> Ráguaaba Jesús:

—¿Bi attu ejemplu quixxi'atia le nu raxxína gue gaxasná rinnabia Tata Do Iyyabaaha ca benni?<sup>31</sup> Gue gaxasná rinnabia Tata Do Iyyabaaha ca benni raxxína anque attiba ttu besi gue coana murtasa riyyada lo ttu yu. Besiha nna masquiba ancana nu chica'aru gue delo iyá besi te yies lo yu-ni,<sup>32</sup> ttiaca dequide chi biedana, ririatteba beotsi gueni, nianna rixenttebana. Xxenrula rácana atti adí ca coanaha, ca xiquiniha nna tsapaba rielhacana. Larcala axtaba ca binni-na guarcaba rusía xcuadi guecani loni qui ribácana xan xula gueni.

<sup>33</sup> Leni ixe loba loesi ca ejemplu-ni bele'eni Jesús ca benni, utixi'abanie cana bedaa atta bedhacaba lee sadú lecani.<sup>34</sup> Lee nna sunruba leni ca ejemplu rinnee leni ca benni, ttiaca gansi chi suntteba lee due len ca benni rudheti ca tisa rule'e, rixxi'attebanie ca bi'iniha iyába bixa diani nu rinnee.

### **Jesús bedhaca dise be idí raca lo indattooha**

(Mt. 8:23-27; Lc. 8:22-25)

<sup>35</sup> Atti chi uca ela la sáha nna rátteba Jesús ca benni rudheti ca tisa rule'e:

—Gualtsá tsiasi attu ladu gue indattoo-ni.

<sup>36</sup> Laniala nna bechú tisacabi ca benni se'e nía, nianna gopittebacabi lo barco atta do Jesús, atti diatteba lencabi Benniha. Diarguaba adí benni leni adí ca barco lhe.<sup>37</sup> Ttiaca tturba biríaru ttu be idí uyu'una lo indattooha. Indattooha nna udulítteba loni uta'ana lo barcoha. Larcala bentteba nua tseettina lhi'u de chi

risána inda.<sup>38</sup> Jesús daca xani'ala barcoha te Benniha ti'edhie gani iquie ttu nu rucani iqui benni. Laniala nna bodibancane rácane:

—¡Maestro! ¿Lä biguaba retábinlu chi diari rettiri lhe'e inda-ni?

<sup>39</sup> Jesús guadhattebe bedhaca dise beha lhe indattooha lhe re cana:

—¡Siru gualese'e!

Beha nna bebe sittebana. Siba bebe nu ridú lí lo indattooha lhe.

<sup>40</sup> Laniala nna rátteba Jesús ca benni rudheti ca tisa rule'e:

—¿Biaca rasinle? ¿Si itú ttuaba bittu chi ria lele neti?

<sup>41</sup> Ttiaca ca bi'iniha nna rasilhabaquinbi, nianna unnaba tisatteba loescabi rácabí:

—¿Nú benni bi'ini du-ni? Nuarcala axtaba be-ni lhe indattoo-ni lhe rudocana tisa guee.

### **Jesús beonie ttu unbiyuu yu'u be xxegüi lhe'e cuerpu gueni**

(Mt. 8:28-34; Lc. 8:26-39)

**5** Bisínba Jesús lenie ca benni rudheti ca tisa rule'e attu ladu gue indattooha ro'o yu gue yiesi te láni Gadara.<sup>2</sup> Atti chi goadi Jesús lo barcoha nna xeaba birátteba ttu unbiyuu yu'u be xxegüi lhe'e cuerpu gueni lhe'e campioniha, dana esána Benniha.<sup>3</sup> Unnuha nna atta sia ca baa gue ca nu yatti yu'u níabaanca lis nua. Tsaba nuttu nu ridána uxxicana nua, niba leni cadena.<sup>4</sup> Ixe libe chi bexxicacana ni'a ná nua leni cadena, ttiaca lana nna richúttebana ca nua atti ruduyyan ca nua. Tsaba nuttu nu ridána loni.<sup>5</sup> Rela resába ribenna ribesi'ana lhe'e campioniha, ca lo lhilhiha lhe run güee cuerpu gueni len ca iyya lhe.<sup>6</sup> Ttiaca atti bilenna Jesús, idittuli daa Benniha, lana nna bigaattebana guatsána Benniha bedú xibini loe,<sup>7</sup> atti ribesi'anina ráne:

—¿Bittu ettega'a guelu len neti, Jesús Xi'ini Tata Do Iyyabaaha Benni ra xxeni lee? ¡Neti rinnaba lolu benchi lo ni'a gue Tata Do Iyyabaaha bittu utelu elha disa quia!

<sup>8</sup> Anía rána cumu Jesús re na:

—¡Be xxegüi, bería lhe'e cuerpu gue unbiyuu-na!

<sup>9</sup> Jesús unnaba tisattebe be xegüiha re na:

—¿Bi lálu?

Unnuha nna becabina rána:

—Legiónba lá neti, cumu ixe ri'itu raca.

<sup>10</sup> Ududitilhabana unnabana leni Jesús qui bittu cuequie cana lo yu atta se'ecanaha. <sup>11</sup> Gaxxaba nía, lati i'iya do nía, yu'u ixeru ca cutsi go. <sup>12</sup> Ca be xxegüiha nna unnabaxxattacana lo Jesús rácane:

—Udhelhachi ri'itu atta yu'u ca cutsi-na qui ga'atu lhe'e ca unná.

<sup>13</sup> Jesús uxielhabe. Ca be xxegüiha nna beríatteleba ca nua lhe'e unbiyuuha, atti uta'attebacana lhe'e ca cutsiha. Attiba tu chupa mil ca cutsiha raca, ca unnuha nna bigaattebacana diacana bitoetticana ro'o ttu belha'a daa nía biyinnacana lhe'e indattooha. Níaba utti ca nua de gopicana inda.

<sup>14</sup> Ca nu rapa ca cutsiha nna bigaattebacana deyyacana guattixxi'aquinna ca benni se'e lhe'e yiesiha, ca benni se'e lhe'e ca ranchuha lhe gue nu ucaha. Ca unnuha nna güiattebacana güegüia bixa nua uca. <sup>15</sup> Atti bisíncana atta du Jesús, níaba biláquinna unbiyuu nu uyu'u ca be xxegüi lhe'e cuerpu gueniha dona, chi bedoenna nibisa lhe chi nucu xoni lhe lacana nna uslaquinna. <sup>16</sup> Ca nu begüiacana nu guate nu uyu'u ca be xxegüi lhe'e cuerpu gueniha lhe nu guate ca cutsiha lhe utixxi'attebaquinna ca benni bisína nía iyába nu ucaha. <sup>17</sup> Laniala nna unnabaxxattacana lo Jesús qui erié lo yu guecaniha.

<sup>18</sup> Atti chi reopie lo barcoha nna rátteba unbiyuu nu uyu'u ca be xxegüi lhe'e cuerpu gueniha Benniha uguelhe na tsiana len lee.

<sup>19</sup> Ttiaca Jesús läga begüeelhe. Nianna ráttebe na:

—Beyya len ca benni datíalu se'e lhe'e yo'o gueluha, guatixxi'aquinna gue iyá nu chi beni Benni bananie lu-na len lu, gue ttixuca besi'linie lu lhe.

<sup>20</sup> Unbiyuuha nna güequittebana deyyana. Nianna udulottebana utixxi'enna ca benni se'e lhe'e ca yiesi se'e lo yu te láni Decápolis gue nu beni Jesús len lana. Iyába ca benni, tsitsiba bebanquinna.

### Jesús beonie nuila utana ro'o xoe lhe xi'iniunná Jairo lhe

(Mt. 9:18-26; Lc. 8:40-56)

<sup>21</sup> Dequide chi besini Jesús len barcoha daca attu ladu gue indattooha, bebi'atteba ixeru ca benni benniha atta due ro'o indattooha. <sup>22</sup> Attirba chi bisína Jairo ttu ca nu banani yo'o atta rudheti ca benni Israel ca tisa gue Tata Do Iyyabaaha. Atti bilen nua Jesús, bedútteba xibini lo Benniha. <sup>23</sup> Nianna unnesi'ixxattattebana ráne:

—Chi ratti xi'iniunnáyaha. Utáxxi bexxúa nálu iquini qui eyacana, bittu gattina.

<sup>24</sup> Jesús diatteba lenie na. Ixeru ca benni dia denocana Benniha, larcala ruquílhabacane. <sup>25</sup> Lagüi ca benni dia denoha, nía nutsa ttu nuila chi uca tsil'inu (12) ida yu'una isagüe rulalna reni. <sup>26</sup> Nuilaha nna chi guatelhabana lo ixe ca nu run ramedi. Iyába nu tee gueni chi bea bennitti lona qui rixan ca nua, ttiaca niba saro'o lä rilhida gana gueni, adlílabo diana rielhana. <sup>27</sup> Atti binana gue nu run Jesús, uta'attebana lagüi ca benni deno Benniha qui uca ubigana daca cu'e Benniha utanana ro'o xoe, <sup>28</sup> cumu raquinna: "Gansi dhaba satana ladiba ro'o xo Ben-na, lania nna güeyacaba." <sup>29</sup> Atti utanana ro'o xo Jesús, la laniatteba nna udú si nu ritsigana. Lana nna guannitteinna chi bitúa isagüeha latini. <sup>30</sup> Jesús ute daattebanie beaca ttu benni rani len elha ra xxeni lee guee. Lee nna bequittebe begüie lo iyába ca nu se'e nía atti ráttebe:

—¿Núnnabettettanana ro'o xoa?

<sup>31</sup> Ca benni rudheti ca tisa rule'e nna ráttebacabi Benniha:

—La gua rugüiabalú aníli de ruquí ca benni se'e-ni lu nna gua rárlu: "¿Núnnabettettanana ro'o xoa?"

<sup>32</sup> Ttiaca Jesús ttu besiguibe rugüie sabi'aba atta due qui ilánie nuxa nua utanana ro'o xoe. <sup>33</sup> Nuilaha nna cumu yu galábana nu uca len lana, nuarca rixidinina de rasbinna atti güiattebana guadú xibini lo Benniha. Nianna utixxi'attebinna Benniha gue iyába nu chi guatena. <sup>34</sup> Jesús nna ráttebe nuilaha:

—Xi'ini, cumu de güia lelu guadába eyonia lu, nuarca beacalu. Xen su lee beyya nnanna. Chiba bitúa isagüe gueluha latilu.

<sup>35</sup> Sna duba Jesús rinnee, attirba chi bisína ttu chupa ca benni daa lhe'e yo'o gue Jairo nu banani yo'o atta rudheti ca benni Israel ca tisa gue Tata Do Iyyabaaha, rácana Jairo:

—Chi utti xi'iniunnáluha. ¡Bitturu utsitsinlu Maestro-na!

<sup>36</sup> Ttiaca Jesús tsa läga bedo nague gue ca nua. Nianna ráttebe Jairo:

—Bittu gasinlu. Lu nna suntteba güia lelu neti.

<sup>37</sup> Tsa nutturu nurua begüeelhe sanone, suntterba Pedro lenbi Jacobo, Juan betsi Jacobo nna. <sup>38</sup> Atti chi bisíncabi atta do yo'o gue Jairo, biláttebanie ca benni chi risatsa nía, nu ribesba lhe ca nu tsitsiba de nu runcana de rexiyaxxattaquinna lhe. <sup>39</sup> Lee nna uta'attebe lhe'e yo'oha re ca nua:

—¿Biaca análi de nu runle, ribesixxattale lhe? NUILATO-NA läga utti unná. Ti'edhi bunna.

<sup>40</sup> Ca benni se'e nía nna bedacalaquinna gue Jesús, ttiaca lee nna benttebe mandadu bería iyárecha ca benni se'e nía, atti uta'attebe atta te nUILATOA lanie ca tata nan gue nua, a tsunna ca benni rudheti ca tisa rule'e nna.

<sup>41</sup> Nianna bedaxxuttebe ná nUILATOA re na:

—Talita cumi. (Ca tisa-ni nna diaquinna innácan: NUILATO, lu rulisa, guadha.)

<sup>42</sup> Uncuitiha nna chiba anquinna tsi'inu (12) ida, larcala xeaba guadhatteba nua udána. Ca benni se'e nía nna tsitsiba bebanquinna.

<sup>43</sup> Jesús tsitsiba belise cana re cana: Tsa bittu quixxi'aquinna ni ttu benni gue nu ucaha. Nianna ráttebe cana ugüecana nUILATOA yetta gona.

### **Ca benni se'e lhe'e yiesi Nazaret rigu'u ni'acani Jesús**

(Mt. 13:53-58; Lc. 4:16-30)

**6** Bedába Jesús nía nna deyyattebe lenie ca benni rudheti ca tisa rule'e lhe'e yiesi atta doe. <sup>2</sup> Atti bisía sá redí le ca benni Israel, udulottebe bele'enie ca benni se'e lhe'e yo'o atta rudheti ca benni Israel ca tisa gue Tata Do Iyyabaaha. Atti bienquin nua ca tisa rinne Benniha nna ixerucana bebanquinna nianna unnaba tisa loescani rácana:

—¿Ga guadheti unná iyá ca tisa rinnen-na? ¿Nú betena elha rieni gueni lhe gasná runna raca gueni runna ca milagru-na lhe? <sup>3</sup> ¿Läba carpintero xi'ini María bunni nna betsi Jacobo lhe José lhe Judas lhe Simón lhe? ¿Si läba niguuba se'e ca dana unní len ri'i lhe'e yiesi-ni lhe?

Lo ni'a gue unnuha nna udulottebacana ucaquinna. <sup>4</sup> Ttiaca Jesús ráttebe cana:

—Gaxaba nua nna gua riaba lecani ttu benni anca profeta, ttiaca lhe'e yiesi atta beaca lasniha tsa läga ria lecan nua, niguuba ca nu datíana lhe niguuba ca nu se'e lhe'e lisni lhe.

<sup>5</sup> Nioca nuarca bittu uca unie ca milagru nía. Sunruba ttu chupa ca benni rani bexxúa nee iquicaninha beacacana. <sup>6</sup> Lee nna rebanbanie gue ca nua cumu bittu ria lecanie.

Laniala berié nía die lhe'e adí ca yiesi se'e gaxxa güele'eni ca benni.

**Jesús ridhelhe ca benni rudheti ca tisa rule'e  
satixxi'acabi ca tisa gue Tata Do Iyyabaaha**

(Mt. 10:5-15; Lc. 9:1-6)

<sup>7</sup> Jesú斯 uxttebe ca benni ts'i'inu rudheti ca tisa rule'e qui idhelhe chupa chupacabi. Beteguabe derechu len ca bi'iniba qui uría lacabi ca be xxegüi. <sup>8</sup> Nianna benttebe mandadu:

—Tsa bittubi ujale gue neda guele, suntterba ttu garroti dhenle. Bittuguaba ujale chuba atta cu'u guele lhe niguaba nu gole lhe niguaba belhi lhe. <sup>9</sup> Guacaba cu'u ni'ale guaracha, ttiaca bittu dica ujale attu cue xole.

<sup>10</sup> Rágube cabi:

—Gansi chi uta'ale lhe'e ttu yo'o, níaba gualtse'e axta liba gansi chi bedále eríale nía. <sup>11</sup> Gansi lhe'e tu yiesi bittu ulabican le, bittuguaba udo nagacani guele lhe gualería nía, gualucuibi tte biste yu anca ni'aleha, cumu unnuha ule'e lo läga be'o le Tata Do Iyyabaaha nu ben ca nua. [Gualíbatiria le, gansi chi bisía sá lhuxa yies lo yu-ni tsitsirla elha disa uyú ca nua atti ca nu beaca lascani yiesi lá Sodoma len Gomorra.]

<sup>12</sup> Laniala nna biríatteba ca benni rudheti ca tisa rule'e diacabi ríguixxi'encabi ca benni qui odú xiyyancana, odaxxucana neda gue Tata Do Iyyabaaha lhe. <sup>13</sup> Ixeru ca be xxegüi bebeacabi lhe'e cuerpu gue ca benni, ixeguaba ca nu rani beoncabí lhe rigabicabi ca nua seti lhe.

**Juan bi'ini rugadi indaha uttibi**

(Mt. 14:1-12; Lc. 9:7-9)

<sup>14</sup> Herodes nu rinnabiahia binattebana gue nu runi Jesúś, cumu lhe'e iyába ca yiesi se'e nía chi bina benni gue nu run Benniha, ttu lhe benni nna rávana:

—Juan bi'inni begadi ca benni indahaba bi'iniha beaquinbi attu libe, beríabi lhe'e baa atta yu'u ca nu yatti-na. Nuarca ridábi runbi ca milagru-na.

<sup>15</sup> Adí benni nna redenácana:

—Gaxa profeta Elíasba bi'in-na.

A ttulhecana nna redenácana:

—Gaxa profetaba unná o ttu ca profeta ra xxeni leni use'e atti nía bunna.

<sup>16</sup> Ttiaca atti bienin Herodes rá ca benni anía, ráttebana:

—Juan nu benia mandadu uchecucana choettuiquiniha bunna. Nnanna nna beacabinna attu libe.

<sup>17</sup> Cumu cuinaba Herodes benna mandadu ca nu güia guadaxxucana Juan, ca unnuha nna bexxicacan bi'iniha len cadena atti bedelhacan bi lisiyya lo ni'a gue nuila gueni lá Herodías, nu uca nuila gue betsini Felipe, cumu Herodesba útúan nua udo lenna.

<sup>18</sup> Denua nna rá Juan Herodes:

—Bittu dica edo lenlu nuila gue betsilha.

<sup>19</sup> Lo ni'a gue unnuha nna ulu'utteba le Herodías Juan. Nuarcala nna rdacana uttina bi'iniha. Ttiaca läga rdana, <sup>20</sup> cumu Herodes nna rasbinna lo bi'iniha denuala nna läga rugüelhana nuxa bixa udhaquinna bi'iniha cumu guayú xeabana anca bi'iniha ttu benni runi nu anca tsee, ancabi benni do riesi anca gue Tata Do Iyyabaaha lhe. Masquiba gansi chi rienin Herodes rinne bi'iniha nna tsaba bittuba rería ni'elhinna bixa unna ttiaca tseeba re'o leni rudo nagani nu rá bi'iniha. <sup>21</sup> Axta liba bisía sá atti bedaxxu Herodes attu ida subi, lania nua beni Herodías nu raca leni. La sáha nna beni Herodes ttu laní. Lana nna uxttebana ca nu rinnabia rise'e cu'eniha, ca nu lo gue ca soldadoha lhe ca benni ra xxeni ru lecani se'e lo yu te láni Galilea lhe qui uto lenna ca nua yetta. <sup>22</sup> Xi'iniunná Herodías nna uta'attebana beya'ana atta sia ca nua go. Herodes nna be'o juisiaba leni gue nua, anáguaba ca nu sia lenna go yettaha lhe. Larcala rána uncuitiha:

—Unnaba neti bixaba raca lelu, neti nna guteba nua len luu.

<sup>23</sup> Nianna axtaba boca'an tsitsi tisa gueni lo nua rán-na:

—Bixaba innábalu len neti nna gunnaba nua, masquiba innábalu salhe xea lo ca yu atta rinnabiaya-ni.

<sup>24</sup> Uncuitiha nna beríatteba nua deyyana guannaba tisana nan gueniha rán-na:

—¿Bi innába?

Unnuha nna becabittebana rán-na:

—Iqui Juan nu rugadi ca benni inda-na unnaba.

<sup>25</sup> Uncuitiha nna ruxunnini nua beta'ana atta do Herodes, nianna ráttebana nua:

—Neti nna raca lasia, nnannatte unnalu choettuiqui Juan nu rugadi ca benni inda-na yu'una lhe'e ttu platu.

<sup>26</sup> Herodes nna attulade si'irurba runna atti bieninna nu rá nua, ttiaca cumu chi begüeena tisa aníba lo ca nu sia lenna nía, nuarca bedobana tisa gue nu rá uncuitiha na. <sup>27</sup> Laniala nna udhelhattebana ttu ca soldado gueniha tsiana saxxína iqui Juan. Soldadoha nna güiattebana guachecuna iqui Juan lhe'e lisiyyaha. <sup>28</sup> Nianna begu'uttebana nua lhe'e ttu platu denojana deyyana begüeena uncuitiha. Uncuitiha nna begüeettebana nan gueniha nua. <sup>29</sup> Atti bina ca benni bedheti nu bele'e Juan gue nu ucaha nna güiattebacabi guaxícabi cuerpu gue bi'linita qui guacatsicabi cuerpuha lhe'e baa.

### Jesús rugoe gayu mil ca benni ttaxtila

(Mt. 14:13-21; Lc. 9:10-17; Jn. 6:1-14)

<sup>30</sup> Dequide besini ca bi'ini rudheti ca tisa rule'e Jesús nna beselattebacabi Jesús. Nianna uttixxi'attebaquinbi Benniha iyába nu bencabi lhe nu bele'encabi ca benni lhe. <sup>31</sup> Jesús ráttebe cabi:

—Gualtá tsiasi suntteba ri'lí attu atta subi atta nuttu nu benni se'e qui aca edí leri ttu satti.

Aníaba rá Jesús cumu de dia lhe dedaa lhe ixeru benni atta se'ecabihha nuarca niba yetta lä raca gocabi. <sup>32</sup> Nioca nna diatteba suntteba laque lo ttu barco atta nuttu benni se'e. <sup>33</sup> Ttiaca ixeru ca benni atti biláquinna biríaque diaque lo barcoha nna beonbiattebacana ca benniha. Larcala ca benni se'e lhe'e iyába ca yiesi se'e nía, bigaattebacana diacana atta chinca isín ca benniha. Lola ca unnuha bisína nía atti ca benni dia lo barcoha. <sup>34</sup> Atti guadi Jesús lo barcoha nna biláttiebanie ixeru benni chi se'e nía. Lee nna besi'ittebanie ca nua cumu ancacana attiba carne'e nuttu xxanni te. Lee nna ixe loba nu uduloe bele'enie cana. <sup>35</sup> Atti chi ulha sá nna ubigatteba ca benni rudheti ca tisa rule'e Jesús rácabi Benniha:

—Chiba ulha sá nna ni nna tsa lägabi yo'o sia. <sup>36</sup> Larcala nna bechú tisa ca benni se'e-ni qui eyyacana ca ranchu-na, lhe'e ca lhe'esi se'e gaxxa-na lhe qui sayo'ocana ttu bixa gocana.

<sup>37</sup> Ttiaca Jesús becabittebe re cabi:

—Lebi'iba gualute nu gocana.

Ca benni rudheti ca tisa rule'e nna becabittebacabi rácabi:  
 —¿Na belhi gue chupa gayua ubisa sina qui sadhenna iyo'o  
 ttaxtila go iyá ca unní?

<sup>38</sup> Jesús ráttebe cabi:

—Gualtsia gualsagüia, ¿balha ttaxtila te guele?

Dequide chi guagüiacabi nna ráttebacabi:

—Sunruba gayu ttaxtila nna chupa belha nna te.

<sup>39</sup> Laniala nna benie mandadu ebía ttu ttu xxia ca nua lo ixxi ga'aha. <sup>40</sup> Lhe'e ttu ttu ca xxiaha nna se'e medi gayua (50) nna ttu gayua (100) nna ca benni. <sup>41</sup> Jesús bedaxxuttebe gayu ca ttaxtilaha leni irupaba ca belhaha, nianna ulhidhatteba loe begüie iyyabaaha, begüee xquixaru Tata Do Iyyabaaha. Atti ulha'attebe lhe'e ca ttaxtilaha begüee ca benni rudheti ca tisa rule'e qui quidhicabi gue ca benni sia nía. Aníaguaba benie len ca belhaha lhe. <sup>42</sup> Iyába ca benni se'e nía utocana bedaa belbaquinna. <sup>43</sup> Bodaparlacabi a ts'i'inu sumi bisá ttiti ca pedazu ttaxtilaha lhe ca belha bexxa utocanaha lhe. <sup>44</sup> Attiba tu gayu mil ca unbiyuu uto ttaxtilaha.

### Jesús ridee lo indattooha

(Mt. 14:22-27; Jn. 6:16-21)

<sup>45</sup> Dequide unnuha nna bentteba Jesús mandadu eyopi ca benni rudheti ca tisa rule'e lo barcoha qui enerucabi elhácabí attu ladu gue indattooha, tsiacabi daca lhe'e yiesi Betsaida, laca lee nna rechú tise ca benni se'e nía. <sup>46</sup> Dequide chi bechú tise ca benni se'e nía nna gopittebe lo lhilhi do nía qui innee lenie Tata Do Iyyabaaha. <sup>47</sup> Atti chi uca lo relaha nna rulha gue indattooha lí chi dia barcoha. Atturba Jesús be'ane lo yu te ro'o indattooha. <sup>48</sup> Lee nna biláttebanie ca benni ts'i'inu rudheti ca tisa rule'e tsapatteba ratecabi diacabi rudhacabi barcoha, cumu de daa xxatta be daca atta diacabiha. Atti chi daa raniha nna udátteba Jesús lo indattooha die daca atta se'e ca bi'ini rudheti ca tisa rule'e. Lee nna benttebe tte xeabe atta se'e ca bi'iniha. <sup>49</sup> Atti biláquinbi benniha die ridee lo indattooha nna uresi'attebacabi, cumu ucaquinbi ga nu i'iyaba nua. <sup>50</sup> Iyábacabi usincabi atti bilencabi Benniha. Lee nna unnettebe re ca bi'iniha:

—Neti bunni. ¡Tsitsi gualcuequi lele, bittu gasinle!

<sup>51</sup> Gopibe lo barcoha nna uretteba beha. Ca bi'iniha nna rebantsitsiabaquinbi, raca teequinbi lhe <sup>52</sup> cumu itú ttuaba nna läga

chi guadú lecabí gue nu ben Jesús len ca ttaxtilaha de sna yayaba elha rieni guecabi.

<sup>53</sup> Dequide chi ulhácabi ttu ladu gue indattooha nna bisínttebacabi lo yu nu te láni Genesaret. Níaba bexxicacabi barcoha ro'o indattooha. <sup>54</sup> Cuantusiba goadicabi lo barcoha nna beonbiatteba ca benni se'e nía Jesús. <sup>55</sup> Bigaattebacana beyyacana lhe'e iyába ca yiesi se'e nía, guaxícana ca nu rani guecaniha. Ca unnuha nna lo bretaba xua ca nua dia lencan cana atta chi binacana bisín Jesús. <sup>56</sup> Gaxaba risine si lhe'e yiesi xxeni lhe si lhe'e ca lhe'esi lhe o atta se'e ca ranchu lhe ribequitteba ca benni se'e nía ca nu rani guecaniha ro'o ca neda, atti rinne si'littebacana loe qui uguelhe ca nu raniha udaxxucana ladiba ro'o xoe. Iyába ca nu radaxxu ro'o xo Benniha nna reacattebacana.

### Nu runna itsiga ca benni lo Tata Do Iyyabaaha

(Mt. 15:1-20)

**7** Ca fariseo lencana adí ca nu rule'e nu rá lo ca ley boca'ana Moisés daa lhe'e yiesi Jerusalén, ubigattebacana sabi'aba Jesús.<sup>2</sup> Lacana nna biláquinna ttu chupa ca benni rudheti ca tisa rule'e Benniha anca tsiga nácabí atti rocabi etta. Delaba bittu bearí nácabí, bittu bedocabi tisa uncabi attiba chi labi ca benni Israel runcana atti deoba gocana etta. Larcala nna unne güeettebacana gue ca bi'iniha. <sup>3</sup> (Cumu ca fariseo lencana adí ca nu Israel tsitsiba runcana qui dho tisa gue nu bele'en ca benniola guecaniha cana. Gansi bittuba quí nácani attiba chi labicana runcana, läga gocana etta.) <sup>4</sup> Dequide resincana riacana lhe'e atta raca i'iya nna tsa läga rocana ttu bixa gansi bittuba quí nácani. Runruguabacana ixerguaba ca loesi unní lhe attiba eyari ca taza lhe ca canti lhe ca platu anca leni bronce lhe axtaba ca nu ribíacana loniha lhe. <sup>5</sup> Nuarcala ca fariseo lencana ca nu rule'e nu rá lo ca ley boca'ana Moisés nna unnaba tisattebacana Jesús rácane:

—Ca benni rudheti ca tisa rule'elu-na, tsigaba anca nácani rocana etta. ¿Biaca bittu rudocana tisa gue nu bele'e ca benniola gueriha?

<sup>6</sup> Jesús becabittebe guecani re cana:

—Gualíbani profeta Isaías atti unnebi utixxi'abi gue nu runle, lebi'i ca nu ni lo ni tisaba runle dequi ancale nu runi nu anca tsee. Lo sitsi ben bi'iniha nna rinne Tata Do Iyyabaaha re:

Ca benni se'e-ni nna cuentaba rinnecana rácana dequi ria  
lecani neti,

ttiaca läga gualícani ca unná racaquinna quia itú iqui itú  
lecani.

<sup>7</sup> Cuentarba te la dequi rudú xibicani loa,  
cumu nu anca gue ca benni se'e yies lo yu-niba rule'equinna  
ca benni,

läga rule'ecana nu ancatia mandadu ule'ecana.<sup>a</sup>

<sup>8</sup> Lebi'i nna rughá iquile nu ben Tata Do Iyyabaaha mandadu unri.  
Gue ca nu chi labi ca benni runcana la diale rudole tisa, [riguífle ca  
canti-na lhe ca xiga-na lhe ixerguaba ca loesi unná runle lhe.]

<sup>9</sup> Rágua Jesús cana:

—;Lebi'i nna si tseeba raquinle rigu'u ni'ale nu ben Tata  
Do Iyyabaaha mandadu unle qui raca runle nu chi labile runle!

<sup>10</sup> Cumu lo ca sitsi boca'ana Moisés rinne rá: “Gapalu respeto tata  
guelu lhe nan guelu lhe.”<sup>b</sup> Ráguba: “Nu quena iqui tata gueniha o  
nan gueniha nna ralhaba nua gattina.”<sup>c</sup> <sup>11</sup> Ttiaca lebi'i nna rálale  
dequi gua dicaba gá ttu benni tata gueniha o nan gueniha: “Bittu  
aca unna ttu bixa te quia guelu, cumu nu dica utea len lu nna chi  
ancana corbán.” Corbán dienna innánu chi anca úna gue Tata Do  
Iyyabaaha. <sup>12</sup> Nianna ráguale dequi care'aba inná ttu benni aná nna  
lärgaga raca duelha ute nua ttu bixa te gueni leni tata gueniha o  
nan gueniha. <sup>13</sup> Aná nna leni nu rughetinle ca benni uncana rigu'u  
ni'ale ca tisa gue Tata Do Iyyabaaha. Runruguabale adírguuba loesi  
unní lhe.

<sup>14</sup> Laniala nna uxi Jesús ca benni se'e nía, nianna re cana:

—Iyá rechattelle nna gualdo nagale quia, gualiyienini gue nu  
innía-ni lhe. <sup>15</sup> Läganu ro ca benni runna acacana nu anca tsiga  
lo Tata Do Iyyabaaha, nu riría lhi'u lhe'e lastooquinna liba runna  
acacana nu anca tsiga lo Ben-na. <sup>16</sup> [Atta gua rieninle, gualdo  
nagale qui sadú lele.]

<sup>17</sup> Atti chi beresi Jesús ca benni se'e nía nna beta'attebe lhe'e  
yo'o. Ca bi'ini rugheti ca tisa rule'e nna unnaba tisattebacabi  
Benniha bixa dia le ca tisa unnee. <sup>18</sup> Lee nna ráttebe cabi:

—¿Si niguuba lebi'i lä radú lele? ¿Si bittuba rieninle läganu ro ca  
benni runna acacana nu anca tsiga lo Tata Do Iyyabaaha? <sup>19</sup> Cumu

<sup>a</sup> 7:6-7 Isaías 29:13

<sup>b</sup> 7:10 Éxodo 20:12

<sup>c</sup> 7:10 Éxodo 21:17

läga lhi'u lhe'e lastoori dia nu rori, lhe'e libari dia nua, lenla nna reríana.

Leni ca tisa unnee-ni rixxi'e gue iyába nu rori ancana nari.  
<sup>20</sup>Rágubabe cabi:

—Nu riría lhi'u lhe'e lastoo ca benni libunna runna acacana nu anca tsiga lo Tata do Iyyabaaha. <sup>21</sup>Cumu lhi'u lhe'e lastoo ca benni liba riría nu lä anca tsee rulaba lecani:

nu runi racacana nu risá nu bittu anca latselani lhe  
 nu runi racacana nu rutsá ro'oni nutti nuttiba lhe  
 nu runi racacana nu runi elhutti lhe  
<sup>22</sup>nu runi racacana nu runi ubana lhe  
 nu runi racacana nu ridá leni acana nu gattaxxatta gueni lhe  
 nu runi racacana nu rudhaca güee benni lhe  
 nu runi racacana nu run leni lhe  
 nu runi racacana nu rudona leni unna nu racaba leni lhe  
 nu runi racacana nu rutía di leni lhe  
 nu runi racacana nu rinne güee gue benni lhe  
 nu runi racacana nu runi ttaba lhe  
 nu runi racacana attiba nu lä caa elha rieni gueni lhe.

<sup>23</sup>Iyába ca unní ancacana nu lä anca tsee riría lhi'u lhe'e lastoo ca benni. Ca unná libunna runcana aca benni nu anca tsiga lo Tata Do Iyyabaaha.

### Ttu nuila bittu ancana benni Israel ria leni Jesús

(Mt. 15:21-28)

<sup>24</sup>Jesús udáttebe nía die lo ca yu gue yiesi nu te láni Tiro leni yiesi nu te láni Sidón. Atti bisíne nía nna uta'attebe lhe'e ttu yo'o do nía. Lee nna bittu raca lee una benni doe nía, ttiaca ga uca dho gatsie nía. <sup>25</sup>Larcala binatteba nan gue ttu uncuiti yu'u be xxegüi lhe'e cuerpu gueni. Nan gue nua nna güiattebana bedú xibini lo Jesús.

<sup>26</sup>Nuilaha nna läganu Israel nua, nu Sirofenicia liba nua. Lana nna unnesi'ixxattana unnabana lo Jesús qui ebea benniha be xxegüi yu'u lhe'e cuerpu gue xi'iniunnániha. <sup>27</sup>Ttiaca lee nna ráttebe na:

—Primer xa begüeelha elani ca benni Israel raca xi'inia-na.  
 Cumu läga anca tsee cuaya ttaxtila ro ca xi'inia-na qui udelha lo ca becu-na.

<sup>28</sup> Nuilaha nna becabina rána:

—Gualíbinlu, xa tata, ttiaca axta ca becu-na rocana nu rexxa ro ca unto-na riyinna xana mexa-na.

<sup>29</sup> Jesús ráttebe nuilaha:

—Tseeba becabili. Denua nna lhatsiru beyya cumu nu xxegüiha nna chiba bería nua lhe'e cuerpu gue xi'iniunnáluha.

<sup>30</sup> Atti chi besin nuilaha lhe'e yo'o gueniha nna biláttebina xi'iniunnániha siba chi tena lo atta rattanaha, cumu chiba bería be xxegüiha lhe'e cuerpu gue nua.

### Jesús benie iyienini lhe inne tsee lhe ttu biría

<sup>31</sup> Jesús beríattebe lo yu gue yiesi nu te láni Tiro, atti beta'attebe lhe'e yiesi nu te láni Sidón. Níala nna die lo yu nu te láni Decápolis, axta liba bisíne ro'o Indattoo gue Galilea. <sup>32</sup> Nía nua uchecana lo Jesús ttu unbiyuu cuesu, bittuguaba rilí ro'oni innena lhe. Nianna unnesi'ittebacana unnabacana loe uxxúa nee iqui nua qui eyacana. <sup>33</sup> Lee nna ulequiesittebe nua atta se'e ca benni se'e nía. Nianna bega'atteba xbine lhe'e irupa laduba nagani, atti bettuttu tteba xxenie lo xbine utane lo lhusani. <sup>34</sup> Laniala nna ulhidha loe begüie Iyyabaaha. Bennexaba lee nna atti re unbiyuuhá:

—¡Efata! —Tisa-ni nna dienna innána: ¡Beali!

<sup>35</sup> Snaba lania nna beali naga nu cuesuha, bilí lhusaniha lhe. Lania nna lhatsirba unne nua. <sup>36</sup> Jesús ráttebe ca benni se'e nía, tsa nuttu nu quixxi'aquinna. Tsitsiba belise ca nua qui bittu quixxi'acana, ttiaca ca unnuha nna adílaba run ca nua rudácanca tisa gue nu beni Benniha. <sup>37</sup> Iyábacana rebanxxattaquinna gue nu ucaha, nianna rácanca:

—¡Iyába nu runi Ben-na ancana nu tsee! ¡Axtaba ca nu cuesu-na runie riyienquinna runie rinne ca biría-na lhe!

### Jesús rute ttaxtila go ttapa mil benni

(Mt. 15:32-39)

**8** La laniaguaba nua bedesina ixeru ca benni atta do Jesús. De bittu te bixa go ca nua nna nuarca uxteba Jesús ca benni rudheti ca tisa rule'e, nianna re ca bi'iniha:

<sup>2</sup>—Resi'irutia ca benni se'e-ni, cumu chi uca tsunna ubisa se'ecana len neti, lacana nna tsa bittu te bixa gocana. <sup>3</sup> Gansi

edhelha cana eyyacana anába na rituncana, la satúba lecani neda, cumu ttulhecana idittuli dácana.

<sup>4</sup> Ca benni rudheti ca tisa rule'e nna becabittebacabi rácabi Benniha:

—Güelha, ¿ga saxxíri xxeni ttaxtila qui go ttonáli ca benni, inqui lo yu bisi bunni se'eri nna?

<sup>5</sup> Jesús unnaba tise re ca bi'iniha:

—¿Balha ttaxtila te guele?

Lacabi nna becabicabi rácabi:

—Gasi.

<sup>6</sup> Laniala nna benie mandadu bebía iyába ca benni se'e nía lo yu. Lee nna bedaxxuttebe gasi ca ttaxtilaha. Dequide chi begüee xquixaru len Tata Do Iyyabaaha, ulha'attebe ca benniha begüee ca benni rudheti ca tisa rule'e, ca bi'iniha nna utidhittebacabi benniha begüeocabi iyába ca benni se'e nía. <sup>7</sup> Gua teeguaba a ttu chupa belha güexxa guecabi lhe. Jesús bodigüettebe xquixaru Tata Do Iyyabaaha, atti benttebe mandadu ca benni rudheti ca tisa rule'e quidhicabi ca belhaha gue ca benni se'e nía. <sup>8</sup> Iyába ca benni se'e nía utocana axta qui belquinna bodaparla ca benni rudheti ca tisa rule'e a gasi sumi ca pedazu bexxa uto ca nua. <sup>9</sup> Attiba tu ttapa mil ca benni uto ttaxtilaha raca. Laniala nna bechú tisa Jesús ca nua, <sup>10</sup> lee nna gopittebe lo barcoha lenie ca benni rudheti ca tisa rule'e, atti diattebaque daca lo yu nu te láni Dalmanuta.

### Ca benni fariseo rinnabacana ule'e lo Jesús gansi gualí dee iyyabaaha

*(Mt. 16:1-4; Lc. 12:54-56)*

<sup>11</sup> Ca fariseo nna bisínttebacana nía, atti udulottebacana ritilha tisacana len Jesús. Qui cu'u biacana Benniha nna unnabattecacana unie ttu milagru nu ule'e lo gansi gualí Tata Do Iyyabaaha udhelhe Benniha. <sup>12</sup> Jesús bennetteba lee, atti re:

—¿Biaca rinnaba ca benni se'e nnanna unia ttu milagru? Neti nna gualíbatia ria: “Tsa läga unia ni ttu nu ule'e lo nuxa anca [len ca benni se'e nnanna.]”

<sup>13</sup> Laniala nna boca'ane ca nua nía. Lee nna beopittebe lo barcoha attu libe deyye daca attu ladu gue indattooha.

**Jesús rixxi'e gue levadura gue ca fariseo**  
**(Mt. 16:5-12)**

<sup>14</sup> Ca benni rudheti ca tisa rule'e Jesús bixulhabaquinbi bittu bijacabi bixa gocabi, sunruba ttu ttaxtila nojacabi lo barcoha.

<sup>15</sup> Jesús ráttebe cabi:

—Gualdo cuidadu qui lä iyietile levadura gue ca fariseo-na, anáguba len levadura gue nu rinnabia lá Herodes-na lhe.

<sup>16</sup> Ttiaca ca benni rudheti ca tisa rule'e nna unnetteba len loescabi rácabi:

—Gaxa de bittuba ttaxtila nojari nuarca rá Ben-na aná.

<sup>17</sup> Atti utedaani Jesús gue nu rá ca bi'iniha nna ráttebe cabi:

—¿Biaca rinnele rále dequi bittu ttaxtila te guele? ¿Si itúttuhaba bittu radú lele? ¿Lä ritedaaguabinle nna? ¡Cattiparba tsitsi yaya elha rien guele! <sup>18</sup> Gua yu'uba iyya lole nna bittu rilenle, gua siaguuba nagale nna bittu rieninle, lä rexxaguuba lele nna. <sup>19</sup> Atti utidhia gayurba ttaxtila gue gayu mil ca unbiyuuha. ¿Balha sumi bisá ca pedazu bodapaleha?

Lacabi nna becabicabi rácabi:

—Tsil'inu (12) sumi.

<sup>20</sup> Ráguaebe:

—Atti utidhia gasirba ttaxtila gue ttapa mil benni, ¿balha sumi bisá ca pedazu bodapaleha?

Becabittebacabi rácabi:

—Gasi.

<sup>21</sup> Lee nna ráttebe cabi:

—¿Biacala itú ttuaba bittu radú lele ganna?

**Jesús benie beali lo ttu nu xua loni**

<sup>22</sup> Atti bisína Jesús lenie ca benni rudheti ca tisa rule'e lhe'e yiesi Betsaida nna uchetteba ca benni ttu unbiyuu xua loni guadúcana loe. Nianna unnesi'ittebacana unnabacana loe cane ca iyya lo nua qui eyacana. <sup>23</sup> Jesús bedaxxuttebe ná nua dia lanie na ro'o yiesiha. Laniala utabi xxenie ca iyya lo nua, bexxúa nee iqui nua lhe atti unnaba tisattebe nua gansi chi rilenna saro'o. <sup>24</sup> Nu xua loniha nna begüiattebana, nianna rána:

—Rilabatia ca benni ttiaca rule'ebatia cana attiba ca yaga ridacana.

<sup>25</sup> Jesúus bodixxuatteba nee attu libe iyya lo nua. Nu xua loniha nna beacattebana, ita suba biláttebinna iyáxeaba. <sup>26</sup> Laniala bedhelha Jesúus nua eyyana lhe'e yo'o gueniha, nianna re na:

—Bittu etelu lhe'e yies-na. [Bittuguaba quixxi'enlu nuxa benni gue nu uca lhe.]

### Pedro ridí ro'obi Jesúus anque Cristu

(Mt. 16:13-20; Lc. 9:18-21)

<sup>27</sup> Jesúus lanie ca benni rudheti ca tisa rule'e nna diattebaque lhe'e ca lhe'esi se'e lo yu nu te láni Cesarea gue Filipo. Atti yu'ucabi neda nna unnaba tisatteba Jesúus ca bi'iniha re cabi:

—¿Nú rá ca benni dequi anca?

<sup>28</sup> Ca bi'iniha nna becabicabi rácabi:

—Ttulhe benni nna rácana lu ancalu Juan bi'ini begadi indaha. Adí benni nna rácana lu ancalu profeta Elías. Attu lhecana nna rácana gaxa ttu ca profetahaba lu.

<sup>29</sup> Laniala nna rá Jesúus ca bi'iniha:

—Lebi'i nna ¿núla rále anca?

Pedro nna becabittebabi rábi:

—Lu ancalu Cristu Benni udhelha Tata Do Iyyabaaha odilá ca benni.

<sup>30</sup> Ttiaca Jesúus bentebe mandadu ca benni rudheti ca tisa rule'e qui tsa nuttu nu quixxi'encabi dequi labe nua Cristu.

### Jesúus rixxi'e gaxasná utticane

(Mt. 16:21-28; Lc. 9:22-27)

<sup>31</sup> Jesúus udulottebe utixxi'anie ca benni rudheti ca tisa rule'e re cabi:

—Neti Benni unbiyuu daa iyyabaaha labíaba satexxatta. Ca nu teru elha rieni gueni gue ca benni gueri anca benni Israel, ca nu lo gue ca bixxudi-na lhe ca nu rule'e nu rá lo ca ley boca'ana Moisés lhe cu'u ni'acani neti, utticana neti lhe ttiaca eyonna ubisa nna eyacatia.

<sup>32</sup> Iyába unní nna lhixxa rába unnee utixxi'anie cabi. Laniala nna ulequiesi Pedro Jesúus attu atta subi. Nianna utisabi Benniha.

<sup>33</sup>Ttiaca Jesús bodequitteba loe begüie lo ca bi'ini rudheti ca tisa rule'e, atti bedhaca disattebe Pedro re bi'iniha:

—¡Ubietta atta dua-ni, nu xxegüi! Lu nna läga rulaba lelu atti rulaba le Tata Do Iyyabaaha, attiba rulaba le ca benni se'e yies lo yu-ni rulaba lelu.

<sup>34</sup>Laniala nna uxie ca benni rudheti ca tisa rule'e leni adí ca benni se'e nía re cabi:

—Gansi nuxale raca lele acale benni udheti ca tisa quia-ni, raca duelha erú iqui erú le nua elha nabani gueni, uchíana lo iyába nu satena lhe attiba ttu benni diana noja crusi gueni atta utácan na lo nua. Lana nna ettenobana neti, masquiba uttican na. <sup>35</sup>Cumu iyába ca benni rdaca odilá elha nabani guecani yies lo yu-ni, unnittiba elha nabani guecani, iyába ca benni erú iqui erú lecani gatticana lo ni'a quia lhe lo ni'a gue ca tisa gue Tata Do Iyyabaaha lhe guadíba ca nua elha nabani gatta ttu tsaba guecani. <sup>36</sup>Tsa lägabi ixuu len ttu benni ganna e'eyuna acana nu banani iyába nu te yies lo yu-ni, elha nabani guenihha nna ttu tsaba dia nittina. <sup>37</sup>Cumu tsa lägabi te ttu bixa ute ttu benni qui gatta elha nabani gueni ttu dia lii. <sup>38</sup>Cumu gansi ttu benni ettuinna quia lhe ettuinna gue ca tisa quia-ni lhe lo ca benni runi nu lä anca tsee se'e nnanna ca nu rudhá iquicani Tata Do Iyyabaaha, anáguaba neti Benni unbiyuu daa iyyabaaha ettúguabatia gueni gansi chi dedaaya lhe'e xieni ga'ana tsee gue Tata quia do iyyabaaha lenia ca ingeli gue Ben-na.

**9** Ráguba Jesús cabi:

—Neti nna gualíbatia ria le, ttulhe ca benni se'e ni nna axta liba gansi chi biláquinna rinnabia Tata Do Iyyabaaha len elha ra xxen le guee, lania liba nna gatticana.

### Botsía lo Jesús

(Mt. 17:1-13; Lc. 9:28-36)

<sup>2</sup>Dequide chi utee xxupa ubisa nna uchetteba Jesús Pedro lhe Jacobo lhe Juan lhe iqui ttu i'lya yadha atta suntteba laque use'e. Nía nua botsía lo Jesús aníba lo ca bi'iniha. <sup>3</sup>Xo Benniha nna ru'uni xieni gue ca nua de chabeatto nisihaba beacacana. Ni ttu benni rii lari do yies lo yu-ni bittu dhana odha'anna ca nua sitsi atti beacacana. <sup>4</sup>Nía bilencabi ucaxxe Elías lenbi Moisés rinnecabi len Jesús. <sup>5</sup>Pedro nna ráttebabí Jesús:

—Maestro, tsee galá guaxxína se'etu nii. Unrugatu tsunna yo'o lhaga, ttu guelu nna attu gue Moisés nna attu gue Elías nna.

<sup>6</sup> Aníaba rá Pedro, cumu bittu bería ni'elhinbi bixa innábi de rasixxattaquinbi. <sup>7</sup> Nianna ucaxxetteba ttu bea udána xequique bexxulana que. Lhe'e beaha nna bieni ts'i'i ttu benni unnee re:

—Ben-ni anque xi'inia benni racaxxattatia guee. Gue Benni gualdo nagale.

<sup>8</sup> Ttu ca lharu nna atti begüiachicabi sabi'aba atta se'ecabiha nna tsa lärganu ca bi'iniha biláquinbi. A tturba Jesús biláquinbi due nía.

<sup>9</sup> Laca deyyacabi readicabi iqui i'iyaha nna bentteba Jesús ca bi'iniha mandadu re cabi:

—Tsa nuttu nu quixxi'enle gue nu bilenle axta liba dequide gansi chi beacatia eríaya lhe'e baa atta yu'u ca nu yatti-na, neti Benni unbiyuu daa iyyabaaha.

<sup>10</sup> Lacabi nna uyu'utsitsibacabi tisa, masquiba gua rinnaba tisaguuba loescabi gue bi dia le nu rá Benniha eyacanie attu libe.

<sup>11</sup> Nianna unnaba tisacabi Jesús rácabi Benniha:

—¿Biaca rá ca nu rule'e nu rá lo ca ley boca'ana Moisés dequi primerla Elías esía, lenla nna isía Benni anque Cristu?

<sup>12</sup> Lee nna becabie re ca bi'iniha:

—Gualíba, primerla Elías esía, bi'iniha ose'etseebi iyánea. Gansi anía anca, ¿Si läba rágua lo ca sitsi gue Tata Do Iyyabaaha neti Benni unbiyuu daa iyyabaaha nna satexxatta, cu'u ni'acani neti lhe? <sup>13</sup> Ttiaca neti nna rpea le, chila beta Elías, ca benni nna nu ucaba lecani bedhacacana bi'iniha, attiba chi ga'ana lo ca sitsi gue Tata Do Iyyabaaha satebi.

### **Jesús bebee be xxegüi yu'u lhe'e cuerpu gue ttu uncuiti**

(Mt. 17:14-21; Lc. 9:37-43)

<sup>14</sup> Atti besina Jesús atta se'e adí ca bi'ini rudheti ca tisa rule'e, biláttebanie ixeru ca benni se'e sabi'aba ca bi'iniha. Níaguuba se'e ttu chupa ca nu rule'e nu rá lo ca ley boca'ana Moisés, ritilha tisacana len ca bi'iniha. <sup>15</sup> Atti biláni ca benni se'e nía Jesús, bebanbaquinna iyábacana bigaattebacana guatsáacana Benniha rácane: “Padiuxi”. <sup>16</sup> Lee nna unnaba tisattebe, re cana:

—¿Bi lo ni'a gueonna ritilha tisa lenle ca unná?

<sup>17</sup> Ttu ca nu se'e nía nna unnettebana rána:

—Maestro, daba neti lenia uncuiti quia-ni lo cuinalu, cumu yu'u lhe'e cuerpu gueni ttu be xxegüii. Unná nna bittu rugüelhana innena. <sup>18</sup> Gaxaba duna atti risía retti gueni nna be xxegüi-na rigu'unattebana unná lo yu, riríatteba besina ro'oni lhe rotteba lo layani lhe atti redá yagattebana. Neti chi unnaba lo ca bi'ini rudheti ca tisa rule'elu-na qui ebeacabi be xxegüi-na, ttiaca bittu udácabí.

<sup>19</sup> Jesús becabie re:

—Lebi'i ca benni bittu ria leni, ¿núcachiarga neti lania le? ¿Núcachiarga neti dhoa uchíana lole? Gualsaxxí uncuitiha ni.

<sup>20</sup> Laniala nna uchecana uncuitiha atta du Jesús. Ttiaca atti biláni be xxegüiha Jesús, benttebana utti'a uncuitiha atti bixxittebanna. Unnuha nna beyyattebana udhá, bitesttebana lo yu lhe biría besina ro'oni lhe. <sup>21</sup> Jesús unnaba tisattebe tata gue uncuitiha re na:

—¿Núcaliga ridaca unná aná?

Tata gue uncuitiha nna becabina ráne:

—Desdeba atti ancali unná chica'a udulo ridacana aná. <sup>22</sup> Ixe libe chi bedelha be xxegüi-na uncuiti quia-na lo gui, lhe'e inda lhe qui gattina. Larcala gansi gua dabalu unlu ttu bixa leni unná, besi'ichinlu ri'itu. Ucachi lenlu ri'itu.

<sup>23</sup> Jesús ráttebe na:

—¿Gasná nua rálú: “Gansi gua dalu”? Bixaba raca le ttu benni aca, ladiba ria leni nna guacaba nua.

<sup>24</sup> Laniala nna unnettebana tata gue uncuitiha idisa, rána:

—¡Gua riaba lasia! ¡Ucachi len neti qui tsiaga lasia!

<sup>25</sup> Atti biláni Jesús chi bisína ixeru ca benni atta due, bedhaca disattebe be xxegüiha re na:

—¡Neti, rinnabiyaya lu, be xxegüii nu runna anca uncuiti-ni biría lhe cuesu lhe bería lhe'e cuerpu gue uncuiti-na. Tsa bitturu eteta'alu lhe'onna attu libe!

<sup>26</sup> Be xxegüiha nna uresi'attebana, nianna benttebana utti'a uncuitiha attu libe, atti beríattebana deyyana. Uncuitiha nna níaba te nua guannalu uttibana. Larcala nna ixe ca nu se'e nía rácana dequi uttiba nua. <sup>27</sup> Ttiaca Jesús bedaxxuttebe ná uncuitiha belhidhe na. Unnuha nna xeaba guadhana udúrana.

<sup>28</sup> Dequila nna uta'a Jesús lhe'e yo'o lanie ca benni rudheti ca tisa rule'e. Nianna atti chi se'ecabi suntteba lacabi lencabi Benniha nna unnaba tisacabi rácabi Benniha:

—¿Biaca bittu udátu ebeatu be xxegüi-na?

<sup>29</sup> Jesúس becabittebe re cabi:

—Ca be xxegüi loesi unná, tsa läga dhari ebeari cana gansi bittuba innábari len Tata Do Iyyabaaha, [cu'u ubina lhe'eri lhe.]

### Ni rerupa libe rixxi'a Jesúس gaxasná gattie

(Mt. 17:22-23; Lc. 9:43-45)

<sup>30</sup> Atti chi bedácabi nía, deyyattebacabi daca lo yu nu te láni Galilea, Jesúś tsa bittu raca lee nuxa unana requique nía, <sup>31</sup> cumu de rule'enie ca bi'ini rudheti ca tisa rule'e. Lee nna re ca bi'iniha:

—Neti Benni unbiyuu daa iyyabaaha, labíaba utee ca benni neti las ná ca nu utticana neti, ttiaca dequide eyonna ubisa nna eyacatia.

<sup>32</sup> Lacabi nna tsaba bittu guadú lecabí bixa dia le ca tisa unnee Benniha, ttiaca rasbaquinbi innába tisacabi Benniha.

### Bi un ttu benni qui e'eyuna acana nu ra xxenru leni

(Mt. 18:1-5; Lc. 9:46-48)

<sup>33</sup> Bisínba Jesúś lenie ca benni rudheti ca tisa rule'e lhe'e yiesi Capernaum. Atti chi se'eque lhe'e yo'o nna unnaba tisatteba Jesúś ca bi'iniha, re cabi:

—¿Bi lo ni'a gue nua ritilha tisa len loesle atti yu'uri neda dari bechiha?

<sup>34</sup> Ttiaca lacabi nna beaca sittebacabi, cumu atti yu'ucabi nedaha nna ritilha tisa len loescabi gue nuxacabi aca nu lo. <sup>35</sup> Laniala nna bedotteba Jesúś, atti uxittebe iyába tsi'inu ca benni rudheti ca tisa guee, nianna re ca bi'iniha:

—Gansi nuxale rdacale acale nu lo, unnuha nna acana nu xubana gue iyále, nu udá náni lo iyále lhe.

<sup>36</sup> Atti bedaxxuttebe ttu unto bedúe salhe gue ca bi'iniha, lenla nna bedotteba lo nee nua, nianna ráttebe cabi:

<sup>37</sup> —Nuxaba benni ulabina ttu unto loes unní de ancana nu ria leni neti nna netiba nua rulabi nua. Nu ulabina neti nna läga sunru neti nua rulabina, anáguauba rulabina Tata quia Do Iyyabaaha benni udhelhe neti.

**Nu bittu rigu'u ni'acana ri'i, se'ecana len ri'i***(Lc. 9:49-50)*

<sup>38</sup> Juan ráttebabí Jesús:

—Maestro, ri'itu chi bilentu ttu nu requi ruría lána ca be xxegüi atti rudettina lálu, ttiaca unná nna läga ri'i selunna. Larcala nna chi besunatu qui bitturu unna aná.

<sup>39</sup> Jesús becabittebe re:

—Bittu usunale uni unná aná, cumu läganu te unna ttu milagru udettina láya, lenla nna eyequina inne güena quia. <sup>40</sup> Nu bittu redú disana lori nna len ri'iba duna. <sup>41</sup> Nuxaba benni gansi utena ladiba ttu xiga inda len lebi'i de ancale benni baba len neti, neti nna gualíbatia rpea le, unnuha nna guadíba na nu tsee ralhana dhína gue nu bennaha.

**Lhatsiru unle***(Mt. 18:6-9; Lc. 17:1-2)*

<sup>42</sup> *Ttiaca gansi nuxa benni unna ixúyie ttu ca benni ria leni neti bittu chi se'e tsitsi lo neda gue Tata Do Iyyabaaha unna ttu nu lä anca tsee, tseerla salíana nua uxxicacana ttu iyya gue mulinu xeni yienni atti udelhacan na lhe'e indatoo.* <sup>43</sup> Gansi ttu nálha runna ixúyielu unlu nu lä anca tsee, lu nna uchecu na, cumu tseerla salíana lu esínlu atta gatta elha nabani guelu ttu dia lii bittu ttu lha'a nálhu te, attichula tsialu atta lexúa leni irpa lha'a nálhu. Nía nua atta ttu dia liiba rite lo guiha, ttu tsa bittu reola loni. <sup>44</sup> [Nía nua bittu ratti ca bedúa, lä reolaguaba lo guiha lhe.] <sup>45</sup> Gansi ttu lha'a ni'alha runna ixúyielu unlu nu lä anca tsee, lu nna uchecu na, cumu tseerla salíana lu esínlu atta gatta elha nabani guelu ttu dia lii bittu ttu lha'a ni'alhu te, attichula tsialu atta lexúa leni irpa lha'a ni'alhu. [Nía nua atta ttu tsa bittu reola lo guiha.] <sup>46</sup> Nía nua bittu ratti ca bedúa, lä reolaguaba lo guiha lhe.] <sup>47</sup> Gansi ttu iyya lolha runna ixúyielu unlu nu lä anca tsee, lu nna ulequi na, cumu tseerla salíana lu eta'alhu atta rinnabia Tata Do Iyyabaaha bittu ttu lha'a iyya lolu tee, attichula tsialu atta lexúaha leni irpa lha'a ca iyya lolha. <sup>48</sup> [Nía nua bittu ratti ca bedúa, lä reolaguaba lo guiha lhe.]

<sup>49</sup> Cumu guiha uni etticana ixe attiba deti. <sup>50</sup> Deti-na tseeba rixúe, ttiaca gansi enitti ixe gue ben-na, lärga aca eyo ben-na ixe.

Gualuni qui acale benni ixú attiba deti-na tseeba rixuuna. Lhatsiru gualtse'e, bittu ttilha len loesle.

### **Bittu dica udhequi ttu unbiyuu nuila gueni**

(Mt. 19:1-12; Lc. 16:18)

**10** Jesúus udáttebe lhe'e yiesi Capernaum die daca lo yu nu te láni Judea, lo yu nu te attu ladu gue yoo Jordán. Ca benni nna bedesinttebacana atta du Benniha. Lee nna bededulottebe bodile'enie ca nua attiba labibe runie.<sup>2</sup> Ttulhe ca fariseo ubigattecacana atta du Jesúus, qui cu'ubiacana Benniha nna unnaba tisattebacane gue gansi gua dica udhequi ttu unbiyuu nuila gueniha.

<sup>3</sup> Lee nna becabittebe guecani re cana:

—¿Bila rá lo ley boca'ana Moisés?

<sup>4</sup> Ca fariseo nna becabicana rávana:

—Lo ca ley boca'ana Moisés rinne rá, dequi guadicaba ela'a ttu unbiyuu leni nuila gueniha leni ttu sitsi ilhidhana utena len nua atta rixxi'a bixa lo ni'a gue ela'acana.<sup>a</sup>

<sup>5</sup> Lania nna rá Jesúus cana:

—Moisés aníaba boca'anabi lo sitsi unle, cumu de yatterba de ditile.<sup>6</sup> Ttiaca atti chi ureba yies lo yu-ni, Tata Do Iyyabaaha benie ttu unbiyuu nna ttu nuila nna.<sup>b</sup> <sup>7</sup> Denuala nna oca'ana unbiyuu-na tata nan gueni qui utsá náni leni nuila aca latselani.<sup>8</sup> Lania nna irpabacana eyacacana attiba ttuba benni. Larcala nna lärga anca ca nua chupa benni, sinuqui ttuba benni chi beaca ca nua.<sup>c</sup> <sup>9</sup> Nuarcala nna läga dica elha'a ttu benni lhe'e loesi ca benni chi bequeti Tata Do Iyyabaaha.

<sup>10</sup> Atti chi besini Jesúus lenie ca benni rudheti ca tisa rule'e lhe'e yo'oha nna unnaba tisa dacabacabi Benniha gue bixa diani nu chi re.<sup>11</sup> Jesúus ráttebe cabi:

—Unbiyuu nu udhequini nuila gueniha qui utsá náni len attu nuila subi nna nu te tulha guebani aca nua.<sup>12</sup> Gansi nuilaha udhequini unbiyuu gueniha, nianna utsá náni len attu unbiyuu subi, nu te tulha gueguabani aca nua.

---

<sup>a</sup> **10:4** Deuteronomio 24:1    <sup>b</sup> **10:6** Génesis 1:27    <sup>c</sup> **10:8** Génesis 2:24

**Jesús rinnabe elha nabani gue ca unto***(Mt. 19:13-15; Lc. 18:15-17)*

<sup>13</sup> Ca benni nna uchecana ca unto guecaniha lo Jesús qui uxúua nee iquicani innábe elha nabani guecani lo Tata Do Iyyabaaha, ttiaca ca benni rudheti ca tisa rule'e nna bedhaca disattebacabi ca benni che ca untoha. <sup>14</sup> Atti biláni Jesús nu run ca bi'iniha nna guanni dittebanie. Nianna ráttebe ca bi'iniha:

—Gualgüelha ca unto-na itacana len neti, bittu usunale, cumu ca benni anca attiba ca unní liba ancacana benni rinnabia Tata Do Iyyabaaha. <sup>15</sup> Neti nna gualíbatia rpea le, gansi bittuba dhielhale innabia Tata Do Iyyabaaha le attiba ttu unto, läga aca iselale ca benni rinnabia Tata Do Iyyabaaha.

<sup>16</sup> Nianna bedotteba lo nee ca untoha, atti bexxúatteba nee iqui ca nua qui unnabe elha nabani gue ca nua lo Tata Do Iyyabaaha.

**Ttu unbiyuu texxatta gueni rinne lena Jesús***(Mt. 19:16-30; Lc. 18:18-30)*

<sup>17</sup> Atti chi dia Jesús edegu'e neda tsie, ruxunnini ttu unbiyuu bisía bedú xibini loe, atti unnaba tisattebana Benniha ráne:

—Maestro, lu ancalu benni tsee. ¿Bi unia qui gatta elha nabani quia ttu tsaba?

<sup>18</sup> Jesús ráttebe na:

—¿Biaca neti rálú benni tsee? Cumu tsa läganu te ancana benni tsee, sunruba Tata Do Iyyabaaha anque benni tsee. <sup>19</sup> Lu nna chiba yulu nu rá lo ca ley boca'ana Tata Do Iyyabaaha len Moisés:

Bittu utsá ro'olu nu bittu anca latselalu,<sup>a b</sup>

bittu lhanalu lhe<sup>c</sup>

bittu un lelu cuentaba unlu xiyya gue benni subi lhe<sup>d</sup>

bittu dhi yielu lhe

gapalu respeto tata nan guelu lhe.<sup>e</sup>

<sup>20</sup> Unbiyuuha nna becabina rána:

—Maestro, iyába unní, atti ancalia güexxaha uduloa runia.

<sup>a</sup> **10:19** Éxodo 20:13

<sup>b</sup> **10:19** Éxodo 20:14

<sup>c</sup> **10:19** Éxodo 20:15

<sup>d</sup> **10:19** Éxodo 20:16

<sup>e</sup> **10:19** Éxodo 20:12

<sup>21</sup> Laniala nna begüia Jesús loni, nianna ucanie gueni, atti re na:  
 —Attuba ttu nu reasa unlu. Beyya guatto'o iyárecha nu te guelu.  
 Belhi gue nua nna begüee ca benni bittu te gueni. Anía liba nna  
 gatta elha tsee guelu iyyabaaha. Lania nna utátte betteno neti.

<sup>22</sup> Ttiaca unbiyuuhu nna paba be'anna atti bieninna rá Benniha  
 na anía. Si'irurba runna deyyana, cumu de ancana nu texxatta  
 gueni.

<sup>23</sup> Laniala nna begüia Jesús sabi'aba atta due, atti ráttebe ca  
 benni rudheti ca tisa rule'e:

—Cattipa tsitsi anca e'eyu ca benni te guequinna acacana benni  
 rinnabia Tata Do Iyyabaaha.

<sup>24</sup> Ca benni rudheti ca tisa rule'e nna rebanbaquinbi gue nu rá  
 Benniha. Lee nna bequittebe re cabi:

—¡Ca xi'into quia, neti rpea le, ca benni xen lecani gue nu te  
 guecani, cattipa tsitsi anca e'eyucana acacana benni rinnabia Tata  
 Do Iyyabaaha! <sup>25</sup> Gaxa guaterla ttu camello lhe'e belea do xan ttu  
 tsioxa atti ttu benni te gueni e'eyuna acana benni rinnabia Tata Do  
 Iyyabaaha.

<sup>26</sup> Ca benni rudheti ca tisa rule'e adílaba bebanquinbi, nianna rá  
 loescabi:

—Gansi anía anca, ¿núla guadána lhána qui bittu tsia nittina  
 ganna?

<sup>27</sup> Begüiatteba Jesús locabi, nianna re:

—Ca benni se'e yies lo yu-niba bittu dhacana uncana unní, ttiaca  
 Tata Do Iyyabaaha nna gunbe unná, cumu benna iyába raca guee  
 runie.

<sup>28</sup> Pedro nna bequittebabí rábi:

—Ri'itu nna iyába nu te guetu boca'antu atti dattebatu len  
 cuinalu.

<sup>29</sup> Jesús ráttebe:

—Neti nna gualíbatia rpea le, nuxaba benni gansi de lo ni'a quia  
 o lo ni'a gue ca tisa gue Tata Do Iyyabaaha, chi bedhá iquini yo'o  
 gueni lhe betsini lhe danni lhe tata gueni lhe nan gueni lhe xi'inni  
 lhe lo yu gueni lhe <sup>30</sup> dhibana ttu gayua (100) libe yies lo yu-ni,  
 yo'o lhe betsini lhe danni lhe tata gueni lhe nan gueni lhe nuila  
 gueni lhe xi'inni lhe lo yu lhe masquiba un ca benni uyúna elha  
 disa. Tiempu chi dabaha nna dhína elha nabani gatta ttu tsaba  
 gueni. <sup>31</sup> Ttiaca ixe ca nu runi ancacana nu ra xxeni leni nnanna

eyacacana nu bittu ra xxeni leni, ixeguaba ca nu bittu ra xxeni leni nnanna eyacacana nu ra xxeni leni.

### **Ni reyonna libe rixxi'a Jesús gaxasná gattie**

(Mt. 20:17-19; Lc. 18:31-34)

<sup>32</sup> Jesús denerube lo ca benni rudheti ca tisa rule'e, deyu'ucabi neda diacabi lhe'e yiesi Jerusalén. Ca benni rudheti ca tisa rule'e nna rebanbaquinbi, adí ca benni denoha nna rasilhabaquinna. Laniala nna bedeaxie ca benni ts'i'inu rudheti ca tisa rule'e, atti udulottebe utixxi'anie ca bi'iniha gue iyába nu sate. <sup>33</sup> Lee na re cabi:

—Niba diari lhe'e yiesi Jerusalén atta udaxxucana neti, Benni unbiyyu daa iyyabaaha, qui utevana neti las ná ca bixxudi anca nu lo-na leni ca nu rule'e nu rá lo ca ley boca'ana Moisés. Ca unná nna oquinna iquicani gattia, lacana nna utevan neti las ná ca benni dittu. <sup>34</sup> Ca unnuha nna udhaca güecana neti, quincana neti lhe uttu ttu xxencani loa lhe utticana neti lhe ttiaca eyonna ubisa nna eyacattebatia.

### **Jacobo lenbi Juan rinnabacabi lo Jesús ttu nu bittu dhacabi uncabi**

(Mt. 20:20-28)

<sup>35</sup> Jacobo lenbi Juan ca xi'ini Zebedeo ubigattebacabi atta du Jesús, nianna rácabi Benniha:

—Maestro, ri'itu nna raca letu unlu nu innábatu lo cuinalu.

<sup>36</sup> Lee nna ráttebe cabi:

—¿Bi raca lele unia?

<sup>37</sup> Lacabi nna ráttebacabi:

—Gansi chi rinnabialu iyyabaaha ugüelhalu dho ttuttu daca derechu guelu, a ttuttu nna dho daca rabesa guelu.

<sup>38</sup> Jesús ráttebe cabi:

—Lebi'i nna läga yule bixunna rinnabale. ¿Si guarudhaca lele guadále satele loesi nu satea? ¿Si guadále uchíale uyúle elha disa loesi elha disa uyúa?

<sup>39</sup> Lacabi nna becabicabi rácabi:

—Guadábatu.

Jesús becabie re ca bi'iniha:

—Gualíba lebi'i nna guadábale uyúle loesi elha disa uyúa, guadábale satele loesi nu satea lhe <sup>40</sup> ttiaca läga neti ralha unia qui dho ttule daca derechu quia, a ttule nna daca rabesa quia. Tata quia do iyyabaaha liba innee nupaxa chi ga'ananie ralha cuia lhuitta.

<sup>41</sup> Atti bienini a tsii ca bi'ini rudheti ca tisa rule'e Jesús, nu rinnaba Jacobo lenbi Juan, bisa'attebaquinbi len ca bi'iniha.

<sup>42</sup> Jesús uxttebe iyábacabi attu atta subi, nianna re ca bi'iniha:

—La gua yuxaabale dequi ca nu rinnabia gue ca yiesi dittu-na, ritee lo bedábacana rinnabiacana ca benni banquinna. Unnuhaguaba run ca nu lo ra xxeni lequinna lhe rite lo bedábacana nu runcana.

<sup>43</sup> Ttiaca lebi'i nna läga dica udhaca loesle aná. Cumu nu rdacana acana nu ra xxeni leni guele nna unnuha udá náni lole. <sup>44</sup> Larcala nna nuxale rdacale acale nu lo, unnuha nna acana attiba ttu nu tto'o lo sina lole. <sup>45</sup> Cumu ni neti Benni unbiyuu daa iyyabaaha läga delha yies lo yu-ni qui udá ná ca benni loa, sinuqui delhaba qui udá náya lo ca benni, gattia utea elha nabani quia qui lhá ixeru ca benni qui bittu tsia nitticana lhe.

### **Jesús benie beali lo nu xua loni te láni Bartimeo**

(Mt. 20:29-34; Lc. 18:35-43)

<sup>46</sup> Dequilaha nna bisína Jesús lhe'e yiesi Jericó lenie ca bi'ini rudheti ca tisa rule'e. Atti chi die erié lhe'e yiesiha lanie ca bi'iniha, denoguaba ixeru ca benni lhe nía ro'o nedaha do ttu unbiyuu xua loni benni lá Bartimeo xi'iní benni lá Timeo rinnabana belhi. <sup>47</sup> Atti bieninna Jesús benni beaca lasie Nazaretba Benniha die ritee nía, udulottebana uresi'ana rána:

—¡Jesús, benni datía David, guatúachi lelu neti!

<sup>48</sup> Ixe ca benni rudhaca disacana nu xua loniha qui eyaca sina, ttiaca adíla idisa uresi'a nua rána:

—¡Benni datía David, guatúachi lelu neti!

<sup>49</sup> Laniala nna uleda Jesús, nianna udhelhattebe ca nu güia gualisacana nu xua loniha. Atti güiacana gualisacana nua nna ráttebacan na:

—Bettipa lelu lhe udulí tte lhe qui chi raxie lu.

<sup>50</sup> Nu xua loniha nna uru'una bixxina lari nucunaha, atti tturba udhina udú lína diana ubigana atta du Jesús. <sup>51</sup> Jesús unnaba tisattebe na re na:

—¿Bi raca lelu unia guelu?

Nu xua loniha nna becabina rána Benniha:

—Maestro, raca lasia eyali ca iyya loa-ni.

<sup>52</sup> Jesús ráttebe na:

—Chinca beyya. Cumu de güia lelu güeyacabalu nuarca beacalu. Snaba lania beali lo nua, atti diattebana denona Jesús.

### Jesús die gue'e lhe'e yiesi Jerusalén

(Mt. 21:1-11; Lc. 19:28-40; Jn. 12:12-19)

**1 1** Atti chi deoba isíni Jesús lenie ca benni rudheti ca tisa rule'e lhe'e yiesi Jerusalén, bisínttebacabi atta re lhe'esi nu te láni Betfagé leni lhe'esi nu te láni Betania ttu ladu gue lo lhilhi nu te láni Atta Daa ca Ya Olivu. Laniala nna udhelha Jesús chupa ca bi'ini rudheti ca tisa rule'e. <sup>2</sup> Lee nna re ca bi'iniha:

—Gualtsia lhe'esi re ttu ladu-na. Gansi chi uta'ale lhe'esi-na, na satti'ale ttu burru cuiti nalhana. Unnuha nna tsa nuttu nu chi udon cu'eni. Lebi'i nna gualudhán-na, atti gualetá tte lenna ni. <sup>3</sup> Gansi nuxa innána: “¿Biaca runle aná?” Lebi'i nna gualgás na: “Benni bananie ri-naba reasanie unní, lenla nna güetteru'unttebe na.”

<sup>4</sup> Lacabi nna güiattebacabi. Níaba guatti'acabi burru cuitiha nalhana gaxxaba lhe'e puerta gue ttu yo'o do xitsi nedaha. Nianna udhasttebacabi nua.

<sup>5</sup> Ttu ca nu se'e nía nna unnaba tisattebacana rácana:

—¿Biunna runle na? ¿Biaca burru-na ridhasle?

<sup>6</sup> Lacabi nna becabittebacabi attiba rába Jesús cabi. Ca unnuha nna lärgabi rua rá ca nua. <sup>7</sup> Besinba lencabi burrutoha atta du Jesús, atti ulu'uttebacabi ca lari rucucabiha cu'e nua. Benniha nna udottebe cu'e nua. <sup>8</sup> Ixeru ca benni ritsilacana ca lari nucucanaha lo neda atta dia Benniha, adícana nna lo ca yaga daa níaba ritsa cana qui ritsilacana lo nedaha. <sup>9</sup> Ca nu denalha lhe ca nu dia neruha lhe ribesi'acana rácana:

¡Xxeni ra lelu o!

¡Carbárulu, lu ancalu benni udhelha Tata Do Iyyabaaha!

<sup>10</sup> ¡Carbárulu, lu benni daa innabia attiba unnabia David  
benni datíariha!

¡Xxeni ra le benni do iyyabaaha!

<sup>11</sup> Atti uta'a Jesús lhe'e yiesi Jerusalén, güiattebe lhe'eli'a gue youtuha. Dequide begüia xxa tseebe iyába nu tee sabi'aba nía nna deyyatteba lenie ca benni ts'i'inu rudheti ca tisa rule'e lhe'e yiesi Betania, cumu chiba ulha sá nua.

### Ya igu bittu sia nu xixxi loniha

(Mt. 21:18-19)

<sup>12</sup> Betteyú sá nna atti bería que lhe'e yiesi Betania, Jesús nna utunie. <sup>13</sup> Idittuli bilánie du ttu ya igu sia lhaga gueni. Lee nna güiattebe guagüie gansi gua sia nu xixxi gue nua. Ttiaca sunruba lhaga gue nua sia, niba ttu nu xixxi bittu te lo nua cumu läga lania anca atti ribía gue nua. <sup>14</sup> Laniala nna rá Jesús ya iguha:

—¡Tsa ni ttu libe nutturu gona nu xixxi guelu!

Ca bi'ini rudheti ca tisa rule'e nna bienbaquinbi nu rá Benniha.

### Jesús bería lee ca nu yu'u güetto'o lhe'eli'a gue youtuha

(Mt. 21:12-17; Lc. 19:45-48; Jn. 2:13-22)

<sup>15</sup> Bisínbacabi lhe'e yiesi Jerusalén nna uta'atteba Jesús lhe'eli'a gue youtuha, atti udulottebe bería lee ca nu yu'u güetto'o nía, ca nu ro'oha lhe. Berixxi lottebe ca mexa gue ca nu rotsía belhiha lhe atta sia ca nu ruto'o becha lhe. <sup>16</sup> Tsa ni ttu benni bitturu begüeelhe ttecana lhe'eli'a gue youtuha leni ca nu checanaha. <sup>17</sup> Lee nna udulottebe bele'enie ca benni re cana:

—¿Si läba gua yubale, lo ca sitsi atta dia ca tisa gue Tata Do Iyyabaaha rinne Ben-na re: “Yo'o quia-ni acana yo'o atta inne iyácea ca benni se'e lhe'e ca yiesi se'e yies lo yu-ni leni neti?<sup>a</sup> Ttiaca lebi'i nna attiba belea anca lisi ubana la chi beonle youtu-ni.”<sup>b</sup>

<sup>18</sup> Atti bienini ca bixxudi anca nu loha lencana ca benni rule'e nu rá lo ca ley boca'ana Moisés nu rá benniha, lacana nna udulottebacana beguila lecani gaxasná uncana qui utticana Benniha de rasquinna loe, cumu iyába ca benni rebanquinna gue nu rule'e

<sup>a</sup> 11:17 Isaías 56:7    <sup>b</sup> 11:17 Jeremías 7:11

Benniha.<sup>19</sup> Atti chi daa raca ela nna beríatteba Jesús lenie ca benni rudheti ca tisa rule'e lhe'e yiesi Jerusalén.

### **Jesús rixxi'e ttixuca ubisi ya iguha**

(Mt. 21:20-22)

<sup>20</sup> Betteyú dila nna ute Jesús lenie ca benni rudheti ca tisa rule'e atta du ya iguha. Lacabi nna biláquinbi chi ubisi yagaha itupa llhu-ni.<sup>21</sup> Laniala nna bexxatteba le Pedro gue nu rá Jesús yagaha, nianna ráttebabí Benniha:

—¡Maestro, begüiarga! ¡Chi ubisi ya igu nu rálu ni ttu libe bitturu cuia nu xixxi gueniha!

<sup>22</sup> Jesús becabie re cabi:

—Gualtsia lele Tata Do Iyyabaaha.<sup>23</sup> Cumu neti nna gualíbatia rpea le nuxaba benni gansi góána i'iyá do-na: “¡Ubieta atta dolha nna güia tte bixudi lhe'e indattoo-na!”, lana nna bittu rudú chupana leni sinuqui ria leni aca nu ránaha, lania nna acaba nu chi ránaha.

<sup>24</sup> Larcala nna rpeale, iyába bixa rinnabale gansi chi rinnele leni Tata Do Iyyabaaha guadíbale nua, ladiba ria tsitsi lele Ben-na.

<sup>25</sup> Gansi chi rinnele leni Tata Do Iyyabaaha, gualdhí elha xen lasi gue bixa uxacale leni nuxa benni, qui anáchu nna dhi Tata guele Benni do iyyabaaha elha xen lasi gue ca tulha guele.<sup>26</sup> [Cumu gansi bittuba ridíle elha xen lasi nna niguaba Tata guele Benni do iyyabaaha bittu dhie elha xen lasi gue ca tulha guele.]

### **Rigu'ubia ca nu lo gue ca nu Israel dhacana lo Jesús**

(Mt. 21:23-27; Lc. 20:1-8)

<sup>27</sup> Atti chi besincabi Jerusalén, níaba requi Jesús lhe'eli'a gue yotuha. Ca bixxudi anca nu lo gue adí ca bixxudiha lencana ca nu rule'e nu rá lo ca ley boca'ana Moisés lhe ca nu teru elha rieni gueni gue ca benni Israel lhe ubigattecacana lo Benniha.<sup>28</sup> Nianna unnaba tisattecacana rácate:

—¿Bi elha rinnabia rapalu qui runlu aná? ¿Nú betena elha rinnabia lenlu qui unlu nu runlu na?

<sup>29</sup> Jesús becabittebe guecani re cana:

—Gansi güecabile quia gue nu innába tisa le nna anáguaba neti ecabiguaba guele quixxi'atia le nuxa betena elha rinnabia quia qui

runia nu runia ni.<sup>30</sup> ¿Nú udhelhana Juan ugadibi benni inda? ¿Si Tata Do Iyyabaaha aca? ¿Si ca benni se'e yies lo yu-ni aca? Gualecabi quia.

<sup>31</sup> Lacana nna uyu'uttebacana unne len loescani, nianna rácana:  
—Gansi ecabiri innári: “Tata Do Iyyabaahaba udhelhe bi'iniha”, lania nna innáttebunna: “¿Biacala bittu güia lele nu rá bil'iniha ganna?”<sup>32</sup> Bittuguaba aca innári dequi ca benni se'e yies lo yu-niba udhelhacana bil'iniha.

Lacana nna rasbaquinna lo ca benni, cumu iyába ca benni rácana qualíba uca Juan ttu profeta gue Tata Do Iyyabaaha.<sup>33</sup> Laniala nna becabicana gue Jesús rácane:

—Bittu yutu.

Benniha nna becabie re cana:

—Anáguuba neti bittuguuba quixxi'aya nuxa betena elha rinnabia quia qui unia nu runia-ni.

### Ejemplu gue ca unbiyuu lä du ta leni ureni sina umpaníha lo ttu yu

(Mt. 21:33-46; Lc. 20:9-19)

**12** Jesús udulottebe utixxi'e ttu ejemplu, re cana:

—Udo ttu unbiyuu udabi ca ya besuli lo yu guebiha, atti benttebabí nua curralli. Nianna ulequittebabí ttu xieru atta idhícana ca besuliha. Benguabi ttu nu yadha anca attiba yo'o qui tsopi nu gapa lo yuha iqui nua qui gapana ca ya besuliha. Bi'ini beaca guebi lo yuha nna betettebabí lo yuha leni ca nu cuencana nua umpanía. Labi nna biríattebabí diabi idittu lhe'e attu yiesi subi.<sup>2</sup> Atti chi bisía sá exuu besuli betee lo yuha nna udhelhatteba benni beaca guebi lo yuha ttu benni riben sina guebiha tsiana sayúna ca nu reni umpanía lo yuha, qui utecana nu ralha bi'iniha dhibi.<sup>3</sup> Ttiaca ca nu reni umpanía lo yuha nna bedaxxulacana unnuha begüeecana, atti bedhelhacan na sunttebancana.<sup>4</sup> Bi'ini beaca guebi lo yuha nna bededhelhattebabí attu benni riben sina guebiha, edeyyana sadiyúna ca nu ribeni umpanía lo yuha. Ca unnuha nna ulha'alacana iqui nua leni iyya, bedhaca disacan na lhe.<sup>5</sup> Bi'ini beaca guebi lo yuha nna bededhelhattebabí attu nu güia, ttiaca ca nu ribeni umpanía lo yuha nna bettilacan nua. Dequila nna bededhelhabí adí nu güia, ttulhe ca nua nna begüeecana, adí ca nua nna betticana.

<sup>6</sup> 'Bi'ini beaca guebi lo yuha nna a sunruba xi'inbi nu raca xxattinbi gueniha bittu chi udhelhabi. Lenla nna udhelhabi nua, cumu raquinbi ga güeyyaba lecani unnuha de raca nua xi'inbi. <sup>7</sup> Ttiaca ca nu riben umpañía lo yuha nna rátteba loescani: "Unní ancana nu eya'anna lo yu-ni. Gualtá uttiri na, lania nna guebari aca lo yu-ni." <sup>8</sup> Nianna bedaxxuttebacana uncuitiha betticana, atti ueleattebacana nua guachu'unacan na ro'o yu atta te besuliha.

<sup>9</sup> Lebi'i nna:

—¿Bi rquinle uni benni beaca guebi lo yu atta te besuliha? Bi'iniha etababi ettelhuxabi ca nu reni umpañía lo yuha. Lo yuha nna dhibi nua utebi umpañía len ca benni subi.

<sup>10</sup> Lebi'i nna:

—¿Si bittuba chi belabale lo ca sitsi gue Tata Do Iyyabaaha atta rá?:  
Iyya nu ulu'u ni'a ca benni rucoa ca yo'o-na,  
unnuha la beacana iyya nu ribe rideñ tsitsina yo'o.

<sup>11</sup> Benni bananie ri-naba benie raca aní.

Unní ancana ttu nu runna eban leri.<sup>a</sup>

<sup>12</sup> Ca bixxudi anca nu lo lencana ca nu rule'e nu rá lo ca ley boca'anaha Moisés lhe ca nu teru elha rieni gueni gue ca benni Israel lhe uxacattebacana udaxxucana Jesús, cumu guadúba lecani labacan nua rutáni benniha len ejemplu unnee. Ttiaca cumu rasquinna lo ca benni se'e nía, nuarca boca'an chibacana Jesús, nianna güequittebacana deyyacana.

### Rinnaba tisacana Jesús gansi gua dica quixacana belhi nu deyya Roma

(Mt. 22:15-22; Lc. 20:20-26)

<sup>13</sup> Lenla nna udhelhattebacana ttu chupa ca fariseo, leni attu chupa ca benni denoo nu rinnabia lá Herodes atta do Jesús, qui un ca nua ibixxi Jesús innee ttu tisa leni nu dhacana udelhiyyacane.

<sup>14</sup> Ca unnuha nna güiattebacana rácane:

—Maestro, ri'itu nna yutu lu nna läga run lelu, bittuguaba rasinlu gue cadiga bi inná benni lhe cumu lu nna läga rugüialu ttixa anca ttu ttu ca benni, sinuqui gualíbinlu rule'ebalu lhixxa suba gue gaxasná raca le Tata Do Iyyabaaha tse'e benni. Nnanna nna

---

<sup>a</sup> 12:10-11 Salmo 118:22-23

utixxi'l a sanguin ri'itu, ¿si guaga'ana quixari len güequixa belhi nu deyya atta do nu rinnabia do lhe'e yiesi Roma? ¿Si quixartu aca? ¿Bitturba quixatu aca?

<sup>15</sup> Ttiaca Jesús yuxabe ni lo ni tisaba rá ca nua anía. Lee nna ráttebe cana:

—¿Biaca runle ibixxia innea ttu nu uni qui dhale udelhiyyale neti? Gualunna ttu belhi qui ugüiaya na.

<sup>16</sup> Lacana nna betetteba cana ttu belhi len Benniha. Lee nna ráttebe cana:

—¿Nú lo unná du lo belhi-ni? ¿Nú beaca láni nu dia lo unná lhe?

Lacana nnabecabicanarácana:

—Gue César nu rinnabia do Roma.

<sup>17</sup> Laniala nna rá Jesús cana:

—Gualugüeba nu rinnabia-na nu ralhana dhína, gualugüeguaba Tata Do Iyyabaaha nu ralhe dhie lhe.

Lacana na rebanbaquinna gue atti becabí Benniha guecani.

### **Jesús rixxi'e gue bixa aca len ca benni yatti-na**

(Mt. 22:23-33; Lc. 20:27-40)

<sup>18</sup> Lenla nna ubigatteba ttulhe ca benni saduceo ca nu rácana dequi läga gualí reacani ca nu yatti-na, guannaba tisacana Jesús, rácane:

<sup>19</sup> —Maestro, lo sitsi bodha'ana Moisés len ri'itu nna rá, gansi ttu unbiyuu chi betsá náni gattina, lana nna nuttu xi'inni use'e leni nuila gueniha, betsí unbiyuu uttiha nna daa loni edína nuila bidabiha qui anáchu nna ca xi'inni tse'e len nuilaha nna acacana attisiba xi'ini betsini chi uttiha. <sup>20</sup> Ttu libe nna use'e gasi betsí ca unbiyuu. Betsí xen guecaniha nna betsátteba náni, ttiaca uttittebana, niba ttu xi'inni bittu bisía. <sup>21</sup> Betsí berupa guecaniha nna betsátteba náni len nuila bidabiha, ttiaca unnuha nna bedeattiguabana, nuttuguuba xi'inni bese'e len nuilaha. Aníaguaba guaditee betsí beyonna guecaniha. <sup>22</sup> Iyába gasicana guatecana anía, niba ttuna lä bese'e xi'inni len nuilaha. Dequide nua nna uttiguaba nuilaha. <sup>23</sup> Gansi chi bisía sá eyacani ca benni yatti-na, ¿núla delo gasi ca unbiyuuhaca nuilaha latselani? Cumu iyába gasicana betsá nácani len nuilaha.

<sup>24</sup> Laniala becabí Jesús re cana:

—Lebi'i nna läga gualínle gue nu rulaba lele-na, cumu läga radú lele gue nu rá lo ca sitsi gue Tata Do Iyyabaaha, niguaba gue

elha ra xxen le gue Ben-na lhe.<sup>25</sup> Atti isía sá eyacani ca benni yatti-na, ca unbiyuu-na lhe ca nuila-na lhe lärga dica utsá nácani, lä uterguabacana ca xil'inquinna qui utsá nácani lhe cumu attiba anca ca ingeli se'e iyyabaaha eyacacana.<sup>26</sup> Ttiaca gue gansi güeyacani ca benni yatti-na, lebi'i nna ¿si littuba chi belabale lo ca sitsi bodha'ana Moisés len ri'i? Lo ca sitsi-na rixxi'a bixa rá Tata Do Iyyabaaha Moisés atti unnee lhe'e bibu riteha re: "Neti anca Tata Do Iyyabaa gue Abraham lhe gue Isaac lhe gue Jacob lhe."<sup>a</sup><sup>27</sup> Tata Do Iyyabaaha läga anque Dios gue ca benni yatti-na, Ben-na anque Dios gue ca benni bani-na. Larcala lebi'i nna tsa läga yule gue nu rále-na.

### ¿Nú ca ley gue Tata Do Iyyabaaha racaru duelha dho tisa guee?

(Mt. 22:34-40)

<sup>28</sup> Ttu ca nu rule'e nu rá lo ca ley boca'ana Moisés, bieninna nu rá Jesús ritilha tise len ca saduceo. Lana nna ute deenna tseeba chi becabí Benniha gue ca nua, ubigattebana unnaba tisana Benniha ráne:

—Delo iyá ca ley boca'ana Tata Do Iyyabaaha leni Moisés, ¿nú ca ben-na racaru duelha dho tisa guee?

<sup>29</sup> Jesús becabittebe gueni re na:

—Ley nu racaru duelha dho tisa guee nna anque tisa rá:  
"Gualiyienini, lebi'i benni Israel, Tata Do Iyyabaaha Benni bananie ri anque Dios gueri, sunruba Ben-na anque Benni bananie ri.

<sup>30</sup> Aquinlu gue Tata Do Iyyabaaha Benni bananie lu itú iqui itú lelu, leni itúxea lastoolu lhe leni itú elha rieni guelu lhe leni itú fuerza guelu lhe".<sup>b</sup> [Ley-na anque benni racaru duelha dho tisa guee.]

<sup>31</sup> Ley berupaha nna anque attiba benni: "Aquinlu gue ca benni attiba raquinlu gue la luba."<sup>c</sup> Tsa lärga birua attu ley te racaru duelha dho tisa guee attichula chupa ca ley-ni.

<sup>32</sup> Nu rule'e nu rá lo ley boca'ana Moisés, becabittebana rána:

—Tseeba becabili, xa Maestro. Gualíbinlu nu rálha, tturba Tata Do Iyyabaaha do, lärga nurua attu do dequide Ben-na.<sup>33</sup> Aquinri gue Tata Do Iyyabaaha itú iqui itú leri lhe leni itú lastoori lhe leni itú elha rieni gueri lhe leni itú fuerza gueri lhe aquinri gue ca

<sup>a</sup> 12:26 Éxodo 3:6

<sup>b</sup> 12:29-30 Deuteronomio 6:4-5

<sup>c</sup> 12:31 Levítico 19:18

benni attisiba ri'iba nua lhe ancana nu rerla bala'ana lo Tata Do Iyyabaaha attichula iyába ca úna lhe ca bela gue ca nimala ratti qui rite lo becoa gue Ben-na.

<sup>34</sup> Atti biyú Jesús tseeba becabí nua leni elha ríeni nna ráttebe nua:

—Läga bicaga reasa qui acalu benni sela ca benni rinnabia Tata Do Iyyabaaha.

Bedá lania nna lärga nurua beaxinna innába tisana Benniha.

### **¿Nú benni nua datía David?**

(Mt. 22:41-46; Lc. 20:41-44)

<sup>35</sup> Atti rule'eni Jesús ca benni se'e lhe'eli'a gue yotuha nna ráttebe cana:

—¿Tti modu rá ca nu rule'e nu rá lo ca ley boca'ana Moisés dequi Cristu anque benni datía David bi'ini uca nu unnabiah? <sup>36</sup> Inqui la laba David unnebi ca tisa bete Espíritu gue Tata Do Iyyabaaha rábi:

Tata Do Iyyabaaha re Cristu Benni bananie neti:

“Ni udo daca lhuitta derechu quia,  
axta liba unia aca ca nu lä raca uyúcan lu-na  
nu udú ni'alu iquicani.”<sup>a</sup>

<sup>37</sup> Inqui la Davidba rábi: “Cristuha anque Benni bananie neti, ganna anía anca, ¿tti modu anca Cristuha benni datía David?”

Ixeru ca benni se'e nía. Lacana nna itú iqui itú lecani rudo nagacani gue Benniha.

### **Jesús rudianni loe ca nu rule'e nu rá lo ley boca'ana Moisés**

(Mt. 23:1-36; Lc. 11:37-54; 20:45-47)

<sup>38</sup> Jesús bele'ettebanie ca benni se'e nía re cana:

—Gualudo cuidadu qui lä unle atti run ca nu rule'e nu rá lo ca ley boca'ana Moisés, cumu ca unná nna re'o lecani tsequicana ucu xo tuni guecani qui ule'e dequi ancacana benni ra xxeni leni, radi lecani gá benni cana padiuxi len respeto lhe'e ca atta raca ca i'iya-na lhe <sup>39</sup> tsitsiba ridá lecani cuiacana lo ca xxila ga'ana tseeru se'e lhe'e ca yo'o atta rudhetiri ca tisa gue Tata Do Iyyabaaha lhe

---

<sup>a</sup> **12:36** Salmo 110:1

cuiacana atta ga'anaru tsee lhe'e atta raca laní lhe. <sup>40</sup> Güeaniba rigúacana ca yo'o gue ca nuila bidabi-na, nianna nilo ni tisaba isáru rise'ecana rinnecana leni Tata Do Iyyabaaha qui ule'e lo dequi ancacana benni runi nu anca tsee lo Ben-na. Larcala nna ttu elha disa xeni ugüe Tata Do Iyyabaaha cunná atti adí benni.

### **Ttu nuila bidabi ulu'una iyába belhi gueniha úna**

(Lc. 21:1-4)

<sup>41</sup> Ttu libe nna udo Jesús lhe'eli'a gue yotuha gaxxaba atta se'e ca nu rigu'u ca benni úna lhe'ecaniha. Rugüie gue ca nu rigu'u belhi lhe'e ca nua. Ixe ca benni te guecani rigu'ucana xxeni belhi. <sup>42</sup> Nianna bisía ttu nuila bidabi nu bittu te gueni, ulu'una lhe'e ttu ca unnuha chupa ca belhi ca nu bittu tte lidhacani te. <sup>43</sup> Jesús beaxittebe ca benni rudheti ca tisa rule'e, nianna re ca bi'iniha:

—Neti nna gualíbatia rpea le, nuila bidabi-ni nu bittu te guen-nala bete xxenru atti adí ca nu rigu'u belhi lhe'e atta ru'u úna-na. <sup>44</sup> Cumu iyába ca unná rutecana sunruba nu rexxa guecani, ttiaca nuila-ni nna lä caa gueni nna iyába nu dica aca bannahä betena.

### **Jesús rixxi'e isía sá ise'e lo yotu do Jerusalén**

(Mt. 24:1-2; Lc. 21:5-6)

**13** Atti chi bería Jesús lhe'eli'a gue yotuha nna unnetteba ttu ca benni rudheti ca tisa rule'e rábi Benniha:

—¡Maestro, begüiarga! ¡Análirba de anca ca iyya cua-na, analirba de tsee ga'ana ca yo'o-na lhe!

<sup>2</sup> Jesús becabittebe re:

—Ca yo'o elha rilenlu sia-na, iyárechaba ca unná ise'e lo. Ni ttu ca iyya coa ca unná lä eya'anru lä itapaba iqui loescani.

### **Nu aca deoba lhuxa yies lo yu-ni**

(Mt. 24:3-35, 42-44; Lc. 21:7-36; 17:22-24)

<sup>3</sup> Atti do Jesús lo lhilhi nu te láni Atta Daa Ca Ya Olivu do ttu ladu gue atta do yotuha nna sigába unnaba tisa Pedro lenbi Jacobo lhe Juan lhe Andrés lhe rácabi Benniha:

<sup>4</sup>—Utixxi'en ri'itu, ¿núca aca nu ralha? ¿Bi aca qui ule'e lo dequi chi deoba isía sá aca iyá nu ralha?

<sup>5</sup> Jesúis, becabie re:

—Gualudo cuidadu qui nuttu nu dhana dhi yienle. <sup>6</sup> Cumu ixe ca nu isía uncana dequi ancacana neti, nianna innácano: “Neti nua Cristu.” Ixeru benni dha ca nua dhiyiecana.

<sup>7</sup> Lebi'i nna atti unale chi ritilha len loesi ca yiesi, chi daa tisa itilha len loesi ca yiesi lhe bittu gasinle, cumu labíaba aca aná. Ttiaca läga chi bisía sá lhuxa yies lo yu-ni. <sup>8</sup> Cumu ttu yiesi xení leni attu yiesi xení itilha len loescani, ttu nu rinnabia leni attu nu rinnabia itilha len loescani. Gatti laduba gue yies lo yu-ni ixúxxatta, aca ubina lhe. Ttiaca iyába unní ancana sunruba nu daneru gue elha disa nu chi daba uyú ca benni se'e yies lo yu-ni.

<sup>9</sup> Lebi'i nna gualdo cuidadu, cumu udaxxu ca benni le sase'ecan le lo ca uxtisi-na. Ca unná nna quincan le lhe'e ca yo'o atta rudheti ca benni Israel ca tisa gue Tata Do Iyyabaaha. Lo ni'a quia nna ichecanle lo ca nu lo gue ca uxtisi-na, lo ca nu rinnabia xení-na lhe. Aníaliba nna qui aca quixxi'enle ca nua ca tisa quia-ni. <sup>10</sup> Ttiaca antisla isía sá lhuxa yies lo yu-ni, labíaba quixxi'ani ca benni iyárecha ca benni se'e lhe'e ca yiesi se'e itúba yies lo yu-ni ca tisa tsee rixxi'a gue gaxasná rinnabia Tata Do Iyyabaaha. <sup>11</sup> Gansi chi bedaxxu ca benni le qui sase'ecan le lo ca uxtisi-na, bittu ichacha iquile gue bixa innále. Gualnneba ca tisa ute Tata Do Iyyabaaha len lebi'i la uraha, cumu läga lebi'i nua innee, Espíritu gue Tata Do Iyyabaahaba Benniha innee. <sup>12</sup> La betsiba ttu benni utena attu betsiniha las ná ca nu uttican na, unnuhaguuba uni ca tata len ca xi'incani lhe ca xi'incaniha nna eyequicana usia lecani ca tata guecaniha, nianna uncana qui gatti ca nua. <sup>13</sup> Lebi'i nna iyába ca benni bitturu aca uyúcan le lo ni'a quia, ttiaca benni dhana dhu tsitsina lo neda gue Tata Do Iyyabaaha axta atti isía sá gattina, unnuha liba lhána bittu tsia nittina.

<sup>14</sup> Larcala nna ca nu ulabacana ca tisa dia lo ca sitsi-ni, uncana duelha qui sadú lecani bixa dia le nu rá atti re: Atti ilenle aca ttu nu satsa atta bittu dica acana, gue nu satsaha nua utixxi'a profeta Daniel. Unnuha nna acana atta bittu dica acana. Lania nna ca nu se'e lo yu te láni Judea-na, uxunnicana tsiacana ca i'iyattoo-na. <sup>15</sup> Nu do iqui yo'o gueniha nna bittu aquinna eyadina, lä sata'aguabana lhe'e yo'oha qui saleana bixa reasinna. <sup>16</sup> Nu requi

ranchu nna bittu eyyana lhe'e lisniha qui saxína gabana gueniha. <sup>17</sup> ¡Carusi'iru ca nuila nuja xi'incani lania, ca nuila deni unto rasi xisi lhe! <sup>18</sup> Gualinnaba lo Tata Do Iyyabaaha qui bittu saxxína isía sá atti uxunnileha tiempu ribe beyya. <sup>19</sup> Cumu lania nna anca ca nua ca sá atti uyúxxatta ca benni elha disa. Desdeba atti ben Tata Do Iyyabaaha yies lo yu-ni axta nnanna lägabi loesi elha disaha chi biyú benni, bitturguaba uyú benni attu elha disa loesi unnuha lhe. <sup>20</sup> Gansi Tata Do Iyyabaaha bittuba odatsie ca sá atti uyúxxatta benni elha disaha, ni ttu benni bittu dhana lhána lo elhuttiha. Ttiaca lo ni'a gue de runrube lhá ca benni chi becuae anca guee, nuarca odatsie ca saha.

<sup>21</sup> 'Lania nna gansi nuxa iríana gán le: "Gualgüiarga, ni Cristuha du nii", o innána: "Gualgüiarga, ni Cristuha du na", lebi'i nna bittu tsia lele gue nu inná anía. <sup>22</sup> Cumu ixe ca benni iría innácana dequi labacana nua anca Cristu, iría ca nu inná dequi ancacana profeta gue Tata Do Iyyabaaha lhe. Lacana nna uncana ixeru ca milagru, unguabacana ilen benni ca nu uni ebanin ca benni lhe. Leni ca unnuha nna dhi yiecanca ca benni. Axtaba ca benni chi becuae Tata Do Iyyabaaha, un ca nua dhi yiecanca. <sup>23</sup> Larcala nna gualudo cuidadu, cumu desde nnannali chi rixxi'atia le gue iyá nu aca.

<sup>24</sup> 'Lania nna dequide tte ca sá atti uyú ca benni se'e yies lo yu-ni elha disaha nna echulhatteba lo tatubisa-na, lo nanto beo-na lhe bitturu cu'una xieni. <sup>25</sup> Ca beli sia lo bea-na, iyinnabacana lo yu, iyába ca nu ra xxeni leni se'e lo bea-na ixidicana lhe. <sup>26</sup> Lania liba nna iláni ca benni se'e yies lo yu-ni neti Benni unbiyuu daa iyyabaaha dedaaya lhe'e ca bea-na anca benni ra xxeni leni, ru'u xieni ga'ana tsee quia lhe. <sup>27</sup> Nianna idhelhatteba ca ingeli quia-na saxícana iyárechaba ca benni chi becuae Tata Do Iyyabaaha anca guee se'e itapa laduba gue yies lo yu-ni. Desdeba ca benni se'e axta atta riluxa yies lo yu-ni saxícana, axta ca benni se'e atta ridú ni'a iyyabaaha lhe.

<sup>28</sup> 'Gualudheti ejemplu gue ya igu-na: Atti rilenle chi re re'eni ca lo xiquini, chi re'eyu lhaga ga'a gueni lhe lebi'i nna ritedaattebinle chi dedaa tiempu iyya. <sup>29</sup> Anágua lebi'i, gansi chi bilenle aca iyába ca nu chi ria-ni, lania nna chi yule chi daa ribiga esíaya neti Benni unbiyuu daa iyyabaaha. <sup>30</sup> Neti nna gualibatia rpea le, iyába nu ria-ni aca, antisla lhuxa ca benni se'e-ni. <sup>31</sup> Lo bea-na lhe yies

lo yu-ni lhe lhuxabacana, ttiaca labíaba saxxína aca nu rá ca tisa quia-ni.

<sup>32</sup> Ttiaca gue bixa sá lhe gue bixa ura aca unnuha lhe tsa läganu yu, ni ca ingeli se'e iyyabaaha lhe niguaba neti benni anca Xi'ini Tata Do Iyyabaaha lhe bittu yua. Sunruba Tata Do Iyyabaaha yue.

<sup>33</sup> Larcala, lebi'i nna satía gualtse'e ubeda, tsitsi gualtse'e lhe gualne len Tata Do Iyyabaaha lhe cumu läga yule nucaxa isía sá atti aca anía. <sup>34</sup> Lania nua aca attiba uca len ttu unbiyuu chi ridána diana idittu attu yiesi subi. Lana nna boca'anattebana yo'o gueniha las ná ca nu riben sina gueniha. Ttuttuba ca nua boca'anna bixa uncana. Nu bodúna gapana ro'o yo'oha nna benna nua mandadu gapa tsitsina ro'o yo'oha. <sup>35</sup> Lebi'i nna bittu tse'e xulhale, cumu attiba anca ca nu upa yo'oha ancale. Ca unnuha nna läga yu ca nua bixa sá esía benni beaca gueni yo'oha, si gansi chi daba raca ela lhe si riloela lhe o si gansi chi uxxá liba ro'o berudiha lhe o si chi daa rani liba lhe. <sup>36</sup> Quini lä ttutterba esíaya nna lania nna ettetti'aya le tele ti'edhile. <sup>37</sup> Nu rpea lebi'i nna unnáguaba rpea iyába adí benni: “¡Gualese'e tsee, tsitsi gualdo cuidadu!”

### Reguila le ca nu lo gue ca nu Israel gaxasná uncana utticana Jesús

(Mt. 26:1-5; Lc. 22:1-2; Jn. 11:45-53)

**14** A chupa ubisaba reasa isía laní nu te láni Pascua, atti ro ca benni Israel ttaxtila nu bittu dia lenna levadura. Ca nu lo gue ca bixxudiha lencana ca nu rule'e nu rá lo ca ley boca'ana Moisés reguila lecani gaxasná uncana qui udaxxucana Jesús. Lacana nna cuentaba uncana xiyya guee dequi benie ttu nu bittu dica unie qui aca utticane. <sup>2</sup> Ttiaca lacana nna rácana:

—Bittu unri aná lhe'e laní-ni qui bittu utsatsari benni.

### Ttu nuila rudona seti rure xixxi iqui Jesús

(Mt. 26:6-13; Jn. 12:1-8)

<sup>3</sup> Atti do Jesús lhe'e yiesi nu te láni Betania, lisi Simón bi'ini teequinna lábi nu uca lepra. Laca doe go etta nna bisíntteba ttu nuila nojana ttu cantito ancana leni ttu iyya tsee nu te láni alabastro, ta'a seti rure xixxi daca yaxi lhe'eni. Seti rure ixixxiha nna ancana gue ttu yaga nu te láni nardo. Nuilaha nna udholttebana ro'o canti atta

ta'a setiha, atti bedottebana nua iqui Jesús.<sup>4</sup> Ttulhe ca nu sia nía nna bisa'attebaquinna. Nianna rátteba loescani:

—¿Biaca güia latti seti nu rure ixixxi-ni?<sup>5</sup> Tseerla ttirca bito'o seti-na. Bennarlacana belhi gue tsunna gayua (300) ubisa sina gueonna, qui uteri leni ca benni bittu te guequinna.

Lacana nna riguisalacana nulaha.

<sup>6</sup>Ttiaca Jesús ráttebe:

—Nan do gueonna. ¿Biaca unná risále? Nu beni nuila-ni len neti, ancana ttu nu tsee.<sup>7</sup> Cumu ca benni bittu te guequinna satíaba tse'e ca unná len lebi'i. Larcala nna guacaba ugüele ca unná nu reasaquinna nucaxaba raca lele. Ttiaca neti nna läga aní dhoa len lebi'i ttu dia lii.<sup>8</sup> Nuila do-ni nna benba unná len neti bedaa nu udábana benna. Cumu chi begu'u gana neti seti rure ixixxi-na qui chi do tseea igatsia gansi chi uttia.<sup>9</sup> Neti nna gualíbatia rpea le, gaxaba lhe'e ca yiesi se'e itúba yies lo yu-ni atta quixxi'a ca benni ca tisa quia-ni, quixxi'aguaba ca benni nu beni nuila-ni qui exxale benni nu benna.

### **Judas reguila leni gaxasná unna utena Jesús las ná ca nu utticana Benniha**

(Mt. 26:14-16; Lc. 22:3-6)

<sup>10</sup>Judas Iscariote, ttu ca benni tsilinu rudheti ca tisa rule'e Jesús, güiattebana atta se'e ca nu lo gue ca bixxudiha guanne lenna ca nua gue gaxasná unna utena Jesús las ná ca nua.<sup>11</sup> Atti bina ca bixxudiha nu rá nua nna be'o tsitsia lecani. Laniala nna begüeecana tisa utecana belhi leni Judas. Lana nna udulottebana beguila leni gaxasná unna utena Benniha las ná ca nua.

### **Jesús lenie ca benni rudheti ca tisa rule'e roque rse gue laní Pascua**

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup>Primerba sá gue laní Pascua atti ro ca benni Israel ttaxtila nu bittu levadura dia lennaha, lania nua rutticana carne'e nu ga'ana gattiha qui rocana laní Pascua. Ca benni rudheti ca tisa rule'e Jesús unnaba tisattecababi rácabi Benniha:

—¿Gonni raca lelu tsiatu sasía tseetu nu go rseri laní Pascua-ni?

<sup>13</sup> Laniala nna udhelhe chupa ca benni rudheti ca tisa rule'e re ca bi'iniha:

—Gualtsia lhe'e yies-na. Na eti'ale ttu unbiyuu denojana ttu re'e deta'a inda lhe'eni. Lebi'i nna sanottele na. <sup>14</sup> Atta eta'a tua nna gualgásitte nu beaca gueni yo'oha: “Aní rá maestruha: ¿Gonni do yo'o atta go rsea gue laní Pascua-ni, lania ca benni rudheti ca tisa rule'a?” <sup>15</sup> Unnuha nna gule'ebinna le ttu yo'o chupa coa xeni, lhe'e yo'o nu do berupa coa chi do tsee-na lhe chi yapa lhe'eni lhe. Nía gualusía tsee iyába nu eyasinri gue rseri gori laní Pascua-ni.

<sup>16</sup> Ca benni rudheti ca tisa rule'e nna biríattebacabi diacabi lhe'e yiesiha. Lacabi nna guattí'abacabi iyába attiba rába Jesús. Nianna benttebacabi rse gue laní Pascua nía.

<sup>17</sup> Ucaba ela nna bisíntteba Jesús nía lenie ca bi'ini tsí'inu rudheti ca tisa rule'e. <sup>18</sup> Atti chi siacabi ro'o mexaha go rse nna unnetteba Jesús re ca bi'iniha:

—Neti nna gualíbatia rpea le, nuxa ttule lebi'i ca nu ro rse lania-ni utele neti las ná ca nu utticana neti.

<sup>19</sup> Ca bi'iniha nna use'e si'ittebacabi. Nianna, udulottebacabi ttuttu ttuttubacabi unnaba tisacabi rácabi Benniha:

—¿Si läba netiba nua?

<sup>20</sup> Jesús becabitibe re:

—Ttu nu sel a lhe'e delo tsí'inule niba nua. Unnuha nua rugutuna ttaxtila gueni lhe'e platu quia. <sup>21</sup> Gualíba, neti Benni unbiyuu daa iyyabaaha nna labíaba satea iyába nu chi ga'ana lo ca sitsi gue Tata Do Iyyabaaha. Ttiaca, ¡carusi'iru nu utena neti las ná ca nu utticana neti! Tseerla salíana nua ttirca bittuba ulina.

<sup>22</sup> Laca siacabi go nna bedaxxutteba Jesús ttu ttaxtila. Dequide begüee xquixaru Tata Do Iyyabaaha, ulha'attebe Benniha begüee ca bi'ini rudheti ca tisa rule'e. Nianna re ca bi'iniha:

—Gualgo ben-ni. Cumu ben-ni anque cuerpu quia.

<sup>23</sup> Lenla nna bedaxxuttebe ttu copa ta'a vinu lhe'eni. Dequide begüee xquixaru Tata Do Iyyabaaha nna betettebe copaha leni ca bi'ini rudheti ca tisa rule'e. Iyába ca bi'iniha u'uyacabi vinuha.

<sup>24</sup> Nianna re ca bi'iniha:

—Benni anque reni quia. Len benni eya'an tsitsi ca tisa cubi chi begüee Tata Do Iyyabaaha len ca benni. Benni nua ilali qui lhá ca benni bittu tsia nitticana. <sup>25</sup> Neti nna gualíbatia rpea le, bedá nnanna

bitturu i'iya inda xixxi gue besuli-na attu libe, axta liba gansi chi bisía sá atti i'iya vinu cubi atta rinnabia Tata Do Iyyabaaha.

**Rixxi'a Jesús Pedro bittu dhi ro'obi gualí anca bienbi benniha**

(Mt. 26:30-35; Lc. 22:31-34; Jn. 13:36-38)

<sup>26</sup> Dequide bilhaque ttu salmo nna diattebaque lo lhilhi Atta Daa Ca Ya Oliviha. <sup>27</sup> Jesús ráttebe ca bi'iniha:

—Iyábale udhá iquile neti nnela, cumu anába chi dia lo ca sitsi gue Tata Do Iyyabaaha atta rinne benniha re: “Neti nna uttia benni ruyú ca carne'eha, lania nna iyába ca carne'eha gatti laduba udaxxucana.”<sup>a</sup>

<sup>28</sup> Ráguba Jesús:

—Ttiaca dequide eyacatia nna lola neti nnerua lole tsiaya daca lo yu te láni Galilea.

<sup>29</sup> Laniala nna rá Pedro Benniha:

—Masquiba udhequi iyá ca benni se'e-ni lu, neti nna läga udhequia lu.

<sup>30</sup> Jesús becabie re Pedro:

—Neti nna gualíbatia rpea lu, nnela antisla erupa libe ixxá ro'o berudi-na, lu nna chila beyonna libe bittu ridí ro'olu gualí anca bienlu neti.

<sup>31</sup> Ttiaca Pedro nna udú ditibabi rábi:

—Masquiba gattia len cuinalu, neti nna dhiba ro'a gualíba ancabiati lu.

Aníaguuba rá iyábacabi lhe.

**Jesús rinnee leni Tata Do Iyyabaaha atta te láni Getsemaní**

(Mt. 26:36-46; Lc. 22:39-46)

<sup>32</sup> Bisínba Jesús lenie ca benni rudheti ca tisa rule'e ttu re atta te láni Getsemaní. Nianna re ca bi'iniha:

—Ni tte gualcuia, laca neti nna tsiaya sannea len Tata Do Iyyabaaha.

---

<sup>a</sup> 14:27 Zacarías 13:7

<sup>33</sup> Atti diatteba lenie Pedro lhe Jacobo lhe Juan lhe. Lee nna udulottebe bedú si'ina lee, bedú guatexxattana lee lhe. <sup>34</sup> Nianna re ca bi'iniha:

—Lastooa-ni nna chi rudú si'ixxattan nna guannalu chitteba daa elhuttia loa. Ni tte gualtse'e. Bittu ga'adhire.

<sup>35</sup> Nianna biriestteba Jesús ttu ro'o, atti bedútteba xibie axta liba binna loe lo yu. Lee nna unnetteba lenie Tata Do Iyyabaaha unnabe lo Benniha gansi bittuba dica utsiatte elha disa chi daa uyúe. <sup>36</sup> Lee nna re:

—Tata xisto quia, lu nna iyába raca guelu runlu. Betsiattachi neti lo elha disa daa uyúa-ni. Ttiaca läga ria aca nu raca lasia, sinuqui nu innába cuinalu unnuhaba aca.

<sup>37</sup> Atti bequittebe deyye atta se'e a tsunna ca benni rudheti ca tisa rule'e. Lee nna níaba guattí'e ca bi'iniha tecabi ti'edhicabi. Nianna, ráttebe Pedro:

—Simóni, ¿si tebalu ti'edhilu? ¿Si niba ttu ura bittu událu uchíalu bittu ga'adhilu? <sup>38</sup> Gualebani, bittu ga'adhire. Gualnne len Tata Do Iyyabaaha qui bittu dha nu xxegüiha dhi yien le. Lebi'i nna gua se'ebale uchíale, ttiiaca cuerpu guele-na bittu rdana uchíana.

<sup>39</sup> Lee nna dedheyyattebe attu libe güenne len Tata Do Iyyabaaha, nianna redea dacabe Benniha attu libe nu chi re Benniha. <sup>40</sup> Atti bequie besine attu libe atta se'e ca bi'iniha, níaba guaditti'e ca bi'iniha dedeti'edhicabi cumu de ta'axxatta bisiela locabi. Lacabi nna tsaba bittu bería ni'elhaquinbi bixa innácabi. <sup>41</sup> Atti beyonna libe bequie besine atta se'e ca bi'ini rudheti ca tisa rule'e, nianna ráttebe ca bi'iniha:

—¿Si sna tebale ti'edhile, redí lele lhe? Chi banca ttonába cumu chi bisía ura atti utevana neti Benni unbiyuu daa iyyabaaha las ná ca nu runi nu lä anca tsee-na. <sup>42</sup> ¡Chinca gualchadha, gualtsá! ¡Ni nu utena neti las ná ca nu utticana netiha chi dana!

### Rudaxxucana Jesús

(Mt. 26:47-56; Lc. 22:47-53; Jn. 18:2-11)

<sup>43</sup> Sna duba Jesús rinnee, atti chi bisína Judas ttu nu babaguuba leni ca bi'ini tsí'inu (12) rudheti ca tisa rule'e Benniha leni ixeru benni, dencana espada lhe yaga lhe. Ca unnuha nua udhelha ca nu anca nu lo gue ca bixxudiha lencana ca nu rule'e nu rá lo ca ley

boca'ana Moisés, ca nu teru elha rieni gueni gue ca benni Israel lhe.  
<sup>44</sup> Judas nu utena Benniha las ná ca nua nna chila utixxi'enna ca nua gaxasná unna qui eyonbia ca nua Benniha. Lana nna rán ca nua:

—Benni utsá loa xxaganiha, unnuha nua. Lebi'i nna udaxxuttele na echele na, tsitsi uxxicale na.

<sup>45</sup> Quantusiba bisína Judas atta du Jesús, ráttebana Benniha:

—¡Maestro!

Atti betsátteba loni xxaga Benniha. <sup>46</sup> Laniala nna bedaxxutteba ca nua Benniha qui echecane.

<sup>47</sup> Ttiaca ttu ca bi'ini du len Jesús nía, ulequittebabí espada guebiha uchúbi naga nu riben sina gue bixxudi xeni rinnabiah.

<sup>48</sup> Jesús unnaba tisattebe ca benni se'e nía re cana:

—¿Biaca dale leni espada lhe leni yaga lhe güedaxxu neti attiba ttu ubana? <sup>49</sup> Inqui ttu ttu sába udúa len lebi'i lhe'eli'a gue yotu-na güele'en le nna lebi'i nna bittu bedaxxule neti. Ttiaca iyába unní raca qui saxxína aca nu chi rá lo ca sitsi gue Tata Do Iyyabaaha.

<sup>50</sup> Lania nna iyába ca bi'ini rudheti ca tisa rule'e Jesús bexunnicabi, a tturba Benniha bodha'ancabi nía. <sup>51</sup> Atturu ttu uncuiti guadenorna Benniha, nucuna sunruba ttu lari. Ca nu se'e nía nna bedaxxuttebacana uncuitiha, <sup>52</sup> ttiaca unnuha nna bedhá bixxi iquini lariha, aníaba ttunttuna bexunnina.

### Rutsá du Jesús lo ca nu runi elha uxtisi gue ca benni Israel

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Uchettebacana Jesús guadúcane lo bixxudi xeni rinnabiah. Nianna, bitupatteba iyárecha ca bixxudi anca nu loha nía, lencana iyába ca nu teru elha rieni gueni gue ca benni Israel lhe ca nu rule'e nu rá lo ca ley boca'ana Moisés lhe. <sup>54</sup> Pedro nna idittu liba denobi Benniha, ni uta'ababi lhi'u gue lhe'eli'a gue yo'o lagüii atta do nu anca bixxudi xeni rinnabiah. Labi nna níaba udobi rutsa'abi ro'o teha lenbi ca nu rise'e rapa yo'o lagüiiha.

<sup>55</sup> Ca nu lo gue ca bixxudiha lencana iyába ca nu runi elha uxtisi gue ca benni Israel, tsitsiba reguila lecani bipaxa xiyya uncana gue Jesús qui te ro'ocani utticana Benniha. Ttiaca bittu reselquinna bixa lo ni'a guee. <sup>56</sup> Cumu ixeru ca benni run lecani runcana xiyya gue Benniha, ttiaca läga riría li nu rácanaha, cumu de bitti bittiba anca

nu rácana.<sup>57</sup> Ttu lhecaná nna udulíttebacana ben lecaní bencana xiyya gue Benniha rácana:

<sup>58</sup>—¿Ri'itu nna chi bienintu rinneonni rána?: “Neti nna uttapa yotu ben ca benni se'e yies lo yu-ni, nianna lhe'e tsunna ubisaba nna elhidha attu yotu subi nu bittu ancana nu beni ca benni se'e yies lo yu-ni.”

<sup>59</sup>Ttiaca niguaba leni unnuha bittu guaxxína nu rácana.

<sup>60</sup>Laniala nna udulí nu anca bixxudi xeni rinnabiah lagüi gue ca nu se'e nía unnaba tisana Jesús rána Benniha:

—¿Si bittuba ecabilu bixa innál? ¿Bila rátticabalu gue nu run ca benni se'e-ni xiyya guelu dequi runlu?

<sup>61</sup>Ttiaca Jesús siba uque, tsa läga becabie bixa innee. Laniala nna bedennaba tisa bixxudi xeni rinnabiah Benniha attu libe ráne:

—¿Si lu nua Cristu, Xi'ini Tata Do Iyyabaaha benni anca le'a?

<sup>62</sup>Jesús becabie re na:

—Agu, netiba nua. Lebi'i nna güilabinle neti Benni unbiyuu daa iyyabaaha dhoa daca ladu derechu gue Tata Do Iyyabaaha Benni ra xxeni lee, iláguabinle neti dedaaya lhe'e ca bea daa iyyabaaha lhe.

<sup>63</sup>Lania nna, uchedatteba xo bixxudi xeni rinnabiah de bisa'axxattabinna. Atti ráttebana:

—¿Tsa lärga nurua reasinri quixxi'enna ri gue bixa runi unní?

<sup>64</sup>Cuinaba lebi'i chi bieninle rinne güena gue Tata Do Iyyabaaha leni ca tisa rinnena. Lebi'i nna, ¿bila rále?

Iyába ca nu se'e nía nna bedelha iyyacana Jesús, denua nna ralhaba Benniha gattie.

<sup>65</sup>Ttulhe ca nu se'e nía nna udulottebacana bettu ttu xxencani lo Benniha, lacana nna bedheattebacana loe, atti begüeettebacane, nianna rácane:

—Unne ya'a sanga, ¿núnna begüeen lu?

Ca nu rise'e rapa yo'o lagüiha nna ralhicana gui loe.

### Pedro bittu ridí ro'obi, anca bienbi Jesús

(Mt. 26:69-75; Lc. 22:56-62; Jn. 18:15-18, 25-29)

<sup>66</sup>Pedro nna níaba dubi liree lhe'eli'a gue yo'oha, attirba chi bisína ttu ca nuila riben sina lhe'e yo'o gue nu anca bixxudi xeni rinnabiah. <sup>67</sup>Atti bilen nua Pedro dubi rutsa'abi ro'o teha nna bedútteba nulaha ttulíba begüiana lobi. Nianna rátteba nua bi:

—Anáguba luu denoguabalu Jesús gue Nazaret.

<sup>68</sup> Ttiaca Pedro, läga uxí ro'obi, tse'e lolabi rábi:

—¡Läga anca biatia unná! ¡Bittuguaba yua gue bixunna rálha lhe!

Laniala nna biríabi guadhúbi atta do rita'acana ro'o yo'o lagüiha, attirba chi uxxá ro'o ttu berudi. <sup>69</sup> Nuilaha nna bedeláttebinna Pedro attu libe, nianna udulotteba nua rána adí ca nu se'e nía:

—Unbiyuu du-ni lhe unnáguba selunna.

<sup>70</sup> Ttiaca bedequi dacaba Pedro redenábi bittu anca bienbi Jesús. Sattigarba uca nna redeatteba ca nu se'e nía Pedro attu libe:

—Gualíba, ca unnába selalu. Cumu Galilea guaba beaca laslu, nuarca attiba rinne ca unná rinnelu.

<sup>71</sup> Ttiaca Pedro nna udulottebabí rábi:

—¡Tata Do Iyyabaaha rudettia, läganu unbiyuu rudettile na ancabiatiat! Cuina Ben-na unie bixa satea gansi run lasia.

<sup>72</sup> Unnuhaba rábi dubi, attirba chi berupa libe uresi berudiha. Nianna bexxatteba le Pedro gue ca tisa unne Jesús atti re: “Lu nna chi erupala libe cuesi berudi-na, lu nna chila beyonna libe bittu ridí ro'olu anca bienlu neti.” Atti bexxale Pedro nu rá Benniha nna uresttebabí.

### Jesús rutsá due lo Pilato

(Mt. 27:1-2, 11-14; Lc. 23:1-5; Jn. 18:28-38)

**15** Atti chi goaniha nna bitupatteba ca nu runi elha uxtisi gue ca benni Israel, ca bixxudi anca nu loha lhe ca nu teru elha rieni gueniha lhe ca nu rule'e nu rá lo ca ley boca'ana Moisés lhe qui unnecana gue bixa anca nu uncana leni Jesús. Nianna bexxicattebacana Benniha, atti uchettebacane guadúcane lo nu rinnabia lá Pilato. <sup>2</sup>Pilato nna unnaba tisattebana Jesús ráne:

—¿Si lu ancalu nu rinnabia gue ca benni Israel-ni?

Jesús becabie re:

—Luba chi rálu.

<sup>3</sup>Cumu de güeä güeaba anca nu runi ca bixxudi anca nu loha xiyya gue Benniha nna, <sup>4</sup>nuarca bedennaba tisa dacaba Pilatoha Benniha redeane:

—¿Si bittuba ecabilu gue ca unná? Begüiarga, análirba de reru xiyya run ca unná guelu.

<sup>5</sup> Ttiaca Jesús tsaba bittu unnee ecabie gueni. Larcala, tsitsiba bebanin Pilato.

### Rinnabiacaña gatti Jesús

(Mt. 27:15-31; Lc. 23:13-25; Jn. 18:38-19:16)

<sup>6</sup> Atti risía laní nu te láni Pascua, Pilato nna rodilána ttu ca benni te lisiyya, rebeabana nu rucueba yiesiha. <sup>7</sup> Lhe'e lisiyyaha te ttu unbiyuu lána Barrabás lenna adí ca nu betti lenna ca benni atti beon nácani lo ca nu rinnabia gue lo yiesiha. <sup>8</sup> Ixeru benni bisíncana unnabacana len Pilato odilána ttu ca nu te lhe'e lisiyyaha, cumu aníaba labina runna ttu ttu ida. <sup>9</sup> Pilato nna becabittebana rána:

—¿Si guarca lele odiláya nu anca nu rinnabia guele-na, lebi'i benni Israel?

<sup>10</sup> Cumu chiba yu Pilato, de lä racaba uyú ca bixxudi anca nu loha Jesús, nuarca guatecana Benniha las náni. <sup>11</sup> Ttiaca ca bixxudi anca nu loha nna betsatsattebacana ca benni se'e nía, qui innábacana leni Pilato ulhána Barrabás. <sup>12</sup> Pilato nna unnaba tisattebana ca unnuha attu libe rán cana:

—Nianna, ¿bila raca lele unia leni nu rále ancana nu rinnabia guele-na, lebi'i benni Israel?

<sup>13</sup> Ca unnuha nna uresi'attebacana rávana:

—¡Betá na lo ya crusi!

<sup>14</sup> Pilato nna rán ca nua:

—¿Biaca nuarca? ¿Bi nu bittu anca tsee beni unní?

Ttiaca ca unnuha nna adílabu uresi'acana rávana:

—¡Betá unní lo ya crusi!

<sup>15</sup> Pilato nna cumu rdacana eya'an tseena len ca benni, nuarca bodilána Barrabás. Dequide chi benna mandadu utín ca soldadoha Jesús, botettebana Benniha las ná ca nu utávana Benniha lo ya crusi.

<sup>16</sup> Ca soldadoha nna uchettebacana Jesús lhe'eli'a gue yo'o lagüiha atta rido nu rinnabia runna elha uxtisi, atti beaxittebacana iyába adí ca soldadoha. <sup>17</sup> Lacana nna begucuttebacana Benniha ttu lari xinaa chulha, nianna ulu'uttebacana ttu corona iqui Benni ancana leni xiqui ya yitsi. <sup>18</sup> Atti udulottebacana uresi'acana ocadiba rávana Benniha:

—¡Xxeni ra lelu, xa nu rinnabia gue ca benni Israel!

<sup>19</sup> Atti rinttebacana ttu iyyaxtila iqui Benniha, rutttutu xxencani loe lhe rudútteba xibicani loe ocadiba runcana dequi rapa cana Benniha respeto. <sup>20</sup> Dequide chi bencana Benniha burla nna utúattebacana lari xinaa chulha nucuquinna Benniha, nianna bogucuttebacane ca xun gueeha. Atti uchettebacane dia lencane qui utácane lo ya crusi.

### Rutácana Jesús lo ya crusi

(Mt. 27:32-44; Lc. 23:26-43; Jn. 19:17-27)

<sup>21</sup> Ttu unbiyuu lábi Simón bi'ini beaca lasbi lhe'esi nu te láni Cirene, dedaabí güiabi ranchu. Labi nua ancabi tata gue Alejandro lhe Rufo lhe. Attiba diabi etebi lo neda atta dia lencana Jesús, bentteba ca soldado duelha guebi ujabi crusi nuja Benniha.

<sup>22</sup> Uchettebacana Jesús ttu re atta te láni Gólgota, (nu dienna innána: Bega Iqui Nu Yatti). <sup>23</sup> Lacana nna begüeettabacana Benniha vinu nu sela nu riria gue tu bibu te láni mirra, ttiaca Jesús läga u'uye nua. <sup>24</sup> Dequide unnuha nna betáttebacana Benniha lo ya crusi, nianna uyu'utteba ca soldadoha bencana ttu nu bele'e lo nuxa ca xo Benniha eyoja ttuttucana.

<sup>25</sup> Ganna merba retin jaa dila nua atti betácana Jesús lo ya crusi.

<sup>26</sup> Betáguaabacana ttu breta iqui crusi atta ta Benniha, nu diaquinna loni bixa lo ni'a gue betácana Benniha lo ya crusi. Lo bretaha nna rá: “Unní ancana nu rinnabia gue ca benni Israel.” <sup>27</sup> Betáguaabacana a chupa ubana lo ca ya crusi len Benniha, ttuna betácana lo ya crusi du daca ladu derechu guee, attu nua nna betácana lo ya crusi du daca ladu rabesa guee. <sup>28</sup> [Anía liba nna guaxxína nu rá lo ca sitsi gue Tata Do Iyyabaaha atta rinne gue Benni anque Cristu atta rá: “Ca benni nna uncana aca Benniha attiba ttu nu runi nu lä anca tsee.”<sup>a</sup>]

<sup>29</sup> Ca nu ritee atta du ya crusi atta ta Jesús nna rudhaca disacane, atti rutttáteba iquicani rácana Benniha:

—¡Anla lu nua rálú dequi uttapalu yotu-na, nianna lhe'e tsunna ubisaba nna elhidhalue attu libe! <sup>30</sup> ¡Lä luba ben sanga gaxasná qui lhálu, beadi tte lo ya crusi-na lhe!

---

<sup>a</sup> 15:28 Isaías 53:12

<sup>31</sup> Aníaguaba runi ca nu lo gue ca bixxudiha, ca nu rule'e nu rá lo ca ley boca'ana Moisés lhe, lacana nna runcana Benniha burla rávana:

—Güenba bodilána adí benni, ttiaca bittu raca gueni gaxasná uni la labana qui lhána. <sup>32</sup> ¡Eyadi sanga benni anca Cristu-na, nu rána ancana nu rinnabia gueri ri'i ca benni Israel, lo ya crusi-na aní lori qui tsia leri-na!

Aníaguaba rudhaca disa ca nu ta lanie lo ca ya crusiha Benniha.

### Jesús ridíe elhutti

(Mt. 27:45-56; Lc. 23:44-49; Jn. 19:28-30)

<sup>33</sup> Desdeba retin ts'i'inu (12) resá bechulha itúba yies lo yu, axtaba retin tsunna ulha. <sup>34</sup> Bisíaba retin tsunna nna uresi'atteba Jesús itú iqui itú lee re:

—Eloi, Eloi, ¿lama sabactani? —Ca tisa-ni nna diacanie innáque: Tata quia do iyyabaaha, Tata quia do iyyabaaha, ¿biaca neti rudhequilu?<sup>a</sup>

<sup>35</sup> Atti bienin ttulhe ca nu se'e nía nu rá Benniha nna ráttebacana:

—Gualudorga nagale, profeta Elíasba bi'l-in-na raxi unná.

<sup>36</sup> Laniala nna bigatteba ttu ca nu se'e nía güiana guadona vinu idí iqui ttu ti'a xila, atti bexxicattebana nua punta ttu iyyaxtila, nianna besigattebana nua ro'o Jesús qui i'kiye nua. Lana nna rána:

—Gualguelha sanga na qui ugüiari gansi güisia Elías ettedilabi-na lo ya crusi-na.

<sup>37</sup> Ttiaca Jesús uresi'attebe idisa, atti uttittebe. <sup>38</sup> Lari nu daa lhe'e yotuha nna biredatteba rulha xeaba lhe'eni, desdeba xequini axtaba xani'ani. <sup>39</sup> Soldado gue Roma nu banani ca soldadoha nu du atta du ya crusi atta ta Jesús, atti bieninna uresi'a Benniha lhe bilenna gaxasná utti Benniha lhe, laniala nna rána:

—¡Gualiba, unbiyuu-naba Benniha anque Xi'ini Tata Do Iyyabaaha!

<sup>40</sup> Ttulhe ca nuila nna idittu liba use'ecabi begüiacabi nu guate Jesús. Lacabi nua lá María Magdalena, Salomé lhe María nan gue José betsi Jacobo nu anca xi'in güexxaru guebiha lhe. <sup>41</sup> Ca nuila-ni nua guanocabi Jesús atti güequie lo yu nu te láni Galilea, betecabi

---

<sup>a</sup> 15:34 Salmo 22:1

nu beasanie lhe. Níaguaba se'e adí ca nuila dia deno Benniha atti die lhe'e yiesi Jerusalén.

### Rigatsi Jesús

(Mt. 27:57-61; Lc. 23:50-56; Jn. 19:38-42)

<sup>42</sup> Atti chi ulha sá bispri gue sá redí le ca benni Israel, atti rose'e tseecana nu ixuuquinna gue sá redí lecaniha, <sup>43</sup> lania nna bebequi reatteba le José bi'ini beaca lasbi lhe'esi nu te láni Arimatea güiabi guayúbi Pilato qui utena Benni yattiha len labi. José ancabi ttu nu ra xxeni leni gue ca nu runi elha uxtisi gue ca benni Israel. Bi'iniha nua doguabi ribedabi isía sá innabia Tata Do Iyyabaaha. <sup>44</sup> Pilato nna bebanlhabinna atti binana chiba utti Jesús. Laniala nna beaxina soldado gue Roma nu banani ca soldadoha qui innába tisana nua gansi gualí chi utti Benniha. <sup>45</sup> Dequide chi utixxi'ani nua na gualíba chi utti Benniha nna, botettebana Benniha len José. <sup>46</sup> Laniala nna guayo'o José ttu lari tsee. Dequide belhidabi Benniha lo ya crusiba nna bottubittebabí Benniha lariha. Nianna, güiattebabí guacatsibi Benniha lhe'e ttu baa nu utenbi do lhe'e ttu iyyattoo. Atti bettulhuttebabí ttu iyya xeni qui bedheabi ro'o beleaha. <sup>47</sup> María Magdalena lenbi María nan gue José, bilábaquinbi gaxa bigatsi Benniha.

### Beacani Jesús

(Mt. 28:1-10; Lc. 24:1-12; Jn. 20:1-10)

**16** Dequide chi ute sá atti redí le ca benni Israel, güiatteba María Magdalena lenbi Salomé lhe María nan gue Jacobo lhe guayo'ocabi ca seti rure ixixxi qui tsiacabi salhu'ucabi Jesús. <sup>2</sup> Dilatte la sá atti redú lo xumanu, chi darba riría tatubisa-na, güiatteba ca nuilaha güennalhi lo baaha. <sup>3</sup> Lacabi nna rinnecabi rá loescabi:

—Güelha, ¿núla nua utsilana iyya yaya ro'o baa-na ganna?

<sup>4</sup> Ttiaca attirba begüiacabi nna chila bisila iyya re ro'o baaha, unnuha nna ancana ttu iyya xeni. <sup>5</sup> Atti uta'acabi lhe'e belea atta uyu'u Jesús, biláttebaquinbi ttu uncuiti dobi daca ladu derechu nucu xo sitsi ttuni guebi. Ca nuilaha nna usttebaquinbi. <sup>6</sup> Uncuitiha nna ráttebabí ca bi'iniha:

—Bittu gasinle. ¿Axxa, Jesús Benni udo lhe'e yiesi Nazaret Benni betácana lo ya crusihä reguilale? Chiba beacani Benniha. Lärga nurua Benniha te-ni. Gualgüiarga atta utixxacana Benniha.  
<sup>7</sup> Gualeyya gualsatixxi'ani Pedro, adí ca bi'ini bedheti ca tisa bele'e Ben-na lhe, Benniha nna lola lee chi nerue lole die lo yu nu te láni Galilea. Nía liba nna eti'alee, attiba chi re lebi'i.

<sup>8</sup> Nianna beríatteba ca nuilaha lhe'e atta te baaha, deyyacabi ruxunnicabi, rixidinicabi de usquinbi. Ni ttu benni bittu utixxi'aquinbi, cumu de rasquinbi.

### **Jesús bele'en loe María bi'ini beaca lasbi yiesi lá Magdala**

*(Jn. 20:11-18)*

<sup>9</sup> [Dequide chi beacani Jesús, chi daba rani la sá atti redú ni'a attu xumanu, bele'e tte ba ni loe primerteba María Magdalena bi'ini bebee gasi be xxegüi lhe'e cuerpu guebiha. <sup>10</sup> Bi'iniha nna beyyattebabí guattixxi'enbi ca benni güequi guano Jesús. Ca bi'iniha nna se'e si'ibacabi lhe ribescabi lhe gue Benniha. <sup>11</sup> Dequide chi utixi'ani nuilaha ca bi'iniha, anca banba Benniha lhe chi bilenbi Benniha lhe, ca bi'iniha nna tsaba bittu güia lecabí.

### **Jesús bele'en loe chupa ca bi'ini bedheti ca tisa bele'e**

*(Lc. 24:13-35)*

<sup>12</sup> Lenla nna bodile'e lo Jesús attu yalee leni a chupa ca bi'ini sela ca bi'ini bedheti ca tisa bele'e Benniha, atti diacabi yu'ucabi neda diacabi ranchu. <sup>13</sup> Lacabi nna beyyattebacabi guattixxi'aquinbi adí ca bi'iniha, ttiaca niguaba ca bi'iniha lä güia lecabí guecabi.

### **Jesús roca'ane sina un ca bi'ini bedheti ca tisa bele'e**

*(Mt. 28:16-20; Lc. 24:36-49; Jn. 20:19-23)*

<sup>14</sup> Dequide lania liba nna bele'en lo Jesús iyába sinía (11) ca bi'ini bedheti ca tisa bele'e, laca siacabi go yetta. Lee nna utisattebe ca bi'iniha de bittu ria lecabí lhe de ancacabi benni lastoo tsitsi lhe cumu bittu güia lecabí gue ca benni chi biláquinbi beacabanie.

<sup>15</sup> Nianna ráttebe cabí:

—Gualtsia lhe'e iyába ca yiesi se'e itúba yies lo yu-ni,  
 gualsattixxi'ani iyárecha ca benni ca tisa gue Tata Do Iyyabaaha.  
<sup>16</sup>Ca benni tsia lecani neti nna gadicana inda nna godilába Tata  
 Do Iyyabaaha cana, ttiaca ca benni bittu tsia lecani neti nna tsia  
 nittiba ca nua. <sup>17</sup>Ca milagru-ni uni ca benni tsia lecani neti: lacana  
 udetticana láya atti ebeacana ca be xxegüi yu'u lhe'e cuerpu gue  
 ca benni, inne guabacana ca tisa cubi utee Tata Do Iyyabaaha  
 len lacana lhe, <sup>18</sup>masquiba udaxxucana belha lhe gansi i'iyacana  
 venenu lhe lägabi dhacacana, eyacaguuba ca benni rani-na atti  
 uxxúa nácani iquicani lhe.

### **Jesús reopie iyyabaaha**

(Lc. 24:50-53)

<sup>19</sup>Dequide chi unnee Jesús Benni bananie ri leni ca bi'ini bedheti  
 ca tisa bele'e, beopittebe deyye iyyabaaha. Nianna bedottebe daca  
 lhuitta derechu gue Tata Do Iyyabaaha. <sup>20</sup>Ca bi'ini bedheti ca tisa  
 bele'e Benniha nna, biríattebacabi diacabi riguixxi'acabi ca tisa gue  
 Jesús itúba ca nía. Benni bananie ri-naba uca lenie cabi. Leni ca  
 milagru run ca bi'iniha nna rule'e lo, nu rá cabiha nna ancana nu  
 gualí. Amén.]

# **Ca tisa rixxi'a gue Jesús ben Lucas lo sitsi-ni**

## **Ca tisa-ni udhelha Lucas len Teófilo**

**1** Ixe ca benni chi bencabi ucuacabi lo sitsi gue nu gualí chi uca aní lo ca benni. <sup>2</sup>Ucaba attiba chi utixxi'ani ca benni begüiaga locabi gue nu uca desde primerahali, lacabi nna ucacabi benni utixxi'a ca tisa gue Tata Do Iyyabaaha. <sup>3</sup>Anáguaba neti, xa Teófilo, chi unnaba tisaxxa tseeba iyába desde gue gaxasná udulo primerahali, nianna ucatia tseeba anca ucuaxxatseeba ca tisa-ni lo sitsi qui idhelha len cuinalu, atta quixxi'atia lu gue iyába nu chi bientia, <sup>4</sup>qui anáchu nna una tseelu gue nu anca gualí chi bele'equin ca benni lu.

### **Ttu ingeli gue Tata Do Iyyabaaha rixxi'e gali Juan**

<sup>5</sup> Atti uca Herodes nu rinnabia gue lo yu nu te láni Judea, lania nua udo ttu bixxudi lábi Zacarías, bababi leni adí ca bixxudi gue bixxudi lá Abías. Nuila guebiha nna lábi Elisabet, ancabi benni datía Aarón. <sup>6</sup>Irupabacabi ancacabi benni runi nu anca tsee lo Tata Do Iyyabaaha, se'eguabacabi rudoacabi tisa gue iyá nu runi Benniha mandadu uncabi lhe. Larcala läganu te inne güeena guecabi.

<sup>7</sup> Ttiaca lacabi nna nuttu xi'incabi se'e, cumu Elisabet ancabi nu bittu aca uja xi'inbi, irupabacabi chi ancacabi benni chi diani lhe.

<sup>8</sup> Ttu sá atti ulha ca bixxudi baba len Zacarías uncabi sina gue Tata Do Iyyabaaha lhe'e yotu. <sup>9</sup>Attiba chi lábi ca bixxudiha runcabi, Zacaríasba guaxxína ulha ga'a lhe'e yotu atta do becoa gue Tata Do Iyyabaaha qui uttebi yala lo becoaha. <sup>10</sup>Laca rite yalaha nna ixeru ca benni se'e lhe'eli'a gue yotuha rinnecabi len Tata Do Iyyabaaha. <sup>11</sup> Unnuhaba raca nna attirba chi ucaxxe ttu ingeli gue Tata Do Iyyabaaha atta du Zacarías. Udúe daca derechu gue becoa atta rite yalaha. <sup>12</sup> Atti biláni Zacarías ingeliha nna uca guatettebinbi lhe usixxattinbi lhe. <sup>13</sup> Ttiaca ingeliha nna rábi bi'iniha:

—¡Bittu gasinlu, Zacarías, cumu chiba bienini Tata Do Iyyabaaha gue nu rinnabalu loe! Nuila guelu Elisabet-na chi uja xi'inni. Untoha nna uguelu láni Juan. <sup>14</sup>Lu nna eyo'oxxatta lelu, ixetsitsiaguuba

benni eyo'oxxatta lecani de gali untoha lhe<sup>15</sup> cumu bi'iniha nna acabi ttu benni ra xxeni leni lo Tata Do Iyyabaaha. Labi nna tsa bittu i'iyabi vinu, niguaba attu nu unna dhusinbi lhe. Atti sna nujali nan guebiha bi chi tsu'u Espíritu gue Tata Do Iyyabaaha itúba lhe'e cuerpu guebi.<sup>16</sup> Unguabi qui eyequi ixetsitsiale ca nu Israel odaxxule neda gue Tata Do Iyyabaaha Benni bananie le-na.<sup>17</sup> Laguabi tsiabi nnerubi lo Benni bananie ri-na. Dhibi loesi Espíritu gue Tata Do Iyyabaaha uxí profeta Elías lhe gatta elha ra xxen lee utta gue bi'iniha guebi lhe. Unbi eyaca tsee ca tata nanaha len ca xi'incaniha. Unguabi qui ca nu bittu rudo tisa-na udocana tisa attiba ca benni tsee-na. Aná nna ose'e tseebi ca benni qui chi se'e tseecana satsávana Benni bananie ri-na gansi chi bisié.

<sup>18</sup> Zacarías unnaba tisabi ingeliha rábi bi'iniha:

—¿Gasná aca xen lasia dequi qualí aca nu rá cuinalu? Cumu neti nna chiba anca benni chi diani, anáguaba nuila quia-na lhe.

<sup>19</sup> Ingeliha nna becabibi rabi:

—Neti láya Gabriel. Anca benni run sina gue Tata Do Iyyabaaha. Lee udhelhe neti qui quixxi'atia lu ca tisa tsee-ni.<sup>20</sup> Nnanna nna biríaba acalu, cumu bittu güia lelu gue ca tisa quia-ni. Lu nna bittu aca innelu axta liba isía sá atti aca nu chi ria-ni, lania liba ennelu.

<sup>21</sup> Laca ca benni nna guase'ecana ribedacana lhe'eli'a gue yotuha ería Zacarías, lacana nna chi raca guatequinna de biaca risá bi'iniha atta do becoha.

<sup>22</sup> Atti chi bería bi'iniha nna lärga raca innebi ulisabi ca benni se'e nía. Laniala utedaaquin ca benni dequi bixaba bele'en bi'iniha lo becoha. Labi nna senniba rule'enbi ca benni, cumu biríaba be'anbi.

<sup>23</sup> Atti chi be'eyu ca sá ben Zacarías sina lhe'e yotuha nna deyyattebabí lhe'e yo'o guebiha.<sup>24</sup> Dequide lania nna lägabi bisá nna nuila guebi Elisabet nna bija xi'inbi. Labi nna gayu beo bittu biríabi yo'o. Nianna rábi:<sup>25</sup> “Unní ancana ttu nu chi ben Tata Iyyabaaha len neti. Lee nna guatúa lee neti qui bitturu edacani ca benni quia de nuttu xi'inia ruja.”

### Ingeli gue Tata Do Iyyabaaha rixxi'abi gali Jesús

<sup>26</sup> Ucaba xxupa beo nna bededhelhatteba Tata Do Iyyabaaha ingeli Gabriel lhe'esi Nazaret re lo yu nu te láni Galilea,<sup>27</sup> atta do ttu nuila rbani cuiti lábi María chi rinnaba unbiyuu bi. Unbiyuuha

nna lábi José. Labi nna datíabi David bi'ini uca nu rinnabia gue ca benni Israel.<sup>28</sup> Atti uta'a ingeliha atta do María nna, unnettebabí rábi María:

—¡Padiuxi! Benni bananie ri-na chi raca lanie lu. Lee due lenlu, [delo iyá ca nuila, luba nu chi ucaru lanie].

<sup>29</sup> Ttiaca María nna uca guatelinbi de bieninbi ca tisa-na, nianna uquinbi: “¿Bi diale ca tisa unne bi'in-ni?”<sup>30</sup> Laniala unne ingeliha re:

—Bittu gasinlu, María, cumu Tata Do Iyyabaaha chi raca lanie lu.<sup>31</sup> Nnanna nna lu uja xi'inlu. Atti cu'ulu unto-ni nna ugüelu lee Jesús.<sup>32</sup> Unto-ni nna aque nu ra xxeni lee. Gágucan Ben-na: “Xi'ini Benni ra xxeni lee do iyyabaaha.” Tata Do Iyyabaaha Benni bananie ri-na unie aca Ben-na nu rinnabia attiba David bi'ini datía Ben-na ucabi benni unnabia.<sup>33</sup> Ben-na nna ttu dia liiba innabie ca benni Israel.<sup>a</sup> Ttu tsaba innabie.

<sup>34</sup> Laniala nna rá María ingeliha:

—¿Tti modu aca nu rálha? Cumu neti läganu unbiyuu chi do lania.

<sup>35</sup> Ingeliha nna becabibi rábi bi'iniha:

—Espíritu gue Tata Do Iyyabaaha isíe tsu'e lhe'e cuerpu guelu. Benni Do iyyabaaha ugucue lu elha ra xxeni lee guee attiba xula gue ttu bea. Larcala benni galiba nna anque benni do riesi anca gue Tata Do Iyyabaaha. Xi'in Tata Do Iyyabaahaba gatta lá Ben-na.<sup>36</sup> Anáguaba Elisabet benni datíalu-na, masquiba chi ancabi benni chi diani, cu'uguuba xi'inbi. Ca benni nna rácana bittu aca uja xi'inbi, ttiaca chila uca xxupa beo nuja xi'inbi.<sup>37</sup> Cumu tsa lägabi te ttu nu lä aca gue Tata Do Iyyabaaha unie.

<sup>38</sup> Laniala nna rá María:

—Neti anca benni rixuu lo sina gue Tata Do Iyyabaaha. Unbenet neti attiba rá cuinalu.

Bedá lania nna güequi ingeliha.

### María güiabi guannalhibi Elisabet

<sup>39</sup> Lägabittega isá uca nna ucatteba María puradu ulu'ubi neda diabi lhe'e ttu lhe'esi re atta sia ca i'iya. Lhe'esiha nna babana lo yu nu te láni Judea.<sup>40</sup> Bisínbabí nía nna uta'attebabí lhe'e yo'o gue

---

<sup>a</sup> 1:33 Israel lenbi Jacob nna ancacabi la ttuba benni.

Zacarías, nianna ráttebabí Elisabet padiuxi.<sup>41</sup> Cuantusiba bienini Elisabet ts'i'i María rábi padiuxi, untoha nna udhí bedona lhi'u lhe'e Elisabet. Espíritu gue Tata Do Iyyabaaha nna uta'attebe lhe'e cuerpu gue Elisabet.<sup>42</sup> Bi'iniha nna unnettebabí idisa rábi:

—¡Tata Do Iyyabaaha chi ucaru lenie lu attichula adí ca nuila-na, racaguuba lanie benni nujalha lhe!<sup>43</sup> Neti nna ¿nú anca nna daa nan gue Benni bananie neti ettenalhie neti?<sup>44</sup> Cumu cuantusiba bientia ts'i'ilu rálu padiuxi, unto quia-ni nna guadhi bedona lhe'a de be'oba leni.<sup>45</sup> ¡Carbárulu de güia lelu saxxína aca ca tisa chi rá Tata Do Iyyabaaha lu!

<sup>46</sup> Laniala rá María:

Itú iqui itú lasia rpea Tata Do Iyyabaaha:

“¡Benni ra xxeni leni ancalu!

<sup>47</sup> Espíritu quia-ni nna tsitsiba re'o leni gue Tata Do Iyyabaaha Benni bodile neti,

<sup>48</sup> cumu chi besía loe neti, nuila nu bittu ra xxeni lee-ni, nu rixuu lo sina guee.

Bedá nnanna iyába ca benni innecana innácana:

¡Carbáru nuila-na!

<sup>49</sup> Cumu xxeni anca nu chi beni Tata Do Iyyabaaha benni ra xxeni lee-na len neti.

Benni do riesi lhe'e iyá nu lä anca tsee anque.

<sup>50</sup> Ben-na satíaba ratúa lee ca benni rapacana ben-na respeto, ca xi'incani lhe ca xidhoacani lhe.

<sup>51</sup> Benie ca nu reban leri len elha ra xxen lee guee lhe belhuxaguabe nu rulaba le ca nu ttaba rácana dequi ancacana nu ra xxeni leni lhe.

<sup>52</sup> Utúaguabe ca nu rinnabia lo atta siacana lhe ulequi xenie ca benni bittu anca nu ra xxeni leni lhe.

<sup>53</sup> Ca benni rituniha nna tsapaba begüee cana guecani, ca nu te guecaniha nna tsa bitturu betee guecani.

<sup>54</sup> Chi uca lanie ri'i ca benni Israel bi'ini bixuu lo sina guee, bittuguuba bixulhanie uyú si'e ri'i lhe.

<sup>55</sup> Aníaba chi begüee tisa unie ttu dia lii len ca benniola guerihá,

Benniha nna chi re, satíaba satúa lee Abraham lhe ca benni datía bi'iniha chi isíala lhe.”

<sup>56</sup> María nna níaba be'anibi leni Elisabet attiba tsunna beo. Lenla nna bequibi besinbi lhe'e yo'o guebiha.

### Uli Juan bi'ini ugadi inda

<sup>57</sup> Atti chi bisía sá cu'u xi'iní Elisabet, labi nna ulu'ubi ttu unbiyuuto. <sup>58</sup> Atti bina ca benni se'e gaxxa atta dobiha lhe ca benni datíabiha lhe gue ya de xxenianca elha tsee bete Tata Do Iyyabaaha len bi'iniha nna bedaca lecani lenbi. <sup>59</sup> Ucaba xxunu ubisa uli untoha nna uchettebacabi untoha qui cuebi senni nu raca leni ca unbiyuu Israel. Ca benni se'e níá nna runcana quixxacana lá untoha Zacarías attiba lá tata guebiha. <sup>60</sup> Ttiaca nan guebiha nna rábi:

—¡Bittu! Juanba gatta lá unto-ni.

<sup>61</sup> Lacana nna rávana:

—Läganu betsi loeslu se'e lá aná.

<sup>62</sup> Laniala nna belisacana Zacarías tata gue untoha leni senni qui quixxi'abi gaxasná raca lebi gatta lá untoha. <sup>63</sup> Bi'iniha nna unnababi ttu breta güexxa, nianna benbi letra loni: “Unto-ni gatta láni Juan.” Lania nna iyába ca nu se'e níá bebanquinna. <sup>64</sup> Snaba lania nna uca benne Zacarías, nianna udulottebabí ulequi xenbi Tata Do Iyyabaaha. <sup>65</sup> Iyába ca benni se'e gaxxa atta do Zacarías uca teequinna. Anáguaba lhe'e iyába ca lhe'esi se'e atta sia ca i'iya sia lo yu nu te láni Judea rinne ca benni gue nu uca. <sup>66</sup> Iyába ca benni runa gue nu ucaha nna rulaba lecani rávana:

—¿Nú e'eyu unto-na acana?

Cumu de ritedaaquinna du Tata Do Iyyabaaha leni untoha.

### Zacarías ribequi xenbi Tata Do Iyyabaaha

<sup>67</sup> Zacarías, tata gue Juan, atti uta'a Espíritu gue Tata Do Iyyabaaha lhe'e cuerpu guebi nna unnettebabí ca tisa bete Espírituha lenbi, nianna rábi:

<sup>68</sup> ¡Ribequi xenia Tata Do Iyyabaaha, Benni bananie ri'i ca benni Israel-ni, cumu chi bisié odile ri'i ca benni guee!

<sup>69</sup> Chi udhelhe Benni ra xxeni lee-na qui odile ri.

Ben-na anque ttu benni datía David bi'ini bixuu lo sina guee.

<sup>70</sup> Benba Tata Do Iyyabaaha nu chi re unie.

Atti níá nna bixunie ca profeta guee qui utixxi'acabi gue nu unie len ca benni guee.

<sup>71</sup> Lee nna re, godilábe ri lo ná ca nu bittu raca uyúcan ri-na,

lo ca nu rutía di lecan ri-na lhe.

<sup>72</sup>Chi re guasatúaba lee ca benniola guerihá lhe  
bittu ixulhanie ca tisa chi begüee len ca bi'iniha lhe.

<sup>73</sup>Ca tisa-ni nua boca'an tsitsie leni Abraham benni uca  
benniola guerihá atti re:

<sup>74</sup>Lee nna odile ri las ná ca nu bittu raca uyúcan ri-na,  
qui lania nna tsa nutturu nu gasinri loni atti ixuuri lo sina  
guee.

<sup>75</sup>Ri'i nna tse'eri acari benni chi se'e riesi anca gue Tata Do  
Iyyabaaha, nu runi nu anca tsee lo Ben-na lhe.

Anába tse'eri unri iyába ca sá aca banri.

<sup>76</sup>Lu nna xa xi'into, quixxacana lálu profeta gue Tata Dios  
Benni do iyyabaaha,  
cumu lu nna nnerulu lo Benni bananie ri-na qui unlu ese'e  
tsee ca benni gansi chi bisié.

<sup>77</sup>Lu nna quixxi'enlu ca benni lo yies gue Ben-na, lee nna  
guadíbe elha xen lasi gue ca tulha guecani,  
anía liba nna odile cana.

<sup>78</sup>Cumu Tata Do Iyyabaa guerihá ratúaxxatta lee ri len si'i le.  
Denua nna iyyabaahali idhelhe Benni anque xieniha dee  
ettennalhie ri,

<sup>79</sup>qui udanie gue ca nu se'e atta anca chulha, ca nu ruxunnina  
guecani gatticana.

Aná nna unie tsiasi lo neda guee atta te elha xen lasi.

<sup>80</sup>Unto bi'ini lá Juan diababi rixenbi, tsitsiba diabi ridúbi lo  
neda gue Tata Do Iyyabaaha. Níaba udobi lo yu bisiha, axta atti  
bisía sá ga'ana ule'e lobi leni ca benni Israel.

### Uli Jesús

(Mt. 1:18-25)

**2** Lania nua anca Augusto César nu rinnabia gue itúba lo yu  
nu baba Roma. Lana nna benna mandadu uncana ttu censu  
gue iyába ca benni se'e lo yu atta rinnabiana. <sup>2</sup>Unníba primerba  
censu bencana atti anca Cirenio nu rinnabia lo yu gue Siria. <sup>3</sup>Iyába  
benni raca duelha tsiacana atta beaca lascani qui dho lacani lo  
sitsi. <sup>4</sup>Denuala nna bedaa José lhe'esi Nazaret re lo yu nu te láni  
Galilea deyyabi lhe'esi lá Belén re lo yu nu te láni Judea atta uli

David bi'ini unnabiahá, cumu ancabi benni datía David. <sup>5</sup> Labi nna beyyabi nía qui udocana lábi lo sitsi lenbi nuila dubi rinnababi lá María. Bi'iniha nna chi dubi nuja xi'inbi. <sup>6</sup> Ttiaca guaxxína laca se'ecabi lhe'e yiesi Belén nna, bisía sá gali xi'inbi. <sup>7</sup> Nía ulu'u xi'in primer gue María. Labi nna bottesttebabí untoha lari atti utixxattebabí Benniha lhe'e atta ro ca u'una bia cumu bitturu bisela atta eya'ancabi lhe'e ca yo'o atta re'an adí benni.

### Ca ingeli rixxi'acabi chi uli Jesús

<sup>8</sup> Gaxxaba ro'o yiesi Belén se'e ca benni ruyú ca carne'e. Níaba re'ancabi lo rela atta yu'u ca carne'eha qui rapacabi ca unnuha. <sup>9</sup> Attirba ttu lhaba ucaxxe ttu ingeli gue Tata Do Iyyabaaha atta se'ecabiha. Sabi'abacabi uyu'u xieni racalaa gue Tata Do Iyyabaaha, lacabi nna usilhabaquinbi <sup>10</sup> Ttiaca ingeliha nna rábi:

—Bittu gasinle, cumu neti delha qui quixxi'atia le gue ttu nu tsee uni eyo'o le iyába benni. <sup>11</sup> Nasá uli lhe'e yiesi gue David, Benni odile ca benni. Benniha nua anque Cristu, Benni bananie ri. <sup>12</sup> Nu innía-ni ule'e lona nu ria-ni ancana nu gualí: Lebi'i nna sati'ale untoha tubie lari, tee lhe'e atta ro ca u'una bia.

<sup>13</sup> Attirba ttu lhaba ucaxxe ixeru ca ingeli daa iyyabaaha atta du ingeliha, rulhacabi gue Tata Do Iyyabaaha rácabi:

<sup>14</sup> ¡Xxeni ra le Tata Dios Benni do iyyabaaha!

Yies lo yu-ni nna tseeba tse'e ca benni redíba elha tsee gue Ben-na.

<sup>15</sup> Atti chi beopi ca ingeliha iyyabaaha nna ca benni ruyú ca carne'eha nna rátteba loescani:

—Tsia sangari lhe'esi Belén, qui sagüiari bixunní uca, gue nu chi utixxi'en Tata Do Iyyabaaha ri.

<sup>16</sup> Bedhiubattebalecabi diacabi. Níaba guattíacabi María lenbi José. Untoha nna níaba tee lhe'e atta ro ca u'una bia. <sup>17</sup> Atti biláquinbi untoha nna utixxi'attebacabi nu chi rá ingeliha cabi gue untoha. <sup>18</sup> Iyába ca nu bienquinna gue nu rá ca benni ruyú ca carne'eha nna bebanquinna gue nu rixxi'a ca nua. <sup>19</sup> Ttiaca María nna uyu'u tsitsibabi tisa gue iyába nu raca, tsitsiba rulaba lebi gue nua. <sup>20</sup> Ca benni ruyú ca carne'eha nna atti bequicabi deyyacabiha nna bilhattebacabi gue Tata Do Iyyabaaha rácabi: “¡Xxeni ra le Tata Do Iyyabaaha!” Rugüecabi Benniha xquixarue gue iyába nu chi bienquinbi lhe biláquinbi lhe, cumu iyába nu rá ingeliha guaxxína.

### Guatsadúcabi Jesús lhe'e yotu

<sup>21</sup> Atti chi uca xxunu ubisa uli untoha nna berenttebacabi Benniha senni, nu runcana leni ca unbiyuu Israel. Nianna begüeocabi lá Benniha Jesús, attiba begüee ingeliha lee atti chi ujala María Benniha.

<sup>22</sup> Atti chi be'eyu ca sá atti anca eyacacabi nu nari lo Tata Do Iyyabaaha attiba ga'ana lo ley boca'ana Moisés, nianna güiatteba len José lhe María lhe, untoha atta do yotu do Jerusalén qui utsá ducabi Benniha lo Tata Do Iyyabaaha. <sup>23</sup> Aníaba bencabi cumu aníaba ga'ana lo ca ley gue Tata Do Iyyabaaha. Lo ben-na rá: "Iyába unbiyuu gali primerteba nna acana nu iriesi aca gue Tata Do Iyyabaaha."<sup>a</sup> <sup>24</sup> Ráguauba lo ca ley-na: Ca tata nanaha labía utecabi úna len Tata Do Iyyabaaha, si chupa bexu o chupa becha.<sup>b</sup>

<sup>25</sup> Laniaguaba nua udo ttu unbiyuu lhe'e yiesi Jerusalén lábi Simeón. Labi nna ancabi ttu benni runi nu anca tsee lo Tata Do Iyyabaaha, rudobi tisa gue Ben-na lhe. Labi nna doguabi ribedabi isía Benni odile ca benni Israel. Espíritu gue Tata Do Iyyabaaha nna len lababi doe. <sup>26</sup> Benniha nna chi utixxi'anie bi, labi nna bittu gattibi axta qui ugüiabi Cristu Benni idhelha Tata Do Iyyabaaha. <sup>27</sup> Espírituha nna uchee bi'línha atta do yotuha la sá atti uche ca tata nan gue Jesús Benniha qui uncabi len Benniha attiba ga'ana lo ca ley boca'ana Tata Do Iyyabaaha leni Moisés. <sup>28</sup> Simeón nna bedaxxubi untoha bexxúa lo nábi, atti betettebabí ixquixaru len Tata Do Iyyabaaha, rábi:

<sup>29</sup> Nnannarguuba xa Tata Do Iyyabaa,  
chiba guaxxína tisa begüeelu len netiha,  
guacaba ugüelhalu gattia leni ttu elha xen lasi,  
neti benni rixuu lo sina guelu.

<sup>30</sup> Cumu leni irpa ca iyya loa-ni chi begüiaya Benni odile  
ri'itu.

<sup>31</sup> Bennionni anque Benni becueelu bedúlu lo iyánea ca benni  
se'e yies lo yu-ni.

<sup>32</sup> Lee anque xieni udani gue ca benni bittu anca benni Israel  
qui unbiacana cuinalu.

Benni anque xieni-ni unie cue xentu, ri'itu ca benni Israel.

<sup>33</sup> José lhe María lhe rebanbaquinbi gue iyá nu rienquinbi rá Simeón rixxi'abi gue Jesús. <sup>34</sup> Laniala nna unnaba Simeón aca len Tata Do Iyyabaaha ca bi'iniha, atti rábi María nan gue Jesús:

—Biyúrga, unto-ni nna anque Benni chi ga'ana odile ixe tsitsia ca benni gueri anca benni Israel, unie qui tsia nitti ixeru cana lhe. Ben-na anque Benni rule'e loe Tata Do Iyyabaaha, ttiaca ixe nu cu'u ni'ani Ben-na. <sup>35</sup> Qui anía nna tsanni lo nu rulaba le ixeru benni. Ttiaca unní nna acana nu uni uyúlu elha disa, [attiba ttu espada ga'ana lhe'e lastoolu.]

<sup>36</sup> Ro'o yotuha guaba du ttu nuila lábi Ana ancabi profetisa, bi'iniha nna ancabi xi'ini bi'ini lá Fanuel baba len ca benni datía bi'ini lá Aser. Labi nna chi ancabi benniola, cuitittebi betsá nábi, sunruba gasi ida udo lenbi unbiyuu guebiha nianna ucattebabí bidabi. <sup>37</sup> Lania chi anquinbi tta yu'u ttapa (84) ida. Labi nna satíaba ridobi lhe'eli'a gue yotuha. Rela resába rixuubi lo sina gue Tata Do Iyyabaaha, rinnebi len Benniha lhe rigu'u bina lhe'ebi lhe. <sup>38</sup> La uraguaba bisín Ana atta se'e ca bi'iniha. Labi nna udulottebabí betebi xquixaru len Tata Do Iyyabaaha, atti udulottebabí utixxi'abi gue untoha lo ca benni se'e ribeda odilá Tata Do Iyyabaaha yiesi Jerusalén.

<sup>39</sup> Dequide chi beni José leni María iyába nu rá lo ca ley gue Tata Do Iyyabaaha, bequittebacabi deyyacabi lhe'esi Nazaret atta beaca lascabi, nu re lo yu nu te láni Galilea. <sup>40</sup> Jesús diabe rixenie, die ribe tsitsi lee lhe. Diaguabe raque nu texxatta elha rien gueni lhe redí baaguabe elha tsee ruta Tata Do Iyyabaaha lhe.

### Jesús doe lheli'a gue yotuha

<sup>41</sup> Ca tata gue Jesús ttu ttu idaba riacabi lhe'e yiesi Jerusalén laní Pascua. <sup>42</sup> Atti ucani Jesús tsil'inu (12) ida nna güiacabi len Benniha laní lhe'e yiesi Jerusalén attiba labicabi runcabi ttu ttu idaba.

<sup>43</sup> Dequide chi uluxa laníha nna, José lhe María lhe güequittebacabi deyyacabi, Jesús nna níaba be'ane Jerusalén. Ca tata gue Benniha nna läga utedaaquinbi. <sup>44</sup> Lacabi nna ttu sá chi bedácabi, ucaquinbi ga níaba de nutsa Jesús lagüii ca benni deyyayha. Laniala beguilacabi Benniha lagüii ca betsi loescabi lhe len ca benni ancabiaquinbi lhe,

<sup>45</sup> ttiaca läganu Benniha guatti'acabi, denua nna nuarca bequicabi deyyacabi Jerusalén reguilacabi Jesús.

<sup>46</sup> Uca liba tsunna ubisa atti guatti'acabi Benniha doe lhe'eli'a gue yotuha lagüi gue ca nu rule'e nu rá lo ca ley boca'ana Tata Do Iyyabaaha leni Moisés. Rudo nague guecani lhe rinnaba tise cana lhe. <sup>47</sup> Iyába ca nu rienquinna gue Benniha nna rebanbaquinna gue elha rieni te guee, gue nu recabie lhe. <sup>48</sup> Atti biláni ca tata nan gueha Benniha nna bebanbaquinbi. Nan gueeha nna rábi:

—Xi'into, ¿biaca benlu aná len ri'itu? Tata guelha lhe neti lhe yade chi raca guatentu requitu regulatu lu.

<sup>49</sup> Laniala nna unne Jesús re cabi:

—¿Biaca neti requile regulale? ¿Si bittuba yule, lo sina gue Tata quiaha raca duelha dhua?

<sup>50</sup> Ttiaca lacabi nna bittu guadú lecabí gue ca tisa unne Benniha.

<sup>51</sup> Laniala nna deyye len ca tata nan gueha lhe'esi Nazaret. Lee nna níaba udoe, bedobe tisa gue ca tata nan guee. Iyába unní nna rigúa tsee lhi'u lhe'e lastoo María nan gue Jesús. <sup>52</sup> Jesús diabe rixenie, diaguaba ratta adí elha rien guee lhe. Tseeba re'o le Tata Do Iyyabaaha gue iyába nu runie, radiguaba le ca benni gue nu runie lhe.

### Ca tisa unne Juan bi'ini rugadi indaha

(Mt. 3:1-12; Mr. 1:1-8; Jn. 1:19-28)

**3** Atti uca tsinu (15) ida anca Tiberio César, nu rinnabia gue ca lo yu baba Roma, lania anca Poncio Pilato nu rinnabia gue lo yu gue Judea. Herodes nna ancana nu rinnabia gue lo yu gue Galilea, betsini Felipe nna ancana nu rinnabia gue ca lo yu te lácani Iturea lhe Traconite lhe. Nu lá Lisanias nna ancana nu rinnabia gue lo yu te láni Abilinia; <sup>2</sup> Anás lenna Caifás nna ancacana bixxudi xeni rinnabia. Lania nua unne Tata Do Iyyabaaha belise Juan xi'ini Zacarías atti dobi lo yu bisiha. <sup>3</sup> Juan güiattebabí itúba ca lo yu se'e bi'a dhacaba yoo Jordán rixxi'enbi ca benni odú xiyyancana gue nu lä anca tsee runcana qui eyadicana inda, anía nna dhi Tata Do Iyyabaaha elha xen lasi gue ca tulha guecani. <sup>4</sup> Ucaba attiba ancaba lo ca sitsi beni profeta Isaías, atta rábi:

Ttu benni cuesi'a lo yu bisiha innábi:

“Gualese'e tsee attiba ttu neda reaca tsee qui isía Benni bananie ri-na.

Gualese'e lhixxa attiba ttu neda relixxana.

<sup>5</sup> Iyába ca atta re lhietti-na esácana  
iyába ca i'iya-na lhe ca atta xua loma-na lhe eyaca lapacana.  
Ca neda yu'u xicuacana elixxacana,  
ca neda anca xxayya loquinna eyacacana sibi.

<sup>6</sup> Iyába ca benni se'e yies lo yu-ni iláquinna Benni odile cana  
idhelha Tata Do Iyyabaaha.”<sup>a</sup>

<sup>7</sup> Ixeru ca benni risina atta do Juan qui ugadibi cana inda. Labi  
nna rábi cana:

—¡Lebi'i, nu datía belha! ¿Nú utixxi'enna le dequi gualábale lo  
elha disa nu chi dala uyúle? <sup>8</sup> Gualuni nu anca lhatsiru qui ule'e lo  
gualí chi bodú xiyyanle bodaxxule neda gue Tata Do Iyyabaaha.  
Bittu aquinle ulaba lele innále: “Gualába ri'itu de ancatu benni  
datía Abraham.” Cumu neti nna gualíbatia ria, axta ca iyya se'e-ni  
guacaba eyon Tata Do Iyyabaaha cana benni datía Abraham.

<sup>9</sup> Anáguuba chiguuba du tsee ttu iyya ttee qui ichúna axta lhu ca  
yaga-na. Larcala iyába ca yaga bittu ribía nu anca tsee gueni nna  
irúbacana qui tsiacana lo gui.

<sup>10</sup> Denua nna iyába ca benni se'e nía rinnaba tisacana rávana Juan:  
—¿Bila anca nu untu?

<sup>11</sup> Juan becabibi guecani rábi cana:

—Nu se'e chupa cue xoni nna utena ttu cue nua leni nu bittu te  
gueni, nu te nu rona utena nu go nu bittu te gona.

<sup>12</sup> Bisíngua ttulhe ca güequixa se'e ridí belhi deyya Roma qui  
gadicana inda. Lacana nna unnaba tisacana Juan rácan bi:

—Maestro, ¿bila anca nu untu?

<sup>13</sup> Juan becabibi rábi cana:

—Bittu uquixale xxenru dequide nu anca dhíle.

<sup>14</sup> Anáguuba ttulhe ca soldado unnaba tisacana rávana:

—Ri'itu nna ¿bila anca nu untu?

Juan becabibi rábi cana:

—Bittu xalhaba unniasinle benni sunruba qui aca utecana belhi  
len lebi'i, lä uteguale parti guecani gue nu bittu gualí bencana lhe.  
Gualaca xen lele len nu naxale.

<sup>15</sup> Ca benni se'e nía nna tsitsiba cuidadu rudocana, cumu chi  
se'ecana ribedacana isía Cristu. Denua nna rulaba lecani racaquinna  
gaxa Juanba bi'iniha ancabi Cristu. <sup>16</sup> Ttiaca Juan ráttebabí iyábacana:

---

<sup>a</sup> 3:4-6 Isaías 40:3-5

—Gualíba neti rugadia benni inda, ttiaca chi dala Benni ugadie le inda leni Espíritu gue Tata Do Iyyabaaha, len gui lhe. Benniha nua raru xxeni lee atti neti. Neti nna niba läbi elha ralha idhasia lo guaracha guee.<sup>17</sup> Benniha nna chi den tsee barquilu qui un tsee xua xuxtila, lee nna cuequiesie xuaha lhe'e te. Xuaha nna egu'u tsee benniha atta ttuatsee, ttiaca teha nna uttebe nua lo gui nu tsa bittu reolana.

<sup>18</sup> Aníba lhe leni adírba ca tisa lhe belisa Juan ca benni, utixxi'enbi cana ca tisa tsee rixxi'a gue Tata Do Iyyabaaha.

<sup>19</sup> Utisaguabi Herodes nu anca nu rinnabiahá rábi na:

—Bittu anca tsee edo lenna Herodías nuila gue betsiniha, anáguauba gue iyába ca nu lä anca tsee chi benna lhe.<sup>20</sup> Delo iyá ca nu lä anca tsee chi ben Herodes nna bedienrulana iqui nua de utixxana Juan lisiyya.

### **Jesús udie inda**

(Mt. 3:13-17; Mr. 1:9-11)

<sup>21</sup> Ttu sá atti rugadi Juan inda iyába ca benni anáguauba Jesús udiguabe inda. Laca rinne lenie Tata Do Iyyabaaha nna bealtteba iyyabaaha.<sup>22</sup> Atti guaditteba Espíritu gue Tata Do Iyyabaaha dee anque attiba ttu becha, udoe iqui Jesús. Iyyabaahali nna bieni ts'i'i Benni do nía re:

—Lu ancalu xi'inia Benni racatia gueni, neti doa redaca lasia len luu.

### **Aní lá ca benni datía Jesús**

(Mt. 1:1-17)

<sup>23</sup> Attiba tu rerua (30) ida chi ancani Jesús atti uduloe benie sina chi ga'anani Tata Do Iyyabaaha unie. Ca benni nna racaquinna anque xi'ini José.

José ancabi xi'ini Elí;

<sup>24</sup> Elí ancabi xi'ini Matat;

Matat ancabi xi'ini Leví;

Leví ancabi xi'ini Melqui;

Melqui ancabi xi'ini Jana;

Jana ancabi xi'ini José;

25 José ancabi xi'ini Matatías;  
 Matatías ancabi xi'ini Amós;  
 Amós ancabi xi'in Nahum;  
 Nahum ancabi xi'ini Esli;  
 Esli ancabi xi'ini Nagai;  
 26 Nagai ancabi xi'ini Maat;  
 Maat ancabi xi'ini Matatías;  
 Matatías ancabi xi'ini Semei;  
 Semei ancabi xi'ini José;  
 José ancabi xi'ini Judá;  
 27 Judá ancabi xi'ini Joana;  
 Joana ancabi xi'ini Resa;  
 Resa ancabi xi'ini Zorobabel;  
 Zorobabel ancabi xi'ini Salatiel;  
 Salatiel ancabi xi'ini Neri;  
 28 Neri ancabi xi'ini Melqui;  
 Melqui ancabi xi'ini Adi;  
 Adi ancabi xi'ini Cosam;  
 Cosam ancabi xi'ini Elmodam;  
 Elmodam ancabi xi'ini Er;  
 29 Er ancabi xi'ini Josué;  
 Josué ancabi xi'ini Eliezer;  
 Eliezer ancabi xi'ini Jorim;  
 Jorim ancabi xi'ini Matat;  
 30 Matat ancabi xi'ini Leví;  
 Leví ancabi xi'ini Simeón;  
 Simeón ancabi xi'ini Judá;  
 Judá ancabi xi'ini José;  
 José ancabi xi'ini Jonán;  
 Jonán ancabi xi'ini Eliaquim;  
 31 Eliaquim ancabi xi'ini Melea;  
 Melea ancabi xi'ini Mainán;  
 Mainán ancabi xi'ini Matata;  
 Matata ancabi xi'ini Natán;  
 32 Natán ancabi xi'ini David;  
 David ancabi xi'ini Isaí;  
 Isaí ancabi xi'ini Obed;  
 Obed ancabi xi'ini Booz;

Booz ancabi xi'ini Salmón;  
 Salmón ancabi xi'ini Naasón;  
<sup>33</sup>Naasón ancabi xi'ini Aminadab;  
 Aminadab ancabi xi'ini Aram;  
 Aram ancabi xi'ini Esrom;  
 Esrom ancabi xi'ini Fares;  
 Fares ancabi xi'ini Judá;  
<sup>34</sup>Judá ancabi xi'ini Jacob;  
 Jacob ancabi xi'ini Isaac;  
 Isaac ancabi xi'ini Abraham;  
 Abraham ancabi xi'ini Taré;  
 Taré ancabi xi'ini Nacor;  
<sup>35</sup>Nacor ancabi xi'ini Serug;  
 Serug ancabi xi'ini Ragau;  
 Ragau ancabi xi'ini Peleg;  
 Peleg ancabi xi'ini Heber;  
 Heber ancabi xi'ini Sala;  
<sup>36</sup>Sala ancabi xi'ini Cainán;  
 Cainán ancabi xi'ini Arfaxad;  
 Arfaxad ancabi xi'ini Sem;  
 Sem ancabi xi'ini Noé;  
 Noé ancabi xi'ini Lamec;  
<sup>37</sup>Lamec ancabi xi'ini Matusalén;  
 Matusalén ancabi xi'ini Enoc;  
 Enoc ancabi xi'ini Jared;  
 Jared ancabi xi'ini Mahalaleel;  
 Mahalaleel ancabi xi'ini Cainán;  
<sup>38</sup>Cainán ancabi xi'ini Enós;  
 Enós ancabi xi'ini Set;  
 Set ancabi xi'ini Adán;  
 Adán ancabi xi'ini Tata Do Iyyabaaha.

### **Nu xxegüiha uxacana dhi yiena Jesús**

*(Mt. 4:1-11; Mr. 1:12-13)*

**4** Jesús chi yu'u Espíritu gue Tata Do Iyyabaaha lhe'e cuerpu  
 guee atti bedee ro'o yoo Jordán. Espírituha nna uchee Benniha  
 lo ttu yu bisi. <sup>2</sup>Níaba udoe chua (40) sá. Nía nua uxaca nu xxegüiha

dhi yiene. Lee nna tsa bittu utoe itú ttuba udoe nía. Atti uca chua (40) sá nna bisía utunie.<sup>3</sup> Nu xxegüiha nna rán Benniha:

—Gansi gualínlu ancalu xi'ini Tata Do Iyyabaaha, gusi ca iyya-ni eyacacana ttaxtila.

<sup>4</sup> Jesús becabie gueni re na:

—Lo ca sitsi gue Tata Do Iyyabaaha rá: “Läga sunru len ttaxtila aca ban ca benni,<sup>a</sup> [sinuqui lacana aca bancana leni iyába ca tisa rinne Tata Do Iyyabaaha.]”

<sup>5</sup> Nu xxegüiha nna uchettebana Benniha axta iqui ttu i'iya yadharu. Nía bele'enna Benniha ttu nnelaru iyába ca yiesi xeni se'e yies lo yu-ni.<sup>6</sup> Nianna, atti rá nu xxegüiha Benniha:

—Neti utea len lu itúrecha elha rinnabia gue ca yies-na qui innabialu cana, iyánea nu tsee te guecani lhe, cumu las nába yu'ucana. Denua nna uteba cana leni nuxaba raca lasia.<sup>7</sup> Larcala nna gansi lu udú xibilu loa, cuequi xenlu neti lhe iyábacana unna guelu.

<sup>8</sup> Jesús becabie re na:

—[Nu rea güia, nu xxegüi,] cumu lo ca sitsi gue Tata Do Iyyabaaha rá: “Suntteba Tata Do Iyyabaaha Benni bananie lu cuequixxenlu, suntteba Ben-na ixuuri lo sina guee lhe.”<sup>b</sup>

<sup>9</sup> Laniala nna bedechee nu xxegüiha Jesús lhe'e yiesi Jerusalén. Nía belhopina Benniha axta atta yadharu gue iqui yotuha. Nianna rána Benniha:

—Gansi gualí ancalu xi'ini Tata Do Iyyabaaha, binna sanga de udiqui-ni leni axta lireeha.<sup>10</sup> Cumu lo ca sitsi gue Tata Do Iyyabaaha ga'ana rá:

Tata Do Iyyabaaha idhelhe ca ingeli guee qui uyúcabi lu.<sup>c</sup>

<sup>11</sup> Ca ingeliha nna güilhenbacabi lu qui bittu icheculu len ca iyya-na.<sup>d</sup>

<sup>12</sup> Jesús becabie re na:

—Ga'anaguaba lo ca sitsi gue Tata Do Iyyabaaha: “Bittu cu'ubialu Tata Do Iyyabaaha Benni bananie lu.”<sup>e</sup>

<sup>13</sup> Atti bitturba beselani nu xxegüiha bixa leni cu'ubiana Jesús, boca'anttebana Benniha qui lenla nna edeaca xxena.

<sup>a</sup> 4:4 Deuteronomio 8:3

<sup>b</sup> 4:8 Deuteronomio 6:13

<sup>c</sup> 4:10 Salmo 91:11

<sup>d</sup> 4:11 Salmo 91:12

<sup>e</sup> 4:12 Deuteronomio 6:16

**Ca benni gue Nazaret rigu'u ni'acani Jesús***(Mt. 4:12-17; Mr. 1:14-15)*

<sup>14</sup> Jesús bequie deyye lo yu gue Galilea. Chi yu'u lhe'e cuerpu guee Espíritu Benni ra xxeni lee gue Tata Do Iyyabaaha. Nianna, itúba nía rinnecana gue nu runi Jesús. <sup>15</sup> Lee nna rule'enie ca benni guee anca benni Israel coa atta siaba ca yo'o atta ritupacana rudheticana ca tisa gue Tata Do Iyyabaaha. Iyábacana ribequi xencana Benniha.

**Jesús besine lhe'esi Nazaret***(Mt. 13:53-58; Mr. 6:1-6)*

<sup>16</sup> Laniala nna beyye lhe'esi Nazaret atta bixinie. Lee nna attiba chi labie runie sá redí le ca benni guee anca benni Israel, uta'attebe lhe'e yo'o atta rudheti ca nua ca tisa gue Tata Do Iyyabaaha. Lee nna udulíttebe qui ulabe lo ca sitsi gue Tata Do Iyyabaaha.

<sup>17</sup> Laniala nna begüeecana Benniha ca sitsi dia loque ca tisa unne profeta Isaías. Atti udhalie lo sitsiha nna guatti'e atta rinne rá:

<sup>18</sup> Espíritu gue Tata Do Iyyabaaha yu'e lhe'e cuerpu quia.  
Benna chi ulequiesie neti qui tsaya quixxi'aya ca tisa tsee  
gue gaxasná rinnabia Tata Do Iyyabaaha len ca  
benni bittu te gueni.

Udhelhaguabe neti qui quixxi'aya gaxasná lhá ca nu te  
lisiyya-na lhe

qui unia iláni ca nu xua loquinna lhe  
qui odiláya ca nu se'e si'i-na lhe

<sup>19</sup> quixxi'aya gue sá atti uni Tata Do Iyyabaaha ttu nu tsee len  
ca benni.<sup>a</sup>

<sup>20</sup> Laniala nna bottubi Jesús sitsiha, bote Benniha len nu run yuda lhe'e yo'o atta rudetti ca benni Israel ca tisa gue Tata Do Iyyabaaha, atti bedottebe. Iyába ca nu se'e lhe'e yo'oha nna tsaba do locani lo Benniha. <sup>21</sup> Lee nna udulottebe re:

—Nasá guaxxína uca aní lole nu rá lo ca sitsi bieninle belaba-ni.

<sup>22</sup> Iyába ca benni tseeba rinnecana gue Jesús, rebanbaquinna gue ca tisa ga'ana tsee rinne Benniha. Nianna, rá loescani:

—¿Si läba xi'in José bunni?

---

<sup>a</sup> **4:18-19** Isaías 61:1-2

<sup>23</sup> Jesús re cana:

—Neti yua nna lebi'i rulaba lele góle neti ca tisa te rinne ca benni rávana: “Nu reoni ca benni rani, luba ben sanga ramedi la luba.” Racaguabinle innále: “Delo iyá nu chi binatu benlu lhe'esi Capernaum, bengua loes nua-ni lhe'esi guelhi.”

<sup>24</sup> Lee nna ráguabe cana:

—Neti nna gualíbatia rpea le, ni ttu benni anca profeta gue Tata Do Iyyabaaha bittu raca uyúcan na lhe'esi gueni. <sup>25</sup> Gualíba ixeru nuila bidabi se'e len ca benni Israel atti udo profeta Elías, lania nua bitturu uca iyya delo tsunna ida yu'u xxupa beo. Denua nna uca ubina itúba nía. <sup>26</sup> Ttiaca läga udhelha Tata Do Iyyabaaha Elías tsiabi atta do ni ttu ca nuila bidabi gue Israel-ni. Atta do nuila bidabi do lhe'esi lá Sarepta, nu re lo yu gue yiesi lá Sidón liba udhelha Benniha bi'iniha. <sup>27</sup> Anáguauba use'e ixe ca nu uyu'u isagüe uca ttu nu anca attiba yiesusu te láni lepra len ca benni Israel atti udo profeta Eliseo. Ttiaca ni ttu ca nua bittu beacacana, sunruba benni dittu lá Naamán nu beaca lasni lo yu te láni Siria beaca.

<sup>28</sup> Atti bienini iyába ca nu se'e lhe'e yo'oha nu rá Jesús, bisa'alhabaquinna. <sup>29</sup> Lacana nna udulíttebacana bebequicana Jesús lhe'e yiesiha. Atti uchecane axtaba iqui il'ya gue atta re yiesiha qui udelhacane ro'o belha'a. <sup>30</sup> Ttiaca lee nna rulha guebacani betee deyye.

### Jesús beonie unbiyuu yu'u be xxegüi lhe'e cuerpu gueniha

(Mr. 1:21-28)

<sup>31</sup> Jesús diattebe lhe'esi Capernaum nu re lo yu gue Galilea. Ca sá atti redí le ca benni Israel nna bele'ettebanie cana. <sup>32</sup> Ca benni se'e nía nna bebanbaquinna gue nu rule'enie cana, cumu rinnee ca tisa rule'e lo anque Benni ra xxeni lee.

<sup>33</sup> Lhe'e yo'o atta rudheti ca benni Israel ca tisa gue Tata Do Iyyabaaha du ttu unbiyuu yu'u be xxegüi lhe'e cuerpu gueni. Unnuha nna uresi'ana itú iqui itú leni rána:

<sup>34</sup> —¡Begüelha ri'itu! ¿Biaca dalu ruga'a guelu len ri'itu, Jesús gue Nazaret? ¿Si dalu qui ulhuxalu ri'itu? Neti gua yuba nuxa ancalu. Lu ancalu Benni do riesi anca gue Tata Do Iyyabaaha.

<sup>35</sup> Jesús bedhaca dise be xxegüiha re na:

—¡Bedhea ro'olu! ¡Bería lhe'e cuerpu gue unbiyuu-na!

Lania nna uru'unatteba be xxegüiha unbiyuuha lo yu lagüi iyába ca benni se'e nía, atti beríattebana lhe'e cuerpu gue unnuha, tsa lärgabi bedhaquinna unbiyuuha.<sup>36</sup> Iyábacana usquinna, nianna rinnaba tisa loescani rácana:

—¿Gaca gasnonni anca ca tisa rinne Ben-ni? Leni elha ra xxeni lee lhe leni elha rinnabia lhe runie mandadu ca be xxegüi-na qui eríacana, ca be xxegüi-na nna rudobacana tisa reríacana.

<sup>37</sup> Lhe'e iyába ca lhe'esi se'e nía rinnecana gue nu runi Jesús.

### Jesús beonie ixe ca benni rani

(Mt. 8:14-15; Mr. 1:29-31)

<sup>38</sup> Beríaba Jesús lhe'e yo'o atta rudheti ca benni Israel ca tisa gue Tata Do Iyyabaaha, uta'attebe lhe'e yo'o gue Simón. Nan gue nuila gue Simón nna tebabí ranbi yu'uxxattabi xilhá. Ca benni se'e nía nna unnabacabi lo Jesús qui eyonie bi'iniha.<sup>39</sup> Jesús bedeatta iquie atta te nuilaha, atti bedhaca dise xilháha. Unnuha nna beríattebana lati bi'iniha. Nuila nna snaba lania guadhattebabí benbi nu go ca benni se'e nía.

<sup>40</sup> Atti chi dia ubisa-na chadina, iyába ca benni se'e benni rani guecani gue bixaba isagüe, uchettebacana ca unnuha lo Jesús. Benniha nna bexxúa nee iqui ttu ttu ca nua qui beonie cana.

<sup>41</sup> Ixeguuba ca benni raniha bería ca be xxegüi lhe'e cuerpu guecani. Ca be xxegüiha nna ribesi'acana rácana:

—¡Lu ancalu Xi'ini Tata Do Iyyabaaha!

Ttiaca lee nna rudhaca dise cana, bittu rugüelhe cana innecana, cumu ca unnuha nna yubacana Benniha anque Cristu benni chi ga'anani Tata Do Iyyabaaha odile ca benni.

<sup>42</sup> Betteyú dila nna biría Jesús güie ttu atta nuttu benni se'e. Ca benni nna güequittebacana beguilacane atti chi bisíncana atta du Benniha nna uxacattebacana ucuedacane qui bitturu gaxa tsie.

<sup>43</sup> Ttiaca lee nna re cana:

—Raca duelha tsiaya lhe'e adí ca yiesi qui quixxi'aya ca tisa tsee gue gaxasná rinnabia Tata Do Iyyabaaha, cumu denuala udhelhe neti daya.

<sup>44</sup> Lee nna diabe lhe'e ca yiesi se'e lo yu gue Galilea riguixxi'e ca tisa gue Tata Do Iyyabaaha lhe'e ca yo'o atta rudheti ca benni Israel ca tisa gue Benniha.

## Xxenru belha bedaxxu ca benni

*(Mt. 4:18-22; Mr. 1:16-20)*

**5** Ttu libe do Jesús ro'o indattoo te láni Genesaret. Ca benni se'e nía nna ruquíhabacane de rdacacana iyienquinna ca tisa gue Tata Do Iyyabaaha rinne Benniha. <sup>2</sup> Nianna biláni Jesús chupa ca barco se'ecana gaxxaba ro'o indattooha. Ca benni rudaxxu belhaba nna chila guadícana lo ca nua, güi ca yexxa guecanihaba yu'ucana. <sup>3</sup> Jesús gopittebe lo ttu barcoha. Unnuha nna ancana gue Simón. Lee nna unnabattebe len Simón qui usigabi nua saro'o lo indaha. Lania la nna udottebe lo nua. Níali doe rule'enie ca benni se'e nía. <sup>4</sup> Atti uluxa bele'enie ca benni se'e nía nna re Simón:

—Uchee barco-ni atta re dila inda-na, gualudelha ca yexxa-na qui udaxxule belha.

<sup>5</sup> Simón nna becabibi rábi:

—Maestro, betuelaba tsitsiba uyu'utu sina, nianna niba ttu belha bittu biaxxuintu. Ttiaca gansi anába rá cuinalu nna udelhaba yexxa-ni.

<sup>6</sup> Atti bealhicabi ca yexxaha nna attulade xxen tsitsia belha deyu'u lhe'e ca nua. Ca yexxaha nna chitteba rise'e locana. <sup>7</sup> Lania la nnabettá nácabi uxicabi ca umpanieru guecabi sia lo attu barcoha qui tsiacabi uncabi yuda. Ca bi'iniha nna güiattebacabi. Irupaba ca barcoha bodisácabi cana belha. Denua nna chitteba tseetti ca nua lhe'e inda. <sup>8</sup> Atti biláni Simón bi'ini teeguaba lábi Pedro nu ucaha nna bedútteba xibibi lo Jesús rábi:

—¡Ubietta atta dua-ni Tata Xis quia, cumu neti anca nu te tulha gueni lo Tata Do Iyyabaaha!

<sup>9</sup> Aníaba rá Simón cumu rasinbi lenbi iyába ca benni se'e lenbiha de bedaxxucabi xxen tsitsia belha. <sup>10</sup> Unnuhaguuba guate Jacobo lenbi Juan, ca bi'ini beaca xi'ini Zebedeo. Lacabi riben lencabi Simón sina. Lania la rá Jesús Simón:

—Bittu gasinlu. Cumu desde nnannali unia qui acalu nu gaxi benni qui udaxxucana neda gue Tata Do Iyyabaaha.

<sup>11</sup> Dequide bebequicabi ca barcoha ro'o indattooha nna níaba bodha'ancabi iyába guecabi. Lacabi nna diattebacabi len Jesús.

**Jesús beonie ttu unbiyuu rácana ttu nu  
anca attiba yiesusu te láni lepra**

(Mt. 8:1-4; Mr. 1:40-45)

<sup>12</sup> Ttu sá atti do Jesús lhe'e ttu ca lhe'esi se'e nía, nía bisíni ttu unbiyuu yu'una isagüe raca cuerpu gueni nu anca attiba yiesusu te láni lepra. Atti bilen nua Jesús, bedútteba xibini axta liba binna lo xeani lo yu. Unnabana lo Benniha rána:

—Benni bananie neti, gansi cuinalu aca lelu nna guaguabalu isagüe quia-ni.

<sup>13</sup> Jesús becatteba nee utane cuerpu gue nua, atti ráttebe na:

—Guaracaba lasia. ¡Beacatte nnanna!

Snaba lania bitúa nu anca attiba yiesusu lána lepra raca unbiyuuhu.

<sup>14</sup> Jesús benie nua mandadu re na:

—Tsa nuttu nu quixxi'enlu. Nu unlalu nna güia guatsá du lo bixxudiha qui ugüiana lu nna chiba beacalu. Bijatte úna nu daa lolu utelu gue Tata Do Iyyabaaha, beni attiba rába lo ca ley boca'ana Moisés qui ugüia ca benni lu nna chiba bitúa isagüe gueluha.

<sup>15</sup> Ttiaca adíla dia runa ca benni gue nu runi Jesús. Ixe tsitsia benni ritupa qui iyienquinna ca tisa rinne Benniha, qui eyonie cana cue ca isagüe guecani lhe, <sup>16</sup> ttiaca Benniha nna ririesttebe rie atta nuttu benni se'e qui rinnee len Tata Do Iyyabaaha.

**Jesús beonie ttu benni daa yatti ni'a náni**

(Mt. 9:1-8; Mr. 2:1-12)

<sup>17</sup> Ttu sá nna laca do Jesús güele'en ca benni, níaguaba sia ca benni fariseo lhe ca nu rule'e nu rá lo ley boca'ana Moisés lhe. Ca unnuha nna dacana deca lhe'e ca yiesi baba lo yu gue Galilea, lo yu gue Judea lhe lhe'e yiesi Jerusalén lhe. Elha ra xxen le gue Tata Do Iyyabaaha due len Jesús qui reonie ca benni rani. <sup>18</sup> Nianna, bisíntteba ca unbiyuu dia lencana ttu unbiyuu daa yatti ni'a náni, xuaquinna nua lo breta. Lacana nna uxacacana tta'a lencana nua lhi'u lhe'e yo'oha qui quixxacan nua atta du Jesús. <sup>19</sup> Ttiaca bittu beselquinna gaxasná uncana qui tta'acana de ixeba benni se'e ro'o yo'oha. Nianna, gopittebacana iqui yo'oha lencana breta atta xua nu raniha. Atti utúattebacana beo sia iqui yo'oha qui bedocana ttu

belea. Nía ulhídacana nu raniha xuana lo breta qui utixxacana nua salhe gue ca benni se'e nía lhixxa lo Jesús.<sup>20</sup> Atti biláni Jesús, gua riaba le ca unnuha guadábe eyonie nua, laniala re nu daa yatti ni'a nániha:

—Xa unbiyuu, chiba uxía elha xen lasi gue ca tulha guelha.

<sup>21</sup> Lania nna ca nu rule'e nu rá lo ca ley boca'ana Moisés lencana ca fariseo, udulottebacana belaba lecani rácana: “¿Nú anca unbiyuu du-ni nna rinne güena gue Tata Do Iyyabaaha leni nu rán? ¿Nú aca gueni dhína elha xen lasi gue ca tulha gue ca benni? ¿Läba sunruba Tata Do Iyyabaaha aca guee dhie elha xen lasi gue ca tulha-na?”

<sup>22</sup> Ttiaca Jesús yuxabe nu rulaba le ca nua, nianna re cana:

—¿Biaca rulaba lele aná?<sup>23</sup> ¿Bi nua nu sattiru inne ttu benni? ¿Si innána: “Chiba uxía elha xen lasi gue ca tulha guelha” aca? ¿Si innána: “Guadha nna udátte” aca?<sup>24</sup> Quitti uyúle nna neti Benni unbiyuu daa iyyabaaha te elha ra xxen le quia ni yies lo yu-ni qui dhia elha xen lasi gue ca tulha gue ca benni.

Nianna re nu daa yatti ni'a nániha:

—Lu rulisa: ¡Guadha nna bodaxxutte breta xualu loenna beyyatte lhe'e yo'o gueluha!

<sup>25</sup> Snaba lania guadha nu daa yatti ni'a nániha aníba lo iyába ca nu se'e nía, atti bodaxxuttebana breta uxúana loniha güequina deyyana lhe'e yo'o gueniha ribequi xenna rán:

—¡Xxeni ra le Tata Do Iyyabaaha!

<sup>26</sup> Iyába ca nu se'e nía bebanxxattaquinna nianna ulequi xenttebacana Tata Do Iyyabaaha. Itú rasbaquinna rácana:

—¡Nasá begüiari ttu nu benna bebaninri!

### Jesús uxie Leví

(Mt. 9:9-13; Mr. 2:13-17)

<sup>27</sup> Dequide unnuha nna beríatteba Jesús lhe'e yo'oha. Nía bilánie ttu unbiyuu lána Leví. Unnuha nna ancana güequixa. Lana nna níaba dona atta ribía ca nu ruquixacana ca benni belhi nu deyya Roma. Jesús nna ráttebe na:

—¡Utá betteno neti!

<sup>28</sup> Leví nna udulíttebabí diabi len Benniha. Níaba bodha'anbi itúba sina runbiha.

<sup>29</sup> Dequilaha nna bentteba Leví ttu laní xení lhe'e yo'o gueniha de do Jesús nía. Ixeru ca güequixa lhe adíba ca benni lhe siacana ro'o mexaha go etta len ca benniha. <sup>30</sup> Ttiaca ca fariseo sela len ca nu rule'e nu rá lo ca ley boca'ana Moisés, udulottebacana unne güecana gue ca bi'ini rudheti ca tisa rule'e Jesús, rácana:

—¿Biaca siale ri'a role len ca güequixa-na lhe len ca nu runi nu lä anca tsee-na lhe?

<sup>31</sup> Jesús becabie guecani re cana:

—Ca benni bittu rani-na lägabi reasaquinna nuxa unna cana ramedi. Ca nu rani-na liba reasaquinna nu eyonna cana. <sup>32</sup> Neti nna läga daya qui gaxia ca benni runi nu anca tsee, daba neti qui gaxia ca nu runi nu lä anca tsee, qui oduxiyyancana odaxxucana neda gue Tata Do Iyyabaaha.

### Rinnaba tisacana Jesús gue nu utte ubina lhe'e benni

(Mt. 9:14-17; Mr. 2:18-22)

<sup>33</sup> Laniala nna rácana Jesús:

—¿Biacala ca benni rudheti ca tisa rule'e Juan satíaba rutte ubina lhe'ecani, satíaba rinnecana leni Tata Do Iyyabaaha lhe? Anáguuba run ca nu rudheti ca tisa rule'e ca fariseo-na lhe, ttiaca ca benni rudheti ca tisa rule'elha nna satíaba ri'a ro cana.

<sup>34</sup> Jesús becabittebe guecani re:

—Läga dica unle utte ubina lhe'e ca benni se'e atta aca laní gue unbiyuu utsá nániha, laca sna doba unbiyuuhu len lacana. <sup>35</sup> Ttiaca chi isía sá atti itúa unbiyuu utsá nániha len lacana. Laniarguuba nna cu'u ubina lhe'ecani.

<sup>36</sup> Utixxi'aguabanie cana ttu ejemplu, nianna re cana:

—Läganu benni te ichúna saro'o ro'o xo cubi gueniha qui egú'una atta chi bisú gue xo yaxxu gueniha. Cumu gansi unna anía nna unnittibana xo cubi gueniha, bittuguuba etoni lari yaxxuha eyo'o lari cubi atta bisú gueniha lhe. <sup>37</sup> Nuttuguuba nu benni te riga'ana vinu cubi nu chi galala lhe'e ca yeti yaxxu nu rixuu attiba ttu re'e. Cumu vinu cubiha nna unba nua isú yeti yaxxuha gansi chi dia nua ralana, lania nna ilalba vinuha, ise'eloguuba ca yetiha lhe. <sup>38</sup> Larcala nna lhe'e yeti cubi liba tta'a vinu cubiha, lania nna läga tsia latti vinuha lhe yetiha lhe. <sup>39</sup> Nuttuguuba benni te ri'ana

lo vinu chi ula, lenla nna aca leni i'iyana vinu bittu chi ula. Cumu innáttebana: "Vinu chi ula-na, unna ancana nu tseeru."

### **Jesús anque Benni bananie sá redí le ca benni Israel**

(Mt. 12:1-8; Mr. 2:23-28)

**6** Ttu sá atti redí le ca benni Israel, utee Jesús die yu'e neda lhe'e ca yu atta te ca xua xuxtila. Ca benni rudheti ca tisa rule'e nna uchecuttebacabi iqui ca xuaha, atti uxubitteba las nácabi benniha qui utocabi. <sup>2</sup> Nianna ttulhe ca fariseo nna rácaná:

—¿Biaca runle nu bittu ga'ana unri la sá redí leri ri'i ca benni Israel?

<sup>3</sup> Jesús becabie re cana:

—¿Si bittuba chi belabale lo ca yitsi gue Tata Do Iyyabaaha atta rixxi'a gue nu beni David ttu libe atti utunbi lenbi ca nu dia lenbiha? <sup>4</sup> David nna uta'abi lhe'e yotu gue Tata Do Iyyabaaha, guaxxíbi ca ttaxtila chi anca le'a gue Benniha sia nía qui utobi, begüeebi ca benni dia lenbiha lhe. Labi nna läga dica gobi ca ttaxtilaha, cumu sunruba ca bixxudiha ga'ana gocabi benniha.<sup>a</sup>

<sup>5</sup> Ráguate cana:

—Neti Benni unbiyuu daa iyyabaaha anca benni banani sá redí leri-ni.

### **Jesús beonie ná unbiyuu nu ubisi'a ttu lha'a nániha**

(Mt. 12:9-14; Mr. 3:1-6)

<sup>6</sup> Attu sá atti redí le ca benni Israel, uta'atbeba Jesús lhe'e yo'o atta rudheti ca benni Israel ca tisa gue Tata Do Iyyabaaha. Lee nna udulottebe bele'enie ca benni se'e nía. Níaguuba du ttu unbiyuu xi ná derechu gueni. <sup>7</sup> Ca nu rule'e nu rá lo ca ley boca'ana Moisés lhe ca fariseo lhe ridunocana Jesús gansi güeyonie nua sá redí lecaniha qui te ro'ocani udelhiyyacane. <sup>8</sup> Ttiaca lee nna yuxabe bixa racaquinna. Nianna re unbiyuu nu ubisi'a nániha:

—Udulí nna udú salhe-ni.

Unbiyuuhá nna udulíttebana udúna salheha. <sup>9</sup> Laniala nna rá Jesús ca benni se'e nía:

---

<sup>a</sup> 6:4 1 Samuel 21:3-6

—Neti nna innába tisa le: ¿Bi ga'ana lo ca ley boca'ana Moisés unri sá redí leri ri'i ca benni Israel? ¿Si unri nu anca tsee, aca? ¿Si unri nu lä anca tsee, aca? ¿Si odilári ttu benni lo elhuttiha, aca? ¿Si ugüelhari nua gattina, aca?

<sup>10</sup> Begüiabe lo iyába ca nu se'e sabi'aba atta due nna ráttebe unbiyuuha:

—Belhí nálu.

Unbiyuuha nna belítteba náni, nianna beacattebana. <sup>11</sup> Ttiaca ca fariseo lencana ca nu rule'e nu rá lo ca ley boca'ana Moisés nna bisa'axxattaquinna nianna udulottebacana unnaba tisa loescani gue bixa anca nu uncana leni Jesús.

### **Jesús becuee tsi'inu (12) ca benni iche ca tisa guee**

(Mt. 10:1-4; Mr. 3:13-19)

<sup>12</sup> Laniaguaba nua güia Jesús lo ttu lhilhi güenne leni Tata Do Iyyabaaha. Níaba udoe betú elaba rinnee len Benniha. <sup>13</sup> Atti guaniha nna uxie ca benni rudheti ca tisa rule'e, nianna becuee tsi'inu (12) ca bi'iniha. Lacabi nua begüee lácabi apóstol. <sup>14</sup> Aní lá ca bi'iniha: Simón bi'ini begüee lábi Pedro, Andrés betsi Simón lhe Jacobo lhe Juan lhe Felipe lhe Bartolomé lhe <sup>15</sup> Mateo lhe Tomás lhe Jacobo xi'in Alfeo lhe Simón bi'ini teequinna lábi Zelote lhe <sup>16</sup> Judas betsi Jacobo lhe Judas Iscariote nu betena Jesús las ná ca nu betticana Benniha lhe.

### **Jesús rule'enie ixe tsitsia ca benni**

(Mt. 4:23-25)

<sup>17</sup> Atti beadi Jesús lo lhilhiha lenie ca bi'iniha nna. Níaba ulede lo ttu latsi lenie ca benni rudheti ca tisa rule'e. Ixeru ca benni deno Benniha se'e nía, ca benni se'e lhe'e yiesi Jerusalén lhe ca benni se'e itúba lo yu gue Judea lhe ca benni se'e lhe'esi lá Sidón lhe lhe'esi lá Tiro lhe ca nu se'e ro'o indattooha. Ca benni-ni nna bisíncana nía qui iyienquinna nu rule'e Jesús, qui eyonie ca nu raniha lhe.

<sup>18</sup> Reacaguaba ca benni ruyúxxatta elha disa yu'u be xxegüi lhe'e cuerpu guecani lhe. <sup>19</sup> Iyába ca benni runcana duelha canacana ro'o xo Jesús, cumu leni elha ra xxeni lee guee reonie iyába ca nu raniha.

**Jesús re ca benni: Carbárule lhe carusi'irule lhe**  
**(Mt. 5:1-12)**

<sup>20</sup> Jesú斯 begüiattebe lo ca benni rudheti ca tisa rule'e, nianna re ca bi'iniha:

—Carbárule, lebi'i ca benni bittu te gueni, cumu lebi'i ancale benni innabia Tata Do Iyyabaaha.

<sup>21</sup> 'Carbárule, lebi'i ca benni se'ele ritunle nnanna cumu isía sá atti elarenle de gole. Carbárule lebi'i ca benni se'ele ribesle, cumu chi isía sá atti edáquinle.

<sup>22</sup> 'Carbárule, atti usia le ca benni le, atti bitturu ulabicana le lhe atti bitturu aca uyúcan le lhe. Carbárule atti cu'u ni'acan le attiba ttu nu runi nu lä anca tsee lo ni'a gue de ria lele neti Benni unbiyuu daa iyyabaaha. <sup>23</sup> Gualedacani la sá atti satele aná, gualebequi itta lele lhe cumu xxeni anca nu tsee dhíle iyyabaaha. Cumu anáguauba ben ca benniola gue ca unná, bittu uca uyúcana ca benni uca profeta gue Tata Do Iyyabaaha.

<sup>24</sup> 'Ttiaca carusi'irule lebi'i ca benni te gueni, cumu sunruba ni yies lo yu-ni se'ele xen su lasi.

<sup>25</sup> 'Carusi'irule lebi'i ca benni yiela rábale nnanna cumu chi isía sá atti ttunle.

'Carusi'irule lebi'i ca benni se'ele redaquinle nnanna cumu chi isía sá atti ixxá ro'ole.

<sup>26</sup> 'Carusi'irule lebi'i ca nu iyába benni rinne tseecana guele, cumu anába ben ca benniola gue ca unná len ca nu ben lecani rávana dequi ucacana profeta gue Tata Do Iyyabaaha.

**Aquinle gue ca nu lä raca uyúcan le**  
**(Mt. 5:38-48; 7:12)**

<sup>27</sup> 'Ttiaca lebi'i ca benni rienini nu ria-ni nna neti rpea le: Aquinle gue ca nu bittu raca uyúcan le-na, lhatsiru gualudú lele len ca nu rutía di lecan le-na lhe. <sup>28</sup> Gualinnaba len Tata Do Iyyabaaha qui salía tseena ca nu riguecana iquile-na, gualnnaba len Tata Do Iyyabaaha aca lanie ca nu rudhaca güecan le-na lhe. <sup>29</sup> Gansi nuxa ugüena ttu ladu xxagalu, odequilu attu ladu qui ugüena, nuxa cuana gabana guelha begüeeguabana mixa guelha. <sup>30</sup> Nuxaba bixa innában lu nna begüee nua nu rinnabana, nuxa cuana ttu bixa guelu

nna bittu ennabal nua.<sup>31</sup> Gualun len ca benni gaxasná raca lele uncana len lebi'i.

<sup>32</sup> Cumu gansi sunruba ca nu racaquinna guele-na raquinle guecani, lania nna tsa lägabi bala'ana rele gue nu runle. ¿Läba ganna anáguaba run ca nu run nu bittu anca tsee-na? Racaguabaquinna gue ca nu rácani guecani.<sup>33</sup> Gansi sunruba len ca nu run tsee len lebi'i run tseele, lägabi bala'ana rele gue nu runle, cumu anáguaba run ca nu run nu lä anca tsee-na.<sup>34</sup> Gansi rute gannale nu te guele suntteba len ca nu ribedale odequican guele, lägabi bala'ana rele gue nu runleha. Cumu anáguaba run ca nu run nu lä anca tsee-na len adí ca nu runi nu lä anca tsee-na, de runcana gosi'iba ca unna guecani.<sup>35</sup> Lebi'i nna nu unlale nna: Aquinle gue ca nu bittu raca uyúcan le-na, un tseele lencana lhe gualute ganna nu rinnabacana, bittu aquinle utevana ttu bixa lenle de bete gannale guecani. Análiba nna dhíle ttu elha tsee xeni lhe acale xi'in Tata Dios Benni do Iyyabaaha lhe cumu Benna anque Benni tsee len ca nu lä du ta lequinna lhe len ca nu bittu rute xquixaru len Ben-na lhe.<sup>36</sup> Gualaca benni ratúa leni attiba Tata gueri do iyyabaaha anque Benni ratúa lee.

### Bittu cuale bala'ana gue benni

(Mt. 7:1-5)

<sup>37</sup> Bittu oquinna iquile anca benni nu te tulha gueni qui bittu oquinna iqui Tata Do Iyyabaaha ancale nu te tulha gueni. Bittu udelha iyyale benni, qui bittu udelha iyya Tata Do Iyyabaaha le. Gualdhí elha xen lasi, qui dhi Tata Do Iyyabaaha elha xen lasi guele.<sup>38</sup> Gualute len benni subi nu reasaquinna Tata Do Iyyabaaha gotebe guele. Lee nna gurixxibiabe lhatsiru guele, uquí tsutsue uxtal guele lhe ucuibie na lhe udobinie loni eyonne guele, cumu attiba rurixxibiabale rutele, anáguaba ebixxibia edíle.

<sup>39</sup> Jesús utixxi'enie cana ttu ejemplu, nianna re cana:

—¿Si guaca gue ttu nu xua loni nneruna lo attu nu xua loni? ¿Läba ganna irpaba ca nua itoetticana lhe'e belea?<sup>40</sup> Nu rudhetiha nna läga anca nua nu yuru atti benni anca maestro guenihá, ttiaca nu udonia leni aquinna gansi chi be'eyuna uquinna lania nna acabana attiba benni bele'enna na.

<sup>41</sup> ¿Biaca ridolu rugüialu libitsu yu'u lhe'e iyya lo betsilha, nianna bittu retábinlu gue yaga yu'u lhe'e iyya lolha? <sup>42</sup> ¿Bi ro'olu te gálu betsiluha: "Betsia, begüeelha cueaya libitsu yu'u lhe'e iyya lolha", inqui lu nna bittu ritedeenlu análí de xxeni anca yaga yu'u lhe'e iyya lolha? ¡Lu ancalu nu ni lo ni tisaba runi dequi ancalu nu runi nu anca tsee! Ulequixa yaga yu'u lhe'e iyya lolha qui ilá tseenlu cuequilu libitsu yu'u lhe'e iyya lo betsilha.

### Nu run benni rule'e lo nuxa ancana

(Mt. 7:15-20)

<sup>43</sup> Lägabi yaga tsee te ribía nu lä anca tsee gueni, lä caguaba yaga nu bittu anca tsee cuia nu tsee gueni lhe. <sup>44</sup> Cua ttu ttu yaga nna nu ribía loniha rixxi'a bixa yaga nua. Bittuguaba relhida benni igu lo ca ya yitsi-na lhe lä redíguabari besuli lo ca yitsi rigaa-na lhe. <sup>45</sup> Benni du lhatsiru leniha nna tseeba rinnena, cumu rinnebana nu tsee re lhe'e lastooni. Benni lä du tsee leniha nna nu bittu anca tseeguaba rinnena, rinnebana nua nu bittu anca tsee re lhe'e lastooni. Cumu nu re lhe'e lastooba benni riría ro'oni.

### Nu guate chupa ca benni bedo yo'o

(Mt. 7:24-27)

<sup>46</sup> ¿Biaca neti rále Benni bananie ri'itu, nianna bittu runle nu rpea le? <sup>47</sup> Neti quixxi'atia le gaxasná anca ca benni risía len neti, ca nu rienquinna ca tisa quia-ni nna rudocana tisa runcana nu rá ca tisa-na. <sup>48</sup> Unnuha ancana attiba unbiyuu nu atti udulona bedona ttu yo'o nna de'axaba uche'enna axta lhi'u, lenla uttixxana cimientu gue yo'oha lo iyya tta'a. Atti bisía bixeni yooha nna inda nna guatsu'uttebana itú iqui itú leni cu'e yo'oha, ttiaca ni lä udána uttána nua, cumu tsitsiba anca cimientu gue nua xua lo iyya tta'aha. <sup>49</sup> Ttiaca benni rieninna nu ria, nianna bittu rudona tisa unna atti ria, lana ancana attiba ttu unbiyuu bedo yo'o gueni atta re cuenta yuba, nianna bittu uche'enna qui quixxana cimientu gue nua. Bixenba yooha nna inda nna guatsu'uttebana itú iqui itú leni cu'e yo'oha. Unnuha nna ubixxi lobana, tsaba bise'e lo itúbana.

## **Jesús beonie nu riben sina gue nu lo gue ca soldadoha**

(Mt. 8:5-13; Jn. 4:43-54)

**7** Dequide uluxa unne Jesús len ca benni rudo nagacani gue nu rule'e nna diattebe lhe'esi Capernaum. <sup>2</sup>Lhe'e yiesiha nua do ttu soldado gue Roma ancana nu banani ttu gayua (100) ca soldado. Ttu benni riben sina gue nua, nu racaxxattinna gueniha nna chiba ratti nua tena ranina. <sup>3</sup>Atti bienini nu lo gue ca soldadoha nu rá ca benni rinnecana gue nu runi Jesús, udhelhattebana ttulhe ca nu teru elha rieni guecani gue ca benni Israel sencana ruegu lo Jesús qui tsie eyonie nu raniha. <sup>4</sup>Ca unnuha nna güiattebacana guayúcana Jesús. Tsitsiba use'ecana bencana ruegu loe, rácane:

—Unbiyuha nna ralhabana unlu na yuda, <sup>5</sup>cumu lana raquinna gue ca benni guer-i-na, chiguaba bedona ttu yo'o atta ritupatu rudhetitu ca tisa gue Tata Do Iyyabaaha lhe.

<sup>6</sup> Jesúis diattebe len ca unnuha, ttiaca atti chi deoba isíne atta do yo'o gue nu anca nu lo gue ca soldadoha nna udhelhatteba nu loha ca nu se'e tsee lenna güiacana guayúcana Jesús rácane:

—Aní rá nu lo gue ca soldado-na: Tata, bittu ichacha iquili quia, cumu neti nna bittu elha ralha ga'alu lhe'e yo'o quia-ni. <sup>7</sup>De unnuha nna nuarca niba lä beaxtia ita cuinaga neti ettetsadua lolu. Lu nna suntteba unne uná, beaca, nu riben sina quia-na nna eyacattebana. <sup>8</sup>Cumu neti nna ancaguaba nu rudo tisa gue ca nu rinnabiacana neti, anáguaba rinnabiaguaba ca soldado quia-na lhe. Atti rpea ttu ca unná: “Güia nía”, tsibunna, atti rpea attuna: “Utá nii”, gua ritabana. Atti runia mandadu nu riben lo sina quia-na bixa unna unba nua nu upea na.

<sup>9</sup> Atti bienin Jesús nu rá nua nna bebanbanie gue nua. Laniala bodequi loe re ca benni dia denalha:

—Neti nna gualíbatia ria: Niba ttu ca benni quia anca benni Israel bittu chi guatti'aya ria tsitsi leni atti ria le unbiyuu-ni.

<sup>10</sup> Atti besin ca nu güia guanne len Jesús lhe'e yo'o gue nu loha nna biláquinna nucala beaca nu riben sinaha.

## **Jesús benie beacani xi'ini ttu nuila bidabi**

<sup>11</sup> Läga bicaga bisá dequide nu uca-ni, Jesús diattebe lhe'e ttu yiesi te láni Naín. Diaguaba lanie ca benni rudheti ca tisa rule'e lhe ixe tsitsia adí benni lhe. <sup>12</sup> Atti chi bisíne gaxxaba ro'o puerta du

ro'o yiesiha, nía bilánie ca benni diacana güecatsi ttu nu yatti. Nan gue uncuiti uttiha nna ancana nuila bidabi, tturu nua xi'inni do. Ca benni gue yiesiha nna ixerucana dia lencan nuilaha.<sup>13</sup> Atti biláni Jesús nuilaha nna guatúatteba lee nua, nianna re na:

—Bittu cueslu.

<sup>14</sup> Laniala nna ubigue, guattane ro'o atta xua nu yattiha. Ca nu nujacan unnuha nna uledattebacana. Jesús nna unnettebe re nu yattiha:

—Uncuiti, lu rulisa, guadha.

<sup>15</sup> Lania nna uncuiti chi uttiha nna beacatteinna guadhattebana udonia, atti udulottebana unnena. Jesús botettebe na len nan gueniha. <sup>16</sup> Iyába ca nu se'e nía nna usixxattaquinna atti ulequi xencana Tata Do Iyyabaaha rácana:

—Ucaxxeba ttu profeta ra xxeni leni len ri'i.

Rágubacana:

—Bisíaba Tata Do Iyyabaaha len ri'i qui aca lanie ca benni guee-ni.

<sup>17</sup> Itúba lo yu gue Judea lhe lhe'e adí ca yiesi se'e bi'a dhacaba nía lhe udá tisa gue nu beni Jesús.

### Juan bi'ini rugadi indaha raca lebi una tseebi gue Jesús

(Mt. 11:2-19)

<sup>18</sup> Ca benni rudheti ca tisa rule'e Juan bi'ini rugadi indaha, utixxi'aquinbi bi'iniha gue iyába nu run Jesús. Laniala nna uxbi chupa ca bi'iniha,<sup>19</sup> nianna udhelhabí ca bi'iniha sannaba tisa tseecabi Jesús gácabi Benniha gansi cuine nua benni chi ga'anani Tata Do Iyyabaaha isía, si cuedabacabi attu benni subi, aca.<sup>20</sup> Atti chi bisína ca benni udhelha Juan atta du Jesús, ráttebacabi Benniha:

—Juan bi'ini rugadi ca benni inda udhelhabí ri'itu len cuinalu qui innába tisatu lu: “¿Si cuinalu nua Benni chi ga'anani Tata Do Iyyabaaha isía? ¿Si cuedabatu attu benni subi aca?”

<sup>21</sup> Snaba lania beoni Jesús ixe tsitsia ca benni rani yu'u ixe loba isagüe, ca nu raca cuerpu guecani lhe ca nu yu'u be xxegüii lhe'e cuerpu guecani lhe ixe tsitsiaguaba ca nu xua loni benie biláquinna lhe. <sup>22</sup> Laniala becabí Jesús re ca bi'iniha:

—Gualeyya nna gualquixxi'ani Juan gue nu chi begüiale runia, gue nu chi bieninle lhe. Gualgás na: “Ca nu xua loquinna riláquinna

ca nu xi-na ridacana lhe ca nu raca cuerpu guecani nu anca attiba yiesusu te láni lepra reacacana lhe ca nu cuesu-na rienquinna lhe ca nu yatti-na reacaquinna lhe ca benni bittu te guecani chi runacana ca tisa tsee gue gaxasná rodilá Tata Do Iyyabaaha ca benni lhe.”<sup>23</sup> Carbáru ca benni bittu rudhequicani ria lecani neti lo ni'a gue nu riláquinna runia.

<sup>24</sup> Atti chi güequi ca benni udhelha Juan, udulotteba Jesús utixxi'enie ca benni se'e nía gue Juan. Nianna re:

—Atti biríale diale güegüia Juan lo yu bisiha, ¿gasná anca benni ribedale ilenle? ¿Si ribedabale ilenle ttu unbiyuu bittu du tsitsi len nu rulaba leni attiba ttu yittixtila dia dedaaba len be-na?<sup>25</sup> Gansi läba anía anca, ¿núla biríale begüiale? ¿Si biríale qui ugüiale ttu unbiyuu nucu xo tsee gueni nu daca yaxi? Lebi'i nna gua yubale, ca nu nucu xo tsee guequinna lhe ca nu se'e redí baa nu re'oba lecani lhe lhe'e yo'o lagüi atta sia ca nu rinnabia xenin liba siacana.<sup>26</sup> ¿Núla nua biríale begüiale ganna? ¿Si ttu benni anca profeta? Neti ria le gualíba. Juan ancabi bi'ini ra xxenru lebi atti ttu benni anca profeta.<sup>27</sup> Gue Juan-ni nua rinne Tata Do Iyyabaaha lo ca sitsi guee-na atta rulise Xi'inie re Benniha:

Neti idhelha ttu benni nneruna lolu qui quixxi'ana ca tisa quia-ni.

Bi'iniha idhalbi neda guelu.<sup>a</sup>

<sup>28</sup> Neti ria, delo iyá ca benni chi uli yies lo yu-ni, läga chi biría ttu profeta ra xxenru leni atti Juan bi'ini rugadi inda-na. Ttiaca benni bittu anque benni ra xxeni leni sela ca benni rinnabia Tata Do Iyyabaaha, benniha la anque nu ra xxenru lee atti Juan.

<sup>29</sup> Iyába ca benni bienin ca tisa-ni, axta ca güequixa ridí belhi deyya Roma lhe boquinna iquicani gualíba tseeba anca neda gue Tata Do Iyyabaaha, denua nna begadi Juan cana inda.<sup>30</sup> Ttiaca ca nu fariseo lencana ca nu rule'e nu rá lo ca ley boca'ana Moisés, ulu'ula ni'acani nu raca le Tata Do Iyyabaaha unie len lacana, läga uca lecani ugadi Juan cana inda.<sup>31</sup> Jesús re:

—¿Nú nua ttu innía anca attiba ca benni se'e nnanna? ¿Nú nua ttu rule'e tu ro'oba attiba lacana?<sup>32</sup> Lacana ancacana attiba ca unto ribía atta raca i'iyá-na, ribesi'en loescani rávana: “Chi becuestu ca pipi guetu-ni nna bittu beya'ale. Chiguaba bilhatu nu rulha ca benni

---

<sup>a</sup> 7:27 Malaquías 3:1

gue ca nu yatti-na lebi'i nna bittuguaba uresle." <sup>33</sup> Cumu bisía Juan bi'ini rugadi inda-na, bittu robi ttaxtila, bittuguaba ri'iyabi vinu lhe lebi'i nna rálale: "Nu xxegüihaba du leni unná." <sup>34</sup> Bisíaya, neti Benni unbiyuu daa iyyabaaha, ri'a roa nna lebi'i nna rálale: "Unbiyuu-ni nna ancana ttu nu ri'a roxxatta, ttu nu do tsee len ca güequixa-na lhe len ca nu te tulha guecani lhe." <sup>35</sup> Ttiaca atti rilenri gaxasná run ca xi'ini Tata Do Iyyabaaha, lania nna ritedeenri, elha rieni rapa Tata Do Iyyabaaha nua rapa ca bi'iniha.

### **Jesús güie lhe'e yo'o gue Simón nu anca fariseo**

<sup>36</sup> Ttu fariseo unnabana lo Jesús tsie go etta len lana. Atti ute'e lhe'e yo'o gue fariseo-ni nna udottebe ro'o mexaha go etta.

<sup>37</sup> Lhe'esiha nua do ttu nuila daa tisa gueni ancana nu requi satsa. Atti bina nuilaha do Jesús go etta lhe'e yo'o gue fariseo-ni nna güiattebana leni ttu cantito ancana leni ttu iyya tsee nu te láni alabastro, sa ttittina seti rure xixxi. <sup>38</sup> Lana nna ribestsitsiana urena atta se'e ca ni'a Jesús. Len inda ribesnaba utína ca ni'a Benniha, len itsiquiniha nna bodibisna ca ni'a Benniha, betságuaba loni ca ni'e lhe bedona ca ni'e seti lhe. <sup>39</sup> Atti biláni fariseo nu uxna Jesús lhe'e yo'o gueniha nna belabatteba leni rána: "Gansi gualíga anca unbiyuu-ni ttu profeta, lania nna guate daabinna nú nuila unná rudaxxuna ca ni'ani, gue bi runi unná lhe cumu unná nna nuila runi nu satsa bunna." <sup>40</sup> Laniala nna rá Jesús:

—Simóni, raca lasia upea lu ttu tisa.

Lana nna rána:

—Unne Maestro.

<sup>41</sup> Laniala rá Jesús:

—Use'e chupa ca nu daa belhi gue la ttuba unbiyuu ribequi belhiha. Ttuna dana belhi gue lhiaxa gayu gayua (500) sá sina, attuna nna dana belhi gue lhiaxa medi gayua (50) sá sina. <sup>42</sup> Nianna niba ttucana bittu te guecani qui quixacana. Nu beaca gueni belhiha nna uxíbana elha xen lasi gue irupabacana. Nnanna nna gus sanga neti, ¿nú delo irupa ca nua racarquinna gue benni uxí elha xen lasi guecaniha?

<sup>43</sup> Simón nna becabina rána:

—Neti racatia nna nu uxína elha xen lasi gue xxenru belhi dana. Jesús re na:

—Gualíbinlu tseeba becabilu.

<sup>44</sup> Laniala nna bodequi loe begüie nuilaha, nianna ráttebe Simón:

—¿Gua rilenlu nuila-na? Neti atti uta'aya lhe'e yo'o guelhi, lu nna bittu bennalu inda qui eyari ni'aya, ttiaca nuila-ni nna utína ca ni'aya-ni leni inda uresna, nianna bodibisna cana leni itsiquini.

<sup>45</sup> Lu nna läga betsá lolu neti, ttiaca nuila-ni nna atti uta'alía lhe'e yo'o guelhi bittu redí leni rutsá loni ni'aya. <sup>46</sup> Bittuguuba utabilu seti iquia lhe. Nuila-ni nna chi utabina seti rure xixxi ca ni'aya-ni.

<sup>47</sup> Denuala nna rpea lu, nuila-ni nna racaxxattinna quia. Cumu de chi te elha xen lasi gue ixeru ca nu lä anca tsee chi benna ttiaca nu lattirba elha xen lasi ridía gueni nna lattirguuba raquinna quia.

<sup>48</sup> Jesús nna re nuilaha:

—Chiba uxía elha xen lasi gue ca nu lä anca tsee chi benlu-na.

<sup>49</sup> Adí ca nu sia go etta ro'o mexaha nna udulottebacana unnaba tisa loescani rácana:

—¿Nú anca unní nna ridíguabana elha xen lasi gue ca nu lä anca tsee run benni lo Tata Do Iyyabaaha?

<sup>50</sup> Ttiaca Jesús unnerle adí re nuilaha:

—De güia lelu Tata Do Iyyabaaha nuarca chi ulálu lo tulha guelu. Xen su lelu beyya lislu.

### Ca nuila sela ca benni deno Jesús

**8** Dequide lania nna diatteba Jesús lhe'e iyába ca yiesi se'e ca nía, lhe'e ca lhe'esi lhe, rixxi'e ca tisa tsee gue gaxasná rinnabia Tata Do Iyyabaaha. Iyába tsil'inu (12) ca bi'ini rudheti ca tisa rule'e diacabi len lee. <sup>2</sup> Diaguuba ttulhe ca nuila ca nu bebea Jesús be xxegüi yu'u lhe'e cuerpu guecani lhe ca nu uyu'u isagüe chi beaca lhe. Len ca unní sela María bi'ini teeguuba lábi Magdalena bi'ini bería gasi (7) be xxegüi lhe'e cuerpu guebi, <sup>3</sup> Juana nuila gue unbiyuu lá Chuza nu baninna iyába nu te gue Herodes lhe, Susana lhe, ixerba adí ca nuila lhe. Lacana nna nu anca guebacani bedaxxucana qui biyo'o nu reasani Jesús lanie ca bi'ini tsil'inu (12) rudheti ca tisa rule'e.

### Ejemplu gue ttu benni rуделха xua xuxtila

(Mt. 13:1-9; Mr. 4:1-9)

<sup>4</sup> Ixe tsitsia benni daa lhe'e ixeru ca yiesi güiacana atta do Jesús. Lee nna utixxi'attebanie cana ttu ejemplu, re cana:

<sup>5</sup>—Ttu benni güiana güedelha xua xuxtila lo yu gueniha. Atti diana rуделhana xuaha nna ttulhe ca xuaha nna binnaque lo neda. Ca nu rite lo nedaha nna beleabacana iqui ca xuaha, nianna ca binni-naba utocana ca xuaha. <sup>6</sup>A ttulhe ca xuaha nna binnaque atta se'e iyya, ttiaca atti be'eyu ca xuaha nna ubisbaque, cumu de bittu lhupa te atta se'e ca iyyaha. <sup>7</sup>A ttulhe ca xuaha nna biyinnaque lhe'e atta daa ca ya yitsi. Ca ya yitsiha nna ttuba bixencana len xuaha, denua nna nuarca betsenquinna ca xuaha. <sup>8</sup>Adí ca xuaha nna binnaque lo yu tsee. Larcala nna bixenbaque, ttu ttu gayuatteba xua bete ttu ttu iqui ca xuaha.

Uluxaba unne Jesús ca tisa-ni nna unnettebe idisa re:

—Atta gua rudo nagale gue nu ria, gualun duelha qui sadú lele.

<sup>9</sup>Ca bi'ini rudheti ca tisa rule'e Jesús unnaba tisacabi Benniha bixa dia le ejemplu utixxi'e. <sup>10</sup>Jesús re cabi:

—Lebi'i nna gua runba Tata Do Iyyabaaha qui sadú lele gue gaxasná rinnabie, nu bittu ritedaani ca benni. Ttiaca adí benni nna leni ca ejemplu liba rinnea rulisa cana, qui masquiba tticaxa rugüiacana, bittu iláquinna, masquiguuba tticaxa rudo nagacani bittu sadú lecani.

<sup>11</sup>'Aníba dia le ejemplu-ni innána: Xua xuxtilaha nna anque tisa gue Tata Do Iyyabaaha. <sup>12</sup>Ca xua binna lo nedaha nna anque attiba ca bennirienini ca tisa gue Tata Do Iyyabaaha, ttiaca nu xxegüiha nna risinttebana raleana ca tisaha lhe'e lastoocani qui bittu tsia lecani, anía nna bittu lhácana. <sup>13</sup>Ca xua binna atta se'e ca iyyaha nna anque attiba ca benni, atti rienquinna ca tisa-na attulade re'o lecani recabicana udaxxucana neda gue Tata Do Iyyabaaha. Ttiaca cumu läga be'an tsitsi ca tisaha lhe'e lastoocani, nuarca läga isá ria lecani. Larcala atti risía ratecana ruyúcana ttu elha disa nna ready gattecacana lo neda gue Tata Do Iyyabaaha.

<sup>14</sup>Ca xua xuxtila biyinna lhe'e yitsiha nna anque attiba ca bennirienini ca tisa-ni, ttiaca nu richacha iquicani gue nu anca gue yies lo yu-ni lhe gue nu ridá lecani acacana nu gattaru guecani lhe gue edí baacana nu te yies lo yu-ni lhe bittu rugüelhan cana tse'e tsitsicana lo neda gue Tata Do Iyyabaaha. <sup>15</sup>Ttiaca ca xua binna lo yu tseeha nna anque ca benni nu itú iqui itú lecani rienquinna ca tisa-na, rigúa tseecana nu rá benna lhe'e lastoocani lhe. Denua nna rise'etsitsicana lhe satíaba se'ecana runcana nu anca tsee lhe.

**Ejemplu gue ttu gui rudani lhe'e ttu yo'o**  
*(Mr. 4:21-25)*

<sup>16</sup> 'Ni ttu benni bittu rugalhana ttu gui, lenla nna udaxxuna ttu bixa uttodhina iqui nua, niguaba lä rudúna nua xan cama gueniha lhe. Lugar quiba unnuha nna uadolana nua ttu atta yadha qui udani nua gue ca benni ga'a lhe'e yo'oha. <sup>17</sup> Cumu tsa lägabi te ttu bixa te gatsi, lä tsanni lobana, niguaba lä caa ttu nu raca sigá, la isíaba sá atti iríana lolia qui una iyá benni na.

<sup>18</sup> 'Larcala nna tsitsi gualdo nagale gue nu rieninle. Cumu ca benni rudo nagacani itú iqui itú lecani gue nu ria, Tata Do Iyyabaaha unie sadúru lecani adí, ttiaca ca benni bittu raca lecani iyienquinna gue nu ria nna axtala nu racaquinna yucana, itúa.

**Nan gue Jesús len ca betsie reguilacane**  
*(Mt. 12:46-50; Mr. 3:31-35)*

<sup>19</sup> Nan gue Jesús lenbi ca betsí benniha bisíncabi atta due. Ttiaca bittu uca isíncabi axtaga atta du Jesús cumu ya de re benni se'e nía.  
<sup>20</sup> Laniala utixxi' aquinna Jesús rácane:

—Ni nan gueluha lenbi ca betsiluha se'e lhe'eli'a gue yo'o-ni.  
 Lacabi nna raca lecabí inne lencabi lu.

<sup>21</sup> Jesús becabie re:

—Ca benni rudo nagacani ca tisa gue Tata Do Iyyabaaha, nianna runcana nu rá ca tisa-na, ca unná liba anca nan quia lhe betsia lhe.

**Jesús benie bebe si ttu iyya be idí**  
*(Mt. 8:23-27; Mr. 4:35-41)*

<sup>22</sup> Ttu sá nna uta'a Jesús lenie ca bi'ini rudheti ca tisa rule'e lhe'e ttu barco. Nianna, re ca bi'iniha:

—Tteri daca attu ladu gue inda-ni.

Laniala nna diattebaque. <sup>23</sup> Ttiaca laca dia lenque barcoha lo indaha nna lee nna utta'adhittebe. Attirba chi bisía ttu iyya be idí lo indattooha, barcoha nna udulotteba nua bisána inda. Denua nna ruxunnina gueque tsettiqie lhe'e indaha. <sup>24</sup> Laniala nna guadibáncabi Jesús rácabi Benniha:

—¡Maestro! ¡Maestro! ¡Chi rettiri lhe'e inda-ni!

Jesús guadhattebe bedhaca dise beha lhe nu ridulí lo indaha lhe ca unnuha nna bebetteba lecani, síba beacatteba.<sup>25</sup> Nianna, re ca bi'ini rudheti ca tisa rule'e:

—¿Gala guaga'ale nu rále dequi chi ria lele neti?

Tu rasbaquinbi lhe rebanbaquinbi lhe rá loescabi:

—¿Nú benni bi'ini du-ni, lee nna runie mandadu be-na lhe indattoo-na lhe, ca unná nna rudocana tisa guee?

### **Jesús beonie ttu unbiyuu yu'u be xxegüi lhe'e cuerpu gueni**

(Mt. 8:28-34; Mr. 5:1-20)

<sup>26</sup> Laque nna bisínque len barcoha axtaba lo yu gue yiesi Gadara. Unnuha rena attu ladu gue ro'o indattoo re ro'o yu gue Galilea.

<sup>27</sup> Atti chi guadi Jesús lo barcoha nna birátteba ttu unbiyuu beaca lasni lhe'e yiesiha yu'u be xxegüi lhe'e cuerpu gueni guatsána Benniha. Unbiyuuhu nna isá chi uca bittu rucu xoni, niguaba lä ridorna lhe'e yo'o lhe. Atta se'e ca baa gue ca nu yattihaba re'an-na. <sup>28</sup> Ttiaca atti bilenna Jesús, bedútteba xibini lo Benniha, atti uresi'attebana idisa rána:

—¡Bittu ettega'a guelu len neti, Jesús, Xi'ini Tata Dios Benni do iyyabaaha! ¡Rinnaba lolu bittu unnalu elha disa quia!

<sup>29</sup> Aníaba rá unbiyuuhu cumu runi Jesús be xxegüiha mandadu eríana lhe'e cuerpu gueniha. Be xxegüiha nna tsaba chi belháninna nua. Masquiba ruxxica ca benni ni'a náni leni cadena qui raca rapakan na, ttiaca lana nna rutse'e loban ca nua, atti ribeatteba be xxegüiha na riana lo yu bisi atta nuttu benni se'e. <sup>30</sup> Jesús unnaba tise na re na:

—¿Bi lálu?

Unnuha nna becabina rána:

—Legiónba lá neti.

Aníaba rána lana cumu ixe tsitsia ca be xxegüiha uta'a lhe'e cuerpu gueni. <sup>31</sup> Ca be xxegüiha nna unnabacana lo Jesús qui bittu udelhe cana atta lexúaha. <sup>32</sup> Latí i'iya do nía requi ixeru ca cutsi rilacana nu gocana. Ca be xxegüiha nna bencana ruegu lo Jesús qui eta'acana lhe'e ca cutsiha. Lee nna begüeelhabe cana.

<sup>33</sup> Ca be xxegüiha nna beríattecacana lhe'e cuerpu gue unbiyuuhu qui beta'acana lhe'e ca cutsiha. Ca cutsiha nna bigaattecacana

bitoetticana ro'o belha'a daa nía biyinnacana lhe'e indattooha. Níaba utti ca nua de gopicana inda.

<sup>34</sup> Ca nu rapa ca cutsiha nna atti begüiacana nu ucaha nna bigaattebacana deyyacana guattixxi' aquinna ca benni se'e lhe'e yiesiha, ca benni se'e lhe'e ca ranchuha lhe gue nu ucaha. <sup>35</sup> Ca benni bina nu rá ca nua nna biráttebacana diacana güegüia nu ucaha. Atti bisíncana atta du Jesús, níaba biláquinna unbiyuu bería ca be xxegüiha lhe'e cuerpu gueniha dona lo Jesús, chi nucu xoni lhe chi bedoenna nibisa lhe. Lacana nna usbaquinna. <sup>36</sup> Ca benni biláni nu ucaha nna utixxi' aquinna cana gue gaxasná uca beaca unbiyuu uyu'u ca be xxegüi lhe'e cuerpu gueniha. <sup>37</sup> Laniala nna iyába ca benni se'e lo yu gue yiesi Gadara bencana ruegu lo Jesús qui eríe atta se'ecanaha, de rasixxattaquinna. Anía uca nna beopitteba Jesús lo barcoha qui bede nía. <sup>38</sup> Unbiyuu bería ca be xxegüi lhe'e cuerpu gueniha nna unnabana lo Jesús uguelhe na tsiana len Benniha. Ttiaca Jesús benie na mandadu eyya'ana. Nianna, re na:

<sup>39</sup>—Bequi beyya lhe'e yo'o gueluha, utixxi'en ca benni datíalu gue nu chi ben Tata Do Iyyabaaha lenlu.

Unbiyuuha nna bequittebana deyyana. Itúba lhe'e yiesiha deyyana rixxi'ana gue milagru xxeni beni Jesús len lana.

### Jesús beonie ttu nuila, benie beaquin xi'in Jairo lhe (Mt. 9:18-26; Mr. 5:21-43)

<sup>40</sup> Atti bequi Jesús besine attu libe daca attu ladu gue indattooha nna ru'u tsitsia le ca benni se'e nía, cumu iyábacana chi ribedacane.

<sup>41</sup> Unnuhaba raca nna atti bisína ttu unbiyuu lá Jairo atta du Jesús. Unnuha ancana nu baninna yo'o atta rudheti ca benni Israel ca tisa gue Tata Do Iyyabaaha. Lana nna bedútteba xibini lo Jesús runna ruegu lo Benniha tsie lhe'e yo'o gueniha, <sup>42</sup> cumu xi'iniunnániha nu tturbana doenna chiba ratti nua tena. Unnuha nna chi anquinna tsi'inu (12) ida.

Atti yu'u Jesús neda die lhe'e yo'o gue Jairo nna ca benni denocan Benniha nna attulade ruquícane.

<sup>43</sup> Len ca benni dia len Jesús, dia ttu nuila. Ttu dialiiba ritsigana. Lana nna chi uca tsi'inu (12) ida ratena nua. Chiguaba bea nu te gueni bennitti lona len ca nu run ramedi lhe ttiaca ni ttu ca nua

bittu udácaneyoncan na.<sup>44</sup> Nuila-ni nna ubigana daca cu'e Jesús qui utanana ro'o xo Benniha. Snaba lania nna udú si nu ritsigana.

<sup>45</sup> Lania nna unne Jesús re:

—¿Núnna utanana ro'o xoa?

Cumu iyába ca benni rácana dequi läga lacana utanacana ro'o xo Benniha, nuarca unne Pedro [lenbi adí ca bi'iniha] rácabi:

—Maestro, iyába ca benni se'e-ni rientsacan lu, ruquícan lu lhe, nianna gua rárlu: “¿Núnna betettanana ro'o xoa?”

<sup>46</sup> Ttiaca Jesús ttu rábe:

—Nuxa ttule unná chi betettanana ro'o xoa, cumu neti nna utedaatia beoni elha ra xxen le quia-ni ttu benni.

<sup>47</sup> Atti biyú nuilaha chi guanni lo nu bennaha, bisínttebana rixidinina bedú xibini lo Jesús. Lania nna utixxi'ana aníba lo iyába ca benni se'e nía bixa gue utanana ro'o xo Jesús, utixxi'ana gue snaba lania beacana lhe.<sup>48</sup> Jesús nna ráttebe nuilaha:

—Xi'ini, cumu de güia lelu guadába eyonia lu, nuarca beacalu. Xen su lee beya.

<sup>49</sup> Sa duba Jesús rinnee atti chi bisía ttu nu daa lhe'e yo'o gue Jairo utixxi'enna nua rán na:

—Nuca utti xi'inluha. Bitturu utsitsinlu Maestro-na.

<sup>50</sup> Atti bienini Jesús nu rá nua nna, unnettebe re Jairo:

—Bittu gasinlu. Suntteba güia lelu neti, xi'iniunnáluha nna güeyacaba nua.

<sup>51</sup> Atti chi bisíne lhe'e yo'oha nna tsa bittu begüeelhe nuxarua ga'a len lee, suntterba Pedro nna Jacobo nna Juan nna tata nan gue nuiłtoha nna.<sup>52</sup> Iyába ca benni se'e nía ribescana lhe se'e s'ilicana lhe gue nuiłtoha. Ttiaca Jesús nna unnee re:

—Bittu cuesle. Läga utti unná. Ti'edhi bunna.

<sup>53</sup> Ca benni se'e nía nna bedaculaquinna gue Benniha, cumu gua yubacana chiba utti nua.<sup>54</sup> Ttiaca Jesús, bedaxxuttebe ná nuiłatoha, atti unnettebe idisa re:

—¡Nuiłato, guadha!

<sup>55</sup> Unnuha nna beacattebinna snaba lania guadhana. Jesús nna benttebe mandadu ugüecana nua etta gona.

<sup>56</sup> Ca tata nan gue nuiłatoha nna rebantsitsiaquinna se'ecana, ttiaca Jesús benie mandadu re cana, tsa nuttu nu quixxi'aquinna gue nu ucaha.

**Jesús ridhelhe ca benni tsi'inu rudheti ca tisa rule'e***(Mt. 10:5-15; Mr. 6:7-13)*

**9** Jesús uxie ca bi'ini tsi'inu (12) rudheti ca tisa rule'e qui betee len ca bi'iniha elha ra xxen lee lhe derechu lhe qui ebeacabi iyáloba ca be xxegüi yu'u lhe'e cuerpu gue ca benni, qui eyoncabi ca nu rani lhe. <sup>2</sup>Nianna udhelhe ca bi'iniha qui quixxi'acabi gue gaxasná rinnabia Tata Do Iyyabaaha, eyoncabi ca benni rani lhe. <sup>3</sup>Lee nna re ca bi'iniha:

—Tsa bittubi ujale gue neda guele, ni garroti lhe ni chuba lhe ni ttaxtila lhe niguaba belhi lhe bittuguaba uja attu cue xole lhe. <sup>4</sup>Gaxaba lhe'e yo'o atta isínle, níaba eya'anle. Edá libale nna eríale nía. <sup>5</sup>Gaxa atta bittu ulabican le nna atti eríale lhe'e yiesiha nna ucuibittele biste yu anca ni'aleha, cumu unnuha ule'e lo läga be'o le Tata Do Iyyabaaha nu ben ca nua.

<sup>6</sup>Lania nna biráttebacabi diacabi lhe'e iyába ca lhe'esi se'e itúba nía utecabi rixxi'acabi ca tisa tsee gue gaxasná rinnabia Tata Do Iyyabaaha, reoncabi ca benni rani lhe.

**Herodes ubinana gue Jesús***(Mt. 14:1-12; Mr. 6:14-29)*

<sup>7</sup> Herodes nu anca tetrarca binana gue iyába nu run Jesús. Lana nna niba lä yuna gue bixa ulaba leni, cumu de rá ttulhe ca benni dequi Juan bi'ini begadi ca benni indahaba bi'iniha beaquinbi beríabi atta yu'u ca nu yatti-na.

<sup>8</sup>Adí benni nna rácana:

—Profeta Elíasba bi'in-na beacaxxe.

Adícana nna rácana:

—Ttu ca profeta gue Tata Do Iyyabaaha udo ca tu nureali, bi'in-na beacani.

<sup>9</sup>Nianna rá Herodes:

—Inqui cuinaba neti benia mandadu uchecucana iqui Juan, nianna, ¿núlunna rientia rinnexxattacan gueni ganna?

Denuala nna run Herodes duelha ilenna Jesús.

## Jesús begoe gayu mil ca benni

*(Mt. 14:13-21; Mr. 6:30-44; Jn. 6:1-14)*

<sup>10</sup> Atti chi besini ca bi'ini rudheti ca tisa rele'e Jesús, utixxi'attebaquinbi Benniha iyába bixa bencabi. Lee nna uchettebe ca bi'iniha lo ttu yu te gaxxaba ro'o yiesi Betsaida atta aca tse'e suntteba laque. <sup>11</sup> Atti bina ca benni gaxa ladu dia Jesús, diattebacana denocana Benniha. Lee nna uxtebe cana atta doe, nianna utixxi'anie cana gue gaxasná rinnabia Tata Do Iyyabaaha, beonguabe ca benni rani lhe.

<sup>12</sup> Atti chi dia ralha sá, ubigatteba ca benni ts'i'inu (12) rudheti ca tisa rule'e Jesús rácabi Benniha:

—Bechú tisa ca benni se'e ni qui eyyacana lhe'e ca lhe'esi-na, lhe'e ca ranchu-na lhe qui satilacana bixa gocana, atta eya'ancana lhe, cumu atta se'eri ni nna tsa lägabi te.

<sup>13</sup> Jesús re ca bi'ini rudheti ca tisa rule'e:

—Lebi'iba gualute nu gocana.

Lacabi nna rácabi:

—Tsa lägabi nu gori noja ri'itu. Sunruba gayu ttaxtila leni chupa belha te guetu. ¿Si tsiabatu sayo'otu nu go iyánea ca benni se'e-ni aca?

<sup>14</sup> Cumu attiba tu gayu mil ca unbiyuuh se'e nía. Laniala nna rá Jesús ca bi'ini ts'i'inu (12) rudheti ca tisa rule'e:

—Gualgás cana qui ebíacana, gualuse'e medi gayua (50) medi gayua cana lhe'e ttuttu cue.

<sup>15</sup> Lacabi nna bedobacabi tisa. Aníaba bencabi ubía iyába benni.

<sup>16</sup> Jesús bedaxxuttebe gayu ca ttaxtilaha len irupaba ca belhaba, nianna ulhidhatteba loe begüie iyyabaaha betee xquixaru leni Tata Do Iyyabaaha. Lenla nna ulhe'e ca ttaxtilaha len ca belhaba begüee ca bi'ini rudheti ca tisa rule'e qui ugüecabi ca benni se'e nía. <sup>17</sup> Iyába ca benni se'e nía utocana bedaa belbaquinna. Bodaparlarcabí a ts'i'inu (12) sumi ca ttaxtila salha'a bexxaha.

## Pedro unnebi rábi: Jesús anque Cristu

*(Mt. 16:13-19; Mr. 8:27-29)*

<sup>18</sup> Ttu sá nna do Jesús rinne lanie Tata Do Iyyabaaha ttu atta nuttu benni se'e. Sunruba ca bi'ini rudheti ca tisa rule'e se'e lenie nía. Lee nna unnaba tisattebe ca bi'iniha re cabi:

—¿Nú rá ca benni dequi anca?

<sup>19</sup> Ca bi'iniha nna becabicabi rácabi:

—Ttulhe benni rácana lu ancalu Juan bi'ini begadi indaha, adí benni nna rácana lu ancalu profeta Elías, adí benni nna rácana gaxa ttu ca benni uca profeta gue Tata Do Iyyabaaha use'e atti níali bi'in-na beacani.

<sup>20</sup> Jesús re ca bi'iniha:

—Lebi'i nna ¿núla rále anca?

Laniala nna becabí Pedro rábi:

—Lu ancalu Cristu benni udhelha Tata Do Iyyabaaha odilá ca benni.

<sup>21</sup> Tiaca Jesús bentebe mandadu ca bi'ini rudheti ca tisa rule'e qui tsa nuttu nu quixxi'encabi labe nua Cristu. <sup>22</sup> Nianna re:

—Neti Benni unbiyuu daa iyyabaaha, labíaba satexxatta.

Ca nu teru elha rieni gueni gue ca benni gueri anca benni Israel, ca nu lo gue ca bixxudi-na lhe ca nu rule'e nu rá lo ca ley boca'ana Moisés lhe cu'u ni'acani neti, utticana neti lhe ttiaca eyonna ubisa nna eyacatia.

<sup>23</sup> Nianna rá Jesús iyába ca bi'iniha:

—Gansi nuxale raca lele acale benni udheti ca tisa quia-ni, ttuttu sá raca duelha erú iqui erú lele elha nabani guele, uchíale lo iyába nu satele lhe attiba ttu benni diana nuja crusi gueni atta utácan na lo nua. Lena nna ettenobana neti, masquiba uttican-na. <sup>24</sup> Cumu iyába ca benni rdaca odilá elha nabani guecani yies lo yu-ni, unnittiba elha nabani guecani, iyába ca benni erú iqui erú lecani gatticana lo ni'a quia nna aca banba ca nua ttu dia lii lo Tata Do Iyyabaaha.

<sup>25</sup> Tsa lägabi ixuu len ttu benni ganna e'eyuna acana nu banani iyá nu te yies lo yu-ni, elha nabani gueniha nna dia nittibana, lana nna ttu tsaba lhuxana. <sup>26</sup> Cumu nu ettuinna quia lhe gue ca tisa quia-ni lhe neti Benni unbiyuu daa iyyabaaha, ettúguatia gueni atti esíaya dedaaya lhe'e xieni ga'ana tsee quia lhe lhe'e xieni ga'ana tsee gue Tata quia do iyyabaaha lhe lhe'e xieni ga'ana tsee gue ca ingeli gue Ben-na lhe. <sup>27</sup> Neti nna gualíbatia ria le, ttulhele ca nu se'e-ni nna läga gattixxile antisla ilenle innabia Tata Do Iyyabaaha.

### Botsía lo Jesús

(Mt. 17:1-8; Mr. 9:2-8)

<sup>28</sup> Attiba tu xxunu ubisa dequide atti unne Jesús ca tisa-ni nna, uchettebe Pedro lhe Juan lhe Jacobo lhe, die lo ttu lhilhi güenne leni

Tata Do Iyyabaaha.<sup>29</sup> Laca rinne Jesús len Tata Do Iyyabaaha nna botsíatteba loe. Xoe nna beacana sitsituuchiga, racalaanina de ru'u xieni gueni.<sup>30</sup> Nía ucaxxe chupa ca unbiyuu rinne lencabi Benniha: ttubi ancabi Moisés, attubi nna ancabi Elías.<sup>31</sup> Bi'a dhacabacabi racalaa yu'u xieni. Lacabi nna rinnecabi len Jesús gue elhutti gue Benniha, attiba chi ga'ana aca lhe'e yiesi Jerusalén.<sup>32</sup> Pedro lenbi ca benni se'e lenbi nía nna tsaba bitturu ridacabi lo bisíala, ttiaca bechíabacabi bittu uta'adhicabi. Lacabi nna biláquinbi xieni ga'ana tsee gue Jesús, a chupa ca bi'ini se'e len Benniha lhe.<sup>33</sup> Atti chi reries ca bi'iniha Jesús, unnetteba Pedro rábi Benniha:

—Maestro, tsee galá guaxxína se'etu nii. Nnanna nna untu tsunna yo'o lhaga: ttu guelu nna, attu gue Moisés nna, attu gue Elías nna.

Pedro nna niba lä yubi bixa nua rábi.<sup>34</sup> Laca du Pedro rinnebi nna bisíatteba ttu bea uyu'una atta se'ecabiha. Lacabi nna usilhabaquinbi de uyu'ucabi lhe'e beaha.<sup>35</sup> Tata Do Iyyabaaha nna unnee lhe'e beaha re:

—Benni anque xi'inia benni racaxxattatia guee. Gue Benni gualdo nagale.

<sup>36</sup> Atti chi uluxa unne Tata Do Iyyabaaha, atturba Jesús biláquinbi due nía. Lacabi nna uyu'utsitsibacabi tisa, itúttuba lania nuttu nu utixxi'aquinbi gue nu biláquinbiha.

### **Jesús beonie ttu uncuiti yu'u be xxegüi lhe'e cuerpu gueni**

(Mt. 17:14-21; Mr. 9:14-29)

<sup>37</sup> Betteyú sá nna atti beadique lo lhilhiha nna ixe tsitsiaba benni güiacana besáicana Jesús.<sup>38</sup> Ttu unbiyuu nutsa lagüi gue ca benni daa nía nna uresi'ana rána:

—Maestro, rinnaba lolu beonchi xi'inia-ni, cumu tturunna dotia.<sup>39</sup> Ttu be xxegüi nna tsaba chi belháninna na, ttutterba risía nna rucusi'an na lhe rucuibir na lhe ridotteba besina ro'oni lhe. Atti rudhaca güena unna nna pena nisi baba rulhán na.<sup>40</sup> Neti nna chi benia ruegu lo ca bi'ini rudheti ca tisa rule'elha qui ebequicabi be xxegüi-na, ttiaca bittu udácabi.

<sup>41</sup> Jesús becabie re:

—¡Lebi'i ca benni bittu ria leni, nu lä du ta leni lhe! ¿Núcachiarga neti dhoa uchíana lole? ¿Núcachiarga neti laniale? Utá len xi'inlu-na nii.

<sup>42</sup>Laca dia uncuitiha ribigana lo Jesús, be xxegüiha nna uru'unatteban nua lo yu, atti becuibittebana nua. Ttiaca Jesús bedhaca disattebe be xxegüiha qui beríana lhe'e cuerpu gue uncuitiha. Beonbe nua nna botettebe na len tata gueni. <sup>43</sup>Iyába ca benni se'e nía rebanquinna gue milagru xxeni runi Tata Do Iyyabaaha.

### Ni rerupa libe rixxi'a Jesús gue gattie

(Mt. 17:22-23; Mr. 9:30-32)

Laca se'e iyába ca benni rebanxxattaquinna gue nu runi Jesús, lee nna re ca bi'ini rudheti ca tisa rule'e:

<sup>44</sup>—Tsitsi gualdo nagale ca tisa upea le-ni. Neti Benni unbiyuu daa iyyabaaha labíaba utevana neti las ná ca benni utticana neti.

<sup>45</sup>Ttiaca lacabi nna läga guadú lecabí bixa dia le ca tisaha, cumu Tata Do Iyyabaaha nna läga chi benie qui sadú lecabí gue iyá nu aca. Rasguabaquinbi innába tisacabi Jesús bixa dia le ca tisa unnee lhe.

### ¿Nú anca nu ra xxenru leni?

(Mt. 18:1-5; Mr. 9:33-37)

<sup>46</sup>Ca bi'ini rudheti ca tisa rule'e Jesús uyu'ucabi bitilha tisa len loescabi lo ni'a gue nuxcabí aca nu raru xxen leni. <sup>47</sup>Jesús yuxabe nu rulaba lecabí. Lee nna bedaxxuttebe ttu unto bedú luitte. <sup>48</sup>Nianna re:

—Nuxaba benni ulabina unto-ni de ria leni neti nna netiba nua rulabi nua, benni rulabina neti nna Benni udhelhe netihaba benniha rulabina. Cumu benni raquinle kittu ancana nu ra xxen leni nutsa len delo iyále nna unnuha la ancana nu ra xxen leni.

### Benni kittu rigu'u ni'an ri nna len ri'iba du nua

(Mr. 9:38-40)

<sup>49</sup>Juan ráttebabí Jesús:

—Maestro, ri'itu chi bilentu ttu nu requi ruríalana ca be xxegüi atti rudettina lálu, ttíaca unná nna läga ri'i selunna. Larcala nna chi besunatu qui kitturu unna aná.

<sup>50</sup>Jesús re Juan:

—Kittu usunale, cumu nu kittu redú disana lori nna len ri'iba du nua.

### **Jesús bedhaca dise Jacobo lenbi Juan**

<sup>51</sup> Atti chi daa ribiga isía sá eyya Jesús iyyabaaha, lee nna bebequitsitsittebale qui tsie Jerusalén. <sup>52</sup> Nianna, udhelhattebe ca benni uneru loe. Ca bi'iniha nna bisíncabi lhe'e ttu lhe'esi re lo yu gue yiesi lá Samaria qui quilacabi atta isín Jesús gansi chi bisíne nía. <sup>53</sup> Ttiaca ca benni se'e nía nna läga uca lecani isín Benniha lascaniha, cumu ute daaqinna Jerusalénba die. <sup>54</sup> Atti biláni ca bi'ini rudheti ca tisa rule'e Jesús, delába Jacobo lenbi Juan, nu ben ca nua nna ráttebacabi Benniha:

—Benni bananie ri'itu, ¿si raca lelu innábatu iyinna gui daa iyyabaaha [attiba beni Elías,] qui ulhuxana ca unná?

<sup>55</sup> Jesús bodequitteba loe bedhaca dise cabi re cabi:

[—Lebi'i nna läga yule nú espíritu gue ancale. <sup>56</sup> Cumu neti Benni unbiyuu daa iyyabaaha nna läga delha qui unia tsia nitti ca benni, daba neti qui odiláya cana.]

Nianna diattebaque daca lhe'e attu yiesi.

### **Ca benni raca lecabí sanalhacabi Jesús**

(Mt. 8:19-22)

<sup>57</sup> Laca diacabi yu'ucabi neda nna ttu unbiyuu rána Jesús:

—Tata, neti raca lasia etenalha lu gaxaba ladu tsialu.

<sup>58</sup> Jesús becabie re na:

—Ca beda-na guasiaba liscani gaxa reta'acana, ca binni-na lhe gua siaba xcuadi guecani, ttiaca neti Benni unbiyuu daa iyyabaaha, läga anca gaxa quixxa iquia.

<sup>59</sup> Attu nua nna re na:

—Utá betenalha neti.

Ttiaca unnuha nna rána:

—Benni bananie neti, begüeelhaxa neti eyya'aya sacatsia tata quiahá.

<sup>60</sup> Jesús becabie re nua:

—Begüelha ca nu anca attiba nu yatti lo Tata Do Iyyabaaha ucatsicana ca nu yatti guequinna. Lu nna güia, utixxi'a gue gaxasná rinnabia Tata Do Iyyabaaha.

<sup>61</sup> Attu na nna rána:

—Benni bananie neti, neti raca lasia etenalha lu, ttiaca primerxa begüeelha neti sachú tisa ca benni se'e lhe'e yo'o quia.

<sup>62</sup> Jesús bequie re na:

—Benni rudaxxu xan belasuha nna nianna rodequir loni rugüiana daca atta dana, lägabi ixuu nua iselana ca benni rinnabia Tata Do Iyyabaaha.

**Jesús ridhelhe gayuna yu'u ts'i'inu (72) ca benni qui  
quixxi'acabi ca tisa gue Tata Do Iyyabaaha**

**10** Dequide unnuha nna becuee Jesús a gayuna yu'u ts'i'inu (72) ca benni rudheti ca tisa rule'e.<sup>a</sup> Ca bi'iniha nna udhelhe chupa chupacabi, bennerue ca bi'iniha tsiacabi lhe'e iyába ca yiesi atta tsie. <sup>2</sup> Nianna re ca bi'iniha:

—Neti rpea le, xxen tsitsia lena bani te exuu, ttiaca ttu chuparba ca benni riben sina se'e. Larcala gualnnaba lo Tata Do Iyyabaaha Benni beaca guee sina-ni qui idhelhe adí benni edícana lena-na. <sup>3</sup> Lebi'i nna gualtsia. Neti ridhelha le tsiale attiba ttu carne'e atta se'e ca benni du lecani attiba du le sagueo. <sup>4</sup> Bittu ujale belhi, niguaba atta yu'u xole lhe niguaba attu cue guaracha lhe bittuguuba cuedale gále paduxi nuxa benni esále diale neda lhe. <sup>5</sup> Nuxaba lisi ga'ale nna primero innále: “Xen su lee tse'e ca benni se'e lhe'e yo'o-ni.” <sup>6</sup> Gansi lhe'e yo'oha do ttu benni do tseena len Tata Do Iyyabaaha, lania liba nna saxxína aca nu ráleha len ca unnuha, gansi bittuba nna läga aca nu unnabaleha. <sup>7</sup> Lebi'i nna níaba tse'ele lhe'e yo'o atta isínleha, gobale lhe i'iyabale lhe iyába nu utecana len lebi'i, cumu ttu benni riben sina, ralhaba nua dhína lhiaxani. Bittu eríale lhe'e ttu yo'o nna sata'ale lhe'e attu yo'o. <sup>8</sup> Gaxaba yiesi isínle atta ulabican le, gualgo iyába nu usiacana lole. <sup>9</sup> Gualeoni ca nu rani se'e nía, nianna gualgás cana: “Chi daa ribiga isía sá innabia Tata Do Iyyabaaha lebi'i.” <sup>10</sup> Ttiaca gansi ga'ale lhe'e ttu yiesi atta bittu ulabican le nna gualtsia lo ca neda guecaniha, gualgás cana: <sup>11</sup> “Axta biste re lhe'e yies guele-ni nu utá xan ca guaracha guetu-ni rucuibitu. Unní rule'e lo bittu anca tsee nu benle len ri'itu. Ttiaca gualodhá lele, chi daa ribiga isía sá innabia Tata Do Iyyabaaha.” <sup>12</sup> Netiunní ria, gansi chi bisía sá uni Tata Do Iyyabaaha elha uxtisi

---

<sup>a</sup> **10:1** Attu chupa ca sitsi nna rá: gayuna yu'u tsii (70) ca benni.

gue ca benni se'e yies lo yu-ni, xxenirla anca elha disa utee gue ca benni se'e lhe'e ca yiesi atta bittu ulabican le attichula elha disa utee gue ca benni use'e lhe'e yiesi Sodoma.

<sup>13</sup>; Carusi'irule xa benni se'e lhe'e yiesi Corazín! ¡Carusi'irule, xa benni se'e lhe'e yiesi Betsaida! Cumu ttirca lhe'e yiesi Tiro lhe Sidón lhe chi uca ca milagru uca len lebi'iha nna nucala chi bodú xiyyan ca nua bodaxxucana neda gue Tata Do Iyyabaaha qui dhie elha xen lhasi guecani. Chi ucucana ca lari ttipa lhe chi usiacana lhe'e te gue gui lhe qui ule'e lo gualí re lenquinna gue nu bencana.

<sup>14</sup> Ttiaca gansi chi bisía sá un Tata Do Iyyabaaha elha uxtisi gue ca benni, xxenirla anca elha disa dhíle atti elha disa dhi ca benni se'e lhe'e yiesi Tiro lhe Sidón lhe. <sup>15</sup> Lebi'i nna ca benni se'e lhe'e yiesi Capernaum, ¿si rquinle dequi eyopile iyyabaaha? ¡Dica! Axta atta lexúaha la iyinnale.

<sup>16</sup> Nu udo nagani guele nna quiba nua rudo naga nua, nu cu'u ni'ani lebi'i nna netiba nua rigu'u ni'a nua. Nu rigu'u ni'ani neti nna Benni udhelhe netihaba Benniha rigu'u ni'ani.

<sup>17</sup> Atti chi besina iyába gayuna yu'u tsilinu (72) ca benni udhelha Jesús güia güixxi'a ca tisaha, ru'u tsitsia lecabí rácabí:

—Tata, axta ca be xxegüi-na rudocana tisa guetu atti rudettitu lálu.

<sup>18</sup> Jesús becabie re:

—Gualí galá, neti bilátia nu xxegüiha dana lo bea-na binnana attiba ttu edha. <sup>19</sup> Neti chi betea elha ra xxen le quia len lebi'i qui utsutsa uleale iqui ca belha-na lhe ca lacrana-na lhe qui dhale lo iyá nu runna anca nu xxegüiha nu ra tsitsi leni lhe lebi'i nna tsa lägabi dhacale. <sup>20</sup> Ttiaca bittu eyo'o lele de rudo ca be xxegüi-na tisa guele. Nu unlale nna guale'o lele de chi dia lále iyyabaaha.

### Jesús redaca lee

(Mt. 11:25-27; 13:16-17)

<sup>21</sup> Snaba lania nna Espíritu gue Tata Do Iyyabaaha benie be'o tsitsia le Jesús, nianna re Tata Do Iyyabaaha:

—Tata, cuinalu ancalu Benni banani iyyabaaha lhe yies lo yu-ni lhe. Neti ribequi xenia lu de bittu begüeelhalu ttedaani ca nu rá ancacana nu yu te elha rien guequinna gue nu ria-ni, lu nna benlu

ttedaaquin ca benni bittu ra xxeni leni gue unní. Gualíba, Tata, cumu anába beda le cuinalu unlu.

<sup>22</sup> Tata quiaha nna iyába nu tee betee las náya. Tsa läganu yu gattigasná anca Xi'ini Tata Do Iyyabaaha, sunruba lee yue nuxa anca Xi'inie. Nuttuguaba yu gattigasná anca Tataha lhe sunruba neti Xi'inie-ni yua nuxa anque, ca benni raca lasia quixxi'atia cana gue Benniharba nna yucana nuxa anque.

<sup>23</sup> Nianna bodequitteba loe re suntteba ca bi'ini rudheti ca tisa rule'e:

—Carbáru ca benni riláquinna nu rilenle. <sup>24</sup> Netiunní ria le, ixe tsitsia ca benni uca profeta lhe ca benni unnabia lhe udá lecabí ugüiacabi nu rilenle nnanna ttiaca bittu biláquinbi-na, uxacacabi iyienquinbi nu rieninle nnanna lhe ttiaca bittu bienquinbi-na.

### Ejemplu gue benni gue Samaria bení nu anca tsee

<sup>25</sup> La laniatteba nna udulí ttu ca nu rule'e nu rá lo ca ley boca'ana Moisés unnena belisana Jesús qui cu'ubiana Benniha nna unnaba tisane ráne:

—Maestro, ¿bi unia qui gatta elha nabani quia ttu tsaba?

<sup>26</sup> Jesús becabie re na:

—¿Bi rá lo ca ley boca'ana Tata Do Iyyabaaha len Moisés?

¿Gasná radú lelu nu rá ca tisa-na?

<sup>27</sup> Unnuha nna becabina rána:

—“Aquinlu gue Tata Do Iyyabaaha Benni bananie lu itú iqui itú lelu<sup>a</sup>, leni itúxea lastoolu lhe leni itú fuerza guelu lhe leni itú elha pieni guelu lhe. Anágua ba acaguabinlu gue ca benni attiba raquinlu gue la luba lhe.”<sup>b</sup>

<sup>28</sup> Jesús becabie re na:

—Tseeba chi becabili. Unnába beni nna guateba elha naban guelu ttu tsaba iyyabaaha.

<sup>29</sup> Ttiaca de rdaca nu rule'e nu rá lo ley eya'an tseena lo benni nna larcala nna bedennaba tisana Jesús rána Benniha:

—Nianna, ¿nú nua anca benni acatia gueni?

<sup>30</sup> Jesús becabie re:

—Ttu libe ttu unbiyuu biríana lhe'e yiesi Jerusalén, bedaxxuna neda dia daca lhe'e yiesi Jericó. Nía biría ca ubana ulanacan na, axtaba

<sup>a</sup> 10:27 Deuteronomio 6:5

<sup>b</sup> 10:27 Levítico 19:18

ca xoni nucunaha utúa ca nua. Chi liba anca nua attiba nu yatti de begüeebacan na, lania liba nna utixxa bixxican nua nía atti güequicana deyyacana.<sup>31</sup> Cattipa guaxxína, laniaguaba ute ttu bixxudi dianala lo nedaguaba. Ttiaca atti bilenna unbiyuuha tena lo nedaha nna betsiallana, besiguibana diana.<sup>32</sup> Aníaguaba beni ttu benni datíana Leví bisína atta te unbiyuuha. Atti bilenna nua nna betsiallana atti utettebana diana.<sup>33</sup> Ttiaca ttu unbiyuu beaca lasni yiesi lá Samaria diana yu'una neda bisínna atta te unbiyuuha. Atti bilenna nua nna guatúatteba leni nua.<sup>34</sup> Ubigattebana atta te nua, benttebana ramedi ca lo güee gue nua len seti lhe vinu lhe bettubina lari ca atta anca güee gue nua lhe. Lenla nna belhopin nua cu'e bia gueniha, qui uchen nua atta do ttu yo'o re'an ca benni. Nía upan nua.<sup>35</sup> Beteyú sá nna benni beaca lasni Samaria, uleana belhi gue chupa ubisa sina betena leni xxan yo'oha, nianna rán nua: "Biyúchi unbiyuu-ni. Iyába adí belhi unnitti lolu gueonni nna guaguixaba nua atti eyequia esíaya."

<sup>36</sup> Jesús unnaba tise:

—Delo tsunna ca unbiyuu uteha nna ¿nú ca nua raquinlu bele'e lo gualí ancana benni racani gue benni begüee ca ubanaha?

<sup>37</sup> Nu rule'e nu rá lo ley boca'ana Moisés nna rána:

—Benni guatúa leni unbiyuuha.

Jesús re na:

—Gansi anía anca, lu nna aníaguaba beyya beni ganna.

### **Jesús bisíne lhe'e yo'o gue Marta lenna María**

<sup>38</sup> Jesús besiguibe yu'e neda die lenie ca bi'ini rudheti ca tisa rule'e. Lee nna uta'attebe lhe'e ttu lhe'esi re nía. Ttu nuila lána Marta nna bete gannana lhe'e yo'o gueniha qui eya'an Benniha.

<sup>39</sup> Marta nna do ttu xilani lána María. María nna urettebana gaxxaba atta do Jesús qui bedo nagani ca tisa rinne Benniha.<sup>40</sup> Ttiaca Marta nna tsitsiba richacha iquini gue sina te lhe'e yo'oha. Lana nna ubigattebana lo Jesús rána Benniha:

—Benni bananie neti, ¿si bittuba retábinlu quia? Tturba neti boca'ana xila-ni unia sina-ni. Gus na qui unna neti yuda.

<sup>41</sup> Ttiaca Jesús becabie re na:

—Marta, lu nna tsitsiba richacha iquili lhe riubinlu lhe de texxatta sina guelu,<sup>42</sup> ttiaca tturba ttu nu te gualíga raca duelha acana. María-ni nna chi becueena nu tseeru, larcala nna tsa läganu te cuana unná lo náni.

## Jesús rule'e gaxasná dica inne ca benni len Tata Do Iyyabaaha

(Mt. 6:9-15; 7:7-11)

**11** Ttu libe atti do Jesús güenne len Tata Do Iyyabaaha ttu re.  
**11** Atti uluxa unnee len Tata Do Iyyabaaha nna ttu ca bi'ini  
 rudheti ca tisa rule'e, rábi Benniha:

—Benni bananie neti, bele'en ri'itu gaxasná dica innetu len Tata Do Iyyabaaha attiba Juan bele'enbi ca benni bedheti nu bele'ebi.

<sup>2</sup> Jesús re bi'iniha:

—Aní innále attiinnele len Tata Do Iyyabaaha:

Tata guetu do iyyabaa, ribequi xentu cuinalu  
 cumu anca cuinalu Dios.

Utá innabialu ri'itu.

[Beni qui nu runtu yies lo yu-ni acana nu raca lelu aca,  
 attiba raca iyyabaaha.]

<sup>3</sup> Bete nureasintu gotu ttu ttu sá.

<sup>4</sup> Uxí elha xen lasi gue nu lä anca tsee runtu lolu,  
 cumu anáguuba ri'itu ridítu elha xen lasi gue iyába ca nu run  
 nu lä anca tsee len ri'itu.

Bittu ugüelhalu ixú yietu untu nu bittu anca tsee.

Bodilá ri'itu lo ná nu xxegüiha.

<sup>5</sup> Anáguuba rá Jesús ca bi'iniha:

—Gansi nuxa ttule do ttu benni do tsee lenle, lu nna tsialu lhe'e  
 yo'o gue nua tu riloela, nianna gál nua: “Benni do tsee lania, ulea  
 gannachi tsunna ttaxtila guelha quia, <sup>6</sup>cumu bisía ttu benni yu'u  
 neda do tsee lania lhe'e yo'o quia, neti nna bittu te quia bixa utea  
 gona.” <sup>7</sup> Unnuha nna ecabina lhi'u lhe'e yo'oha innána: “Bittu  
 utsitsinlu neti. Nuca yayatia puerta-na, chiguuba te ca unto quia-ni  
 len neti lhe. Larcala nna bittu aca chadha qui unna nu rinnabalha.”

<sup>8</sup> Neti ria nna läga chadha nua utena nu rinnabalu de anca nua nu  
 do tsee lenlu. De bittuba saxxaquinlu dhu ditilu, rinnabalu nu  
 reasinlu, larca chadha nua utena iyába nu rinnabalu. <sup>9</sup> Larcala nna  
 neti ria le: “Gualnnaba len Tata Do Iyyabaaha, Benniha nna gutebe  
 nu reasinle. Gualeguila, lee nna gunbe eselinle nu reguilaleha.

Gualnne ro'o yo'o, lee nna gunbe idhalcana guele. <sup>10</sup> Cumu iyába ca  
 benni rinnaba, gua ridíba ca nua nu rinnabacana, ca nu reguilaha  
 nna gua reselbaquin nua nu reguilacana, ca nu rinne ro'o puertaha  
 nna gua ridhalbacana gue ca nua.”

<sup>11</sup> ¿Nu benni nua ancana tata, gansi innába xi'inniha ttu ttaxtila, lana nna ttu ca iyya du'uya lo neda-na la ugüena nua? ¿O innába nua ttu belha raca lhe'e inda, lana nna belha ra'aya lhe'eni lo yu la ugüena nua? <sup>12</sup> ¿O ganna innába nua ttu sitta nna lana nna ttu lacranala ugüena nua? <sup>13</sup> Inqui lebi'i ancalale nu lä du tsee leni nna gua rutebale nu tsee len ca xi'inle-na, adíla Tata gueri do iyyabaaha, gutebe Espíritu guee len ca benni innábacana Benniha len Ben-na.

**Ca benni rácana dequi Beelzebúba raca lenna  
Jesús qui rebequie ca be xxegüi**

(Mt. 12:22-30; Mr. 3:20-27)

<sup>14</sup> Jesús rebequie ttu be xxegüi yu'u lhe'e cuerpu gue ttu unbiyuu chi bodha'anna nua biría. Atti chi bería be xxegüiha nna udulotteba unbiyuu uca biríaha unnena. Ca benni se'e nía nna tsitsiba rebanquinna. <sup>15</sup> Ttiaca ttulhecana rinnecana gue Jesús rácana:

—Beelzebú, nu rinnabia ca be xxegüi-naba rutena derechu gue unná qui ebeana ca be xxegüi yu'u lhe'e cuerpu gue ca benni.

<sup>16</sup> Adícana nna de rdacacana cu'u biacane, unnabattecacana unie ttu milagru nu ule'e lo gansi gualí Tata Do Iyyabaaha udhelhe Benniha.

<sup>17</sup> Ttiaca Jesús yuxabe nu rulaba le ca nua, nianna ráttebe cana:

—Iyába yiesi rinnabia xeni, gansi se'e la'a ca benni se'e lhe'eniha de ritilha len loescani, yiesiha nna gualuxattena. Anáguaba ca benni se'e lhe'e ttu yo'o, gansi se'e la'acana de ritilha len loescani, lhuxabacana. <sup>18</sup> Anáguaba nu xxegüiha, gansi se'e la'a len loesi xxegüi-ni, ¿gasná aca usiguina innabiana? Rpeale aná cumu de rále dequi neti nna Beelzebú-naba runna neti yuda qui rebequia ca be xxegüi-na. <sup>19</sup> Gansi neti rebeaya ca be xxegüi-na de rute Beelzebú-na derechu quia, ca benni rudheti ca tisa rule'ele-na nna ¿si nu xxegüiha guaba rutena derechu gue ca unná qui rebequicana ca be xxegüi-na? Larcala nna la ca benni rule'enlenba inná dequi lebi'i nna läga gualínle gue nu rále-na. <sup>20</sup> Cumu gansi Tata Do Iyyabaahaba raca lanie neti qui rebeaya ca be xxegüi-na lhe'e ca benni, lania nna unní rule'e lo chi udulo Tata Do Iyyabaaha rinnabie lebi'i.

<sup>21</sup> 'Gansi ttu benni run tsitsi denna iyába nu reasinna ttihana duna rapana yo'o gueniha, iyába nu yu'u lhe'e nua nna lägabi dhacana. <sup>22</sup> Ttiaca gansi isín attu unbiyuu run tsitsiru atti lana ttihana na, nianna dhaba nua loni, atti cuatteba nua lo náni iyába ca

nu xen leni utía lennaha, lania nna quidhitteba nua iyába nu uca gue unbiyuu run tsitsiha.

<sup>23</sup>'Nu bittu du len neti nna läga raca uyú nua neti. Nu bittu runna neti yuda gaxtu adí benni qui udaxxucana neda gue Tata Do Iyyabaaha nna ruríalala nua ca benni.

### **Be xxegüi nu requi reta'a attu libe atta beríana**

(Mt. 12:43-45)

<sup>24</sup>'Gansi chi rería ttu be xxegüi lhe'e cuerpu gue ttu benni, riattebana lo yu bisi atta nuttu benni se'e regulana gaxa eta'ana qui edí leni. Atti bittuba ratti'ana nna ulabatteba leni gue benni beríana lhe'eniha, nianna innána: "Eyequibalha neti lisia atta beríaya". <sup>25</sup> Atti eyequina esínna lania nna satt'ana benni beríana lhe'eniha ancana attiba ttu yo'o chi luba lhe'eni lhe chi yapa te xea lhe'eni lhe. <sup>26</sup> Be xxegüiha nna tsiattebana saxxína a gasi (7) ca be xxegüi runru adí nu lä anca tsee atti lana. Nianna ga'atteba iyábacana tse'ecana lhi'u lhe'e benni beríana lhe'eniha. Lania nna adíla satsa udú le nua attichula atti du leni primeraoha.

### **Ca benni gualíga se'e tseecana**

<sup>27</sup> Laca rinne Jesús ca tisa-ni nna ttu nuila nutsa ca benni se'e nía uresi'ana rána:

—¡Carbáru benni nuila bijabi lu lhe begasbi lu lhe!

<sup>28</sup> Jesús becabie re:

—Carbáru ca benni rudo nagacani ca tisa gue Tata Do Iyyabaaha, rudoacana tisa gue nu rá Ben-na lhe.

### **Ca benni rinnabacana un Jesús ttu milagru**

(Mt. 12:38-42; Mr. 8:12)

<sup>29</sup> Atti chi bitupa adí benni sabi'aba Jesús, lee nna udulottebe re:

—Ca benni se'e nnanna ancacana nu runi nu lä anca tsee.

Lacana rinnabacana unia ttu milagru nu ule'e lo gansi gualí Tata Do Iyyabaaha udhelhe neti, ttiaca bittu ule'etia cana attu milagru subi gan läba loesi milagru uca len profeta Jonás. <sup>30</sup>Cumu attiba Jonás, nu guatebiha beni bele'e lo len ca benni se'e Nínive gualíba Tata Do Iyyabaaha udhelhe bi'iniha, aníaguuba neti Benni unbiyuu

daa iyyabaaha, nu sateha ancana nu ule'e lo len lebi'i ca benni se'e nnanna gualíba Tata Do Iyyabaaha udhelhe neti.<sup>31</sup> Gansi chi bisía sá uni Tata Do Iyyabaaha elha uxtisi gue ca benni, nuila unnabia daca sur, esíaguana qui udelhiyyana lebi'i ca benni se'e nnanna. Cumu nuiлаha nna lhe'e yiesi nu reru idittuli udána güiana atta do Salomón qui bedo nagani gue elha rieni gue nua. Nnanna nna gualgüiarga, niba du len lebi'i ttu Benni ra xxenru leni atti Salomón.<sup>32</sup> Ca benni use'e lhe'e yiesi Nínive esíaguacana gansi chi ben Tata Do Iyyabaaha elha uxtisi gue ca benni se'e nnanna qui udelhiyyacana lebi'i. Cumu boduxiyyaban ca unnuha bodaxxucana neda gue Tata Do Iyyabaaha atti bienquinna ca tisa utixxi'a Jonás. Nnanna nna gualgüiarga, niba len lebi'i du ttu Benni raru xxen leni atti Jonás.

**Ca iyya lo ttu benni ancacana nu  
rudani itúba cuerpu gue ttu benni**

(Mt. 5:15; 6:22-23)

<sup>33</sup> Ni ttu benni bittu rugalhana ttu gui, lenla nna udaxxuna ttu bixa uttona iqui nua, niguaba lä ruttdohina ttu lmoti iqui nua lhe. Sinuqui uadolana nua iqui ttu bixa nu yadha qui cu'u nua xieni gue ca benni ga'a lhi'u lhe'e yo'oha.<sup>34</sup> Ca iyya lolha ancacana nu rudani gue itúba cuerpu guelu. Gansi ca iyya lolha ancacana tsee lania nna itúba cuerpu guelha duna lhe'e xieni, ttiaca gansi ca iyya lolha ancacana nu bittu anca tsee, lania nna itúba cuerpu guelha duna lhe'e chulha.<sup>35</sup> Tsitsi begüia nu anca guelu, qui cadirbaga chulhala anca nu rálu anca xieni guelha.<sup>36</sup> Cumu gansi itúba lhe'e cuerpu guelha ralha gui, ni ttu latti bittu anca chulha, lania nna itúba cuerpu guelha duna lhe'e xieni, attiba gansi chi rigu'u ttu gui itúba xieni gueni atta dulu.

**Jesús ru delha iyye ca fariseo, ca nu rule'e nu  
rá ca ley boca'ana Tata Do Iyyabaaha lhe**

(Mt. 23:1-36; Mr. 12:38-40; Lc. 20:45-47)

<sup>37</sup> Atti chi uluxa unne Jesús, ttu benni fariseo unnabana len Benniha tsie go etta lhe'e yo'o gueniha. Uta'aba Jesús lhe'e yo'oha nna urettebe ro'o mexaha.<sup>38</sup> Nu fariseo nna bebanbinna bilenna bittu bedo Benniha tisa lola eyari nee lenla nna goe etta, unie attiba labi ca nu fariseo runcana.<sup>39</sup> Ttiaca Jesús re unnuha:

—Lebi'i, ca fariseo, ancabale attiba ca taza-na lhe ca platu-na lhe lebi'i nna tsapaba riile cu'ecani ttiaca lhi'u lhe'ecani nna attulade satsa anca. Aná bunna ancale, sunruba lolia guele nari ttiaca lhi'u lhe'e lastoole nna attulade re nu satsa, nu ridá lele lhanale lhe nu bittu anca tsee runle-na lhe.<sup>40</sup> ¡Nu diti bittu rienini! ¿Si bittuba yule dequi benni benie nu anca lolia gueri, laguabe benie lhi'u lhe'eri?<sup>41</sup> Itú iqui itú lele gualute nu te guele len ca benni bittu te gueni, anía liba nna aca nari itúbale.

<sup>42</sup>,¡Carusi'irule, xa fariseo! Lebi'i rutsiattale tsii (10) gue lo ttu ttu gayua (100) nu anca gue guadhi bela-na lhe ruda-na lhe adírbä ca coana radale-na lhe qui rutele len Tata Do Iyyabaaha, ttiaca bittu retábinle unle nu anca tsee len ca benni, niguaba lä retábinle aquinle gue Tata Do Iyyabaaha lhe. Lo unní dica unle, ttiaca bittu udhanle utele tsii gue lo ttu gayua gue nu te guele.

<sup>43</sup>,¡Carusi'irule, xa fariseo! Lebi'i nna tsitsiba ridá lele cuiale lo ca xxila se'e gaxxa atta ribía ca benni anca nu lo lhe'e ca yo'o atta rudhetiri ca tisa gue Tata Do Iyyabaaha, ridá lele gá benni le padiuxi len respeto lo ca neda se'e atta raca i'iya lhe.

<sup>44</sup>,¡Carusi'irule xa fariseo, anágua ca nu rule'e nu rá lo ca ley boca'ana Moisés lhe ca nu ni lo ni tisaba runle dequi ancale benni runi nu anca tsee! Cumu lebi'i ancale attiba ttu baa nu bittu rule'e gansi nía tena. Denuala nna ca benni rite lo nua nna läga yucana bixa yu'u lhi'u gue atta ruleacanaha.

<sup>45</sup> Becabitteba ttu ca nu rule'e nu rá lo ley boca'ana Moisés rána Jesús:

—Maestro, atti rinnelu rálú aná, ri'itu lhe riendintu.

<sup>46</sup> Jesús becabie re:

—¡Anágua lebi'i, ca nu rule'e nu rá lo ley-na, carusi'irule! Cumu runle duelha gue ca benni uncana iyácea nu rá lo ley-na, lebi'i nna niba saro'o nu rule'e na bittu raca lele unle.

<sup>47</sup>,¡Carusi'irule! Lebi'i nna rusíale ca baa tsee gue ca bi'ini uca profeta, ca bi'in-ni nua ulhidha ná ca benniola gueleha betticana.

<sup>48</sup> Leni nu runle-na rule'e lole lebi'i nna re'o lele gue nu ben ca benniola gueleha. Ca unnuha betticana ca bi'iniha, lebi'i nna rusíale ca baa guecabi.

<sup>49</sup> Denua nna unne Tata Do Iyyabaaha leni elha rieni re: “Neti idhelha atta se'ele-na ca benni anca profeta, ca benni anca apóstol lhe lebi'i nna uría lále ttulhe ca bi'iniha, a ttulhe ca bi'iniha

nna uttile.”<sup>50</sup> Larcala nna ca benni se'e nnannaba uni Tata Do Iyyabaaha quixacana gue reni bilali gue iyába ca benni uca profeta, desdeba axta atti ure yies lo yu-ni,<sup>51</sup> desdeba reni gue Abel axtaba reni gue Zacarías, bi'ini betticana lagüi gue lhe'eli'a gue yotuha atta do becoaha. Larcala nna rpea le, Tata Do Iyyabaaha ennabe cuenta gue elhutti gue ca bi'iniha len ca benni se'e nnanna.

<sup>52</sup>; Carusi'irule! Lebi'i ca nu rule'e nu rá lo ca ley boca'ana Moisés, cumu chi rusunale unbia ca benni Tata Do Iyyabaaha. Lebi'i nna lä riaguuba lele Ben-na, lä rugüelhaguale tsia le ca benni raca lecani tsia lecani Ben-na lhe.

<sup>53</sup> Atti bería Jesús lhe'e yo'o gue benni fariseo, ca nu rule'e nu rá lo ley boca'ana Moisés lhe ca fariseo lhe bisa'axxattaquinna lo ni'a gue nu unne Jesús. Denua nna desdeba lania udulottebacana betsitsiquinne lhe rinnaba tisaxxattacane lhe.<sup>54</sup> Anía bencana qui ixii ro'o Benniha ibixxie bixa innee qui te ro'ocani udelha iyyacane.

**Jesús rule'enie ca benni qui bittu  
uncana nu lä anca tsee run ca fariseo**

(Mt. 10:26-27)

**12** La laniaguaba nua nna balhala mili benni bitupa atta do Jesús. De yarba de ixe ca benni chi raca, nuarca risinxattalhe'e loescani. Jesús unnee belise primerba ca bi'ini rudheti ca tisa rule'e re cabi:

—Gualdo cuidadu len levadura gue ca fariseo-na. Diatia ria, lacana ancacana nu ni lo ni tisaba runcana dequi ancacana nu runi nu anca tsee.<sup>2</sup> Cumu tsa lägabi te ttu bixa te gatsi, lä tsanni lobana, niguuba lä caa ttu nu raca sigá, lä unaba benni-na.<sup>3</sup> Larcala nna iyába nu unne gatsile, iríana lolia. Nu unne sigá ro'o naga loesle lhe'e yo'o yaya nna ribesi'anicana nua iqui yo'o.

**Nu dica gasin ca benni**

(Mt. 10:28-31)

<sup>4</sup> Lebi'i, ca benni se'e tsee len neti, neti nna upea le: “Bittu gasinle lo ca nu uttican cuerpu guele-na, cumu dequila nna tsa lärga birua dhacana udhacaquinna le.”<sup>5</sup> Neti quixxi'atia le nú Benni dica

gasinle: Gualgásin Benni dequide cuee elha naban guele-na, lee nna te derechu guee udelhe le atta lexúa ha. Gualíba, Benniha gualgásini.

<sup>6</sup>'¿Si läba guayúbari len chuparba belhi nu bittu tte lidhacani te rito'o gayu ca binnito? Läquiga de nua nna tsa läga rixulhani Tata Do Iyyabaaha gue ni ttu ca unná. <sup>7</sup>Anáguaba lebi'i, axta ca itsiquile-na coa ttuttucana babani Benniha. Larcala nna bittu gasinle, cumu lebi'i nna dacarlale atti ixe tsitsia ca binni-na.

### **Nu sate ca benni dhi ro'ocani gualí ancabiaquinna Jesús**

(Mt. 10:32-33; 12:32; 10:19-20)

<sup>8</sup>'Neti ria le, nuxaba benni dhi ro'oni gualíba ria leni neti aní lo benni, neti Benni unbiyuu daa iyyabaaha nna dhíguba ro'a gualíba ria leni neti aní lo ca ingeli gue Tata Do Iyyabaaha. <sup>9</sup>Ttiaca benni bittu dhi ro'oni aní lo benni gualíba ria leni neti nna anáguaba neti bittuguuba dhi ro'a gualí ria leni neti lo ca ingeli gue Tata Do Iyyabaaha.

<sup>10</sup>'Tata Do Iyyabaaha guadíbe elha xen lasi gue iyába ca benni inne güecana quia neti Benni unbiyuu daa iyyabaaha, ttiaca bittu dhie elha xen lasi gue nu inne güena gue Espíritu guee.

<sup>11</sup>'Atti ichecan le lo ca nu lo se'e lhe'e ca yo'o atta ritupari rudhetiri ca tisa gue Tata Do Iyyabaaha, o lo ca xueda-na lhe lo ca uxtisi-na lhe bittu ichacha iquile gue bixa innále qui exúle o gue bixa ecabile lhe. <sup>12</sup>Cumu atti isía inneleha nna Espíritu gue Tata Do Iyyabaahaba quixxi'enie le bixa innále.

### **Ejemplu gue benni uttaxxatta gueni**

<sup>13</sup>Ttu ca nu sela len ca benni se'e nía nna unnena rána Jesús:

—Maestro, gus betsia-na ila'ana interés-na qui unnana nu ralha dhia.

<sup>14</sup>Jesús becabie re nua:

—Unbiyuu du-ni, läganu bodún neti aca xueda o nu ilha'a nu te guele lhe.

<sup>15</sup>Nianna re ca benni se'e nía:

—Gulyú guele, bittu dhaxxatta lele nu te yies lo yu-ni, cumu läganu de gattaxxatta guele uni itíaruinle.

<sup>16</sup>Laniala nna utixxi'enie cana ttu ejemplu, nianna re cana:

—Udo ttu unbiyuu uttaxxatta gueni. Ca lo yu gueniha nna bixuuxxatta lena bani locani. <sup>17</sup>Unbiyuu texxatta gueniha nna

udona belaba leni rána: “¿Bi unia nnanna? Bitturu anca gaxa cua tseea ca lena bani quia-ni.”<sup>18</sup> Nianna rána: “Chi yua bixa unia. Ottapaba ca atta tua tseetia ca lena bani quia-ni, nianna eyonia cana xxenru, qui cua tseea lhe'ecani iyába ca lena bani quia-ni lhe iyába nu te quia lhe.<sup>19</sup> Lania nna upetteba la netiba: Xxeni elha tsee chi tua tsee quia gue ixe ida. Nnanna nna edí lasia lhe i'iya lhe goa lhe edaca lasia lhe.”<sup>20</sup> Ttiaca Tata Do Iyyabaaha re na: “Nu dit lärienini, nantte lo rela-niba gattilu, nianna nu tua tseenlu-na nna ¿núla gueonna?”<sup>21</sup> Aná rate ca benni runi racacana nu texxatta gueni yies lo yu-ni, ttiaca len Tata Do Iyyabaaha nna benni diba ancacana.

### **Tata Do Iyyabaaha ruyué ca xi'inie**

*(Mt. 6:25-34)*

<sup>22</sup> Nianna rá Jesús ca benni rudheti ca tisa rule'e:

—Larcala nna rpea le: Bittu ichacha iquile gue nu gole qui aca banle, niguaba gue nu uculé lhe.<sup>23</sup> Cumu dacarla elha nabán guele atti nu role, aníaguaba cuerpu guele dacarla na attichula nu rucule.<sup>24</sup> Gualgüia gue ca bequi-na, ca unna nna läga rigu'ucana xua, bittuguaba rolapacana lhe bittuguaba rigúa tsee guecani lhe. Läquiga de nua nna Tata Do Iyyabaaha gua rutebe nu ro ca unná. ¡Adílaba lebi'i dacarlale atti ca binni-na!<sup>25</sup> Läganu benni te de ichachaba iquini nna unna itienna ladiba attu ura iqui de nu chi anca aca banna yies lo yu-ni.<sup>26</sup> Cumu gansi bittuba dhale unle ni ttu nu anca chica'aru nna ¿biacala nna richacharu iquile gue bixarua?

<sup>27</sup> Gualgüia gaxasná rixen ca iyya-na. Ca unna nna läga runcana sina, lä runguacana lari lhe. Ttiaca neti ria le, niba Salomón, masquiba chi uttaxxatta gueni, tsa bittu udána ucu xo rule'e tsee gueni qui ule'ena atti rule'e ca iyya-na.<sup>28</sup> Gansi análi tsee run Tata Do Iyyabaaha rule'e ca iyya daa ca lo yu-na ca nu nasá ralicana, uxxedilaba nna chi tsiacana lo gui, ¡läba ganna adírlaba tsee uni Ben-na len lebi'i, ca benni bittu chi ria tsee leni!<sup>29</sup> Larcala nna bittu ichacha iquile gue bixa gole, niguaba gue bixa i'iyale lhe. Bittu ulaba lele gue unní.<sup>30</sup> Cumu gue iyába unní richacha iqui ca benni bittu ancabiani Tata Do Iyyabaaha, ttiaca lebi'i nna gua doba Tata guele benni do iyyabaaha, lee nna guayuxabe bixa reasinle.

<sup>31</sup> Lebi'i nna primero gualudo lele gualuni nu run ca benni rinnabia Tata Do Iyyabaaha. Benniha nna gutebe iyába nu reasinle.

**Jesús rixxi'e gaxasná unri qui gatta elha tsee gueri iyyabaaha**  
*(Mt. 6:19-21)*

<sup>32</sup> 'Bittu gasinle, lebi'i ca benni anca attiba carne'e quia. Masquiba läga ixele se'e, ttiaca Tata Do Iyyabaaha chi bedaa lee unie acale benni innabia len lee. <sup>33</sup> Gualto'o bixa te guele. Nu unnacana gue unnuha nna gualute na len ca benni bittu te gueni. Anía nna rigúa tseele nu te guele iyyabaaha, atta bittu lhuxana. Nía nua gatta ttu dia liiba elha tsee guele atta bittu aca ga'a ubana lhanana nua, bittuguaba aca ga'a tsu unna tsu'uba nua lhe. <sup>34</sup> Cumu atta tua tsee elha tsee gueleha nna gue níaguuba rulaba lele.

**Ese'e tseele cumu güesia Benni unbiyuu daa iyyabaaha**

<sup>35</sup> 'Gualese'e tsee, tsitsi gualedhí lhe'ele, gualugalha ca gui denle-na lhe. <sup>36</sup> Gualuni attiba ca benni ren sina se'ecana ribedacana benni baninbi cana dedaabi güiabi atta betsá nácani, qui cuantusi inne bi'iniha nna idhalttebacana puertaha qui eta'a bi'iniha gansi chi besíabi. <sup>37</sup> Carbáru ca nu ren sina ettetti'a Benni bananie cana se'ecana ubeda gansi chi besíabi. Neti nna gualibatia rpea le, bi'iniha nna edutsettebabí cuinaba labi osiabi cana ro'o mexaha, atti ca'attebabí elha go gocana. <sup>38</sup> Carbáru ca nua, gansi ettetti'abi cana se'ecana ubeda, masquiba chi bisía tu riloela o si tu daa tsani lhe. <sup>39</sup> Ttiaca Gualúnarga nu upea le-ni, ttirca ttu benni beaca gueni ttu yo'o chi yuna bi ura isína ubanaha, lana nna läga ga'adhina qui bittu uguelhana ga'a ubanaha lhanana nu te lhe'e yo'o guenihá. <sup>40</sup> Anáguuba lebi'i, gualtse'e ubeda, cumu neti Benni unbiyuu daa iyyabaaha esíaya atti bittu leda lele."

**Benni bittu rudo tisa gue benni bananie na**  
*(Mt. 24:45-51)*

<sup>41</sup> Pedro nna unnaba tisabi rábi:  
 —Benni bananie ri, ¿si sun ri'ibatu unní rinnelu rulisalu leni ejemplu-ni, aca? ¿Si iyába ca benni se'e-ni rulisalu, aca?

<sup>42</sup> Nianna rá Jesús:

—¿Nú nua ancana benni rudo tisa te elha rieni gueni bodú benni bananie na qui gapana ca benni riben sina lhe'e yo'o guebiha, utena nu go ca nua ura guecani lhe? <sup>43</sup> Carbáru nu ren sina satti'a benni bananie na dana runna nu daa loni unna gansi chi besíabi. <sup>44</sup> Neti ria, bi'ini baninbi nua nna odúbi na qui acana nu gapa iyába nu te guebi. <sup>45</sup> Ttiaca gansi nu ren sinaha aquinna dequi bi'ini baninbi na ha isábabi atti esíabi. Lana nna dhulottebana ugüena adí ca unbiyuu ren sinaha, adí ca nuila ren sinaha lhe atti dhottebana i'lya lhe gona lhe dhusinna lhe. <sup>46</sup> Nianna bi'ini baninbi na ha esíabi la sá atti bittu ribedana, la ura atti bittu leda leni esín bi'iniha lhe. Bi'iniha nna ugüebi na ttu elha disa tsitsi, atti udelhabi na atta ralhana tsiana len ca nu lä bedo tisa.

<sup>47</sup> 'Nu ren sina nu gua yuxeabana bi nua raca le bi'ini baninbi na unna lana nna bittu redú tseena, lä runguana nu raca le bi'iniha lhe de unnuha nna tsitsiba itín nua. <sup>48</sup> Ttiaca nu ren sina bittu yuna bix nua raca le bi'ini baninbi na unna lana nna runna ttu nu ralhana dhína elha disa gueni. Unnuha nna ttu lattiba itínna. Cumu iyába ca nu ridíxxeni nna xxenirguaba ralha ca nua otecana. Anágua ba benni nu ruxxenru le benni-na, xxenirguaba nu innábacana unna.

### Lo ni'a gue Jesús ila'a lhe'e loes ca benni

(Mt. 10:34-36)

<sup>49</sup> 'Neti nna delha unia dho gui yies lo yu-ni, nu racaru lasia nna ttirca chila udona gui. <sup>50</sup> Ttiaca neti nna labíaba satexxatta uyúa elha disa, tsitsiba rudú guaten neti axta liba isía sá atti satea aná.

<sup>51</sup> Lebi'i nna ¿si raquinle dequi delha yies lo yu-ni qui tse'e tsee len loes ca benni? Neti nna ria, bittu. De bisíala nna ila'a lhe'e loes ca benni. <sup>52</sup> Cumu desde nnannali dhulo gayu ca benni se'e lhe'e ttu yo'o tse'e tilha len loescani, tsunnacana ttilha lencana a chupa ca nua, ca nu chupaha nna ttilha lencana ca nu a tsunna. <sup>53</sup> Tataha nna ttilha lenna xi'in biyuuniha, xi'in biyuuniha nna ttilha lenna na. Nanaha nna ttilha lenna xi'iniunnániha, xi'iniunnániha nna ttilha lenna na. Nan gue unbiyuuhha nna ttilha lenna xolisniha, xolisniha nna ttilha lenna na.

**Nu raca yies lo yu-ni rixxi'ana gue nu aca***(Mt. 16:1-4; Mr. 8:11-13)*

<sup>54</sup> Jesús re iyába ca benni:

—Lebi'i nna gansi chi rilenle dedaa ttu bea daca atta radi bisa-na, ráttebale: “Iyyaba aca”, nianna aníaba raca. <sup>55</sup> Atti riría be daca sur, ráttebale: “Bisaba aca”, nianna aníaba raca. <sup>56</sup> ¡Lebi'i ca nu nilo ni tisa runle dequi ancale nu runi nu anca tsee! Gua ritedaablinle gue nu raca lo bea-na lhe nu raca yies lo yu-ni lhe. ¿Biacala nna bittu ritedeenle gue nu rilenle raca tiempu se'ele-ni?

**Gualuni qui eyaca tsee lenle nu ritilha lenleha***(Mt. 5:25-26)*

<sup>57</sup> ¿Biaca lä ritsatsa ni'a la lebi'iba qui ttedeenle gaxa te nu anca tsee? <sup>58</sup> Gansi nuxa saga'an lu lhe'e yo'o lagüi lo ca uxtisi, laca yu'u lenlu nua neda nna beni gaxasná eyaca tsee lenlu nua, qui bittu icheen lu sadún lu lo xueda, cumu xuedaha nna utten lu las ná güensina, güensinaha nna udelhan lu lisiyya. <sup>59</sup> Neti ria nna läga eríalu lhe'e lisiyyaha axta liba quixalu iyárecha belhi nu innába ca nua.

**Gualodú xiyyan le qui bittu tsia nittle**

**13** Laniaguaba nua bisína ttu chupa ca benni atta du Jesús. Lacana nna utixxi' aquinna Benniha, Pilato benna mandadu betticana ttulhe ca unbiyuu daa lo yu gue Galilea laca se'ecana rutticana ca nimala qui utecana úna gue Tata Do Iyyabaaha. Reni gue ca nimalaha nna biselana len reni guecani. <sup>2</sup> Jesús re:

—¿Si rquinle dequi guate ca unbiyuu gue Galilea anía de ancacana nu teru tulha guecani lo Tata Do Iyyabaaha atti adí ca benni se'e lhe'e yies guecaniha? <sup>3</sup> Neti nna ria, dica. Lebi'i nna gansi bittuba odú xiyyan le odaxxule neda gue Tata Do Iyyabaaha, anáguaba lebi'i, iyábale gattiguabale. <sup>4</sup> ¿O rquinle dequi ca nu sixunu (18) utti atti ubixxi lo yo'o nu anca ixe coa do lhe'e yiesi Siloé iquicaniha, ancacana ca nu benru nu bittu anca tsee delo iyá ca nu se'e Jerusalén? <sup>5</sup> Neti nna ria, dica. Lebi'i nna gansi bittuba odú xiyyanle odaxxule neda gue Tata Do Iyyabaaha, anáguaba lebi'i iyábale gattiguabale.

### Ejemplu gue ya igu nu bittu ribía nu xixxi gueniha

<sup>6</sup> Jesú utixxi'attebanie ca benni se'e nía ttu ejemplu, re cana:

—Ttu unbiyuu yadinbi ttu ya igu lhe'e yu atta te besuli guebiha. Nianna güiabi guagüiabi gansi gua sia igu gue nua. Ttiaca niba ttu igu bittu guatti'abi. <sup>7</sup> Larcala nna rábi unbiyuu ruyú atta yada besuliha: “Begüiarga, chinca tsunna ida-ni rita reguila nu xixxi gue ya igu-ni, ttiaca tsa bittu rati'aya nu xixxi loni. Uchú na, cumu cuentarguaba duna rulháninna lo yu-na.” <sup>8</sup> Ttiaca nu rapa lo yuha nna becabina rána: “Benni bananie neti, begüeelha na dhuna attu ida-ni, laca iche'enia xanni, cuequia bebi lhe <sup>9</sup> qui nicaga gutebana nu xixxi. Gansi bittuba nna lania liba ichúlha.”

### Jesús beonie ttu nuila sá redí le ca benni Israel

<sup>10</sup> Ttu sá atti redí le ca benni Israel, Jesús bele'enie ca benni lhe'e ttu yo'o atta rudheticana ca tisa gue Tata Do Iyyabaaha. <sup>11</sup> Nía du ttu nuila chi anca sixunu (18) ida ranina. Ttu be xxegüiba nua uyu'una, nuarca bedo rubana cu'eni, nianna ttu tsaba bittu raca elixxana. <sup>12</sup> Atti bilen Jesús nuilaha nna uxttebe na re na:

—Nuila, chiba ulálu lo isagüe guelha.

<sup>13</sup> Laniala nna bexxúa nee cu'eni. Snaba lania belína, nianna udulottebana ulequi xenna Tata Do Iyyabaaha. <sup>14</sup> Ttiaca nu lo gue yo'o atta rudheticana ca tisa gue Tata Do Iyyabaaha nna bisa'attebinna de biaca beon Jesús nuilaha la sá redí lecaniha. Nianna ráttebana ca benni se'e nía:

—Xxupa ubisaba ga'ana cuen ca benni sina. Lhe'e ca sá-ni gualtá qui eyacale, bittu itale qui eyacale sá redí leri-ni.

<sup>15</sup> Jesús becabie re:

—Lebi'i, ca nu ni lo ni tisaba runi dequi ancale nu runi nu anca tsee, lä gua rudhanba cua ttu ttule u'una guele o burru guele sá redí leri-ni qui tsia lenle nua sagüi'ale na inda. <sup>16</sup> Nuila du-ni nna ancana nu datía Abraham. Chinca sixunu [18] ida yu'uni nu xxegüiha na isagüe, nianna ¿si bittuba dica eyaca nuila-ni sá redí leri-ni?

<sup>17</sup> Atti rá Jesús anía nna ca nu bittu raca uyúcana Benniha nna bettuxxattaquinna, ttiaca adí ca benni se'e nía nna tsitsiba ru'u lecani rilaquinna ca milagru run Benniha.

### **Ejemplu gue bes coana murtasa**

(Mt. 13:31-32; Mr. 4:30-32)

<sup>18</sup> Ráguba Jesú:

—¿Gasná rule'e atti rinnabia Tata Do Iyyabaaha ca benni? ¿Bi nua ttu te innía ancana aná? <sup>19</sup> Atti rinnabia Tata Do Iyyabaaha ca benni ancana attiba ttu besi coana murtasa uda ttu unbiyuu lo yu gueniha. Unnuha nna bixenna ucana attiba ttu ya ga'a, ca binni-na nna runi xcuadi guecani lo ca xiquini.

### **Ejemplu gue levadura**

(Mt. 13:33)

<sup>20</sup> Ráguba Jesú attu libe:

—¿Bi nua ttu innía raxxína ancana attiba atti rinnabia Tata Do Iyyabaaha ca benni? <sup>21</sup> Atti rinnabia Tata Do Iyyabaaha ca benni ancana attiba levadura bedaxxu ttu nuila betselana lhe'e tsunna ya yiedi qui ilhidhana lhe'e itúba cua gue ttaxtilaha.

### **Gualun duelha gualga'a ro'o puerta güexxa-na**

(Mt. 7:13-14, 21-23)

<sup>22</sup> Laca dia Jesú yu'e neda daca Jerusalén, lee nna rule'enie ca benni se'e lhe'e ca yiesi lhe ca ranchu lhe se'e atta die ritee. <sup>23</sup> Ttu benni nna unnaba tisana rána Benniha:

—Benni bananie neti, ¿si ttulherba benni anca odilá Tata Do Iyyabaaha?

Lee nna becabie re:

<sup>24</sup> —Gualun duelha gualga'a ro'o puerta güexxa-na, cumu netiria, ixe ca benni uncana ga'acana, ttiaca bittu dhacana. <sup>25</sup> Dequide chadha benni beaca guebi yo'oha odheabi puertaha nna lebi'i ca nu se'e lhe'eli'a nna innele innále: “Benni bananie ri'itu, udhalchi qui ga'atu”, ttiaca bi'iniha nna ecabibi guele innábi: “Läga yu neti gax beaca lasle.” <sup>26</sup> Lania nna dhulole innále: “Inqui len luba u'uya utotu lhe lo ca neda se'e lhe'e ca yies guetu-naba udílu bele'enlu ri'itu lhe.” <sup>27</sup> Ttiaca Benniha nna ecabie innee: “¿La chiba rpea le bittu yua ga ladu dale? ¡Gualbieta atta dua-ni, lebi'i ca nu runi nu bittu anca tsee!” <sup>28</sup> Atta tsiale nna ancana atta cuesle lhe atta goni

lo layale lhe atti ilenle Abraham, Isaac lhe Jacob lhe iyáguaba ca benni uca profeta lhe se'e atta rinnabia Tata Do Iyyabaaha, ttiaca lebi'i nna cuequibe le.<sup>29</sup> Cumu isía ca benni daa daca norti lhe daca sur lhe daca atta riría bisa-na lhe daca atta radi bisa-na lhe qui ebíacana gocana ttu elha go tsee atta rinnabia Tata Do Iyyabaaha.<sup>30</sup> Lania nna ixe ca nu bittu ancacana nu ra xxeni leni nnanna eyacacana nu ra xxeni leni, ca nu anca nnanna nu ra xxeni leni nna eyacacana nu bittu ra xxeni leni.

### **Jesús ribesie gue Jerusalén**

(Mt. 23:37-39)

<sup>31</sup> La sátteba bisín ttulhe ca benni fariseo, nianna rácana Jesús:  
—Bería ni beyya, cumu Herodes rdacana uttin lu.

<sup>32</sup> Jesús becabie re cana:

—Gualtsia gualgás bedaha: “Neti nna nasá lhe uxxea lhe ebearba ca be xxegüi-na lhe eyonia ca benni rani-na lhe güisa nna uluxa sina quia-ni.”<sup>33</sup> Ttiaca labíaba usiguiá neda quia nasá lhe uxxea lhe güisa lhe cumu läga dica gatti ttu benni ancabi profeta attu atta subi, gan läba lhe'e yiesi Jerusalén.

<sup>34</sup> ¡Atturu gueni xa benni se'e Jerusalén! Lebi'i nna ruttile ca bi'ini anca profeta, rusíale iyya ca benni ridhelha Tata Do Iyyabaaha atta se'ele lhe. ¡Balhala libe benia ose'ale ttu reba attiba run ttu bera reaxina ca xi'inni regu'u lhe'e xxilani qui uyúncana, ttiaca bittu uca lele!<sup>35</sup> Gualgüia nnanna yies guele-ni nna a tturbana eya'ana. Neti rpea le, lebi'i nna bitturu ilenle neti, axta liba isía sá innále: “¡Carbáru Benni daa cuenta gue Tata Do Iyyabaaha!”

### **Jesús beonie ttu unbiyuu yu'u gui**

**14** Ttu sá redí le ca benni Israel nna güia Jesús go yetta lhe'e yo'o gue ttu nu anca nu lo gue ca fariseo. Adí ca fariseo nna se'ecana güelhatsi.<sup>2</sup> Gaxxaba atta do Jesús du ttu unbiyuu rani yu'una gui.<sup>3</sup> Jesús unnaba tise ca fariseo se'e nía lhe ca nu rule'e nu rá lo ley boca'ana Moisés lhe re cana:

—¿Si gua dica eyaca ttu beni rani sá redí leri-ni? ¿Si bittuba aca?

<sup>4</sup> Ttiaca lacana nna bittu unnecana. Laniala nna bedaxxue nu raniha atti beonttebe na, nianna re na:

—Beyyatte.

<sup>5</sup> Ca fariseo nna re cana:

—Lebi'i nna gansi burru gueleha o si u'una gueleha iyinnina lhe'e ttu pozo, ¿läba ganna saleattebale nua masquiba anca sá redíleri?

<sup>6</sup> Lacana nna bittu beselaquinna bixa innácaná ecabicana gue Benniha.

### **Ca nu se'e atta betsá ná ca benni**

<sup>7</sup> Atti biláni Jesús ca benni biyaxi go etta rucuecana atta anca tseeru qui cuiacana, lee nna bedúttebe elha rieni iquicani re cana:

<sup>8</sup>—Gansi nuxa gaxina lu atta utsá ná ca benni, bittu ttelu dholu atta anca cuia ca nu lo, qui lä isía attu benni biyaxi ra xxenru leni atti lu. <sup>9</sup>Lania nna nu uxna leha nna isíana gán lu: “Begüe unní atta dolha dhona.” Nianna lu nna tu rettubinlu sadolu axta xurbanali. <sup>10</sup>Lugar quiba unnuha nna gansi chi nuxa gaxna lu, lu nna dhottelalu xubana, qui atti isía nu uxna luha nna innána: “Benni do tsee lania, ute udo axta atta anca cuia ca benni lo.” Lania nna iyába ca nu sia lenlu ro'o mexaha iláquinna rapa nu run laníha lu respeto. <sup>11</sup>Cumu nuxaba benni nu la labana runna dequi ancana nu ra xxeni leni, Tata Do Iyyabaaha unie eyadigaa leni, nu rechida gaa leniha nna uni Benniha acana nu ra xxeni leni.

<sup>12</sup>Ráguba Jesús unbiyuu nu uxne lhe'e yo'o gueniha:

—Atti aquinlu ugolu xue o si rse, bittu gaxlu ca nu se'e tsee lenlu, niguaba ca betsiliha lhe niguaba ca nu datíaluha lhe niguaba ca nu te gueni se'e lenlu gaxxa lhe cumu ca unnuha nna gaxguaba ca nua lu, lania nna chiba beguixa ca nua guelu. <sup>13</sup>Lu nna atti unlu ttu laní, tseerla gaxlu ca nu bittu te guecani, ca benni recu ni'a nácani lhe ca benni xi lhe ca nu xua locani lhe. <sup>14</sup>Lania nna carbárulu. Cumu ca unní nna bittu aca eguixacana guelu, ttiaca lu nna dhílu elha tsee atti isía sá eyadha ca benni beni nu anca tsee lhe'e ca baa-na.

### **Ca benni biyaxi tse'e laní**

*(Mt. 22:1-10)*

<sup>15</sup> Atti bienin ttu ca nu re ro'o mexaha nu rá Jesús, nianna rána Benniha:

—¡Carbáru ca benni go elha go gatta atta do Tata Do Iyyabaaha rinnabie!

<sup>16</sup> Jesús becabie re:

—Ttu unbiyuu bego etta nna uxbi ixeru benni. <sup>17</sup> Bisíaba ura gocana etta nna benttebabí mandadu benni run sina guebiha sayúma ca nu anca ita go etta, gán cana: “Gualtá, qui chi te elha go.”

<sup>18</sup> Ttiaca iyábacana udulocana bedúcana tisa. Nu primeraha nna rána: “Chi uxíba ttu lo yu quia, níala tsiaya sagüiaya nua. Rinnaba lolu gálbi dhichibi elha xen lasi quia.” <sup>19</sup> Attuna nna rána: “Chi uxíba gayu neda u'una, nianna chi uquetila ca nua qui ule'ena gansi güixúcana cuencana sina. Rinnaba lolu gálbi dhichibi elha xen lasi quia.” <sup>20</sup> Attuna nna rána: “Chi betsába náya, denua nna larcala bittu aca ita.” <sup>21</sup> Benni run sinaha nna bequina guattixxi'enna benni baninna naha iyába nu rá ca unnuha. Nianna benni beaca guebi yo'oha nna bisa'attebinbi, atti rábi benni run sina guebiha: “Güia dhuti lo ca neda xen-na lhe atta se'e ca neda güexxa se'e lhe'e yies-ni lhe guaxxí ca nu bittu te guequinna ca nu recu nácani o ni'acani lhe ca nu xua loquinna lhe ca nu xi lhe.” <sup>22</sup> Läga bicaga isá uca nna chi besin benni ren sinaha rána: “Benni bananie neti, chi benia nu ben cuinalu mandadu unia. Sna ancaba lhe'e yo'o-ni nna.” <sup>23</sup> Nianna redea benni baninbi benni run sina guebiha: “Güia ro'o yies-ni lo ca neda xen-na lhe lo ca neda chica'a-na lhe ben duelha gue adí benni itacana, qui tsa isá lhe'e yo'o quia-ni. <sup>24</sup> Cumu neti ria, ni ttu ca nu uxia primeraha bittu gocana elha go quia-ni.”

### Nu sate ca benni udheti ca tisa rule'e Jesús

(Mt. 10:37-38)

<sup>25</sup> Ixe tsitsia ca benni denalhacana Jesús. Lee nna bodequitteba loe re cana:

<sup>26</sup> —Nuxa benni raca leni acana benni udheti nu rule'a nna gansi bittuba racaruinna quia atti gue tata gueniha lhe gue nan gueniha lhe gue nuila gueniha lhe gue ca xi'inniha lhe gue ca betsiniha lhe gue ca danniha lhe gue elha nabán gueni lhe läga aca aca nua benni udheti nu rule'a. <sup>27</sup> Benni bittu dhielhana uchíana lo nu satena lo ni'a quia, attiba ttu benni nuja crusi gueni diana atta ttána lo nua, unnuha nna bittuguaba bi elha ralhana acana nu udheti nu rule'a. <sup>28</sup> Gansi nux ttule raquinle udole ttu yo'o nu aca ixe coa, ¿läba primerxa ebíale ulaba lele gue ttixa tsia gue nua qui anáchu ugüiale gansi guaca ni nu te guele uluxale nua? <sup>29</sup> Cumu gansi

dhulole ucoale cimientu gue yo'oha, nianna bittu dhale uluxale nua, lania nna iyába ca nu iláquinna nua, dhulocana edacaquinna guele,<sup>30</sup> innácana: “Unbiyuu du-ni nna udulona rudona yo'o, ttiaca bittu udána uluxan na.”<sup>31</sup> O gansi ttu nu rinnabia tsiana ttilha lenna attu nu rinnabia, ¿läba primerxa dhona udhaca leni gansi guadá tsii mil ca soldado gueniha ttilha lencana nu daa len galhia (20) mil soldadoha?<sup>32</sup> Gansi udhacaba leni bittuba dhana ttilha lenna ca nua nna laca sna daa nu rinnabiahia idittu nna idhelhana benni gueni qui tsiacana sannabacana lo nua qui bittu ttilhacana.<sup>33</sup> Aníaguuba lebi'i, gansi nuxa ttule bittu udhequile iyá nu te guele, läga aca acale benni udheti nu rule'a.

### **Bi un benni len deti-na gansi initti ixe gueni**

(Mt. 5:13; Mr. 9:50)

<sup>34</sup> Tseeba rixuu deti-na, ttiaca gansi enitti ixe gueni, lärga aca eyona ixe attu libe.<sup>35</sup> Tsa lärgabi ixuuna, ni de cuena lo yu, niguuba qui tsiana lhe'e bebi lhe. Denuala nna iru'una na. Atta rieninle nu ria-ni nna tsitsi gualdo nagale qui sadú lele.

### **Benni beselani carne'e bigannah**

(Mt. 18:10-14)

**15** Iyába ca güequixa, nu ruquixacana ca benni belhi qui eyya Roma, lencana adí ca nu te tulha guecani lo Tata Do Iyyabaaha lhe ubigacana atta du Jesús qui iyienquinna gue nu rá Benniha.<sup>2</sup> Ca nu fariseo lencana ca nu rule'e nu rá lo ley boca'ana Moisés, rinne güecana gue Jesús rácan:

—Unbiyuu du-ni nna rulabina ca nu te tulha guecani lo Tata Do Iyyabaaha, roguaba lenna ca unná yetta lhe.

<sup>3</sup> Laniala nna utixxi'ani Jesús cana ttu ejemplu, nianna re cana:

<sup>4</sup> —Gansi nuxle se'e ttu gayua (100) carne'e gueni, nianna iganna ttuna, ¿läba ganna use'e bixxi nua ca nu tta yu'u chennia (99) qui tsiana satilana carne'e bigannah, axta qui eselinna nua?<sup>5</sup> Gansi chi besinna nua nna eyo'o tsitsia leni, atti odaxxuna nua oxxúa xiquini.<sup>6</sup> Gansi chi besinna lhe'e yo'o gueniha nna saxxittebana ca benni se'e tsee lenna ca nu se'e gaxxa atta do yo'o gueniha lhe nianna innána: “Gualedacani len neti, cumu chi guatt'iaya

carne'e bigannah." <sup>7</sup> Neti rpea le, anáguaba adílaba güedaca le te iyyabaaha gue ttu benni te tulha gueni atti rodú xiyyan na rodaxxuna neda gue Tata Do Iyyabaaha attichula gue ca nu tta yu'u chennia (99) bittu reasa odú xiyyancana lo Tata Do Iyyabaaha.

### **Nuila nu bedelhana belhi gueniha**

<sup>8</sup> 'O si ttu nuila denna tsii ca belhi, nianna udelhana ttu nua, ¿läba ganna ugalhattebana ttu gui lhe ulhubana lhe'e yo'o gueniha eguila te suna axta qui eselinna nua? <sup>9</sup> Atti satti'ana unnuha nna salisattebana ca nu se'e tsee lennaha lhe adí ca nuila ca nu se'e gaxxa atta do yo'o gueniha lhe nianna innána: "Gualedacani len neti, cumu chi beseltia belhi bedelhaha." <sup>10</sup> Neti ria le, anáguaba redaca le ca ingeli gue Tata Do Iyyabaaha gansi chi rodú xiyyan ttu benni te tulha gueni qui rodaxxuna neda gue Tata Do Iyyabaaha.

### **Benni uxí elha xen lasi gue xi'in biyúbi biría lhe'e yo'o guebiha**

<sup>11</sup> Ráguba Jesús:

—Ttu unbiyuu se'e chupa xi'in biyuuni. <sup>12</sup> Nu güexxaha nna rána tata gueniha: "Tata, benna interés quia nu ralha dhia." Laniala nna ulha'a tata gueniha nu te gueni begüeena irupaba ca xi'in biyuuniha. <sup>13</sup> Lägabi bisá dequide lania, uncuiti güexxaha nna bettupana iyába nu uxínaha. Atti diattebana attu yiesi subi atta guannitti lona itúba interés uxínaha, benna nu ucaba leni. <sup>14</sup> Atti chi bea iyába nu cheenaha bennitti lona, ucatteba ttu ubina xeni lhe'e yiesi atta donaha. Nianna udulotteba beasinna nu gona. <sup>15</sup> Laniala nna güiana guannabana sina lo ttu unbiyuu beaca lasni lo yiesiha. Unnuha nna udhelhan na ranchu gueniha güeyú cutsi. <sup>16</sup> Lana nna attulade ridá leni gona ttu nu ro ca cutsiha de ritunxxattana, ttiaca tsa läganu rutena nu gona. <sup>17</sup> Laniala nna bodhá leni, nianna rána: "¡Ixe ca nu yu'u sina lhe'e yo'o gue tata quia rexxala nu rocana, neti nna gua doa ni rattia ubina!" <sup>18</sup> Eyequibalha neti eyya lhe'e yo'o gue tata quia, nianna upe: Tatato quia, benba nu bittu anca tsee lo Tata Do Iyyabaaha lhe len cuinalu lhe. <sup>19</sup> Larca bittu ralha aca xi'inlu, benba aca attiba ttu ca nu yu'u sina guelha." <sup>20</sup> Anía uca nna begu'una neda deyyana lhe'e yo'o gue tata gueniha.

'Atti sa dedaalina idittu nna chi biláni tata gueniha na. Lana nna guatúatteba leni na. Bigaattebana guatsána na, atti utesttebana yienni, betsá loni xxagani lhe. <sup>21</sup> Xi'inniha nna rán na: "Tatato

quia, benba nu bittu anca tsee lo Tata Do Iyyabaaha, len cuinalu lhe larcala bitturu ralha aca xi'inlu.”<sup>22</sup> Ttiaca tata gueniha nna benttebana mandadu ca nu ren sina gueniha rána ca nua: “¡Jertte gualsalheaxxi ca lari tsee gualugucu na, gualcu'u ttu be'e xbináni lhe gualcu'u guaracha ni'aní lhe! <sup>23</sup> ¡Gualsaxxíguaba ttu u'una cuiti nu rixenruha, nianna gualuttitte na qui gori unri laní! <sup>24</sup> Cumu neti nna ucatia chiba utti xi'inia-ni, ttiaca besía banrubana, tsaba chi unitti lona lhe nianna beselarbana attu libe.” Atti udulottebacana bencana laní.

<sup>25</sup> ‘Xi'inbiyuu xen gueniha nna ranchula diana. Atti besinna gaxxaba atta do yo'oha nna bienttebinna ts'i'i ca nu rulha, raca güeya'a lhe. <sup>26</sup> Laniala nna uxna ttu ca nu ren sina gue tata gueniha unnaba tisana rána: “¿Biunna raca nii?” <sup>27</sup> Nu ren sinaha nna rán na: “Betsiluha bunna besía. Tata guelha nna benbi mandadu bettitu ttu u'una cuiti rixenruha, cumu de bequi betsilha besíana lhatsiru len labi, bittubi uxacana.” <sup>28</sup> Nianna betsí xen gueniha nna bisa'atsitsiabinna nianna bittu uca leni eta'ana yo'o. Laniala nna biría tata gueniha benna ruegu loni qui eta'ana. <sup>29</sup> Ttiaca lana nna becabina rána tata gueniha: “Lu gua yubalu ixe ida chi bixuu lo sina guelu, niba tsa lati quitsa tisa guelu lhe. Nianna tsaba bittu chi bennalu niba ttu chiva chica'a qui uttia unia laní len ca nu chi do tseea len lacana. <sup>30</sup> Ttiaca nnanna besía xi'inlu-na, nu chi guanitti lona belhi gueluha len ca nuila requi satsa-na, nianna lu nna bettirlu u'una cuiti rixenruha qui runlu laní gueni.”

<sup>31</sup> ‘Tata gueniha nna becabina rána: “Xi'into quia, lu nna ttu tsaba dolu len neti, nianna iyába nu te quia, guebalu ancana, <sup>32</sup> ttiaca nnanna raca duelha unri laní lhe edaca leri lhe cumu betsilha nna attisiba chiba uttina, nianna beaquinna attu libe. Chiguuba unittina lhe nianna beselabana.”

### Ejemplu gue nu beni unbiyuu banani sina

**16** Jesús utixxi'aguabanie ca bi'ini rudheti ca tisa rule'e, re cabi: —Udo ttu unbiyuu texxatta gueni, lana nna udoguaba ttu unbiyuu banani sina gueniha. Ca benni nna güiacana guattixxi'aquinna nu texxatta gueniha, rácan na: “Nu banani sina guelha nna cuentaba runnitti lona nu te guelu”. <sup>2</sup> Nu beaca gueni sinaha nna uxna nua rán na: “¿Biunni rácana runlu? Nnanna tte raca lasia bote cuenta len neti gue sina runlu-na, cumu lärga aca

usigUILU acalu nu banani sina quia-ni.”<sup>3</sup> Nu banani sinaha nna belabatbeba leni, nianna uquinna: “¿Bi unia nnanna? Benni renia sina guebi-ni cuababi sina quia. Neti nna bitturu guaca unia sina lo ca yu-na. Tsequia güennaba nu goa ro'o lis benni nna ettúbatia.

<sup>4</sup> Chi yua bixa unia, qui tse'e nuxa gaxna neti lisni atti bitturu sina quia te.”<sup>5</sup> Laniala nna udulona uxna ttuttu ttuttuba ca nu dácana gue benni beaca guebi sina baninnaha. Nu primeraha nna unnaba tisan nua rán nua: “¿Tti dalu gue benni beaca guebi sina bantia-ni?”<sup>6</sup>

<sup>6</sup> Unnuha nna becabina rána: “Neti nna daya ttu gayua (100) lampa ta'a seti lhe'eni.” Nu banani sinaha nna rána: “Ni sitsi gue nu daluha te ni. Jertte udo, bedo loni dequi a suna medi gayua (50) ba dalu.”<sup>7</sup> Lenla nna unnaba tisana attu nua rán na: “Lu nna ¿tti dalu?” Unnuha nna becabina rána: “Ttu gayua (100) uxtali xuxtila.”

Nu banani sinaha nna rána: “Ni sitsi gue nu daluha te ni. Bentte loni dequi a suna tta (80) ba uxtali xuxtila dalu.”<sup>8</sup> Benni beaca guebi sinaha nna bebanbinbi gue atti modu de resi'inu nu bittu run lhatsiru banani sina guebiha. Cumu ca benni bittu anca biani Tata Do Iyyabaaha, resi'inurcana len nu runcana atti ca benni chi ancabiani Tata Do Iyyabaaha.

<sup>9</sup> Neti nna rpea le, gualixuuni nu te guele yies lo yu-ni qui tse'e benni tse'e tsee lenle, qui atti isía sá eyya nu te gueleha nna chi se'e nu edínle lhe'e ca yo'o sia ttu dia liiba iyyabaaha.

<sup>10</sup> Benni ruyú lhatsiru nu saro'o baninna anáguba unna len xxenru. Nu bittuba run lhatsiruna len nu saro'o baninna anáguba un nua len xxenru.<sup>11</sup> Larcala gansi bittuba ruyú tseele elha tsee anca gue yies lo yu-ni nna tsa läganu uxxen leni le len nu gualíga anca elha tsee te iyyabaaha.<sup>12</sup> Cumu gansi bittuba biyú tseele nu bittu anca guele, nurquinle uxxen len le utena len lebi'i nu ralhale dhíle.

<sup>13</sup> Ni ttu nu ren sina bittu aca gueni unna sina gue chupa ca benni banquinna na. Cumu ttu nua aquinna gueni, attu nua nna utía di leni, o si udonia tisa gue ttu nua, attu nua nna cu'u ni'aní. Anáguba lebi'i läga aca ixuule lo sina gue Tata Do Iyyabaaha, nianna udogualele gatta xxatta guele.

<sup>14</sup> Iyábunni bianini ca benni fariseo ridáxxatta lecani belhi-na. Lacana nna bedacalaquinna gue Jesús.<sup>15</sup> Benniha nna re cana:

—Lebi'i bunna runle dequi ancale benni tsee lo adí ca benni, ttiaca Tata Do Iyyabaaha gua yube gaxasná anca lhi'u lhe'e lastoole.

Cumu nu racani ca benni se'e yies lo yu-ni ancana nu ra xxenru leni nna ttu tsaba rigu'u ni'a Tata Do Iyyabaaha nua.

### **Ca ley boca'ana Tata Do Iyyabaaha**

<sup>16</sup> 'Ca ley boca'ana Tata Do Iyyabaaha len Moisés, ca tisa utixxi'a ca profetaha lhe ucaque nu bele'en lebi'i bedaa atti bisía Juan benni begadi indaha. Bedaa lania nna udulo runa ca benni ca tisa tsee rixxi'a gue gaxasná rinnabia Tata Do Iyyabaaha ca benni, nianna iyába ca benni runcana duelha ga'acana qui iselacana ca benni rinnabia Ben-na.

<sup>17</sup> 'Ttiaca adíla satti enitti lo lo bea-na lhe yies lo yu-ni lhe attichula tua ttu letra nu chica'aru dia lo ca ley gue Tata Do Iyyabaaha.

### **Jesús rule'e bittu anca tsee udhá iqui ttu unbiyuu nuila gueni**

*(Mt. 19:1-12; Mr. 10:1-12)*

<sup>18</sup> 'Gansi ttu unbiyuu udhá iquini nuila gueniha, nianna otsá náni len attu nuila subi, ttu nu satsaba nua unna. Unbiyuu otsá náni leni nuila bedhá iqui unbiyuuha nna ttu nu satsaba nua unna.

### **Jesús rixxi'e nu guate unbiyuu uttaxxatta gueniha lenna Lázaro**

<sup>19</sup> 'Udo ttu unbiyuu uttaxxatta gueni. Tsitsiba sipa redúna len ca xo daca racalaa gueni, ttu ttu sába runna laní rugo tseena benni.

<sup>20</sup> Udoguaba ttu unbiyuu lábi Lázaro ancabi benni di, itúba cuerpu guebi sia güee chi bixínani. Labi nna níaba ridobi lo yu ro'o puerta gue nu texxatta gueniha. <sup>21</sup> Labi nna attulade nu runbi gobi ca nu yuya rinna xana mexa gue nu te gueniha. Axtaba ca becu risincana rilhe'ecana lo ca güee guebiha. <sup>22</sup> Ttu sá nna uttiba Lázaro, nianna ca ingeli gue Tata Do Iyyabaahaba betexxicabi bi'iniha qui esínbi dhobi lhuitta Abraham. Unbiyuu texxatta gueniha nna uttiguabana, nianna becatsibacan na.

<sup>23</sup> 'Lagüiba ratexxatta unbiyuu uttaxxatta gueni yu'una atta se'e ca benni chi utti-na nna ulidha loni bilenna Abraham idittuli dobi lenbi Lázaro. <sup>24</sup> Laniala nna uresi'ana rána: "¡Tata Abraham, guatúachi lelu neti! Gusichi Lázaro-na odibidha lo xbináni, atti itana ettedibidhana lo lhusa-ni, cumu ya de ratea yu'a lo gui-ni."

<sup>25</sup> Ttiaca Abraham becabibi rábi: "Xi'ini, borexxa lelu, atti udolu yies lo yuha nna tseeba gualíana lu Lázaro-ni nna läga gualía

tseen nna. Nnanna nna lana tseeba dona-ni, lu nna ratexxattalu.

<sup>26</sup> Güeaniba nna xxen tsitsia anca belha'a du lagüi atta se'etu-ni len atta yu'ule-na. Larcala nna läga aca tte ca nu se'e-ni itacana atta yu'ule na, niguaba ca nu yu'u na bittu aca ttecana qui isáacana nii."

<sup>27</sup> 'Nu uttaxxatta gueniha nna rána: "Rinnaba lolu xa Tata Abraham, udhelha chi Lázaro-na lhe'e yo'o gue tata quia, <sup>28</sup> qui sattixxi'enbi a gayu ca betsaha, gue gaxasná anca ni. Anía nna bittu etáacana atta yu'utu ruyútu elha disa-ni." <sup>29</sup> Abraham nna rábi: "Chiba den ca nua ca tisa boca'ana Moisés lhe ca tisa boca'ana ca benni uca profeta lhe. ¡Gue ca tisaha udo nagacani!" <sup>30</sup> Unbiyuu uttaxxatta gueniha nna becabina rána: "Bittu xa tata Abraham, läga iyienquin ca unnuha, ttiaca gansi ttu nu chi utti eyaquinna nianna ule'e loni len lacana, ca unnuha nna godú xiyyaban cana odaxxucana neda gue Tata Do Iyyabaaha." <sup>31</sup> Ttiaca Abraham nna rábi na: "Gansi bittuba raca lecani udo nagacani gue ca tisa gue Moisés, nigua gue ca tisa ben ca benni uca profeta lhe bittuguuba tsia le ca nua masquiba eyacani ttu nu chi utti ule'e loni len lacana."

### Jesús re: Bittu unle uni adí ca benni nu bittu anca tsee

(Mt. 18:6-7,21-22; Mr. 9:42)

**17** Jesús re ca bi'ini rudheti ca tisa rule'e:

—Labíaba tse'e nu unna ixú yie ca benni uncana nu bittu anca tsee lo Tata Do Iyyabaaha, ttiaca ¡carusi'iru benni unna un adí ca nua nu bittu anca tsee! <sup>2</sup>Tseerla salían na uxxicacan ttu iyya gue ttu mulinu xeni yienni atti udelhacan na lhe'e indatoo, attichula unna uni ttu ca benni bittu chi se'e tsitsi lo neda gue Tata Do Iyyabaaha ttu nu lä anca tsee. <sup>3</sup>Larcala ¡gualdo cuidadu!

'Gansi ttu ca benni ria le ca tisa quia-ni unna ttu nu bittu anca tsee len lu, unne lenna qui bitturu unna anía. Gansi odú xiyyanna gue nu bennaha, lu nna uxi elha xen lasi gueni. <sup>4</sup>Masquiba gasi libe unna nu bittu anca tsee len lu lhe'e ttu sá, nianna gasi libeguuba isíana innána: "Neti nna rexiyatia gue nu benia", lu nna dhílu elha xen lasi gueni.

### Nu guaca gueri unri gansi ria leri Tata Do Iyyabaaha

<sup>5</sup> Ca bi'ini rudheti ca tisa rule'e Jesús, rácabi Benni bananie cabi:  
—Ben qui tsiar letu lu adí.

<sup>6</sup> Jesúis becabie re cabi:

—Gansi lebi'i ria lele ladiba saro'oto attiba ttu besi gue coana murtasa ancana nu chica'ato, lania nna guacaba gále yaga du-ni: “Bilupi atta yadalha nna güia beyada lo indatloo-na.” Yagaha nna gudobana tisa guele.

### Ttu nu riben sina gua yubana bixa daa loni unna

<sup>7</sup> Gansi nux ttule do ttu nu tto'o lo sina guele, riana güelha'a lo yu gueleha o riana lo ca carne'e gueleha, gansi chi besía nua dequide urennna sina, ¿si guale nua: “Bete tte qui golu etta”? <sup>8</sup> ¿Läba ganna gálal nua: “Beni rsea, nianna bedú tsee tte qui ca'aluu quia laca doa ri'iya roa, lenla nna edolu i'iya golu”? <sup>9</sup> Niguaba lä rál nua: “Xquixarulu, cumu chi benlu nu rpea lu unlu.” <sup>10</sup> Anáguaba lebi'i, atti lhuxa unle iyá nu chi rá Tata Do Iyyabaaha benie mandadu unle, lania nna innále: “Ri'itu ancatu benni tto'o lo sina guelu bittu rixuu, cumu sunruba bentu nu chi ancatu mandadu untu.”

### Jesúis beonie tsii ca nu raca cuerpu guecani ttu isagüe te láni lepra

<sup>11</sup> Atti yu'u Jesúis neda die daca Jerusalén, utee atta risá bedaa lo yu gue Samaria len lo yu gue Galilea. <sup>12</sup> Atti chi die gue'e lhe'e ttu lhe'esi re nía, biríatteba tsii (10) ca unbiyuu raca cuerpu guecani ttu nu anca attiba yiesusu te láni lepra guatsácane. Ca unnuha nna idittuli use'ecana, <sup>13</sup> atti uresi'acana rácana:

—¡Maestro Jesúis, guatúaichi lelu ri'itu!

<sup>14</sup> Atti biláni Jesúis ca unnuha nna unnettebe re cana:

—Gualtsia, gualsatsá du lo ca bixxudiha.

Ca unnuha nna laca diacana yu'ucana neda, bitúatteba isagüeha cuerpu guecani. <sup>15</sup> Atti biláni ttu ca unnuha chiba beacana, bequittebana, ribesi'anina ribequi xenna Tata Do Iyyabaaha. <sup>16</sup> Lana nna bedútteba xibini lo Jesúis axta liba binna lo xeani lo yu, betena xquixaru len Benniha de beonie na. Unbiyuu-ni nna beaca lasni Samaria. <sup>17</sup> Jesúis re:

—¿Si läba tsii xa ca unní beaca nna? ¿Nala a jaa (9) ca unnuha?

<sup>18</sup> ¿Si tturba benni dittu du-ni bequina qui cuequi xenna Tata Do Iyyabaaha?

<sup>19</sup> Laniala rá Jesúis unbiyuuhá:

—Bedulí beyya, cumu de güia lelu neti nuarca beacalu.

## Gasná aca atti isía innabia Tata Do Iyyabaaha

(Mt. 24:23-28, 36-41)

<sup>20</sup> Ca benni fariseo unnaba tisacana Jesús gue nucaxa isía innabia Tata Do Iyyabaaha. Lee nna becabie re:

—Lebi'i nna lägabi ilenle ttu nu uni qui ttedeenle chi bisía Tata Do Iyyabaaha innabie. <sup>21</sup> Lä innáguba benni: “Ni chi rinnabie”, o “Na chi rinnabie”, cumu niba chi du Benniha len lebi'i rinnabie.

<sup>22</sup> Nianna, rá Jesús ca bi'ini rudheti ca tisa rule'e:

—Isía sá atti dharu lele ladiba ttu sá dhoa neti Benni unbiyuu daa iyyabaaha len lebi'i, ttiaca bittu aca. <sup>23</sup> Ca benni nna gácan le: “Nie du-ni”, o “na doe.” Masquiba gácan le anía, bittu tsiale sagüiale, nigua lä sanalhale cana lhe. <sup>24</sup> Cumu attiba ganchi ropi edha-na tsaba rigu'una xieni itúba lo bea-na, aníaguuba gansi chi bisía saha, ilá sába esíaya neti Benni unbiyuu daa iyyabaaha.

<sup>25</sup> Ttiaca primerxa satexxatta, cu'u ni'a ca benni se'e nnanna neti lhe. <sup>26</sup> Attiba ucaba tiempu atti udo Noé, aníaguuba aca atti isía sá esíaya neti Benni unbiyuu daa iyyabaaha. <sup>27</sup> Ca benni use'e lania nna uyu'ubacana go lhe güe'eya lhe güetsaa ná lhe axta liba bisía sá atti uta'a Noé lhe'e barcoha, lania nna bisía ttu iyya lhá, nianna iyábacana utticana. <sup>28</sup> Unnuhaguuba uca atti udo Lot: ca benni use'e lania nna utocana lhe u'uyacana lhe uyo'ocana lhe beto'ocana lhe udacana xua lhe besiacana yo'o lhe. <sup>29</sup> Ttiaca atti biría Lot lhe'e yiesi Sodoma nna binnatteba belha gue gui daa iyyabaaha lhe'e yiesiha, binnaguuba ca iyya lá azufre lhe nianna iyába ca benni se'e nía utticana. <sup>30</sup> Aníaguuba aca la sá atti eyacaxxa esíaya, neti Benni unbiyuu daa iyyabaaha.

<sup>31</sup> 'La saha nna benni do iqui yo'o gueniha nna gansi bixa se'e gueni lhi'u lhe'e yo'oha, bittu aquinna eyadina qui cuequina ca nua. Anáguuba nu requi ranchuha lhe bittu eyequina eyvana lhe'e yo'o gueniha. <sup>32</sup> Gualorexxa lele bixa guate nuila gue Lot. <sup>33</sup> Nu unna odilá elha nabani gueni nna unnittiba nua elha nabani gueni, benni unnitti elha nabani gueni lo ni'a quia nna aca banba nua ttu dia lii lo Tata Do Iyyabaaha.

<sup>34</sup> 'Neti ria, ca benni te chupacana lo la ttuba ta'a la elaha nna tturba nua echea, attu nua nna eya'anbana. <sup>35</sup> Delo chupa ca nuila rencana güettu, ttuna echea, attuna eya'ana. <sup>36</sup> [Chupa ca unbiyuu se'e ranchu nna ttuna echea, a ttuna nna eya'anna.]

<sup>37</sup> Lacabi nna becabicabi rácabi:  
 —¿Benni bananie ri'itu, ga aca nua?  
 Lee nna becabie re:  
 —Iyábale yule, atta te ttu nu yatti nía ritupa ca chettu.

**Ejemplu gue nuila bidabi unnaba elha uxtisi lo xueda**

**18** Jesús utixxi'attebanie ca bi'ini rudheti ca tisa guee ttu ejemplu nu ule'enna cabi satía innecabi len Tata Do Iyyabaaha, bittu edíl recabi. <sup>2</sup>Nianna, re cabi:

—Lhe'e ttu yiesi, udo ttu xueda bittu ria leni Tata Do Iyyabaaha, lä rapaguaban respeto ca benni lhe. <sup>3</sup>La lhe'e yiesiha guaba udo ttu nuila bidabi utta ttu elha utilha gueni, nianna riana lo xuedaha rána nua: “Benchi elha uxtisi quia lania nu riltilha lania na.” <sup>4</sup>Isáru guadána, bittu uca le xuedaha unna elha uxtisi gue nuila bidabiha. Ttiaca lenla uquinna: “Masquiba lä ria lasia Tata Do Iyyabaaha, niguaba lä rapa respeto ca benni lhe <sup>5</sup>de bittuba rudú si nuila bidabi-ni rutsitsinna neti nna unbalha elha uxtisi gueni, qui lä oditúna pasensi quia de satti belhaba ritana.”

<sup>6</sup> Jesús re:

—Gualudo nagale gue nu rá xueda bittu runi nu daa loni unna. <sup>7</sup>Anáguba Tata Do Iyyabaaha, ¿si bittuba unie elha uxtisi gue ca benni chi becuae anca guee rinne ruliscane rela resába? ¿Si isá lhaba aca atti ecabie guele? <sup>8</sup>Neti ria dequi sattitte unie elha uxtisi guele. Ttiaca atti esíaya, neti Benni unbiyuu daa iyyabaaha nna ¿si gua se'e ca benni ria lecani neti ni yies lo yu-ni lania?

**Ejemplu gue ttu fariseo lenna ttu güequixa**

<sup>9</sup> Utixxi'aguaba Jesús attu ejemplu, belise ca nu racaquinna ancacana nu runi nu anca tsee, nianna rigu'u ni'acani adí ca benni. Le nna re cana:

<sup>10</sup>—Chupa ca unbiyuu güiacana atta do yotuha guannecana len Tata Do Iyyabaaha. Ttuna ancana fariseo, attuna nna ancana güequixa ridí belhi deyya Roma. <sup>11</sup>Nu fariseo nna du ranina rinnena rulisanata Do Iyyabaaha rána Ben-na: “Xquixarulu, cumu bittu anca attiba adí benni, lacana ancacana ubana lhe nu bittu du ta leni lhe nu risá nu bittu anca latselani lhe. Anáguba rutea xquixarulu len cuinalu de bittu anca attiba güequixa du-na. <sup>12</sup>Neti rigu'u ubina lhe'a chupa libe lhe'e ttu xmanu, ruteguaba

tsii gue de lo ttu gayua len lu gue iyába nu ridía gue sina runia lhe.”<sup>13</sup> Ttiaca güequixaha nna idittu liba duna, niba lä reaxinna ilidha loni ugüiana iyyabaaha, sunruba rugüe lastooni de re lenina, nianna rána: “¡Tata Do Iyyabaa quia, guatúachi lelu neti, cumu anca nu te tulha gueni lolu!”<sup>14</sup> Neti ria, güequixaha nna atti güequina deyyana lhe'e yo'o gueniha nna chiba uxí Tata Do Iyyabaaha elha xen lazi gue ca tulha gue nua, ttiaca fariseo nna bittu uxíe elha xen lazi gueni. Cumu ca nu run ttaba ribequi xen lecani, eyadi gala lecani. Nu bittu run ttaba cuequi xen leniha nna tsopi leni.

### **Jesús rinnabe elha nabani gue ca unto**

*(Mt. 19:13-15; Mr. 10:13-16)*

<sup>15</sup> Anáguaba richeguaba ca benni ca unto guecaniha rase'ecana lo Jesús qui uxxúa nee iquicani innábe elha nabani guecani lo Tata Do Iyyabaaha. Ttiaca atti biláni ca bi'ini rudheti ca tisa rule'e nna, bedhaca disattebacabi ca benni che ca untoha. <sup>16</sup> Laniala nna uxi Jesús ca bi'iniha, nianna re cabi:

—Gualguelha ca unto-na itacana len neti, bittu usunale, cumu ca benni anca attiba ca unní liba ancacana benni rinnabia Tata Do Iyyabaaha. <sup>17</sup> Neti nna gualíbatia rpea le, nu bittuba dhielhana innabia Tata Do Iyyabaaha-na attiba ttu unto, tsa läga aca isela nua ca benni rinnabia Tata Do Iyyabaaha.

### **Ttu unbiyuu te gueni unne lenna Jesús**

*(Mt. 19:16-30; Mr. 10:17-31)*

<sup>18</sup> Ttu nu lo gue ca benni Israel unnaba tisana Jesús ráne:

—Maestro, lu ancalu ttu benni tsee. ¿Bi unia qui gatta elha nabani quia ttu tsaba?

<sup>19</sup> Jesús becabie re:

—¿Biaca neti rálu benni tsee? Cumu tsa läganu te ancana benni tsee, sunruba Tata Do Iyyabaaha anque benni tsee. <sup>20</sup> Lu nna chiba yulu nu rá lo ca ley boca'ana Tata Do Iyyabaaha len Moisés: “Bittu utsá ro'olu nu bittu anca latselalu<sup>a</sup>, bittu utilu benni lhe<sup>b</sup> bittu

---

<sup>a</sup> **18:20** Éxodo 20:14    <sup>b</sup> **18:20** Éxodo 10:13

lhanalu lhe<sup>a</sup> bittu un lelu cuentaba unlu xiyya gue benni subi lhe<sup>b</sup> gapalu respeto tata nan guelu lhe.”<sup>c</sup>

<sup>21</sup> Unbiyuuha nna rána:

—Iyába unní, atti ancialia güexxaha uduloa runia.

<sup>22</sup> Bienbani Jesús nu rá nua nna ráttebe:

—Reasa attu nu unlu: Betto'o iyá bixa te guelu. Belhiha nna betena len ca nu bittu te gueni. Anía liba nna gatta elha tsee guelu iyyabaaha. Lania nna utátté betteno neti.

<sup>23</sup> Ttiaca atti bienin unbiyuuha nu rá Jesús, attulade udú si'ina, cumu de texxatta gueni. <sup>24</sup> Bilábani Jesús udú si'i nua nna ráttebe:

—¡Cattipa tsitsi anca e'eyu ca benni te guequinna acacana benni rinnabia Tata Do Iyyabaaha! <sup>25</sup> Gaxa guaterla ttu camello lhe'e belea do xan ttu tsioxa atti ttu benni te gueni e'eyuna acana benni rinnabia Tata Do Iyyabaaha.

<sup>26</sup> Ca nu bienquinna nu rá Benniha nna rávana:

—Gansi anía anca, ¿núla guadána lhána qui bittu tsia nittina ganna?

<sup>27</sup> Jesús becabie re:

—Nu bittu dhaa ca benni se'e yies lo yu-ni uncana, Tata Do Iyyabaaha guadábe unie nua.

<sup>28</sup> Pedro nna unnebi rábi:

—Ri'itu nna iyába nu te guetu boca'anatu, atti dattebatu len cuinalu.

<sup>29</sup> Jesús becabie re:

—Neti gualíbatia rpeale, nuxaba benni gansi lo ni'a gue de ancana benni rinnabia Tata Do Iyyabaaha chi bedhá iquini yo'o gueni lhe nuila gueni lhe betsini lhe tata gueni lhe nan gueni lhe xi'inni lhe <sup>30</sup> unnuha nna xxenrula nu dhína ni yies lo yu-ni, tiempu chi dabaha nna dhína elha nabani gatta ttu tsaba gueni.

### Ni aca tsunna libe rixxi'a Jesús, lee nna uttibacane

(Mt. 20:17-19; Mr. 10:32-34)

<sup>31</sup> Jesús uchee attu atta subi ca bi'ini ts'i'inu (12) rudheti ca tisa rule'e, nianna re ca bi'iniha:

<sup>a</sup> **18:20** Éxodo 20:15

<sup>b</sup> **18:20** Éxodo 20:16

<sup>c</sup> **18:20** Éxodo 20:12

—Gualuyurga, niba diari lhe'e yiesi Jerusalén atta aca iyába nu daa lo ca sitsi beni ca benni uca profeta atta rixxi'a gue nu satea, neti Benni unbiyuu daa iyyabaaha.<sup>32</sup> Ca benni nna utecana neti las ná ca benni dittu, uxíscana quia lhe udhaca disacana neti lhe uttuttu xencani loa lhe.<sup>33</sup> Dequide ugüiecaná neti nna utticana neti, ttiaca dequide tsunna ubisa nna eyacatia eríaya atta yu'u ca nu yatti-na.

<sup>34</sup> Ca bi'ini ts'i'inuha nna tsa bittu guadú lecabí, niguaba lä yucabí bi gue nua rinne Benniha, cumu de anca ca tisaha nu bittu dica sadú lecabí.

### Jesús beonie ttu benni xua loni lhe'e yiesi Jericó

(Mt. 20:29-34; Mr. 10:46-52)

<sup>35</sup> Atti chi bisína Jesús gaxxaba ro'o yiesi Jericó, nía do ttu benni xua loni ro'o nedaha rinnabana belhi. <sup>36</sup> Atti bienin nu xua loniha ritexxatta benni, nianna unnaba tisattebana rána:

—¿Bilunni raca nii?

<sup>37</sup> Ca benni nna rácan na, Jesús gue Nazaretba Ben-na die ritee ni. <sup>38</sup> Laniala uresi'ana rána:

—¡Jesús, Benni datía David, guatúachi lelu neti!

<sup>39</sup> Ca benni neruha nna bedhaca disacana nu xua loniha qui eyaca sina, ttiaca adíla idisa uresi'a nua rána:

—¡Benni datía David, guatúachi lelu neti!

<sup>40</sup> Laniala nna uleda Jesús, nianna benttebe mandadu saxxícana nua. Atti chi duna lo Benniha nna unnaba tisattebe na re na:

<sup>41</sup> —¿Bi raca lelu unia guelu?

Nu xua loniha nna becabina rána:

—Benni bananie neti, raca lasia ilátia.

<sup>42</sup> Jesúz becabie re na:

—¡Biláni nnanna! Cumu de güia lelu güeyacabalú nuarca beacalu.

<sup>43</sup> Snaba lania bilen nu xua loniha, lana nna diattebana denona Jesús ribequi xenna Tata Do Iyyabaaha. Iyába ca benni begüia nu ucaha lhe anáguuba ribequi xencana Tata Do Iyyabaaha.

### Zaqueo nu anca güequixa rdacana ilenna Jesús

**19** Atti chi uta'a Jesús lhe'e yiesi Jericó, lee nna diabe yu'e neda utee lhe'e yiesiha.<sup>2</sup> Nía do ttu unbiyuu texxatta gueni, lana Zaqueo. Ancana nu lo gue ca güequixa ridí belhi deyya Roma.

<sup>3</sup>Lana nna rdacana ilenna nuxa benni nua lá Jesús, ttiaca bittu ralhana ilenna Benniha de bittu ancana ttunni, cumu yaderba de reru benni lhe. <sup>4</sup>De unnuha nna nuarca bigaana uneruna, atti gopittebana lo ttu yaga lá sicómoro du gaxxaba atta tte Jesús qui ilenna Benniha. <sup>5</sup>Atti chi bisína Jesús atta donaha, ulidhatteba loe begüie güetsaa, nianna re na:

—Zaqueo, begüee lelu, jertte beadi, cumu nnolha raca duelha eya'ana lhe'e yo'o gueluhha.

<sup>6</sup>Zaqueo nna quedha beadina nía, ru'u tsitsia leni unnabana lo Benniha gue'e lhe'e yo'o gueniha. <sup>7</sup>Atti bilácani ca benni dia denalha nu ucaha, nianna iyábacana unne güecana gue Jesús, de biaca die se'ane lhe'e yo'o gue ttu nu runi nu bittu anca tsee lo Tata Do Iyyabaaha. <sup>8</sup>Ttiaca Zaqueo nna udulíttebana rána Jesús:

—Benni bananie neti, begüiarga, neti utea len ca benni bittu te gueni rulha xea gue iyába nu te quia. Gansi ulana nuxa benni leni nu ben lasia nna, ttapa libe nu uxí sigáya gueni otea len lana.

<sup>9</sup>Jesús re Zaqueo:

—Nasá nna bisíaba sá odilá Tata Do Iyyabaaha ca benni se'e lhe'e yo'o-ni, cumu unbiyuu du-ni nna ancaguabana benni datía Abraham. <sup>10</sup>Cumu neti Benni unbiyuu daa iyyabaaha nna delha eguila ca benni chi dia nitti qui odiláya cana.

### Ejemplu gue nu guate ca benni uxí belhi

(Mt. 25:14-30)

<sup>11</sup>Laca rudo naga ca benni se'e nía nu rá Jesús, lee nna utixxi'attebanie cana ttu ejemplu. Cumu de chi due gaxxaba Jerusalén nuarca ca benni nna rulaba lecani chi tte deoba innabia Tata Do Iyyabaaha. <sup>12</sup>Larcala re cana:

—Ttu unbiyuu ra xxeni leni diana lhe'e attu yiesi re idittuchiga qui nía odúcan na acana nu innabia. Laniala nna eyequina esíana. <sup>13</sup>Atti chi deoba iríana, uxttebana tsii ca nu tto'o lo sina gueniha, begüeen ttu ttu ca unnuha xxeni belhi, nianna rán ca unnuha: “Gualun sina len belhi quia-ni qui un xi'inni axta atti eyequia esíaya.” <sup>14</sup>Ttiaca ca benni gue yies gueniha nna rutía di lecan na. Lacana nna udhelhattebacana ttulhe ca nu dia atta dia unbiyuuha, qui gá ca unnuha nu rinnabia do nía: “Ri'itu nna bittu raca letu aca unbiyuu du-ni nu innabiana ri'itu.”

<sup>15</sup> "Ttiaca labíaba labana bedú acana nu innabia. Atti chi besinna lhe'e yies gueniha nna benttebana mandadu gualisacana ca nu tto'o lo sina gueni betena belhi len canaha, cumu raca leni ugüiana ttixa chi ben xi'ini belhi begüeena ttu ttu ca unnuha. <sup>16</sup> Nu bisín primeraha nna rána: "Benni bananie neti, belhi gueluha nna chi ben xi'inni tsii libe a ttoníha." <sup>17</sup> Nu rinnabiahha nna rána: "Tseeba anca, lu ancalu ttu benni riben tsee sina. Cumu de tsitsiba biyúlu saro'o belhi betea len luha nna nnanna nna unia acalu nu innabia tsii ca yiesi." <sup>18</sup> Bisíntteba attuna rána: "Benni bananie neti, belhi gueluha nna chiguaba beni xi'inni a gayu libe a ttoníha." <sup>19</sup> Nu rinnabiahha nna rána: "Lu nna acalu nu innabia gayu ca yiesi."

<sup>20</sup> Laniala bisína attuna, nianna rána: "Benni bananie neti, ni belhi gueluha te ni. Utúa tseeba unní lhe'e ttu panitu. <sup>21</sup> Neti nna ustia lo cuinalu, cumu ancalu ttu unbiyuu rudhiubaxxatta lu benni lo sina. Redílu nu bittu ralhalu edílu lhe rialu raxílu lena atta bittu udalu lhe." <sup>22</sup> Nu rinnabiahha nna rána: "Lu ancalu ttu nu riben sina runi nu lä anca tsee. La len ca tisa riría ro'olhaba unia elha uxtisi guelu. Gansi gua yubalu dequi neti anca ttu unbiyuu rudhiubaxxatta benni lo sina, redía nu bittu ralha edía lhe riaya raxia lena atta bittu neti uda lhe <sup>23</sup> ¿biacala bittu guaca'anlu belhi quia-ni atta uncana xi'inni, qui edíana len xi'inni, atti eyequia esíaya?" <sup>24</sup> Laniala rá nu rinnabiahha ca nu se'e nía: "Gualcúa belhi-na lo náni, gualute na leni nu ulha tsii belhi-na." <sup>25</sup> Ca unnuha nna rácana: "¡Benni bananie ri'itu, la chiba deni unná a tsii belhi!" <sup>26</sup> Nu rinnabiahha nna becabina rána: "Neti ria le, nu te gueniha nna dhirla nua adí, ttiaca nu bittu te gueniha nna axtala saro'o nu te gueniha itúa. <sup>27</sup> Anáguaba ca nu lä raca uyúcana neti, ca nu bittu uca lecani aca nu innabia guecani, gualsaxxi cana nii, gualutti cana aní loa."

### Jesús ute'e lhe'e yiesi Jerusalén

(Mt. 21:1-11; Mr. 11:1-11; Jn. 12:12-19)

<sup>28</sup> Dequide unne Jesús ca tisa-ni nna, uneruttebe lo ca benni die lhe'e yiesi Jerusalén. <sup>29</sup> Atti chi bisíne gaxxaba ro'o lhe'esi Betfagé leni lhe'esi Betania, gaxxaba atta do lhilhi nu te láni Lo Lhilhi Atta Daa Ca Ya Olivu. Laniala nna udhelha Jesús chupa ca bi'ini rudheti ca tisa rule'e, <sup>30</sup> re ca bi'iniha:

—Gualtsia lhe'esi re gaxxabana. Gansi chi uta'ale lhe'esi-na, na satti'ale ttu burru cuiti nalhana. Unnuha nna tsa nuttu nu chi udon cu'eni. Lebi'i nna gualudhán-na, atti gualetá tte lenna nii.<sup>31</sup> Gansi nuxa innába tisana innána: “¿Biaca unná ridhasle?” Lebi'i nna gualgás na: “Benni bananie ri-naba reasanie unní.”

<sup>32</sup> Diatteba ca bi'ini udhelheha. Lacabi nna guatti'abacabi burrutoha attittiba rába Jesús. <sup>33</sup> Atti ridhascabi burruha nna ca xxan nua nna unnaba tisacana rácana:

—¿Biaca burru-na ridhasle?

<sup>34</sup> Lacabi nna becabicabi rácabi:

—Cumu Benni bananie ri-naba reasanie unní.

<sup>35</sup> Bechettebacabi nua atta du Jesús. Dequide ulu'ucabi ca lari rucucabiha cu'e burruha nna belhopittebacabi Jesús cu'e nua.

<sup>36</sup> Cua diaba Jesús risile, ca benni nna ritsilacana ca lari nucucanaha lo nedaha. <sup>37</sup> Atti chi bisíncabi atta ridú lo lhiaxu gue lo Lhilhi Atta Da Ca Ya Olivuha nna, iyába ca benni deno Jesús bedaca lecani, atti udulocana ribesi'acana, ribequi xencana Tata Do Iyyabaaha de chi begüiacana ca milagru ben Benniha. <sup>38</sup> Lacabi nna rácabi:

—¡Carbárulu lu ancalu Benni rinnabia udhelha Tata Do Iyyabaaha! ¡Ri'i se'e tseeri len Tata Do Iyyabaaha! ¡Cuequi xenri Tata Dios Benni do iyyabaaha!

<sup>39</sup> Lania nna ttulhe ca fariseo nutsa len ca benni dia nía nna rácana:

—Maestro, bedhaca disa ca nu denalhacan lu-na.

<sup>40</sup> Ttiaca Jesús becabie re:

—Neti rpea le, gansi ca unní eyaca sicana, ca iyya-na cuesi'acana.

<sup>41</sup> Atti chi bisína Jesús gaxxaba Jerusalén, begüiabe yiesiha nna uresttebe gueni. <sup>42</sup> Nianna re:

—¡Atturu guen xa ca benni gue Jerusalén, ganruba ttirca sadú lele gue bi nua uni ese'e tseele len Tata Do Iyyabaaha, masquiba anca nasá sá bedúba! Ttiaca nnanna lärga aca ttedeenle gue nua.

<sup>43</sup> Chi isía sá atti bi'a dhacabale ebi'ano ca nu ritilha lenle-na le. Iyába ladu iríacana itilha lencan le. <sup>44</sup> Yies-ni nna tsaba cuequi tinacan na lo yu, itupa lenna ca benni se'e lhe'eni. Ni ttu iyya coa-na bittu eya'ana iqui loesni, cumu lebi'i nna tsa läga güia lele, Tata Do Iyyabaahaba udhelhe neti qui odiláya le.

**Jesús bería lee ca nu yu'u güetto'o lhe'eli'a gue yotuha**

(Mt. 21:12-17; Mr. 11:15-19; Jn. 2:13-22)

<sup>45</sup> Atti uta'a Jesús lhe'eli'a gue yotuha nna udulottebe bería lee ca nu yu'u güetto'o nía. <sup>46</sup> Nianna re cana:

—Lo ca sitsi atta dia ca tisa gue Tata Do Iyyabaaha rinne Ben-na re: “Yo'o quia-ni ancana yo'o atta inne len ca benni neti<sup>a</sup>”, ttiaca lebi'i nna attiba belea anca lisi ubana la chi beonle yotu-ni<sup>b</sup>.

<sup>47</sup> Ttu ttu sába rule'eni Jesús ca benni lhe'eli'a gue yotuha. Ca nu lo gue ca bixxudiha lhe ca nu rule'e nu rá lo ca ley boca'ana Moisés lhe anáguba ca nu lo gue yiesiha lhe requicana reguila lecani gaxasná uncana utticane. <sup>48</sup> Ttiaca bittu reselquinna gaxasná uncana, cumu iyába ca benni se'e nía itú iqui itú lecani rudo nagacani gue iyába nu rá Benniha.

**Rinnaba tisacan Jesús gue nu rinnee**

(Mt. 21:23-27; Mr. 11:27-33)

**20** Ttu sá nna laca du Jesús lhe'eli'a gue yotuha rule'enie ca benni ca tisa gue Tata Do Iyyabaaha, bisíntteba ca nu lo gue ca bixxudiha lencana ca nu rule'e nu rá lo ca ley boca'ana Moisés lhe ca nu teru elha rieni guecani gue ca benni Israel lhe. <sup>2</sup> Nianna, rácane:

—Utixxi'en ri'itu, ¿Bi elha rinnabia rapalu runlu aná? ¿Nú betena elha rinnabia lenlu qui unlu nu runlu-na?

<sup>3</sup> Jesús becabie re:

—Anáguba neti lhe innába tisaguuba le. Lebi'i nna gualecabi sanga quia. <sup>4</sup> ¿Nú udhelhana Juan qui ugadibi ca benni inda? ¿Si Tata Do Iyyabaaha aca? ¿Si ca benni se'e yies lo yu-ni aca?

<sup>5</sup> Lacana nna uyu'uttebacana unne len loescani, nianna rácana:

—Gansi ecabiri innári Tata Do Iyyabaahaba udhelhe bi'iniha, lania nna innáttebunna, ¿biacala bittu güüa lele gue nu rá bi'iniha ganna? <sup>6</sup> Bittuguuba aca innári dequi ca benni se'e yies lo yu-niba udhelhacana bi'iniha, cumu lania nna iyába ca benni se'e lhe'e yies-ni uttican ri len iyya, de iyábacana ria lecani Juan ucabi ttu profeta gue Tata Do Iyyabaaha.

<sup>a</sup> 19:46 Isaías 56:7    <sup>b</sup> 19:46 Jeremías 7:11

<sup>7</sup> Laniala nna becabicana rácana dequi bittu yucana nuxa udhelhana Juan qui ugadibi ca benni inda. <sup>8</sup> Jesús becabie re:

—Anáguaba neti bittuguaba quixxi'aya nuxa betena elha rinnabia quia qui unia nu runia-ni.

**Jesús rixxi'e ttu ejemplu gue ca unbiyuu lä  
du ta lecani uren sina lo ttu yu**

(Mt. 21:33-44; Mr. 12:1-11)

<sup>9</sup> Udulotteba Jesús utixxi'anie ca benni se'e nía ttu ejemplu, re cana:

—Udo ttu unbiyuu udabi ca ya besuli lo yu guebiha, nianna bete gannabi lo yuha len ca benni qui cuencana nua umpanía. Labi nna biráttebabí diabi lhe'e attu yiesi subi isáru. <sup>10</sup> Atti chi bisía sá exuu besuli betee lo yuha nna udhelhatteba benni beaca guebi lo yuha ttu nu tto'o lo sina guebiha tsiana sayúna ca nu reni umpanía lo yuha qui utecana nu ralha bi'iniha dhibi, ttiaca ca nu reni umpanía lo yuha nna bedaxxulacana unnuha begüeecana, atti bedhelhacan na sunttebancana. <sup>11</sup> Bi'ini beaca guebi lo yuha nna bededhelhattebabí attu nu tto'o lo sina guebiha edeyyana sadiyúna ca nu ribeni umpanía lo yuha. Ca unnuha nna anáguaba bodidhacacana unnuha, utilaguaba lencan nua, begüeecan na lhe suna ancaba nua bedhelhacan na. <sup>12</sup> Bi'ini beaca guebi lo yuha nna bededhelhattebabí attu nu güia, ttiaca ca nu ribeni umpanía lo yuha nna benlacana nua güee, atti bebequican na ro'o yuha.

<sup>13</sup> 'Laniala nna rá bi'ini beaca guebi lo yuha: “¿Bila unia nnanna? Idhelharba xi'inia-ni nu racatia guen-ni, gaxa guapabacan unní respeto atti iláquinna-na.” <sup>14</sup> Ttiaca atti bilen ca nu riben umpanía lo yuha nua nna rátteba loescani: “Unní ancana nu eya'anna lo yu-ni. Udaxxuri na uttiri na qui eya'an lenri lo yu-ni.” <sup>15</sup> Ulequittebacana uncuitiha ro'o yu atta te besuliha, atti bettittebacan na.

Lebi'i nna:

—¿Bi rquinle udhaca benni beaca guebi lo yu atta te besuliha ca nu ribeni umpanía lo yu guebiha? <sup>16</sup> Labi nna etabi ettelhuxabi ca nu reni umpanía lo yu guebiha, lo yuha nna dhibi nua utebi umpanía len ca benni subi.

Atti bienquinna nu unne Jesús ráttebacana:

—Gaxa lä innácaba Tata Do Iyyabaaha saxxína aca anía.

<sup>17</sup> Ttiaca Jesús ttu líba begüie locani, nianna re cana:  
 —¿Bila dia le nu rá lo ca sitsi gue Tata Do Iyyabaaha atta rinne  
 re:

Iyya nu ulu'u ni'a ca benni rucoa ca yo'o-na,  
 unnuha la beacana iyya nu ribe rideñ tsitsina yo'o.<sup>a</sup>

<sup>18</sup> Nuxaba iyinnana iqui iyya-ni nna tsaba iyuyana. Gansi iyya-ni  
 iyinnana iqui nuxa nna tsaba eyonna nua biste.

### Rinnaba tisacana gansi gua dicá quixacana belhi deyya Roma (Mt. 21:45-46; 22:15-22; Mr. 12:12-17)

<sup>19</sup> Snaba lania uxaca ca nu lo gue ca bixxudiha lencana ca nu rule'e nu rá lo ca ley boca'ana Moisés udaxxucana Jesús, cumu guadúba lecani labacan nua rutáni benniha leni ejemplu unnee, ttiaca rasbaquinna lo ca benni se'e nía.

<sup>20</sup> Ca nu lo gue ca bixxudiha lencana ca nu rule'e nu rá lo ca ley boca'ana Moisés, udhelhattebacana ca nu dia güelhatsi. Ca unnuha nna ocadiba runcana dequi ancacana benni du tsee leni, qui anía nna dhacana ibixxi Benniha bixa innee. Qui leni unnuha nna satecana Benniha las ná nu rinnabiah. <sup>21</sup> Denua nna unnaba tisa ca nua Benniha rácane:

—Maestro, ri'itu yutu nna nu rálú lhe nu rule'elu lhe ancana nu anca gualí, ttuba runlu leni iyába benni lhe, lu nna rule'ebalu lhixxa suba gue gaxasná raca le Tata Do Iyyabaaha tse'e benni. <sup>22</sup> Larcala utixxi'a sanguin ri'itu, ¿si guaga'ana quixari len güequixa belhi nu deyya atta do nu rinnabia do lhe'e yiesi Roma? ¿Si bittuba aca?

<sup>23</sup> Ttiaca Jesús gua yuxabe läga anca tsee nu rulaba le ca nua uncana, nianna re cana:

—[¿Biaca runle ixú yieya?] <sup>24</sup> Gualule'en neti ttu belhi-na. ¿Nú lo unná du lo belhi-ni? ¿Nú beaca láni nu dia lo unná lhe?

Lacana nna becabicana rácana:

—Gue César nu rinnabia do Roma.

<sup>25</sup> Lania la rá Jesús cana:

—Gualugüeba nu rinnabia-na nu ralhana dhína. Gualugüeguaba Tata Do Iyyabaaha, nu ralhe dhie lhe.

---

<sup>a</sup> 20:17 Salmo 118:22

<sup>26</sup> Tsa läga udáicana satti'acana ni ttu nu lä anca tsee lhe'e ca tisa rinne Benniha lo iyába benni. Denua nna síba beacacana de rebanbaquinna gue ca tisa recabi Benniha.

### **Gasná eyacani ca nu yatti-na**

*(Mt. 22:23-33; Mr. 12:18-27)*

<sup>27</sup> Laniala bisína ttulhe ca benni saduceo atta du Jesús. Ca unnuha nna bittu ria lecani dequi gualí eyacani ca nu yatti-na.

<sup>28</sup> Denua nna unnaba tisacana rávana:

—Maestro, lo sitsi bodha'ana Moisés len ri'itu nna rá: “Gansi ttu unbiyuu chi betsá náni gattina, lana nna nuttu xi'inni use'e leni nuila gueniha, betsí unbiyuu uttiha nna daa loni edína nuila bidabiha qui anáchu ca xi'inni tse'e len nulaha nna acacana attisiba xi'ini betsini chi uttiha.” <sup>29</sup> Ttu libe use'e gasi betsí ca unbiyuu. Betsí xen guecaniha nna betsátteba náni, ttiaca uttittebana, níba ttu xi'inni bittu bisía. <sup>30</sup> Betsí berupa guecaniha nna betsátteba náni len nuila bidabiha, ttiaca unnuha nna bedeattiguabana, nuttuguuba xi'inni bese'e len nulaha. <sup>31</sup> Betsí beyonaha nna boditsátteba náni len nuila bidabiha, nuttuguuba xi'incani bisía. Aníaba ben iyába gasi betsicani, lacana nna uttibacana, ttiaca nuttu xi'incani use'e. <sup>32</sup> Lenla nna uttiguuba nulaha. <sup>33</sup> Gansi chi bisía sá eyacani ca benni yatti-na, ¿núla ca unbiyuuh aca nulaha latselani? Cumu iyába gasicana betsá nácani leni nulaha?

<sup>34</sup> Laniala becabí Jesúz re:

—Ca benni se'e yies lo yu-ni nna rutsába nácani, ruteguabacana ca xi'incani qui rutsá nácani lhe. <sup>35</sup> Ttiaca ca benni rudhaca le Tata Do Iyyabaaha ralhacana tse'ecana lhe'e yiesi cubi atta tse'e ca benni chi utti eyacaniha nna nía lärgaga utsá ná ca benni lä uterguabacana ca xi'incani qui utsá nácani lhe. <sup>36</sup> Cumu lärga aca gatticana, lacana nna eyacabacana attiba ca ingeli gue Tata Do Iyyabaaha. Acaguabacana xi'in Tata Do Iyyabaaha de ancacana benni beacani dequide utticana. <sup>37</sup> Ttiaca gue gansi güeyacani ca benni yatti-na, lo sitsi gue Tata Do Iyyabaaha atta rinne gue atti biláni Moisés bibu riteha nna rixxi'abi gualíba eyacani ca nu yatti-na. Labi nna rábi: “Benni bananie ri-na anque Tata Do Iyyabaa gue Abraham lhe gue

Isaac lhe gue Jacob lhe.”<sup>a</sup> <sup>38</sup>Tata Do Iyyabaaha läga anque Dios gue ca benni yatti-na, Ben-na anque Dios gue ca benni bani-na. Cumu len Ben-na, masquiba ratti ca benni, iyábacana banbacana.

<sup>39</sup>Tulhe ca nu rule'e nu rá lo ca ley boca'ana Moisés becabicana ráacana:

—Tseeba chi becabilu, xa maestro.

<sup>40</sup>Lacana nna tsa lärga beaxquinna innába tisacana Benniha adí.

### ¿Nú benni nua datie David?

(Mt. 22:41-46; Mr. 12:35-37)

<sup>41</sup>Jesús unnaba tise re:

—¿Tti modu rále dequi Cristu anque benni datía David? <sup>42</sup>Inqui la laba David rábi lo ca sitsi atta dia ca Salmo-na:

Tata Do Iyyabaaha re Cristu Benni bananie neti:

“Ni udo daca lhuitta derechu quia,

<sup>43</sup>axta liba unia aca ca nu lä raca uyúcan lu-na

nu udú ni'alu iquicani.”<sup>b</sup>

<sup>44</sup>Inqui la Davidba rábi: “Cristuha anque Benni bananie neti”, ganna anía anca, ¿tti modu anca Cristuha benni datía David?

### Jesús rudelha iyye ca nu rule'e nu rá lo ca ley boca'ana Moisés

(Mt. 23:1-36; Mr. 12:38-40; Lc. 11:37-54)

<sup>45</sup>Laca rudo naga iyába ca benni se'e nía gue Jesús, lee nna unnee re ca bi'iní rudheti ca tisa rule'e:

<sup>46</sup>—Gualudo cuidadu qui lä unle atti run ca nu rule'e nu rá lo ca ley boca'ana Moisés, cumu ca unná nna re'o lecani tsequicana ucu xo tuni guecani qui ule'e dequi ancacana benni ra xxeni leni, radi lecani gó benni cana paduxi len respeto lhe'e atta raca ca i'iyá-na lhe. Atti se'ecana lhe'e ca yo'o atta rudhetiri ca tisa gue Tata Do Iyyabaaha nna tsitsiba ridá lecani cuiacana lo ca xxila atta ribía ca nu ra xxeni lecani, aníaguuba runcana ca atta raca laní atti riacana go etta. <sup>47</sup>Güeaniba rigúacana ca yo'o gue ca nuila bidabi-na, nianna ni lo ni tisaba isáru rise'ecana rinnecana leni Tata Do Iyyabaaha qui ule'e lo dequi ancacana benni runi nu anca tsee

<sup>a</sup> 20:37 Éxodo 3:6    <sup>b</sup> 20:42-43 Salmo 110:1

lo Ben-na. Larcala nna ttu elha disa xeni ugüie Tata Do Iyyabaaha ca unná atti adí benni.

### **Úna ulu'u nuila bidabi bittu te gueniha**

(*Mr. 12:41-44*)

**21** Jesús rugüie gue ca nu texxatta guecaniha rigu'ucana úna lhe'e ca atta ru'u úna sia lhe'eli'a gue yotuha.<sup>2</sup> Biláguabanie ttu nuila bidabi bittu te gueni ulu'una chupa ca belhi bittu xxeni lidhacacani te lhe'e atta ru'u únaha.

<sup>3</sup> Laniala nna rá Jesús:

—Neti rpea le, xxeniru úna bete nuila bidabi bittu te guen-na atti iyába ca benni ulu'u úna.<sup>4</sup> Cumu iyábacana nu rexxa guebacani bedaxxucana ulu'ucana úna, ttiaca nuila bittu te guen-na, betena iyába nu te gueni, nu dica gona qui aca banna.

### **Jesús unnee re: Isía sá ise'e lo yotuha**

(*Mt. 24:1-2; Mr. 13:1-2*)

<sup>5</sup> Ttulhe ca benni rudheti ca tisa rule'e Jesús se'e nía, rinnecana gue yotuha, gue ca iyya tsee coa nua lhe gue ca nu ga'ana tsee bete benni taa lhe'e yotuha lhe. Jesús nna re:

<sup>6</sup> —Isía sá atti iyába nu rilenle-ni ise'e lona, ni ttu ca iyya coa-na bitturu eya'ana iqui loesni. Itúbana ise'e lo.

### **Gaxasná aca atti chi deoba lhuxa yies lo yu-ni**

(*Mt. 24:3-28; Mr. 13:3-23*)

<sup>7</sup> Laniala nna unnaba tisacana Jesús rácane:

—Maestro, ¿núca aca nu ralha? ¿Bi aca qui ule'e lo dequi chi deoba aca aná?

<sup>8</sup> Jesús becabie re:

—Tsitsi gualdo cuidadu qui bittu dhielhale ixú yiele. Cumu ixe ca nu isía uncana dequi ancacana neti, nianna innáacana: “Neti nua Cristu.” Innáguabacana: “Chi bisía sá atti lhuxa yies lo yu-ni.” Ttiaca lebi'i nna bittu tsia lele guecani.<sup>9</sup> Atti unale ritilha len loesi ca yiesi lhe ca benni se'e lhe'e la ttuba yiesi lhe bittu gasinle, cumu labíaba loxaba unní aca, ttiaca läga chi bisía sá lhuxa yies lo yu-ni.

<sup>10</sup> Nianna re ca bi'iniha:

—Ttu yiesi xeni leni attu yiesi xeni itilha len loescani, ttu nu rinnabia leni attu nu rinnabia itilha len loescani. <sup>11</sup> Gatti laduba gue yies lo yu-ni ixúxxatta, aca ubina lhe isíaguaba ixe lo isagüe gue ca benni lhe ilen benni lo bea-na nu unna gasquinna lhe nu unna ebanquinna lhe.

<sup>12</sup> "Ttiaca antisla aca iyá unní nna lebi'i nna uría lacan le, udaxxucan le qui ichecan le utsá dule lhe'e ca yo'o atta rise'eri rudhetiri ca tisa gue Tata Do Iyyabaaha qui uncana elha uxtisi guele, sase'ecan le lo ca nu rinnabia lhe lo ca uxtisi lhe quixxacan le lisiyya lhe lo ni'a quia. <sup>13</sup> Aníaliba nna qui aca quixxi'enle ca nua ca tisa quia-ni. <sup>14</sup> Lebi'i nna gualorexxa lele, bittu ulaba lele gue bixa innále ecabile guecani, <sup>15</sup> cumu neti guteba tisa len lebi'i, uteguaba elha rieni guele lhe qui ni ttu ca nu bittu raca uyúcan le nna bittu dhacana uchíacana lo nu innele, lä eselguabaquinna bixa innáacana qui ecabicana guele lhe. <sup>16</sup> Lebi'i nna axtaba ca tata gueleha lhe ca betsile lhe ca nu datíale lhe ca nu se'e tsee len lebi'i lhe satecan le las ná ca nu bittu raca uyúcan le-na. Uttiguabacan ttulhele lhe. <sup>17</sup> Iyába ca benni bitturu aca uyúcan le lo ni'a quia. <sup>18</sup> Ttiaca ni ttu ca itsiquile-na bittu tsia nitti. <sup>19</sup> ¡Tsitsi gualtse'e qui dhale gatta elha naban guele ttu dia lii!

### Jesús rixxi'e atti uyú ca benni se'e Jerusalén elha disa

<sup>20</sup> Atti ilenle chi bebi'a no soldado yiesi Jerusalén, lebi'i nna chi yule chi tte deoba ise'e lona. <sup>21</sup> Lania nna ca nu se'e lo yu nu te láni Judea, uxunnicana tsiacana atta sia ca i'iya-na, ca nu se'e Jerusalén-ni nna iríacana lhe'e yies-ni, ca nu se'e ranchu nna bittu eyequicana esíacana lhe'e yies-ni. <sup>22</sup> Cumu lania isía sá atti dhi ca benni elha disa, qui saxxína aca iyá nu ga'ana lo ca sitsi gue Tata Do Iyyabaaha. <sup>23</sup> ¡Carusi'iru ca nuila se'e nuja xi'incani lania, ca nu deni unto rasi xisi lhe! Cumu tsitsiba nu sate ca benni se'e itúba yies lo yu-ni, ttu elha disa xenba uyúcana. <sup>24</sup> Ttulhecana gatticana lo ná ca soldado, adícana nna iyaxxucana echechan cana lhe'e ca yiesi dittu. Ca benni dittu nna udhaca güecana yiesi Jerusalén-ni, axta liba lhuxa ca sá chi ga'anani Tata Do Iyyabaaha satecana.

## Jesús rixxi'e gaxasná aca atti eyequie esíe

*(Mt. 24:29-35, 42-44; Mr. 13:24-37)*

<sup>25</sup> 'Lania nna aca ttu nu aca lo tatubisa-na, lo nanto beo-na lhe len ca beli-na lhe. Ca benni se'e yies lo yu-ni nna aca guatexxattaquinna gasixxattaquinna lhe de cu'u bexxatta idisa tsi'i indatloo-na, de dhulíxxatta loni lhe. <sup>26</sup> Ca benni nna echulhaquinna de gasixxattabaquinna de ichacha iquicani gue nu aca yies lo yu-ni lhe cumu axtaba ca beli-na leni ca nu ra xxeni leni se'e lo bea-na ixidicana. <sup>27</sup> Lania nna iláni ca benni, neti Benni unbiyuu daa iyayabaaha dedaaya lhe'e ttu bea anca benni ra xxeni leni, ru'u xieni ga'ana tsee quia lhe. <sup>28</sup> Gansi chi udulo aca ca nu ria-ni nna gualelhidha iquile, tsitsi gualse'e lhe cumu lania nna chi deoba lhále.

<sup>29</sup> Utixxi'aguabani Jesús cana attu ejemplu, nianna re cana:

—Gualgüia lo ya igu-na, lo adí ca yaga-na lhe. <sup>30</sup> Atti rilenle chi dedaa reatsa lhaga guecani, lebi'i nna ritedaattebinle chi dedaa tiempu iyya. <sup>31</sup> Anáguaba lebi'i, gansi chi bilenle aca iyába ca nu chi ria-ni, lania nna chi yule chi daa ribiga isía sá innabia Tata Do Iyyabaaha.

<sup>32</sup> Neti nna gualibatia rpea le, iyába nu ria-ni aca, antisla lhuxa ca benni se'e-ni. <sup>33</sup> Lo bea-na lhe yies lo yu-ni lhe lhuxabacana, ttiaca labíaba saxxína aca nu rá ca tisa quia-ni.

<sup>34</sup> Gualdo cuidadu. Bittu udo lele dha lele nu bittu anca tsee anca gue yies lo yu-ni, lä acaguale nu dusi lhe bittuguaba aquinle ichachaxxatta iquile gue nu anca gue yies lo yu-ni, qui lä iyayaba lele isía sá esíaya. <sup>35</sup> Cumu attiba ttu nu iyayaba leni uyu'una yalhi, aníaba isía sáha gue iyába ca nu se'e bi'acanaba yies lo yu-ni. <sup>36</sup> Gualese'e tsee, satía gualnne len Tata Do Iyyabaaha qui dhale lhále lo iyába nu chi daa aca, anáguaba qui aca utsá dule loa gansi chi besíaya neti Benni unbiyuu daa iyayabaaha.

<sup>37</sup> Resá nna rule'eni Jesús ca benni ritupa lhe'eli'a gue yotuha. Lo rela nna rie atta do lo lhilhi Atta Da Ca Ya Olivuha. <sup>38</sup> Nianna iyába ca benni riacana dilatte lhe'eli'a gue yotuha qui iyienquinna nu rá Benniha.

## Reguila le ca benni gaxasná uncana uttican Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Chiba deoba isía laní nu te láni Pascua atti ro ca benni Israel ttaxtila nu bittu dia lenna levadura.<sup>2</sup> Ca nu lo gue ca bixxudiha lencana ca nu rule'e nu rá lo ca ley boca'ana Moisés, sigába reguila lecani gaxasná uncana utticana Jesús, cumu de rasquinna lo ca benni.

<sup>3</sup> Nianna, uta'atteba nu xxegüiha lhe'e Judas, nu teeguaba láni Iscariote, selá ca bi'ini ts'i'inu (12) rule'eni Jesús.<sup>4</sup> Judas nna güiattebana atta se'e ca nu lo gue ca bixxudiha, atta se'e ca nu lo gue ca nu rise'e rapa yotuha lhe guanne lenna ca nua gue gaxasná unna utena Jesús las ná ca nua.<sup>5</sup> Ca unnuha nna be'o tsitsia lecani, laniala nna begüeecana tisa utecana belhi len Judas.<sup>6</sup> Lana nna ucaba leni, atti udulottebana beguila leni gaxasná unna utena Jesús las ná ca nua atti nuttu benni se'e len Benniha.

## Jesús redú tsee qui go rse lenie ca benni rudheti ca tisa rule'e

(Mt. 26:17-29; Mr. 14:12-25; Jn. 13:21-30; 1 Co. 11:23-26)

<sup>7</sup> Atti chi bisía sá laní atti ro ca benni Israel ttaxtila nu bittu levadura dia lenna, lania nua labíaba rutticana ttu carne'e nu ga'ana gattiha qui rocana laní Pascua.<sup>8</sup> Jesús udhelhe Pedro lenbi Juan, nianna re ca bi'iniha:

—Gualtsia gualseni rseri qui gori gue laní Pascua-ni.

<sup>9</sup> Lacabi nna unnaba tisacabi rácabi Benniha:

—¿Gonni raca lelu tsiatu sentu nu go rseri?

<sup>10</sup> Jesús becabie re:

—Atti ga'ale ro'o yies-na, na etti'ale ttu unbiyuu denojana ttu re'e deta'a inda lhe'eni. Lebi'i nna sanottele na axtaba lhe'e yo'o atta eta'ana.<sup>11</sup> Nianna gále xxana yo'oha: “Maestruha rinnaba tise re: ¿Gonni do yo'o atta go rsea gue laní Pascua-ni lania ca benni rudheti ca tisa rule'a?”<sup>12</sup> Unnuha nna ule'enna le lhe'e ttu yo'o xeni nu do berupa coa chi do tseena yapa lhe'eni. Nía unle rse.

<sup>13</sup> Lacabi nna diattecababi, guatt'i'abacabi iyába attiba rába Jesús. Nianna benttebacabi rse gue laní Pascua nía.

<sup>14</sup> Atti chi bisía ura go rseque nna bedotteba Jesús lenie ca bi'ini rudheti ca tisa rule'e, bi'a dhacaba ro'o mexaha. <sup>15</sup> Nianna re ca bi'iniha:

—¡Neti nna attulade chi re lasia go rse lania le nnanna laní Pascua-ni, antisla gattia! <sup>16</sup> Cumu neti ria, bitturu goa rse-ni attu libe, axta liba atti isía sá saxxína aca unní atta rinnabia Tata Do Iyyabaaha.

<sup>17</sup> Laniala nna bedaxxue ttu copa ta'a vinu lhe'eni, dequide betee xquixaru leni Tata Do Iyyabaaha, nianna re:

—Gualudaxxu copa-ni, guali'iya ttu ttule sa saro'o nu ta'a lhe'eni. <sup>18</sup> Neti nna rpea le, bedá nnanna bitturu i'ya inda xixxi gue besuli-na attu libe, axta liba gansi chi bisía sá innabia Tata Do Iyyabaaha.

<sup>19</sup> Laniala nna bedaxxue ttaxtilaha. Dequide begüee xquixaru Tata Do Iyyabaaha, ulha'attebe lhe'e ttaxtilaha begüee ca bi'ini rudheti ca tisa rule'e, nianna re ca bi'iniha:

—Taxtila-ni anque cuerpu quia. Cuerpu quia-ni utea na qui gattina cuenta guele. Aní unle qui exxa lele neti.

<sup>20</sup> Dequide uto rseque nna aníaguaba benie, bedaxxuttebe copa ta'a vinu lhe'eniha, nianna re:

—Vinu ta'a lhe'e copa-ni ancana reni quia. Len ben-ni eya'an tsitsi ca tisa cubi chi begüee Tata Do Iyyabaaha len ca benni. De lebi'i nna ilali reni quia-ni qui lhále bittu tsia nittle. <sup>21</sup> Ttiaca nu utena neti las ná ca nu lä raca uyúcana neti, niba dona leni neti ro'o mexa-ni. <sup>22</sup> Gualíba neti Benni unbiyuu daa iyyabaaha nna labíaba satea iyába nu chi ga'ana lo ca sitsi gue Tata Do Iyyabaaha. Ttiaca, ¡carusi'iru nu utena neti las ná ca nu utticana neti!

<sup>23</sup> Ca bi'ini ts'i'inu (12) rudheti ca tisa rule'e Jesús, udulottebacabi unnaba tisa loescabi gue nú nua utena Benniha las ná ca nu utticane.

### Ca benni rudheti ca tisa rule'e Jesús rinnecabi gue nuxcabi aca nu lo

<sup>24</sup> Ca bi'ini rudheti ca tisa rule'e Jesús udulocabi bitilha tisa len loescabi lo ni'a gue nuxcabi aca nu lo. <sup>25</sup> Ttiaca Jesús re cabi:

—Ca nu rinnabia gue ca yiesi se'e yies lo yu-ni, rite lo bedábacana rinnabiabacana ca benni banquinna. Ca nu anca nu lo gue ca benni nna re'o lecani gácan cana nu runi nu anca tsee len benni. <sup>26</sup> Ttiaca lebi'i nna läga dica unle aná. Nu unlale nna benni run gue nu lo len

lebi'i nna acana attiba ttu nu bittu chi te elha rieni gueni, nu runi mandaduha nna acana attiba ttu nu rudá náni lole.<sup>27</sup> Cumu, ¿nú nua anca nu lo? ¿Si nu redo ro'o mexa gona etta aca? ¿Si nu rusiga platu lo nua aca? ¿Läba ganna nu redo ro'o mexaha nua ancana nu lo? Ttiaca neti nna doa len lebi'i anca attiba ttu nu rusiga platu lole.

<sup>28</sup> 'Lebi'i ancale ca nu satíaba use'e len neti itúttuba atti biyúa elha disa gue nu guatea.<sup>29</sup> Denuala nna attiba beni Tata quia aca nu rinnabia, aníaguaba unia acale nu innabia,<sup>30</sup> qui ebíale i'iyá gole ro'o mexa quia atta dhoa innabiaya. Anáguaba ebíaguale lo ca xxila atta tse'ele innabiale qui unle elha uxtisi gue ca tsí'inu (12) cue ca benni datía benni lá Israel.

### **Jesús rixxi'e Pedro bittu dhi ro'obi gualí anca bienbi benniha**

(Mt. 26:31-35; Mr. 14:27-31; Jn. 13:36-38)

<sup>31</sup> Ráguba Jesús:

—Simóni, binarga. Nu xxegüiha chi unnabana ucuibin le attiba ttu nu rutte xuxtila lhe'e gabeli.<sup>32</sup> Ttiaca neti chi unnaba lo Tata Do Iyyabaaha qui bittu udhanlu ria lelu neti. Lu nna gansi chi bedú tsitsilu len neti attu libe, lania nna unlu yuda adí ca loeslu-na qui tse'e tsitsicana.

<sup>33</sup> Simón becabibi rábi:

—Benni bananie neti, neti nna gua duba tsia lania lu lisiyya, masquiguuba gattia len cuinalu lhe.

<sup>34</sup> Jesús becabie re:

—Pedro, neti nna ria, nnela antisla cuesi berudi-na, lu nna chila beyonna libe bittu ridí ro'olu gualí anca bienlu neti.

<sup>35</sup> Nianna, unnaba tisatibe ca bi'ini rudheti ca tisa rule'e re ca bi'iniha:

—Atti udhelha le güiale güettixxi'a ca tisa quia-niha atti bittu belhi bijaleha, niguuba chuba atta yu'u guele lhe, niguuba attu cue guaracha lhe, lania nna, ¿si beasa guele?

Lacabi nna becabicabi rácabi:

—Tsa lägabi beasa.

<sup>36</sup> Nianna re ca bi'iniha:

—Ttiaca nnanna nna nu te chuba atta yu'u gueni nna ujan nua, anáguuba atta yu'u belhi gueni lhe. Nu bittu espada gueni te nna utto'ona gabana gueni qui go'ona ttu espada.<sup>37</sup> Cumu neti ria,

labíaba satea attiba chi ga'ana lo ca sitsi gue Tata Do Iyyabaaha atta rá: "Bedhacacane attiba bedhacacana ca nu beni nu bittu anca tsee."<sup>a</sup> Cumu iyába nu chi ga'ana lo ca sitsi-na satea, labíaba saxxína acana.

<sup>38</sup> Lacabi nna rácabi:

—Benni bananie ri'itu, ni chupa espada se'e-ni.

Jesús becabie re:

—Care'aba ca unná.

### Jesús rinnee len Tata Do Iyyabaaha lo lhilhi te láni Atta Da Ca Ya Olivuha

*(Mt. 26:36-46; Mr. 14:32-42)*

<sup>39</sup> Lania nna beríatteba Jesús lhe'e yiesiha die lo lhilhi Atta Da Ca Ya Olivuha, cumu aníaba labie runie. Ca bi'ini rudheti ca tisa rule'e nna diattebacabi denocabi Benniha. <sup>40</sup> Atti chi bisíne lo lhilhiha nna ráttebe ca bi'ini denoha:

—Gualnne len Tata Do Iyyabaaha qui bittu dha nu xxegüiha dhi yienle.

<sup>41</sup> Lee nna biriesttebe atta se'e ca bi'iniha, attiba tu atta isína ttu iyya rigu'unari. Nía bedú xibie unnee len Tata Do Iyyabaaha.

<sup>42</sup> Nianna re:

—Tata, gansi lu raca lelu, bodiláchi neti lo elha disa daa uyúa-ni. Ttiaca läga ria aca nu raca lasia, sinuqui nu innába cuinalu unnuhaba aca.

<sup>43</sup> [Lania nna ucaxxe ttu ingeli daa iyyabaaha, qui ulequi tsitsie le Benniha. <sup>44</sup> Atti doe ruyúxxatte elha disa gue nu sate nna adílaba itú iqui itú le Benniha rinnee len Tata Do Iyyabaaha. Indedha raca Benniha nna risúnie lo yu attiba risúni reni.]

<sup>45</sup> Atti bedulíe dequide unne lenie Tata Do Iyyabaaha, deyyattebe atta se'e ca bi'ini rudheti ca tisa rule'e. Níaba guatti'e ca bi'iniha tecabi ti'edhicabi, cumu de se'e si'icabi nuarca ttuttíru bedaxxu bisielacabi. <sup>46</sup> Nianna re ca bi'iniha:

—¿Biaca ti'edhile? Gualchadha. Gualnne len Tata Do Iyyabaaha, qui bittu dha nu xxegüiha dhi yien le.

---

<sup>a</sup> 22:37 Isaías 53:12

### **Bedaxxucana Jesús**

(Mt. 26:47-56; Mr. 14:43-50; Jn. 18:2-11)

<sup>47</sup> Sna duba Jesús rinnee, atti chi bisína ixeru benni. Nu te láni Judas, nu selaguaba ca bi'ini ts'i'inu (12) rudheti ca tisa rule'e Jesús, unnuha neruna lo ca nua. Judas nna ubigattebana betsá loni xxaga Jesús. <sup>48</sup> Laniala nna rá Jesús:

—Judas, ¿si leni nu betsá lolu xxaga-ni utelu neti Benni unbiyuu daa iyyabaaha las ná ca nu utticana neti?

<sup>49</sup> Atti biláni ca benni se'e leni Jesús, nu racaha nna unnaba tisattebacabi rácabi:

—Benni bananie ri'itu, ¿si gutiatu leni ca espada-ni?

<sup>50</sup> Nianna ttu ca bi'iniha nna benbi güee nu riben sina gue bixxudi xeni rinnabiah, uchúbi naga derechu gue nua. <sup>51</sup> Ttiaca Jesús unnettebe re:

—Ttonába, chinca.

Laniala utane naga nua qui beonie na. <sup>52</sup> Nianna re ca nu lo gue ca bixxudiha lhe ca nu lo gue ca nu rapa yotuha lhe ca nu teru elha rieni gueni gue ca benni Israel lhe ca nu bisína bedaxxucane:

—¿Biaca dale len espada lhe len yaga lhe güedadxxu neti attiba ttu ubana? <sup>53</sup> Inqui ttu ttu sába udúa len lebi'i lhe'eli'a gue yotu-na, lebi'i nna bittu beixinle ettedaxxule neti. Ttiaca nnanna liba anca ura guele atti rinnabia nu lexúaha le.

### **Bittu uxí ro'o Pedro anca bienbi Jesús**

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Laniala bedaxxucana Jesús, uchecane lhe'e yo'o gue bixxudi xeni rinnabiah. Pedro nna idittu liba denobi. <sup>55</sup> Nianna, beontteba ca benni ttu cue gui rulha gue lhe'eli'a gue yo'oha, atti usiattebacana bi'a dhacaba guiha. Pedro nna níaguuba udobi len ca nua. <sup>56</sup> Ttiaca ttu nuila ren sina nía, atti bilenna Pedro dobi atta re guiha, begüiattebana ttu líba lobi, nianna rána:

—Anáguba unbiyuu re-ni, len Jesús-naguuba du unná.

<sup>57</sup> Ttiaca Pedro nna bittu uxí ro'obi. Unnettebabí rábi:

—Xa nuila, läga anca biatia unná.

<sup>58</sup> Sattigaba uca nna chi biláni attu nu subi Pedro, nianna rá nua:

—Lu lhe ancalu benni baba len Jesús-na.

Pedro nna becabibi rábi:

—Dica, läga anca neti benni baba len unná.

<sup>59</sup> Attiba attu ura dequide lania nna chi redená attuna:

—Gualíba unbiyuu-ni nna len Jesús-naba du unná, cumu nu Galileaguabana.

<sup>60</sup> Laniala rá Pedro:

—Läga yu neti bi gueonna rinnelu.

Snaba lania, sa duba Pedro rinnebi nna chi uresi berudiha.

<sup>61</sup> Laniala nna bodequi lo Jesús begüie lo Pedro. Pedro nna bexxatteba lebi gue atti unne benni bananie ri-na re: “Nnela antisla cuesi berudi-na, lu nna chila beyonna libe bittu ridí ro'olu anca bienlu neti.” <sup>62</sup> Pedro nna beríattebabí nía. Attula de ures yielabi de relenxxattinbi.

### Rugüecan Jesús lhe redacaquinna guee lhe

(Mt. 26:67-68; Mr. 14:65)

<sup>63</sup> Ca unbiyuu se'e rapa Jesús, redacaquinna guee lhe rugüecane lhe. <sup>64</sup> Bexxicattebacan loe len ttu lari, nianna unnaba tisacana Benniha rácane:

—¡Unne ya'a sanga, núnna begüeen lu!

<sup>65</sup> Ixerba nu rácane rudhaca disacane.

### Jesús rutsá due lo ca nu uni elha uxtisi guee

(Mt. 26:59-66; Mr. 14:55-64; Jn. 18:19-24)

<sup>66</sup> Atti goaniha nna bitupatteba ca nu teru elha rieni gueni gue ca benni Israel, ca nu lo gue ca bixxudiha lhe ca nu rule'e nu rá lo ca ley boca'ana Moisés lhe. Lacana nna uchecana Jesús atta rise'ecana runcana elha uxtisi. Nía unnaba tisacane rácane:

<sup>67</sup> —Utixxi'en ri'itu, ¿si lu nua anca Cristu benni chi ga'anani Tata Do Iyyabaaha odile ca benni?

Lee nna becabie re:

—Gansi neti upea le: “Agu, netiba nua”, läga tsia lele quia.

<sup>68</sup> Gansi neti innába tisa le nna läga ecabile quia, [lä ulhágubale neti lhe]. <sup>69</sup> Ttiaca desde nnannali nna neti Benni unbiyuu daa iyyabaaha dhoa daca lhuitta derechu gue Tata Do Iyyabaaha, Benni ra xxeni lee.

<sup>70</sup> Lania nna iyábacana unnaba tisacana rácane:

—Gansi anía anca, ¿si lu ancalu Xi'in Tata Do Iyyabaaha?

Jesús becabie re:

—Lebi'iba chi rále, neti anca xi'ini Benniha.

<sup>71</sup> Lania nna rácana:

—Lärga nurua reasinri quixxi'enna ri gue bixa runi unní.

Cuinaba ri'i chi bieninri biría ro'oni rána aná.

### Jesús betsá due lo Pilato

*(Mt. 27:1-2, 11-14; Mr. 15:1-5; Jn. 18:28-38)*

**23** Laniala nna udulí iyábacana, nianna uchettebacana Jesús lo Pilato. <sup>2</sup> Atti udulottebacana bencana xiyya guee rácana:  
—Ril'itu chi guatt'atu unbiyuu du-ni rutsatsana ca benni guetu se'e lhe'e yies-ni. Nianna, rána dequi bittu dica quixari belhi leni nu rinnabia do Roma. Rágubana dequi lana ancana Cristu Benni rinnabia.

<sup>3</sup> Pilato nna unnaba tisattebana Benniha ráne:

—¿Si lu ancalu nu rinnabia gue ca benni Israel-ni?

Jesús becabie re:

—Luba chi rálu.

<sup>4</sup> Laniala rá Pilato ca nu lo gue ca bixxudiha, ca benni sama nía lhe:

—Neti nna bittu ratti'aya ni ttu nu lä anca tsee chi beni unbiyuu-ni.

<sup>5</sup> Ttiaca adíla duelha bencana rácana:

—Lana requina rutsatsana iyába ca benni gue Judea-ni leni nu rule'ena. U dulona Galilea-na, nnanna nna requina nii.

### Jesús rutsá due lo Herodes

<sup>6</sup> Atti bienini Pilato rudetti ca nua Galilea nna unnaba tisattebana gansi nía baba Benniha. <sup>7</sup> Binabana anca Jesús Benni baba lo yu rinnabia Herodes nna bottettebana Benniha las ná nua. Cumu níaguaba re Herodes Jerusalén lania. <sup>8</sup> Atti biláni Herodes Jesús, be'o tsitsiaba leni, cumu isá chinca rdacana ilenna Benniha, de chi bieninna nu rá benni run Benniha. Nianna, ribedana ilenna un Benniha ttu milagru. <sup>9</sup> Lana nna ixeru nu unnaba tisana Jesús, ttiaca Benniha nna tsa läga becabie gueni. <sup>10</sup> Níaguaba se'e ca nu

lo gue ca bixxudiha, ca nu rule'e nu rá lo ca ley boca'ana Moisés lhe. Ca unnuha nna tsitsiba duelha runcana se'e diticana rudelha iyyacana Benniha.<sup>11</sup> Laniala nna Herodes lenna ca soldado gueniha nna bedhaca güecana Benniha, bencana Benniha burla lhe nianna begucuttebacane ttu lari tsee racalaa, atti bedhelha dacabana Benniha leni Pilato.<sup>12</sup> La sá nna beaca tsee Pilato lenna Herodes, cumu use'e tilhabacana, läga uca uyú loescani.

### **Boquinna iquicani gattiba Jesús**

(Mt. 27:15-26; Mr. 15:6-15; Jn. 18:39–19:16)

<sup>13</sup> Pilato nna bottupattebana ca nu lo gue ca bixxudiha, ca nu rinnabia gue yiesiha lhe iyába benni lhe. <sup>14</sup> Nianna unnena rán cana:

—Lebi'i bisía lenle unbiyuu du-ni, rále dequi requina rutsatsana ca benni se'e lhe'e yies-ni, ttiaca neti chi unnaba tisa na aníba lole, nianna bittu chi guatti'aya ancana nu te tulha gueni gue ni ttu delo iyá nu rále runna.<sup>15</sup> Anáguuba Herodes, bittuguuba guatti'ana bixa lo ni'a gueanca unní nu te tulha gueni. Denuala nna bodequin na len neti. Lebi'i nna gua rugüiabale, unní nna lägabi chi benna ttu bixa qui ralhana gattina.<sup>16</sup> Larcala nna ttu elha disaba ugüeá na, lenla nna ulháya na.

<sup>17</sup> [Cumu ttu ttu idaba gansi chi raca laní Pascua nna chi labi ca nu Israel odilá Pilato ttu nu te lisiyya.]<sup>18</sup> Ttiaca iyábacana udulocana ttu libeba uresi'acana rávana:

—¡Betti unná! ¡Barrabás-na bodil!

<sup>19</sup> Barrabás-na utixxacan na lisiyya cumu de betsatsa na benni bedú disacana lo ca nu rinnabia gue Jerusalén, de benna elhutti lhe.

<sup>20</sup> Pilato nna rdacana odilána Jesús. Denuala nna rána ca unnuha attu libe odilábana Benniha.<sup>21</sup> Ttiaca ca unnuha nna adílaba uresi'acana rávana:

—¡Betá na lo ya crusi! ¡Betá na lo ya crusi!

<sup>22</sup> Pilato nna beyonna libe rán cana:

—¿Bi nu bittu anca tsee beni unní? Neti nna bittu ratti'aya bixa lo ni'a gue ralhana gattina. Larcala nna ugüeba na ttu elha disa, dequide la nna ulhába na.

<sup>23</sup> Ttiaca lacana nna adílaba uresi'acana, rinnabacana utá Pilato Jesús lo ya crusi. De ribesi'axxattabacana lencana ca nu lo gue ca

bixxudiha, udábacana uca nu raca lecani.<sup>24</sup> Laniala nna boquinna iqui Pilato aca nu rinnaba ca nua.

<sup>25</sup> Lana nna benttebana mandadu belhávana Barrabás, cumu unnuhaba rinnaba ca benni ulhána. Unnuha nna tena lisiyya de betsatsana ca benni qui bedú disacana lo ca nu rinnabiaha, de benna elhutti lhe. Pilato nna botebana Jesús las ná ca benni qui uncana nu racaba lecani len Benniha.

### Jesús betácane lo ya crusi

(Mt. 27:32-44; Mr. 15:21-32; Jn. 19:17-27)

<sup>26</sup> Atti dia lencana Jesús qui utácane lo ya crusi nna bedaxxucana ttu unbiyuu lábi Simón bi'ini beaca lasbi lhe'esi nu te láni Cirene, dedaabi güiabi ranchu. Nianna, bejúacana bi'iniha ya crusihha qui tsiabi sanalhabi Jesús nojabi nua.

<sup>27</sup> Ixe tsitsia ca benni se'e lhe'e yiesiha denocana Benniha, denoguaba ixeru ca nuila ribescana guee lhe. Lacana nna ribesi'anicana de relenquinna gue nu rate Benniha. <sup>28</sup> Ttiaca Jesús bodequi loe begüie cana, nianna re cana:

—Ca nuila gue yiesi Jerusalén, bittu cuesle quia, guele gualcuesi, gue ca xi'inle-na lhe. <sup>29</sup> Cumu isía sá inná ca benni: “Carbáru ca nuila bittu dica uja xi'inquinna ca nu bittu ulu'u xi'incani lhe ca nu nuttu nu unto usna xiscani lhe.” <sup>30</sup> Lania nna dhulo ca benni gácana ca i'iya-na: “¡Gualiyinna iquitu! ¡Lo lhilhi do-na, becatsi ri'itu!”

<sup>31</sup> Cumu gansi aní raca leni benni anca attiba ya ya'a, ¿Tittialiga la aca lenna gansi ancana ya bisi?

<sup>32</sup> Cheeguabacana chupa ca nu beni nu lä anca tsee, qui uttican ca unnuha len Jesús. <sup>33</sup> Atti bisíncana ttu re atta te láni Bega Iqui Nu Yatti, nía nua betácana Jesús lo ya crusi, ca nu beni nu lä anca tseeha lhe. Ttuna betácana lo ya crusi du daca ladu derechu guee, attu nua nna betácana lo ya crusi du daca ladu rabesa guee. <sup>34</sup> Jesús unnee re:

—Tata, uxíchi elha xen lasi gue ca unní, cumu bittu yucana bixunní runcana.

Ca soldadoha nna bencana ttu nu bele'e lo nuxa ca xo Benniha eyoja ttuttucana. <sup>35</sup> Ca benni nna se'ebacana güegüia. Axtaba ca nu anca uxtisiha runcana Benniha burla rávana:

—Inqui benni subi bodilána. Nnanna nna un sanga la labana gaxasná qui lhána, gansi gualínna ancana Cristu Benni chi ga'anani Tata Do Iyyabaaha odilá ca benni.

<sup>36</sup> Ca soldadoha lhe aníaguaba runcana burla Jesús, atti ribigacana rugüecana Benniha vinu idí. <sup>37</sup> Nianna, rácane:

—¡Gansi lu nua ancalu nu rinnabia gue ca benni Israel-ni, la luba ben sanga gaxasná qui lhálu lo ya crusi-na!

<sup>38</sup> Iqui crusi atta ta Jesús betácana ttu breta [dia letra griego lhe latin lhe hebreo lhe loni]. Ca letraha nna rácana: “Unní ancana nu rinnabia gue ca benni Israel.”

<sup>39</sup> Ttu ca nu beni nu lä anca tsee taguaba lo ttu ya crusiha nna rudhaca disana Jesús ráne:

—Gansi gualínlu lu nua Cristu, beni qui lhálu lhe bodilágua ri'itu lhe.

<sup>40</sup> Ttiaca attu nu ta lo attu ya crusiha nna bedhaca disan na rán na:

—Lu nna ¿si bittuba rasinlu lo Tata Do Iyyabaaha, inqui lo ya crus-naguaba chi talu nna? <sup>41</sup> Ri'i nna ralhabari nu rateri-ni, cumu rixari gue nu chi benri, ttiaca unbiyuu-ni nna lägabi chi beni unní ttu bixa nu bittu anca tsee.

<sup>42</sup> Nianna ráttebana Jesús:

—Exxachi lelu neti gansi chi rinnabialuha.

<sup>43</sup> Jesús re na:

—Neti nna gualíbatia rpea lu, snaba nasá esínlu len neti atta dho tseelu lo yu ga'ana tseeha.

### Atti utti Jesús

*(Mt. 27:45-56; Mr. 15:33-41; Jn. 19:28-30)*

<sup>44</sup> Desdeba retin ts'i'inu (12) resá bechulha itúba yies lo yu, axtaba retin tsunna ulha. <sup>45</sup> Tatubisa-na bitturu ulu'una xieni, lari nu daa lhe'e yotuha nna rulha xeaba lhe'eni bireda. <sup>46</sup> Lania nna uresi'a Jesús re:

—¡Tata, las nálu rodha'ana espíritu quia-ni!

Unnuhaba unnee re nna uttittebe.

<sup>47</sup> Atti biláni soldado gue Roma nu banani ca soldadoha nu ucaha nna nianna ulequi xenna Tata Do Iyyabaaha rána:

—Gualíba unbiyuu-ni nna lägabi tulha gueni te.

<sup>48</sup> Lania nna iyába ca benni bitupa se'e rugüia nu raca nna bilábaquinna nu ucaha nna rugüeni lastoocani güequicana deyyacana. <sup>49</sup> Ttiaca iyába ca nu anca biaquinna Jesús, anágua ba ca nuila ca nu denalhacana Benniha desdeba Galilea, idittu liba be'ancana rugüiacana iyába nu raca.

### Jesús becatsicane

(Mt. 27:57-61; Mr. 15:42-47; Jn. 19:38-42)

<sup>50</sup> Udo ttu unbiyuu lábi José, ancabi ttu nu du tsee leni, runbi nu anca tsee lhe. Labi nna beaca lasbi lhe'esi nu te láni Arimatea, re lo yu gue Judea. Nutsaguabi lhe'e ca nu runi elha uxtisi gue ca benni Israel. <sup>51</sup> José nna doguabi ribedabi isía sá isía Tata Do Iyyabaaha innabie. Labi nna bittu uyu'u lebi nu boquinna iqui adí ca nu runi elha uxtisiha uncana leni Jesús. <sup>52</sup> Nianna güiattebabí guannababi lo Pilato qui ote nua cuerpu gue Jesús lenbi. <sup>53</sup> Dequide belhidabi Benniha lo ya crusiba nna bottubitebabí Benniha ttu lari ga'ana tsee, atti becatsittebabí Benniha lhe'e ttu baa cubi do lhe'e ttu iyyattoo, nu bittu chi bigatsi ni ttu benni lhe'ení. <sup>54</sup> La sáha rese'e tsee ca benni Israel cumu ga'a sá redí lecaniha. Sáha nna chitteba deoba ga'ana.

<sup>55</sup> Ca nuila ca nu denalhacabi Jesús desdeba Galilea nna güiacabi guanocabi José qui begüiacabi baa gue Benniha, gaxasná bigatsie lhe. <sup>56</sup> Atti bequicabi besin liscabi nna benttebacabi ca seti rure tsee, adíba ca nu rigu'ucana cuerpu gue ca benni yatti-na lhe.

Lacabi nna bedíba lecabí sá redí lecabiba, attiba ga'ana lo ca ley boca'ana Moisés.

### Atti beacani Jesús

(Mt. 28:1-10; Mr. 16:1-8; Jn. 20:1-10)

**24** Duminca primerba sá redú lo xumanu, diltochiga udá ca nuilaha diacabi lo baa gue Jesús, nujacabi ca seti rure xixxi. [Diarguaba adí ca nuila len lacabi lhe.] <sup>2</sup> Atti bisíncabi ro'o beleahat ta te baaha nna biláquinbi lärga re iyya nu yaya ro'o beleaha atta rena. <sup>3</sup> Uta'abacabi lhi'u nna lärga nu cuerpu gue Jesús Benni bananie ri biláquinbi nía. <sup>4</sup> Níaba se'ecabi raca guatequinbi, bittu rería ni'elhaquinbi bixa uncabi, attirba elha ucaxxela chupa

ca unbiyuu nucu xo racalaa guecabi use'ecabi lhuitacabi.<sup>5</sup> De usbaquinbi nna bodeattatteba locabi lo yu. Ca unbiyuuhha nna unnettebacabi rácabi:

—¿Biaca reguilale Benni anca bani-na atta yu'u ca nu yatti-ni?<sup>6</sup> Lärga nu Benniha te-ni. Chiba beaquin Benniha. Gualorexxa lele nu unne Benniha atti sna requibe Galilea.<sup>7</sup> Lee nna re: “Neti Benni unbiyuu daa iyabaaha, labíaba utecana neti las ná ca benni te tulha guecani lo Tata Do Iyyabaaha, lacana nna utávana neti lo ya crusi, ttiaca eyonna ubisa nna eyacatia.”

<sup>8</sup> Lania liba bexxa lecabí ca tisa unne Jesús. <sup>9</sup> Dequide besincabi güiacabi lo baaha nna utixxi'attebaquinbi a sinía (11) ca bi'ini bedheti ca tisa bele'e Benniha gue iyába nu biláquinbi, iyáguuba adí ca benni se'e nía lhe. <sup>10</sup> María Magdalena lenbi Juana lhe María nan gue Jacobo lhe adírba ca nuila lhe, lacabi nua utixxi'aquinbi ca bi'ini bedheti nu bele'e Jesús gue nu biláquinbiha. <sup>11</sup> Ca bi'ini bedheti nu bele'e Benniha nna tsa läga güia lecabí gue nu rá ca nuilaha, cumu ucaquinbi dequi läganu dica ixuu nua rá ca bi'iniha.

<sup>12</sup> Ttiaca Pedro nna bigaattebabí diabi ro'o baaha. Atti begüiabi lhe'e baaha, a sunruba ca lari bitesi Benniha re nía. Lania nna güequittebabí deyyabi lhe'e yo'oha, rebanbinbi gue nu ucaha.

### Nu guate ca benni yu'u neda dia daca lhe'e yiesi Emaús

(Mr. 16:12-13)

<sup>13</sup> Snaba la sáha nna, chupa ca bi'ini bedheti nu bele'e Jesús diacabi daca lhe'e yiesi Emaús. Unnuha rena attiba sinía (11) kilómetro leni Jerusalén. <sup>14</sup> Lacabi nna diacabi rinnecabi gue iyába nu ucaha. <sup>15</sup> Laca rinne len loescabi lhe rinnaba tisa loescabi lhe cuinaba Jesús ubigue uyu'e neda lencabi. <sup>16</sup> Ttiaca masquiba biláquinbi Benniha nianna läga uca eyon biacabi Benniha. <sup>17</sup> Jesús unnaba tise re:

—¿Biunna rinne len loesle laca diale yu'ule neda-ni?

Lacabi nna si'irurba runcabi bese'e sicabi. <sup>18</sup> Ttucabi, bi'ini lá Cleofas, becabibi rábi:

—¿Si sun luba unní nu dittu dolu Jerusalén-ni bittu yulu gue nu ya'a sutsutteba chi ucaba?

<sup>19</sup> Laniala unnaba tisa Jesús re:

—¿Bi uca?

Lacabi nna rácabi Benniha:

—Nu guate Jesús gue Nazaret. Benniha uque ttu profeta, lee nna xxeniba anca ca milagru benie lhe anáguaba nu unnee lhe benie nua lo Tata Do Iyyabaaha lhe lo iyába ca benni lhe.<sup>20</sup> Ttiaca ca nu lo gue ca bixxudi-na lencana ca uxtisi guetu-na betecana Benniha las ná ca nu boquinna iquicani gattie. Ca unnuha nna betácane lo ya crusi.<sup>21</sup> Ri'itu nna xen letu Benniha anque Benni odile ri'itu ca nu Israel-ni, ttiaca nasá chinca tsunna ubisa uca iyába nu rátu-ni.<sup>22</sup> Masquiba ttu chupa ca nuila sela len ri'itu-na chi bencabi bebanintu. Lacabi nna baniha sna ancarla chulha güiacabi atta te baaha.<sup>23</sup> De nuttu cuerpu gue Benniha guatti'acabi, nuarca bequicabi besíacabi lhe'e yo'o atta se'etuha. Nianna, rácabi dequi bele'equinbi ca ingeli. Ca ingeliha nna rácabi dequi Jesús do banbe.<sup>24</sup> Lania la güia ttu chupa ca benni guetu guagüiacabi ro'o baaha. Lacabi nna guatti'abacabi anca attiba rába ca nulaha, ttiaca Jesús nuttue biláquinbi.

<sup>25</sup> Lania la nna rá Jesús ca bi'iniha:

—¡Lebi'i, cattipa ditile! ¿Núcalunni tsia lele ca tisa unne ca benni uca profeta?<sup>26</sup> ¿Si läba anába chi ga'ana sate Cristuha antisla eyopie iyyabaaha qui uni Tata Do Iyyabaaha aca Benniha Benni ra xxeni lee?

<sup>27</sup> Lania la nna uduloe utixxi'anie ca bi'iniha iyába nu rá lo ca yitsi gue Tata Do Iyyabaaha atta rinne guee uduloe len nu rá lo ca sitsi beni Moisés, besiguibe unnee nu rá lo iyába ca sitsi beni ca profetaha.

<sup>28</sup> Atti chi bisíncabi ro'o lhe'esi atta diacabiha nna Jesús benie dequi ttebe die.<sup>29</sup> Ttiaca lacabi nna duelhaba bencabi gue Benniha qui eya'ane, nianna rácabi Benniha:

—Ni tte be'ana len ri'itu. Chiba guadi ubisa, ela bunni chi aca.

Lania la uta'a Jesús qui eya'ane len ca bi'iniha.<sup>30</sup> Atti chi doe ro'o mexa len ca bi'iniha nna bedaxxuttebe ttaxtila. Dequide betee xquixaru len Tata Do Iyyabaaha ulha'attebe ttaxtilaha begüee ca bi'iniha.<sup>31</sup> Snaba lania nna bisía uca beon biacabi Jesús, ttiaca Benniha nna bennitti lottebe.<sup>32</sup> Nianna, rá loescabi:

—Anla nuarca la de ya de nu racani lastoori atti dedee rixxi'anie ri ca tisa dia lo ca sitsi gue Tata Do Iyyabaaha laca dedee deyu'e neda len ri'i.

<sup>33</sup> Snaba lania nna begu'uttebacabi neda bequicabi dedaacabi Jerusalén. Níaba bettetti'acabi iyába sinía (11) ca bi'ini bedheti ca tisa bele'e Jesús, se'ecabi ttu reba leni adí ca benni. <sup>34</sup> Ca benni se'e nía nna rácabi a chupa ca bi'iniha:

—Gualiba, becabani Jesús. Simón chi bilenbi Benniha.

<sup>35</sup> Laniala nna utixxi'a ca benni besinaha iyába nu guatecabi atti diacabi yu'ucabi neda, gue gaxasná uca beon biacabi Jesús atti ulhe'e ttaxtilaha lhe.

### **Jesús ucaxxe atta se'e ca benni bedheti nu bele'e**

(Mt. 28:16-20; Mr. 16:14-18; Jn. 20:19-23)

<sup>36</sup> Sna se'eba ca bi'iniha rixxi'acabi nu guatecabi, atti chi ucaxxe Jesús udúe lagüi guecabi, nianna re ca bi'iniha:

—Xen su lee gualtse'e.

<sup>37</sup> Lacabi nna usitsitsiabaquinbi cumu ucaquinbi ga ttu espírituba nua biláquinbi. <sup>38</sup> Laniala unne Jesús re ca bi'iniha:

—¿Biaca se'ele rasinle? ¿Biaca rudú chupana lele lhe?

<sup>39</sup> Gualgüiarga ca náya-ni lhe ca ni'aya-ni lhe. Cuinaba neti unní. Gualcana neti, gualgüiatte nna cumu ttu espíritu läga anca nua len sitta bela atti rilenle anca dua-ni.

<sup>40</sup> Dequide unnee re anía, bele'ettabe ca nee lhe ca ni'e lhe. <sup>41</sup> Ca bi'iniha nna de re'oba lecabí lhe de rebanbaquinbi lhe ituttuaba bittu ria lecabí gansi gualí Benniha nua du nía. Jesús unnaba tise re:

—¿Bila te guele-ni qui gori?

<sup>42</sup> Laniala begüeocabi Benniha salha'a belha biyexxu lo gui len saro'o besinttoo. <sup>43</sup> Benniha nna bedaxxuttebe nua utoe aníba locabi. <sup>44</sup> Laniala re ca bi'iniha:

—Nu guatea-ni ancana nu utixxi'atia le atti sa duba len lebi'ihá. Neti nna ria, labíaba aca iyába nu rixxi'a quia dia lo ca ley boca'ana Tata Do Iyyabaaha len Moisés, nu ga'ana lo ca sitsi beni ca benni uca profetaha lhe nu ga'ana lo ca Salmo-na lhe.

<sup>45</sup> Laniala utixxi'enie ca bi'iniha bixa dia le nu rá lo ca sitsi-na, qui anáchu sadú lecabí, <sup>46</sup> nianna re ca bi'iniha:

—Anába rá lo ca sitsi-na: “Neti Cristu labíaba gattia, atti eyonna ubisa nna eyacatia eríaya lhe'e baa atta yu'u ca nu yatti-na.” <sup>47</sup> Lebi'i nna tsiale cuenta quia lhe'e iyába ca yiesi se'e itúba yies lo yu-ni qui quixxi'enle ca benni, gále cana: “Guadiba Tata Do Iyyabaaha

elha xen lasi guele gansi odú xiyyanle gue nu lä anca tsee runle, eyequile odaxxule neda gue Ben-na lhe. Lhe'e yiesi Jerusalén-ni dhulole quixxi'ale ca tisa-na.<sup>48</sup> Lebi'i ancale ca benni biyú lole iyá nu ucaha.<sup>49</sup> Neti nna güidhelhaba benni chi rá Tata quiaha utee len lebi'i. Larcala niba gualtse'e lhe'e yiesi Jerusalén-ni axta qui dhíle elha raca len daa iyyabaaha, qui acale nu ra tsitsi leni.”

### **Jesús beopie deyye iyyabaaha**

*(Mr. 16:19-20)*

<sup>50</sup> Laniala nna uchee Jesús ca bi'iniha biría lenie cabi lhe'e yiesi Jerusalén. Axtaba ro'o yiesi Betania bisín lanie ca bi'iniha. Lee nna ulhidhatteba nee güetsaa unnabe aca len Tata Do Iyyabaaha ca bi'iniha.<sup>51</sup> Lagüiba due rinnabe aca len Tata Do Iyyabaaha ca bi'iniha nna beriesttebe beopie deyye iyyabaaha.<sup>52</sup> Lacabi nna, dequi de ulequixxencabi Benniha nna attulade re'o lecabí bequicabi deyyacabi Jerusalén.<sup>53</sup> Ttu ttu sába use'ecabi lhe'eli'a gue yotuha rulhacabi gue Tata Do Iyyabaaha, ribequixxencabi Ben-na lhe.

Amén.

# Ca tisa rixxi'a gue Jesús ben Juan lo sitsi-ni

## Benni anque tisaha beaque benni attiba ri'i

**1** Atti deobali cue yies lo yu-ni nna chila do Benni anque tisa-na.  
Benni anque tisaha nna len Tata Do Iyyabaahaba doe, la tisahaba Benniha anque Tata Do Iyyabaaha. <sup>2</sup>Labe Benniha doe len Tata Do Iyyabaaha atti deobali cue yies lo yu-ni. <sup>3</sup>Len Benni anque tisaha beni Tata Do Iyyabaaha iyánea nu se'e. Ttirca lä Benni anque tisaha nna ni ttu nu se'e bittu ucana. <sup>4</sup>Leni Benni anque tisa te elha nabani. Elha nabaniha nna anque xieni gue Tata Do Iyyabaaha ridí ca benni se'e yies lo yu-ni. <sup>5</sup>Xaniha nna rigu'e xieni atta anca chulha, chulhaha nna läga udána udheana lo xieniha.

<sup>6</sup>Tata Do Iyyabaaha udhelhe yies lo yu-ni ttu unbiyuu lábi Juan. <sup>7</sup>Bi'iniha bitabi utixxi'abi gue xieniha, qui iyánea benni tsia lecani Benni anca xieniha. <sup>8</sup>Läga Juan anca xieni, suna bitaba bi'iniha utixxi'abi gue Benni anca xieniha. <sup>9</sup>Benni gualíga anca xieni rudani lhi'u lhe'e lastoo iyánea benni chi dee yies lo yu-ni.

<sup>10</sup>Yies lo yu-niba chi doe. Len labe beni Tata Do Iyyabaaha yies lo yu-ni, ttiaca ca benni se'e yies lo yu-ni nna läga beon biacana Benniha. <sup>11</sup>Len benni guebe bisíe, lacana nna läga belabican Benniha. <sup>12</sup>Ttiaca iyába ca benni ca nu belabican Benniha lhe güia lecanie lhe, lee nna benie gapacana derechu acacana xi'ini Tata Do Iyyabaaha. <sup>13</sup>Be'eyucana ucacana xi'ini Tata Do Iyyabaaha, läga anía ancacana ulcana, niguaba ca tata nan guecani uca lecani lhe, ucacana xi'ini Tata Do Iyyabaaha cumu lee nna aníaba uca lee.

<sup>14</sup>La tisaba Benniha beaque benni, udoe len ri'i. De nu guate Benniha, besi'in Tata Do Iyyabaaha ri, rule'enie ri nu gualí lhe. Begüiari elha ra xxen le guee bete Tata Do Iyyabaaha de tturba Benniha anque xi'linie. <sup>15</sup>Juan utixxi'abi gue Benniha atti unnebi rábi:

—Gue Ben-ni nua rinnea atti ria: “Benni isía dequide neti nna Benniha anque Benni ra xxeniru lee atti neti, cumu primerla Benniha chi doe atti antisla dhoa.”

<sup>16</sup> De chi anque Benni te iyá guee nna iyábari chi uxíri lhe ridíri lhe adí elha tsee rute len ri'i. <sup>17</sup> Cumu ca ley gue Tata Do Iyyabaaha nna Moisésba betebi Benniha len ri'i. Ttiaca elha si'i le gue Tata Do Iyyabaaha lhe nu anca gualí lhe, Jesús Benni anque Cristu bele'e loe Ben-na len ri'i. <sup>18</sup> Tsa läganu chi bilenna Tata Do Iyyabaaha. Benni anque tturbe xi'inie, ancaguabe Dios, doe cuitta tata guee, Ben-na bele'e loe gaxasná anca Benniha len ri'i.

### Juan bi'ini rugadi inda, rixxi'abi gue Jesús

(Mt. 3:11-12; Mr. 1:7-8; Lc. 3:15-17)

<sup>19</sup> Aní becabí Juan gue ca bixxudi lhe gue ca benni datía Leví runcana sina gue yotu udhelha ca nu lo gue ca benni Israel. Cunní nna lhe'e yiesi Jerusalén li udáicana diacana güennaba tisa Juan rácan bi:

—Lu nna ¿núnna ancalu?

<sup>20</sup> Bi'iniha nna lägabi bedhea lebi, utixxi'ababi nu ancaba. Labi nna rábi cana:

—Läga neti nua Cristu Benni chi ga'anani Tata Do Iyyabaaha isía odile ri.

<sup>21</sup> Lacana nna bedennaba tisa dacabacana bi'iniha redeácan bi:

—¿Núla ancalu ganna? ¿Si luba nua profeta Elías?

Juan becabibi rábi:

—¡Dica!

Nianna, redeácan bi:

—¿Si luba nua profeta chi ga'ana isía aca?

Labi nna becabibi rábi:

—¡Dica!

<sup>22</sup> Lacana nna redeácan bi:

—¿Núla ancalu gannaxa? Qui anáchu quixxi'entu ca nu udhelhacana ri'itu. Lu nna ¿núla rálu ancalu?

<sup>23</sup> Labi nna rábi:

—Neti anca ttu benni requi ribesi'a lo yu bisi rinnea ria attiba rá profeta Isaías: “Lhatsiru gualodú lele attiba ttu neda relixxana qui chi se'e tseele esále Benni bananie ri-na gansi chi bisié.”

<sup>24</sup> Ca nu güia güennaba tisaha nna ancacana benni sela ca nu fariseo. <sup>25</sup> Lacana nna unnaba tisattebacan bi rácanbi:

—¿Biacala nna rugadilu benni inda gansi läba lu nua Cristuha, bittuguaba lu nua Elías lhe bittuguaba ancalu profeta lhe?

<sup>26</sup> Juan becabibi guecani rábi cana:

—Neti nna suntteba inda rugadia benni, ttiaca lagüii guebale requi ttu benni bittu anca bienle. <sup>27</sup> Benniha nua daa dequide neti. Neti nna nibala bi elha ralha idhasia lo guaracha guee.

<sup>28</sup> Unní uca lo yu lá Betania, nu re ttu ladu gue yoo Jordán atta rugadi Juan ca benni inda.

### **Jesús anque carne'e udhelha Tata Do Iyyabaaha**

<sup>29</sup> Betteyú sá nna biláni Juan Jesús dee atta dubiha, nianna rábi:

—¡Gualgüiarga! Ni benni anque carne'e udhelha Tata Do Iyyabaaha qui cue ca tulha gue ca benni se'e yies lo yu-ni. <sup>30</sup> Gue Ben-ni nua rixxi'atia le atti ria: “Benni daa dequide neti nna anque Benni ra xxeni ru lee atti neti. Cumu anque Benni udo primero atti neti.” <sup>31</sup> Ni neti bittu yua nuxa anque lania. Qui un biaba ca benni Israel-na nuxa anque, nuarca delha rugadia cana inda.

<sup>32</sup> Utixxi'aguuba Juan rábi:

—Bilátia Espíritu gue Tata Do Iyyabaaha dee guadie iyyabaaha attiba ttu becha bisié udoe iqui Benniha. <sup>33</sup> Neti nna läga chi yua nuxa anque lania, ttiaca Benni udhelhe neti ugadia benni inda Benniha re neti: “Benni ilenlu chadi Espíritu quia dhoe iquier, Benniha nua ugadie ca benni inda leni Espíritu quiah.” <sup>34</sup> Neti nna chi bilátie. Nuarcala rixxi'aya ria: Lee Benni xi'ini Tata Do Iyyabaaha.

### **Ca bi'in-ni uca ca benni primero bedheti nu bele'e Jesús**

<sup>35</sup> Betteyú sá nna níaba dedhú Juan leni chupa ca bi'ini rudheti ca tisa rule'ebiha. <sup>36</sup> Atti biláni Juan ute Jesús atta se'ecabiha nna ráttebabí:

—¡Gualgüiarga! Ni benni anque carne'e udhelha Tata Do Iyyabaaha dia-na.

<sup>37</sup> Irupaba ca bi'ini rudheti ca tisa rule'e Juan se'e lenbi nía, atti bienquinbi nu rá bi'iniha nna diattebacabi denocabi Benniha.

<sup>38</sup> Jesús bodequitteba loe, atti bilánie ca bi'iniha denocabi nna unnaba tisattebe ca bi'iniha re cabi:

—¿Bi reguilale?

Ca bi'iniha nna becabicabi rácabi:

—Rabí, ¿gala dolu? (Tisa rabí dienna innána maestru.)

<sup>39</sup> Jesús becabie re:

—Gualtá gualgüia.

Nianna, güiattebacabi guagüiacabi atta do Benniha attiba tu retin ttapa nua. Lacabi nna níaba use'ecabi len Benniha itúba ulhaha.

<sup>40</sup> Andrés betsi Simón bi'ini láguaba Pedro, bi'iniha nua ttu ca nu chupa bienini ca tisa rixxi'a Juan, dia deno Jesús.

<sup>41</sup> Andrés nna primerteba betsibi Simón guatilabi, nianna rábi bi'iniha:

—Guattí'abatu Mesías. (Mesías ancana tisa hebreo dienna innána Cristu len tisa griego.)

<sup>42</sup> Andrés nna uchettebabí Simón atta du Jesús. Atti biláni Jesús bi'iniha nna ráttebe:

—Lu nua lá Simóni xi'ini Juan. Nnanna nna Cefasba gatta lálu. (Cefas ancana tisa arameo dienna innána Pedro leni tisa griego.)

### **Jesús uxie Felipe leni Natanael**

<sup>43</sup> Betteyú sá nna bebequi le Jesús tsie daca lo yu gue Galilea. Nía nua guatti'e Felipe, atti ráttebe bi'iniha:

—Utá betteno neti.

<sup>44</sup> Felipe beaca lasbi yiesi Betsaida, attaguuba beaca lasi Andrés lenbi Pedro. <sup>45</sup> Felipe nna güiattebabí guatilabi Natanael, nianna rábi bi'iniha:

—Chi guatti'atu Jesús gue Nazaret xi'ini José. Gue Benni nua rixxi'a Moisés lo ca ley boca'anbi lenri, gue Benni guaba nua beni ca profeta lo sitsi lhe.

<sup>46</sup> Natanael nna rábi:

—¿Si güiría tsa ttu benni tsee lhe'esi Nazaret?

Felipe nna rábi:

—Utáruga begüia xa.

<sup>47</sup> Atti biláni Jesús Natanael chi dabi ribigabi gaxxaba atta due nna ráttebe:

—Benni da-ni nna gualígä ancana benni Israel, lana nna bittu run leni.

<sup>48</sup> Natanael nna rábi:

—¿Tti uca ben bialu neti?

Jesús nna becabie re:

—Atti antisla gaxi Felipe-na lu, neti nna chi bilátia lu atti dolu xan ya iguha.

<sup>49</sup> Natanael nna becabibi rábi Benniha:

—Maestro, lu ancalu xi'ini Tata Do Iyyabaaha, luguaba nua anca lu Benni rinnabia ri'itu ca benni Israel-ni lhe.

<sup>50</sup> Jesús becabie re:

—¿Si de rpea lu chi bilátia lu dolu xan yaga gue iguha nuarca ria lelu? Xxenirla anca nu chi ilenlu.

<sup>51</sup> Ráguba Jesús:

—Neti gualíbatia ria le, lebi'i nna ilenle iyyabaaha du yalie. Ilágabinle ca ingeli gue Tata Do Iyyabaaha chadique lhe eyopique lhe xequia, neti Benni unbiyuu daa iyyabaaha.

### Jesús güie atta betsá ná ca benni lhe'esi te láni Caná

**2** Beyonna ubisa nna uca ttu laní betsá ná ca benni lhe'esi lána Caná. Unnuha nna rena lo yu gue Galilea. Níaguaba du nan gue Jesús. <sup>2</sup> Uxiguacana Jesús tsie atta utsá nácaniha lenie ca bi'ini rudheti ca tisa rule'e. <sup>3</sup> Atti chi bebisi vinuha nna unnetteba nan gue Jesús rábi:

—Lärga birua vinu te gue ca unní.

<sup>4</sup> Jesús becabie re:

—Nana, ¿biaca neti la rálu aná? Läga chi bisía ura quia.

<sup>5</sup> Nan gue Benniha nna ráttebabí ca nu bese'e aca mandadu gue laníha:

—¡Gualuni iyába nu inná Ben-ni!

<sup>6</sup> Nía se'e xxupa re'e ancacana leni iyya, rita'a attiba ttu gayua litro inda lhe'e ttuttucana. Lhe'e ca unnuha nua riga'a ca benni Israel inda rixuuquinna qui reacacana nu nari lo Tata Do Iyyabaaha, aníaba labicana runcana. <sup>7</sup> Jesús re ca benni bese'e aca mandadu gue laníha:

—Gualodisá ca re'e-na inda.

Lacana nna bodisá ttittican ca nua inda. <sup>8</sup> Jesús redée cana:

—Nnanna nna gualcuea saro'o gualsagüe nu anca sola-na.

Lacana nna aníaba bencana. <sup>9</sup> Solaha nna bennixxittebana inda beaca vinuha, ttiaca ni lä yuna ga guaxxí ca unnuha vinuha. Suntterba ca benni bese'e aca mandadu gue laníha yucana, cumu laxacana uta'acana inda lhe'e ca re'eha. Larcala nna uxitteba solaha unbiyuu rutsá nániha. <sup>10</sup> Nianna rána unnuha:

—Iyába ca benni runi loesi laní-ni nna de'axa vinu anca tseeruha rudácana. Dequide liba chi belin ca nu dia laníha u'uyacana vinu,

lania liba rudáicana vinu bittu tte anca tseeha. Ttiaca lu nna nnanna liba chi rudábalu vinu tsee.

<sup>11</sup> Unníba primer milagru beni Jesús lhe'esi Caná nu re lo yu gue Galilea. Anía liba nna bele'e loe anque benni ra xxeni leni. Ca bi'ini rudheti ca tisa rule'e nna güia lecabí guee.

<sup>12</sup> Dequide unnuha nna diattebe lhe'esi Capernaum lenie nan gueha lhe ca betsie lhe ca bi'ini rudheti ca tisa rule'e lhe. Níaba use'equé ttu chupa ubisa.

### **Jesús beríale ca benni se'e güetto'o lhe'eli'a gue yotuha**

(Mt. 21:12-13; Mr. 11:15-18; Lc. 19:45-46)

<sup>13</sup> De chi daa ribiga laní gue ca benni Israel, nu te láni Pascua. Jesús nna diattebe lhe'e yiesi Jerusalén. <sup>14</sup> Lhe'eli'a gue yotuha guatti'e ca nu rutto'o u'una lhe carne'e lhe becha lhe níaguaba sia ca nu retsila belhi lhe. <sup>15</sup> Jesús ulu'u xicuattebe ttu tuu. Leni unnuha nna bebeattebe iyába ca unnuha lhe'eli'a gue yotuha lencana ca u'una guecaniha lhe ca carne'e guecaniha lhe. Ca nu retsila belhiha nna bedhittebe ca belhi guecaniha, atti berixxi lottebe ca mexa guecaniha lhe. <sup>16</sup> Ca nu rutto'o bechaha nna re cana:

—¡Gualebea ca unna ni! Bittu unle lisi tata quia yo'o raca i'iya lhe'eni.

<sup>17</sup> Ca bi'ini rudheti ca tisa rule'e Benniha nna bexxatteba lecabí nu rá lo ca tisa gue Tata Do Iyyabaaha: “Tata, de yatterba nu runia gue yo'o guelhi nna runna uyúa elha disa.”

<sup>18</sup> Ca nu anca nu lo gue ca benni Israel, se'e nía nna rácana:

—Bele'en ri'itu ttu nu uni ule'e lo dequi gualí te derechu guelu unlu aná.

<sup>19</sup> Jesús becabie re cana:

—Gualuttapa yotu-ni, neti nna lhe'e tsunna ubisaba nna elhidha na attu libe.

<sup>20</sup> Ca nu lo gue ca benni Israel nna rácana:

—Chua yu'u xxupa (46) ida bisá ca benni bedocabi yotu-ni, lu nna rálú dequi lhe'e tsunna ubisaba elhidhalu na attu libe.

<sup>21</sup> Ttiaca Jesús nna läga gue yotuha ga nua rinnee, gue cuerpu guebe Benniha rinnee. <sup>22</sup> Larcala nna dequide beacani Jesús beríe lhe'e baa atta yu'u ca nu yatti-na, ca bi'ini rudheti ca tisa rule'e nna

bexxatteba lecabí nu chi rá Benniha, lania nna güia lecabí nu rá Benniha lhe nu rá lo ca sitsi gue Tata Do Iyyabaaha lhe.

<sup>23</sup>Ttu requiru Jesú斯 lhe'e yiesi Jerusalén laní Pascua ixeru benni güia lecani Benniha de biláquinna ca milagru runie. <sup>24</sup>Ttiaca Jesú斯 läga ria lee guecani dequi gualíquinna cumu chiba yuxabe atti du lecani. <sup>25</sup>Lägabi reasanie nuxa quixxi'enne gaxasná du le ca benni, cumu lee nna chiba yuxabe gaxasná anca lhi'u lhe'e lastoo ca benni.

### Jesú斯 rinnee len Nicodemo

**3** Udo ttu benni ancana fariseo lána Nicodemo. Ancana ttu benni lo gue ca benni Israel. <sup>2</sup>Unnuha nna güiana ttu lo rela guannalhina Jesú斯, nianna rána Benniha:

—Maestro, ri'itu yutu nna Tata Do Iyyabaahaba udhelhe lu qui ule'enlu ri'itu, cumu ni ttu benni bittu aca gueni unna ca milagru runlu-na gansi bittuba du Tata Do Iyyabaaha lenna.

<sup>3</sup>Jesú斯 becabie re:

—Neti nna gualíbatia rpea lu, benni bittuba galina attu libe nna läga aca isela nua ca benni rinnabia Tata Do Iyyabaaha.

<sup>4</sup>Nicodemo nna ráne:

—¿Gasná un ttu benni chi anca yaxxu galna attu libe? ¿Si guacaba gue nua eta'ana lhe'e nan gueniha qui galna attu libe?

<sup>5</sup>Jesú斯 becabie re:

—Neti nna gualíbatia rpea lu, benni bittu galina attu libe leni inda nna leni Espíritu gue Tata Do Iyyabaaha nna läga aca isela nua ca benni rinnabia Tata Do Iyyabaaha. <sup>6</sup>Benni rali yies lo yu-ni nna xi'ini ca benni se'e yies lo yu-niba anca nua, benni anca xi'ini Tata Do Iyyabaaha nna Espíritu gue Bennihaba benie nua xi'inie. <sup>7</sup>Bittu aca guatenlu de biaca rpea lu: “Raca duelha galile attu libe.” <sup>8</sup>Be-na gatti laduba riríana, lu nna masquiba gua rieninlu tsi'ini, ttiaca läga yulu ga ladu dana lhe ga ladu diana lhe. Aná runi Espíritu gue Tata Do Iyyabaaha lhi'u lhe'e lastoo ca benni rali attu libe.

<sup>9</sup>Nicodemo nna becabina rána:

—¿Gasná aca nu rálha?

<sup>10</sup>Jesú斯 becabie re na:

—Lu ancalu maestro gue ca benni Israel-ni, ¿si bittuba ritedeenlu nu ria-ni? <sup>11</sup>Neti nna gualíbatia ria lu, ri'itu nna rinnebatu gue nu chi yutu, rixxi'abatu gue nu chi bilentu lhe ttiaca lebi'i nna läga ria lele gue nu rátu le. <sup>12</sup>Inqui gue nu anca gue yies lo yu-niba

rixxi'atia le nna bittu ria lele, ¿gasná tsia lele gue nu anca gue iyyabaaha gansi quixxi'atia le?

<sup>13</sup> 'Tsa läganu benni chi gopi iyyabaaha sunruba neti Benni unbiyuu daa iyyabaaha goadia bisíaya nii. <sup>14</sup> Attiba beni Moisés lo yu bisiha, ulhidhabi ttu yaga xua ttu belha ancana leni bronce loni, anáguaaba neti Benni unbiyuu daa iyyabaaha raca duelha ilhidhacana neti güetsaa, <sup>15</sup> qui anáchu nna iyába ca benni tsia lecani neti gatta elha nabani guecani ttu dia lii.

<sup>16</sup> 'Tata Do Iyyabaaha nna raca huisianie gue ca benni, denuala nna udhelhe yies lo yu-ni neti Xi'inie Benni tturba donie, qui anáchu nna iyába ca benni tsia lecani neti nna bittu tsia nitticana, sinuqui gatta elha nabani guecani ttu dia liiba iyyabaaha. <sup>17</sup> Cumu Tata Do Iyyabaaha nna läga udhelha Benniha neti Xi'inie-ni qui unia tsia nitti ca benni se'e yies lo yu-ni, udhelhabe neti qui odiláya cana.

<sup>18</sup> 'Benni ria leni neti Xi'ini Tata Do Iyyabaaha, läga tsia nitti nua, ttiaca nu bittu ria leniha nna dia nittiba nua, de bittu güia leni neti Benni nu ttu cuinarba anca Xi'ini Tata Do Iyyabaaha. <sup>19</sup> Chi dia nitticana cumu neti Benni anca xieniha nna chiba bita yies lo yu-ni, lacana nna de runcana nu lä anca tsee nuarca ucarlaquinna gue atta chulha attichula gue xieniha. <sup>20</sup> Iyába ca nu runi nu lä anca tsee bittu raca uyúcana xieniha, läga ribigacana atta ru'u xieniha qui bittu tsanni lo nu runcana nianna itisacana. <sup>21</sup> Ttiaca benni runi nu anca gualí rá Tata Do Iyyabaaha, gua ribigaba ca nua atta yu'u xieniha qui ilá lacana nna runbacana nu radi le Tata Do Iyyabaaha.

### Juan bi'ini rugadi inda rixxi'abi gue Jesús

<sup>22</sup> Dequide lania nna güiatteba Jesús lenie ca bi'ini rudheti ca tisa rule'e lo yu gue Judea, níaba bisée lenie ca bi'iniha, rugadi guabe benni inda lhe. <sup>23</sup> Anáguaaba Juan rugadiguabi benni inda daca lo yu te láni Enón nu re gaxxaba lo yu nu te láni Salim, cumu nía yu'uxxatta inda. Nía ria ca benni radicana inda. <sup>24</sup> Juan läga chi te bi'iniha lisiyya lania. <sup>25</sup> Ttulhe ca benni rudheti ca tisa rule'e Juan bitilha tisacabi leni adí ca benni Israel lo ni'a gue bi nua rigúarna nu tsiga ancari lo Tata Do Iyyabaaha qui reacari benni nari loe.

<sup>26</sup> Ca unnuha nna güiattebacana guayúcana Juan rácan bi:

—Maestro, benni udú lenlu daca attu ladu gue ro'o yoo Jordán, nu utixxi'aguabalu gueniha, nnanna nna rugadiguabana benni inda. Iyába benni diacana len lana.

<sup>27</sup> Juan becabibi rábi:

—Ni ttu benni bittu aca gueni unna ttu bixa gansi läba Tata do iyyabaaha aca lanie na qui unna nua. <sup>28</sup> Lebi'i nna gua rienbinle ria, läga neti nua Cristu, suntterba anca ttu benni neru udhelha Tata Do Iyyabaaha rixxi'a dequi chi daa Cristu. <sup>29</sup> Attiba ttu atta rutsá nácani, unbiyuu utsá nániha liba nua dhína nuila. Unbiyuu raca ruyú tsee loesni leni unbiyuu utsá nániha du gaxxaba nía nna re'o juisia leni rieninna rinne nua. Denuala nna neti nna re'o juisia lasia cumu neti anca nu ruyú tsee loesni leni Jesús. <sup>30</sup> Larcala nna raca duelha e'eyu Ben-na aque Benni ra xxeni leni, neti nna eyadi ga lasia eyaca nu bittu ra xxeni leni.

<sup>31</sup> 'Ben-na dee iyyabaaha. Lee anque benni ra xxeni leni gue delo iyába. Benni anca gue yies lo yu-ni nna suntteba gue yies lo yu-ni anca nua, nu anca gue yies lo yu-niba rinnena. Ttiaca Benni daa iyyabaa nna Benniha anque Benni ra xxeni leni gue delo iyába.

<sup>32</sup> Gue nu bilábanie lhe nu bienbanie lhe rixxi'e, ttiaca läganu ria leni guee. <sup>33</sup> Ca benni ria lecani gue nu rá Ben-na nna leni unnuha rule'e locana dequi gualíba nu rá Tata Do Iyyabaaha. <sup>34</sup> Ben-na anque Benni udhelha Tata Do Iyyabaaha, ca tisa gue Bennihaba rinnee, cumu Tata Do Iyyabaaha nna itú iqui itú lee bete Espíritu guee len Ben-na. <sup>35</sup> Tata Do Iyyabaaha nna raca juisien Benniha gue Xi'inie-na, larcala nna iyába nu tee chi boca'ane las ná Ben-na. <sup>36</sup> Nu ria leni gue Xi'inie-na gua teba elha nabani ttu dia lii gueni, nu bittuba tsia leni Ben-na nna lägabi elha nabani gue nua te ttu dia lii. Unnuha nna elha disa la yu'ubia ute Tata Do Iyyabaahaba ralha nua dhína.

### Jesús rinnee len ttu nuila beaca lasni lo yu te láni Samaria

**4** Ca benni fariseo chi binacana dequi ixeru benni chi denoo Jesú, ixerguaba benni rugadie inda atti Juan lhe. <sup>2</sup> (Masquiba läga Jesús ga rugadie ca nua inda, ca bi'ini rudheti ca tisa rule'e Benniha liba rugadi inda.) <sup>3</sup> Atti bine nua nna bedáttebe lo yu gue Judea deyye lo yu gue Galilea attu libe.

<sup>4</sup> Atti deyya Benniha nna labíaba bete lo yu gue Samaria.

<sup>5</sup> Denuala nna bisíne lhe'e ttu lhe'esi re lo yu gue Samaria, unnuha nua te láni Sicar rena gaxxaba ro'o yu gue Jacob nu begüeebi xi'inbi José. <sup>6</sup> Nía nua re pozo inda nu te láni pozo gue Jacob. Tu deoba tsil'nuha liba bisína Jesús nía. Lee nna biachuttebe ure

ro'o pozoha bedí lee, cumu chi ranie de yu'e neda.<sup>7</sup> Nía bisína ttu nuila gue Samaria ro'o pozoha diana güelhequi inda. Jesús ráttebe nulaha:

—Bete saro'o inda i'iya.

<sup>8</sup> Ca bi'ini rudheti ca tisa rule'e Jesús lhe'esihaba diacabi güeyo'o nu gocabi. <sup>9</sup> Nuila gue Samariaha nna becabina rána Benniha:

—Lu nna benni Israelba lu, ¿gasná rinnabalu inda len neti? Gua yubalu nna benni Samariaba neti.

(Anía rá nulaha, cumu ca benni Israel läga raca uyú loescani leni ca benni Samaria.)<sup>10</sup> Jesús becabie gueni re na:

—Ganruba ttirca yulu gue nu tsee rute Tata Do Iyyabaaha, gue nú benni unní rinnabe lu inda lhe lu nna innábalu lenie, lee nna utee inda rute elha nabani i'iyalu.

<sup>11</sup> Nulaha nna ráne:

—Tata, inqui lägabi denlu bixa leni cuealu inda nna pozo-ni nna axta lhi'u dionna. ¿Gala saxxílu inda rálus runna elha nabani-na ganna?<sup>12</sup> ¿Si xxenrula rá lelu atti benniola gueri Jacob? Labi boca'anbi pozo-ni len ri'itu. Lhe'onni u'uya bi inda, ca xi'inbiha lhe ca nimala guebiha lhe.

<sup>13</sup> Jesús becabie re na:

—Iyába ca benni ri'iya inda-ni nna rebisi dacaba ca nua attu libe.<sup>14</sup> Ttiaca benni i'iya inda utea-ni nna tsa lärgaga ebis nua attu libe. Cumu inda utea i'iyanaha aque lhi'u lhe'eni attiba ttu ro'o dina riría inda. Benniha nna utee elha nabani gatta ttu dia lii gueni.

<sup>15</sup> Nulaha nna becabina ráne:

—Xa Tata, benna loesi indaha i'iya qui bitturu ebisia attu libe, lä itarguuba ni ubea inda lhe.

<sup>16</sup> Jesús re na:

—Beyya, gualisa unbiyuu gueluha nna utá lenna nii.

<sup>17</sup> Nulaha nna becabina ráne:

—Läganu unbiyuu qui neti te.

Jesús re na:

—Gualíbinlu rálus dequi läganu unbiyuu guelu do.<sup>18</sup> Cumu gayu unbiyuu chi udo lenlu. Nu do len lu nnanna nna läga unbiyuu guelu unná, larca gualíba nu rálha.

<sup>19</sup> Nulaha nna ráne:

—Neti nna racatia lu ancalu ttu profeta.<sup>20</sup> Ca benniola guetu use'eha nna iqui i'iya-niba bitacabi ulequixxencabi Tata Do

Iyyabaaha. Lebi'i nu Israel nna rále dequi lhe'e yiesi Jerusalén anca atta chi ga'ana cuequi xxeni ca benni Tata Do Iyyabaaha.

<sup>21</sup> Jesús becabie re nuilaha:

—Güia lelu nu ria-ni. Chi isía sá atti ni iqui i'iya-ni lhe ni Jerusalén-na lhe lä udú xibile qui cuequixxenle Tata Do Iyyabaaha. <sup>22</sup> Lebi'i nna läga yule nuxa rudú xibile loni, ri'itu nna gua yubatu nuxa anca Benni cuequixxentu lee. Cumu lhe'e yiesi gue ca benni Israel, iría Benni odile ca benni qui bittu tsia nitticana. <sup>23</sup> Ttiaca chi isía uraha, nnannargua nua nna chi bisía ura atti cuequi xen ca benni gualígaquinna cuequi xencana Tata Do Iyyabaaha attiba ga'ana uncana lhe attiba raca le Espíritu guee lhe. Lee nna rile ca loesi lacana qui cuequixxencana itú iqui itú lecani lee. <sup>24</sup> Tata Do Iyyabaaha anque Espíritu, larcala nna ca benni ribequixxencane nna raca duelha uncan nua attiba ga'ana uncana, attiba raca le Espíritu guee lhe.

<sup>25</sup> Nuilaha nna ráne:

—Neti yua nna isía Mesías (benni lá Cristu). Gansi chi bisía Benniha nna quixxi'anie ri'itu iyába.

<sup>26</sup> Jesús becabie re na:

—Neti nua Benni rálha. Neti unní rinnea len lu.

<sup>27</sup> Unnuhaba raca nna atti besin ca bi'ini rudheti ca tisa rule'e Jesús, lacabi nna bebanbaquinbi bilencabi Benniha rinnee len ttu nuila, ttiaca ni ttucabi bittu beaxiquinbi gácabí Jesús: “¿Biunna raca leonna? O ¿Bi gueonna rinne lenlu nuila-na?” <sup>28</sup> Nuilaha nna bedú bixxina re'e gueniha nía atti deyyatttebana lhe'esiha guagunana ca benni, rán cana:

<sup>29</sup> —Gualtárqa gualgüia. Ni ttu unbiyuu du-ni chi utixxi'enna neti iyába nu chi benia. ¿Si läba unníba nua Cristu Benni chi ga'anani Tata Do Iyyabaaha odile ca benni?

<sup>30</sup> Laniala nna biría ca benni se'e lhe'esiha diacana atta du Jesús.

<sup>31</sup> Laca ca bi'ini rudheti ca tisa rule'e nna rácabi Benniha:

—Maestro, uto chi ladiba saro'o.

<sup>32</sup> Beniha nna re ca bi'iniha:

—Neti nna te ttu elha go quia roa nu bittu anca bienle.

<sup>33</sup> Ca bi'ini rudheti ca tisa rule'e Jesús, udulottebacabi rá loescabi:

—¿Si nuxaba chi betteca'ana nu uto Benni aca?

<sup>34</sup> Jesús re ca bi'iniha:

—Elha go quia nna ancana unia nu raca le Benni udhelhe neti, ulhuxa sina guee-ni lhe. <sup>35</sup> Lebi'i nna gaxa gua rábale: “Sna reasaba a ttapa beo isía güitsela.” Neti nna ria le: Gualodequi lole gualugüia ca xua xuxtila se'e-na, chiba rigatsicana qui erúcana. <sup>36</sup> Benni ribeni güitsela nna ridíba nua lhiaxani. Lena bani redínaha nna ancana ca benni chi uxí elha nabani gatta ttu dia lii guecani, qui anáchu nna benni ruelha xua lhe benni rechú xua lhe ttulapaba edaca lecani. <sup>37</sup> Ni raxxína tisa nu rá: “Yaba le benni bedelha xua nna yaba le benni bechú xua.” <sup>38</sup> Neti nna ridhelha le echúle xua bedelha attu benni subi nu bittu lebi'i guatele bedelhale. Nnanna nna lebi'iba ribe xenle gue sina guecani.

<sup>39</sup> Ixeru ca benni se'e lhe'esi re lo yu gue Samaria güia lecani Jesús atti rá nUILaha cana: “Ben-na chi utixxi'enie neti iyába nu chi benia.” <sup>40</sup> Larcala nna atti bisína ca benni gue Samaria atta du Jesús, unnabattecacana lo Benniha eya'ane nía. Lee nna níaba udoe len lacana chupa ubisa. <sup>41</sup> Ixeru ca benni güia lecanie atti bienquinna ca tisa unne cuinaga Benniha. <sup>42</sup> Nianna, rácana nUILaha:

—Nnanna nna läga sunru de utixi'enlu ri'itu nu ráluba nna ria letu. Ria letu nnanna cumu ri'igatu chi bienintu nu rá Ben-na. De unnuha nna chi yutu gualíba Ben-niba nua anque Benni odile ca benni se'e yies lo yu-ni.

### Jesús beonie xi'in biyuu ttu nu ra xxeni leni runi sina gue nu rinnabia

(Mt. 8:5-13; Lc. 7:1-10)

<sup>43</sup> Dequide ute chupa ubisa nna, beríatteba Jesús lhe'e yiesi Samaria die daca lo yu gue Galilea. <sup>44</sup> Cuinaba lee nna re: “Ttu benni rinne ca tisa rute Tata Do Iyyabaaha, läga ria lecani bi'iniha lo yu guebi.” <sup>45</sup> Atti bisíne Galilea nna tseeba beni ca benni se'e nía lenie, de chi biláquinna iyába nu beni Benniha lhe'e yiesi Jerusalén atti raca laní Pascua, cumu lacana nna güia guabacana laní.

<sup>46</sup> Jesús besin dacabe lhe'esi Caná nu re lo yu gue Galilea atta beonie indaha vinu. Nía do ttu nu lo runi sina gue nu rinnabiahia. Unnuha nna do ttu xi'inbiyuu-ni lhe'esi Capernaum ranina.

<sup>47</sup> Atti bieninna chi dedaa Jesús lo yu gue Judea qui esíe Galilea,

güiattebana guannabana lo Benniha tsie lhe'e yo'o gueniha qui eyonie xi'inniha, cumu chi ratti nua tena ranina.<sup>48</sup> Laniala rá Jesús nua:

—Lebi'i nna gansi bittuba ilenle aca ttu milagru nu unna eban lele nna läga tsia lele.

<sup>49</sup> Ttiaca nu lo runi sina gue nu rinnabiahha nna ráne:

—Benni bananie neti, utiaxxi tsiari qui antisla gatti xi'iniha.

<sup>50</sup> Jesús ráttebe na.

—Beyya lhe'e yo'o gueluha, xi'inluha nna läga gatti nua.

Unbiyuuha nna güiaba leni nu rá Jesús, laniala nna deyyana.

<sup>51</sup> Atti chi deyu'una neda deyyana esínna lhe'e yo'o gueniha nna ca nu riben sina gueniha nna güiattebacana gualedacan na rácan na:

—¡Beacaba xi'inluha!

<sup>52</sup> Lana nna unnaba tisattebana ca nua rán cana:

—¿Bi ura beaca untoha?

Ca unnuha nna rácana:

—Nnaya attiba tu retin ttu bería xilhá cuerpu gueni.

<sup>53</sup> Tata gue untoha nna guadútteba leni, la uraba nua rá Jesús na: “Läga gatti xi'inluha.” Laniala nna güia leni Jesús lenna iyába ca benni se'e lhe'e lisniha.

<sup>54</sup> Unní berupa milagru runi Jesús dequide bedee lo yu gue Judea besíe lo yu gue Galilea.

### Jesús reonie ttu unbiyuu daa yatti ni'a náni

**5** Dequide lania nna bisía ttu laní gue ca benni Israel. Jesús diattebe Jerusalén.<sup>2</sup> Lhe'e yiesi Jerusalén gaxxaba atta do ro'o puerta atta rita'a ca carne'e, nía re ttu pozo inda te láni Betesda leni tisa hebreo. Sa bi'aba pozoha nna daa corredori sia gayu ro'o puerta xxeni gueni.<sup>3</sup> Lhe'e corredoriha te ixeru ca benni rani, nu xua loni lhe nu xi lhe nu daa yatti ni'a náni lhe ribedacana ita lo indaha.<sup>4</sup> Cumu ttu ingeli daa iyyabaaha nna guadú guadúba riyinnibi lhe'e pozoha ruttábi lo indaha. Benni riyúbani rita'axxi lhe'e indaha dequide rebe si loe nna, reríatteba bixaba isagüe yu'u cuerpu gueni.<sup>5</sup> Nía sela ttu unbiyuu chi uca rerua yu'u xxunu ida (38) ranina.<sup>6</sup> Atti biláni Jesús nua tena nía, bine dequi isá chi uca ranina lhe lee nna ráttebe na:

—¿Si gua rdacalu eyacalu?

<sup>7</sup> Unbiyuu raniha nna becabina ráne:

—Benni bananie neti, tsa läganu teti neti qui uga'ana neti lhe'e pozono gansi chi ritá lo inda-na. Cadaba runia ga'aya nna attu nu subila riubinna rita'ana.

<sup>8</sup> Jesús re na:

—Guadha nna bodaxxutte nu rattalu loenna udátte.

<sup>9</sup> La uratteba nna beaca unbiyuuhá, atti bodaxxuttebana nu uttáná loniha, udána requina nía. Ttiaca la sá-na ancana sá redí le ca benni Israel. <sup>10</sup> Ca nu lo gue ca benni Israel nna rácana unbiyuu beacaha:

—Nasá anca sá redí leri. Bittu dica eyojalu nu uttalú loen-na.

<sup>11</sup> Unbiyuuhá nna becabina rána:

—Cuinaba Benni beonie netiha re neti: “Ulhidha nu uttalú loen-na nna udá tte.”

<sup>12</sup> Ca unnuha nna ráttebacan na:

—¿Nú nua rán lu: “Ulhidha nu uttalú loen-na nna udátte”?

<sup>13</sup> Unbiyuu beacaha nna ni lä yuna nú benni nua re na anía, cumu Jesús nucala benitti lo benniha lagüi gue ca benni se'e nía.

<sup>14</sup> Dequila nna guatti'a Jesús nua lhe'eli'a gue yotuha, nianna ráttebe na:

—Begüiarga, urgabi chi beacalu. Bittu eyequilu edeonlu ttu nu lä anca tsee, qui lä satelu attu nu lä anca tsee xxenru.

<sup>15</sup> Unbiyuuhá nna güiattebana guattixxi'enna ca nu lo gue ca benni Israel dequi Jesúsba Benniha beonie na.

### **Jesús rixxi'e, lee anque Xi'ini Tata Do Iyyabaaha**

<sup>16</sup> Lo ni'a gue unnuha nna besía le ca nu lo gue ca benni Israel Jesús de runie nua sá redí letu. <sup>17</sup> Ttiaca Jesús becabie guecani re cana:

—Tata quia nna satíaba riben Benniha sina, axtaba nasá ribenie. Denuala nna neti nna renguuba.

<sup>18</sup> Lo ni'a gue unnuha nna ca nu lo gue ca benni Israel nna adíla bedona lecani utticane. Cumu läga sunru bittu rudoе tisa edí lee sá redí le ca nu Israel, ráguabe anque ttuba leni Tata Do Iyyabaaha de re raca tata guee Benniha.

<sup>19</sup> Nianna becabí Jesús re cana:

—Neti Xi'ini Tata Do Iyyabaaha qualíbatia ria le: Läga aca quia unia ttu bixa sunteba neti. Nu rugüiaba runi Tataha nna

runia. Iyába nu runi Tataha nna runia.<sup>20</sup> Cumu Tataha nna racanie quia neti Xi'inie-ni, denuala nna rule'enie neti iyába nu runie. Nu xxenirla atti ca unní chi ule'e len neti, nu unna ebanin lele gansi chi bilenle na.<sup>21</sup> Cumu attiba Tataha runie reacani ca nu yatti-na rote elha nabani guecani, aníaguaba neti Xi'inie-ni rutea elha nabani gue ca benni raca lasia utea elha nabani guecani.<sup>22</sup> Tataha nna läganu benni runie elha uxtisi gueni, las nába, neti Xi'inie-ni, chi boca'ane iyá qui unia elha uxtisi.<sup>23</sup> Anáchu nna iyá ca benni rapacana Tataha respeto nna gapaguabacana neti Xi'inie-ni respeto. Nu bittuba rapana neti respeto nna bittuguaba rapa nua respeto Tata quia do iyyabaaha. Lee udhelhe neti benni anca Xi'inie-ni.

<sup>24</sup> Neti nna gualíbatia ria, benni rudo nagani gue nu ria nna riaguaba leni benni udhelhe neti, unnuha nna guateba elha nabani gueni ttu dia lii, läga tsia nittina. Benni yattiba uca nua lo Tata Do Iyyabaaha, nnanna nna yu'u elha nabani gueni lo Ben-na.<sup>25</sup> Neti nna gualíbatia ria le chi daa isía ura ria-ni, nnanna nna uraba Benni chi bisía, atti iyienini ca benni anca attiba nu yatti lo Tata Do Iyyabaaha tsi'a, neti Xi'inie-ni, ca nu udo nagacani quia nna guaca banbacana.<sup>26</sup> Cumu attiba Tata quia do iyyabaaha lee rute elha nabani, aníaguaba neti Xi'inie-ni benguabe aca benni rute elha nabani.<sup>27</sup> Chiguaba boca'ane las náya qui unia elha uxtisi de anca Benni unbiyuu daa iyyabaaha.<sup>28</sup> Bittu ebaninle gue nu ria-ni, cumu chi isía ura atti iyienini iyába ca nu yatti yu'u lhe'e ca baa-na tsi'a.<sup>29</sup> Ca nu beni nu anca lhatsiru nna eyadhadacana qui aca bancana ttu dia lii iyyabaaha, ca nu beni nu lä anca tsee nna eyadhadacana qui tsiacana atta lexúaha.

### **Jesús rixxi'e gaxasiná tte daani ca benni nuxa anque**

<sup>30</sup> Neti nna läga aca quia unia ttu bixa suntteba neti. Runba elha uxtisi attiba rába Tata quia neti. Elha uxtisi runia-ni nna ancana ttu elha uxtisi lhixxa, cumu neti läga reguila unia nu ru'u lasia, runba nu ru'u le benni udhelhe neti.<sup>31</sup> Cumu gansi la netiba rixxi'aya gue nuxa anca nna nu rixxi'aya nna lägabi daca nua.<sup>32</sup> Attu benni subi liba rixxi'e nu anca quia, neti nna yua nna nu re nna ancana nu gualí.<sup>33</sup> Juan utixxi'ababi nu anca gualí leni ca nu udhelhale güüia güennaba tisaha.<sup>34</sup> Neti lägabi reasatia nuxa benni quixxi'ana quia, suna rorexxaba lele gue nu rá Juan qui lhále, bittu tsia nittle.<sup>35</sup> Juan ancabi attiba ttu gui ralhana rigu'una xieni. Lebi'i nna

ttu sattirba bebe itta lele de bieninle nu rábi.<sup>36</sup> Ttiaca te attu nu rixxi'arna gue nuxa anca atti nu utixxi'a Juan, delába ca elha ban lasi runia-ni, cumu laba Tata quia do iyyabaaha rute ca ben-na len neti. La ca ben-naba rixxi'aque dequi gualí lee udhelhe neti.

<sup>37</sup> Anáguba Tata quia Benni udhelhe neti, rixxi'aguabe nuxa anca, masquiba lebi'i nna bittu chi bieninle tsil'e, niguaba lä chi bilenle lhe.<sup>38</sup> Bittuguaba yu'u ca tisa gue Ben-na lhe'e lastoole lhe cumu de bittu ria lele neti Benni udhelha Benna.<sup>39</sup> Lebi'i nna tsitsiba rudhetile ca tisa dia lo ca sitsi gue Tata Do Iyyabaaha, cumu ruxxen lele satti'ale lo ca benna elha nabani gatta ttu dia liiba guele. Gua liba ca ben-na unná rixxi'aque quia,<sup>40</sup> ttiaca lebi'i nna bittu raca lele itale len neti qui gatta elha nabani guele ttu dia lii.

<sup>41</sup> 'Neti nna lägabi reasatia nuxa innána dequi neti anca Benni ra xxeni leni,<sup>42</sup> cumu chiba anca biatia le, gua yuxeba lebi'i nna läga raquinle gue Tata Do Iyyabaaha.<sup>43</sup> Neti daya cuenta gue Tata quia, lebi'i nna bittu raca uyúle neti. Lala ttirca attu nuxa dana cuenta gue la labana nna unnuha liba raca ruyúle.<sup>44</sup> Gaga nua tsia lele quia, cumu la lebi'iba rá loesle dequi ancale nu ra xxeni leni, läga runle qui Tata Do Iyyabaaha Benni tturbe do anque Dios innee ancale nu ra xxeni leni.<sup>45</sup> Bittu aquinle dequi netiba udienni loa le lo Tata quia do iyyabaaha, Moisés bi'ini xen lele gue nu unnebiha liba udienni lobi le.<sup>46</sup> Ttirca ria lele gue nu unne Moisés, tsiaguaba lele quia, cumu quionna rixxi'a Moisés lo ca sitsi-na.<sup>47</sup> Ttiaca gansi bittuba ria lele gue nu rá lo ca sitsi benbi-na, ¿gasná tsia lele gue nu rpea le-ni?

### Jesús betee nu uto guatela gayu mil ca benni

(Mt. 14:13-21; Mr. 6:30-44; Lc. 9:10-17)

**6** Dequide lania nna diatteba Jesús daca attu ladu gue ro'o indattoo gue Galilea, nu teeguaba láni indattoo gue Tiberias.<sup>2</sup> Ixeru ca benni denocane cumu chi biláquinna ixe ca milagru runie reonie ca benni rani.<sup>3</sup> Jesús gopittebe lo ttu lhilhi. Níaba udoe len ca bi'ini rudheti ca tisa rule'e.<sup>4</sup> La lania guaba nua chi daa ribiga laní gue ca benni Israel, lá Pascua.<sup>5</sup> Atti biláni Jesús de ya de re benni denocane nna ráttebe Felipe:

—¿Gala sayo'ori ttaxtila qui go iyá ca benni deno-ni?

<sup>6</sup> Aníaba re Felipe qui ilánie bittuca inná bi'iniha, cumu lee nna chiba yue bixa unie. <sup>7</sup> Felipe nna becabibi rábi:

—Gaxa niba belhiu gue chupa gayua ubisa sina lä aca ni qui iyo'o ttaxtila go ttutu ca unná sa saro'o.

<sup>8</sup> Attu bi'ini rudheti ca tisa rule'e Jesús lá Andrés, betsi Simón bi'ini láguaba Pedro, ráttebabí Benniha:

<sup>9</sup> —Ni ttu uncuiti du-ni denna gayu ttaxtila gue cebada, a chupa belha nna, ttiaca ¿gani unná go iyá ca benni se'e-ni?

<sup>10</sup> Jesús ráttebe:

—Gualgási iyácea ca benni se'e-na ebíacana.

Nianna, bebíattebacana lo ixxiha cumu attulade ixxi anca nía. Attiba tu gayu mil suntterba ca benni unbiyuu se'e len ca benni bebíaha. <sup>11</sup> Jesús bedaxxuttebe ca ttaxtilaha. Dequide betee xquixaru leni Tata Do Iyyabaaha nna utidhittebe benniha gue iyába ca benni se'e nía. Aníaguaba benie len ca belhaha. Betebe nu uto iyárecha ca benni se'e nía bedaa belbaquinna. <sup>12</sup> Dequide chi belin ca benni nna rátteba Jesús ca bi'ini rudheti ca tisa rule'e:

—Gualottupa iyárecha ca pedazu bexxa-na, qui tsa bittubi tsia latti.

<sup>13</sup> Ri'itu nna bottupattebatu benni bexxaha. Tsi'inu sumi bisá ca pedazu bexxa gue gayu ttaxtila gue cebadaha. <sup>14</sup> Atti biláni ca benni milagru beni Jesús, ráttebacana:

—Gualíba Benniba nua profeta chi ga'ana isía yies lo yu-ni.

<sup>15</sup> Utedaabani Jesús rdaca ca nua eche cane la fuerzaba qui aque nu rinnabia guecani nna, dedhiattebe ttube attu libe axta lo lhilhiha.

### Jesús ridee die lo indattoo

(Mt. 14:22-27; Mr. 6:45-52)

<sup>16</sup> Atti chi uca ela nna beaditteba ca bi'ini rudheti ca tisa rule'e Jesús, ro'o indattooha, <sup>17</sup> gopittebacabi lo ttu barco qui elhácabi lo indattooha esíncabi lhe'esi Capernaum. Chiba uca ela nua nna Jesús läganue chi besina len ca bi'iniha. <sup>18</sup> Indattooha nna chi udulí lo nua de raca ttu be idí. <sup>19</sup> Dequide chi bedácabi attiba tu gayu o xxupa kilómetro lo indattooha nna, biláquinbi Jesús ridee lo indaha dedee rebigue cu'e barcoha, lacabi nna usilhabaquinbi. <sup>20</sup> Lee nna unnettebe re ca bi'iniha:

—Neti bunni. ¡Bittu gasinle!

<sup>21</sup> Lacabi nna re'o juisia lecabí bolhopicabi Benniha lo barcoha. Barcoha nna besintteguá nua ro'o yu atta diacabiha.

### **Jesús anque ttaxtila rute elha nabani ttu dia lii**

<sup>22</sup> Betteyú sá nna ca benni sna se'eba ttu ladu gue indattooha nna utedaabaaquinna gopi ca bi'ini rudheti ca tisa rule'e Jesús lo barco nuttu iqui iyya xuaru du nía diacabi. Jesús läganue gopi lhe'e nua. <sup>23</sup> La ságuuba nua besina ca barco dedaa daca lhe'esi Tiberias gaxxaba atta uto ca benni ttaxtila dequide bete Benni bananie ri-na xquixaru leni Tata Do Iyyabaaha. <sup>24</sup> Atti biláni ca benni se'e nía nuttu Jesús du nía, niguaba ca bi'ini rudheti ca tisa rule'e lhe, gopittebacana lo ca barcoha diacana satilacana Benniha daca Capernaum.

<sup>25</sup> Atti guattí'acana Jesús attu ladu gue indattooha nna, unnaba tisattebacane rácane:

—Maestro, ¿núca bisíalu nii?

<sup>26</sup> Jesús becabie guecani re cana:

—Neti nna gualíbatia ria le, lebi'i reguilabale neti de betea ttaxtila utole axta qui belinle, läga reguilale neti de begüiale ca milagru runia. <sup>27</sup> Bittu udoxxatta lele quilale elha go nu bittu ruchía isá yies lo yu-ni. Nu unlale nna gualuni duelha gualeguila elha go nu ute elha nabani ttu dia lii guele. Elha go-ni nua utea len lebi'i, neti Benni unbiyuu daa iyyabaaha. Denua nna Tata quia do iyyabaaha chi bodúe neti.

<sup>28</sup> Lacana nna rácane:

—¿Galasná untu qui aca nu raca le Tata Do Iyyabaaha aca?

<sup>29</sup> Jesús becabie re cana:

—Tsia lele neti Benni udhelhe ni. Unní raca le Tata Do Iyyabaaha unle.

<sup>30</sup> Lacana nna unnaba tisattebacana rácana:

—¿Bila milagru ule'enlu ri'itu qui ilentu nna tsia letu lu? ¿Bi raca guelu runlu? <sup>31</sup> Ca benniola guetu use'e atti nía nna utocana nu te láni maná udhelha Tata Do Iyyabaaha lo yu bisi atta use'ecanaha, attiba rá lo ca sitsi guee-na: “Ttaxtila daa iyyabaaha bete Tata Do Iyyabaaha utocana.”

<sup>32</sup> Jesús becabie re cana:

—Neti nna gualíbatia ria le, läga Moisés nua betebi ttaxtila daa iyyabaaha len ca nua, Tata quiaba bete nua, nnanna nna rute nu

gualíga anca ttaxtila daa iyyabaaha.<sup>33</sup> Cumu netiba nua goadia iyyabaaha anca ttaxtila gue Tata Do Iyyabaaha rutea elha nabani gue ca benni se'e yies lo yu-ni.

<sup>34</sup> Nianna rácane:

—Tata, satíaba bete loesi ttaxtila-na gotu.

<sup>35</sup> Jesús re cana:

—Neti anca ttaxtila rute elha nabani ttu dia lii. Benni itana len neti nna tsa lärgabi ttun nua, nu tsia leni neti nna tsa lärgabi ebis nua.<sup>36</sup> Ttiaca attiba chi rpea le, masquiba chi bilenle neti nna tsa läga ria lele quia.<sup>37</sup> Iyába ca benni rute tata quia len neti nna guadába ca nua len neti. Ca benni daa len neti nna läga odeckua ca nua.<sup>38</sup> Cumu neti nna läga guadía iyyabaaha qui unia nu raca lasia. Neti nna delha unia nu raca le Tata quia.<sup>39</sup> Unní anca nu raca le Tata quia Benni udhelhe neti unia, bittu uguelha tsia nitti ni ttu ca benni utee len neti. Nu unla nna unia eyacaquinna attu libe gansi chi bisía sá lhuxa.<sup>40</sup> Nu ru'u le Tata quia nna ancana, iyába ca benni odeckui locani ugiüiacana neti Xi'inie-ni, tsia lecani neti lhe ca unnuha gatta elha nabani guecani ttu dia lii, neti nna unia eyacaquinna attu libe gansi chi bisía sá lhuxa.

<sup>41</sup> Lo ni'a gue nua nna udulo ca benni Israel unnecana gue Jesús, de rá Benniha: “Neti anca ttaxtila daa iyyabaaha.”

<sup>42</sup> Rágubacana:

—¿Lä Jesús xi'ini José bunni nna? Ri'i nna guanca biabinri tata gueniha lhe nan gueniha lhe. ¿Biacala rá unní dequi dana iyyabaaha ganna?

<sup>43</sup> Jesús becabie re:

—Bitturu innele gue nu chi ria-ni.<sup>44</sup> Ni ttu benni lä isíana anátteba len neti gan läba Tata quia Benni udhelhe neti unie itana. Neti nna unia eyaquinna attu libe gansi chi bisía sá lhuxa.<sup>45</sup> Lo ca sitsi boca'a ca profeta nna rá: “Tata Do Iyyabaaha ule'enie iyába ca benni.” Larcala nna iyába ca nu bienquinna gue Tataha lhe bideticana guee lhe dacana len neti.

<sup>46</sup> Tsa läganu chi bilenna Tata quia do iyyabaaha, sunruba neti Benni delha atta doe chi bilátie.<sup>47</sup> Neti nna gualíbatia rpea le, benni ria leni neti nna gua teba elha nabani gue nua ttu dia lii.<sup>48</sup> Neti anca ttaxtila rute elha nabani ttu dia lii gue ca benni.<sup>49</sup> Ca benniola gueleha nna utocana ttu elha go te láni maná lo yu bisiha, ttiaça läquiga de unnuha nna bittuba utticana.<sup>50</sup> Neti nna rinnea gue

ttaxtila daa iyyabaaha. Benni gona ttaxtila-ni nna tsa läga gatti nua lo Tata Do Iyyabaaha.<sup>51</sup> Neti nua anca ttaxtila rute elha nabani guadi iyyabaaha. Benni gona ben-ni nna aca banna ttu dia liiba iyyabaaha. Ttaxtila utea-ni nna anque cuinaga cuerpu quia, utea na qui ca benni se'e yies lo yu-ni nna gatta elha nabani guecani ttu dia lii.

<sup>52</sup>Lania nna ca benni Israel nna udulottebacana bitilha tisacana rávana:

—¿Gasná uniunná utena bela gue cuerpu guen-na gori?

<sup>53</sup>Jesús becabie guecani re cana:

—Neti nna gualíbatia ria le, gansi bittuba gole bela quia-ni lhe i'iyale reni quia-ni lhe neti Benni unbiyuu daa iyyabaaha, läga aca banle ttu dia lii.<sup>54</sup> Nu gona bela quia-ni lhe i'iyana reni quia-ni lhe gua teba elha nabani gueni ttu dia lii. Neti nna gunba eyaquinna attu libe ca sá daa lhuxa.<sup>55</sup> Cumu bela quia-ni nna ancana nu gualíga anca elha go, reni quia-ni nna ancana nu gualíga anca i'iya ca benni.<sup>56</sup> Nu gona bela quia-ni lhe i'iyana reni quia-ni lhe unnuha duna len neti, neti nna dua len lana.<sup>57</sup> Tata quia Benni udhelhe neti nna yu'u elha nabani guee. Larcala nna neti nna yu'uguaba elha nabani quia. Denuala nna ca benni gocana bela quia-ni, de netirba nna aca bancana.<sup>58</sup> Benni anque ttaxtila daa iyyabaaha, bittu anque loesi ttaxtila lá maná uto ca benniola gueri use'e atti nía. Masquiba utocana benniha nna labíaba utticana, ttiaca benni gona ttaxtila-ni nna aca banbana ttu dia lii iyyabaaha.

<sup>59</sup>Unní utixxi'a Jesús lhe'e yo'o atta ritupa ca benni Israel rudheticana ca tisa gue Tata Do Iyyabaaha do lhe'esi Capernaum.

### **Jesús anque benni rinne ca tisa rute elha nabani ttu dia lii gue ca benni**

<sup>60</sup>Atti bienquinna nu rá Jesús, ixe ca nu rudheti ca tisa rule'e rávana:

—Tsitsi anca ca tisa rule'e Ben-ni. ¿Nú dhana udo nagani gue Ben-ni?

<sup>61</sup>Utedaabani Jesús rinne ca bi'ini rudheti ca tisa rule'e gue nu unnee nna, ráttebe cana:

—¿Si rien díbinle ca tisa unnea-ni?<sup>62</sup> ¿Titialiga unle gansi ilenle neti Benni unbiyuu daa iyyabaaha eyopia atta doa ttuha?<sup>63</sup> Espíritu gue Tata Do Iyyabaaha rute elha nabani guele ttu dia lii, läga bela gue cuerpu guele-na unná rute elha nabani guele. Ca tisa rinnea-ni

nna ancaque gue Espíritu gue Tata Do Iyyabaaha rute elha nabani gue ca benni ttu dia lii.<sup>64</sup> Ttiaca se'e ttu chupale nna bittu ria lele.

Jesús re anía cumu desde primeraha li chi yue nupaxa bittu tsia lenie lhe nú nua utene las ná ca nu utticane lhe.<sup>65</sup> Ráguae:

—Denuala nna ria le, ni ttu benni bittu aca itana natteba len neti, gansi läba Tata quia unie ita nua len neti.

<sup>66</sup> Snatteba lania nna ixeru ca benni rudheti ca tisa rule'e bequicana, bitturu güiacana sanalhacane.<sup>67</sup> Laniala nna rá Jesús ca bi'ini tsil'inu rudheti ca tisa guee:

—Lebi'i nna, ¿si rdacaguale eyyale?

<sup>68</sup> Simón bi'ini láguaba Pedro nna becabibi rábi:

—Benni bananie ri'itu, ¿núrua la len nua tsiatu ganna? Inqui sunruba lu rinne ca tisa rute elha nabani gatta ttu dia lii gue ca benni nna.<sup>69</sup> Ri'itu nna chi ria letu lhe chi yutu lhe lu ancalu Cristu xi'ini Tata Do Iyyabaaha Benni doe anque Benni bani.

<sup>70</sup> Jesús becabie re:

—Tsil'inule chi becuela, ttiaca ttule nna ancana ttu nu xxegüi.

<sup>71</sup> Atti re anía nna rixxi'e nu uni Judas xi'inbiyuu Simón Iscarioote, cumu masquiba selana len tsil'inu ca bi'ini rudheti ca tisa rule'e Benniha nna lana utena Benniha las ná ca nu utticane.

### Ca betsi Jesús bittu ria lecani Benniha

**7** Dequide unnuha nna, daca Galileaba requi Jesús. Läga raca lee dhoe deca Judea, cumu ca nu lo gue ca benni Israel nna reguilacane quini utticane.<sup>2</sup> Chiguaba daa ribiga laní gue ca benni Israel nu te láni laní gue yo'o lhaga.<sup>3</sup> Ca betsi Jesús rácane:

—Biría nii güia daca Judea, qui anáchu iláguani ca bi'ini rudheti ca tisa rule'elu se'e nía ca milagru runlu-na.<sup>4</sup> Cumu ttu benni rdacana tsanni lona gue nu runna nna läga tsequi nua unna nua atta gatsi. Nu runlu-na benna aní lo iyá benni quini iláquinna.

<sup>5</sup> Aníaba rá ca betsi Benniha, cumu ni ca unnuha bittu ria lecanie.<sup>6</sup> Jesús becabie re cana:

—Läga chi bisía ura quia qui tsiaya nía, lebi'i nna bixaba ura nna guacaba tsiale.<sup>7</sup> Ca benni gue yies lo yu-ni nna lägabi te bixa lo ni'a gue utía di le ca unná le. Neti libunni bittu raca uyúcaná, cumu rixxi'aya guecani bittu anca tsee nu runcana.<sup>8</sup> Lebi'i gualtsia laní, neti bittu tsiaxxia, cumu läga chi bisía ura qui neti.

<sup>9</sup> Dequide re cana anía nna níaba be'ane Galilea.

### Jesús güie laní nu te láni laní gue yo'o lhaga

<sup>10</sup>Ttiaca dequide chi dia ca betsi Jesús laní nna anáguaba lee diaguabe, masquiba lä aní lo iyá benni cumu güequi gatsibe. <sup>11</sup> Ca nu lo guetu, ca benni Israel nna ugüila labe requicana ca sá laníha, nianna rá loescani: “¿Nala nua ganna?”

<sup>12</sup>Anáguaba iyába ca benni requi nía rinnecana guee. Lhecana rácana: “Benni tsee bunna.” Adícana nna rácana: “Läga benni tseeonna, ridí yie bunna benni.” <sup>13</sup>Ttiaca ni ttu benni bittu reaxinna innena idisa guee, cumu rasquinna ca nu lo gue ca benni Israel.

<sup>14</sup>Atti liba chi dia rilagüi laníha nna bisína Jesús lhe'eli'a gue yotuha. Lee nna udulottebe bele'enie ca benni. <sup>15</sup>Rebanbani ca nu lo gue ca benni Israel, nianna rácana:

—¿Gasná raca gueonni? Inqui lägabi bedhetina attiba ri'i nna.

<sup>16</sup>Jesús becabie re cana:

—Läga nunca quionni rule'a, nunca gue Benni udhelhe neti bunni. <sup>17</sup>Ca benni raca lecani uncana nu raca le Tata Do Iyyabaaha nna guate daabaquinna gansi guanca nu rule'a-ni gue Tata Do Iyyabaaha, si nu anca quiba rinnea aca. <sup>18</sup>Nu rinne nu anca guebani nna runba nua qui gapa ca benni-na respeto, ttiaca benni raca leni gapacana respeto benni udhele na, unnuha nna rixxi'aba nua nu anca gualí, lägabi run le nua.

<sup>19</sup>’¿Si läba Moisés boca'anbi ca ley-na len lebi'i? Lebi'i nna bittu rudole tisa guee. ¿Biacala neti rdacale uttile ganna?

<sup>20</sup>Ca benni nna becabicana rácana Jesús:

—¡Nu xxegüihaba yu'u lhe'elu! ¿Nú rdacana uttin lu?

<sup>21</sup>Jesús re cana:

—Iyábale rebanxxatta lele de biaca benia ttu nu xxeni sá reaca leri, ca benni Israel. <sup>22</sup>Gualíba Moisés boca'anbi lo sitsi urencana senni, nu runcana leni ca unbiyuu Israel (masquiba läga Moisés biriequibi nua, ca benniola guerihali udulocabi bencabi unná). Lebi'i nna rurencana senni, nu runcana leni ca unbiyuu Israel masquiba anca sá redí leri. <sup>23</sup>Masquiba anca sá redí leri nna rurencana senni ca unto chica'a-na qui bittu quitsale tisa gue ca ley boca'ana Moisés. Ganna anía nna ¿biacala rise'enle len neti de beonia ttu tsaga ttu unbiyuu rani sá redí leri? <sup>24</sup>Bittu cuenta innele gue nu rilenle. Nu unlale nna gualinne attiba raxxíbana innele.

### Ca benni rinnaba tisacana gansi Jesús anque Cristu

<sup>25</sup> Ttulhe ca nu se'e Jerusalén nna ráttebacana:

—¿Si läba unní nua reguilacana utticana? <sup>26</sup> Gualugüiarga. Ni nua duna rinnena aní lo iyá benni, nianna tsa läganu bi rán unná. ¿Si chiba ria le ca nu lo gueri-na dequi gualíba unnába nua Cristu benni chi ga'anani Tata Do Iyyabaaha ita aca? <sup>27</sup> Unní nna gua yubari ga beaca lasni, ttiaca gansi chi bisía Cristuha nna tsa läga yuri gaxa ladu daa Benniha.

<sup>28</sup> Jesús níaba due rule'enie ca benni lhe'eli'a gue yotuha. Atti bieninie nu rá ca nua nna unnettebe idisa re:

—¡Lebi'i nna guanca biabinle neti lhe gua yuguale ga beaca lasia lhe, ttiaca läga titú neti delha! Benni udhelhe neti nna anque Benni rinne nu anca gualí. Lebi'i nna läga anca bienle Benniha. <sup>29</sup> Neti nna anca biatie cumu atta doe biríaya delha, lee udhelhe neti lhe.

<sup>30</sup> Lania nna uxacacana udaxxucane, ttiaca ni ttucana bittu bedaxxucane, cumu läga chi bisía ura guee. <sup>31</sup> Ixeru ca benni se'e nía güia lecani guee, nianna rácana:

—Gansi chi bisía Cristuha nna ¿si xxenrula anca ca milagru un Benniha atti ca milagru runi unní?

<sup>32</sup> Atti bienini ca fariseo gue nu rá ca benni rinnecana gue Jesús, lacana lhe ca bixxudi anca nu loha lhe udhelhattebacana ca güensina gue yotuha qui tsiacana sadaxxucana Benniha. <sup>33</sup> Laniala rá Jesús cana:

—Attu sattirba dhoa len lebi'i, lenla nna eya'atteba atta do Benni udhelhe neti. <sup>34</sup> Lania nna lebi'i nna eguijale neti, ttiaca läga ettetti'ale neti, cumu läga aca eta'ale atta esína.

<sup>35</sup> Ca benni Israel nna unnaba tisatteba loescani rácana:

—¿Ga ladu tsionni, ri'i nna bittu eselinri na? ¿Si tsiana atta se'e adí ca benni gueri lhe'e adí ca yiesi dittu-na qui ule'enna ca nu dittu-na aca? <sup>36</sup> ¿Bi diale nu rán-na: “Masquiba eguijale neti nna läganu neti eselinle, cumu läga eta'ale atta esína”?

<sup>37</sup> Atti bisía sá lhuxa laníha, la sá nua anca sá laní xeni, lania nna udulítteba Jesús unnee idisa re:

—Gansi nuxale rebisle nna gualtá len neti guali'iya inda.

<sup>38</sup> Attiba rá lo ca sitsi gue Tata Do Iyyabaaha: “Lhe'e lastoo benni tsia leni neti nna satíaba dha inda rute elha nabani ttu dia lii.”

<sup>39</sup> Atti unne Jesús gue inda rute elha nabani ttu dia lii nna gue Espíritu gue Tata Do Iyyabaaha dhi ca benni tsia lecani Bennihaba nua rinnee. Lania nna lägabi chi uxí ca benni Espíritu cumu läga chi beopi Jesús iyyabaaha ule'e loe anque Benni ra xxeni lee.

<sup>40</sup> Atti bienini ca benni se'e nía nu rá Jesús, rátteba ttulhecana:  
—Bennirguaba nna gualíba anque profeta chi ga'ana isía.

<sup>41</sup> Adícana nna rácana:

—Benniba nua Cristuha.

Ttiaca adícana nna rácana:

—Dica, läga Galilea-na iría Cristuha. <sup>42</sup> Lo ca sitsi gue Tata Do Iyyabaaha nna rá: “Cristuha nna anque ttu nu datía David, iríe lhe'esi Belén nna attaguaba beaca lasi David.”

<sup>43</sup> Lo ni'a gue Jesús, ulha'a lhe'e loescani de bittu ttudi rinnecana. <sup>44</sup> Ttulhecana nna runcana udaxxucane, ttiaca ni ttucana lä bedaxxucane.

### **Ca nu lo gue ca benni Israel bittu ria lecani gue Jesús**

<sup>45</sup> Ca güensina gue yotuha nna bequibacana deyyacana atta se'e ca nu lo gue ca bixxudiha lencana ca fariseo. Ca unnuha nna rácana ca güensinaha:

—¿Biaca nua lä dechele?

<sup>46</sup> Ca güensinaha nna becabicana rácana:

—¡Ni ttu benni bittu chi bienintu innena atti rinne nua!

<sup>47</sup> Ca fariseo nna becabicana rácana:

—Lebi'i nna, ¿si chiguaba uxí yie nua le? <sup>48</sup> ¿Si nux ttu ca nu lo gueri-ni o nux ttutu ri'itu ca fariseo-ni chi güia letu gueni aca?

<sup>49</sup> Ca bennirienini gue Jesús bittu yucana gue nu rá lo ca ley bodha'ana Moisés, dia nittibacana.

<sup>50</sup> Tu benni fariseo lána Nicodemo nu güiana guanne lenna Jesús ttu lo rela nna unnettebana rána:

<sup>51</sup> —Lo ca ley-na rá: “Läga dica udelha iyyari ttu benni bittu chi bieninri innána bixa benna.”

<sup>52</sup> Ca unnuha nna becabicana rácana:

—Lu nna ¿si nu Galileoguabalu? Begilarga lo ca sitsi gue Tata Do Iyyabaaha, tsa lägabi rixxi'a dequi chi biría ttu profeta Galilea-na.

<sup>53</sup> [Coa ttuttuba ca benni bodaxxu neda guecani deyya liscani.

**Ttu nuila beyaxxuna leni attu unbiyuu subi**

**8** Ttiaca Jesús daca lo lhilhi lána Atta Da ca ya gue Olivuhaba die.<sup>2</sup> Betteyú dila nna besinttebe lhe'eli'a gue yotuha attu libe. Iyába ca benni bedesincana atta due. Lee nna udottebe bele'enie cana.<sup>3</sup> Ca nu rule'e nu rá lo ca ley boca'ana Moisés lencana ca fariseo, uchecana ttu nuila beyaxxuquinna leni ttu unbiyuu bittu anca latselani bedúcan-na salhe gue ca nu se'e nía.<sup>4</sup> Nianna ráttebacana Jesús:

—Maestro, nuila du-ni nna beyaxxuintu na leni attu unbiyuu subi.<sup>5</sup> Lo ca ley-na rá Moisés, gattiba ca loesi nuila-na leni iyya. Lu nna ¿bila rálú?

<sup>6</sup> Lacana nna aníaba beguila lecani rácana Benniha qui ibixxie bixa innee, aníachu nna te ro'ocani udelha iyyacane. Ttiaca Jesús biachuttebe uduloe runie letra lo yu leni xbine.<sup>7</sup> De ttu runbacana duelha rinnaba tisacane nna bedú líttebe re cana:

—Nuxale bittu tulha guele te nna primero unnuha udaxxuna iyya use'ena nuila-na.

<sup>8</sup> Bedeyachuttebe attu libe, bededulo dacabe redeonie letra lo yu.<sup>9</sup> Atti bienquinna nu rá Benniha nna udulottebacana ttuttu ttuttabacana deyyacana. Primero ca nu yaxxuha udulo güequi, lenla nna güequi ca uncuitiha, axta liba beacana. Atturba Jesús be'ané nía lenie nuila bedúcana salheha.<sup>10</sup> Bededulítteba Jesús, unnaba tise nuilaha re na:

—Xa nuila, ¿nala ca nua? ¿Si niba ttu ca nua bittu bedelha iyyacana lu gattilu?

<sup>11</sup> Lana nna rána:

—Niba ttucana, xa tata.

Jesús re na:

—Anáguuba neti bittuguuba udelhiyya lu. Nnanna nna beyya lisluha nna bitturu eyequili unlú nu lä anca tsee.]

**Jesús re: “Neti anca xieni gue ca benni se'e yies lo yu-ni”**

<sup>12</sup> Jesús bedulottebe unnee attu libe re ca benni se'e nía:

—Neti anca xieni gue ca benni se'e yies lo yu. Benni etenalhana neti nna läga tsequi nua atta chulha, cumu gattaba xieni rute elha nabani ttu dia lii gue nua.

<sup>13</sup> Ca fariseo nna rácane:

—Lägabi daca nu rálha cumu la luba rixxi'alu nuxa ancalu.

<sup>14</sup> Jesús becabie guecani re:

—Nu ria-ni nna gua daca bunní, masquiba la netiba rixxi'aya nu anca quia, cumu gua yuba ga biríaya daya lhe ga ladu diaya lhe ttiaca lebi'i nna läga yule ga biríaya lhe ga ladu diaya lhe. <sup>15</sup> Lebi'i nna runbale elha uxtisi gue ca benni leni elha uxtisi gue yies lo yu-ni. Neti nna läganu benni runia elha uxtisi gueni aná. <sup>16</sup> Ttiaca gansi neti unia elha uxtisi nna unba nua attiba raxxína, cumu läga tturu neti unia elha uxtisi, irpaba tata quia Benni udhelhe neti untu nua. <sup>17</sup> Lo ca ley guele-na rá: Gansi se'e chupa benni ttuba rinnecana gue nu biláquinna dacaba nu rixxi'a ca nua. <sup>18</sup> Neti anca ttu nu rixxi'a nuxa anca. Tata quia Benni udhelhe neti nna anque attu benni rixxi'a nuxa anca.

<sup>19</sup> Lacana nna unnaba tisacana rácane:

—¿Nala tata gueluha?

Jesús becabie re cana:

—Lebi'i nna läga anca bienle neti, niguaba tata quia. Ttirca anca bienle neti nna lania nna anca biaguabinle Tata quia.

<sup>20</sup> Ca tisa-ni unne Jesús laca due rule'enie ca benni lhe'eli'a gue yotuha gaxxaba atta sia ca nu rigu'ucana úna lhe'ecaniha. Ttiaca ni ttucana bittu bedaxxucane cumu läga chi bisía ura guee.

<sup>21</sup> Jesús re ca benni attu libe:

—Neti nna eyyaba, lebi'i nna eguilale neti. Ttiaca atta eyya'aya nna lebi'i nna läga eta'ale. Lebi'i nna gattibale de runle nu lä anca tsee.

<sup>22</sup> Ca benni quia ca nu Israel nna rácana:

—¿Si rulaba leni la lattebana unna qui gattina nuarca rána ri'i atta eyyana nna ri'i nna bittu aca eta'ari?

<sup>23</sup> Lee nna re cana:

—Lebi'i nna ancale benni gue liree, neti nna anca benni gue güetsaa. Benni gue yies lo yu-niba ancale, neti nna läga benni gue yies lo yu-ni neti. <sup>24</sup> Denuala nna ria le, gattibale de runle nu lä anca tsee, cumu gansi bittuba ria lele ria neti anca benni chi rpea le anca nna lebi'i nna gattibale de runle nu lä anca tsee.

<sup>25</sup> Laniala unnaba tisacana rácana:

—Lu nna ¿nú ancalu?

Jesús becabie guecani re cana:

—La unnuha xa nua ria le primera li nna. <sup>26</sup> Gue nu runle-na xxeni nu tetia upea le lhe udelhiyya le lhe ttiaca Benni udhelhe

netiha anque Benni rinne nu anca gualí. Nu rábe neti nna unnuhaba rpea ca benni se'e yies lo yu-ni.

<sup>27</sup> Ca benni se'e nía nna ni lä guadú lecani gue Tata guee do iyyabaahaba nua rinne Jesús re cana anía. <sup>28</sup> Lee nna re cana:

—Gansi chi ulhidhale neti Benni unbiyuu daa iyyabaaha lo crusi nna lania liba ttedeenle neti nua anca nu chi ria le anca, bittuguuba runia nu anca quia lhe. Nu bele'ebani tata quia neti, unnuhaba rinnea. <sup>29</sup> Cumu tata quia Benni udhelhe neti nna len netiba due, tsa läga chi bodha'ane neti ttuba, de satíaba runia nu raca lee.

<sup>30</sup> Atti rá Jesús anía nna ixeru ca benni güia lecanie.

### **Ca xi'in Tata Do Iyyabaaha leni ca nu tto'o lo sina gue nu lä anca tsee runcana**

<sup>31</sup> Jesús re ca benni Israel chi güia lecanie:

—Gansi lebi'i nna usiguile udole tisa gue nu ria le-ni nna lania liba acale nu gualíga anca nu rudheti ca tisa rule'a. <sup>32</sup> Anía liba nna un biale nu anca gualí, nu anca gualíha nna unie lhále.

<sup>33</sup> Lacana nna becabicana guee rácane:

—Ri'itu ancatu benni datía Abraham, tsa läga chi uca ri'itu nu tto'o lo sina gue nuxa benni. ¿Gasná rálu nna ese'e látu?

<sup>34</sup> Jesús re cana:

—Neti nna gualíbatia ria le, iyába ca nu runi nu lä anca tsee nna attiba nu tto'o lo sinaba ancacana gue nu lä anca tsee runcana.

<sup>35</sup> Ttu nu tto'o lo sina nna lägabi elha ralha nua dhona ttu dia lii lisi Benni bananie na, xi'in biyuu Benni bananie na liba nna ralhana dhona ttu dia lii nía. <sup>36</sup> Larcala nna gansi neti xi'ini Tata Do Iyyabaaha odiláya le nna lania liba acale nu gualíga se'e lále.

<sup>37</sup> Neti nna gua yuba dequi ancale benni datía Abraham, ttiaca lebi'i nna runlale uttile neti, cumu bittu raca lele tsia lele gue ca tisa quia-ni. <sup>38</sup> Neti nna rinneba nu bilátia atti doa len Tata quia, lebi'i nna runbale nu bienbinle rá tata gueleha.

<sup>39</sup> Lacana nna rácana:

—Abrahamba anca benniola gue ca tata guetu.

Jesús re cana:

—Ttirca gualíga ancale benni datía Abraham, lania nna gua runbale ca nu tsee ben bi'iniha. <sup>40</sup> Ttiaca lebi'i runlale uttile neti de anca benni rixxi'a nu anca gualí, nu bienbatia rá Tata Do Iyyabaaha.

¡Abraham tsa läga ben bi'iniha atti runle na! <sup>41</sup> Lebi'i nna runbale loesi nu run tata gueleha.

Lacana nna rávana:

—Ri'itu nna läga ancatu xi'ini attu nu subi, ttuba tata guetu do. Xi'ini Tata Do Iyyabaahaba ri'itu.

<sup>42</sup> Jesús re cana:

—Gansi gualíga ancale xi'ini Tata Do Iyyabaaha nna gua racabinle quia cumu neti nna atta do Benniha biríaya delha dua-ni, läga titú neti delha, labe udhelhe neti. <sup>43</sup> ¿Biacala bittu ritedeenle gue nu rpeale-ni? Lebi'i nna bittu ritedeenle cumu läga raca lele udo nagale gue nu ria. <sup>44</sup> Lebil'i nna nu xxegüihaba anca xxudile. Nu ru'u le tata guelehaba re'o lele runle. Lana nna atti uduloli ure yies lo yu-ni ancana nu runi elhutti, läga runna nu anca gualí cumu läga rinnena nu gualí. Gansi chi rinnena run leni nna rinnebana nu ancabana, cumu ancana nu run leni lhe xxudi ca nu run lecani lhe. <sup>45</sup> Neti nna ganna de rinnea nu anca gualí nuarca bittu ria lele quia. <sup>46</sup> ¿Núle cuequilíle dequi anca nu te tulha gueni? Gansi rinneba nu anca gualí nna ¿biacala bittu ria lele quia ganna? <sup>47</sup> Benni anca gue Tata Do Iyyabaaha nna ca tisa gue Bennihaba rudo naga nua, ttiaca lebi'i nna läga ancale gue Tata Do Iyyabaaha, nuarca bittu raca lele udo nagale ca tisa gue Benniha.

### Jesús re, lee nna chila doe atti uli Abraham

<sup>48</sup> Ca nu Israel nna becabicana rávana Jesús:

—Gualíbintu rátu lu, nu Samariaba lu, nu xxegüihaba yu'u lhe'elu.

<sup>49</sup> Jesús becabie guecani re:

—Läganu nu xxegüi yu'u lhe'e neti, nu runba nna rapa tata quia respeto, lebi'i nna bittu rapale neti respeto. <sup>50</sup> Neti nna läga runia qui cuequi xen ca benni neti, gua doba ttu benni runie aca nu ra xxeni leni. Leonna runi elha uxtisi. <sup>51</sup> Neti nna gualíbatia ria le, benni udonra tisa gue nu ria nna tsa läga gatti nua.

<sup>52</sup> Ca nu Israel nna becabicana rávana:

—Nannarguaba nna chi yu tseetu, lu nna nu xxegüihaba yu'u lhe'elu. Abraham uttiba bi'iniha, anáguaba ca bi'ini uca profeta lhe lu nna rálu: “Nu udonra tisa gue nu ria nna tsa läga gatti nua.” <sup>53</sup> Lu nna ¿si xxenrula rá lelu atti benniola guetu Abraham? Bi'iniha nna uttibabi, anáguaba ca bi'ini uca profeta. Lu nna ¿núnna runlu dequi ancalu?

<sup>54</sup> Jesús becabie re:

—Gansi la netiba unia anca nu ra xxeni leni nna tsa lägabi daca nua. Ttiaca tata quia benni rále anca Tata Do Iyyabaaha guele-na runie anca nu ra xxeni leni. <sup>55</sup> Lebi'i nna läga anca bienle Benniha, netirguuba nna anca batiie. Gansi innía bittu anca batiie nna lania nna anca ttu nu run leni attiba lebi'i, ttiaca gualíba anca batiie lhe rudoa tisa gue nu re lhe. <sup>56</sup> Abraham bi'ini uca tata gue ca tata gueleha nna bedáquinbi de ilenbi sá isíaya. Atti bilenbi bisía sá nna be'olhaba lebi.

<sup>57</sup> Ca nu Israel nna bequicana rácana Jesús:

—Nila medi gayua (50) ida lati aquinlu nna gua rálu dequi bilenlu Abraham.

<sup>58</sup> Jesús re cana:

—Neti nna gualíbatia ria le, atti antisla gali Abraham, chila doa lania.

<sup>59</sup> Lania nna bedaxxuttebacana iyya uxacacana usiacana Jesús. Lee nna becatsitteba loe sigába betee lagüi gue ca benni se'e nía beríe lhe'eli'a gue yotuha deyye.

### Jesús beonie ttu nu xua loni

**9** Atti bete Jesús deyye nna bilánie ttu unbiyuu xua loni. Aníaba anca nua atti ulna. <sup>2</sup> Ca bi'ini rudheti ca tisa rule'e nna unnaba tisa cabi rácabi Benniha:

—Maestro, ¿biaca xua lo unbiyuu-na atti ulna? ¿Si de ben ca tata gueniha ttu nu bittu anca tsee aca, si labana benna nu lä anca tsee aca?

<sup>3</sup> Jesús becabie re:

—Läga de beni ca tata nan gueonna ttu nu bittu anca tsee, niguuba de beni unná ttu nu lä anca tsee, anca bunna aná qui leni milagru uni Tata Do Iyyabaaha nna ule'e loe anque nu ra xxeni lee. <sup>4</sup> Laca anca resá nna unxxiri sina gue Benni udhelhe neti, cumu gua daa ribiga aca lo rela nna lania nna tsa lärga nuruha aca gueni cuenna sina. <sup>5</sup> Laca doa yies lo yu-ni nna neti anca xieni gue ca benni se'e yies lo yu-ni.

<sup>6</sup> Dequide rá Jesús anía nna bettuttutteba xxenie lo yu. Leni unnuhaba benie saro'o yuna, atti utabittebe nua ro'o lo nu xua loniha. <sup>7</sup> Nianna ráttebe unbiyuuhá:

—Güia guattí lolu ro'o bila inda te láni Siloé-na. (Tisa Siloé dienna innána sola.)

Nu xua loniha nna güiattebana guattí loni, atti bequina besinna nna chi rilenna.<sup>8</sup> Ca benni se'e gaxxaba atta re'anna lhe ca benni chi biláquinna ridona güennaba belhi lhe rinnaba tisa loescani rácan:

—¿Si läba unníba nua ridona güennaba belhi?

<sup>9</sup>Tulhecana nna rácan:

—Gualíba, unnuha bunna.

Adícana nna rácan:

—Dica, läga unnuha unná. De rule'e bunna attiba rule'e unnuha.

Lana nna rána:

—Netiba nua.

<sup>10</sup>Nianna unnaba tisacan na rácan na:

—¿Galasná uca bilenlu?

<sup>11</sup>Lana nna becabina rána:

—Unbiyuu lá Jesúsba benie yuna utabie ro'o loa, nianna re neti: “Güia guattí lolu ro'o bila inda lá Siloé-na.” Neti nna güiatteba, utíba loa nna biláttebatia.

<sup>12</sup>Laniala nna rácan na:

—¿Nala unbiyuuhá?

Lana nna rána:

—Bittu yua.

<sup>13</sup>Uchettebacana nu uxua loniha guadúcan na lo ca nu fariseo,  
<sup>14</sup>cumu de anca sá redí le ca nu Israel, la sá atti beni Jesús yuna leni xxenie, utabie ro'o lo nu uxua loniha qui ilenna.<sup>15</sup> Ca nu fariseo nna bedennaba tisattecacan na gaxasná uca beali loni. Lana nna becabina rána:

—Yunaba utabie ro'o loa, nianna utítteba loa nna biláttebatia.

<sup>16</sup>Tulhe ca fariseo nna ráttebacana:

—Unbiyuu beni unní nna läga anca unná gue Tata Do Iyyabaaha, nuarca runbana sina sá redí leri.

Adícana nna rácan:

—Läga aca gue ttu unbiyuu runi nu lä anca tsee unna ca milagru runi unná.

Lo ni'a gue unnuha nna bila'a lhe'e loescani de bittu ttudi rinnecana.<sup>17</sup> Bedennaba tisa dacabacana unbiyuu uxua loniha redeácan na:

—Lu nna ¿bila rálu gue nu benna rilenlu-na?

Lana nna rána:

—Neti nna ria, Ben-na anque ttu profeta.

<sup>18</sup> Ttiaca ca nu lo gue ca benni Israel nna tsa läga ria lecani dequi gualí uca nua ttu nu xua loni, nnanna nna chi ancana nu riláni, axta qui uxcana tata nan gue nua. <sup>19</sup> Nianna, unnaba tisacana ca unnuha rácan cana:

—¿Si xi'inle nu du-ni, nu rále anába xua loni ulna? ¿Ttiluca nna riláni unná nnanna?

<sup>20</sup> Ca tata nan gue nua nna becabicana rácan:

—Yubatu xi'inbatu unní lhe xuaba loni atti ulna lhe <sup>21</sup> ttiaca läga yutu gaxasná uca chi rilenna nnanna, bittuguuba yutu nuxa benna bilenna lhe. Na gualnnaba tisa na chiba anca unná nu xxeni, guaguixxi'a bunna gaxasná uca bilenna.

<sup>22</sup> Aníaba rá ca tata nan gue nua de rasbaquinna ca nu lo gue ca benni Israel, cumu ca unnuha nna chi unnecana rácan, ttu tsaba ebeacana lhe'e yo'o atta rudheticana ca tisa gue Tata Do Iyyabaaha nuxa innána Jesús anque Cristu Benni chi ga'anani Tata Do Iyyabaaha odile ca benni. <sup>23</sup> Nuarcala nna rá ca tata nan gue nua: “Na gualnnaba tisa-na, nu xxenba chi anca unna.”

<sup>24</sup> Ca nu lo gue ca benni Israel nna bedeaxi dacabacana nu uxua loniha, nianna rácan na:

—Aní lo Tata Do Iyyabaaha uxí ro'olu. Ri'itu nna yutu nu runi nu lä anca tseeba anca nu benna bilenlu-na.

<sup>25</sup> Lana nna becabina rána:

—Bittu yua gansi ancana nu runi nu lä anca tsee o bittu. Nu yurba nna neti uca nu xua loni, nnanna nna chi rilátia.

<sup>26</sup> Bedennaba tisa dacabacan na attu libe rácan na:

—¿Bi bedhacan lu? ¿Bi benna qui bilenlu?

<sup>27</sup> Becabittebana rán cana:

—Lä chiba ria le nna lebi'i nna bittu bedo nagale. ¿Biaca rdacale quixxi'atia le attu libe? ¿Si rdacaguale acale benni rudheti ca tisa rule'e Ben-na?

<sup>28</sup> Laniala nna bedhaca disacan nua rácan na:

—Luba ancalu nu rudheti ca tisa rule'e unná, ri'itu nna nu rudheti nu bele'e Moisés liba anca ri'itu. <sup>29</sup> Ri'itu nna yutu unne Tata Do Iyyabaaha len Moisés, ttiaca unbiyuu-na nna niba lä yutu ga ladu don-na.

<sup>30</sup> Nu uxua loniha nna becabina rána:

—Unnírguaba nna ancana ttu nu runna reban leri. Lebi'i nna rále dequi bittu yule ga ladu daa Ben-na, ttiaca neti nna benie bilátia. <sup>31</sup> Ri'i nna gua yubari, Tata Do Iyyabaaha nna läga rienini benniha gue ca nu runi nu lä anca tsee-na, sunruba gue ca nu ria lecanie lhe rudocana tisa guee lhe rieninie. <sup>32</sup> Ni ttu libe bittu chi bieninri gue nuxa quixxi'ana innána beni ttu benni biláni ttu nu ulina ancana nu xua loni, <sup>33</sup> gansi läba Tata Do Iyyabaaha udhelhe Ben-na nna, tsa läga aca gue Ben-na unie ttu bixa.

<sup>34</sup> Lania nna ráttebacana nua:

—Lu nna atti ulililu chi ancalu nu te tulha gueni. ¿Rdacalu ule'enlu ri'itu nna?

Bebequittebacan na ttu tsaba lhe'e yo'o atta rudheticana ca tisa gue Tata Do Iyyabaaha.

<sup>35</sup> Jesús bine rácana dequi uleabacana nu uxua loniha. Atti beti'e nua nna ráttebe na:

—¿Si gua ria lelu Benni unbiyuu daa iyyabaaha?<sup>a</sup>

<sup>36</sup> Unbiyuuhu nna becabina rána:

—Utixxi'en neti nuxque nua, xa tata, qui tsia lasie.

<sup>37</sup> Jesús re na:

—La chiba bilenlu Benniha. Neti nua.

<sup>38</sup> Laniala nna bedútteba xibi unbiyuuhu lo Jesús, nianna rána:

—Gua riaba lasia lu, xa tata.

<sup>39</sup> Jesús re:

—Neti daya yies lo yu-ni qui unia elha uxtisi, delha qui unia iláni ca nu xua loquinna ca nu racaquinna ancacana nu riláni nna acacana attiba nu xua loni.

<sup>40</sup> Atti bienini ttu chupa ca fariseo se'e nía re anía nna unnaba tisattebacana Benniha rácane:

—Ri'itu nna, ¿si nu xua lobani ancatu?

<sup>41</sup> Jesús becabie re:

—Ttirca ancale nu xua loni nna lägabi te tulha guele. Ttiaca de rále, rilenle nna nuarca ancabale nu te tulha gueni.

---

<sup>a</sup> **9:35** Lo yitsi-ni dia rá: “¿Si gua ria lelu Benni daa iyyabaaha?” Lo attu yitsi dia rá: “¿Si gua ria lelu Benni anque Xil'in Tata Do Iyyabaaha?”

### Jesús riguixxi'e gue ttu nu ria lo ca carne'e

**10** Jesús re:

—Neti nna gualíbatia ria le, nu bittu rita'ana daca ro'o puerta gue curralli atta yu'u ca carne'e-na, sinuqui attu atta subila ropina qui rita'ana ubanaba nua, nu rigúa sigá nu te gue benniba nua lhe. <sup>2</sup>Nu rita'a daca ro'o puertaha liba nna ancana nu ruyú ca carne'e-na. <sup>3</sup>Nu du rapa ro'o curralliha nna nua nna ridhalbana puertaha rita'a nu ria lo ca nua. Ca carne'eha nna reon biacana tsi'i nu ria locaniha. Lana nna raxxína ca nua coa ttuttu ca nua rudettina läcani qui cueancana lhe'e curralliha. <sup>4</sup>Dequide chi uleana iyá ca nu anca gueni nna rinerttebana lo ca nua. Ca unnuha nna ranottebacan na cumu reon biacana tsi'ini. <sup>5</sup>Delo attu nu subi nna läga ranocan nua, ruxunni lacana lo nua, de bittu anca biaquinna tsi'i attu nu subi.

<sup>6</sup>Ca tisa utixxi'en Jesús ca benni se'e nía ancacana ttu ejemplu, ttiaca ni lä guadú lecani bixa dianie re cana anía.

### Jesús anque attiba ttu benni ruyú tsee ca carne'e

<sup>7</sup> Jesús re ca benni se'e nía attu libe:

—Neti nna gualíbatia ria, neti anca puerta du ro'o curralli atta reta'a ca carne'e-na. <sup>8</sup>Iyába ca nu rácana dequi lacana ancacana Cristu chi bisía atti lati isíaya yies lo yu-ni nna ubanaba ca nua, larca bittu bedo naga ca carne'e-na guecani. <sup>9</sup>Neti anca puerta du ro'o curralliha. Benni ga'ana atta dua nna gualába nua. Unnuha nna acana attiba ttu carne'e rería reta'abana lhe'e curralliha, saxxacana nu gona lhe.

<sup>10</sup>'Ubanaha nna suntteba daa nua lhanana, uttina lhe utse'e lona lhe ttiaca neti nna delha utea elha nabani guele qui gatta xxeni elha nabani guele ttu dia lii. <sup>11</sup>Neti anca attiba ttu benni ruyú tseenca ca carne'e gueniha. Nu ruyú tseenca ca carne'e gueniha nna rerú iqui rerú leni rute elha nabani gueni cuenta gue ca carne'eha. <sup>12</sup>Nu naxabana rena lo ca carne'eha nna atti rilenna daa sagueha nna ruse'e bixxina ca nua nía ruxunnina, cumu läga gueni ca nua, yaba le nu beaca gueni ca nua. Sagueha nna risinttebana rudaxxuna ca carne'eha, atti rutsiattebinna ca nua qui tsiacana gatti laduba. <sup>13</sup>Ruxunniba nu re lo ca carne'eha cumu läga de ca carne'eha nua run nua, lhiaxaba nua denona.

<sup>14</sup> 'Neti anca attiba ttu benni ruyú tsee ca carne'e gueni. Anca biatia ca carne'e anca quia, anáguaba ca nu anca quia nna anca biaguabaquinna neti. <sup>15</sup> Attiba tata quia anca bienie neti, anáguaba neti anca biaguatie. Neti utea elha nabani quia qui odiláya ca benni, attiba ttu benni re lo ca carne'e rerú iqui rerú leni elha nabani gueni rutena cuenta gue ca carne'eha. <sup>16</sup> Se'e guabatia adí ca carne'e bittu babacana len ca nu se'e-ni. Lacana lhe saxía, ca unnuha nna güiyienbaquinna quia. Lania nna ttuba eyaca iyábacana, ttu guaba benni gape cana lhe.

<sup>17</sup> 'Larcala nna tata quia racanie quia, cumu neti utea elha nabani quia qui odiláya ca benni, lenla nna eyacatia attu libe. <sup>18</sup> Tsa läganu ettettuana elha nabani quia-ni, netiba rerú iqui rerú lasia na utea na. Neti nna anca nu ra xxeni leni. Denua nna raca quia utea elha nabani quia-ni lhe edía na attu libe lhe. Unní rá tata quia unia.

<sup>19</sup> Atti bienini ca benni Israel nu rá Benniha nna bedela'atteba lhe'e loesicani attu libe. <sup>20</sup> Ixerucana rácana:

—¿Biaca unná rudo nagale gueni? Gua yubale nna nu xxegüihaba yu'u lhe'onna iquibunna raca lhe.

<sup>21</sup> Adícana nna rácana:

—Tsa läganu nu yu'u nu xxegüi lhe'eni te aca gueni innena aná. Läga aca gue ttu nu xxegüi unna iláni ca nu xua loquinna.

### Ca nu Israel bittu rulabicana Jesús

<sup>22</sup> Atti risía raca idilhaha nua runi ca benni Israel ttu laní lhe'e yiesi Jerusalén. Lania nua rexxa lecani la sá atti beaca le'a yotu guecaniha. <sup>23</sup> Jesús níaba requie lhe'eli'a gue yotuha atta te láni corredori gue Salomón. <sup>24</sup> Ca benni Israel nna bitupattebacana sa bi'abe, nianna rácane:

—¿Núcalunni nna unlu qui kitturu udú chupana letu? Gansi luba nua Cristu, tsala utixxi'a aní lo iyátu.

<sup>25</sup> Jesús becabie re cana:

—Lä chiba ria le nna lebi'i nna bittu güia lele. Ca milagru rute tata quia runia-ni nna rule'e loque nuxa anca. <sup>26</sup> Lebi'i nna läga ria lele, cumu läga ancale carne'e quia. <sup>27</sup> Ca benni anca attiba carne'e quia nna gua rienbaquinna tsil'a rinnea. Neti nna anca biatia cana, lacana nna denocana neti. <sup>28</sup> Neti rutea elha nabani guecani qui aca bancana ttu dia lii, bittu tsia nitticana lhe nuttuguaba nu dhana ettattuana cana lo náya lhe. <sup>29</sup> Tata quia Benni betecana las náya

nna xxeniru ra le Benniha atti nuxaba benni, larcala nna läganu dhana cuana cana lo nee.<sup>30</sup> Tata quia nna neti nna ttuba ancatu.

<sup>31</sup> Bodidaxxu dacaba ca benni Israel iyya qui use'ecane.<sup>32</sup> Jesús re cana:

—Ixe ca milagru tsee bete tata quia unia chi benia aní lole. ¿Lo ni'a gue nu ca nua rdacale usiale neti iyya?

<sup>33</sup> Ca benni Israel nna becabicana rácana:

—Läga usia ri'itu lu iyya lo ni'a gue ca milagru tsee runlu-na. Usiatu lu iyya cumu len nu rálha nna rinne güelu gue Tata Do Iyyabaaha. Lu nna benniba ancalu nna runlu dequi ancalu Dios.

<sup>34</sup> Jesús re cana:

—¿Si läba lo ca ley denle-na rá Tata Do Iyyabaaha: “Neti chi ria, lebi'i ancale diosi”?<sup>a</sup> <sup>35</sup> Ri'i nna yubari, läga aca gueri otsiari nu rá ca tisa gue Tata Do Iyyabaaha. Lee nna re diosi anca ca benni betee ca tisa guee-na lencabi.<sup>36</sup> ¿Biacala neti Benni chi riesinie udhelhe yies lo yu-ni rále dequi rinne güea gue Tata Do Iyyabaaha de ria: “Neti anca Xi'ini Tata Do Iyyabaaha”? <sup>37</sup> Gansi bittuba runia nu runi tata quia nna bittu tsia lele quia.<sup>38</sup> Ttiaca gansi runba nu runie nna masquiba lä ria lele neti, gualtsia lele gue nu runia, qui tsala nna ttedeenle, tata quia nna ttuba Benni anque lenie neti, neti nna ttuba Benni anca lenie.

<sup>39</sup> Bedeonttebacana odidaxxucane attu libe, ttiaca lee nna ulabe lo nácani.

<sup>40</sup> Dedhia dacaba Jesús attu ladu gue yoo Jordán. Níaba be'ane atta udulo Juan begadibi benni inda.<sup>41</sup> Ixeru benni risina atta du Benniha, nianna rácana:

—Gualí galá, lägabi milagru beni Juan, ttiaca iyába nu utixxi'abi gue Ben-ni nna gualíba nua.

<sup>42</sup> Ixeru ca benni se'e daca nía güia lecani Jesús.

### Ttu benni lána Lázaro uttina

**11** Lhe'esi lá Betania nua do ttu benni rani lána Lázaro.

Níaguaba nua beaca lasi María lenna xilani Marta.<sup>2</sup> María dana Lázaro nu raniha nua ulu'una seti rure xixxi ni'a Jesús. Leni itsiquibani bodibisna ca ni'a Benniha.<sup>3</sup> Irpa xilabacani udhelhacana rasona len Jesús rácane:

—Raniba nu raca xxattinlu gueniha, xa tata.

---

<sup>a</sup> 10:34-35 Salmo 82:6

<sup>4</sup> Atti chi bina Jesús nu rá ca nua nna ráttebe:

—Isagüee yu'u nua nna läga anca nua nu uttin na, delába unnuha nna ixuula isagüeha qui inná ca benni: “¡Xxeni ra le Tata Do Iyyabaaha!”, anáguauba qui ule'e lo neti Xi'inie-ni anca Benni ra xxeni leni lhe.

<sup>5</sup> Masquiba raca juisiani Jesús gue Lázaro lhe gue Marta lhe gue María lhe <sup>6</sup>be'anrube atta doe a chupa ubisa dequide bine rani Lázaro. <sup>7</sup> Dequilaha nna re ca bi'ini rudheti ca tisa rule'e:

—Gualtsá tsiasi attu libe deca Judea.

<sup>8</sup> Ca bi'ini rudheti ca tisa rule'e nna rácabi Benniha:

—Maestro, ¿si edeyya dacabari nía attu libe? Inqui ttu sába nua uxaca ca benni Israel se'e nía usiacan lu iyya nna.

<sup>9</sup> Jesús becabie guecabi re:

—¿Si läba tsil'inu ura yu'u lhe'e ttu sá nna? Nu requi resá nna läga richecu nua cumu xieni gue yies lo yu-ni nna gua rusanbe gue nua. <sup>10</sup> Ttiaca nu requi lo rela nna ichecuba nua cumu bittu xieni yu'u atta diana.

<sup>11</sup> Dequide unnuha nna re:

—Lázaro nu raquinri gueniha nna chi utta'adhi nua. Tsiala qui odibania na.

<sup>12</sup> Ca bi'ini rudheti ca tisa rule'e Benniha nna rácabi:

—Benni bananie ri'itu, gansi ti'edhiba nua nna güeyacaba nua ganna.

<sup>13</sup> Gue elhutti gue Lázaroba nua rinne Jesús, ca bi'iniha nna ucaquinbi ga gue bisiela nu runna ra'adhiri-nba nua rinne Benniha.

<sup>14</sup> Laniala nna utixxi'a tseenie ca bi'iniha re cabi:

—Uttiba Lázaro. <sup>15</sup> De lebi'i nna re'o lasia nuttuha du nía cumu unnuha nna ancana ttu nu tsee len lebi'i. Unnuha unna tsiasi lele neti. Larcala nna gualtsá sanga tsiasi sagüiari na.

<sup>16</sup> Tomás bi'ini rácana Cuachiha nna ráttebabi adí ca bi'ini rudheti ca tisa rule'e Jesús:

—Gualtsá guaba tsiasi, qui ttuba gatti lenri Ben-na.

<sup>17</sup> Atti bisína Jesús Betania nna binattebe dequi chila uca ttapa ubisa bigatsi Lázaro. <sup>18</sup> Lhe'esi Betania nna gaxxaba rena leni Jerusalén, attiba nu ridá benni ttu ura. <sup>19</sup> Ixeru ca benni Israel chi güiacana guanalhicana Marta lenna María, rutecana elha xen lasi lencana cumu se'e si'icana de utti dancaniha. <sup>20</sup> Atti bina Marta chi

daa Jesús, biríattebana diana guatsána Benniha. María nna níaba be'anna lhe'e yo'oha. <sup>21</sup> Marta nna rána Jesús:

—Ttirca dobalu ni, xa Benni bananie neti, lania nna läga utti danaha. <sup>22</sup> Ttiaca neti nna yua nnanna bixaba innábalu leni Tata Do Iyyabaaha, lee nna gutebe nua lenlu.

<sup>23</sup> Jesús becabie re na:

—Eyacabani danluha attu libe.

<sup>24</sup> Marta nna rána Jesús:

—Chiba yua nna güeyocabani unná gansi chi beacani ca nu yatti-na attu libe, atti isía sá lhuxa.

<sup>25</sup> Jesús re na:

—Neti anca benni runi reacani ca nu yatti-na lhe rutea elha nabani ttu dia lii lhe. Nu tsia leni neti nna masquiba chi uttina güeyacabinna attu libe. <sup>26</sup> Iyába ca benni anca bani ria lecani neti nna läga gatti ca nua ttu tsa. ¿Si gua ria lelu nu ria-ni?

<sup>27</sup> Marta nna rána:

—Agu, Benni bananie neti. Riaba lasia, lu ancalu Cristu, Xi'ini Tata Do Iyyabaaha, benni chi ga'ana isía yies lo yu-ni.

<sup>28</sup> Dequide rána anía nna, güiattebana gualisana xilani María, nianna sigába rána nua:

—Niba chi du Maestroha. Lee nna raxie lu.

<sup>29</sup> Dequide chi bina María nna, rigánina udulína diana atta du Jesús. <sup>30</sup> Jesús läga chi ute'e lhe'esiha, sna dube atta beti'e Marta.

<sup>31</sup> Atti biláni ca benni Israel rute elha xen lași leni María se'e lenna lhe'e yo'oha ruxunninina udulína biríana, lacana nna diattebacana denocana María, cumu ucaquinna ga lo baahaba dia nua sachesna. <sup>32</sup> Bisínba María atta du Jesús, bilábinna Benniha nna bedútteba xibini loe, nianna ráne:

—Ttirca dochibalu ni, xa Benni bananie neti, lania nna läga utti benni danaha.

<sup>33</sup> Atti biláni Jesús ribesna, anágua ca benni Israel dia lennaha lhe, su suba guadina itúba lhi'u lhe'e lastoo Benniha, bedú guatettebane. <sup>34</sup> Unnaba tisattebe re cana:

—¿Galiga guacatsile nua?

Lacana nna becabicana rácane:

—Utá begüia, tata.

<sup>35</sup> Jesús uresttebe. <sup>36</sup> Ca benni Israel nna ráttebacana:

—Gualgüiarga. ¡Cattipa racanie gueonna!

<sup>37</sup> Attu lhecana nna rácana:

—Unní beni biláni nu xua loniha. ¿Si bittuba uca gueonni gaxasná unna qui bittu gatti Lázaro?

### Lázaro beaquinna

<sup>38</sup> Jesús su suba bedeadina lhi'u lhe'e lastooe attu libe atti bisíne ro'o belea do lhe'e iyyattooha. Unnuha nua ancana baa. Leni ttu iyya xeniba to ro'o nua. <sup>39</sup> Nianna, re:

—Gualcua iyya-na.

Marta dana nu yattiha nna ráne:

—Xa Benni bananie neti, gaxa chiba rureonna, cumu chi uca ttapa ubisa atti uttina.

<sup>40</sup> Jesús re na:

—¿Si läba ria lu, gansi tsia lelu nna gugüiabalu nu xxeni ra le Tata Do Iyyabaaha?

<sup>41</sup> Utúabacana iyyaha nna ulhidhatteba lo Jesús begüie lo bea-na, nianna re:

—Xquixarulu, xa Tata, cumu bienbinlu quia. <sup>42</sup> Neti nna gua yuba, lu nna satíaba rieninlu quia, ttiaca de ca benni se'e-niba nna ria aná, qui tsia lecani gualí lu udhelhalu neti.

<sup>43</sup> Dequide re anía nna uresi'e idisa re:

—¡Lázaro, bería na!

<sup>44</sup> Nu yattiha nna detubiba lari ni'ani lhe náni lhe beríana, detubiguaba lari loni lhe. Jesús re ca benni se'e nía:

—Gualedhasi na ca lar-na, qui aca edána.

### Ca nu anca nu lo gue ca nu Israel boquinna iquicani utticana Jesús

(Mt. 26:1-5; Mr. 14:1-2; Lc. 22:1-2)

<sup>45</sup> Ixeru ca nu dia leni María güia lecani Jesús atti biláquinna nu benie. <sup>46</sup> Ttiaca attu lhecana nna güiattebacana guattixxi'aquinna ca fariseo gue nu beni Jesús. <sup>47</sup> Nianna ca nu lo gue ca bixxudiha lencana ca fariseo bottupattebacana ca uxtisi gue ca benni Israel, nianna ráttebacana ca unnuha:

—¿Bila unri nnanna? Unbiyuu requina nna ixe lhaba ca milagru runi unná. <sup>48</sup> Gansi uguelhabari anába na requibana, iyába benni tsia leni gueonna lania nna ca nu rinnabia gue Roma nna isíaba ca nua utse'e locana yotu anca le'a gueri-ni lhe yies gueri-ni lhe.

<sup>49</sup> Ttu nu sela len lacana lána Caifás, ancana bixxudi xxeni rinnabia guecani la ida nna unnena rána:

—Lebi'i nna tsa läga yule, <sup>50</sup> niguaba lä ritedeenle dequi tseerla anca len ri'i gatti ttuba benni cuenta gue ttu yiesi, attichula iyába benni gattina.

<sup>51</sup> Caifás nna läganu yu'u iquini nua unnena. De ancabana bixxudi xxeni rinnabia la idaha nna rána anía. Unnebana ca tisa bete Tata Do Iyyabaaha lenna qui quixxi'ana Jesús gattie qui quixe nu dica quixa ca benni Israel. <sup>52</sup> Bittuguaba sunru qui lhá ca benni Israel, anáguaba gatti guabe qui ottupe iyárecha ca xi'ini Tata Do Iyyabaaha se'e gatti laduba. <sup>53</sup> Larcala nna bedaa la sá nna boquinna iqui ca nu lo gue ca benni Israel utticana Jesús.

<sup>54</sup> Denua nna lärga güequi Jesús ule'e loe leni ca benni Israel. Beríattebe lo yu lá Judea deyye gaxxaba daca lo yu bisi atta re ttu yiesi lá Efraín. Níaba güequie leni ca bi'líni rudheti ca tisa rule'e.

<sup>55</sup> Atti chi deoba isía laní gue ca benni Israel nu te láni Pascua, ixeru benni se'e lhe'e adí ca yiesi diacana Jerusalén qui eyacacana nu nari lo Tata Do Iyyabaaha attiba labicana runcana. <sup>56</sup> Lacana nna requicana reguilacana Jesús, atti reti'a loescani lhe'eli'a gue yotuha nna rinnaba tisatteba loescani rácana:

—¿Bi raquinle? ¿Si güitachu nua laní aca, bittuba aca?

<sup>57</sup> Ca bixxudi anca nu loha lencana ca fariseo nna chi unnabiaciona rácana ca benni, gansi nuxa ttu benni yuna gaxa requi Jesús, quixxi'a ttena qui tsiacana sadaxxucana Benniha.

### María rigu'una seti ni'a Jesús

(Mt. 26:6-13; Mr. 14:3-9)

**12** A xxupa ubisa deoba isía laní Pascua, Jesús güie lhe'esi lá Betania atta do Lázaro bi'ini benie beaquinbi dequide chi uttibi. <sup>2</sup> Ca benni se'e lhe'e lisi Lázaro bencana ttu rse qui go lencana Jesús. Marta nna riga'ana lhe'e ca platuha, Lázaro nna labi bi'iniha ttu ca benni do lanie ro'o mexaha go etta. <sup>3</sup> María bedaxxuttebana attiba medi litro seti rure xixxi daca yaxi, nu anca ttaga'a gue ttu iyya te láni nardo, ulu'uná ni'a Jesús. Lenla nna leni itsiquibani bodibisna ca ni'a Benniha. Betú rechaba lhe'e yo'oha bebe ts'i'i setiha. <sup>4</sup> Ttiaca Judas Iscariote, ttu nu sela guaba len ca

bi'ini rudheti ca tisa rule'e Jesús, nu utene las ná ca nu utticane unnena rána:

<sup>5</sup>—¿Biaca lä bito'o seti rure xixxi-ni qui dhi ca benni bittu te guecani belhi quixacana seti-na, cumu gua daca bunna nu ridí ttu benni gue tsunna gayua (300) ubisa sina?

<sup>6</sup> Judas nna läga gualínna de ca nu bittu te guecaniha nua runna rána anía. De ancabana ubana nuarca rána anía, de laguabana denna beduti yu'u belhiha lhe lana nna chiba ancabienna rudaxxu sigána belhi ru'u lhe'e nua. <sup>7</sup> Nianna, rá Jesús Judas:

—Begüeelhunna. Run bunna aná qui chi bedú tseea gansi chi bisía sá igatsia. <sup>8</sup> Cumu ca benni bittu te guequinna satíaba tse'e ca unná len lebi'i, ttiaca neti nna läga aní dhoa len lebi'i ttu dia lii.

<sup>9</sup> Ixeru ca benni Israel binacana dequi níaba do Jesús, lacana nna güiattebacana nía. Läga sunru güegüia Jesús diacana, dia guabacana qui iláquinna Lázaro nu beni Jesús beaquinna dequide chi uttina. <sup>10</sup> Ca nu lo gue ca bixxudiha nna boquinnatteba iquicani utti guabacana Lázaro, <sup>11</sup> cumu de lo ni'a gueni nna ixeru ca benni Israel chi biriescana len lacana. Ca unnuha nna chi ria lecani Jesús.

### Jesús ute'e lhe'e yiesi Jerusalén

(Mt. 21:1-11; Mr. 11:1-11; Lc. 19:28-40)

<sup>12</sup> Ixeru benni güia laní Pascua. Betteyú sá nna binacana chi daa Jesús gue'e lhe'e yiesi Jerusalén. <sup>13</sup> Laniala nna uchúcana dina qui dhencana, atti biriattebacana diacana esácana Benniha ribesi'acana rávana:

—¡Xxeni ra lelu o! ¡Carbárulu! ¡Lu ancalu benni udhelha Tata Do Iyyabaaha! ¡Carbárulu! ¡Lu ancalu nu innabia ri'itu ca benni Israel-ni!

<sup>14</sup> Jesús guatti'e ttu burru cuiti, nianna udottebe cu'e nua, attiba rá lo ca sitsi gue Tata Do Iyyabaaha:

<sup>15</sup> Bittu gasinle, lebi'i ca benni se'e lhe'e yiesi Sión;

Gualugüiarga, ni benni rinnabia gueleha dee doe cu'e ttu burru cuiti.

<sup>16</sup> Ca bi'ini rudheti ca tisa rule'e nna läga guadú lecabí gue nu raca lania. Dequide liba chi beopi Jesús iyyabaaha bele'e loe lee anque benni ra xxeni leni, lania liba guadú lecabí iyába nu

bedhacacana Benniha nna chi dia lo ca sitsi gue Tata Do Iyyabaaha, aníaba guate.

<sup>17</sup> Ca benni use'e len Jesús begüiacana beaxie Lázaro atti yu'ubi lhe'e baa atta yu ca nu yatti-na, qui benie beaquinbi, lacana nna rixxi'acana gue nu biláquinna. <sup>18</sup> Larcala nna biría ca benni gualedacana Benniha, cumu binacana gue milagru xxeni benie.

<sup>19</sup> Ca fariseo nna rá loescani:

—Urga xa, läga ridári lo unná. Gualugüiarga, iyárechaba ca benni diacana denocana unná.

### **Jesús rixxi'e gattie**

<sup>20</sup> Lagüi gue ca benni dia laní lhe'e yiesi Jerusalén qui cuequixxencana Tata Do Iyyabaaha, sela ttu chupa ca benni Grecia.

<sup>21</sup> Ca unnuha nna ubigattecacana atta du Felipe, bi'ini beaca lasbi yiesi Betsaida nu re lo yu gue Galilea, unnabacana lenbi rácan bi:

—Xa tata, raca letu ilentu Jesús.

<sup>22</sup> Felipe nna güiattebabí guayúbi Andrés, laniala nna irupabacabi güiacabi guattixxi'aquinbi Jesús. <sup>23</sup> Benniha nna re cabi:

—Bisíaba ura neti Benni unbiyuu daa iyyabaaha nna eyopia iyyabaaha qui ule'e lo neti anca Benni ra xxeni leni. <sup>24</sup> Neti nna gualíbatia ria le, gansi xua xuxtila nna bittuba tsu'e lhi'u yu qui gattie, delába usue qui e'eyu beotsi guee nna tturba benniha eya'ana. Ttiaca gansi gattie nna qui e'eyu beotsi guee nna lania nna xxenru xua xuxtila utee. <sup>25</sup> Benni raca xxattinna gue elha nabani te gueni yies lo yu-ni nna unitibana elha nabani ralhana dhína iyyabaaha, benni rerú iqui rerú leni elha nabani te gueni yies lo yu-ni nna aca banba nua ttu dia lii lo Tata do Iyyabaaha. <sup>26</sup> Gansi nuxa ttu benni raca leni acana nu ixuutia unna nu raca lasia nna itana etenalhana neti. Unnuha nna dhona atta dhoa. Nuxa benni rixuuna lo sina quia nna Tata quia nna unie acana nu ra xxeni leni.

### **Jesús riguixxi'abi dequi utticane**

<sup>27</sup> 'Lora nnanna tte nna rudú guate juisiabana lasia. ¿Bila innía? ¿Si innía: "Tata, bodiláchi neti lo elha disa-ni"? Ttiaca nna de unnuhala nna delha. <sup>28</sup> Tata, bele'e lo lu ancalu Benni ra xxeni leni.

Laniala nna bieni tsil'i ttu Benni unnee iyyabaaha re:

—Chiba bele'e loa neti anca Benni ra xxeni leni. Nnanna nna ule'e loa attu libe neti anca Benni ra xxeni leni.

<sup>29</sup> Ca benni se'e nía nna bienbaquinna. Ttulhecana nna rácana:  
—Uyu'u beba.

Adícaná nna rácana:

—Ttu ingeliba Ben-na unnee belise Ben-na.

<sup>30</sup> Jesús becabie re cana:

—Läga lo ni'a quionna bieni ts'i-na, sinuqui lo ni'a gueba leonna. <sup>31</sup> Nnanna nna bisíaba sá aca elha uxtisi gue ca benni se'e yies lo yu-ni. Nnanna nna bisíaba sá uría la Tata Do Iyyabaaha nu xxegüi rinnabiana ca benni se'e yies lo yu-ni. <sup>32</sup> Ttiaca gansi chi ulhidhacana neti güetsaa lo ya crusi nna lania nna iyába benni gaxia qui itacana len neti.

<sup>33</sup> Leni ca tisa-ni nna runie ttedaani benni gaxasná gattie. <sup>34</sup> Ca benni se'e nía nna becabicana guee rácana:

—R'ilitu nna yutu, lo ca ley boca'ana Moisés len ri'itu nna rá: Cristuha nna tsaba dho Benniha. Lu nna ¿biacala rálu dequi raca duelha ilhidhacana Benni unbiyuu daa iyyabaaha lo ya crusi? Ganna anía nna ¿Núla nua anca Benni unbiyuu daa iyyabaaha ganna?

<sup>35</sup> Jesús re cana:

—Nnanna nna gua dorba len lebi'i, neti anca xieni nu rudani lagüi guele, ttiaca attu sattirba. Larcala nna laca dorua len lebi'i nna gua rudanru xieni-ni guele, gualdhá dhuti qui lä iyaxxuni ela le, cumu nu requi lhe'e atta chulha nna ni lä yu nua ga nua diana. <sup>36</sup> Gualtsia lele neti, Benni anca xieni-ni, nnanna gua dorua len lebi'i, qui acale xi'ini Benni anca xieni-ni.

Dequide rá Jesús anía nna deyyattebe, becatsitteba loe cana.

### Ca nu Israel bittu ria lecani Jesús

<sup>37</sup> Masquiba chi beni Jesús ixeru milagru aní lo ca benni nna bittu ria lecanie. <sup>38</sup> Anía liba nna guaxxína uca nu rá ca tisa unne profeta Isaías atti rábi:

Nurla ria leni gue nu rinnetu-ni, xa Tata.

Nurla rite deenna gue nu xxeni ra le Tata Do Iyyabaaha chi bele'enie cana lhe.

<sup>39</sup> Denua nna nuarca bittu uca tsia lecani Jesús, cumu ráguba Isaías lo ca sitsi-na:

<sup>40</sup> Tata Do Iyyabaaha benie qui acacana attiba nu xua loni, benie qui aca lastoocani attiba iyya lhe qui masquiba gua rugüiacana bittu iláquinna

masquiguaba te elha rieni guecani lhe bittu ttedaaquinna.

“Anía nna qui bittu eyequicana esíacana len neti, neti nna eyonia cana”,

rá Tata Do Iyyabaaha.

<sup>41</sup> Anía rá Isaías, cumu bilenbi anca Jesús benni ra xxeni leni. Denuala nna utixxi'abi gue Benniha.

<sup>42</sup> Läquiga de nua nna axta ca nu lo gue ca benni Israel, ixerucana güia lecani. Ttiaca de rasquinna lo ca fariseo nuarca bittu rixxi'acana aní lo benni, qui bittu cueacan cana ttu tsaba lhe'e ca yo'o atta rudheticana ca tisa gue Tata Do Iyyabaaha. <sup>43</sup> Cumu radirla lecani eya'an tseecana len benni, attichula len Tata Do Iyyabaaha.

<sup>44</sup> Jesús unnee idisa re:

—Benni tsia leni neti nna läga sunru neti nua ria le nua, riaguaba le nua Tata quia Benni udhelhe neti. <sup>45</sup> Benni rilenna neti nna rilágubinna Benni udhelhe neti. <sup>46</sup> Neti anca xieni, delha yies lo yu-ni qui iyába ca benni tsia lecani neti nna bitturu tse'ecana atta chulha. <sup>47</sup> Ca benni iyienini ca tisa quia-ni nna bittu udocana tisa gueque nna läga neti unia elha uxtisi guecani qui tsia nitticana, cumu neti nna läga delha qui unia elha uxtisi gue ca benni qui tsia nitticana, daba neti qui odiláya cana. <sup>48</sup> Nu cu'u ni'ani neti nna bittu udo nagani gue nu ria nna gua teba nu unna tsia nitti nua. Ca tisa chi unnea-niba unque tsia nittina gansi chi bisía sá lhuxa. <sup>49</sup> Cumu neti nna läganu anca quia rinnea, Tata quia Benni udhelhe netiha Bennihaba re neti bixa innea lhe quixxi'aya lhe. <sup>50</sup> Neti nna yua, nu rá Benniha un benni nna ancana nu uni gatta elha nabani guecani ttu dia lii. Larcala nna nu rpea le-ni nna rixxi'aba na attiba rá Tata quia neti innea.

### Jesús riguíe ni'a ca bi'ini rudheti ca tisa rule'e

**13** Deoba laní Pascua, Jesús yube chiba bisía ura atti edee yies lo yu-ni qui esíne atta do Tata gueha. Attiba ucanie gue ca benni guee se'e yies lo yu-ni nna aníaba ucanie gue ca bi'iniha axta atti bisía sá uttie. <sup>2</sup> Atti chi do Jesús len ca bi'ini rudheti ca tisa rule'e go rse nna nu xxegüiha nna chila uxí yiena Judas Iscariote xi'ini Simón, qui utena Benniha las ná ca nu utticane. <sup>3</sup> Jesús yube, iyába chi bete Tata gueha las nee, atta do Bennihaba biríe dee yies lo yu-ni lhe níaguaba esíne lhe. <sup>4</sup> Lee nna udulíttebe utúe lari nucueha, bedaxxuttebe attu lari bexxica lhe'e. <sup>5</sup> Atti uta'attebe inda

lhe'e ttu xiga xeni, nianna udulottebe utié ni'a ca bi'ini rudheti ca tisa rule'e. Leni lari xica lhe'e Benniha nna rodibisie ni'a ca bi'iniha.<sup>6</sup> Atti die quie ni'a Simón bi'ini lágua Pedro nna bi'iniha nna ráttebabí:

—¿Si lu quilu ni'aya, Benni bananie neti?

<sup>7</sup> Jesús becabie re bi'iniha:

—Nnanna nna läga radú lelu nu runia-ni, lenla nna guasadúba lelu.

<sup>8</sup> Pedro nna rábi Benniha:

—¡Locachirba uguelha lu quilu ni'aya!

Jesús becabie re:

—Gansi bittuba quia ni'alu nna läga acalu benni quia.

<sup>9</sup> Simón bi'ini lágua Pedro nna rábi Benniha:

—Ganna anía nna xa Benni bananie neti, bittu sunru ca ni'aya-ni quilu, quíguabalu iquia lhe ca náya lhe.

<sup>10</sup> Jesús becabie re:

—Ttu benni chiba udina, lägabi reasin nua gadina attu libe. A suna ni'aba nua eyari, cumu itúba nua chi anca nari. Lebi'i nna chiba ancale nari lo Tata Do Iyyabaaha, masquiba lä iyále.

<sup>11</sup> Lee nna yube nuxcan nua utecane las ná ca nu utticane, larcala re: “Läga iyále chi ancale nari.”

<sup>12</sup> Dequide utié ni'a ca bi'iniha nna beocuttebe lari rucueha atti bedottebe ro'o mexaha, nianna ráttebe ca bi'iniha:

—¿Si guadú lele bi diale nu benia-na?<sup>13</sup> Lebi'i nna rále neti anca Benni rule'enie le, Benni bananie le lhe. Gualíbinle, cumu unnuhaba anca.<sup>14</sup> Ganna anía nna neti ancala Benni bananie le lhe Benni rule'enie le lhe nianna utía ni'ale, anáguaba lebi'i nna labíaba quii ni'a loesle.<sup>15</sup> Neti nna chi bele'a gaxasná unle qui aníachu nna lebi'i nna unle atti benia len lebi'i.<sup>16</sup> Neti nna gualíbatia ria le, ni ttu benni reni sina bittu ancana nu ra xxeniru leni atti Benni bananie na, niguaba ttu benni rácana mandadu lhe läga anca nua nu raru xxeni leni atti benni ridhelhe na gaxa tsiana.<sup>17</sup> Lebi'i ca benni chi yu unní, carbárule gansi udole tisa unle na.

<sup>18</sup> 'Läga iyáleonna rpea le aná, neti nna gua yuba nupaxale chi becueea. Ttiaca nna labíaba saxxína aca nu rá lo ca sitsi gue Tata Do Iyyabaaha, atta rá: “La nu ro yetta len netihaba bequinona neti.”

<sup>19</sup> Nnannali chi rixxi'atia le antisla aca unní, qui gansi chi ucana nna lebi'i nna tsia lele, neti nna anca nu chi ria le anca.<sup>20</sup> Neti nna

gualíbatia ria, benni ulabina benni idhelha nna netiba nua rulabi nua, benni ulabina neti nna Benni udhelhe netihaba benniha rulabina.

### **Jesús rixxi'e, Judasba nua utene las ná ca nu utticane**

(Mt. 26:20-25; Mr. 14:17-21; Lc. 22:21-23)

<sup>21</sup> Dequide rá Jesús anía nna bedú guatettebana lee, nianna re:

—Neti nna gualíbatia rpea le, nuxa ttule nna utele neti las ná ca nu utticana neti.

<sup>22</sup> Ca bi'ini rudheti ca tisa rule'e nna udulottebacabi begüia lo loescabi, ni lä yucabi nu gue nua rinne Benniha. <sup>23</sup> Ttu ca bi'iniha nna bi'ini racaxxattani Jesús guebiha nna dobi gaxxaba cuitta Benniha. <sup>24</sup> Simón bi'ini láguba Pedro nna bele'ettebinbi bi'iniha senni qui innába tisabi Benniha nuxa nua re uni anía. <sup>25</sup> Bi'iniha nna ubigattebabí gaxxa cuitta Jesús, nianna unnaba tisattebabie rábi Benniha:

—Benni bananie neti, ¿nú tu nua?

<sup>26</sup> Jesús ráttebe:

—Nu ugüea ttaxtila odibidha-ni, unnuha nua.

Laniala nna bodibidhe ttu pedazu ttaxtila begüee Judas Iscariote xi'ini Simón. <sup>27</sup> Dequide uto nua ttaxtilaha nna uta'atteba nu xxegüiha lhe'eni. Jesús re na:

—Nu chi relelu unlu nna tsala ben nua.

<sup>28</sup> Ttiaca ni ttu ca bi'iniha sia ro'o mexaha, bittu guadú lecabí biaca rá Benniha anía. <sup>29</sup> Judas galá denna beduti yu'u belhi, nuarcala ttulhecabí nna ucaquinbi ga rába Jesús nua tsiana sayo'ona nu reasa gue laní o ugüena ca benni bittu te guecani ttu latti belhi. <sup>30</sup> Dequide chi uto Judas ttaxtila begüee Benniha na nna biríattebana. Lo relaba chi anca lania.

### **Jesús rute attu tisa cubi len ca bi'ini rudheti ca tisa rule'e**

<sup>31</sup> Dequide chi biría Judas, nianna rátteba Jesús:

—Nnanna nna ule'e lo anca nu ra xxeni leni, neti Benni unbiyyuu daa iyyabaaha, de neti nna ule'e lo anca Tata Do Iyyabaaha Benni ra xxeni lee lhe. <sup>32</sup> Ganna neti runia rule'e lo anca Tata Do Iyyabaaha Benni ra xxeni lee nna anáguaba Benniha, unguabe qui ule'e lo anca nu ra xxeni leni. Chi tte deoba unie nua. <sup>33</sup> Xa xi'into quia, attu sattirba doa len lebi'i. Lebi'i nna eguilale neti. Nnanna nna

upea le attiba rpea ca nu lo gue ca benni Israel-na: Lebi'i nna bittu aca edále atta eyya'aya.<sup>34</sup> Ttu ley cubi utea len lebi'i: Aquin gue loesle. Attiba ucatia guele, anía aquin gue loesle.<sup>35</sup> Gansi aquin gue loesle nna iyába ca benni ttedaaquinna gualíba ancale benni bedheti nu bele'a.

### **Jesús rixxi'e, Pedro nna bittu dhi ro'obi gualí anca bienbi benniha**

(Mt. 26:31-35; Mr. 14:27-31; Lc. 22:31-34)

<sup>36</sup> Simón bi'ini láguaba Pedro nna unnaba tisabi Jesús rábi Benniha:

—¿Xa Benni bananie neti, gala tsialu?

Jesús becabie re:

—Lu nna läga aca edálu atta eyya'aya nnanna lenla nna esíaguabalu atta deyya'aya.

<sup>37</sup> Pedro nna rábi Benniha:

—¿Biaca bittu aca ettenoalu nnanna xa Benni bananie neti? ¡Neti nna chiba berú iqui berú lasia elha nabani quia utea cuenta guelu!

<sup>38</sup> Jesús becabie re:

—¿Si gualíguinlu erú iqui erú lelu elha nabani guelu utelu cuenta quia? Cumu neti nna gualíbatia ria: “Antisla ixxá ro'o berudi-na, lu nna chila beyonna libe bittu ridí ro'olu gualí anca bienlu neti.”

### **Jesús anque neda dia atta do Tata Do Iyyabaaha**

**14** Jesús re ca bi'ini rudheti ca tisa rule'e:

—Bittu aca guatenle. Gualtsia lele Tata Do Iyyabaaha, gualtsiaguaba lele neti lhe.<sup>2</sup> Lhe'e lisi Tata quia do iyyabaaha nna ixe atta tse'e benni sia nía. Gansi läba anía anca nna lägabi upea le aní. Nnanna nna eyya'aya qui sen tseea atta tse'ele.<sup>3</sup> Dequide eyya'aya sen tseea atta tse'ele nna dedaaya attu libe qui echea le len neti, qui tse'eguabale atta dhoa.<sup>4</sup> Lebi'i nna chiba anca bienle neda dia atta eyya'aya.

<sup>5</sup> Tomás rábi Jesús:

—Läga yu ri'itu gaxa eyyalu, xa Benni bananie ri'itu. Larcala nna ¿tti modu yutu bixa neda nua?

<sup>6</sup> Jesús becabie re:

—Netiba nua anca neda dia atta do Tata Do Iyyabaaha. Anca nu rule'e nu anca gualí lhe anca nu rute elha nabani ttu dia lii lhe.

Ni ttu benni bittu aca gueni isínna len Tata quia gansi läba neti unia qui isínna len Benniha.<sup>7</sup> Gansi lebi'i chi anca bienle neti nna chiguaba anca bienle Tata quia. Nnannali chi anca bienle, cumu Benniha bunni rugüiale.

<sup>8</sup>Felipe nna rábi:

—Benni banani ri'itu, bele'en ri'itu Tata gueriha, care'aba nua nna ucatte.

<sup>9</sup>Jesús becabie re:

—Felipe, isá chi uca requia len lebi'i nna ¿si itú ttuali nna bittu chi yulu nuxa anca? Benni chi bilenna neti nna chiguaba bilen nua Tataha. ¿Gasná nua nna lu nna rálú: “Bele'en ri'itu Tataha”?<sup>10</sup> ¿Si läba gua ria lelu, neti nna ttuba Benni anca lenia Tataha, Tataha nna ttuba Benni anca Benniha lenie neti? Ca tisa rinnea-ni nna läganu anca quionni rinnea, nu anca gue Tata Do Iyyabaaha Benni yu'u lhe'e lastooa-niba Ben-ni rinnea. Labe runie ca milagru runia.<sup>11</sup> Gualtsia lele, neti nna ttuba Benni anca lenia Tataha, Tataha nna ttuba Benni anque lenie neti. Gansi bittuba nna ladiba gue nu rilenle runia gualtsia lele.<sup>12</sup> Neti nna gualíbatia ria, nu tsia leni neti nna unguabana ca nu runia-ni. Nu xxenrula unna cumu neti nna eya'aba atta do Tata quia.<sup>13</sup> Iyába nu innábale len Tataha rudettile láya nna gunba nua, qui anáchu neti xi'in Tata Do Iyyabaaha, de nu runia-ni nna ule'e lo anca Benniha Benni ra xxeni leni.<sup>14</sup> Bixaba innábale rudettile láya nna gunba nua.

### **Jesús rucan yienie idhelhe Espíritu gue Tata Do Iyyabaaha**

<sup>15</sup>'Gansi lebi'i raquinle quia nna gudobale tisa gue ca tisa runia le mandadu unle.<sup>16</sup> Neti nna güinnababa lo Tata quia qui idhelhe attu Benni aca lanie le, qui dhoe len lebi'i ttu dia lii.<sup>17</sup> Benniha nua Espíritu gue Tata Do Iyyabaaha, Benni rule'enie le nu anca gualí. Ca benni se'e yies lo yu-ni nna läga ulabicana Benniha, cumu läga anca biaquinna Benniha, niguaba lä riláquinne lhe. Ttiaca lebi'i nna chiba anca bienle Ben-na, cumu len lebi'iba doe, dhoe lhe'e lastoole lhe.

<sup>18</sup>'Läga oca'an neti le attiba ttu bidabi, esíaba neti qui dhoa len lebi'i.<sup>19</sup> Chi tte deoba bitturu iláni ca benni se'e yies lo yu-ni neti, lebi'i nna güilabinle neti. De anca bania nna lebi'i nna guaca banguale.<sup>20</sup> Gansi chi bisía sá aca nu ria-ni nna lania nna ttedeenle neti nna ttuba Benni anca lenia tata quiaha, lebi'i nna ancale ttuba

benni leni neti, neti nna anca ttuba Benni len lebi'i. <sup>21</sup> Benni chi bieninna ca tisa runia le mandadu unle-na lhe udonia tisa gueque lhe unnuha nua gualíguinna raquinna quia. Benni raquinna quia nna Tata quia nna acanie gueni. Anáguaba neti acaguabatia gueni, ule'e loa len lana nuxa anca lhe.

<sup>22</sup> Judas nu bittu lá Iscariote nna ráne:

—Tata, ¿biaca suntteba len ri'itu ule'e lolu nuxa ancalu, bittu ule'e lolu leni iyá ca benni nuxa ancalu?

<sup>23</sup> Jesús becabie re:

—Benni raquinna quia nna udoba nua tisa gue ca tisa quia-ni. Tata quia nna guaca banie gueni. Tata quia lenie neti nna itatu tsu'utu lhe'e lastooni. <sup>24</sup> Nu bittu raquinna quia nna läga rudo nua tisa gue nu rixxi'aya. Ca tisa rieninle rinnea-ni nna läga anca ca unní nu anca quia, nu anca gue Tata quia Benni udhelhe netiha bunni rinnea.

<sup>25</sup> 'Iyábunni rixxi'atia le, nnanna doa len lebi'i. <sup>26</sup> Ttiaca Benni aca lanie leha, delába Espíritu idhelha Tataha cuenta quia, Benniha ule'enie le iyába, orexxe lele iyá nu chi rpea le lhe.

<sup>27</sup> 'Neti rutea xen su le lenle. Xen su le guele rutea lenle-na bittu ancana loesi xen su le rute ca benni se'e yies lo yu-ni. Nuarca bittu aca guatenle, lä gasguabinle lhe. <sup>28</sup> La chiba bieninle ria: "Eyya'aba, lenla nna esíaya qui dhoa len lebi'i attu libe." Gansi gualíguinle raquinle quia nna rana be'o juisia lele atti rpea le: "Eyya'aya atta do Tata quia", cumu Benniha anque Benni raru xxeni lee atti neti.

<sup>29</sup> Nnannali chi rixxi'atia le, qui gansi chi uca nu ria-ni nna tsia lele.

<sup>30</sup> 'Lärga bitterga isá rinne lania le, cumu nu xxegüi rinnabia ca benni se'e yies lo yu-ni nna chi dana, masquiba läga unnuha rinnabiana neti. <sup>31</sup> Ttiaca anába te aca, qui ttedaani ca benni, neti nna racatia gue Tata quia, runia nu re neti unia lhe.

'Gualdu lí. Gualtsá.

### Jesús anque attiba ttu ya besuli tsee

**15** Jesús re:

—Neti anca ttu ya besuli tsee. Tata quia nna anque Benni ruyúe na. <sup>2</sup> Iyába ca xiqui ya besuli-na, ca nu bittu ribía guecani nna rigúabe cana. Iyába ca nu ribía guecani nna richúe locani lhe rigúe nu bisi guecani lhe qui cuia chietti guecani. <sup>3</sup> Ca tisa chi utixxi'atia lenba chi benque acale benni nari lo Tata Do Iyyabaaha attiba ttu

yaga ritúa nu bisi gueni.<sup>4</sup> Attiba dua len lebi'i, anía gualtse'e len neti. Attiba ttu xiqui yaga, gansi bittuba yaxxu nua yagaha nna läga aca ute nua nu xixxi. Anáguaba lebi'i, gansi bittuba se'ele len neti nna läga aca unle nu tsee.

<sup>5</sup> 'Neti anca ya besuli, lebi'i nna ancale ca ná ya besuli. Nu gua duna len neti nna gua duguaba len lana, unnuha nna cuia juisia gueni. Tsa läga aca guele unle ttu bixa gansi bittuba dua len lebi'i.

<sup>6</sup> Ca nu bittuba se'ecana len neti nna iríaba ca nua iru'unacana. Ancacana attiba ca xiqui yaga nu dequide chi ribiscana nna redígatteba benni cana qui tsiacana lo gui itecana.

<sup>7</sup> 'Gansi gua se'ele len neti lhe bittu ixulhinle nu rá ca tisa quia-ni lhe lania nna bixaba raca lele, gualhnaba nna guadibale nua.<sup>8</sup> Tata quia benie runle rule'e lo anque Benni ra xxeni lee, ganna unle nu anca tsee, attiba ttu yaga ribiaxxatta gueni, anía liba nna ule'e lo lebi'i rguaba nna gualíga ancale benni rudheti ca tisa rule'eha.

<sup>9</sup> Neti nna racatia guele attiba racani Tataha quia. Lebi'i nna gualusigui gualtse'e len neti, benni racatia guele.<sup>10</sup> Gansi gudole tisa gue ca tisa benia le mandadu unle-na, lania nna guase'ele len neti, benni racatia guele, attiba neti rudoa tisa gue nu beni Tata quia neti mandadu unia, dua lanie lhe lee nna racanie quia.

<sup>11</sup> 'Anába rpea le, qui ebe itta lele itupa lenle neti, anía liba nna edaca lele itú iqui itú lele.<sup>12</sup> Unní anca ley quia: aquin gue loesle attiba ucatia guele.<sup>13</sup> Tsa läga nu benni te racaruinna gue ca benni se'e tsee lenna atti ttu benni dhielhana uttican na qui lhá ca benni se'e tsee lenna.<sup>14</sup> Lebi'i ancale ca benni se'e tsee lania gansi udole tisa unle nu chi rpea le unle.<sup>15</sup> Lärgaga upea le benni tto'o lo sina quia, cumu nu tto'o lo sinaha nna läga yu nua gaxasná anca gue nu baninna na. Benni se'e tsee len netiba upea le nnanna de chi bele'etia le iyába nu bina rá Tata quia.<sup>16</sup> Läga lebi'i becueele neti, neti liba becueea le. Chi bose'a le qui tsiale unle nu anca tsee, nu anca tsee unleha nna uchíana, Tata quia nna gutebe iyá nu innábale lenie udettile neti.<sup>17</sup> Unní rodha'ana unle: Aquin gue loesle.

### Ca benni bittu ria lecani Jesús bittu aca uyúcana ca benni ria lecani benniha

<sup>18</sup> Jesús re:

—Gansi ca benni bittu ria lecani neti se'e yies lo yu-ni bittu aca uyúcana le nna gualodhá lele primerla neti bittu uca uyú ca unná.

<sup>19</sup> Ttirca ancarle benni baba len lacana, lania nna guacabaquinna guele attiba racaquinna gue ca benni baba len lacana. Ttiaca lebi'i nna lärga ancale benni baba yies lo yu-ni. Neti nna chi becueea le lhe'e ca benni baba yies lo yu-ni. Nuarca bittu raca uyúcana le.

<sup>20</sup> Gualorexxa lele gue nu chi rpea le: “Ni ttu benni tto'o lo sina bittu ancana nu ra xxeniru leni atti Benni bananie na.” Gansi neti besía le ca unná, anáguauba lebi'i usiaguaba le ca unná le. Gansi bedo nagacani gue nu ria nna udoguaba nagacani guele. <sup>21</sup> Iyá unní udhacacan le lo ni'a quia de ria lele neti, cumu bittu anca biaquinna Benni udhelhe neti.

<sup>22</sup> Ttirca bittuba bisíaya yies lo yu-ni lhe bittuguaba belisa cana lhe lania nna lägabi dia nitti ca unná, cumu läga yu ca unná gansi runcana nu lä anca tsee. Ttiaca nnanna nna tsa bittu te ro'ocani innácan: “Bittu yutu gansi runtu nu lä anca tsee.” <sup>23</sup> Nu rutía di leni neti nna rutía diguaba le nua Tata quia. <sup>24</sup> Ttirca bittuba benia ca milagru nu tsa nuttu nu chi beni aní locani nna tsa lägabi tulha te ttiaca nnanna nna chi biláquinna nu benia. Läquiga de unnuha nna lacana sa tica rutía diru lecani neti lhe Tata quia lhe. <sup>25</sup> Anába chi ga'ana aca, qui saxxína nu chi dia lo ca ley gue Tata Do Iyyabaaha se'e len lacana atta rá: “Locachirba bi lo ni'a guee nna xalhatteba betia di lecani neti.”

<sup>26</sup> Neti idhelha Benni aca lanie le, delába Espíritu Benni rule'e nu anca gualí. Benniha nna atta do Tata Do Iyyabaaha li iríe dee. Lee quixxi'e nuxa anca. <sup>27</sup> Anáguauba lebi'i lhe quixxi'aguabale quia, cumu atti udulolia bele'etia ca benni, lebi'i nna chi se'ele len neti.

**16** <sup>1</sup>Rixxi'atia le unní, qui tse'e tsitsile, bittu odha'anle ria lele neti. <sup>2</sup>Lebi'i nna ebea ca benni le lhe'e ca yo'o atta rudhetile ca tisa gue Tata Do Iyyabaaha, isía sá nna nuxaba uttin le nna aquinna sina gue Tata Do Iyyabaahaba nua runna unna anía.

<sup>3</sup> Anía uncana, cumu bittu anca biaquinna Tataha, niguaba neti.

<sup>4</sup> Rixxi'atia le unní, qui gansi chi bisíá sá satele aná nna lania nna exxa lele, neti nna chiba utixxi'atia le nu satele.

## Espíritu gue Tata Do Iyyabaaha ule'enie ca benni nu anca gualí

'Läga utixxi'atia le unní primera, cumu len lebi'iba doa.

<sup>5</sup> Nnanna nna chi eyya'aya atta do benni udhelhe neti, lebi'i nna niba ttule bittu rinnaba tisale neti innále: “¿Ga eyyalu?” <sup>6</sup>Ttiaca se'e si'ilale de utixxi'atia le nu rpea le-ni. <sup>7</sup>Neti nna rpeba le nu

anca gualí: Tseerla salfánale eyya'aya, cumu gansi bittuba eyya'aya nna läga isía Espíritu Benni aca lanie le. Ttiaca gansi eyya'aya nna lania nna idhelha Benniha len lebi'i.<sup>8</sup> Gansi chi bisía Benniha nna unie ttedaani ca benni bittu ria lecani Tata Do Iyyabaaha se'e yies lo yu-ni nú nua te tulha guecani, nú nua runi nu anca tsee lo Tata Do Iyyabaaha lhe nú nua satena lo elha disa ute Tata Do Iyyabaaha gansi chi benie elha uxtisi guecani lhe.<sup>9</sup> Unie ttedaaquinna lacana ancacana nu te tulha gueni de bittu ria lecani neti.<sup>10</sup> Unie ttedaaquinna neti anca benni runi nu anca tsee lo Tata Do Iyyabaaha. Denua nna chi deyya'aya atta doe, lebi'i nna lärga nurua neti ilenle.<sup>11</sup> Unie ttedaaquinna lacana nna dhibacana elha disa ute Tata Do Iyyabaaha cumu nu xxegüi rinnabia yies lo yu-ni nna chiba beni Tata Do Iyyabaaha elha uxtisi gue nua qui tsiana atta uyúna elha disa.

<sup>12</sup> 'Iixeru nu tetia upea le, ttiaca nnanna nna läga sadú lele nu innía. <sup>13</sup> Gansi chi bisía Espíritu gue Tata Do Iyyabaaha benni rixxi'a nu gualí, Benniha ule'enie le iyá nu anca gualí, cumu läganu anca gue Benniha innee, nu iyienbani Benniha inná Tata Do Iyyabaaha innee, quixxi'enie le iyába nu chi daa aca lhe.<sup>14</sup> Benniha nna unie ule'e lo anca Benni ra xxeni leni, cumu udaxxu ni'e nu anca quia nna quixxi'enie le.<sup>15</sup> Iyába nu anca gue Tata quia nna quiba anca nua. Denuala nna ria, Espírituha nna udaxxu ni'e nu anca quia qui quixxi'enie le.

### Nu tse'e si'ileha nna eyacana nu unna edaca lele

<sup>16</sup> 'Lärga biruatttega isá nna nuttur neti ilenle, bittuguuba isáttega aca nna chi edelenle neti attu libe.

<sup>17</sup> Ttulhe ca bi'ini rudheti ca tisa rule'e Jesús unnaba tisatteba loescabi rácabi:

—¿Bi diani nu rá Ben-na: “Lärga biruatttega isá nna nutturu neti ilenle, bittuguuba isáttega aca nna chi edelenle neti attu libe”? ¿Bi diani nu rá Ben-na: “Eyya'aya atta do Tata quia”?

<sup>18</sup> Lacabi nna rá loescabi:

—¿Bi diani nu rá Ben-na: “Lärga birua isá”? Tsa läga rite deenri bi gueonna rinnee.

<sup>19</sup> Jesús utedaattebanie rdacatu innába tisatue. Laniala nna re ri'itu:

—¿Si rinnaba tisa loesle gue bixa dia-ni nu ria: “Lärga biruattega isá nna nuttur neti ilenle, bittuguaba isáttega aca nna chi edelenle neti”? <sup>20</sup> Neti nna gualíbatia ria, lebi'i nna cuesle lhe tse'e si'ile lhe gue nu satea, laca ca benni se'e yies lo yu-ni nna eyo'o lecani. Ttiaca masquiba tse'e si'ile, lenla nna edaca lele. <sup>21</sup> Gansi chi deoba gali unto gue ttu nuila, si'irurba runna cumu chi bisía ura gueni. Ttiaca dequide chi uli untoha nna tsa rixulhin nua gue elha disa biyúna, cumu de re'o leni bisía attu benni yies lo yu-ni. <sup>22</sup> Anáguauba lebi'i, ttu nnanna bunna se'e si'ile, neti nna güetaba ettegüiaya le, lania nna eyo'o juisia lele. Unnuha ancana ttu elha redaca lee guele nu tsa nuttu nu dhana cuana.

<sup>23</sup> Gansi chi bisía la sá nna lärgabirua innába tisale neti gue ttu bixa. Neti nna gualíbatia ria, iyába bixa innábale leni Tata quia rudettile láya nna gutebe nua len lebi'i. <sup>24</sup> Axta nnanna lägabi chi unnabale lenie udettile láya. Gualnnaba nna guadíbale, qui edaca lele itú iqui itú lele.

<sup>25</sup> 'Iyába nu ria-ni nna rinnea-na leni ejemplu, ttiaca chi isía sá nna bitturu innea aná len lebi'i, sinuqui lhixxa su innea quixxi'atia le gue Tataha. <sup>26</sup> Gansi chi bisía sá nna lärga neti innába guele lo Tataha, lebi'iba nna innábale lenie udettile láya. <sup>27</sup> Cuinaba Tata quia racanie guele cumu lebi'i nna raquinle quia, de güia lele neti nna biríaya atta doe delha-ni lhe. <sup>28</sup> Atta do Tataha biríaya delha yies lo yu-ni. Nnanna nna odha'ana yies lo yu-ni qui eyya'aya atta do Tataha.

<sup>29</sup> Ca bi'ini rudheti ca tisa rule'e Jesús rácabi Benniha:

—Nnannarguaba nna rinnelu lhixxa suu, bitturu rinnelu leni ejemplu. <sup>30</sup> Nnannarguaba chi yutu lu nna iyába chi yulu. Tsa lägabi resinlu nuxa innába tisan lu. Denuala nna nuarca yutu, lu nna atta do Tata Do Iyyabaahaba biríalu dalu.

<sup>31</sup> Jesús becabie re:

—¿Si gualíga chi ria lele nnanna? <sup>32</sup> Uraha nna chiba daa nua ribigana, chiba bisía ura atti isatsa lhe'e loesle, coa ttuttubale udaxxu neda guele gaxa ladu tsiale, atturba oca'anle lania. Ttiaca läga tturu neti dua, gua duba Tata quiah len neti. <sup>33</sup> Iyá unní rixxi'atia le qui edíle elha xen lasi ruta de guadúba len lebi'i. Yies lo yu-ni nna satele uyúle elha disa. Lebi'i nna tsitsi gualcuequi lele, cumu neti nna udába bedú ni'aya iqui nu lä anca tsee gue yies lo yu-ni.

**Jesús rinnabe len Tata Do Iyyabaaha aca  
lanie ca bi'ini rudheti ca tisa rule'e**

**17** Dequide unne Jesús iyába unní nna ulhidhatteba loe begüie iyyabaaha, nianna re:

—Tata, nnanna nna chiba bisía ura. Beni qui ule'e lo neti xi'inxu-ni anca Benni ra xxeni leni, qui anágua ba neti nna unia ule'e lolu ancalu Benni ra xxeni leni.<sup>2</sup> Lu nna chi benlu aca nu innabia iyá ca benni, qui utea elha nabani gatta ttu dia lii gue iyá ca benni chi betelu len neti lhe.<sup>3</sup> Guattaba elha nabani ttu dia lii gue ca benni gansi un biacana lu, lu nna tturbalu dolu gualígua ancalu Dios, un bia guabacana neti, neti nua Jesús Benni anca Cristu udhelhaluha.

<sup>4</sup>'Neti nna chiba bele'e loa yies lo yu-ni lu ancalu Benni ra xxeni leni, chiba uluxatia sina betelu unia lhe.<sup>5</sup> Nnanna nna Tata, beni qui eyaca Benni ra xxeni leni lolu attiba anca doa len cuinalu atti bittu yies lo yu-ni chi reha.

<sup>6</sup>'Ca benni becuelu lhe'e ca benni se'e yies lo yu-ni betelu len neti nna chiba utixxi'atia cana nuxa ancalu. Guebalu ancacana, lu nna betelu cana len neti, lacana nna guarudoba cana tisa gue ca tisa guelha.<sup>7</sup> Nnanna nna chiba yucana, iyába nu betelu len neti nna guebalu nua,<sup>8</sup> cumu utixxi'abatia cana ca tisa betelu len neti, lacana nna bedoba nagacani gue nu rá ca tisa guelha. Chiba yucana atta dolhaba biríaya daya, chiguaba güia lecani luba udhelhalu neti lhe.

<sup>9</sup>'Gue ca unní rinnaba lolu, läga gue ca nu bittu ria lecani lu rinnaba. Rinnaba gue ca nu betelu len neti, cumu guebalu ancacana.<sup>10</sup> Iyába nu anca quia nna guebalu nua, nu anca guelu nna quiba nua. Ca unná runcana rule'e lo anca Benni ra xxeni leni.

<sup>11</sup>'Neti nna lärga dhoa yies lo yu-ni, ttiaca ca unní nna tse'erba ca unní yies lo yu-ni. Laca neti nna dedaaya atta dolha, xa Tata do riesi leni nu lä anca tsee, ca benni betelu len neti nna upachi cana leni elha ra xxeni le guelha, qui tse'ecana acacana ttuba benni attiba ri'l ancari ttuba Benni.<sup>12</sup> Atti doa lencana yies lo yu-ni nna netiba rapa lhe redía lhe ca nu betelu len neti leni elha ra xxeni le guelha. Ni ttucana bittu dia nitti, suna ttuba nu chi ga'ana tsia nittiha dia nittina, qui guaxxína uca nu chi ga'ana aca, attiba rá lo ca sitsi guelha.

<sup>13</sup>'Nnanna nna dedaaba atta dolha. Laca sna doa yies lo yu-ni nna rinnea ria aní, qui edaca lecani itú iqui itú lecani attiba neti

redaca lasia itú iqui itú lasia.<sup>14</sup> Neti nna chiba utixxi'atia cana ca tisa guelha, ttiaca ca benni bittu ria lecani lu se'e yies lo yu-ni nna bittu raca uyúcana ca unná cumu de bittu ancacana benni baba yies lo yu-ni, attiba neti bittu anca Benni baba yies lo yu-ni.<sup>15</sup> Läga rinnaba lolu cualu cana yies lo yu-ni, rinnababa lolu gapal cana qui bittubi udhacani nu xxegüiha cana.<sup>16</sup> Läga anca ca unní benni baba yies lo yu-ni, attiba neti bittu anca Benni baba yies lo yu-ni.<sup>17</sup> Bele'equinna nu gualí rixxi'a ca tisa guelha qui iriescana acacana guelu, cumu ca tisa guelha ancaque nu gualí.<sup>18</sup> Attiba udhelhalu neti yies lo yu-ni, anáguuba idhelha cana tsiacana atta se'e ca benni se'e yies lo yu-ni.<sup>19</sup> De lacana nna la netiba ririesia utea elha nabani quia cuenta guecani, qui anáguuba lacana iriescana acacana guelu, de ria lecani nu gualí.

<sup>20</sup> 'Läga sunru gue ca unní rinnaba lolu, rinnabaguuba gue ca nu tsia lecani neti gansi chi biyienquinna ca tisa quixxi'a ca unní.<sup>21</sup> Rinnaba lolu qui ttuba ese'e iyábacana, attiba lu, xa Tata, ttuba Benni ancalu len neti, neti nna ttuba Benni anca len cuinalu. Anáguuba lacana eyacacana ttuba benni len ri'i, qui anáchu tsia le ca benni se'e yies lo yu-ni, lu udhelhalu neti.<sup>22</sup> Neti nna chiba benia qui acacana nu ra xxeni leni, attiba lu benlu anca Benni ra xxeni leni, qui acacana ttuba benni attiba lu len neti ttuba Benni ancari.<sup>23</sup> Lu nna dulu len neti. Neti nna dhua len lacana, qui dhacana e'eyucana acacana benni se'e ttuba. Anía liba nna ttedaani ca benni bittu ria lecani lu, gualíba lu udhelhalu neti, raquinlu guecani attiba raquinlu quia lhe.

<sup>24</sup> 'Ca benni chi betelu len neti, xa Tata, raca lasia tse'e guabacana len neti atta dhoa, qui iláquinna nu xxeni ra lasia chi betelu len neti, cumu antisla cue yies lo yu-ni chi raquinlu quia.<sup>25</sup> Tata, lu ancalu Benni runi nu raxxína anca lhixxa. Ca benni bittu ria lecani lu se'e yies lo yu-ni nna läga anca biaquinna lu, ttiaca neti nna anca biabatia lu. Ca benni se'e len neti ni lhe chiba yucana luba udhelhalu neti.<sup>26</sup> Chi utixxi'atia cana nuxa ancalu, sna quixxi'arguabatia cana adí lhe qui anáchu attiba raquinlu quia nna anáguuba aquin gue loescani, cuinaba neti nna dhoa lhe'e lastoocani.

### Bedaxxucana Jesús

*(Mt. 26:47-56; Mr. 14:43-50; Lc. 22:47-53)*

**18** Dequide unne Jesús iyába nu chi unne-ni nna biráttebe die len ca bi'ini rudheti ca tisa rule'e attu ladu gue lidhá nu te láni Cedrón. Nía nua te ttu lo yu daa ca ya olivo loni. Lhe'e nua nua uta'a Jesús lenie ca bi'ini rudheti ca tisa rule'e.<sup>2</sup> Judas nu utene las ná ca nu utticaneha nnaanca biasabinna nía, cumu ixe liberu güia leni Jesús ca bi'ini rudheti ca tisa rule'e nía.<sup>3</sup> Larcala nna Judas nna bisíntteba lenna ca soldado lhe ca güen sina gue yotuha lhe nía. Ca unnuha udhelha ca bixxudi loha lencana ca fariseo. Lacana nna nujacana espada lhe yaga lhe quinque lhe ca yaga ralha iquicani lhe.<sup>4</sup> Tiaca Jesús chiba yue iyába nu sate, nianna biráttebe die guatsee ca unnuha re cana:

—¿Nú reguilale?

<sup>5</sup> Lacana nna rávana:

—Jesús gue Nazaret.

Jesús re cana:

—Netiba nua.

Len ca unnuha guaba du Judas nu utena Benniha las ná ca unnuha.<sup>6</sup> Atti rá Jesús cana: “Netiba nua”, lacana nna beadi gattebacana ubixxi locana lo yu.<sup>7</sup> Lee nna bedennaba tise cana attu libe re cana:

—¿Nú reguilale?

Lacana nna bedecabicana rávana:

—Jesús gue Nazaret.

<sup>8</sup> Jesús re cana attu libe:

—La chiba rpea le: “Netiba nua nna”, gansi neti reguilale nna gualguelha ca nu se'e ni eyyacana ganna.

<sup>9</sup> Anía uca qui guaxxína tisa nu la laba Jesús unnee, atti re Tata Do Iyyabaaha: “Tata, ni ttu ca benni betelu len neti bittu bedelha.”

<sup>10</sup> Laniala nna ulea Simón bi'ini lágua Pedro espada nojabiba lhe'e xoni, uchúbi naga derechu gue ttu unbiyuu te láni Malco. Unnuha nua ancana nu ribeni sina gue bixxudi xxeni rinnabiahia.

<sup>11</sup> Jesús re Pedro:

—Boga'a espada-na lhe'e xoni. Elha disa rute Tata quia len neti nna ¿biaca lä dhielha satea-na?

## **Uchecana Jesús bedúcane lo bixxudi anca nu lo lá Anás**

(Mt. 26:57-58; Mr. 14:53-54; Lc. 22:54)

<sup>12</sup> Ca soldadoha lencana nu lo guecaniha lhe ca güen sina gue yotuha lhe bedaxxucana Jesús, atti bexxicattebacane. <sup>13</sup> Lotteba lo Anás uchecane, cumu unnuha anca tata gue nuila gue Caifás nu anca bixxudi xeni rinnabia la idaha. <sup>14</sup> Caifás-ni nua rána ca nu lo gue ca benni Israel, tseeba anca len lacana gatti ttuba benni cuenta gue iyába ca benni.

## **Pedro bittu ridí ro'obi anca bienbi Jesús**

(Mt. 26:69-70; Mr. 14:66-68; Lc. 22:55-57)

<sup>15</sup> Simón bi'ini lágua Pedro lenbi attu bi'ini rudheti ca tisa rule'e Jesús denobacabi Benniha. Bi'iniha nna anca biabinbi bixxudi xxeni rinnabiah, larcala nna uta'ababi len Jesús lhe'eli'a gue yo'o gue bixxudiha. <sup>16</sup> Ttiaca Pedro nna níaba be'anbi, ro'o puertaba dubi. Denuala nna nuarca bequi bi'ini anca biani bixxudiha unne lenbi nuila du ridhali puertaha qui ga'a benni, ugüelhana ga'a Pedro.

<sup>17</sup> Nuila du ro'o puertaha nna unnaba tisana rána Pedro:

—¿Si läba lu lhe ancagualu ttu ca nu rudheti ca tisa rule'e unbiyuu-na?

Labí nna becabibi rábi:

—Dica. Läga anca neti nu rudheti ca tisa rule'e unná.

<sup>18</sup> De daa idilha nna ca nu ribeni sina gue bixxudiha lencana ca güen sina gue yotuha nna beonttebacana gui, use'ettabacana gaxxaba ro'o guiha rotsa'acana. Pedro nna níaguaba dubi len ca nua rotsa'abi ro'o teha.

## **Anás rinnaba tisana Jesús**

(Mt. 26:59-66; Mr. 14:55-64; Lc. 22:66-71)

<sup>19</sup> Bixxudi xeni rinnabiha nna unnaba tisana Jesús gue ca tisa rule'e lhe guetu ca bi'ini rudheti ca tisa rule'e lhe. <sup>20</sup> Jesús becabie gueni re na:

—Neti nna aní lo iyába benni unnea, satíaba udúa bele'etia ca benni Israel-na atta ritupari lhe'eli'a gue yotu-na lhe lhe'e ca yo'o atta rudhetiri ca tisa gue Tata Do Iyyabaaha lhe. Larcala nna lägabi

unne neti ttu bixa atta gatsi. <sup>21</sup> ¿Biaca neti la rinnaba tisalu? Na unnaba tisa ca nu bienquinna nu ria. Lacana innáca bixa rpea cana. Ca unná yucana bixa ria.

<sup>22</sup> Atti rá Jesús anía nna, ttu ca güensina gue yotuha du nía nna uleattebana gui ro'o Benniha nianna ráne:

—¿Si aná dica ecabilu gue benni anca bixxudi xxeni rinnabia-na?

<sup>23</sup> Jesús re na:

—Gansi unnea nu lä anca tsee nna gus neti: ¿Bi nu bittu anca tsee unnea? Gansi unneba nu anca tsee nna ¿biacala neti begüeelu?

<sup>24</sup> Laniala nna unnabia Anás bexxicacana Benniha atti udhelhane lo Caifás nu anca bixxudi xxeni rinnabiah.

### **Attu libe bittu ridí ro'o Pedro anca bienbi Jesús**

(Mt. 26:71-75; Mr. 14:69-72; Lc. 22:58-62)

<sup>25</sup> Pedro nna níaba sna dubabi ro'o teha rotsa'abi. Ca nu se'e nía nna rácan bi:

—¿Si läba lu lhe ancalu ttu ca nu rudheti ca tisa rule'e unbiyuu-na?

Labi nna läga uxí ro'obi, rálabi:

—Dica. Läga anca neti nu rudheti ca tisa rule'e unná.

<sup>26</sup> Ttu ca nu ribeni sina gue bixxudi xxeni rinnabiha, nu datíana unbiyuu uchú Pedro naganinha nna rán bi:

—Inqui níaba bilátia lu du lenlu unná atta daa ca ya olivuha nna.

<sup>27</sup> Pedro nna bittu uxí ro'obi attu libe gansi gualí anca bienbi Jesús. Snaba lania nna uresi berudiha.

### **Uchecana Jesús guadúcane lo Pilato nu bodú ca nu rinnabia gue Roma**

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ca nu bedaxxucana Jesús udátteba lencane lhe'e yo'o gue Caifás, dia lencane lhe'e yo'o lagüi atta do nu rinnabia gue Roma. De chi daa tsaniha nna nuarca bitturu uta'acana lhe'e yo'o lagüiha cumu lacana racaquinna itsigacana lo Tata Do Iyyabaaha gansi ga'acana atta se'e ca benni bittu anca benni Israel. Lania nna lärga aca gocana rse gue laní Pascua. <sup>29</sup> Larcala nna biría Pilato rán cana:

—¿Bi lo ni'a gue rüdelhiyyale unbiyuu-ni?

<sup>30</sup> Lacana nna becabicana rácan na:  
—Ttirca bittuba beni unní ttu nu lä anca tsee nna läga ita ri'itu ettetetu unní las nálu.

<sup>31</sup> Pilato nna rán cana:  
—Lebi'iba gualeche na, gualuni elha uxtisi gueni attiba rá lo ca ley guele-na.

Lacana nna rácana:  
—Ri'itu nna lägabi ga'ana uttitu nuxa benni.  
<sup>32</sup> Anía liba nna guaxxína ca tisa unne Jesús gue gaxasná gattie.  
<sup>33</sup> Laniala nna beta'a Pilato lhe'e yo'o lagüiiha attu libe, atti uxittebana Jesús, nianna rána Benniha:

—¿Si lu ancalu nu rinnabia gue ca benni Israel-ni?  
<sup>34</sup> Jesús becabie re:  
—¿Si nu anca guelunni rinnelu aca, nuxaba attu nu subi utixxi'enna lu gue nu anca quia aca?

<sup>35</sup> Pilato nna becabina rána benniha:  
—¿Nnari benni Israel neti? Ca benni guelhaba lencana ca nu lo gue ca bixxudi-naba bettelhu'ucan lu las náya. ¿Bi benlu?

<sup>36</sup> Jesús becabie re:  
—Elha rinnabia quia-ni nna läga ancunni gue yies lo yu-ni. Ttirca ancana gue yies lo yu-ni nna ca benni rudheti ca tisa rule'a-na, bitilhabacana qui bittu bedaxxu ca benni Israel-na neti. Ttiaca elha rinnabia quia-ni nna läga ancunni gue nii.

<sup>37</sup> Laniala nna rá Pilato Benniha:  
—¿Anla lu ancalu nu rinnabia ganna?  
Jesús becabie re:  
—Luba chi rálú, neti anca nu rinnabia. Denuala nna ulia, delha yies lo yu-ni qui quixxi'aya nu anca gualí. Iyába ca nu runi nu anca gualí nna, rudo nagacani gue nu ria.

<sup>38</sup> Pilato nna ráne:  
—¿Bi nua nu anca gualí?

### Boquinna iqui ca nu Israel gatti Jesús

(Mt. 27:15-31; Mr. 15:6-20; Lc. 23:13-25)

Dequide atti rá Pilato anía nna biríattebana diana güenne len ca nu lo gue ca benni Israel attu libe, nianna rán ca nua:

—Tsa bittu ratti'aya bixa lo ni'a gue rуделха ийяле унні.  
<sup>39</sup>Lebi'i nna labile neti nna rodiláya ttu nu te lisiyya laní Pascua. ¿Si gua rdacale odiláya nu rinnabia guele-ni, lebi'i benni Israel?

<sup>40</sup>Ttiaca iyábacana bedebesi'acana attu libe rácana:

—¡Unná bittu! ¡Barrabás na bodilá!

Barrabás-na ancana nu runi ubana.

**19** Laniala nna beni Pilato mandadu bedaxxucana Jesús qui quincana Benniha. <sup>2</sup>Ca soldadoha nna bencana ttu corona len xiqui ya sitsi ulu'ucana iquie, atti begucuttebacane ttu lari xinaa chulha. <sup>3</sup>Nianna ubigattebacana atta due rácane:

—¡Xxeni ra lelu, xa nu rinnabia gue ca benni Israel!

Atti ralhittebacana gui loe.

<sup>4</sup>Pilato nna bederíattebana attu libe lhe'e yo'o lagüiha, nianna rán ca benni Israel:

—Gualgüiarga. Ni na chea nii. Ni udúa na lole attu libe, qui ugüiale nna neti nna tsa läga ratti'aya bixa beni unná qui gattina.

<sup>5</sup>Biríatteba Jesús yu'u iquie corona anca len sitsiha, nucue lari xinaa chulhaha lhe. Pilato nna rán cana:

—Ni Benniha du nii.

<sup>6</sup>Atti biláni ca nu lo gue ca bixxudiha lencana ca güen sina gue yotuha nna uresi'attecana rácana:

—¡Betá na lo ya crusi! ¡Betá na lo ya crusi!

Pilato nna rán cana:

—Naba gualeche na. Lebi'iba gualutá na lo ya crusi, cumu neti nna tsa läga ratti'aya bixa nu lä anca tsee beni unná.

<sup>7</sup>Ca benni Israel nna becabicana rácana:

—Ri'itu nna te ttu ley guetu. Lo ley nna rá: labíaba gatti unná cumu de rána ancana xi'ini Tata Do Iyyabaaha.

<sup>8</sup>Atti bienini Pilato rácana anía nna adílaba usinna.

<sup>9</sup>Beta'attecana attu libe lhe'e yo'o lagüiha, nianna rána Jesús:

—¿Ga ladu beaca laslu?

Ttiaca Benniha nna tsaba bittu unnee ecabie gueni. <sup>10</sup>Pilato nna ráne:

—¿Neti unní rinnea nna lä recabilu quia? ¿Si bittuba yulu dequi neti nna te derechu quia odiláya lu, o si utáya lu lo ya crusi?

<sup>11</sup> Laniala nna becabí Jesús re na:

—Ttirca bittuba ben Tata Do Iyyabaaha acalu uxtisi nna läga aca guelu innabialu bixa udhacacana neti. Larcala nna nu betena neti las nálu nna ancarlana nu te tulha gueni atti lu.

<sup>12</sup> La laniatteba nna udulo Pilato reguila leni gaxasná unna qui odilána Jesús, ttiaca ca benni Israel nna ribesi'anicana rácan na:

—¡Lu nna läga ancalu benni do tsee leni César nu rinnabia Roma gansi unná odilálu! ¡Iyába nu runi ancana nu rinnabia nna nu läraca uyúna Césarba anca nua!

<sup>13</sup> Dequide bina Pilato nu rá ca nua nna uleattebana Jesús. Lana nna udottebana lo xxila atta ridona runna elha uxtisiha. Atta runna elha uxtisiha nua te láni Atta Yu'u Iyya. Leni tisa hebreo nna te láni Gabata. <sup>14</sup> La sá nua anca bispri gue laní Pascua. Attiba tu deoba tsil'inu (12) Pilato nna rána ca benni Israel:

—¡Ni nu rinnabia gueleha du nii!

<sup>15</sup> Ttiaca lacana nna uresi'attebacana rácana:

—¡Betti unná! ¡Betti unná! ¡Betá unná lo ya crusi!

Pilato nna unnaba tisan cana rán cana:

—¿Si utáya nu rinnabia guele-ni lo ya crusi?

Ca nu lo gue ca bixxudiha nna becabicana rácana:

—Rí'itu nna suna Césarba anca nu rinnabia guetu.

<sup>16</sup> Nía uca nna bote Pilatoha Benniha las nácani qui utácane lo ya crusi. Lacana nna bechettebacana Benniha.

### Betácana Jesús lo ya crusi

(Mt. 27:32-44; Mr. 15:21-32; Lc. 23:26-43)

<sup>17</sup> Jesús nujabe ya crusi gueha biré lhe'e yiesiha die ttu re atta te láni Bega Iqui Nu Yatti. Leni tisa hebreo nna lána Gólgota.

<sup>18</sup> Nía betácana Benniha lo ya crusi lenie a chupa ca unbiyyu. Ladu laduba gue ya crusi atta ta Jesús betácana ca unnuha lo ya crusi gue ttuttucana. <sup>19</sup> Pilato nna benna mandadu bencana letra lo ttu breta betácana iqui crusi atta ta Benniha. Lo bretaha nna rá: “Jesús gue Nazaret, nu ancana nu rinnabia gue ca benni Israel.” <sup>20</sup> Ixeru ca benni quia ca nu Israel belabacana nu rá lo bretaha, cumu gaxxaba ro'o yiesi Jerusalén nua atta betácana Jesús lo ya crusiha. Letraha nna ancana leni tisa hebreo lhe latín lhe griego lhe. <sup>21</sup> Larcala nna ca nu lo gue ca bixxudi gue ca benni Israel nna rácana Pilato:

—Bittu unlu lo breta-na: “Nu rinnabia gue Israel.” Benla loni: “Nu rána dequi lana ancana nu rinnabia gue Israel.”

<sup>22</sup>Ttiaca Pilato nna becabina rána:

—Nu chi benia nna tsaba chi benia nua.

<sup>23</sup>Dequide betá ca soldadoha Jesús lo ya crusihá nna, bodaxxuttebacana ca xo Benniha bencana ttapa lila'a, ttuttu nua gue ttuttu ca soldadoha. Bodaxxu guabacana lari radi Benniha lhe. Unnuha nna lägabi tiyya ro'o loes nua, ttuba anca itú nua, desdeba liree axtaba güetsaa yaba nua. <sup>24</sup>Ca soldadoha nna rá loescani:

—Bittu ichedari unná. Unbari tu nu ule'e lo qui ttedeenri nuxari ralhari unná.

Anía liba nna guaxxína nu rá ca tisa dia lo ca sitsi gue Tata Do Iyyabaaha atta rá: “Ulha'abacana ca xun quia, beguila lecani bencana tu nu bele'e lo qui utedaquinna nuxcana be'an lencana lari radiahá lhe.” Aníaba ben ca soldadoha.

<sup>25</sup>Gaxxaba xana ya crusi atta ta Jesús du nan gue Benniha, xila nan gueha lhe María bi'ini do leni Cleofas lhe María Magdalena lhe.

<sup>26</sup>Atti biláni Jesús nan gueha dubi gaxxaba atta du bi'ini rudheti ca tisa rule'e, benni racaxxattanie guebiha, lee nna ráttebe nan gueha:

—Nana, ni xi'inlu du-na.

<sup>27</sup>Lenla nna re bi'ini rudheti ca tisa guee:

—Ni nan guelu du-na.

Laniatteba nna bechee bi'iniha nan gue Benniha qui dhobi lhe'e yo'o guebiha.

### Aní bedhacacana Jesús atti chi deoba gattie

(Mt. 27:45-56; Mr. 15:33-41; Lc. 23:44-49)

<sup>28</sup>Dequide nua nna Jesús chiba yuxabe chiba benie iyába nu ga'ana unie, qui saxxína aca nu rá lo ca sitsi gue Tata Do Iyyabaaha nna lee nna re:

—Rebisia.

<sup>29</sup>Nía du ttu canti sa ttittina vinu idí. Ca nu se'e nía nna ulu'uttebacana ttu xunu lhe'e vinuha qui ibidhana, atti bexxicattebacana unnuha punta ttu iyyaxtila, nianna besigattebacana nua ro'o Jesús qui i'iye nua. <sup>30</sup>Dequide bennixtie nua nna ráttebe:

—Ni uluxa iyá nu ga'ana unia.

Nianna, bedeattatteba iquie, atti uttittebe.

<sup>31</sup> La sá nna ancana bispri gue Pascua. Ca nu lo gue ca benni Israel nna bittu raca lecani eya'ana ca benni yatti lo ya crusí sá redí lecaniha, cumu la sá nna ancana sá laní xeni. Denuala nna unnabacana lo Pilatoha unna mandadu quitsacana ca ni'a ca benni ta lo ya crusíha qui yuba gatti ca nua qui itúa ca nua nía. <sup>32</sup> Ca soldadoha nna güiattebacana guattítsacana ni'a nu ta lo ya crusí primeroha, anáguaba ni'a attu nu ta lo ya crusí daca attu ladu gue Jesús. <sup>33</sup> Ttiaca atti ubigacana atta ta Jesús, lacana nna biláquinna chiba utti Benniha. Larcala nna bittu utitsacana ni'a Benniha. <sup>34</sup> Ttu ca soldadoha nna bega'attebana nu do iyya ttutsi loni dennaha uxtil gue Benniha. Atta uta'a nua nna biríatteba inda lhe reni lhe. <sup>35</sup> Bi'ini rixxi'a unní nna ancabi benni begüia lobi nu uca. Nu gualíba rixxi'abi. Labi nna rixxi'ababi nu anca gualí qui anáchu nna lebi'i nna tsia lele. <sup>36</sup> Anába uca qui guaxxína nu chi ga'ana lo ca sitsi gue Tata Do Iyyabaaha atta rá: "Ni ttu sitta gue Benniha bittu quitsacana." <sup>37</sup> Rágua abu attu re lo ca sitsi-na: "Ugüiacana benni bega'acana nu do iyya ttutsi loni cuitteha."

### Jesús bigatsie

(Mt. 27:57-61; Mr. 15:42-47; Lc. 23:50-56)

<sup>38</sup> Dequide lania nna José bi'ini beaca lasibi lhe'esi Arimatea, unnababi len Pilato ugüelhana echebi cuerpu gue Jesús. José nna sigába ucabi benni bedheti ca tisa bele'e Jesús, cumu de usinbi lo ca nu lo gue ca benni Israel. Pilato nna ucaba leni. José nna güiattebabí guaxíbi cuerpu gue Benniha. <sup>39</sup> Anáguaba Nicodemo nu güiana ttu lo rela guanne lenna Jesús bisínguana leni attiba rerua (30) kilo nu rure xixxi gue mirra leni aloe. <sup>40</sup> José lenbi Nicodemo nna bedaxxucabi cuerpu gue Jesús bottubicabi Benniha lari leni nu rure xixxiha. Benbacabi attiba labiba ca benni Israel runcana gansi chi rucatsicana ttu benni yatti. <sup>41</sup> Gaxxaba atta betáicana Jesús lo ya crusíha nna te ttu lo yu daa ca ya xixxi lhe'eni. Lhe'e nua nna do ttu baa cubi nu bittu chi bigatsi ni ttu benni lhe'eni. <sup>42</sup> Nía becatsicana Jesús, cumu de te baa gaxxa, de chiguuba ga'a sá redí le ca benni Israel lhe.

### Jesús beacanie

(Mt. 28:1-10; Mr. 16:1-8; Lc. 24:1-12)

**20** Duminicu, primerba sá redú lo xumanu, diltochiga sna ancarla chulha güia María Magdalena atta te baa gue Jesús. Biláttebinbi chi bitúa iyya yaya ro'o baaha. <sup>2</sup>Laniala nna begáttebabí deyyabi atta do Simón bi'ini lágua Pedro lenbi bi'ini racaxxattani Jesús guebiha. Nianna, rábi ca bi'iniha:

—¡Bebeabacana Benni bananie ri lhe'e baaha! ¡Bittu yutu gaxa ladu guadha'ancane!

<sup>3</sup>Pedro lenbi attu bi'iniha nna diattebacabi atta te baaha.

<sup>4</sup>Irupabacabi ruxunnini cabi diacabi, ttiaca attu bi'iniha nna bigaarbi atti Pedro. Nuarca lo bi'iniha bisínbi atta te baaha.

<sup>5</sup>Biachuttebabíbecálobi lhi'u, níaba bilenbi ca lari bitesi Jesús, ttiaca bittu uta'abi lhi'u. <sup>6</sup>Dequila nna bisía Simón bi'ini lágua Pedro. Bi'iniha nna uta'attebabí lhi'u. Labi nna biláguabinbi ca lari bitesi Benniha se'ecana nía. <sup>7</sup>Lari bottesicana iqui Benniha nna läga re nua leni adí ca lariha, atta subila latsi tte yapa nua rena. <sup>8</sup>Laniala uta'a bi'ini bisína primero atta te baaha. Bilábinbi lhe'e baaha nna güiatteba lebi. <sup>9</sup>Cumu läga chi guadú lecabí gue nu chi ga'ana lo ca sitsi gue Tata Do Iyyabaaha, atta rá Jesús labíaba eyaquin Benniha qui erié lhe'e baa atta yu'u ca nu yatti-na. <sup>10</sup>Lacabi nna güequittebacabi deyyacabi atta re'ancabiha.

### Jesús bele'en loe María Magdalena

(Mr. 16:9-11)

<sup>11</sup>María nna níaba dubi ro'o baaha ribesbi. Laca dubi ribesbiha nna biachuttebabíbecálobi begüiabi lhe'e baaha. <sup>12</sup>Níabilenbi chupa ingeli nucu xo sitsi guecabi. Ttubi dobi daca xequi atta utta Jesús, attubi nna dobi daca xani'a atta utta Benniha. <sup>13</sup>Ca ingeliha nna unnaba tisacabi rácabi:

—Xa nuila du-na, ¿biaca ribeslu?

Labi nna becabibi rábi:

—Cumu dechebacana Benni bananie neti. Neti nna bittu yua gaxa guaca'ancane.

<sup>14</sup> Unnuhaba rábi nna bodequitteba lobi daca cu'ebi, biláttebinbi Jesús níaba due, ttiaca läga yubi gansi Benniha nua. <sup>15</sup> Jesús unnaba tise re bi'iniha:

—Nuila, ¿biaca ribeslu? ¿Nú reguilalu?

Labi nna uquinbi ga nu rapa lo yu atta daa ca ya xixxihaba nua, nuarca rábi:

—Xa Tata, gansi luba dechelu Benniha nna utixxi'en neti gaxa guaca'anlu Benniha qui tsiaya saxié.

<sup>16</sup> Jesús re bi'iniha:

—¡María!

Labi nna bodequitteba lobi, unnebi tisa arameo rábi:

—¡Raboni! —Tisa-ni nna dienna innána Maestro.

<sup>17</sup> Jesús re bi'iniha:

—Bittu udaxxulu neti, cumu läga chi beopia atta do Tata quia. Beyyala guattixxi'en ca betsito quia chi deyya'aya atta do Tata quia, Benni ancaguuba Tata guele. Lee anque Dios quia, Benni ancaguuba Dios guele.

<sup>18</sup> Laniala nna deyya María Magdalena qui quixxi'enbi ca bi'ini rudheti ca tisa rule'e Jesús, labi nna chi bilenbi Benniha, quixxi'aguabi iyába nu rá Benniha bi lhe.

### **Jesús ucaxxe lhe'e yo'o atta se'e ca bi'ini rudheti ca tisa rule'e**

(Mt. 28:16-20; Mr. 16:14-18; Lc. 24:36-49)

<sup>19</sup> Atti chi daa raca ela la sá dumincutteba, sá redú ni'a xumanu, ca bi'ini rudheti ca tisa rule'e Jesús, yayabincabi puerta gue yo'o atta bitupacabiha, cumu rasquinbi lo ca nu lo gue ca benni Israel. Nianna ucaxxe Jesús udúe salhe guecabi, atti re ca bi'iniha:

—¡Xen su lee gualtse'e!

<sup>20</sup> Dequide re anía nna bele'ettebanie ca bi'iniha ca ne lhe uxtil guee lhe. Ca bi'ini rudheti ca tisa guee nna be'o juisia lecabí bilencabi Benniha. <sup>21</sup> Jesús re ca bi'iniha attu libe:

—¡Xen su lee gualtse'e! Attiba udhelha Tata quia neti, aníaguuba idhelha lebi'i.

<sup>22</sup> Unnuhaba re nna belubittebe, nianna re:

—Gualdhí Espíritu gue Tata Do Iyyabaaha. <sup>23</sup> Ca benni gále gua teba elha xen lasi gue nu lä anca tsee runcana nna gua teba elha

xen lasi guecani. Ca benni innále bittu elha xen lasi guecani te nna bittuguaba elha xen lasi te gue ca nua.

### Bittu ria le Tomás dequi gualí beacani Jesús

<sup>24</sup> Tomás bi'ini teeguaba lábi nu Cuachi, labi nna selaguabi ca bi'ini rudheti ca tisa rule'e Jesús. Läganu bi te atti bele'en lo Jesús adí ca bi'iniha. <sup>25</sup> Lenla nna rácabi bi'iniha:

—Chi bilentu Benni bananie ri'i.

Ttiaca Tomás nna becabibi rábi:

—Gansi bittuba ilátia las nee anca güee gue ca clavuha lhe uga'a xbináya atta uta'a ca clavuha lhe lhe'e belea bedocana lhe'e uxtil guee lhe läga tsia las neti.

<sup>26</sup> Dequide ute xxunu ubisa nna ca bi'ini rudheti ca tisa rule'e Jesús bedetupattebacabi attu libe lhe'e ttu yo'o. Laniarguaba nna níaba du Tomás len ca bi'iniha. Ri'itu nna yayabintu yo'oha. Jesús ucaxxettebe lhe'e yo'oha udúe salhe guetu. Nianna re ri'itu:

—¡Xen su lee gualtse'e!

<sup>27</sup> Lee nna ráttebe Tomás:

—Bedo xbinálu nii. Begüiatte ca néya-ni lhe besiga nálu nna bega'a nálu lhe'e belea do lhe'e uxtil quia-ni. Bittu acalu nu lä ria leni. Uca benni ria leni.

<sup>28</sup> Tomás nna becabibi rábi:

—¡Lu ancalu Benni bananie neti lhe Tata Do Iyyabaaha quia lhe!

<sup>29</sup> Jesús re bi'iniha:

—¿Si de bilenlu neti nna ria lelu? ¡Carbáru ca benni bittu biláquinna nianna ria lecani!

### Bi lo ni'a gue beni Juan lo sitsi-ni

<sup>30</sup> Ixeru adí ca milagru beni Jesús aní lo ca bi'ini rudheti ca tisa rule'e. Ca benniha nna lägabi diaque lo sitsi-ni. <sup>31</sup> Ca ben-ni nna ucaque lo sitsi qui anáchu lebi'i nna tsia lele Jesús anque Cristu Benni chi ga'anani Tata Do Iyyabaaha odile ca benni, anque Xi'ini Tata Do Iyyabaaha lhe. De tsia lele gue Ben-na nna gatta elha nabani guele iyyabaaha ttu dia lii.

Jesús bodile'en loe a gasi ca bi'ini rudheti ca tisa rule'e

**21** Dequide lania nna bodile'en loen Jesús attu libe ca bi'ini rudheti ca tisa rule'e ro'o indattoo gue Tiberias. Aní uca

bele'en loe ca bi'iniha: <sup>2</sup> Simón bi'ini láguba Pedro lhe Tomás bi'ini te lábi Cuachiha lhe Natanael gue yiesi Caná re lo yu gue Galilea lhe, ca xi'ini Zebedeo lhe a chupa ca bi'ini sela len ca bi'ini rudheti ca tisa rule'e Jesús lhe. Iyába ca bi'in-ni ttu reba se'ecabi nía. <sup>3</sup> Simón bi'ini láguba Pedro rábi ca bi'iniha:

—Tsiaya güedaxxu belha.

Lacabi nna becabicabi rácabi:

—Dhaba ri'itu len luu.

Laniala nna diacabi, gopittebacabi lo ttu barco, ttiaca la elaha nna tsa bittu biexxuincabi ni ttu belha. <sup>4</sup> Atti chi daa raniha nna ucaxxetteba Jesús ro'o indattooha. Ca bi'ini rudheti ca tisa rule'e nna ni lä yucabi ganna Bennihaba nua. <sup>5</sup> Jesús unnaba tise re ca bi'iniha:

—Ca xi'into, ¿si biexxuinle belha qui gori?

Ri'itu nna becabitu rátu:

—Nuttu biexxuintu.

<sup>6</sup> Jesús re ri'itu:

—Gualudelha yexxa guele-na daca ladu derechu gue barco-na, uyúrgale bi güiyaxxubinle belha.

Aníaba bencabi. Dequila nna ganua riedhintu yexxaha ebeatu na lhe'e indaha de deyu'uxxatta belha lhe'eni. <sup>7</sup> Nianna, ttu ca bi'ini rudheti ca tisa gue Jesús, bi'ini racaruni Benniha guebiha nna rábi Pedro:

—¡Benni bananie rihaba Ben-na!

Atti bienini Simón bi'ini láguba Pedro dequi Benni bananie ca bi'inihaba Benniha nna, beocutteba xobi cumu riaba xobi, nianna uta'attebabí lhe'e indaha. <sup>8</sup> Adí ca bi'ini rudheti ca tisa gue Benniha nna deyya lencabi barcoha qui eríacabi ro'o indattooha, dena'ayacabi yexxaha de sa tina belha, cumu attiba attu gayua (100) metroba reasa esíncabi atta daa ro'o indaha. <sup>9</sup> Atti besintu ro'o indaha nna biláttebintu ttu gui yali re nía. Lo guiba nna xua ttu belha, chiguaba te ttaxtila lhe. <sup>10</sup> Jesús re ri'itu:

—Gualsaxxí ttu chupa ca belha chi guadaxxubale-na.

<sup>11</sup> Simón bi'ini láguba Pedro nna gopittebabí lo barcoha, bebe na'ayattebabí yexxaha bebeabi na ro'o indaha de sa tina belha elha. Ttu gayua yu'u medi gayua yu'u tsunna (153) belha deyu'u lhe'e nua. Delo ttoníali nua deyu'u lhe'e yexxaha nna tsa läga bise'elo nua. <sup>12</sup> Jesús re ri'itu:

—Gualtá, gualgo xtilhe.

Niba ttuttu bittu beaxintu innába tisatu gátu Benniha:  
 “¿Núleonn?”, cumu yutu Benni bananie ttuhaba Benniha.<sup>13</sup> Jesús ubigattebe bedaxxue ttaxtilaha benne ri'itu, aníaguaba benie len ca belhaha lhe.<sup>14</sup> Lania beyonna libe rule'en loe ri'itu ca bi'ini rudheti ca tisa rule'e, dequide beacanie berié lhe'e baa atta yu'u ca nu yatti-na.

### **Jesús rulise Pedro qui uyúbi ca benni ria lecabí benniha**

<sup>15</sup> Dequide chi uluxa utoxtiltu nna, rátteba Jesús Simón bi'ini láguaba Pedro:

—Simóni xi'ini Jonás, ¿si racaruinlu quia atti ca bi'ini se'e ni?

Pedro becabibi rábi:

—Bila. Lu nna gua yuxebalu, xa Benni bananie neti, gua racabatia guelu.

Jesús re bi'iniha:

—Biyú ca carne'e quia-na ganna.

<sup>16</sup> Bedequi dacabe re bi'iniha attu libe:

—Simóni xi'ini Jonás, ¿si gua raquinlu quia?

Pedro becabibi rábi:

—Bila. Lu nna gua yubalu, xa Benni bananie neti, gua racabatia guelu.

Jesús re bi'iniha:

—Biyú ca carne'e quia-na ganna.

<sup>17</sup> Nu beyonna libe re bi'iniha:

—Simóni xi'ini Jonás, ¿si gua raquinlu quia?

Pedro nna si'irurba benbi lania, cumu nía beyonna libe rá Benniha bi, ¿si gua raquinlu quia?

Laniala nna rábi Benniha:

—Lu nna iyába yulu, xa Benni bananie neti. Gua yuxebalu neti nna gua racabatia guelu.

Jesús re bi'iniha:

—Biyú ca carne'e quia-na ganna.<sup>18</sup> Neti gualíbatia rpea lu, atti ancalu cuitiha nna ttubalu reocu xolu, riabalu attaba racaba lelu. Ttiaca gansi chi ucalu benniola nna ulhíba nálu qui ugucu nu subi xolu. Unnuha nna icheen lu tsia lenna lu atta bittu raca lelu tsialu.

<sup>19</sup> Aníaba rá Jesús, rixxi'e gaxasná gatti Pedro. Leni elhutti guebiha nna unbi ule'e lo anca Tata Do Iyyabaaha benni ra xxeni lee. Lenla nna re bi'iniha:

—¡Utá, bettenalha neti!

### **Bi'in-ni nua ucaxxattani Jesús guebi**

<sup>20</sup> Atti bodequi lo Pedro bilenbi denoo bi'ini racaxxattani Jesús guebiha nna, bi'iniha guaba nua udo cuitta Jesús atti uto rsetuha. Labi nua unnaba tisabi Jesús rabi Benniha: “Benni bananie neti, ¿núnna uten lu las ná ca nu uttican lu?” <sup>21</sup> Atti biláni Pedro bi'iniha nna unnaba tisattebabí Jesús rábi benniha:

—Benni bananie neti, unní nna ¿bila sateonni?

<sup>22</sup> Jesús becabie re bi'iniha:

—Gansi aca lasia nna anába na dona axta liba esíaya, lu nna ¿bi elha ralhalu rinnaba tisalu? Lu nna utába betteno neti.

<sup>23</sup> Anía uca nna nuarca biría tisa bina adí ca benni ria le Jesús dequi bi'iniha nna bittu gattibi. Ttiaca Jesús läga re Pedro dequi bi'iniha nna bittu gattibi. Rábe bi'iniha: “Gansi aca lasia nna, anába na dona axta liba esíaya, lu nna, ¿bi elha ralhalu rinnaba tisalu?”

### **Ni lhuxa ca tisa beni Juan lo sitsi**

<sup>24</sup> Bi'in-ni nua bi'ini bedheti ca tisa bele'e Jesús, labi nna rixxi'abi iyába unní, cuinaba labi benbi ca tisa-ni lo sitsi lhe. Ri'i nna gua yubari, labi nna rixxi'ababi nu anca gualí.

<sup>25</sup> Jesús ixeru nu beni Benniha. Gansi tsia ttuttu ca nu beni Benniha lo sitsi nna neti nna racatia, gaxa läga aca ni yies lo yu-ni atta tsu'u ca sitsi aca locani gue iyá nu benie. Amén.

# Nu guate ca apóstol gue Jesús

Tata Do Iyyabaaha chi begüee tisa idhelhe Espíritu guee

**1** Lo ca sitsi ca nu primerba benia, xa tata Teófilo, nía benia iyá nu udulo Jesús benie, iyába nu bele'e lhe<sup>2</sup> axta liba atti bisía sá beopie deyye iyyabaaha. Atti deobali eyye nna leni Espíritu gue Tata Do Iyyabaaha chi utixxi'anie ca bi'ini bedheti ca tisa bele'enie ca benni chi becuae bixaanca nu uncabi.<sup>3</sup> Dequide uttie nna bele'eguabani loe ca bi'iniha ixe libe qui tsia lecabidequi gualiba beacabanie. Attu chua (40) ubisa beacaxxe len lacabi, riguixxi'anie cabi gaxasná rinnabia Tata Do Iyyabaaha.

<sup>4</sup> Atti sna dobe leni ca bi'ini bedheti ca tisa bele'enie, unnabiattebe re ca bi'iniha:

—Bittu iríaxxile lhe'e yiesi Jerusalén-ni. Gualcueda nu chi rá Tata quia utee len lebi'i nu chiguaba utixxi'atia le.<sup>5</sup> Cumu Juan sunruba inda bixuuinbi begadibi ca benni inda, ttiaca lebi'i nna chi tte deoba gadile inda leni Espíritu gue Tata Do Iyyabaaha.

## Beopi Jesús iyyabaaha

<sup>6</sup> Ca bi'in-ni se'e ttu reba nía leni Jesús, unnaba tisattebacabi rácabi Benniha:

—Benni bananie ri, ¿si nnanna unlu innabia ca benni Israel-ni yies lo yu-ni attu libe?

<sup>7</sup> Lee nna becabittebe re:

—Lebi'i, läga dica unale nucaxa o bixa sá uni Tata Do Iyyabaaha nu sunruba lee yue nucaxa chi ga'ananie acana.<sup>8</sup> Ttiaca gansi chi bisía Espíritu gue Tata Do Iyyabaaha itúba cuerpu guele, lania nna utee derechu guele qui iríale tsiale quixxi'enle ca benni se'e lhe'e yiesi Jerusalén-ni quia, itúba lo yu te láni Judea lhe anáguaba lo yu te láni Samaria lhe itúttega yies lo yu-ni lhe.

<sup>9</sup> Dequide chi utixxi'e iyába nua, ttu se'erucabi rugüiacabi nna beopitteba Benniha deyye iyyabaaha, atti biríatteba ttu bea beocun Benniha atta deyyeha. Lania nna lärga nu Benniha biláquinbi.

<sup>10</sup> Laca se'ecabi rugüiacabi deyya Jesús iyyabaaha nna attirba chi

ucaxxe chupa ca unbiyuu atta se'ecabiha, nucu xo sitsi guecabi.

<sup>11</sup> Nianna rácabi ca benni se'e rugüiaha:

—Lebi'i, xa benni gue Galilea, ¿biaca se'ele rugüiale iyyabaaha?  
 ¿Läba gua yubale Jesús benni güequie len lebi'ihaba Ben-na  
 belhidha Tata Do Iyyabaaha? La Ben-naba Benniha, Benni esía attu  
 sá. Attiba bilenle beopie deyye iyyabaaha, anáguuba esíe attu libe.

### Bodúcabi Matías cuenta gue Judas

<sup>12</sup> Lania nna beaditteba ca bi'ini bedheti ca tisa bele'e lo lhilhi  
 Atta Da Ca Yaga gue Olivu nu do gaxxaba atta re yiesi Jerusalén.  
 Neda bedácabi besincabi Jerusalén-na tena attiba ttu kilómetro,  
 nu ga'anaba lo ca ley boca'ana Moisés dha ca benni Israel sá redí  
 lecaniha. <sup>13</sup> Atti besincabi lhe'e yiesi Jerusalén nna beopittebacabi  
 lhe'e yo'o chupa coa atta re'ana Pedro lhe Juan lhe Jacobo lhe  
 Andrés lhe Felipe lhe Tomás lhe Bartolomé lhe Mateo lhe Jacobo,  
 xi'ini Alfeo lhe Simón, bi'ini te lábi Zelote lhe Judas, xi'ini Jacobo  
 lhe. <sup>14</sup> Iyába ca bi'in-ni satíaba rise'ecabi ttu reba nía rinnecabi leni  
 Tata Do Iyyabaaha lencabi ca betsi Jesús lhe len nan gue Benniha  
 lhe adírba ca benni nuila lhe.

<sup>15</sup> Ttu sá atti se'e ttu reba attiba ttu gayua yu'u galhia (120) ca  
 benni ria lecabí ca tisa gue tata Jesús, nianna udulítteba Pedro lagüi  
 gue ca benni se'e nía atti rábi cabi:

<sup>16</sup> —Xa betsito, labíaba uca nu rá ca tisa betee Espíritu gue Tata  
 Do Iyyabaaha unne David, nu dia lo ca sitsi benbiha atti unnebi  
 gue nu uni Judas nu uneruna lo ca nu bedaxxucana Jesús. <sup>17</sup> Cumu  
 Judas ucana benni baba len ri'i, selaguabana unna sina nu ga'ana  
 unri-ni. <sup>18</sup> Lana nua güiana guayo'ona ttu lo yu leni belhiu nu  
 utixacan na gue nu lä anca tsee bennaha. Nía nua biyinnana delo  
 udiqui atti bisú lhe'eni nna biría tuu yi'e gueniha bisílana lo yu.

<sup>19</sup> Iyába ca benni se'e lhe'e yiesi Jerusalén-ni binacana nua, nianna  
 utixxattebacana lá yuha Acéldama, leni tisa guecani dienna innána:  
 Lo Yu Gue Reni. <sup>20</sup> Cumu attiba rá lo sitsi atta dia ca Salmo-na rána:

Lhe'e lismiha si si banihaba aca,  
 cumu nuttu nu benni tse'e lhe'eni.<sup>a</sup>

Ráguauba lo sitsiha:

Attu benni subi edúna cuenta gue nua.<sup>b</sup>

<sup>a</sup> 1:20 Salmo 69:25    <sup>b</sup> 1:20 Salmo 69:25

<sup>21</sup> 'Larcala nna de nua nna raca duelha odúri attu benni qui edúna cuenta gue Judas. Niba se'e ca unbiyuu ca bi'ini güequi len ri'i itú ttuba atti güequi Jesús Benni anque Benni bananie ri len ri'iha. <sup>22</sup> Udulocabi bettenalhacabi attili begadi Juan bi'ini rugadi indaha Benniha indaha, axta liba beopie deyye iyyabaaha se'ecabi len ri'i. Larcala nuxa ttucabi iselacabi ri'i qui quixxi'abi len ri'i beacabani Jesús.

<sup>23</sup> Laniala nna bele'ecabi chupa ca benni: José bi'ini lá Barsabás bi'ini teeguaba lábi Justo, attu bi'ini lá Matías nna. <sup>24</sup> Nianna atti unnettebacabi len Tata Do Iyyabaaha rácabi:

—Benni bananie ri'itu, lu yulu ttixa anca lhe'e lastoo ttu ttuttu. Nnanna nna bele'e delo chupa ca unbiyuu se'e-ni, nuxcabí chi becuelu <sup>25</sup> qui edúbi acabi apóstol unbi sina nu anca un Judas. Cumu unnuha nna bexxíbana leni nu lä anca tsee bennaha nuarca bennittina sina-ni. Nianna diabana atta ralhana tsiana.

<sup>26</sup> Laniala nna bencabi ttu nu beni qui bele'eni Tata Do Iyyabaaha cabi nuxa ca bi'iniha saxxína. Nianna guaxxíbana Matíasba bodúcabi. Snaba lania nna bisela bi'iniha len ca bi'ini sinía (11) bedheti ca tisa bele'enie.

### Atti bisía Espíritu gue Tata Do Iyyabaaha

**2** Atti bisía laní nu te láni Pentecostés iyába ca benni ria le ca tisa gue Jesús se'ecabi ttu reba lhe'e ttuba yo'o. <sup>2</sup> Attirba iyyaba lecabí uyu'u be daca lo bea-na, attiba atta daa ttu be idí ulu'u tsil'ini lhe'e itúba yo'o atta se'ecabiha. <sup>3</sup> Nianna ucaxxetteba attiba ca belha gue gui, atti bila'atteba lhe'e guiha udonia iqui ttu ttucabi. <sup>4</sup> Lania nna iyábacabi uta'a Espíritu gue Tata Do Iyyabaaha lhe'e itúba cuerpu guecabí. Nianna udulottebacabi unnecabi attu tisa subi, cua ruteba Espírituha rinnecabi.

<sup>5</sup> La laniaguaba nua resina ca benni Israel se'e lhe'e ca yiesi dittu lhe'e yiesi Jerusalén. Ancacana benni rudoru tisa gue Tata Do Iyyabaaha. <sup>6</sup> Ca benni bienquinna uyu'u beha nna güiattebacana guagüiacana bixa nua ucaha. Lacana nna niba lä beselaquinna bixa innácaná, cumu ttu ttubacana rieniquinna rinne ca benni ria le ca tisa gue Jesús ca tisa nu rinne ttu ttucana lhe'e ca yiesi atta se'ecanaha. <sup>7</sup> Nianna rugüiaba lo loescani, rebanbaquinna lhe atti rinnaba tisa loescani rácana:

—¿Lä nu Galileaba iyába ca nu se'e rinne-ni nna? <sup>8</sup> ¿Biacala rieninri rinne ca unna tisa nu rinne ttu ttubari lasri ganna? <sup>9</sup> Ri'i ancari ca benni daa daca lo yu gue Partia lhe daca lo yu gue Media lhe daca lo yu gue Elam lhe daca lo yu gue Mesopotamia lhe daca lo yu gue Judea lhe daca lo yu gue Capadocia lhe daca lo yu gue Ponto lhe daca lo yu gue Asia lhe <sup>10</sup>daca lo yu gue Frigia lhe ca nu daa daca lo yu gue Panfilia lhe ca nu daa daca lo yu gue Egipto lhe. Niguaba se'e ca benni daa gaxxaba atta re yiesi lána Cirene nu re lo yu gue Libia. Niguaba se'e ca benni daa daca lhe'e yiesi Roma ancacana benni Israel atti ulicana, attu chupacana ancacana benni Israel cumu bedaxxucana elha runi gue ca benni Israel. <sup>11</sup> Niguaba se'e ca nu daa daca lo yu gue Creta lhe daca lo yu gue Arabia lhe. Nianna iyába ca nu Galilea-ni rieninri rinnecana loesi ca tisa rinneri, rixxi'acana gue nu runi reban leri runi Tata Do Iyyabaaha.

### Pedro riguixxi'enbi ca benni gue nu raca

<sup>12</sup> Iyábacana rebanquinna niguaba lä yucana bixa ulaba lecani lhe. Laniala nna unnaba tisa loescani rácana:

—¿Bi diani nu raca-ni?

<sup>13</sup> Ttiaca adí ca nu se'e nía nna redaculaquinna rácana:

—¡Cumu dusbacani unná!

<sup>14</sup> Laniala nna udulí Pedro lenbi a sinía (11) ca bi'ini bedheti ca tisa bele'e Jesús, atti unnebi idisa rábi ca nu se'e nía:

—¡Ca benni Israel lhe iyále ca nu se'ele lhe'e yiesi Jerusalén-ni lhe gualdo nagale gue nu innea-ni qui unale gue bixunní raca-ni!

<sup>15</sup> Ca nu se'e-ni nna läga duscani ca unní atti nu rále-na. Gua rgüiabale nna chi begüeerbana retin jaa dila nna. <sup>16</sup> Nnanna nna ni chi rilenle raca nu unne profeta Joel, atti rábi:

<sup>17</sup> Tata Do Iyyabaaha nna re:

“Ca sá deoba lhuxa yies lo yu-ni nna

unia ga'a Espíritu quia lhe'e cuerpu gue iyá ca benni se'e yies  
lo yu-ni.

Lania nna ca xi'in biyuule-na lhe

ca xi'iniunnále-na lhe

innecana ca tisa utea len lacana.

Ca uncuiti gueleha nna ule'equinna ttu nu runna  
reban leri,

ca benniolaha nna itsiaquinna yiel.

<sup>18</sup>Laniaguaba unia ga'a Espíritu quia lhe'e cuerpu gue ca  
unbiyuu lhe

ca nuila runi sina quia lhe  
qui innecana ca tisa utea len lacana.

<sup>19</sup>Ulhe'eguaba elha reban xxen leri iyyabaaha lhe  
aníaguaba aca yies lo yu-ni lhe.

Ilali reni lhe ite lhe  
chadha bea seni lhe;

<sup>20</sup>tatubisa-na nna echulha loni,  
nanto beo-na nna eyacana xinaa attiba reni  
atti chi deoba isía sá esía Benni bananie ri-na,  
sáha ancana sá xeni, sá eban le benni lhe.

<sup>21</sup>Nianna iyába ca benni, innábacana lo Benni bananie ri-na  
odile cana

gualábacana qui bittu tsia nitticana.”

<sup>22</sup>'Larcala gualdorga nagale, xa benni Israel, gue nu innía. Lebi'i  
nna gua yuxebale, Jesús Benni udo lhe'e yiesi Nazaret, uque Benni  
ulea tsee Tata Do Iyyabaaha lo iyábale, cumu Jesús bixuunie qui  
benie ca elha reban leri lhe ca milagru lhe. <sup>23</sup>Atti betecana Benniha  
las nále qui guaxxína uca attiba chi ga'anani Tata Do Iyyabaaha  
aca, bedaxxulale Benniha leni ca nu lä duta leni qui betti lee lo  
ya crusicha. <sup>24</sup>Ttiaca Tata Do Iyyabaaha nna bechidhabe Benniha  
lhe'e baa atta yu'u ca nu yatti-na, bodilábe Benniha lo elha disa  
ruyú Benni gue elhuttiha. Cumu elhuttiha nna läga udána un gueni  
Benniha. <sup>25</sup>David bi'ini uca nu rinnabia gue ca benni Israel ca tu  
atti nía utixxi'abi gue Jesús rábi:

Neti satíaba rilátia Benni bananie neti nerue loa.

Gansi lee due daca lhuitta derechu quia nna tsa läganu dhana  
uttínna neti iyya.

<sup>26</sup>Larcala neti nna re'olhaba lasia, rulha guee  
itú iqui itú lasia lhe

neti nna ruxxenba lasia lägabi satea.

<sup>27</sup>Cumu lu, Tata Do Iyyabaa, läga odha'anlu neti atta yu'u ca  
nu yatti-na,

niguaba lä ugüelhalu usu bela gue Benni ulequiesilu uni sina  
guelu-ni lhe.

<sup>28</sup>Cuinalu bele'enlu neti neda atta raxxacari elha nabani lhe  
yalha re'o lasia de dulu len neti lhe.

<sup>29</sup> 'Betsito, gualugüelha neti quixxi'atseetia le gue David benni uca benniola gueri udo ca tu nurea. Gua yubale nna uttiba bi'iniha nianna bigatsibabi. Nnanna nna sna rilábinri sa teba baa gue bi'iniha atta se'eri-ni. <sup>30</sup>Cumu David ucabi profeta, labi nna guayúbabí Tata Do Iyyabaaha nna chi boca'an tsitsie tisa, re bi'iniha: "Ttu ca benni datíalu odúa aca nu innabia attiba lu", <sup>31</sup>larcala David nna chiba yubi guee nu chi daa aca, nuarcala unnebi dequi eyacabani Cristu. Läga eya'ana Benniha atta yu'u ca nu yatti-na, niguaba lä usu bela gue Benniha lhe. <sup>32</sup>Gualíba Jesúsba Benniha beni belhidha Tata Do Iyyabaaha lo elhuttiha. Gue unnuha nna iyábatu ancatu benni biyú lotu. <sup>33</sup>Benniha nua beni Tata Do Iyyabaaha aque Benni ra xxeni leni, bodo daca lhuitta derechu gue Benniha lhe. Nianna uxíe Espíritu bete Tata Do Iyyabaaha lenie, benni chi becan yienie idhelhe len ri'i. Benniha benni chi bieninle lhe chi bilenle lhe betee len ca benni se'e-ni. <sup>34</sup>Cumu läga David bi'iniha beopi iyyabaaha. Ttiaca labi unnebi rábi:

Ni rá Tata Do Iyyabaaha Benni bananie neti:

"Udo ni daca lhuitta derechu quia-ni,

<sup>35</sup>axta liba unia tse'e ca nu rutía di lecanlu na xani'alu qui acacana nu udú ni'alu iquicani."<sup>a</sup>

<sup>36</sup>'Larcala nna xa benni Israel, gualuna iyárechattle, gualíba Jesús Benni betále lo ya crusihaba Benniha benni beni Tata Do Iyyabaaha aque Benni bananie ri lhe Cristu lhe.

<sup>37</sup>Atti bienini ca nu se'e nía nu rá Pedro, lania nna si'irurba runcana cumu de guadú lecani nu rá bi'iniha cana. Nianna unnaba tisattebacana bi'iniha, adí ca bi'ini bedheti ca tisa bele'e Jesús lhe rácan cabi:

—Xa betsito, ¿bila anca nu untu ganna?

<sup>38</sup>Pedro nna becabittebabi guecani rábi cana:

—Gualodú xiyyanle nna gualodaxxutte neda gue Tata Do Iyyabaaha. Nianna atti cua ttu ttubale gadile inda udettile lá Jesucristuha, qui anáchu dhi Tata Do Iyyabaaha elha xen lasi gue ca tulha chi benle-na. Lania nna utee Espíritu guee-na len lebi'i.

<sup>39</sup>Cumu chiba begüee Tata Do Iyyabaaha tisa utee Espíritu-na len lebi'i, len ca xi'inle-na lhe anáguauba leni ca benni dittu lhe delába

---

<sup>a</sup> 2:34-35 Salmo 110:1

iyába ca benni raca le Tata gueri do iyyabaaha Benni bananie ri gaxie.

<sup>40</sup> Unnerguuba Pedro adí ca tisa, belisabi cana rábi cana:

—Gualeriesi ca nu runi nu lä anca tsee se'e nnanna.

<sup>41</sup> Anioca nuarca ca benni güia lecabí gue ca tisa unne Pedro nna udittebacabi inda. La sátteba bisela attiba tsunna mili ca benni cubi leni ca benni chi ria le Jesús. <sup>42</sup> Iyábacabi rudobacabi tisa gue nu rule'e ca bi'ini bedheti ca tisa bele'e Jesús, ruteguuba gue loescabi ttu bixa reasaquinbi lhe ttulapaba ro iyábacabi yetta lhe aníaguuba runcabi atti rinnecabi leni Tata Do Iyyabaaha lhe.

### Nu run ca benni chi güia le ca tisa gue tata Jesús

<sup>43</sup> Iyába ca benni rebanquinna cumu riláquinna ca milagru lhe ca nu runi rebaninri lhe runi ca bi'ini bedheti ca tisa bele'e Jesús.

<sup>44</sup> Iyába ca benni chi ria lecabí Jesús ttu reba atta rise'ecabi. Iyába nu te guecabí nna gue iyábacabi reaca nua. <sup>45</sup> Rutto'oguabacabi ca lo yu guecabicha lhe adírba nu te guecabí lhe. Belhiha nna riguidhi gue loescabi cua reasabani ttu ttucabi. <sup>46</sup> Ttu ttu sába riacabi rise'ecabi ttu reba lhe'eli'a gue yotuha. Dequila nna reyya lhe'e lisi loescabi qui rocabi rse gue Jesús, aníaguuba qui rocabi yetta lhe. Yalha re'o lecabí de se'e tsee len loescabi, <sup>47</sup> satíaba ribequi xencabi Tata Do Iyyabaaha lhe. Larcala iyába ca nu se'e lhe'e yiesi Jerusalén racaquinna guecabí. Aníaguuba ttu ttu sába runi Benni bananie ri-na risela adí ca benni rodile qui bittu tsia nitticabi ca bi'ini chi ria le Jesús.

### Ttu unbiyuu xi beacana

**3** Ttu sá nna dia Pedro lenbi Juan atta do yotuha attiba tu retin tsunna ulha cumu uraha anca rinne ca benni len Tata Do Iyyabaaha. <sup>2</sup> Ro'o yotuha nna do ttu unbiyuu xi, aníaba anca nua ulina. Ttu ttu sába radocana nua ro'o yotuha daca atta du puerta te láni Nu Ga'ana Tsee, qui innábana belhi leni ca benni ria lhe'eli'a gue yotuha. <sup>3</sup> Atti biláni benni anca xiha Pedro lenbi Juan chi diacabi ga'acabi lhe'eli'a gue yotuha nna unnettebana rinnabana ca bi'iniha belhi. <sup>4</sup> Lania la nna ttu liba begüiacabi loni, atti unnettebana Pedro rábi na:

—¡Begüia ri'itu!

<sup>5</sup> Unbiyuuhha nna bedo tseettetebana begüiana locabi, cumu raquinna ga guebloacabi ttu bixa len lana. <sup>6</sup> Ttiaca Pedro nna ráttebabí na:

—Bittu belhi quia te utea len luu. Nu teerba quia nna utea len luu. Jesucristu gue Nazaret rudettia, udulí nna udá.

<sup>7</sup> Laniala nna bedaxxutteba Pedro ná derechu gue unbiyuuhha, atti bedhulíttebabí na. La laniatteba bílí ca ni'aniha lhe ca dhetiniha lhe. <sup>8</sup> Nu xiha nna tturba udhina udulína, atti udáttebana. Laniala nna uta'a lenna ca bi'iniha lhe'eli'a gue yotuha, ttubana ridána lhe radhina lhe nianna rinnena rána: “¡Xxeni ra lelu, Tata Do Iyyabaaha!”

<sup>9</sup> Iyába ca nu biláquinna unbiyuuhha ridána lhe rulhana lhe gue Tata Do Iyyabaaha, <sup>10</sup> ucatequinna lhe bebanquinna lhe biláquinna nu guate unbiyuuhha, cumu chiba anca biaquinna labana nua ridona ro'o yotuha daca atta du puerta te láni Nu Ga'ana Tseeha rinnabana belhi.

### Pedro riguixxi'enbi ca benni gue nuxa beonnanu xiha

<sup>11</sup> Nu xi chi beacaha nna tsaba bitturu rulhána Pedro lenbi Juan. Nianna iyába ca benni se'e nía rebanquinna atti diattebacana atta se'e ca bi'iniha lhe'e corredori daa ro'o yotuha nu te láni Corredori gue Salomón. <sup>12</sup> Atti biláni Pedro chi bisína ixe benni atta se'ecabihha nna unnettebabí rábi cana:

—Lebi'i, benni Israel, bittu ebaninle gue nu chi bilenle-na. Lä ugüiguabale ri'itu lhe. Cumu läga ri'itu beni beaca unbiyuu-ni leni elha ra xxen le guetu, niguaba de ancatu benni ratúa leni lhe. <sup>13</sup> Tata Do Iyyabaa gue Abraham lhe gue Isaac lhe gue Jacob lhe Tata Do Iyyabaaha gue ca benniola guerihha chi benie cuequi xen iyácea Benni Xi'inie Jesús<sup>a</sup> Benni bedaxxule guatele las ná Pilatoha. Lebi'i nna bittu uxielhale olhána Benniha atti chi rána olháne.

<sup>14</sup> Ttiaca lebi'i nna läga uca lele lhá Benni bittu tulha guee te, Benni do riesi anca gue Tata Do Iyyabaaha. Nu beni elhuttiha la unnabale belhá Pilatoha. <sup>15</sup> Lebi'i nna Benni rute elha nabani guerihha la bettile. Ttiaca Tata Do Iyyabaaha nna benie beaquin Benniha, belhidhe Benniha lhe'e baa atta yu'u ca nu yatti-na. Ri'itu ancatu

<sup>a</sup> **3:13** Lo yitsi-ni atta dia rá: “Jesús Benni anca Xi'inieha”, lo adíru ca yitsi nna rá: “Jesús Benni rixuunie lo sina gueeha.”

benni biyú lotu gue iyá nu uca. <sup>16</sup>Larcala unbiyuu rilenle du-ni lhe nu anca bienle-ni lhe chi güia leni Jesús nuarca beni Benniha udána. De güia leni gue Benniha nuarcala chi beacarana. Lebi'i nna iyábale gua rugüiabale nu chi uca.

<sup>17</sup>'Neti racatia xa betsito, de chulhabinle lenle ca nu rinnabia guele-na nuarcala bedhacale Jesús anía. <sup>18</sup>Ttiaca aníaba uca qui guaxxína nu chi rá Tata Do Iyyabaaha iyába ca benni uca profeta guee, ca bi'iniha nna chi utixxi'acabi rácabi, labíaba gatti Cristu. <sup>19</sup>Larcala lebi'i nna gualodú xiyyanle, gualodaxxutte neda gue Tata Do Iyyabaaha qui cue ca tulha guele-na, lania nna uni Benni bananie ri-na salía tseenle. <sup>20</sup>Anáguba qui edhelhe attu libe Jesús, delába Cristu Benni chi ga'ananie idhelhe len lebi'i. <sup>21</sup>Benniha nna labíaba cuede iyyabaaha axta liba isía sá lhuxa ose'e tsee Tata Do Iyyabaaha iyánea, attiba chi rá ca profeta utixxi'a ca tisa betee benna lencabi itú nurea. <sup>22</sup>Attiba chi rá Moisés ca benni uca benniola gueriba: "Tata Do Iyyabaaha, Benni bananie le-na idhelhe ttu Benni datíabi lebi'i, Benniha inne ca tisa utee Ben-na lenie. Benniha nua idhele attiba udhele neti. Benniha udole tisa gue iyába nu innee."<sup>a</sup> <sup>23</sup>Cumu iyába ca benni bittu udo nagacani gue Benniha nna ttu tsaba iría nua lo yiesi gue ca benni baba leni Tata Do Iyyabaaha."<sup>b</sup>

<sup>24</sup>Iyába ca benni uca profeta unnecabi gue nu raca nnanna udulo leni profeta Samuel. <sup>25</sup>Lebi'i ancale benni datíia ca benni uca profeta, larcala ralhaguabale dhíle nu chi rá Tata Do Iyyabaaha utee len ca bi'iniha. Nu chi begüee tisa utee leni ca benniola gueri use'e ca tu nureha, atti re Abraham: "Leni ca benni aca betsi loesluha idhela elha tsee guee iyárecha ca benni se'e yies lo yu-ni."<sup>c</sup> <sup>26</sup>Atti belhidha Tata Do Iyyabaaha xi'inie Jesús lhe'e baa atta yu'u ca nu yatti-na, udhelhattebe benniha lola len lebi'i qui aca lanie le, anáchu nna eriale lhe'e nu lä anca tsee runle-na.

### Pedro lenbi Juan rutsá ducabi lo ca uxtisi

**4** Sna duba Pedro lenbi Juan rulisacabi ca benni se'e lhe'eli'a gue yotuha, attirba chi bisína ca bixxudiha dia lencana nu lo gue ca nu rapa yotuha, cheeguabacana ca benni saduceo lhe. <sup>2</sup>Ca unnuha nna risa'quinna biaca rule'eni Pedro lenbi Juan ca benni

<sup>a</sup> 3:22 Deuteronomio 18:15-16

<sup>b</sup> 3:23 Deuteronomio 18:19

<sup>c</sup> 3:25 Génesis 22:18

se'e nía, de biaca rixxi'aquinbi ca nua gue atti beacani Jesús bele'e lo gualíba eyacani ca nu yatti-na lhe.<sup>3</sup> Lania nna bedaxsutteba ca nua ca bi'iniha, bega'acana lhe'e lisiyya la ulhaha, cumu chiba ulha sá nua larcala betteyú sá liba bebeacana ca bi'iniha.<sup>4</sup> Ixe ca benni bienquinna ca tisaha güia lecani Jesús, larcala attiba tu gayu mili ca benni cubi bisela, suntterla ca benni unbiyuuhá bibaba.

<sup>5</sup> Beteyú dila nna bese'etteba ca nu rinnabia gue ca benni Israel ttu reba lhe'e yiesi Jerusalén lencana ca benniola teru elha rieni guecaniha lhe ca nu rule'e nu rá lo ca ley boca'ana Moisés lhe.

<sup>6</sup> Níaguaba du Anás nu anca bixxudi xeni rinnabiahá, Caifás lhe Juan lhe Alejandro lhe adírba ca nu datía bixxudi xeni rinnabiahá lhe.<sup>7</sup> Laniala nna udhelhacana ca nu güia gualeacana Pedro lenbi Juan lhe'e lisiyyaha. Atti chi besin lencana ca bi'iniha atta se'e ca nua nna unnaba tisattecacana ca bi'iniha rácan cabi:

—Lebi'i nna ¿nú betena derechu guele nuarca requile runle aná, nú udhelhana le lhe?

<sup>8</sup> Pedro nna cumu itúba lhe'e cuerpu guebi yu'u Espíritu gue Tata Do Iyyabaaha, bequittebabí rábi cana:

—Ca benni rinnabia gue Israel, anágua lebi'i ca benni teru elha rieni gueni gue lo yies-ni lhe<sup>9</sup> lebi'i nna rinnaba tisale ri'itu gue nu tsee uca leni unbiyuu xi-ni, cumu raca lele unale gasná uca beacana.<sup>10</sup> Qui una tseele nna anágua iyárecha ca benni Israel-ni lhe unbiyuu du lole-ni nna lá Jesucristu gue Nazaretba bedettitu nna beaca unní. Benniha nua bettile betále lo ya crusicha, ttiaca Tata Do Iyyabaaha nna belhidhe Benniha lhe'e baa atta yu'u ca nu yatti-na.<sup>11</sup> Jesús nua anque attiba ttu iyya nu ulu'u ni'ale, lebi'i benni anca attiba nu rucua yo'o. Ttiaca lee nua be'eyue uque attiba ttu iyya nu ribe rideñ tsitsina yo'o.<sup>12</sup> Larcala lärga nurua attu te dhana odilán ri qui bittu tsia nittiri, cumu lärga nu attu benni chi udhelha Tata Do Iyyabaaha yies lo yu-ni, qui odilán ri.

<sup>13</sup> Atti biláni ca nu rinnabiahá bittu rasini Pedro lenbi Juan atti rinnecabi nna bebanbaquinna guecabí, cumu yuxéabacana läga raca gue ca bi'iniha sitsi, niguaba lä bedheticabi lhe. Laniala nna boquinna iquicani gualíba anca ca bi'iniha benni güequí leni Jesús.

<sup>14</sup> Güea níaguaba du unbiyuu beacaha len lacabi lhe larcala bi rlaba teequinna bixa gáacana ca bi'iniha.<sup>15</sup> Laniala nna bebeacana Pedro lenbi Juan lhe'e yo'o lagüiha. Nianna a sun ca nu rinnabiahába be'ana rinne leni loescani,<sup>16</sup> ráacana:

—¿Bila anca nu unri leni ca unbiyuu-ni ganna? Cumu iyába ca benni se'e Jerusalén-ni chi yucana dequi chi ben ca unná ttu milagru. Ri'i nna ¿ga sacatsiri innári dequi bittu lí? <sup>17</sup> Suntterba qui bitturu gadhi tisa-ni lhe'e yiesi-ni nna uniasinri cana qui udhá iquicani bitturu quixxi'aquinna nuxaruha benni ca tisa gue unbiyuu rácana Jesús.

<sup>18</sup> Aní uca nna beaxicana Pedro lenbi Juan attu libe atta se'ecanaha, atti bedhaca disattebacana ca bi'iniha qui tsa bitturu quixxi'acabi gue Jesús, bitturguaba ule'equinbi ca benni gue Benniha lhe. <sup>19</sup> Ttiaca Pedro lenbi Juan, becabilacabi rácabi cana:

—Lebi'itteba attiba se'e-le-na, gualnna sanga, ¿si tseerla anca lo Tata Do Iyyabaaha udotu tisa guele attichula gue Benniha? <sup>20</sup> Cumu ri'itu nna läga aca udhantu quixxi'atu nu chi bienintu lhe nu chi bilentu lhe.

<sup>21</sup> Dequide bedhaca disa chatti ca nu rinnabia ca bi'iniha nna laniala nna bolhávana cabi. Ttiaca lägabi ria lencana eselquinna gaxasná uncana udhaca si'icana ca bi'iniha lo ni'a gue de iyába ca benni se'e nía rinnecana rácana: “¡Xxeni ra le Tata Do Iyyabaaha!” de begüiacana nu chi uca. <sup>22</sup> Cumu unbiyuu beaca leni milagru ucaha nna chiba anquin nua guatela chua (40) ida.

### Ca benni ria le Jesús rinnecabi leni Tata Do Iyyabaaha

<sup>23</sup> Dequide chi ulá Pedro lenbi Juan, deyyattebacabi atta se'e adí ca benni ria le Jesús. Nianna utixxi'attebaquinbi ca bi'iniha iyába nu rá ca bixxudi anca nu loha lhe nu rá ca nu teru elha rieni gueni gue ca benni Israel lhe. <sup>24</sup> Atti chi binacabi iyába nu utixxi'a ca bi'iniha nna iyábacabi ttulapaba unnecabi belisacabi Tata Do Iyyabaaha, rácabi:

—Benni bananie ri'itu, lu ancalu Benni ra xxeni leni, cuinalu benlu iyyabaaha lhe yies lo yu-ni lhe indattoo-na lhe anáguaba iyába nu se'e locani lhe. <sup>25</sup> Lu unnelu leni Espíritu guelu ca tisa unne David bi'ini uca benniola guetu beni sina guelu ca tu nurea atti rábi:

¿Biaca risatsa ca benni dittu-na,  
rulaba lecani nu lä dica ixuu lhe?

<sup>26</sup> Ca nu rinnabia xeni gue yies lo yu-ni lhe ca nu anca nu lona lhe ttuba riacana rese'e

disacana lo Tata Do Iyyabaaha,  
lo Cristu Benni udhelha Ben-na lhe.<sup>a</sup>

<sup>27</sup> Gualíba aníaba beni Herodes lenna Poncio Pilato lhe'e yies-ni, lencana iyába ca nu dittu lhe iyáguba ca nu Israel-ni lhe atti bebi'a nottebacana Xi'inlu Jesús benni do riesinlu anca guelu. Benniha nua chi ga'aninlu aque Cristu. <sup>28</sup> Aníaba ben ca nua qui guaxxína uca iyá nu chi ga'aninlu lhe nu chi bedaa lelu lhe aca. <sup>29</sup> Nnanna nna xa Benni banani ri'itu, biyúrga nu runcana, urga bi rudhaca disacana ri'itu. Larcala nna rinnabatu lo cuinalu, qui aca lenlu ri'itu, ca benni runtu sina guelu-ni, qui bittu gasintu gansi chi riguixxi'atu ca tisa guelha. <sup>30</sup> Bele'e lo nu ancalu, beni ca milagru lhe beoni ca benni rani lhe leni elha ra xxeni le guee Xi'inlu Jesús benni do riesinlu anca guelu.

<sup>31</sup> Uluxaba unnecabi leni Tata Do Iyyabaaha nna attirba chi bixú atta se'ecabiha. Lania nna uta'atteba Espíritu gue Tata Do Iyyabaaha lhe'e itúba cuerpu guecabi, atti udulottebacabi utixxi'acabi itú iqui itú lecabí ca tisa gue Tata Do Iyyabaaha.

### **Ca benni ria le ca tisa gue Jesús rute len loescabi iyába nu te guecabi**

<sup>32</sup> Iyába ca benni chi ria lecabí Jesús, ttuba rulaba lecabí, ni ttu ca bi'iniha bittu rácabi: "Suna quiba bixa te quia." Gue iyábacabi anca ttu bixa te guecabi. <sup>33</sup> Ca bi'ini bedheti ca tisa bele'enie nna tsitsiba chi ra lecabí, itú iqui itú lecabí requicabi riguixxi'acabi beacabani Jesús Benni bananie ri. Tsitsiguuba raca leni Tata Do Iyyabaaha iyába ca benni ria le Jesús. <sup>34</sup> Ni ttu ca benni sela leni ca bi'iniha bittu reasaquinbi ttu bixa, cumu ca benni se'e lo yu guecabi o sia liscabi lhe rutto'obacabi ca nua. Belhiha nna <sup>35</sup> rutecabi leni ca bi'ini bedheti ca tisa bele'enie qui quidhicabi nua gue ca benni cua reasabani ttu ttucabi. <sup>36</sup> Aníaba beni ttu benni lábi José, datíabi Leví, dabi daca lo yu nu te láni Chipre. Bi'ini nua utixxa ca bi'ini bedheti ca tisa bele'enie lábi Bernabé, dienna innána Benni rute elha xen lasi. <sup>37</sup> Labi nua betto'obi ttu lo yu guebi. Nianna betebi iyába belhiha leni ca bi'ini bedheti ca tisa bele'enie.

---

<sup>a</sup> 4:25-26 Salmo 2:1-2

### Nu guate Ananías lenna Safira

**5** Udoguaba attu unbiyuu lána Ananías, nuila gueniha nna lána Safira. Lacana nna betto'ocana ttu lo yu. <sup>2</sup>Unbiyuu-ni nna unnena leni nuila gueniha qui uca bedátsicana iqui belhi gue lo yuha, adí nua nna güiacana guagüecana ca bi'ini bedheti ca tisa bele'e Jesús. <sup>3</sup>Ttiaca Pedro ráttebabí:

—Ananías, ¿biaca begüeelhalu uta'a nu xxegüiha lhe'elu ben lelu lo Espíritu gue Tata Do Iyyabaaha, lu nna bedátsibalu iqui belhi nu utixacana lo yuha? <sup>4</sup>¿Si läba guebalu anca lo yuha atti bittu chi betto'olu nua? Larcala guegualu anca belhi nu utixacana nua. ¿Tti uca belaba lelu benlu aná? Läga lo benni unní ben lelu, lo Tata Do Iyyabaaha unní ben lelu.

<sup>5</sup> Atti bienini Ananías unnuha nna beyyattebana udhá, nianna uttittebana. Iyába ca nu binacana gue nu ucaha nna usixxattaquinna. <sup>6</sup>Laniala nna udulí ttu chupa ca uncuiti bottesican na lari, atti güiattebacana guacatsican na.

<sup>7</sup> Dequide utee attiba tu tsunna ura nna attirba chi bisína Safira nuila gue Ananías. Ttiaca ni lä yuna bixa chi uca. <sup>8</sup>Pedro nna unnaba tisattebabí nuilaha rábi na:

—Utixxi'en neti, ¿si belhi betelenaba anca iyá nu beguixacana lo yuha?

Lana nna becabina rána:

—¡Ttoníaba beguixacana nua!

<sup>9</sup>Pedro nna ráttebabí na:

—¿Biaca ttulapaba güiale benle cu'u biale Espíritu gue Benni bananie ri-na? Nnanna nna ni ca nu guacatsicana unbiyuu gueluha chi dedaa-na. Anáguba lu lhe icheeguabacan lu qui salhu'ucana lu lhe'e baa.

<sup>10</sup>La uratteba nna bedebixxi lotteba Safira atta du Pedro, atti uttittebana. Atti beta'a ca uncuiti guacatsicana Ananías nna níaba chi dedeete nuilaha uttina. Laniala uchecana nuilaha guacatsican na atta yu'u unbiyuu gueniha. <sup>11</sup>Iyába ca benni ria lecabi Jesús lhe iyába ca nu binacana gue nu guate ca nua lhe usixxattaquinna.

#### Tu racaba ixe ca benni ria le ca tisa gue Jesús

<sup>12</sup>Iixeru ca milagru lhe ca nu runi rebaninri lhe beni ca bi'ini bedheti ca tisa bele'e Jesús lhe'e yiesiha. Iyába ca benni ria le Jesús

riacabi rise'ecabi lhe'e corredori nu te láni Corredori Gue Salomón daa ro'o youtuha. <sup>13</sup> Adí ca benni se'e lhe'e yiesiha nna tsitsiba rapacana ca bi'iniha respeto, ttiaca bittu reaxiquinna satselacana ca bi'iniha. <sup>14</sup> Läquiga de nua, adfía guani ca benni güia lecabí Jesú, unbiyuu lhe nuila lhe. <sup>15</sup> Axtaba ro'o ca nedaha ribeacana ca benni raniha, rixxacana ca nua lo ta'a lhe lo breta lhe qui gansi chi utee Pedro nna ladiba xula guebi tsu'u atta te ca nua qui eyacacana. <sup>16</sup> Ca benni se'e lhe'e adí ca lhe'esi se'e sabi'aba Jerusalén lhe ixerucana güiacana nía leni ca benni rani lhe ca benni yu'u be xxegüi lhe'e cuerpu guecani lhe. Iyába ca nua beacacana.

**Ca nu rinnabia gue ca benni Israel rudhaca  
si'icana ca bi'ini bedheti ca tisa bele'enie**

<sup>17</sup> Bixxudi xeni rinnabiah lenna iyába ca benni saduceo sela len lana, upattebacana malisi. <sup>18</sup> Denua nna nuarca bedaxxucana ca bi'ini bedheti ca tisa bele'e Jesú bedheacana cabi lhe'e lisiyya. <sup>19</sup> Ttiaca lo relaha nna bisína ttu ingeli gue Tata Do Iyyabaaha udhalbi ro'o lisiyyaha qui bebeabi ca bi'iniha, nianna rábi ca bi'iniha:

<sup>20</sup> —Gualeyya lhe'eli'a gue youtuha. Gualquixxi'ani ca benni ca tisa gue Jesú qui gatta elha nabani guecani ttu dia liiba lo Tata Do Iyyabaaha.

<sup>21</sup> Lacabi nna bedobacabi tisa gue nu rá ingeliha. Nuarca betteyú dila nna dilatte chi bisíncabi ro'o youtuha. Atti bededú lottebacabi rodile'equinbi ca benni.

Laca bixxudi xeni rinnabiah lenna adí ca nu se'e lennaha, uxittebacana ca nu teru elha rieni guecani gue ca benni Israel lhe ca nu runi elha uxtisiha lhe atti udhelhattebacana ca nu dia saleacana ca benni te lisiyyaha. <sup>22</sup> Ttiaca atti bisína ca nu dia saleacana ca bi'iniha lhe'e lisiyyaha nna lärga nurua te nía. Laniala nna bequicana quatixxi'acana rácana:

<sup>23</sup> —Tsitsiba yaya lisiyyaha bisíntu. Ca nu se'e rapacana ro'o nua nna níaba se'e ca nua. Ttiaca atti udhaltu uta'atu nna lärga nu te lhe'e lisiyyaha.

<sup>24</sup> Atti bienini bixxudi xeni rinnabia lenna adí ca bixxudi anca nu loha lhe nu lo gue ca nu rise'e rapa youtuha lhe gue nu rá ca nua, ucattebaquinna nianna rácana: “¿Bilabunni sateri nnanna?”

<sup>25</sup> Unnuhaba rácana se'ecana attirba chi ucaxxe ttu nu bisína, rán cana:

—Ni ca nu utixxale lisiyyaha se'e lhe'eli'a gue yotuha rule'equinna ca benni.

<sup>26</sup> Nianna diatteba nu lo gue ca nu rise'e rapa yotuha itupaba lenna ca güensina gueniha guaxxícana ca bi'iniha. Ttiaca bittu beaxquinna bixa udhacacana ca bi'iniha, cumu usquinna qui lä use'e ca benni se'e nía cana iyya.

<sup>27</sup> Atti besin lencana ca bi'iniha lhe'e atta runcana elha uxtisiha nna unnetteba bixxudi xeni rinnabiahá rána:

<sup>28</sup> —¿Läba chi xa rátu le dequi tsa bittur ule'ele ca tisa gue unbiyuu rinnele guen-na nna? Lebi'i nna adila runle. Nnanna nna iyába ca benni se'e Jerusalén-ni chi begunale gue nu rule'ele na. Güea rinnele rále dequi ri'ituba bettitu unbiyuuhá lhe.

<sup>29</sup> Pedro becabittebabi lenbi adí ca bi'ini bedheti ca tisa bele'e Jesús rácabi:

—Ttiaca runrulana duelha udotu tisa gue Tata Do Iyyabaaha, attichula gue ca benni se'e yies lo yu-ni. <sup>30</sup> Tata do Iyyabaaha gue ca benniola gueriha belhidhe Jesús lhe'e baa. Benniha nuabettile betále lo ya crusihá. <sup>31</sup> Ttiaca Tata Do Iyyabaaha nna bedo lhuitta derechu guee Benniha benie aque Benni ra xxeni lee. Nianna benie aca Benniha benni rinnabia gueri lhe Benni rodile ri lhe qui anáchu ri'i ca benni Israel-ni nna odú xiyyanri qui odaxxuri neda gue Tata Do Iyyabaaha, Benniha nna dhie elha xen lasi gue ca tulha gueri. <sup>32</sup> Ri'itu ancatu benni begüia lotu gue iyába nu beni Benniha, anáguuba Espíritu bete Tata Do Iyyabaaha len ca benni rudo tisa guee lhe.

<sup>33</sup> Atti bienquinna nu rá ca bi'iniha nna bisa'attebaquinna nianna uxacattecacana utticana ca bi'iniha. <sup>34</sup> Ttiaca len ca nu runcana elha uxtisiha nna nutsa ttu benni fariseo lábi Gamaliel. Ancabi benni rule'e ca ley boca'ana Moisés, bi'ini riaguuba le iyá ca benni se'e lhe'e yiesiha guebi lhe. Bi'iniha nna udulíttebabi rábi ca nu se'e nía ebeacana ca bi'ini bedheti ca tisa bele'e Jesús ttu satti atta se'ecana.

<sup>35</sup> Nianna unnettebabí rábi ca benni runi elha uxtisiha:

—Benni Israel, primerxa gualulaba tsee lele guee bixunna rdacale udhacale ca unbiyuu-na. <sup>36</sup> Gua yuxebale nu uca ca axta tu nurea, biríaguuba ttu benni lána Teudas rána dequi lana ancana ttu benni ra xxeni leni. Larcala attiba tu ttapa gayua (400) ca

benni guanalhacan na. Ttiaca bettibacana nua, nianna iyába ca nu guanocana nua gatti laduba bedaxxucana. Níaba uluxa nua.

<sup>37</sup> Dequila lania nna bedería Judas, benni Galilea, atti ulhidhacana censuha. Unnuha nna udágubana guano ixeru ca benni na. Ttiaca atti bedeotticana unnuha nna iyába ca nu guanalhacana nua gatti laduba bedaxxucana. <sup>38</sup> Larcala neti ria le: Gualuhá ca unná.

Bittubi udhaquinle cana, cumu nu rinnecan nna ganna si ancabunna gue benni se'e yies lo yu-ni nna güedeluxa bunna. <sup>39</sup> Ttiaca ganna si ancabunna gue Tata Do Iyyabaaha nna lebi'i läga dhale utse'e lole unná. Gualuyurga cadiga len Tata Do Iyyabaaha lä yu'ule utilha.

<sup>40</sup> Bedoba nagacani guebi. Laniala nna beaxicana ca bi'ini bedheti ca tisa bele'e Jesús atta se'ecanaha. Nianna dequide chi unnabiaca cana begocana ca bi'iniha ttu bede'elu nna atti ráttebacana ca bi'iniha:

—Bitturu innele ca tisa gue Jesús.

Laniala nna bolhácana cabi. <sup>41</sup> Dequide beríacabi atta se'e ca nu runcana elha uxtisiha nna re'olhaba lecabí de begüeelha Tata Do Iyyabaaha uxícabi ttu elha disa de rixxi'acabi gue Jesús. <sup>42</sup> Ttu ttu sába guase'ebacabi lhe'eli'a gue yotuha, lhe'e lisi ca benni lhe. Tsa bittu rudú sicabi rule'ecabi lhe riguixxi'acabi lhe dequi Jesús anque Cristu.

### Bose'ecabi gasi ca benni uni sina leni ca bi'ini bedheti ca tisa bele'enie

**6** Lania nna cumu chi dia rani adí ca benni ria le Jesús, ca benni rinne tisa griego nna chi udulocana rinnecana gue ca benni rinne tisa hebreo, rávana dequi ca nuila bidabi nu rinne griego bittu ralhacana dhicana guadi lo nu ritidhi ttu ttu sá. <sup>2</sup> Lania nna ca benni tsil'inu (12) anca ca bi'ini bedheti ca tisa bele'e Jesús nna beaxittebacabi iyába ca benni ria le Jesús, atti rávabi ca bi'iniha:

—Läga anca tsee gansi ri'itu udú situ quixxi'atu ca tisa gue Tata Do Iyyabaaha qui tsequitu quidhitu nu ritupa-na. <sup>3</sup> Larcala, xa betsito, raca duelha eguilale gasi ca unbiyuu chi rapa elha rieni, ca nu rinne tsee ca benni guecani lhe ca nu chi yu'u Espíritu gue Tata Do Iyyabaaha lhe'e cuerpu guecani lhe qui ose'etu cana uncana sina-ni, <sup>4</sup> qui anáchu ri'itu nna tsaba udo letu innetu leni Tata Do Iyyabaaha, qui acarguaba tsequitu ule'etu ca tisa gue Ben-na lhe.

<sup>5</sup> Iyába benni guadi lecabí gue nu rá ca bi'iniha, atti bodúttebacabi Esteban, bi'iní chi ria tsitsi lebi Jesús, chi yu'u Espíritu gue Tata Do Iyyabaaha lhe'e itúba cuerpu guebi lhe. Bodúguacabi Felipe lhe Prócuru lhe Nicanor lhe Timón lhe Parmenas lhe Nicolás bi'iní beaca lasbi lhe'esi Antioquía lhe bi'iniha nua beacabi benni Israel. <sup>6</sup> Laniala nna uchecabi ca bi'iniha atta se'e ca bi'ini bedheti ca tisa bele'e Jesús. Lacabi nna bexxúatteba nácabi iqui ca bi'iniha, atti unnettebacabi leni Tata Do Iyyabaaha unnabacabi aca leni Benniha ca bi'iniha.

<sup>7</sup> Ttu diaba runa adí benni ca tisa gue Tata Do Iyyabaaha, anáaguaba tsitsiba dia rani ca benni ria le Jesús lhe'e yiesi Jerusalén lhe anáguuba ixeguaba ca bixxudiha güia lecani Jesús.

### Uchecana Esteban lo ca uxtisi

<sup>8</sup> Esteban nna tsitsiba ra lebi lo neda gue Tata Do Iyyabaaha, tsitsiba raca leni Benniha bi lhe. Labi nna runbi ca milagru lhe ca nu runi rebaninri lhe leni ca benni se'e lhe'e yiesiha. <sup>9</sup> Ttiaca ttulhe ca nu daa lhe'e ttu yo'o atta rudheti ca benni Israel ca tisa gue Tata Do Iyyabaaha, nu te láni Yo'o Gue Ca Nu Chi Se'e Lá, lencana adí ca benni daa lhe'esi Cirene lhe ca nu daa lhe'esi Alejandría lhe ca nu daa lo yu te láni Cilicia lhe ca nu daa lo yu te láni Asia lhe udulottebacana unne dícana belisacana Esteban. <sup>10</sup> Ttiaca läga ridacana lobi cumu rinnebi leni elha rieni rute Espíritu gue Tata Do Iyyabaaha. <sup>11</sup> Laniala nna sigába utixacana ttu chupa ca nu innácano dequi chi bienquinna gue Esteban riguebi iqui Moisés, iqui Tata Do Iyyabaaha lhe. <sup>12</sup> Aní uca nuarca betsatsacana ca benni se'e lhe'e yiesiha, ca nu teru elha rieni gueni gue ca benni Israel lhe ca nu rule'e nu rá ca ley boca'ana Moisés lhe. Lo ni'a gue unnuha nna bedaxxucana bi'iniha uchecan bi guadúcan bi atta runcana elha uxtisiha. <sup>13</sup> Utilaguabacana ca nu ben lecani rácana:

—Unbiyuu du-ni nna littuba redí leni riguena iqui yotu anca le'a-ni lhe iqui ca ley-ni lhe. <sup>14</sup> Chiguaba bienintu rána dequi Jesús, benni udo lhe'e yiesi Nazaret, utse'e lona yotu-ni lhe otsiana nu chi labiri runri nu boca'ana Moisés unri lhe.

<sup>15</sup> Ca nu runi elha uxtisiha nna lencana iyába ca nu sia nía lhe begüiattebacana lo Esteban. Lacana nna biláquinna lo bi'iniha ancana attiba lo ttu ingeli gue Tata Do Iyyabaaha.

### Esteban recabibi gue ca uxtisi

**7** Lania nna unnaba tisatteba bixxudi xeni rinnabiah Esteban gansi gualíni ca nu rinne guebiha.

<sup>2</sup>Labi nna becabibi rábi:

—Xa tata xeni lhe betsito lhe gualudorga nagale quia. Tata Do Iyyabaaha, benni ru'u xieni guee, bele'en loe benniola gueri Abraham, atti dobi lo yu te láni Mesopotamia, atti chi deoba iríabi tsiabi sadhobi lhe'e yiesi Harán. <sup>3</sup>Nianna re bi'iniha: “Bedhá iquili yies guelha lhe ca benni datíalu-na lhe biría güia lo yu atta ule'etia lu.” <sup>4</sup>Laniala nna biría Abraham lo yu gue Caldea, atti güiabi guadhabi Harán. Dequide utti tata guebiha nna Tata Do Iyyabaaha uche Abraham bisíabi lo yu atta se'ele nnanna. <sup>5</sup>Bittuguuba begüee Benniha bi saro'o lo yu-ni guebi, ladiba saro'o atta dhobi. Sunruba begüee tisa re: “Neti godha'anba lu lo yu-ni lenlu ca xi'inlu lhe ca xidhoalu chi daba isía lhe ca nu udaxxucana lo tia guelu.” Masquiba lä nu xi'ini Abraham chi te lania. <sup>6</sup>Ráguaabe Abraham: “Ca xi'ini xidhoalu, ca nu udaxxucana lo tia guelu, acacana benni dittu tse'ecana lo yu dittu atta acacana benni tto'o lo sina, nía udhaca si'ican cana, urenxattacan cana sina ttapa gayua (400) ida.” <sup>7</sup>Ráguaabe Tata Do Iyyabaaha bi: “Neti nna gualíba lasia ugüea elha disa yiesi nu urennna cana sina. Dequide nua nna eríacana nía esíacana ni qui udú xibicani loa.” <sup>8</sup>Qui eya'an tsitsi tisa begüee Tata Do Iyyabaaha leni Abraham nna bodha'anguabe leni bi'iniha urenbí senni nu runcana leni ca unbiyuu Israel qui ule'e lo ancacana benni gue Tata Do Iyyabaaha. Larcala atti chi ucani Isaac xxunu bisa dequide ulina, berentteba tata guebi, Abraham, senni-ni lenbi. Aníaguuba beni Isaac leni xi'inbi Jacob. Jacob nna bedeonbi nua leni ca xi'inbi, ca nu uca benniola gue tsil'inu (12) xxia ca benni Israel.

<sup>9</sup>'Ca unnuha nua betia di lecani betsican José, nianna betto'ocan na leni ca nu uchecan na daca lo yu gue Egipto. Ttiaca Tata Do Iyyabaaha nna udíbe leni José. <sup>10</sup>Labe bodile bi lo ca elha disa biyúbi, begüeeguabe bi elha rieni lhe benguabe qui benbi nu dica uyu'u le Faraón, nu unnabiana Egipto. Nianna bodúguuba Faraón José ucabi nu innabia berupa gue Egipto, gue lhe'e yo'o lagüi lhe.

<sup>11</sup>'Lania nua bisía ttu ubina itúba lo yu gue Egipto axtaba lo yu gue Canaán. Ca benniola guerihha nna biyúttebacabi elha disa

cumu bea nu rocabi.<sup>12</sup> Ttiaca atti bina Jacob dequi deca Egiptoha te xua xuxtila nna, udhelhattebabí ca xi'in biyuubiha delába ca benni uca benniola gueriha. Lania nua güiacabi primerba.<sup>13</sup> Atti güiacabi berupaha nna lania liba utixxi'a José dequi lababi nua anca betsicabi. Lania liba bina Faraón gaxa ladu beaca lasi José.<sup>14</sup> Dequide nua nna bentteba José mandadu guaxí ca bi'iniha tata guebi Jacob, itupa leni adí ca benni raca betsí loesicabiha. Gayuna yu'u tsinu (75) ca bi'iniha bisína nía.<sup>15</sup> Anía uca bisíni Jacob lo yu gue Egipto. Níaba uttibi. Níaguaba utti ca benniola gueriha lhe.<sup>16</sup> Dequila nna dechecana ca sitta gue ca bi'iniha becatsicana lhe'e baa uyo'o Abraham, nu betto'o ca xi'ini Hamor daca lhe'esi te láni Siquem.

<sup>17</sup> Atti chi deoba isía aca nu unne Tata Do Iyyabaaha atti begüee tisa leni Abraham, lania nna chi guaniru adí ca benni Israel se'e Egiptoha. Yalha ixecabi chi raca.<sup>18</sup> La laniaguaba nua uta'a attu nu unnabiana Egipto nu bittu anca bienna José.<sup>19</sup> Unnuha uxí yienna ca benniola gueriha. Tsaba bittu ulu'ubiana nu bedhacana ca bi'iniha, lana nna benna duelha guecabi udhá iquicabi ca xi'ini chica'a guecabi chi ralbaha qui gatticana, anía nna litturu tsancana.<sup>20</sup> Lania nua uli Moisés. Bi'iniha nna ucabi ttu unto guadi le Tata Do Iyyabaaha. Ca tata nan guebiha nna biyú gatsibacabi bi'iniha tsunna beo lhe'e liscabiha.<sup>21</sup> Ttiaca atti litturu uca igatsibi nna bedhába iquican bi. Lania nna xi'iniunná Faraónba bedína bi'iniha, labana biyúna bi'iniha attisiba xi'imbani.<sup>22</sup> Anía uca nuarca bideti Moisés iyába elha rieni gue ca nu Egipto, ucabi ttu unbiyuu beni ca sina xxeni lhe unnebi ca tisa elha lhe.

<sup>23</sup> Atti chi ucani Moisés chua (40) ida nna bexxa lebi uquinbi sannalhibi ca benni guebiha, delába ca benni Israel.<sup>24</sup> Atti güiabi guannalhibi ca benni guebiha nna bilenbi ttu nu Egipto dana rugüena ttu ca benni guebiha. Nianna güiattebabí guadilábi nua. Ttiaca tuttíru bettibi nu Egiptoha.<sup>25</sup> Cumu labi nna raquinbi nicaga guate daabani ca benni Israel dequi len labi nua odilá Tata Do Iyyabaaha cana. Ttiaca lacana nna läga guadú lecani.<sup>26</sup> Betteyú sa nna guaditi'atteba Moisés chupa ca benni Israel yu'ucana utilha. Labi nna benttebabí etsilabi ca nua. Nianna rábi cana. “¿Biaca ritilha len loesle? Gua yubale nna betsibale raca.”<sup>27</sup> Ttiaca attu nu rugüena attu nua nna besigalana Moisés. Nianna atti rán bi: “Lu nna ¿nú bodún lu acalu nu innabia ri'itu o acalu xueda guetu lhe?

<sup>28</sup> ¿Si rdacaguabalu edeottilu neti attiba benlu leni nu Egipto bettilu nnayaha, aca?" <sup>29</sup> Atti bienini Moisés nu rá nua nna bexunnittebabí guadhabo lo yu te láni Madián, atta ucabi benni dittu. Nía betsá nábi, nianna use'e chupa xi'inbi.

<sup>30</sup> 'Dequide utee chua (40) ida dobi lo yuba atta nuttu benni se'e nna gaxxaba atta do I'iya Sinaí, nía bele'e loen ingeli gue Tata Do Iyyabaaha Moisés lhe'e belha radha gue ttu bibu rite re nía.

<sup>31</sup> Atti biláni Moisés nua nna bebanabinbi. Nianna ubigattebabí diabi rugüiabi qui ilátseenbi nua. Laniala nna bieninbi tsi'i Tata Do Iyyabaaha re bi'iniha: <sup>32</sup> "Neti anca Tata Do Iyyabaa gue ca benni uca benniola gueleha. Anca Tata Do Iyyabaaha gue Abraham lhe gue Isaac lhe gue Jacob lhe." Moisés nna bixidittebabí de usbinbi, garua beaxinbi ugüiabi nía. <sup>33</sup> Laniala nna rá Benni bananie ri na: "Ulea ni'alu ca guaracha guelha, cumu atta dulha nna ancana yu anca le'a. <sup>34</sup> Gualíba neti nna chi bilátia atti rate ca benni quia se'e Egipto-na chiguaba bientia ribescana lhe. Nnanna nna guadia qui odiláya cana. Larcala nna bedú tsee qui idhelha lu tsialu Egipto nna."

<sup>35</sup> 'La Moisés nu ulu'u ni'a ca benni Israel atti rávana bi: "Ttiba ancalu nna ¿nú bodún lu acalu nu innabia ri'itu o acalu xueda guetu lhe?" La bi'inihaba nua udhelha Tata Do Iyyabaaha. Ingeli ucaxxe lhe'e belha radha gue bibuha bixuuni Tata Do Iyyabaaha qui bodúe Moisés acabi nu innabia lhe nu odilána cana lhe. <sup>36</sup> Labi nua bebeabi ca benniola gueriha Egiptoha. Nianna benbi ca elha rebanin xxeni leri Egiptoha. Lo Indattoo Xinaaha lhe lo yu bisi atta nuttu benni se'eha lhe delo chua (40) ida. <sup>37</sup> Moisés guaba nua rábi ca benni Israel: "Tata Do Iyyabaaha idhelhe ttu benni anque profeta attiba neti. Benniha nua aque Benni datíale." <sup>38</sup> Moisés guaba bi'iniha udúbi lagüi gue ca benni Israel lo yu bisiha. La laguababi nua unne lenbi ingeli gue Tata Do Iyyabaaha iqui I'iya Sinaí lhe. Lenla nna unnebi len ca benniola gueriha. La laguabi nua uxíbi ca tisa ca benni rute elha nabani ttu dia lii gueri lhe nianna betebi Benniha len ri'i.

<sup>39</sup> Ttiaca ca benniola gueriha nna läga uca lecabí udocabi tisa quebi. Ulu'ula ni'acabi bi atti uxacacabi eyequicabi Egiptoha attu libe. <sup>40</sup> Nianna rácabi Aarón: "Beni ca diosi qui nnerucana lori cumu läga yuri bixa guate Moisés nu bebeana ri lo yu te láni Egiptoha."

<sup>41</sup> Laniala nna bencabi ttu me leni oro nu uca diosi guecabi. Nianna

bettittebacabi ca nimala qui betecabi úna len nua, atti benttebacabi laní de re'oba lecabí gue diosi anca leni oro bencabiba. <sup>42</sup> Lo ni'a gue ca bi'ini nna bedhá iqui Tata Do Iyyabaaha cabi, begüeelhe cabi bencabibi le'a gue ca beli sia lo bea-na lhe attiba dia lo ca sitsi bodha'ana ca profeta, atta rinne Tata Do Iyyabaaha re:

Lebi'i, benni Israel, ¿si nimala bettile betele úna len neti delo chua (40) ida güequile lo yu bisi atta nuttu benni se'e?

<sup>43</sup> Delaba unnuha nna yo'o lari gue nu te láni diosi Moloc, la dechele leni beli gue nu te láni diosi Renfán.

Ca unnuha nna lebi'iba uyu'ule benle cana, atti bilhattebale le'a guecani.

Denua nna cueaya le udelha le daca nurearu gue lo yu te láni Babilonia, atta acale benni dittu.<sup>a</sup>

<sup>44</sup> 'Udorba yotu lari gue Tata Do Iyyabaaha len ca benniola gueriha atti requicabi lo yu bisi atta nuttu benni se'e. Unnuha rixxi'ana dequi gualíba due len lacabi. Yotu lariha nna bencabi benniha attiba rá Tata Do Iyyabaaha Moisés unbie, attiba anca nu chi bilenbiha. <sup>45</sup> Ca benniola gueriha nna be'an lencabi yotu lariha, nianna betecabie leni ca xi'incabi beta'a leni Josué lo yu atta besincabiba. Nía nua udácabí lo ca benni bittu anca benni Israel se'e nía, ca nu bebea Tata Do Iyyabaaha aníba locabi lo yuha. Yotu lariha nna níaba udoe axta liba atti bisía David. <sup>46</sup> Labi nua guadi lee Tata Do Iyyabaaha guebi. Nianna unnababi udobi ttu yotu atta cuequi xxen ca benni datía Jacob Tata Do Iyyabaaha. <sup>47</sup> Ttiaca Salomón liba bedobi yotuha. <sup>48</sup> Masquiba Tata Do Iyyabaaha, Benni ra xxeni le, läga do Benniha lhe'e yotu runi ca benni se'e yies lo yu-ni, attiba rá bi'ini uca profeta gue Ben-na:

<sup>49</sup> Iyyabaaha ancana atta doa rinnabiaya rá Benni bananie ri-na.

Yies lo yu-ni nna ancana atta rudú ni'aya.

¿Bi yotu nua udole quia?

Bittuguuba aca guele unle ttu atta dhoa eyaca lasia lhe.

<sup>50</sup> Cumu netiba benia iyába ca nu se'e yies lo yu-ni.

<sup>51</sup> 'Ttiaca lebi'i —rá Esteban—, ancale benni diti, nu lastoo tsitsi. Gua siaba nagale nna lä rieninle. Satíaba redú disale lo Espíritu

<sup>a</sup> 7:42-43 Amós 5:25-27

gue Tata Do Iyyabaaha. Attiba ben ca benniola gueriha runle.

<sup>52</sup> Iyába ca benni uca profeta gue Tata Do Iyyabaaha besía le ca benniola gueleha, axtababetticana ca profeta utixxi'a dequi isía ttu benni runi nu anca tsee lo Tata Do Iyyabaaha. Nnanna nna chi bita Benniha. Ttiaca lebi'i nna bedaxxulale Benniha bettile. <sup>53</sup> Lebi'i la nua uxíle ca ley-na las ná ca ingeli gue Tata Do Iyyabaaha. Nianna bittu rudole tisa gue nu re.

### Betticana Esteban leni iyya

<sup>54</sup> Atti chi bina ca benni se'e nía iyába nu rá Esteban nna bisa'alhabaquinna roni lo layacani de riláxxattaquinna. <sup>55</sup> Ttiaca bi'iniha nna yu'u itúba lhe'e cuerpu guebi Espíritu gue Tata Do Iyyabaaha. Attiba ulhidha lobi begüiabi güetsaa, biláttebinbi xieni gue Tata Do Iyyabaaha, Jesús due daca lhuitta derechu gue Benniha lhe. <sup>56</sup> Laniala nna unnebi rábi:

—Nnannatte nna rilátia iyyabaaha du yalie. Rilágubatia Benni unbiyuu daa iyyabaaha due daca lhuitta derechu gue Tata Do Iyyabaaha lhe.

<sup>57</sup> Ttiaca lacana nna bettola nagacani, atti uresi'acana idisa, nianna bebi'a notteba iyábacana bi'iniha. <sup>58</sup> Atti uleattecacana Esteban ro'o yiesiha, besiacan bi iyya. Ca nu rудelha iyyacan bi'iniha nna bodha'anttebacana ca xocaniha leni ttu uncuiti lána Saulo. <sup>59</sup> Lagüiba yu'ucana rusíacana Esteban iyyaha nna labi nna unnettebabí rábi:

—Jesús, Benni bananie neti, na chi dedaaya len cuinalu. Bedíchi neti.

<sup>60</sup> Nianna bedútteba xibibi atti unnebi idisa rábi:

—¡Benni banani neti, bixulhachini gue nu lä anca tsee run ca unní!

Uluxaba rábi anía nna sigába bixun lebi.

**8** Níaguaba du Saulo, lana nna uyu'uba leni betticana Esteban.

### Saulo ruríalana ca benni ria le Jesús

La sáhatteba udulo ca benni besía lecani ca benni ria Jesús se'e lhe'e yiesi Jerusalén. Ca bi'iniha nna bexunnittebacabi diacabi gatti laduba gue lo yu gue Judea, benni diaba daca lo yu gue Samaria lhe. A sunruba ca bi'ini bedheti ca tisa bele'e Jesús be'ancabi

lhe'e yiesi Jerusalén. <sup>2</sup>Ttu chupa ca unbiyuu rudoru tisa gue Tata Do Iyyabaaha nna guacatsicabi Esteban, ca bi'iniha nna attulade urescabi gue bi'iniha. <sup>3</sup>Laca Saulo nna gua diana rudhaca si'ina ca benni ria le Jesús. Lana nna rata'ana lhe'e ca yo'o, rache na'ayana ca benni nuila lhe ca unbiyuu lhe atti radheana ca bi'iniha lhe'e lisiyya.

### **Ttu güesaa güia leni ca tisa gue Jesús**

<sup>4</sup>Ttiaca ca benni bexunni biría lhe'e yiesi Jerusalén, gaxaba diacabi riguixxi'acabi ca tisa gue Jesús. <sup>5</sup>Felipe nna ulu'uttebabí neda diabi deca lhe'e yiesi xeni re lo yu gue Samaria, labi nna riguixxi'enbi ca benni se'e nía gue Cristu. <sup>6</sup>Ca benni nna atti rienquinna gue nu rá Felipe, riláquinna ca milagru lhe ca nu runi reban leri lhe runi bi'iniha, iyábacana ritupacana qui rudo tsee nagacani gue nu riguixxi'a bi'iniha. <sup>7</sup>Ixe ca nu yu'u be xxegüi lhe'e cuerpu guecani reacacana. Ca be xxegüiha nna ribesi'ani ca nua reríacana. Anáguba ixe ca nu daa yatti ni'a nácani lhe ca nu xi lhe beacacana. <sup>8</sup>Lo ni'a gue unnuha nna iyába ca benni se'e lhe'e yiesiha redaca lecani.

<sup>9</sup>La laniaguaba udo ttu benni lána Simón. Chi bisá rudhetina gue güesaa. Udábana uxí yienna ca benni se'e lo yu gue Samaria, axta güia lecani gueni dequi lana ancana ttu benni ra xxeni leni. <sup>10</sup>Iyárechaba ca benni rudo nagacani gueni, desdeba unto axtaba ca benniola. Nianna rácan:

—Unní rapana elha ra xxeni le gue Tata Do Iyyabaaha.

<sup>11</sup>Isá chi güia lecani gueni cumu nucala dana ridí yiena ca nua leni elha güesaa gueniha. <sup>12</sup>Ttiaca atti bienini ca benni ca tisa rixxi'ani Felipe cana gue Jesucristuha, gue gaxasná innabia Tata Do Iyyabaaha ca benni lhe lania nna unbiyuu lhe nuila lhe güia lecani, atti udittebacana inda. <sup>13</sup>Axtaba Simón güia leni, nianna udiguabana inda. Bedaa lania udulona guanalhana Felipe gaxaba dia bi'iniha, rebanbinna rilenna ca milagru lhe ca nu runi rebaninri lhe runi bi'iniha.

<sup>14</sup>Atti bina ca bi'ini bedheti ca tisa bele'e Jesús se'e Jerusalén dequi chi bedaxxu ca benni se'e Samaria tisa gue Tata Do Iyyabaaha nna laniala udhelhacabi Pedro lenbi Juan qui güiacabi nía. <sup>15</sup>Bisínba ca bi'iniha nna udulottebacabi unnecabi leni Tata Do Iyyabaaha rinnabacabi aca len Benniha ca benni chi ria lecabí

Jesús qui dhicabi Espíritu gue Tata Do Iyyabaaha.<sup>16</sup> Cumu ni ttu ca bi'iniha lägabi chi uxicabi Espírituha, sunruba lá Jesús, Benni bananie ri-na betti atti udi ca bi'iniha inda.<sup>17</sup> Laniala nna bexxúa ná Pedro lenbi Juan iqui ca bi'iniha qui uxícabi Espíritu gue Tata Do Iyyabaaha.

<sup>18</sup> Atti biláni Simón rixxua ná ca bi'ini bedheti ca tisa bele'e Jesús iqui ca bi'iniha qui ridícabi Espíritu gue Tata Do Iyyabaaha, lana nna uxacattebana utena belhi leni ca bi'ini bedheti ca tisa bele'e Jesús,<sup>19</sup> atti rán ca bi'iniha:

—Gualute loesi elha raca lani-na len neti qui anáchu nna nuxaba benni ixxúa náya iquicani nna dhígubacana Espíritu gue Tata Do Iyyabaaha.

<sup>20</sup> Laniala nna becabí Pedro gueni rábi na:

—¡Itupa lenlu belhi guelha tsia nittilu! ¿Biaca runlu go'olu nu anca gue Tata Do Iyyabaaha, rute len ri'i?<sup>21</sup> Lu nna lägabi elha ralhalu unlu loesi sina runtu-ni, cumu läga anca tsee nu rulaba lelu lo Tata Do Iyyabaaha.<sup>22</sup> Bedhana nu lä anca tsee runlu-na, atti unnabatte lo Tata Do Iyyabaaha qui nicaga guadíbe elha xen lasi guelu de belaba lelu aná.<sup>23</sup> Cumu neti nna rilátia rexxatta malisi lhe'elu, tsaba xicalu lo nu lä anca tsee-na lhe.

<sup>24</sup> Simón nna becabina rána:

—Lebi'iba gualinnaba chi quia lo Benni bananie ri-na qui bittu satea ni ttu nu chi rále-na.

<sup>25</sup> Pedro lenbi Juan, dequide chi utixxi'acabi lhe bele'ecabi lhe ca tisa gue Tata Do Iyyabaaha, begu'uttebacabi neda deyyacabi riguixxi'encabi ca benni se'e lhe'e adí ca yiesi se'e lo yu gue Samaria ca tisa gue Jesús. Ni besinbacabi lhe'e yiesi Jerusalén.

### Felipe riguixxi'enbi ttu nu Etiopía ca tisa gue Jesús

<sup>26</sup> Dequide la nna bodole'e lo ttu ingeli gue Tata Do Iyyabaaha re Felipe:

—Bedú tsee nna güia daca sur daca atta dia neda nu riria lhiaxu Jerusalén nu diana daca lo yu bisi atta nuttu benni se'e, risinna lhe'e yiesi te láni Gaza.

<sup>27</sup> Felipe nna guadhattebabi diabi. Lo neda atta diabiha nna nía beti'abi ttu unbiyuu ancana eunuco nu beaca lasni Etiopía. Unnuha ancana ttu uxtisi ra xxeni leni, lana denna belhi gue yo'o lagüi gue nuila rinnabia itúba lo yu gue Etiopía. Nuila rinnabia te láni

Candace. Unbiyuuhua nua dedaana güiana lhe'e yiesi Jerusalén qui gualequixxenna Tata Do Iyyabaaha.<sup>28</sup> Atti deyu'una neda deyyana lasniha nna dedona lo carreta gueniha rulabana lo ca sitsi beni profeta Isaías.

<sup>29</sup> Espíritu gue Tata Do Iyyabaaha nna ráttebe Felipe:

—Güia atta deyya carreta deyya-na.

<sup>30</sup> Atti bisín Felipe gaxxaba nna bienttebinbi rulaba nua lo ca sitsi beni profeta Isaías. Laniala nna rábi nua:

—Lu nna ¿si gua radú lelu nu rulabalha?

<sup>31</sup> Nu Etiopía nna becabittebana rána bi'iniha:

—¿Gasná sadú lasia gue nu rá lo sitsi-ni, cumu läganu te quixxi'enna neti nu dia le ca tisa-ni?

Laniala nna unnaba unbiyuuhua tsopi Felipe dho lenbi na lo carreta gueniha.<sup>32</sup> Lo sitsi gue Tata Do Iyyabaaha atta rulaba unbiyuuhua nna rá:

Uchebacane attiba ttu carne'e diana gattina,  
attiba ttu carne'e siba ancana duna lo ca nu richúcana itsa  
xoni lhe

niba ttu tisa bittu unnee.

<sup>33</sup> Atti lagüi lo rate Benniha locachirba nu bedíne.

Nurla te quixxi'ana gue ca benni datía Benniha.

Cumu de utúacane yies lo yu-ni.<sup>a</sup>

<sup>34</sup> Unbiyuu Etiopíaha nna unnaba tisattebana Felipe rána bi'iniha:

—¿Si biba innáchibalu utixxi'en neti nu gueonni rinne profeta Isaías? ¿Si la guebabí unní rinnebi, aca? ¿Gue nu subi bunni rinnebi, aca?

<sup>35</sup> Laniala nna bedaxxu ni'a Felipe atta rulaba nu Etiopíaha nna atti utixxi'enbi na ca tisa gue Jesús.<sup>36</sup> Deyu'ubacabi neda deyyacabi, nianna besincabi atta te ttu inda. Nu Etiopía nna ráttebana:

—¡Ni inda te ni! ¿Si gua te ttu bixa lo ni'a gue nna bittu aca gadia inda?

<sup>37</sup> [Felipe nna rábi:

—Ganna si gua riaba lelu itú iqui itú lelu nna guacaba gadilu inda.

Unbiyuuhua nna becabittebana rána:

—Bila, gua riaba lasia Jesucristu anque xi'ini Tata Do Iyyabaaha.]

---

<sup>a</sup> 8:32-33 Isaías 53:7-8

<sup>38</sup> Laniala nna benna mandadu becuedacana carretaha atti guadittebacabi lhe'e indaha. Nianna begaditteba Felipe nua inda.  
<sup>39</sup> Dequide beríacabi lhe'e indaha nna Espíritu gue Tata Do Iyyabaaha nna bechettebe Felipe. Lania nna lärga nurua bi'iniha biláni nu Etiopía. Lana nna re'olhaba leni deyu'una neda deyyana.  
<sup>40</sup> Felipe nna lhe'e yiesi Azoto nía liba chi dubi atti betedeenbi. Aníaba deyyabi riguixxi'abi ca tisa gue Jesús lhe'e iyába ca yiesi atta retebiha, axta liba besinbi lhe'e yiesi Cesarea.

### Saulo bedaxxubi neda gue Jesús

(Hch 22:6-16; 26:12-18)

**9** Saulo nna garula rudú sina, ttu diabana rinnena rána dequi uttibana ca benni ria le Jesús. Nía güiana lo bixxudi xeni rinnabiah, <sup>2</sup> guannabana qui utee nua lisensi tsiana lhe'e ca yo'o atta rudheti ca benni Israel ca tisa gue Tata Do Iyyabaaha sia lhe'e yiesi Damasco, qui satilana ca benni chi bedaxxu neda gue Jesús, nuxaba ancacabi si unbiyuu lhe si nuila lhe qui uxxicana cabi echená cabi lhe'e yiesi Jerusalén. <sup>3</sup> Ttiaca atti chi deoba isínna lhe'e yiesi Damasco nna lhaba ucaxxe ttu xieni daa iyyabaaha uyu'e sabi'aba atta dianaha. <sup>4</sup> Lana nna ubixxi lottebana. Nianna atti bieninna ts'i'i ttu Benni unne re:

—¡Saulo! ¡Saulo! ¿Biaca neti denalhalu rughaca si'ilu?

<sup>5</sup> Saulo nna unnaba tisattebana rána:

—¿Nú leonna tata?

Tsi'i Benni unneha nna becabie re:

—Neti Jesús, Benni denalhalu rughaca si'ilha. [Ttiaca luba rila guelu runlu aná attiba ttu nu la labana ruse'e ni'ani lo tu clavu.]

<sup>6</sup> Lana nna [tu rixidibana de rasbinna unnena] rána:

—Tata, ¿bi raca lelu unia?

Jesús ráttebe na:

—Nnanna nna guadha, güia lhe'e yies-na. Na quixxi'aquinna lu bixa anca nu unlu.

<sup>7</sup> Ca benni dia leni Saulo nna nibala ucaru innecana de usixxattabaquinna atti bieniquinna ts'i'i Benniha, ttiaca läganu biláquinna. <sup>8</sup> Laniala nna beadhatteba Saulo lo yu, ttiaca atti bedhali loni diana ugüiana nna garua bilenna. Larcala denalhibacan

náni bisín lencan na lhe'e yiesi Damasco.<sup>9</sup> Níaba udona tsunna ubisa bittu bilenna niguaba lä utona lhe lä u'uyaguabana inda lhe.

<sup>10</sup> Lhe'e yiesi Damasco do ttu benni ria lebi Jesús lábi Ananías. Bi'iniha nua bele'en lo Benni bananie ri-na, atti re bi'iniha:

—¡Ananías!

Bi'iniha nna becabibi rábi:

—Ni doa, tata.

<sup>11</sup> Benni bananie ri-na ráttebe bi'iniha:

—Udulí, güia atta te ttu neda te láni Neda Lixxa. Nía beguila lhe'e lisi Judas ttu unbiyuu lána Saulo, unnuha beaca lasni lhe'e yiesi Tarso. Nía do nua rinnena leni Tata Do Iyyabaaha.<sup>12</sup> Lana nna chi bele'enna ttu unbiyuu lána Ananías uta'ana bexxúa náni iquini qui eyali loni.

<sup>13</sup> Ananías nna becabittebabí rábi:

—Benni bananie neti, ixe benni chi utixi'aquinna neti gue nu runi unbiyuu rálha, yalha nu chi bedhá ca unna ca benni chi se'e riesi anca guelu se'e lhe'e yiesi Jerusalén.<sup>14</sup> Nnanna nna dana ni cumu bete ca bixxudi anca nu lo na lisensi qui udaxxuna ca benni ria lecabí lu.

<sup>15</sup> Ttiaca Jesús re bi'iniha:

—Güia, cumu chi becúeaa unná qui tsiana quixxi'ana ca tisa quia-na leni ca benni dittu, leni ca nu rinnabia lhe anáguaña leni ca benni Israel lhe.<sup>16</sup> Cumu neti ule'etia na, lana nna tsitsiba nu satena lo ni'a quia.

<sup>17</sup> Ananías nna diattebabí lhe'e yo'o atta do Saulo, bisínbabí nna bexxúatteba nábi iqui Saulo atti rábi na:

—Betsito, Jesús Benni unnee lanie lu atti yu'ulu neda dalu nii, Benniha guaba udhelhe neti nii qui eyali lolu lhe dhílu Espíritu gue Tata Do Iyyabaaha lhe.

<sup>18</sup> Laniatteba bitúa nu attiba anca xui yu'u iyya lobihá, atti belattebinbi. Laniala nna udulíttebabí lenla nna udibí inda.

<sup>19</sup> Dequide utobi yetta nna bedú tsitsittebabí.

### Saulo riguixxi'abi gue Jesús lhe'esi Damasco

Lania nna níaba bisá Saulo attu chupa ubisa leni ca benni ria le Jesús se'e lhe'esi Damasco.<sup>20</sup> Dequila nna udulottebabí rixxi'abi gue Jesús lhe'e ca yo'o atta rudheti ca benni Israel ca tisa gue Tata Do Iyyabaaha se'e lhe'esi Damasco. Nianna rábi:

—Jesúsba Benniha anque xi'ini Tata Do Iyyabaaha.

<sup>21</sup> Iyába ca nu rienquinna nu rinnebiha nna rebanbaquinna attírácana:

—Inqui unníba nua requina rudaxxuna ca benni ria le ca tisa gue Jesús se'e Jerusalén nna. Läguabana nua dana nii güedadaxxu ca benni se'e-ni qui echena cana lo ca bixxudi anca nu lo-na.

<sup>22</sup> Ttiaca Saulo-na adíla itú iqui itú lebi rinnebi rixxi'enbi cana Jesúsba Benniha anque Cristu. Tuttírba becannabi iqui ca nu Israel se'e Damasco.

<sup>23</sup> Dequila de chi utee ixe ubisaha nna lania liba nna unnee len loesi ca nu Israel dequi uttibacana Saulo. <sup>24</sup> Ttiaca binatteba Saulo gue nu rele ca nua udhacacan bi. Ca unnuha nna rela resába se'ecana atta do rería benni ro'o yiesiha qui ganna eríabi nna uttittebacan bi. <sup>25</sup> Ttu lo rela nna ca benni ria le Jesús se'e lenbi lhe'esi Damasco nna ulu'uttebacabi Saulo lhe'e ttu sumi attí bechidacabi bi'iniha lo de'e iyya coa bi'aba yiesiha. Anía liba uca nna ulábi.

### Saulo besinbi lhe'e yiesi Jerusalén

<sup>26</sup> Attí besina Saulo lhe'e yiesi Jerusalén nna benttebabí satselabi ca benni ria le Jesús se'e nía. Ttiaca iyába ca bi'iniha nna rasquinbi Saulo cumu läga ria lecabí dequi chiguaba anca bi'iniha benni ria le Jesús. <sup>27</sup> Laniala nna uchee Bernabé Saulo guatsá dubí bi'iniha lo ca bi'ini bedheti ca tisa bele'e Jesús. Nianna attí utixxi'enbi ca bi'iniha gaxasná uca biláni Saulo Benni bananie ri-na attí yu'ubi neda, unneguaba Benniha lenbi lhe. Utixxi'aguabinbi ca bi'iniha gaxasná unne Saulo itú iqui itú lebi utixxi'abi gue Jesús lhe'esi Damasco.

<sup>28</sup> Anía uca nuarca be'ana Saulo lhe'e yiesi Jerusalén leni ca bi'ini bedheti ca tisa bele'e Jesús. Labí nna dia dedaababi requibi lhe'e itúba yiesiha. <sup>29</sup> Tsa bittu usinbi rixxi'abi gue Jesús Benni bananie ri-na, ritilha tisaguaba lenbi ca benni Israel rinne tisa griego lhe. Ttiaca ca unnuha nna rudhiubacana uttican bi. <sup>30</sup> Attí bina adí ca benni ria le Jesús nu rulaba le ca nua udhacacana Saulo nna laniala nna uleacabi bi'iniha lhe'e yiesiha dia lencabi bi lhe'esi Cesarea. Bedaa nía nna bedhelhacabi bi'iniha lhe'esi te láni Tarso.

<sup>31</sup> Lania nna ca benni ria le Jesús se'e lo yu gue Judea lhe Galilea lhe Samaria lhe tseeba se'ecabi, ttu diabacabi rise'e tsitsicabi lo neda gue Tata Do Iyyabaaha, tsitsiba rapacabi respeto Ben-na lhe.

Lacabi nna ttu diabacabi ranicabi, cumu Espíritu gue Tata Do Iyyabaaha nna guaracaba lanie cabi.

### **Ttu benni daa yatti ni'a náni beacana**

<sup>32</sup>Pedro nna requibabi güenalhi iyába ca benni se'e itúba nía. Güiaguabi guanalhibi ca benni chi se'e riesi anca gue Tata Do Iyyabaaha se'e lhe'esi Lida. <sup>33</sup>Nía guattí'acabi ttu benni lána Eneas. Chi uca ttu xxunu ida tena ta'a cumu daa yatti ni'a náni. <sup>34</sup>Pedro nna rábi na:

—¡Eneas, Jesucristuha eyonie lu! ¡Guadha! ¡Uchidhatte ta'a guelha!

Eneas nna guadhattebana. <sup>35</sup>Lania nna iyába ca nu se'e daca lhe'esi Lida lhe daca lhe'esi Sarón lhe biláquinna beaca nua. Ca unnuha nna bedaxxuttebacana neda gue Tata Do Iyyabaaha.

### **Ttu nuila beaquinna dequide chi uttina**

<sup>36</sup>La laniaguaba nua udo ttu nuila ria lebi Jesús lhe'esi Jope, lábi Tabita. Leni tisa griego nna dienna innána Dorcas. Nuilaha nua satíaba benbi nu anca tsee lhe beteguabi nu reasani ca benni bittu te guecani lhe. <sup>37</sup>Laniaguaba nua uni Tabita, nianna uttibabi. Dequide chi bogadican bi nna belhopittebacan bi lhe'e attu yo'o do güetsaa. <sup>38</sup>Cumu gaxxaba re lhe'esi Jope leni lhe'esi Lida atta do Pedro. Larcala ca benni ria le Jesús binattebacabi dequi níaba do Pedro. Udhelhattebacabi chupa ca unbiyuu güiacan guayúcan bi, rácan bi:

—O chiba unaa, goachi tsiasi lhe'esi Jope. Bittu aquinlu isálu.

<sup>39</sup>Pedro nna diatteba lenbi ca nua. Bisínba lencan bi'iniha nna belhopittebacan bi lhe'e yo'o do güetsaa atta te benni yattiha. Ca nuila bidabi se'e nía nna bebi'attebacan bi, ribesicana atti rule'ecana ca xalhoocani beni Tabita atti do banbi len lacana. <sup>40</sup>Pedro nna bebeattebabí iyába ca benni se'e nía. Nianna bedútteba xibibi, unnebi belisabi Tata Do Iyyabaaha, atti bodettatteba lobi atta te benni yattiha, nianna rábi:

—¡Tabita, guadha!

Nuilaha nna bedhaltteba lobi, bilábinbi Pedro nna guadhattebabí udobi. <sup>41</sup>Pedro nna bedaxxuttebabí ná nuilaha bedhulíbi na. Laniala nna beaxbi ca benni ria le Jesús se'e nía leni ca nuila bidabiha, atti bedúbi nuilaha locani. <sup>42</sup>Sattitte bina iyába ca benni se'e lhe'e yiesi Jope gue nu ucaha, nianna ixerucana güia lecani

Benni bananie ri-na.<sup>43</sup> Isáru udo Pedro lhe'esi Jope lisi ttu benni rucusi ca yieti lábi Simón.

**Pedro rixxi'abi gue Jesús lhe'e yo'o  
gue ttu benni dittu lána Cornelio**

**10** Udo ttu unbiyuu lhe'e yiesi Cesarea lána Cornelio. Ancana nu banani ttu gayua (100) soldado te lácani Italiano.<sup>2</sup> Lana lenna iyába ca benni se'e lhe'e lisniha nna ancacana benni rudoru tisa gue Tata Do Iyyabaaha, tsitsiba ria lecani Benniha lhe. Cornelio nna satíaba rinnebi len Tata Do Iyyabaaha. Labi nna itú iqui itú lebi redá lebi rutebi nureasani ca benni Israel bittu te guecani.<sup>3</sup> Ttu sá nna attiba tu retin tsunna ulha bele'enbi ttu nu bele'enbi. Nianna bilásabinbi ttu ingeli gue Tata Do Iyyabaaha ute'e lhe'e yo'o atta dobiah, ingeliha nna re:

—¡Cornelio!

<sup>4</sup> Cornelio nna siba bedobi, ttu lixxaba rugüiabi ingeliha. Itú rasbinbi unnaba tisabi rábi:

—¿Bi raca lelu, tata?

Ingeliha nna becabie re:

—Tata Do Iyyabaaha chiba bieninie ca tisa rinnelu rulisa lue, chiguuba uxieba neda nu redá lelu rutelu leni ca benni bittu te guequinna lhe.<sup>5</sup> Nnanna nna udhelha nuxa tsia lhe'e yiesi Jope saxxicana Simón bi'ini láguuba Pedro.<sup>6</sup> Nía dobi lhe'e lisi ttu benni láguabana Simón nu rucusi ca yieti, nu do gaxxaba ro'o indattooha.

<sup>7</sup> Atti chi deyya ingeli unne len Cornelio nna uxttebabí chupa ca nu tto'o lo sina rixuinbi lhe'e yo'o guebiha, leni attu soldado guebi nu rinnetiaba lenbiha. Unnuha nna riaguaba le nua Tata Do Iyyabaaha.<sup>8</sup> Dequide utixxi'enbi ca nua iyába nu guatebi nna udhelhattebabí cana diacana lhe'e yiesi Jope.

<sup>9</sup> Betteyú sá nna attiba tu retin tsi'inu (12) ttu yu'uru ca nua neda diacana, atti chi deoba isíncana Jope, Pedro nna gopittebabí iqui yo'o atta dobiah qui innebi leni Tata Do Iyyabaaha.<sup>10</sup> Labi nna bitunttebabí, nianna uquinbi gobi, ttiaca ttu runrucana elha go qui gobi nna labi nna bele'enbi ttu nu bele'enbi.<sup>11</sup> Nianna bilenbi beali lo bea-na guadi attiba ttu lari nixula xica ittapa laduba ro'oni dana iyinnana yies lo yu-ni,<sup>12</sup> lhe'e lariha nna yu'u iyáloba nimala sia ttapa ni'a náni. Yu'uguuba belha ra'aya lhe'eni lo yu lhe nu sia

xxilani requi lo bea-na lhe.<sup>13</sup> Nianna bieninbi tsi'i ttu Benni unnee re:

—¡Pedro, udulí! Betti ca nu rilenlu na, uto.

<sup>14</sup> Ttiaca Pedro nna becabittebabí rábi:

—¡Bittu, tata! Ni ttu libe bittu chi utoa nu bittu ga'ana gotu, nu anca tsiga lo cuinalu.

<sup>15</sup> Ttiaca bedeyien dacabinbi tsi'i Benni unneha attu libe re bi'iniha:

—Nu chi beon Tata Do Iyyabaaha nari nna lärga dica gálu nua nu anca tsiga.

<sup>16</sup> Beyonna liba libe uca anía nna lania liba beopi lariha deyyana lo bea-na.

<sup>17</sup> Pedro nna dobabi richacha iquibi raquinbi: “¿Bi dia le nu bele'etia ni?” Attirba chi bisína ca unbiyuu udhelha Cornelio ro'o yo'o atta dobiha, cumu chiba unnaba tisacana gaxa do lisi Simón.

<sup>18</sup> Nianna unnettebacana rácana:

—¿Si ni do Simón bi'ini láguuba Pedro?

<sup>19</sup> Ttiaca Pedro chi dolabi rulaba lebi gue nu bele'enbiha, Espíritu gue Tata Do Iyyabaaha nna ráttebe bi'iniha:

—¡Begüiarga! Ni tsunna ca unbiyuu bisía-na reguilacan lu.

<sup>20</sup> Bedulí nna beadi tte. Bittu ulaba lelu aquinlu: “Bittu tsia lania ca unná cumu netiba udhelha ca unná.”

<sup>21</sup> Pedro nna beadittebabí atta se'e ca unbiyuuhá, ráttebabí ca nua:

—Neti bunna benni reguilale-na. ¿Bi gue dale axta nii?

<sup>22</sup> Ca nua nna becabicana rácana:

—Niba datu udhelha Cornelio nu banani ttu gayua (100) ca soldadoha ri'itu. Labi ancabi ttu benni tsee, nu ria tsitsi lebi Tata Do Iyyabaaha lhe iyába ca benni Israel rinne tseecana guebi. Ttu ingeli gue Tata Do Iyyabaaha re bi'iniha gaxbi cuinalu lhe'e lisbiha qui udo nagabi gue nu gálbi.

<sup>23</sup> Laniala nna bette Pedro ca nua lhe'e yo'o atta dobiha.

Níaba be'ana ca nua la ulhaha. Betteyú dila liba nna dia Pedro lenbi ca nua. Diaguaba attu chupa ca benni ria lecabí Jesús se'e lhe'e yiesi Jope lenbi.<sup>24</sup> Betteyú liba bisíncabi lhe'e yiesi Cesarea. Níaba chi do Cornelio ribedabi cabí. Labi nna chi uxbi ca benni datíabi lhe ca benni se'e tsee lenbiha lhe.<sup>25</sup> Atti chi bisína Pedro ro'o yo'oha nna Cornelio nna biríattebabí guatsábi bi'iniha. Nianna

bedútteba xibibi lo Pedro, atti diattebabí utsá lobi bi'iniha.<sup>26</sup> Ttiaca Pedro nna bodhulíttebabí bi'iniha, nianna rábi:

—¡Bedulí! Cumu attiguaba ancalu benni, anáguuba anca neti.

<sup>27</sup> Laca rinne Pedro leni Cornelio nna uta'attebabaci lhe'e yo'oha. Nía bilenbi ixeru ca benni chi se'e.<sup>28</sup> Pedro nna ráttebabí cana:

—Lebi'i nna gua yubale, ca ley guetu-na bittu rugüelhacana ttu benni Israel iselana ca nu dittu o ga'ana lhe'e lisi ca nua lhe. Ttiaca Tata Do Iyyabaaha nna chi utixxi'e leni nu benie bele'etia, neti nna bitturu dica quixxa lá ca benni bittu anca benni Israel nu anca satsa, o nu anca tsiga lo Tata Do Iyyabaaha lhe.<sup>29</sup> Larcala atti bisía ca unní rácana neti: “Dhalu tsiasi”, tsa lägabi bedú neti tisa lo ca unní, datteba lania cana. Nnanna nna raca lasia quixxi'ale, ¿bi gue uxle neti?

<sup>30</sup> Cornelio nna becabittebabí rábi:

—Chi uca ttapa ubisa nua, attiba tu ura-ni nua rea lhe'e yo'o quia-ni rutte ubina lhe'a. Nianna rinnea leni Tata Do Iyyabaaha attiba labitu runitu retin tsunna ulha. Attirba chi bele'etia ucaxxe ttu benni nucu xo raca la guee.<sup>31</sup> Nianna re neti: “Cornelio, Tata Do Iyyabaaha chiba bieninie ca tisa rinnelha. Chiguuba uxieba neda nu redá lelu rutelu leni ca benni bittu te guequinna lhe.

<sup>32</sup> Nnanna nna udhelha nuxa tsia lhe'e yiesi Jope qui saxxícana Simón bi'ini láguba Pedro. Nía dobi lhe'e yo'o gue ttu benni láguba Simón, nu rucusi ca yieti, do gaxxaba ro'o indattooha.”

<sup>33</sup> Anía uca nna udhelhatteba ca benni betetilacan lu. Lu nna tseeba benlu dattebalu. Nnanna nna niba se'e iyátu lo Tata Do Iyyabaaha. Raca letu udo nagatu iyá nu chi rá Benniha lu quixxi'enlu ri'itu.

<sup>34</sup> Laniala nna udulo Pedro unnebi rábi:

—Nnanna liba chi radú lasia, Tata Do Iyyabaaha nna lägabi rugüia Benniha ttixa anca ttu ttu benni, ttulapaba racanie gue iyába benni.<sup>35</sup> Benni se'e lhe'e gaxaba yiesi, radi le Ben-na acacana benni guee, ladiba tsia lecani Ben-na lhe uncana nu dica ixuu lhe.

<sup>36</sup> Tata Do Iyyabaaha unnee len ri'itu ca benni Israel, utixxi'enie ri'itu ca tisa rixxi'a gue ttu nu tsee, delába iyába ca benni gansi tsia lecani Jesucristu Benni anque Benni banani iyárecha ri nna eyacatseecana leni Tata Do Iyyabaaha.<sup>37</sup> Lebi'i nna gua yuxebale gue nu uca itúba lo yu gue Judea udulona daca lo yu gue Galilea, dequide atti chi utixxi'ani Juan ca benni dequi raca duelha gadicana inda.<sup>38</sup> Anáguuba gua yubale, Tata Do Iyyabaaha betee Espíritu

guee leni Jesús gue Nazaret, benie aca Benniha Benni ra xxeni leni lhe guayúguabale benniha nna güequie benie nu anca tsee, beonie ca nu ruyúcana elha disa de yu'u be xxegüi lhe'e cuerpu guecani lhe. Iyá bunni benie cumu Tata Do Iyyabaahaba due len Benniha.<sup>39</sup> Ri'itu ancatu benni begüia lotu iyába nu beni Benniha atti güequie daca lo yu gue Judea, daca lhe'e yiesi Jerusalén lhe. Dequide nua nna bettigane betácane lo ttu ya crusi.<sup>40</sup> Ttiaca Tata Do Iyyabaahha nna benie beaquin Benniha dequide beyonna ubisa. Nianna benguabe bele'en lo Benniha ri'itu lhe.<sup>41</sup> Läga leni iyá benni bele'e lo Benniha, sunruba len ri'itu, cumu ri'itu ancatu benni becuae Tata Do Iyyabaahha bose'e qui ugüia lotu nu aca. Ri'itu uto lentue lhe u'uyatu inda lenie lhe dequide beacanie.<sup>42</sup> Nnanna nna udhelhe ri'itu qui tsequitu quixxi'entu ca benni lee nua bodú Tata Do Iyyabaahha aque xueda gue ca benni bani lhe gue ca benni yatti lhe.<sup>43</sup> Iyába ca benni uca profeta chi utixxi'acabi gue Jesús rácabi leni nu sate Benniha lo ya crusiha nna iyába ca benni tsia lecani Benniha gatta elha xen lasi gue ca tulha chi bencana.

<sup>44</sup> Sna duba Pedro rinnebi nna attirba chi bisía Espíritu gue Tata Do Iyyabaahha uyu'e lhe'e itúba cuerpu gue iyába ca benni se'e güedo naga ca tisa rinne bi'iniha.<sup>45</sup> Ca benni Israel ria le Jesús daa len Pedro nna rebanbaquinbi biláquinbi ruteguaba Tata Do Iyyabaahha Espíritu guee leni ca benni bittu anca benni Israel,<sup>46</sup> cumu rienquinbi rinne ca bi'iniha ca tisa subi rácabi: “¡Xxeni ra le Tata Do Iyyabaahha!”<sup>47</sup> Laniala nna unne Pedro rábi:

—¿Nútteba usunana gadi ca bi'ini inda? Nnanna chiba uxí ca bi'ini Espíritu gue Tata Do Iyyabaahha attiba chi uxíri Ben-na.

<sup>48</sup> Laniala nna beni Pedro mandadu gadi ca bi'iniha inda, atti gadicabi inda nna etti lá Jesús Benni bananie ri. Dequide unnuha nna unnabacabi leni Pedro eya'anbi attu chupa ubisa lencabi.

### Pedro rixxi'abi bixa lo ni'a gue güiabi atta se'e ca benni dittu

**11** Ca bi'ini bedheti ca tisa bele'e Jesús, leni adí ca benni chi ria le Jesús se'e lo yu gue Judea binacabi dequi ca benni bittu anca benni Israel chiguaba güia lecani ca tisa gue Tata Do Iyyabaahha.<sup>2</sup> Ttiaca atti besin Pedro lhe'e yiesi Jerusalén, ttu chupa ca benni Israel ria lecani Jesús, uxacatteba lencana Pedro.<sup>3</sup> Nianna rácán bi:

—¿Biaca güialu lhe'e lisi ca benni dittu, güea uto lenlu ca nua yetta lhe?

<sup>4</sup>Pedro nna udulottebabí utixxi'enbi cana gaxasná uca güiabi nía, gue bixa guatebi lhe. Nianna rábi cana:

<sup>5</sup>—Doba neti lhe'e yiesi Jope. Nianna lagüiba doa rinnea leni Tata Do Iyyabaaha nna bele'ettebatia attiba ttu lari nixula xica itapa laduba ro'oni goadina dana lo bea-na ttu lixxaba daca atta doa. <sup>6</sup>Begüiajxa tseeba bixa nua yu'u lhe'e nua nna nía bilátia iyáloba nimala, ca nu sia ttapa ni'a náni ruyú benni lhe ca nu requi i'iyattoo lhe anáguba ca nu ra'aya lhe'ecani lo yu lhe ca nu sia xxilacani lhe. <sup>7</sup>Laniala nna bientia ts'i'i ttu Benni unnee re neti: “Pedro, udulí betti ca unná uto.” <sup>8</sup>Neti nna becabitteba ria: “Bittu, tata, cumu ni ttu libe lägabi chi uto neti nu anca satsa o nu anca tsiga lo cuinalu.” <sup>9</sup>Laniala nna bedennee benni unnee lo bea-na attu libe re: “Nu chi ben Tata Do Iyyabaaha nari, lärga dica quixxalu lá nua nu satsa o nu anca tsiga.” <sup>10</sup>Tsunna libe uca anía. Laniala nna beopi lariha deyyana lo bea-na. <sup>11</sup>Suntteba ute uca nua nna attirba chi ucaxxe tsunna ca unbiyuu bisíacana ro'o yo'o atta doha reguilacan neti. Ca unnuha nua udhelha ttu benni do lhe'e yiesi Cesarea. <sup>12</sup>Espíritu gue Tata Do Iyyabaaha nna ráttebe neti: “Güia len ca unná, tsa bittu ulaba lelu aquinlu bittu tsialu.” Udáguuba xxupa ca benni ria lecabí Jesús se'e-ni len neti lhe. Iyábatu nna uta'atu lhe'e yo'o gue unbiyuuhá. <sup>13</sup>Laniala nna utixxi'en nua ri'itu gaxasná uca bilenna ingeli gue Tata Do Iyyabaaha ucaxxe lhe'e lisniha. Nianna re na: “Udhelha nuxa tsia lhe'e yiesi Jope qui saxxícana Simón bi'ini láguuba Pedro. <sup>14</sup>Bi'iniha quixxi'enbi lu gaxasná unlu qui lhálu bittu tsia nittilu lenlu iyába ca benni guelu se'e lhe'e yo'o guelhi.” <sup>15</sup>Atti uduloa unnea belisa ca nua nna bisíatteba Espíritu gue Tata Do Iyyabaaha ute'e lhe'e cuerpu guecani, attiba bisíabe lhe'e cuerpu gueri primera. <sup>16</sup>Laniala nna bexxa lasia ca tisa unne Benni bananie ri-na atti re: “Gualíba, Juan sunruba inda bixuinbi qui begadibi benni inda, ttiaca lebi'i nna gadile inda leni Espíritu gue Tata Do Iyyabaaha.” <sup>17</sup>Cumu ganna si Tata Do Iyyabaaha ruteguabe len ca unná loesi elha tsee chi betee len ri'i, ca nu chi ria lerí Jesucristu, Benni bananie ri-na, neti nna ¿nu anca qui uqui'aya lo neda gue Tata Do Iyyabaaha?

<sup>18</sup> Atti bienini ca benni chi ria lecabí Jesús se'e lhe'e yiesi Jerusalén iyába nu rá Pedro, laniala nna beaca sicabi. Nianna rácabi:

—¡Xxeni ra lelu Tata Do Iyyabaaha! Anla chiguaba betelu lo neda gue ca benni bittu anca benni Israel-na qui odú xiyyancana udaxxucana neda guelu, lania nna gatta elha nabani guecani ttu dia liiba.

### Aní uca udulo ca benni se'e lhe'e yiesi Antioquía ria lecabí Jesús

<sup>19</sup> Dequide chi utti Esteban nna udulotteba ca benni bería lacana ca benni ria le Jesús. Ca bi'iniha nna bexunnittebacabi diacabi daca lo yu gue Fenicia lhe daca lo yu gue Chipre lhe daca lhe'e yiesi Antioquía lhe. Lacabi nna tsa bittu utixxi'aquinbi ca benni dittu gue Jesús, sunruba len ca benni Israel utixxi'aquinbi gue Ben-na.

<sup>20</sup> Ttiaca nía sel a ttu chupa ca benni daa daca lo yu gue Chipre lhe daca lhe'e yiesi Cirene lhe ca bi'iniha nna atti uta'acabi lhe'e yiesi Antioquía nna utixxi'attebaquinbi ca benni dittu se'e nía gue Jesús, Benni bananie ri. <sup>21</sup> Tata Do Iyyabaaha nna ucaba lanie cabi, larcala ixe ca benni güia lecani Jesús de güia lecani gue nu riguixxi'a ca bi'iniha.

<sup>22</sup> Atti bina ca benni ria lecabí Jesús se'e lhe'e yiesi Jerusalén gue nu raca nía nna udhelhattebacabi Bernabé lhe'e yiesi Antioquía.

<sup>23</sup> Atti chi bisínbi nía nna biláttebinbi tseeba anca nu run Tata Do Iyyabaaha len ca bi'iniha. Laniala nna bedaca lebi de re'oba lebi gue ca bi'iniha. Lenla nna belisabi iyába ca bi'iniha rábi cabi: “Ttu tsa oquinna iquicabi itú iqui itú lecabí tsia lecabí Jesús.” <sup>24</sup> Cumu Bernabé ancabi ttu benni tsee, yu'u Espíritu gue Tata Do Iyyabaaha itúba lhe'e cuerpu guebi lhe ancabi ttu benni ria tsitsi lebi Jesús lhe. Larcala ixeru benni bedaxxucana neda gue Benni bananie ri-na.

<sup>25</sup> Dequide lania nna güiatteba Bernabé deca lhe'e yiesi Tarso guatilabi Saulo. <sup>26</sup> Atti guati'abi bi'iniha nna bechettebabí bi'iniha deca lhe'e yiesi Antioquía. Nía bisácabi ttu ida leni ca benni ria le Jesús se'e nía, güele'eni ixe ca benni. Lhe'e yiesi Antioquía nua primerba utta lá ca benni ria le Jesús: “Ca Benni Gue Cristu”.

<sup>27</sup> Laniaguaba nua udá ttu chupa ca benni anca profeta lhe'e yiesi Jerusalén diacabi lhe'e yiesi Antioquía. <sup>28</sup> Ttu ca bi'iniha, bi'ini lá Agabo, udulíbi utixxi'abi ca tisa bete Espíritu gue Tata Do Iyyabaaha lenbi, labi nna rábi isía ttu ubina lhe'e iyába ca yiesi

se'e yies lo yu. Unnuha nua uca atti anca Claudio nu rinnabia.

<sup>29</sup> Laniala nna ca benni ria lecabí Jesús se'e lhe'e yiesi Antioquía-na boquinnatteba iquicabi idhelha ttuttucabi cua teba guecabi leni ca benni ria le Jesús se'e lo yu gue Judea. <sup>30</sup> Lenla nna udhelhacabi Bernabé lenbi Saulo guaca'ancabi nua leni ca benni teru elha rieni guecabi anca nu lo gue ca benni ria le Jesús se'e nía.

### Ingeli gue Tata Do Iyyabaaha bebequie Pedro lhe'e lisiyya

**12** Laniaguaba nua uduto Herodes nu rinnabiah bedaxxuna ttu chupa ca benni ria le Jesús qui odidhaca si'incabi. <sup>2</sup> Lana nna unnabiattebanabetticana Jacobo betsi Juan leni espada. <sup>3</sup> Atti biyúna dequi gua re'oba le ca nu Israel gue nu benna laniala nna bodidaxxuttebana Pedro. La laniaguaba nua bisía laní atti ro ca benni Israel ttaxtila nu bittu levadura ria lenna. <sup>4</sup> Dequide la chi bedaxxucana Pedro nna unnabiatteba Herodes bedelhacan bi'iniha lisiyya, cumu belaba leni cueana bi'iniha ni lo benni dequide chi ute laní nu te láni Pascua. Lana nna bese'ettebana ttapa xxia ca soldado, ca nu ugüiacana bi'iniha qui bittu eríabi. Ttapa ttapa ca benni sela lhe'e ttu ttu xxiaha. <sup>5</sup> Nuarca tsitsiba rapacana Pedro. Ttiaca ca benni ria le Jesús tsaba bittu redí lecabí rinnabacabi leni Tata Do Iyyabaaha gue Pedro.

<sup>6</sup> La ulha atti tsan dila cuea Herodes Pedro udún bi lo ca benni nna labi nna tebabí ti'edhibi lagüi chupa ca soldado gue Herodes. Xicabi chupa cadena. Laca adí ca soldadoha nna tsitsiba rapacana ro'o lisiyyaha. <sup>7</sup> Attirba chi ucaxxe ttu ingeli gue Tata Do Iyyabaaha, nianna tsaba betú lhe'e lisiyyaha uyu'uchaba xieni. Ingeliha nna benipattebe lhuitta Pedro qui ebanbi, nianna re bi'iniha:

—¡Jerttexirga guadha!

Ca cadena xxica ná Pedro nna xeaba bitúatteba ca nua biyinnacana lo yu. <sup>8</sup> Ingeliha nna ráttebe:

—Beocu xolu nna boleatte guaracha guelha lhe.

Pedro nna ráttebabi:

—O.

Nianna redea ingeliha bi:

—Beocu lari guelha lhe atti betátte betenalha neti.

<sup>9</sup> Pedro nna beríattebabi denalhabi ingeli gue Tata Do Iyyabaaha, ttiaca läga yubi gansi nu runi ingeliha ancana nu gualí, cumu labi nna raquinbi dequi lo bisíala guebabi nua rule'enbi anía.

<sup>10</sup> Betebacabi lo ttu soldado du rapa nía nna bedetettebacabi lo attuna. Atti besincabi atta du puerta iyya du ro'o neda nna titúba nua bealina beríacabi. Dequide chi belhácabi lo neda te nía nna benitti lotteba ingeliha, atturba Pedro be'anbi. <sup>11</sup> Lania liba utedaatseenbi. Nianna rábi:

—Nnanna liba chi yua gualíba udhelha Benni bananie ri-na ingeli guee-ni betedile neti lo ná Herodes, lo iyába nu chi rele ca nu Israel-na udhacacana neti lhe.

<sup>12</sup> Dequide chi utedaani Pedro gue iyába nu guatebi nna deyyattebabí lhe'e lisi María, nan gue Juan bi'ini teeguaba lábi Marcos. Nía nua se'e ixeru ca benni rinnecabi leni Benni bananie ri-na rinnabacabi aca leni Benniha bi. <sup>13</sup> Atti unne Pedro ro'o puerta gue yo'o do deca lo nedaha nna biríatteba ttu nuila rbani lána Rode bedo nagani nuxa nua rnne. <sup>14</sup> Dequide beaca bienna tsil'i Pedro nna de re'oba leni nna niba lä udhalna yo'oha, bexunnilana bequina beta'ana lhi'u guattixxi'ana Pedroba bi'iniha rinnebi ro'o yo'oha.

<sup>15</sup> Ca benni se'e nía nna rácabi uncuitiha:

—¡Iquibalu raca!

Ttiaca uncuitiha nna tu duba nua rána:

—¡Gualíbatia, bi'inihaba bi'in-na!

Laniala nna redenácabi:

—Läga labi unná. Ingeli guebabi unná.

<sup>16</sup> Pedro nna tu dubabi rinnebi ro'o yo'oha, attirba udhalcabi nna biláttebaquinbi bi'iniha. Nianna bebanbaquinbi. <sup>17</sup> Labi nnabettátteba nábi bele'enbi cabi qui eyaca sicabi. Laniala nna utixxi'enbi ca bi'iniha gaxasná uca bebea Benni bananie ri-na bi lhe'e lisiyyaha. Rágubi ca bi'iniha quixxi'aquinbi Jacobo lhe adí ca benni ria le Jesús lhe gue nu guatebi. Atti biríattebabí diabi attu atta subi.

<sup>18</sup> Guan dila nna bisatsatteba ca soldadoha cumu läga guanniquinna ga ladu dia Pedro. <sup>19</sup> Herodes nna bentebana mandadu beguilacana bi'iniha, ttiaca läganu guatti'acana. Laniala nna bedelhana nu ucaha cu'e ca nu se'e rapacana ro'o lisiyyaha, atti unnabiattebana betticana ca nua. Dequide nua nna biríatteba Herodes lo yu gue Judea güiana guadhma lhe'e yiesi Cesarea.

### Aní uca utti Herodes

<sup>20</sup> Herodes nna risa'abinna leni ca benni se'e lhe'e yiesi Tiro lhe leni ca benni se'e lhe'e yiesi Sidón lhe. Ttiaca ca unnuha nna ttuba bese'ecana qui tsiacana güenne leni Herodes, qui dhacana innábacana ese'e tsee lencana unnuha nna unnetteba lencana Blasto ttu ca uxtisi nu du gaxxaba leni Herodes qui utsá du nua cana loni, cumu ca lo yu atta rinnabia nuarba nua rixuu lena ro'ocana rocana. <sup>21</sup> Herodes nna bedúttebana ttu sá atti tsiacana sanne lencan na. La sá nna beocutteba xo tsee gueni. Nianna udottebana lo xxila atta ridona rinnabiana, atti udulottebana ulu'una libana. <sup>22</sup> Lania nna biyyatteba ca benni se'e nía rávana:

—¡Benni rinne-ni nna läga benni unní, tata diosihaba benni rinne!

<sup>23</sup> Attirba chi ucaxxe ttu ingeli gue Tata Do Iyyabaaha betee ttu isagüee gue Herodes de begüeelhana rácan na anía, cumu bittu ulequi xenna Tata Do Iyyabaaha. Nianna uttibana de uto bedúa na.

<sup>24</sup> Tisa gue Tata Do Iyyabaaha nna tu diaba runa adí benni benniha lhe'e iyába ca yiesi se'e itúba nía, anáguuba ttu diaba rani ca benni ria le Jesús.

<sup>25</sup> Atti chi uluxa sina beni Bernabé lenbi Saulo nna bedáttebacabi Jerusalén deyyacabi, dechebacabi Juan bi'ini láguaba Marcos.

### Bernabé lenbi Saulo udulocabi rixxi'acabi gue Jesús

**13** Leni ca benni ria le Jesús se'e lhe'e yiesi Antioquía, nía sel a ca benni anca profeta lhe ca benni rule'e ca tisa gue Tata Do Iyyabaaha lhe delába Bernabé lhe Simón bi'ini teeguabaquinna lábi Nu Yadhi lhe Lucio benni beaca lasbi Cirene lhe Manaén benni bixeni la ttuba lhe'e yo'o leni Herodes, nu unnabiana lo yu gue Galilea lhe. Níaguaba sela Saulo. <sup>2</sup>Ttu sá nna laca yu'ucabi ribequixxencabi Tata Do Iyyabaaha lhe rutte ubina lhe'ecabi lhe unnetteba Espíritu gue Tata Do Iyyabaaha re ca bi'iniha:

—Gualcuequiesi Bernabé-na lenbi Saulo-na qui uncabi sina nu chi ga'anatia uncabi.

<sup>3</sup>Laniala nna dequide ute unnecabi leni Tata Do Iyyabaaha lhe bette ubina lhe'ecabi lhe bexxúatteba nácabi iqui ca bi'iniha qui aca len Benni bananie ri-na ca bi'iniha, atti bechú tisattecababi ca bi'iniha.

**Pablo lenbi Bernabé riguixxi'acabi ca  
tisa gue Jesús lo yu te láni Chipre**

<sup>4</sup> Udhelatteba Espíritu gue Tata Do Iyyabaaha Bernabé lenbi Saulo tsiacabi daca lhe'e yiesi Seleucia. Nía bedaxxucabi barco nu uchencabi deca lo yu re lagüi indattoo lána Chipre. <sup>5</sup> Atti bisíncabi lhe'e yiesi Salamina nna udulottebacabi utixxi'acabi ca tisa gue Tata Do Iyyabaaha lhe'e ca yo'o atta rudheti ca benni Israel ca tisa gue Benniha. Níaguaba sela Juan Marcos runbi yuda ca bi'iniha. <sup>6</sup> Dequide chi utecabí itúba lo yu re lagüi indattooha nna bisínttebacabi lhe'e attu yiesi nu lá Pafos. Nía guattí'acabi ttu güesaa, ancana nu Israel lána Barjesús, unnuha nna run leni rána dequi ancana profeta. <sup>7</sup> Güesaaha nna tseeba do lenna nu rinnabiana yiesiha lána Sergio Paulo. Nua ancana ttu unbiyuu re dhína iquini. Lana nna benttebana mandadu guaxxícana Bernabé lenbi Saulo cumu raca leni udo nagani ca tisa gue Tata Do Iyyabaaha. <sup>8</sup> Ttiaca güesaa lá Barjesús nu teeguaba láni Elimas leni tisa griego, udulottebana unnena richúna lo ca benni rinneha qui bittu tsia le Sergio Paulo ca tisa gue Jesús. <sup>9</sup> Saulo, bi'ini láguaba Pablo nna cumu yu'u galába itúba lhe'e cuerpu guebi Espíritu gue Tata Do Iyyabaaha, begüiattebabí ttu liba loni <sup>10</sup> atti rábi na:

—¡Lu nna ancalu ttu nu güen lasi, nu runi nu satsa lhe xi'ini nu xxegüi lhe nu bittu raca uyúna iyába nu anca tsee! ¿Núcalá udú silu rutsiattalu ca benni lo neda gue Tata Do Iyyabaaha? <sup>11</sup> Nnanna nna utee Benniha ttu elha disa guelu. Xuaba lolu nnanna isá bitturu ilenlu xieni gue tatubisa-na.

Lagüiba dubi rinnebiha nna bechulhatteba lo Elimas, tsaba bitturu bilenna dhana. Lana nna udulottebana requina reguilana sabi'aba nía nuxa galhina náni cumu tsa lärga rilenna. <sup>12</sup> Atti biláni nu rinnabiahua nu ucaha nna güiatteba leni Jesús, rebanbinna gue ca tisa gue Benniha rule'e Pablo lenbi adí ca bi'iniha.

**Pablo lenbi Bernabé rixxi'acabi ca tisa  
gue Jesús lhe'e yiesi Antioquía**

<sup>13</sup> Pablo nna lenbi adí ca bi'ini dia lenbiha nna bodaxxuttebacabi barco ro'o indattoo gue yiesi Pafos, besincabi lhe'e yiesi Perge nu re lo yu te láni Panfilia. Bedaa nía bodha'ana Juan Marcos ca bi'iniha, nianna bequittebabí deyyabi lhe'e yiesi Jerusalén.

<sup>14</sup> Dequide bedácabi Perge besinttebacabi Antioquía, yiesi re lo yu te láni Pisidia. Atti bisía sá redí le ca benni Israel nna uta'attebacabi lhe'e yo'o atta rudheti ca nua ca tisa gue Tata Do Iyyabaaha, atti usiattebacabi. <sup>15</sup> Dequide chi uluxa belabacabi ca ley gue Tata Do Iyyabaaha lhe ca tisa dia lo ca sitsi boca'ana ca profetaha lhe laniala nna unne ca nu rinnabia lhe'e yo'oha rácana ca bi'iniha:

—Xa betsito, gansi te ttu tisa guele innele ulisale ca benni se'e-ni qui tse'etsitsicabi lo neda gue Tata Do Iyyabaaha nna gualte daca-ni, gualnne.

<sup>16</sup> Laniala nna udulí Pablobettá nábi bele'enbi cana qui eyaca sicana, atti unnettebabí rábi:

—Gualdo nagale, benni Israel lhe iyábale ca benni dittu lhe atta rapale Tata Do Iyyabaaha respeto. <sup>17</sup> Tata Do Iyyabaaha gue ca benni Israel-ni becuae ca benni uca benniola gueriha. Benie guanicabi lhe ucacabi benni ra xxeni leni lhe atti sna se'ebacabi ancacabi benni dittu lo yu te láni Egipto. Dequila laniala nna bebequie ca bi'iniha lo yu atta use'ecabiha leni elha ra xxeni le guee. <sup>18</sup> Delo chua (40) ida bechie biyúe ca bi'iniha atti güequicabi lo yu bisi.

<sup>19</sup> Gasi ca yiesi elha betse'e loe daca lo yu te láni Canaán qui uca betee ca lo yu gue ca nua leni ca benni uca benniola gueriha.

<sup>20</sup> Iyába unní uca lhe'e delo ttapa gayua yu'u medi gayua (450) ida.

'Lenla nna bose'e xueda unnabiana ca bi'iniha, bedaa profeta Samuel uca xueda. <sup>21</sup> Dequila nna unnabacabi edú ttu nu innabia xeni qui nneruna locabi. Laniala nna bodú Tata Do Iyyabaaha Saúl, xi'ini Cis, unnuha nua datíana ca benni gue Benjamín. Lana nna unnabiana chua (40) ida. <sup>22</sup> Lenla nna utúe Saúl. Nianna bodúe David qui acabi nu innabia ca benni Israel. Gue bi'iniha nua unnee atti re: "Neti chi guati'aya David, xi'ini Isaí. Lana ancana ttu unbiyyuu radi lasia gueni, lana unna iyába nu raca lasia lhe."

<sup>23</sup> Jesús anque Benni datía David, Benniha nua udhelha Tata Do Iyyabaaha qui odile ca benni Israel, benbe attiba chi begüee tisa unie. <sup>24</sup> Atti bittu chi bisía Jesús, Juanba requi riguixxi'enbi iyába ca benni Israel qui odú xiyyancana odaxxucana neda gue Tata Do Iyyabaaha, gadicana inda lhe. <sup>25</sup> Atti chi deoba lhuxa sina nu chi ga'ana unbi nna rábi: "Läga neti nua anca nu rulaba lele gueni isía. Ttiaca dequide neti nna isía ttu Benni bittu elha ralha idhasia lo ca guaracha guee."

<sup>26</sup> 'Lebi'i, xa betsito, ca benni datíale Abraham, lebi'i ca benni dittu atta gua rudole tisa gue Tata Do Iyyabaaha lhe gue iyábari<sup>a</sup> anca ca tisa udhelha Ben-na ca ben-na rixxi'acanie ri gaxasná odilá Tata Do Iyyabaaha ri qui bittu tsia nittiri. <sup>27</sup> Cumu ca benni se'e lhe'e yiesi Jerusalén, lencana ca nu rinnabia guequinna läga utedaaquinna nuxa anca Jesús, bittuguaba radú lecani gue ca tisa dia lo sitsi boca'ana ca profetaha lhe ca benni rulabacana lhe'e ca yo'o atta rudheticana ca tisa gue Tata Do Iyyabaaha ca sá atti redí lecani. Larcala atti betecana Jesús las ná ca nu betticana Benniha, lania guaxxína nu rá ca tisa dia lo ca sitsi-na. <sup>28</sup> Masquiba bittu birialíquinna bixa lo ni'a gue gatti Benniha, lacana nna labíaba unnabacana leni Pilato qui innabia nua utticana Benniha. <sup>29</sup> Nianna dequide chi uluxa bedhacacana Benniha iyába nu rinne lo ca sitsi gue Tata Do iyyabaaha nna laniala belhidacane lo ya crusihá qui becatsicane. <sup>30</sup> Ttiaca Tata Do Iyyabaaha nna belhidhe Benniha lhe'e baa atta yu'u ca benni yatti-na. <sup>31</sup> Iixeru ubisa bele'e loe len ca benni denalhacabi Benniha atti biríe lo yu te láni Galilea bisíne lhe'e yiesi Jerusalén. Nnanna nna ca bi'iniha unna requicabi riguixxi'aguinbi ca benni gue Jesús.

<sup>32</sup> Anáguuba ri'itu, riguixxi'aguabintu le ca tisa gue Ben-na, delába nu chi rá Tata Do Iyyabaaha ca benniola gueriha unie. <sup>33</sup> Unnuonni chi benie nnanna len ri'i cumu ancari benni datía ca bi'iniha. Atti belhidha Tata Do Iyyabaaha Jesús lhe'e baa atta yu'u ca nu yatti-na, lania guaxxína ca tisa rinne benna lo Salmo berupa-na atta re:

Lu ancalu xi'inia, neti bijalu nasá.<sup>b</sup>

<sup>34</sup> Tata Do Iyyabaaha nna chila unne re echidhabe Jesús lhe'e baa atta yu'u ca nu yatti-na qui tsa bittu usu cuerpu guee, attiba re lo ca sitsi guee-na atta rá:

Gunba saxxína aca len lebi'i nu tsee rá ca tisa chi begüeea len David.<sup>c</sup>

<sup>35</sup> Larcala rá David Tata Do Iyyabaaha lo attu Salmo-na:

Bittu uguelhalu nnitti cuerpu gue Benni do riesinlu anca guelu-na.<sup>d</sup>

<sup>a</sup> 13:26 Lo yitsi-ni rá: "gue iyábari", adí ca yitsi nna rá: "len lebi'i."

<sup>b</sup> 13:33 Salmo 2:7    <sup>c</sup> 13:34 Isaías 55:3    <sup>d</sup> 13:35 Salmo 16:10

<sup>36</sup> Gualfiba, David nna dequide bixuubi lo ca benni use'e atti udobiaha, benbabi nu rába Tata Do Iyyabaaha bi unbi, atti uttibi nna bigatsibabi attiba bigatsi ca benniola guebiha. Larcala cuerpu guebiha nna usuba nua. <sup>37</sup> Ttiaca Benni bechidha Tata Do Iyyabaaha lhe'e baa-na, läga usu cuerpu gue Benniha. <sup>38</sup> Larcala, xa betsito, raca duelha unale nu riguixxi'entu le-ni, cumu leni nu chi guate Jesús lo ya crusicha liba guate elha xen lasi gue ca tulha gue ca benni. <sup>39</sup> Ca ley boca'ana Moisés nna läga udá ca nua cuacana ca tulha gue ca benni, ttiaca iyába ca benni ria lecani Jesús te elha xen lasi guecani, de Benniha nna reacacana Benni bittu tulha gueni te. <sup>40</sup> Larcala, lebi'i nna tsitsi gualgüia qui bittu satele loesi nu dia lo ca sitsi beni ca benni uca profeta, atta rá:

<sup>41</sup> ¡Gualgüia, lebi'i ca nu bittu ria lele  
Güebanbinle nna lhuxabale  
cumu ca sá atti se'ele yies lo yu-ni nna  
unia ttu nu unia, lebi'i nna läga tsia lele gansi chi bilenle na  
masquiba nuxa quixxi'enna le gue nua!<sup>a</sup>

<sup>42</sup> Atti bería Pablo lenbi Bernabé lhe'e yo'o atta rudheti ca benni Israel ca tisa gue Tata Do Iyyabaaha nna ca benni se'e nía nna ráttebacabi ca bi'ininha:

—Itale attu libe agüesía qui quixxi'achatinle ri'itu gue nu riguixxi'ale-na.

<sup>43</sup> Dequide chi besatsa benni nna ixeru ca benni Israel lhe ca benni ria lecani attiba ria le ca nu Israel lhe guanalhattebacana Pablo lenbi Bernabé. Lacabi nna ráttebacabi cana usiguicana tse'etsitsicana lo neda ga'aná tsee chi bedá lee Tata Do Iyyabaaha betee len lacana.

<sup>44</sup> Atti chi guadona xumanu bedesía sá atti redí le ca benni Israel nna lattiba la bea ca benni se'e lhe'e yiesiha güiacana qui udo nagacani ca tisa gue Tata Do Iyyabaaha. <sup>45</sup> Ttiaca atti biláni ca benni Israel de yatterba de re ca benni bisína nía nna lacana nna upattebacana malisi, atti udulottebacana bitti rábacana recabicana gue Pablo, riguecana iquibi lhe. <sup>46</sup> Laniala nna unnee Pablo lenbi Bernabé itú iqui itú lecabí becabicabi rácabi cana:

—Ri'itu nna daba lotu quixxi'atu ca tisa gue Tata Do Iyyabaaha primertteba len lebi'i, ca benni Israel. Ttiaca lebi'i nna rigu'ula

---

<sup>a</sup> 13:41 Habacuc 1:5

ni'ale ca tisa-ni. Leni unná nna rule'e lole dequi bittu elha ralhale gatta elha nabani guele ttu dia lii. Larcala denua nna leni ca benni dittu la quixxi'atu ca tisa-ni.<sup>47</sup> Cumu anába chi beni Benni bananie ri-na ri'itu mandadu untu. Ben-na nna re:

Lu chi bodúa qui acalu xieni gue ca benni dittu,  
qui icheelu ca tisa quia-ni lhe,  
acalu benni quixxi'enlu axta ca benni se'e xi'a gue yies lo  
yu-ni

gaxasná lhácana qui bittu tsia nitticana.<sup>a</sup>

<sup>48</sup> Atti bienini ca benni bittu anca benni Israel nu unneocabiha nna laniala bedaca lecani de be'oba lecani. Nianna ráttebacana:

—¡Carbáru! ¡Anílirba de tsee anca ca tisa gue Benni bananie riha!

Laniala nna güia le ca benni chi ga'ana gatta elha nabani guecani ttu dia lii.<sup>49</sup> Aní uca nna bisína ca tisa gue Benni bananie ri-na lhe'e iyába ca lhe'esi se'e ca nía.<sup>50</sup> Ttiaca ca benni Israel nna unnetteba lencana ca nuila ria le ca tisa gue Tata Do Iyyabaaha ca nu ra xxeni lecani lo yiesiha lhe unneguaba lencana ca unbiyuu anca nu lo gue yiesiha lhe ca unnuha nna betsatsattecana benni, qui besía le ca nua Pablo lenbi Bernabé. Ttutirba bebeacana ca bi'iniha lo yu guecaniha.<sup>51</sup> Pablo lenbi Bernabé nna becuibitteba biste yu ni'acabi aní lo ca nua, cumu unnuha runi qui ttedaaquin ca unnuha bittu anca tsee nu bencanaha lo Tata Do Iyyabaaha. Laniala nna diacabi deca lhe'e yiesi Iconio.<sup>52</sup> Ttiaca ca benni güia lecabí Jesús se'e lhe'e yiesiha nna attulade redaca lecabí, chi yu'u Espíritu gue Tata Do Iyyabaaha itúba lhe'e cuerpu guecabí lhe.

### Pablo lenbi Bernabé rixxi'acabi ca tisa gue Jesús lhe'e yiesi Iconio

**14** Atti bisína Pablo lenbi Bernabé lhe'e yiesi Iconio nna irupabacabi uta'acabi lhe'e yo'o atta rudheti ca benni Israel ca tisa gue Tata Do Iyyabaaha. Nianna utixxi'attecana ca tisa gue Jesús itú iqui itú lecabí, nuarcala ixe ca benni Israel lhe ca benni dittu lhe güia lecani Jesús.<sup>2</sup> Ttiaca ca benni Israel bittu güia lecaniha nna ulu'u tisattecana ca benni dittuha qui besía le ca nua ca benni chi ria lecabí Jesús.<sup>3</sup> Läquiga denua nna Pablo lenbi Bernabé isáru use'ecabi lhe'e yiesiha rixxi'achaticabi itú iqui itú lecabí ca tisa gue Benni bananie ri-na. Benniha nna gua racaba lanie

---

<sup>a</sup> 13:47 Isaías 49:6

cabi runcabi ca milagru lhe ca nu runi rebanin ri lhe qui rule'e lo gualíba anca ca tisa rixxi'a ca bi'iniha tisa gue Benni bananie ri-na.<sup>4</sup> Ttiaca ca benni se'e lhe'e yiesiha nna ulha'atteba lhe'e loescani: salhecana guattacana ca nu Israel, a salhecana nna guattacana ca bi'ini bedheti ca tisa bele'e Jesús. <sup>5</sup> Laniala nna bese'etteba ca nu Israel ttuba len ca nu dittuha lhe ca nu rinnabia guecaniha lhe qui tsiacana sadhaca si'icana ca bi'iniha, sasíacana cabi iyya lhe. <sup>6</sup> Ttiaca atti bina Pablo lenbi Bernabé gue nu rele ca nua uncana nna bexunnittebacabi diacabi deca Listra, deca Derbe lhe ca yiesi se'e lo yu te láni Licaonia. Güiaguabacabi lhe'e iyába ca lhe'esi se'e sabi'aba nía lhe <sup>7</sup> qui utixxi'acabi gue Jesús.

### **Lhe'e yiesi Listra uxacacana utticana Pablo**

<sup>8</sup> Lhe'e yiesi Listra nua do ttu unbiyuu bittu raca dhana. Unnuha nna tsa bittu chi udána cumu xibana atti ulina. <sup>9</sup> Unbiyuuhu nna dobana rudo nagani nu rá Pablo. Labi nna begüiattebabu ttu liba loni, nianna utedeenbi unbiyuuhu nna gua riaba leni eyacana.

<sup>10</sup> Laniala nna atti unnebi idisa rábi na:

—¡Udulí! ¡Lixxa udú!

Unbiyuuhu nna tturba udhina udulína, nianna udulottebana udána. <sup>11</sup> Atti biláni ca benni nu beni Pablo nna unnettebacana idisa leni tisa licaonia nu anca tisa guecani, rácana:

—¡Nirba ca diosi ancacana attiba anca benni chi bisía len ri'i yies lo yu-ni!

<sup>12</sup> Lania nna utixxattebacana lá Bernabé diosi Zeus<sup>a</sup>; Pablo nna utixxacana lábi diosi Hermes<sup>b</sup> cumu labi nua rinne. <sup>13</sup> Bixxudi ridú lhe'e yotu gue diosi Zeus nu do ro'o yiesiha nna bisíntteba lenna ca u'una lhe ca arco iyya lhe ro'o puerta gue yiesiha qui utecana úna leni ca bi'iniha. <sup>14</sup> Ttiaca atti utedeani Bernabé lenbi Pablo gue nu rdaca ca nua uncana, laniala nna ucheda xocabi, atti guata'attebacabi lagüi ca benni se'e nía. Nianna uresi'attebacabi idisa rácabi:

<sup>15</sup> —Lebi'i nna ¿biaca runle aná? Ri'itu nna attiguaba ancale benni anca ri'itu. Lo ni'a gue unnuha xa nna datu-ni qui quixxi'entu le gue Jesús qui bitturu unle ca nu bittu anca tsee runle-na, cumu

<sup>a</sup> 14:12 Lo yitsi-ni rá “Júpiter”, lo adí ca yitsi nna rá “Zeus”.

<sup>b</sup> 14:12 Lo yitsi-ni rá “Mercurio”, lo adí ca yitsi nna rá “Hermes”.

tsa läga anca unná nu dica ixuu, qui anáchu eyequile udaxxule neda gue Tata Do Iyyabaaha, Benniha doe banie. Lee benie iyyabaaha lhe yies lo yu-ni lhe indatoo-na lhe. Laguabe benie iyá ca nu se'e lo ca unná lhe. <sup>16</sup> Masquiba itú nurea begüeelhabe iyába ca benni se'e yies lo yu-ni bencana nu racaba lecani, <sup>17</sup> ttiaca lee nna tsa läga bedú sie rule'e loe nuxa anque leni ca nu tsee runie len lebi'i, lee ridhelhe iyya yies lo yu-ni qui rixuu lena bani guele, anáchu nna te xxeni nu gole, runie qui ebe itta lele lhe.

<sup>18</sup> Ttiaca masquiba utixxi'aquinbi ca benni se'e nía iyá nua nna ni síbaba udácabi bienquin ca unnuha bittubetticana ca u'unaha qui utecana úna lencabi.

<sup>19</sup> Unnuhaba raca nna attirba chi bisína ttu chupa ca nu Israel se'e lhe'e yiesi Antioquía lencana ca nu daa daca lhe'e yiesi Iconio, ca unnuha nna uxí yiettebacana ca benni se'e nía qui besiacana Pablo iyya. Lacana nna ucaquinna dequi chiba udácana betticana Pablo, nuarcala nna u'uyacana bi'iniha uleacan bi ro'o yiesiha.

<sup>20</sup> Ttiaca atti bitupa ca benni ria le Jesús sabi'aba Pablo nna labi nna xeaba guadhattebabí. Nianna guata'a dacababi lhe'e yiesiha attu libe. Betteyú sá nna diattebabí lenbi Bernabé deca lhe'e yiesi Derbe.

### Pablo lenbi Bernabé besíacabi lhe'e yiesi Antioquía attu libe

<sup>21</sup> Dequide utixxi'acabi ca tisa gue Jesús lhe'e yiesi Derbe atta ixeru ca benni güia lecabí Benniha, laniala nna bequicabi besincabi daca Listra attu libe. Beteguacabi itúba lhe'e yiesi Iconio lhe ni besinbacabi lhe'e yiesi Antioquía. <sup>22</sup> Lhe'e ttu ttu ca yiesi atta betecabihá nna bese'etsitsicabi ca benni ria le Jesús se'e nía, tsitsiba belisacabi ca bi'iniha qui bittu ixulhaquinbi ca tisa gue Jesús. Rágubacabi ca bi'iniha, qui eta'acabi atta rinnabia Tata Do Iyyabaaha nna labíaba uyúcabi ixeloba ca elha disa. <sup>23</sup> Lhe'e ttu ttu ca yiesiha bese'ecabi ca benni deaparu elha rieni qui acacabi nu lo gue ca benni ria lecabí Jesús. Dequide rinnecabi leni Tata Do Iyyabaaha lhe rutte ubina lhe'ecabi lhe lania nna rodha'ancabi ca bi'iniha las ná Benni bananie ri-na, Benni ria lecabí-na.

<sup>24</sup> Utebacabi lo yu te láni Pisidia nna besinttebacabi lo yu te láni Panfilia. <sup>25</sup> Dequide chi utixxi'acabi ca tisa gue Jesús lhe'e yiesi Perge, utettebacabi diacabi daca lhe'e yiesi Atalia. <sup>26</sup> Nía bodaxxucabi barco deyyacabi daca lhe'e yiesi Antioquía, atta boca'an ca benni ria le ca tisa gue Jesús cabi las ná Tata Do

Iyyabaaha atti udulocabi bencabi sina nu chi uluxaquinbiha.<sup>27</sup> Atti chi besincabi lhe'e yiesi Antioquía nna beaxittebacabi iyába ca benni ria le Jesús se'e nía. Nianna utixxi'attebaquinbi ca bi'iniha iyába nu beni Tata Do Iyyabaaha lencabi, gue gaxasná chi udhali Benña neda gue ca benni bittu anca benni Israel qui tsia lecani Jesús lhe.<sup>28</sup> Isáru be'ana Pablo lenbi Bernabé leni ca benni ria le Jesús se'e lhe'e yiesi Antioquía.

**Ca bi'ini bedheti ca tisa bele'enie lencabi ca benni anca nu lo  
gue ca benni ria le Jesús bitupacabi Jerusalén**

**15** Laniaguaba nua udá ttu chupa ca unbiyuu se'e lo yu gue Judea bisíncabi lhe'e yiesi Antioquía. Nianna udulottebacabi bele'equinbi ca benni ria le Jesús bittu anca benni Israel se'e nía, rácabi ca bi'iniha: "Läga odilá Tata Do Iyyabaaha cabi gansi bittuba cuecabí senni nu runcana ca unbiyuu Israel attiba rá ca ley bodha'ana Moisés."<sup>2</sup> Ttiaca Pablo lenbi Bernabé nna uyu'uttebacabi bitilha tisacabi len ca unnuha lo ni'a gue nu rá ca nua. Laniala nna bodúcabí Pablo lenbi Bernabé, adírba ca benni ria le Jesús lhe qui tsiacabi lhe'e yiesi Jerusalén sanne lencabi ca benni deaparu elha rieni anca nu lo gue ca benni ria le Jesús, ca bi'ini bedheti ca tisa bele'enie se'e nía lhe gue nu chi unnecabiha.<sup>3</sup> Dequide chi udhelha ca benni ria le Jesús se'e lhe'e yiesi Antioquía ca bi'iniha nna utettebacabi deca lo yu te láni Fenicia, lo yu te láni Samaria lhe lacabi nna utixxi'attebaquinbi ca benni se'e nía dequi ca benni dittu lhe chiguaba bedaxxucana neda gue Tata Do Iyyabaaha. Laniala nna iyáxeaba ca benni ria le Jesús se'e nía be'olhaba lecabí de binacabi nua.

<sup>4</sup> Atti bisína Pablo lenbi Bernabé lhe'e yiesi Jerusalén nna ca benni ria le Jesús lencabi ca benni deaparu elha rieni anca nu lo guecabíha lhe ca bi'ini bedheti ca tisa bele'e Jesús lhe chi se'etseecabi ribedacabi ca bi'iniha. Pablo lenbi adí ca bi'iniha nna utixxi'attebaquinbi ca benni se'e nía iyába bixa chi ben Tata Do Iyyabaaha lencabi.<sup>5</sup> Ttiaca ttu chupa ca benni fariseo chi ria lecani Jesús se'e nía nna udulíttebacabi rácabi:

—Labíaba raca duelha uren senni unbiyuu bittu anca benni Israel chi ria le Jesús, udoguabacana tisa gue ca ley bodha'ana Moisés lhe.

<sup>6</sup> Laniala nna beaxi loesi ca bi'ini bedheti ca tisa bele'e Jesús lencabi ca benni chi deaparu elha rieni anca nu lo guecabíha qui

innecabi gue nu rá ca nua.<sup>7</sup> Dequide chi unnexxattacabi gue nua nna laniala udulí Pedro unnebi rábi ca bi'iniha:

—Xa betsito, lebi'i gua yuxebale, axta ttuali becuee Tata Do Iyyabaaha neti, la lhe'e lebi'iba qui tsequia quixxi'aya gue Jesús atta se'e ca benni dittu-na qui tsia lecani Ben-na.<sup>8</sup> Cumu Tata Do Iyyabaaha Benni yue ttixaanca lhe'e lastoo ttu tturi chiba bele'e loe dequi güedibe cana. Nuarca betee Espíritu guee lencana attiba ri'i.<sup>9</sup> Tata Do Iyyabaaha nna ttuba runie len ri'i lhe leni ca unná lhe lee nna chiguaba benie nari lhi'u lhe'e lastoocani de güia lecani Jesús.<sup>10</sup> Lebi'i nna ¿biaca rutse'enle Tata Do Iyyabaaha? Rdacale uni ca benni dittu chi ria le Jesús ttu nu niba ri'i lhe ca benniola gueriha lhe bittu udácabi uncabi.<sup>11</sup> Ri'i nna riaba leri, de bedába le Jesús Benni bananie ri-na odile ri nuarca ulári, anáguauba ca unná lhe.

<sup>12</sup> Laniala nna iyábacana beaca sicana rudo nagacani gue Bernabé lenbi Pablo riguixxi'acabi gue ca milagru lhe gue ca nu runi rebaninri lhe chi beni Tata Do Iyyabaaha bencabi atta se'e ca benni dittu.<sup>13</sup> Atti uluxa unnecabicha nna udulítteba Jacobo rábi:

—Betsito, gualudo nagale quia.<sup>14</sup> Simón-ni chi utixxi'enbi ri gue gasná uca desde primeraha li uca lani Tata Do Iyyabaaha ca benni bittu anca benni Israel-na, qui ulequiesie ca benni aca guee lhe'e yiesi gue ca unná.<sup>15</sup> Nu beni Ben-na raxxína leni nu unnee ca benni uca profetaha, attiba rá lo ca sitsi gue Ben-na atta rá:

<sup>16</sup> Isía sá eyequia echidha yo'o gue David  
nu chi ubixxina.

Eyonia ca de'e bise'elona lhe  
atti echidhana attu libe,

<sup>17</sup> qui anáchu adí benni nna odecki locani egUILACANA neti  
itupa leni iyá ca benni dittu chi uxia acacana quia.

<sup>18</sup> Anía rá Benni bananie ri-na,  
lee chi utixxi'e iyába unní axta atti nía li.

<sup>19</sup> Jacobo ráguababi: Larcala neti nna racatia, läga dica unri duelha gue ca benni dittu chi bedaxxu neda gue Tata Do Iyyabaaha uncabi nu rá ca ley bodha'ana Moisés.<sup>20</sup> Ri'i nna nu unlari nna idhelhari sitsi lencabi qui bitturu gocabi elha go gue nu rutecana úna len ca nu rácana anca diosí-na, bitturu isácana nu bittu anca latselacani lhe. Anáguauba bitturu gocabi bela gue nimala utti bidí yienni lhe niguaba reni lhe.<sup>21</sup> Cumu desde ca ttu nu reali chi bese'e lhe'e ttu ttu ca yiesi ca benni riguixxi'acabi ca ley bodha'ana

Moisés. Ca benniha unna rulabacana lhe'e ca yo'o atta rudhetiri ca tisa gue Tata Do Iyyabaaha atti risía ca sá redí leri-na.

### **Ca benni ria le Jesús se'e Jerusalén ridhelhacabi sitsi leni ca benni dittu**

<sup>22</sup> Ca bi'ini bedheti ca tisa bele'e Jesús lhe ca benni deaparu elha rieni anca nu lo lhe iyába ca benni ria le Jesús lhe boquinnatomba iquicabi ucueecabi ttu chupa ca benni sela len lacabi qui idhelhacabi ca bi'iniha leni Pablo lhe Bernabé lhe qui tsiacabi lhe'e yiesi Antioquía. Nianna bodúttebacabi Judas, bi'ini láguaba Barsabás, Silas lhe ca bi'iniha nua ancacabi benni raparu ca benni ria le Jesús se'e nía respeto. <sup>23</sup> Len ca bi'iniha udhelhacabi sitsi nu rá loni aní:

“Ri'itu, ca bi'ini bedheti ca tisa bele'e Jesús lento ca benni deaparu elha rieni anca nu lo gue ca benni ria le Jesús, ni ridhelhatu ttu padiuxi guele lebi'i ca benni dittu chi ria lele Jesús se'e lhe'e yiesi Antioquía lhe daca lo yu gue Siria lhe daca lo yu gue Cilicia lhe. <sup>24</sup> Ri'itu chi binatu dequi chi bita ttu chupa ca benni sela ri'itu atta se'ele-na. Ca unnuha nna läga ri'itu udhelhatu cana, titúba ca unnuha bitacana atta se'ele-na. Lacana nna chi bettacannacana iquile leni nu bettele'equinnale, cumu rácana le dequi labíaba udoles tisa gue ca ley bodha'ana Moisés lhe cue senni ca unbiyuu-na lhe.

<sup>25</sup> De nua nna ttuba chi bese'etu unnetu boquinna iquitu idhelhatu ttu chupa ca benni sela len ri'itu atta se'ele-na, lencabi Pablo lhe Bernabé lhe ca benni raca betsiri raquinri guecabi. <sup>26</sup> Ca bi'in-ni nna tsaba chi berú iqui berú lecabí masquiba gatticabi de riguixxi'acabi ca tisa gue Jesucristu, Benni bananie ri-na. <sup>27</sup> Larcala nna udhelhatu Judas lenbi Silas qui cuinaga lacabi quixxi'atseequinbi le gaxasná anca tisa chi begüeetu. <sup>28</sup> Espíritu gue Tata Do Iyyabaaha lenie ri'itu nna chi boquinna iquitu, lärga udo duelhatu le unle attu bixarua. Suntteba nu rá lo sitsi-ni raca duelha unle, <sup>29</sup> delába bitturu gole elha go gue nu rutecana úna leni ca nu rácana anca diosi-na, bitturguaba gole reni lhe niguuba bela gue nimala utti bidí yienni lhe. Anáguauba bitturu isále nu bittu anca latselale. Gansi lebi'i unle nu rátu-ni nna tseeba salíanle. Lhatsiru gualtse'e.”

<sup>30</sup> Nianna dequide chi bechú tisa loescabi nna biríattebacabi lhiaxu diacabi deca lhe'e yiesi Antioquía. Atti bisíncabi nía nna uxíttebacabi iyába ca benni ria le Jesús se'e nía, qui begüeecabi ca bi'iniha sitsi nojacabihá. <sup>31</sup> Atti chi belaba ca benni se'e nía lo

sitsiha nna be'olhaba lecabí gue elha xen lasi rute ca benni udhelha sitsiha.<sup>32</sup> Cumu Judas lenbi Silas ancacabi profeta. Larcala xxeniba nu unnecabi rácabi ca benni ria le Jesús se'e nía qui bettipacabi le ca bi'iniha lhe betecabi elha xen lasi len ca bi'iniha lhe.<sup>33</sup> Dequide chi uca isá use'e ca bi'iniha nía, laniala nna bechú tisa ca benni ria le Jesús Judas lenbi Silas qui eyequi ca bi'iniha esíncabi atta se'e ca benni udhelhacabi ca bi'iniha.<sup>34</sup> [Ttiaca Silas nna radi lebi eya'anbi nía.]<sup>35</sup> Pablo lenbi Bernabé nna níaba be'ancabi lhe'e yiesi Antioquía. Lacabi nna güequittebacabi güele'e lhe ugüixxi'a lhe ca tisa gue Benni bananie ri-na lencabi adí ca benni ria le Ben-na se'e nía.

### Pablo lenbi Bernabé ulha'a lhe'e loescabi

<sup>36</sup> Isába uca nna lenla nna rá Pablo Bernabé:

—Tsiari sannahiri ca benni chi bianini ca tisa gue Jesús se'e lhe'e ttu ttu ca yiesi atta chi guatixxi'ari ca tisa gue Ben-na, qui ugüíari gaxasná se'ecabi.

<sup>37</sup> Bernabé nna rdacabi ichecabi Juan, bi'ini láguuba Marcos.

<sup>38</sup> Ttiaca Pablo nna läga uyu'u lebi ichecabi Marcos, cumu atti uchecabi bi'iniha nna bedaa Panfilia bequibi. Lärga uca lebi tsia lenbi ca bi'iniha qui quixxi'acabi ca tisa gue Jesús.<sup>39</sup> Idíba bencabi nua, nuarca ulha'a lhe'e loescabi. Bernabé nna uchettebabí Marcos diacabi bedaxxucabi barco nu dia daca lo gue Chipre.<sup>40</sup> Pablo nna becuettebabí Silas. Nianna dequide boca'an ca benni ria le Jesús se'e nía cabi las ná Benni bananie ri-na, biráttebacabi diacabi.

<sup>41</sup> Laniala nna utecabi daca lo yu gue Siria lhe daca lo yu gue Cilicia lhe ruse'etsitsicabi ca benni chi ria le Jesús se'e nía.

### Timoteo dia lenbi Pablo lhe Silas lhe

**16** Atti bisína Pablo deca lhe'e yiesi Derbe nna utettebabí diabi deca lhe'e yiesi Listra. Nía guattíabi ttu benni chi ria lebí Jesús lábi Timoteo, xi'ini ttu nuila Israel nu riaguuba leni Jesús. Tata guebiha nna ancabi benni Grecia.<sup>2</sup> Ca benni ria le Jesús se'e lhe'e yiesi Listra lhe lhe'e yiesi Iconio lhe rinnecabi rácabi dequi tseeba runi Timoteo.<sup>3</sup> Pablo nna rdacabi ichebí Timoteo, larcala labíaba berenttebabí bi'iniha senni nu runcana ca unbiyyu Israel qui bittu inne güee ca nu Israel se'e nía guebi, cumu de bittu anca tata gue bi'iniha benni Israel.<sup>4</sup> Lhe'e iyába ca yiesi atta ritecabiha

utixxi'aquinbi ca benni ria le Jesús gue nu rá lo sitsi beni ca bi'iní bedheti ca tisa bele'e Jesús lencabi ca benni deaparu elha rieni anca nu lo gue ca benni ria le Jesús se'e Jerusalén. Rágubacabi ca bi'iníha udocabi tisa gue nu rá lo sitsiha lhe.<sup>5</sup> Larcala ca benni chi ria le Jesús se'e itúba ca nía nna chi ria tsitsiru lecabí. Ttu ttu sába diacabi racaru ixecabi lhe.

**Pablo bele'enbi rinne lenbi ttu unbiyuu  
gue lo yu te láni Macedonia**

<sup>6</sup> Ttiaca Espíritu gue Tata Do Iyyabaaha nna läga begüeelle Pablo lenbi Timoteo quixxi'aquinbi ca benni se'e daca lo yu te láni Asia ca tisa gue Jesús. Larcala nna utettebacabi diacabi daca lo yu te láni Frigia lhe lo yu te láni Galacia lhe.<sup>7</sup> Atti bisíncabi lo bedaa gue lo yu te láni Misia nna belabatteba lecabí ga'acabi deca lo yu te láni Bitinia. Ttiaca Espíritu gue Jesús, läga begüeelhe cabi ga'acabi nía.<sup>8</sup> Larcala neda yu'ubacabi utecabí lo yu gue Misia. Níala nna bisíncabi lhe'e yiesi Troas nu re ro'o indattooha.<sup>9</sup> Lo relaha nna bele'eni Pablo ttu unbiyuu gue yiesi Macedonia du ditibana rinnabana rána: “Betechi Macedonia-na qui unlu ri'itu yuda.”

<sup>10</sup> Suntteba uluxa bele'eni Pablo anía lo relaha nna ráttebabí: “Ese'e tseeri qui tsiasi Macedonia, nía chi raxi Tata Do Iyyabaaha ri, qui quixxi'ari ca tisa gue Jesús.”

**Pablo lenbi Silas riguixxi'acabi ca tisa gue Jesús lhe'e yiesi Filípos**

<sup>11</sup> Atti bedátu Troas nna bodaxxuttebatu barco nu uchena ri'itu ttu lixxaba daca lo yu re lagüi indattoo lána Samotracia. Betteyú sá nna bisíntu lhe'e yiesi te láni Neápolis.<sup>12</sup> Níala bedátu nna diatu deca lhe'e tu yiesi te láni Filípos nu baba Roma. Unnuha nua ancana ttu yiesi ra xxeni leni re lo yu gue Macedonia. Níala bisátu ttu chupa ubisa.<sup>13</sup> Ttu sá redí le ca benni Israel nna biríattebatu ro'o yiesiha diatu gaxxaba ro'o ttu yoo te nía, cumu chi uquintu dequi níala ria ca benni Israel rannecana leni Tata Do Iyyabaaha. Níala usiatu, atti udulottebatu riguixxi'entu ca nuila risía nía ca tisa gue Jesús.<sup>14</sup> Níala du ttu nuila lána Lidia dana deca lhe'e yiesi lána Tiatira rutto'ona ca lari xinaa chulha daca yaxi. Nuilaha nna ancana ttu benni ribequi xxeni Tata Do Iyyabaaha. Lagüiba duna rudo naganiha nna bentteba Benni bananie ri-na uta'a ca tisaha lhe'e lastooni qui güia leni gue

nu rá Pablo.<sup>15</sup> Laniala nna udittebana inda lenna iyába ca benni raca betsi loesni se'e lhe'e yo'o gueniha. Nianna ráttebana ri'itu:

—Gansi gualínle rále dequi chi anca benni ria le ca tisa gue Benni bananie ri-na, nnanna nna gualtsá eya'anle lhe'e yo'o quiahá.

Lana nna duelhaba benna guetu be'antu lhe'e yo'o gueniha.

### **Pablo lenbi Silas utixxacan cabi lisiyya lhe'e yiesi Filipes**

<sup>16</sup> Guatetu ttu libe atti diatu atta rannetu leni Tata Do Iyyabaaha, nía beti'atu ttu nuila cuiti yu'u ttu be xxegüi lhe'e cuerpu gueni, nu runi qui rinne ya'ana. Unnuhaba anca sina runi nuilaha. Ca nu banquinna nua nna xxeni belhi ridícana gue nu rinne ya'a nua.

<sup>17</sup> Nuilaha nna betenalhattebana ri'itu lento Pablo, lana nna rinnena idisa rána:

—Ca unbiyuu-ni ancacana benni rixuuni Tata Do Iyyabaaha, benni ra xení lee. Lacabi riguixxi'acabi gue gaxasná lhári qui bittu tsia nittiri.

<sup>18</sup> Aníaba benna güequina ixe ubisa, axta liba bitisini Pablo atti bequibi belisabi be xxegüi yu'u lhe'e cuerpu gue nua rábi na:

—Jesucristuha rudettia rulisa lu, neti nna rinnabiaya lu, bería lhe'e cuerpu gue nuila-na.

Atti beríatteba be xxegüi yu'u lhe'e cuerpu gue nuilaha.

<sup>19</sup> Ttiaca atti utedaani ca nu banquinna nuilaha bitturu aca dhicana belhi gue nu rinne ya'a nua nna bedaxxuttebacana Pablo lenbi Silas, na'ayani cana ca bi'iniha checan cabi guase'ecan cabi lhe'eli'a gue yo'o lagüiha lo ca nu rinnabia.<sup>20</sup> Atti chi se'equinna ca bi'iniha lo ca xuedaha nna ráttebacana:

—Ca nu Israel-ni requicana rutsatsacana ca benni gueri se'e lhe'e yies gueri-ni.<sup>21</sup> Lacana nna dacana rule'ecana nu chi labicana runcana, nu bittu dica uguelhari ga'a lo yies gueri-ni lhe nu bittu dica unri lhe cumu ri'i ancari benni Roma.

<sup>22</sup> Ca benni se'e nía nna ubigattecana besía lecani Pablo lenbi Silas. Ca xuedaha nna bentebacana mandadu cueacana xo ca bi'iniha, atti quitsacana lhe'ecabi len ya lhadhi.<sup>23</sup> Dequide chi begüeexxatta ca nua ca bi'iniha nna utixxattecana ca bi'iniha lisiyya. Nianna rácana nu du rapa ro'o lisiyyaha gapa tsitsina ca bi'iniha.<sup>24</sup> Dequide rácana nua anía nna bega'attebana Pablo lenbi Silas lhe'e lisiyya do axta lhi'uru, atti bedágattecana ni'a ca bi'iniha lhe'e ttu yaga xxeni do belea lhe'eni.

<sup>25</sup>Ttiaca tu riloelaha nna udulotteba Pablo lenbi Silas rinnecabi leni Tata Do Iyyabaaha, rulhacabi gue Benniha lhe. Adí ca nu te lisiyya nna siba beacacana qui rudo nagacani. <sup>26</sup>Attirba chi bixú idí, ttuttíru bitá axta lo cimientu gue lisiyyaha, atti xeaba beali ca puerta yaya ro'o ca yo'o sia lhe'e lisiyya. Nianna iyába ca nu te lisiyyaha beasi ca cadena xicacanaha. <sup>27</sup>Atti bebani nu du rapana ro'o lisiyyaha, nianna bilenna chi du yali ca puerta yaya ro'o nua nna uleattebana espada gueniha diana uxudi lhe'eni cumu raquinna ga chiba bexunni ca nu yaya lisiyyaha. <sup>28</sup>Ttiaca Pablo nna uresi'attebabí rábi na:

—¡Bittu unlu aná! ¡Niba se'e iyába ri'itu!

<sup>29</sup>Laniala nna unnaba nua ttu gui qui ilenna atti rigánina uta'ana tu rixidibana de rasbinna bedú xibini lo Pablo lhe lo Silas lhe, <sup>30</sup>laniala bebeana ca bi'iniha, nianna unnaba tisattebana rán cabi:

—Xa tata, ¿bila anca nu unia qui lháya bittu tsia nittia?

<sup>31</sup>Lacabi nna becabittebacabi gueni rácabi na:

—Güia lelu Jesús, Benni bananie ri-na, lania nna gualábalu itupa lenlu ca benni datíalu se'e lhe'e lisluha.

<sup>32</sup>Laniala nna utixxi'encabi na ca tisa gue Benni bananie ri-na lenna iyába ca benni se'e lhe'e lisniha. <sup>33</sup>La lo relatteba utí nu du rapa ro'o lisiyyaha lo ca güee gue Pablo lenbi Silas. Nianna uditteba nua inda itupa lenna ca benni se'e lhe'e lisniha. <sup>34</sup>Laniala nna dechena ca bi'iniha lisniha, qui begona cabi yetta. Lana lenna iyába ca benni se'e lhe'e lisniha nna tsitsiba re'o lecani de chi güia lecani Tata Do Iyyabaaha.

<sup>35</sup>Atti guaniha nna dilatte udhelha ca xuedaha chupa ca nu rise'e rapa ro'o yo'o lagüiha diacana sayúcana nu du rapa ro'o lisiyyaha qui ebeana Pablo lenbi Silas. <sup>36</sup>Unnuha nna rána Pablo:

—Ca xuedaha nna chi udhelhacana nu bettettixxi'a-na dequi chiba anca ebeaya le lhe'e lisiyya-ni. Larcala chiba anca eríale. Lhatsiru gualeyya.

<sup>37</sup>Ttiaca Pablo nna ráttebabí ca nu rise'e rapa ro'o yo'o lagüiha:

—Ri'itu ancatu benni Roma. Cuentaba chi begüeexxattacana ri'itu aníba lo benni. Lacana nna niba lä ulequilicana bixa bentu. Nianna bega'arcana ri'itu lhe'e lisiyya-ni nna. Nnanna nna runcana ebeacana ri'itu sigába. ¡Bittu! ¡Läga ería ri'itu! Labacana ita sangacana ebeacana ri'itu.

<sup>38</sup> Ca nua nna besinttebacana utixxi'aquinna ca xuedaha nu rá ca bi'iniha. Lacana nna usittebaquinna atti binacana dequi anca ca bi'iniha benni Roma. <sup>39</sup> Laniala nna güia ca xuedaha guannabacana elha xen lasi lo Pablo lhe Silas lhe. Dequide bebeacana cabi lhe'e lisiyya nna belisattebacana cabi leni tisa tsee qui eríacabi lhe'e yiesiha. <sup>40</sup> Atti chi bería Pablo lenbi Silas lisiyya nna deyyaxeattebacabi besincabi lisi Lidia. Dequide unne lencabi ca benni ria le Jesús, bese'etsitsichaticabi ca bi'iniha lhe laniala nna bedáttebacabi deyyacabi.

### Risatsa ca benni se'e lhe'e yiesi Tesalónica gue Pablo lenbi Silas

**17** Dequide bete Pablo lenbi Silas lhe'e yiesi Anfípolis lhe Apolonia lhe besinttebacabi lhe'e yiesi Tesalónica. Nía do ttu yo'o atta rudheti ca benni Israel ca tisa gue Tata Do Iyyabaaha. <sup>2</sup> Attiba chi labi Pablo runbi güiattebabí lhe'e yo'o atta rudheti ca nua ca tisa gue Tata Do Iyyabaaha delo tsunna xumanu coa risíaba ca sá redí le ca benni Israel, labi nna ritilha tisabi len ca nu ria nía. Rudaxxu ni'abi nu rá lo ca sitsi gue Tata Do Iyyabaaha, <sup>3</sup> rixxi'enbi cana rábi cana dequi Cristuha nna labíaba gatti Benniha, lenla nna eyacanie eríe lhe'e baa atta yu'u ca nu yatti-na. Rágubi cana:

—Jesús, Benni rixxi'atia le guee-ni, Ben-na anque Cristu.

<sup>4</sup> Ttu chupa ca nu Israel nna güiaba lecani, lacana nna guattatebacana Pablo lenbi Silas. Güiguuba le adí ca benni Grecia ca nu rudo tisa gue Tata Do Iyyabaaha lhe ixeguuba ca nuila ca nu rapacana respeto lhe'e yiesiha lhe güia lecani Jesús. <sup>5</sup> Ttiaca ca nu Israel bittu güia lecaniha nna upattebacana malisi. Laniala nna güiacana guattupacana ca nu lä du ta leni requi utá lo nedaha qui tsequi ca nua güetsatsa benni. Güia gua ca nua guatta'acana lhe'e yo'o gue benni lá Jasón, cumu reguilacana Pablo lenbi Silas qui ichecan ca bi'iniha atta chi se'e ca benni. <sup>6</sup> Ttiaca atti nuttu ca bi'iniha guatti'acana nna la dula Jasón leni attu chupa ca benni chi ria le Jesús uchecana, na'ayanicana ca bi'iniha guase'ecan cabi lo ca nu rinnabia gue yiesiha, atti ribesi'anicana rácana:

—¡Ca unbiyuu requi rucannacana iqui ca benni se'e itúba yies lo yu-ni nna chiguuba bisíacana nii! <sup>7</sup> ¡Jasón-ni nna belábin ca nua lhe'e lisni! ¡Yábacana rigu'u ni'acani ca ley gue César nu rinnabia lo yu gue Roma. Nianna rácana dequi do attu nu rinnabia ra xxeniru leni lána Jesús!

<sup>8</sup> Atti bienini ca benni lhe ca nu rinnabia lhe nu rá ca nua nna biyyiattebacana. <sup>9</sup> Ca nu rinnabiahia nna benttebacana duelha gue Jasón lenbi adí ca bi'iniha utecabi belhi, anía liba nna bodilácan cabi.

### Pablo lenbi Silas riguixxi'acabi ca tisa gue Jesús lhe'e yiesi Berea

<sup>10</sup> Quantusiba uca lo rela nna bedhelhatteba ca benni ria le Jesús Pablo lenbi Silas daca lhe'e yiesi Berea. Atti chi bisíncabi nía nna güiattebacabi lhe'e yo'o atta rudheti ca benni Israel ca tisa gue Tata Do Iyyabaaha. <sup>11</sup> Ca benni Israel se'e lhe'e yiesi Berea nna ancacana benni radúru lecani atti ca benni se'e lhe'e yiesi Tesalónica. Larcala itú iqui itú lecani güia lecani ca tisa gue Jesús. Nianna ttu ttu sába rise'ecana rulabacana lo ca sitsi gue Tata Do Iyyabaaha qui ttedaaquinna gansi gualí nu riguixxi'en Pablo cana. <sup>12</sup> Larcala ixe ca benni Israel se'e nía güia lecani. Güiaguaba le ixeru ca benni dittu rinne tisa griego lhe ca nuila rapacana respeto lhe'e yiesiha lhe ca unbiyuu lhe güia lecani Jesús. <sup>13</sup> Ttiaca atti bina ca benni Israel se'e Tesalónica chi requi Pablo güele'e ca tisa gue Tata Do Iyyabaaha lhe'e yiesi Berea nna güiattebacana guatsatsacana ca benni se'e nía. <sup>14</sup> Ttiaca ca benni ria le Jesús, bebeattebacabi Pablo bedhelhacabi bi'iniha daca ro'o indattooha. A sunruba Silas lenbi Timoteo be'ancabi lhe'e yiesi Berea. <sup>15</sup> Ca benni dia güeru'un Pablo nna bisín liba lencabi bi'iniha lhe'e yiesi Atenas nía liba bequicabi. Pablo nna ráttebabí ca bi'iniha:

—Gále Silas lenbi Timoteo etattegabacabi qui yuba esela loestu attu libe.

### Pablo riguixxi'abi ca tisa gue Jesús lhe'e yiesi Atenas

<sup>16</sup> Laca do Pablo ribedabi Silas lenbi Timoteo esíncabi lhe'e yiesi Atenas nna tsaba bittu uca tseenbi de bilenbi itúba lhe'e yiesiha sia ca nu bittu gualí anca diosi. <sup>17</sup> Larcala nna riabi lhe'e yo'o atta rudheti ca benni Israel ca tisa gue Tata Do Iyyabaaha rattisabi ca nua, ca nu dittu rinne tisa griego rudú xibicani lo Tata Do Iyyabaaha lhe. Aníaguaba runbi ttu ttu sába lhe'e atta raca i'iyyaha leni ca benni risina nía. <sup>18</sup> Bitilha tisaguaba lenbi ttu chupa ca nu teru elha rieni quecani te lácani epicurios lhe estoicos lhe. Adícana nna rácana:

—¿Biunni rá nu ro'o rucha requi-ni?

Alhecana nna redenácana:

—Gaxa gue ca diosi subi bunna rixxi'a unná.

Anía rácana cumu de riguixxi'a Pablo gue Jesús, gue reacani ca benni yattina lhe.<sup>19</sup> Lania la nna uchecana bi'iniha lo tu lhilhi te láni Areópago atta riacana rise'ecana rinnecana. Atti unnaba tisattebacan bi rácana:

—¿Si guaca quixxi'enlu ri'itu bi tisa cubi unní cheelu?<sup>20</sup> Cumu lu nna rinnelu gue ca nu läga yutu gueni. Nnanna nna raca letu quixxi'enlu ri'itu ¿bi gueonna rinnelu?

<sup>21</sup> Cumu iyába ca benni se'e lhe'e yiesi Atenas lhe ca nu dittu se'e nía lhe suntteba do lecani rudo nagacani lhe rinnecana lhe gue bixaba ttu nu cubi rienquinna.

<sup>22</sup> Lania la nna udulí Pablo lagüi gue ca nu se'e atta te láni Areópago, atti unnebi rábi:

—¡Lebi'i, benni Atenas! Neti nna ritedaatia ancale benni nu riaxxatta leni ca diosí-na,<sup>23</sup> cumu coa atta riteba diaya rilátia sia ca becoa atta runle le'a. Na chi bilátia ttu becoa dia ca letra loni rána: “Diosi nu nuttu nu anca bienna na.” Güelha gue Dios benni rudú xibile loe-na, masquiba bittu anca bienle, delha rixxi'atia le nnanna.

<sup>24</sup> 'Tata Do Iyyabaaha, benie yies lo yu-ni lhe iyába nu se'e loni lhe lee anque Benni bananie iyyabaaha lhe yies lo yu-ni lhe. Läga do Benña lhe'e yotu nu runi ca benni se'e yies lo yu-ni.<sup>25</sup> Bittuguaba reasanie nuxa bixa unna guee lhe cumu lee anque benni rute elha nabani gue iyári. Rute be qui anca banri lhe adírba nu reasinri lhe.

<sup>26</sup> 'Leni ttuba benni benie use'e benni lhe'e iyába ca yies-na qui tse'ecana itúba yies lo yu-ni. Utixxi'aguabanie cana bedaa nuca tse'ecana lhe gaxa tse'ecana lhe.<sup>27</sup> Aníaba beni Tata Do Iyyabaaha qui eguilacane masquiba tu rigána rideencana qui nicaga guasati'abacane, ttiaca läga idittu do Ben-na leni atta se'e ttu tturi.

<sup>28</sup> Cumu de larbe nna gua anca banri lhe gua ritári lhe gua se'erí yies lo yu-ni lhe. Attiguaba rá ttulhe ca benni rinne ca tisa elha guele-na rácana: “Ri'i ancari xi'ini Tata Do Iyyabaaha.”<sup>29</sup> Larcala nna ri'i ancari xi'in Tata Do Iyyabaaha, nuarcala läga dica ulaba leri dequi Tata Do Iyyabaaha anque ttu diosi nu ancana leni oro, o leni plata lhe o leni iyya nu rotsi'inu le ca benni rilhachu leni nácani lhe.<sup>30</sup> Ca tu nurea nna Tata Do Iyyabaaha lägabi casu benie gue nu beni ca benni atti bittu chi yucana. Ttiaca nnanna nna rinnee rulise iyácea ca benni se'e yies lo yu-ni qui odú xiyyancana odaxxucana neda guee.<sup>31</sup> Cumu Tata Do Iyyabaaha chi bedúe ttu sá atti unie elha uxtisi lixxa gue ca benni se'e yies lo yu-ni.

Unnuha unie leni benni chi becuae bodúie, Benniha nua lá Jesús. Atti belhidhe Benniha lhe'e baa atta yu'u ca nu yatti-na lania bele'e loe leni iyá benni gualíba chi becuae Benniha qui unie elha uxtisi.

<sup>32</sup> Atti bienin ca nua gue eyacabani ca nu yatti-na, bedacalin ttulhecan, adícana nna rácana:

—Gudoga nagatu gue nu rálha attu sá.

<sup>33</sup> Laniala nna güequi Pablo atta se'e ca nua. <sup>34</sup> Ttiaca adí ca benni nna guanalhattebacana bi'iniha cumu güia lecani gue nu rábi. Ttu ca benni güia lecaniha nna lána Dionisio. Lana nna ancana ttu ca nu sela len ca benni ria lo lhilhi te láni Areópago. Selaguaba attu nuila lána Dámaris lhe adírba ca benni lhe.

### Pablo dobi lhe'e yiesi Corinto

**18** Dequide la lania nna bería Pablo lhe'e yiesi Atenas, nianna bisínbi lhe'e yiesi Corinto. <sup>2</sup> Nía beti'abi ttu benni Israel lábi Aquila, ancabi ttu unbiyuu bababi lo yu te láni Ponto. Aquila nna chi bisínbabí nía lenbi nuila guebi lána Priscila. Lacabi nna bedácabi lo yu gue Italia besincabi Corinto, cumu nu rinnabia gue Roma lána Claudio nna unnabiattebana bebeacana iyárechaba ca benni Israel se'e lo yu gue Roma. Pablo nna güiattebabí guanalhibi ca bi'iniha. <sup>3</sup> Cumu labi nna runguabi sina loes nu run ca bi'iniha güen ca yo'o lari, anía uca nna be'anbi urenbi sina len ca bi'iniha. <sup>4</sup> Nianna cua risíaba sá redí le ca benni Israel nna riabi lhe'e yo'o atta rudheti ca nua ca tisa gue Tata Do Iyyabaaha ránne lenbi ca nu Israel lhe ca nu dittu lhe. Runbi qui oquinna iqui ca nua tsia lecani gue nu rixxi'enbi cana.

<sup>5</sup> Atti bisína Silas lenbi Timoteo dacabi deca lo yu gue Macedonia nna Pablo nna a suntteba ca tisa gue Jesús bedona lebi utixi'abi, rixxi'enbi ca benni Israel Jesús anque Cristu. <sup>6</sup> Ttiaca ca unnuha nna besíala lecani bi'iniha utelacana iquibi. Laniala nna becuibi xobi biste de bittu güia le ca nua nu rábi cana, atti ráttebabí:

—Nnanna nna cu'ebale tsia tulha guele-na cumu neti nna chiba benia len lebi'i nu ralha unia. Bedá nnanna leni ca benni bittu anca Israel-na la tsiaya satixxi'aya ca tisa-ni.

<sup>7</sup> Laniala nna beríabi lhe'e yo'o atta rudheti ca benni Israel ca tisa gue Tata Do Iyyabaaha, atti deyyattebabí lisi ttu benni do gaxxaba nía lábi Justo, ancabi ttu benni ria lebi Tata Do Iyyabaaha.

<sup>8</sup> Anáguuba Crispo nu rinnabia lhe'e yo'o atta rudheti ca benni

Israel ca tisa gue Tata Do Iyyabaaha, iyába lenna ca benni gueni se'e lhe'e yo'o gueniha güia lecani ca tisa gue Benni Bananie ri-na. Ixerguaba ca benni se'e lhe'e yiesi Corinto güia lecani atti bienquinna ca tisaha, laniala nna udicana inda.<sup>9</sup> Ttu lo rela nna bele'eni Pablo Benni Bananie ri-na rinnee re:

—Bittu gasinlu. Utixxi'a chatti ca tisa-na Bittu eyaca silu.<sup>10</sup> Neti nna guadúba lania lu. Larcala läganu dhana bixa udhaquinna lu, cumu lhe'e yies-ni nna ixe ca benni chi ga'anatia acacana quia se'e.

<sup>11</sup> Anía uca nuarca be'ana Pablo lhe'e yiesi Corinto ttu ida nalha güele'en ca benni se'e nía ca tisa gue Tata Do Iyyabaaha.

<sup>12</sup> Ttiaca atti anca Galión nu rinnabia lo yu te láni Acaya nna ca benni Israel nna beaxitteba loescani qui usia lecani Pablo. Atti bedaxxuttebacana bi'iniha uchecan bi lo ca nu anca uxtisiha.

<sup>13</sup> Nianna ráttebacana nu rinnabiahaha:

—Unbiyuu du-ni nna requina ridí yiena ca benni cuequixxencana Tata Do Iyyabaaha attu yalee, rule'enna ca benni nu bittu raxxína leni nu dia lo ca ley boca'ana Moisés lhe.

<sup>14</sup> Pablo nna chitteba diabi innebi bixa innábi, attirba chi unne Galión rána ca nu Israel:

—Lebi'i, benni Israel gansi unbiyuu du-ni ulána-na o nuxa bettina lhe lania liba nna güeya lasia udo naga guele.<sup>15</sup> Unná nna cumu ancabunna gue suna tisaba, gue ca tisa rinnabia guele-nba lhe larcala läga un neti elha uxtisi guele. Naba gualyú. Lebi'iba gualuluxa guele.

<sup>16</sup> Laniala nna bebeana cana lhe'e yo'o lagüiha.<sup>17</sup> Nianna iyábacana bedaxxuttebacana Sóstenes nu rinnabia lhe'e yo'o atta rudheti ca benni Israel ca tisa gue Tata Do Iyyabaaha, snaba nía begüeelhabacana bi'iniha. Ttiaca Galión nna niba saro'o lä betabinna gue nu ben ca nua.

### Pablo bequibi deyyabi lhe'e yiesi Antioquia

<sup>18</sup> Pablo nna isáru be'anbi lhe'e yiesi Corinto leni ca benni se'e nía. Lenla nna bechú tisabi ca benni ria le Jesús, nianna bedáttbabí deyyabi leni Aquila lhe Priscila lhe bodaxxucabi barco besincabi lo yu gue Siria. Lhe'e yiesi Cencrea nna atti chi deoba odaxxucabi barco nna nía begá iqui Pablo, cumu chiba uluxa benbi nu dica unbi attiba chi boca'anbi tisa leni Tata Do Iyyabaaha.<sup>19</sup> Atti chi bisíncabi lhe'e yiesi Éfeso nna nía bodha'anbi Priscila lenbi Aquila.

Labi nna diattebabí lhe'e yo'o atta rudheti ca benni Israel ca tisa gue Tata Do Iyyabaaha. Nía unne lenbi ca nua ca tisa gue Jesús.<sup>20</sup> Ca unnuha nna unnabattecacan rácan bi eya'anbi a ttu chupa tsunna ubisa len lacana, ttiaca labi nna läga uca lebi. <sup>21</sup> Labi nna bechú tisattebabí ca nua rábi cana:

—[Labíaba eyya'aya Jerusalén. Níaba uttea laní nu chi deoba isía.] Ganna si Tata Do Iyyabaaha aca lee nna guadedhába etadinalhia le attu libe.

Dequila nna bodaxxu Pablo barco bedábi Éfeso besinbi lhe'e yiesi Cesarea.

<sup>22</sup> Atti besinbi lhe'e yiesi Cesarea nna güiattebabí lhe'e yiesi Jerusalén rábi padiuxi ca benni ria le Jesús se'e nía. Nianna deyyattebabí besinbi lhe'e yiesi Antioquía. <sup>23</sup> Níaba udobi isá. Lenla nna bederíabi dedheyabi attu libe. Utettebabí lhe'e coa ttu ttuba ca yiesi se'e lo yu gue Galacia lhe lo yu te láni Frigia lhe. Ruse'etsitsibi iyába ca benni chi ria lecabí Jesús se'e itúba ca nía.

### Apolos rixxi'abi gue Jesús lhe'e yiesi Éfeso

<sup>24</sup> Laniaguaba nua bisína ttu unbiyuu lhe'e yiesi Éfeso lábi Apolos. Ancabi benni Israel, ulibi lhe'e yiesi Alejandría. Labi nna ancabi ttu benni reda'ani tisa, tsitsiba yubi gue nu rá lo ca sitsi gue Tata Do Iyyabaaha lhe. <sup>25</sup> Chiba bedhetibi gaxasná anca neda gue Benni Bananie ri-na, labi nna tsitsiba re'o lebi rixxi'abi lhe rule'ebi lhe lixxa suba gue Jesús, masquiba sunruba yubi gue bi gue begadi Juan ca benni inda. <sup>26</sup> Apolos nna udulottebabí unnebi itú iqui itú lebi rixxi'enbi ca benni se'e lhe'e yo'o atta rudheti ca benni Israel ca tisa gue Tata Do Iyyabaaha. Ttiaca atti bienini Priscila lenbi Aquila gue bi'iniha nna uxttebacan bi ttu re atta utixxi'atseequinbi bi'iniha adí gue gatigasná anca neda gue Tata Do Iyyabaaha. <sup>27</sup> Atti chi runi Apolos tsiabi deca lhe'e ca yiesi se'e lo yu gue Acaya nna ca benni ria le Jesús nna benttebacabi bi'iniha yuda. Atti begüeettebacabi bi'iniha ttu sitsi atta rulisacabi ca benni ria le Jesús se'e nía qui ulabicabi Apolos gansi chi bisínbí nía. Atti chi bisínbí lo yu gue Acaya nna tsitsiba bixuubi benbi yuda ca benni chi bedaa le Tata Do Iyyabaaha uca lanie cabi güia lecabí Jesús. <sup>28</sup> Cumu aníba lo iyába ca benni se'e lhe'e yiesiha ritilha tisabi leni ca nu Israel, rigu'u ni'abi nu rá ca nua. Labi nna rinnebi ca tisa anca gualí, rudaxxu

ni'abi nu rá ca tisa dia lo sitsi gue Tata Do Iyyabaaha, rixxi'enbi cana Jesúsba Benniha anque Cristu.

### Pablo rixxi'abi ca tisa gue Jesús lhe'e yiesi Éfeso

**19** Laca re Apolos lhe'e yiesi Corinto, Pablo nna diattebabí utebi atta sia ca i'iya lo yu te láni Galacia, lo yu gue Frigia lhe. Níala nna besinbi lhe'e yiesi Éfeso. Nía guati'abi ixe ca benniria le Jesús.<sup>2</sup> Labi nna unnaba tisattebabí ca bi'iniha rábi cabi:

—¿Si uxíle Espíritu gue Tata Do Iyyabaaha atti güia lele ca tisa gue Jesús?

Ca bi'iniha nna becabittebacabi rácabi:

—¡Dica! Lägabi chi bienin ri'itu innecana gue Espíritu gue Tata Do Iyyabaaha.

<sup>3</sup> Pablo nna ráttebabí ca bi'iniha:

—¿Núla güia lele atti udile inda?

Lacabi nna becabittebacabi rácabi:

—Ca tisa unne Juanba güia letu atti uditu inda.

<sup>4</sup> Pablo nna ráttebabí ca bi'iniha:

—Gualíba, Juan begadibi inda ca benni bodú xiyyancana gue nülä anca tsee runcana qui bedaxxucana neda gue Tata Do Iyyabaaha, ttiaca laguabi nna unnebi rábi: “Tsia lele Benni isía dequide neti”, delába Jesús.

<sup>5</sup> Atti bina ca bi'iniha nu rá Pablo, laniala nna udicabi inda betti lá Jesús Benni bananie ri. <sup>6</sup> Atti bexxúatteba ná Pablo iqui ca bi'iniha qui uxícabi Espíritu gue Tata Do Iyyabaaha, lacabi nna udulottebacabi unnecabi attu tisa subi. Unneguabacabi ca tisa betee Tata Do Iyyabaaha lencabi lhe. <sup>7</sup> Tsil'inuba (12) ca unbiyuu-na.

<sup>8</sup> Delo tsunna beo bisá Pablo nía, güiattebabí lhe'e yo'o atta rudheti ca benni Israel ca tisa gue Tata Do Iyyabaaha, guattixxi'abi gue Jesús itú iqui itú lebi. Tsitsiba rinnebi qui iyienquin ca unnuha tsia lecani gue gaxasná rinnabia Tata Do Iyyabaaha. <sup>9</sup> Ttiaca adí ca nua nna benditibacana, tsaba bittu uca lecani tsia lecani.

Rinnelacana aníba lo benni gue neda gue Jesús. Laniala nna biriesi Pablo lenbi ca benni ria le Jesús, deyya lenbi ca bi'iniha lhe'e ttu yo'o scuela gue ttu benni lána Tirano. Nía bele'en Pablo ca benni ttu ttu sába. <sup>10</sup> Aníaba benbi delo chupa ida. Larcala iyába ca benni se'e daca lo yu gue Asia bienquinna ca tisa gue Benni Bananie ri-na, ca nu Israel lhe ca nu dittuba lhe.

<sup>11</sup>Tata Do Iyyabaaha nna bixuunie Pablo qui benie ca milagru xxeni. <sup>12</sup>Larcala axtaba ca lari ruxí lobi lhe ca lari rixuinbi rucubi ribenbi sina lhe rechecana atta se'e ca benni raniha. Ca unnuha nna reacattecacana, ca be xxegüi yu'u lhe'e cuerpu guecaniha lhe reriattecacana.

<sup>13</sup>Ttiaca ttu chupa ca nu Israel requi lo nedaha, rebeaguabacana be xxegüi yu'u lhe'e cuerpu gue ca benni, lacana nna benttebacana udetticana Jesús Benni bananie ri-na, qui ebeacana ca be xxegüiha lhe'e cuerpu gue ca benni. Nianna rávana:

—Jesús, benni riguixxi'a Pablo ca tisa guee-na rudettitu rulisatu le, gualería lhe'e cuerpu gue ca benni-ni.

<sup>14</sup>Anía beni gasi ca xi'in biyuu ttu nu Israel lána Esceva. Ancana bixxudi lo rinnabia. <sup>15</sup>Ttiaca ttu libe nnabecabi ttu be xxegüi guecani rána cana:

—Guanca biabatia Jesús lhe gua yuguaba nuxa nua Pablo lhe ttiaca lebi'i nna ¿nú ancale?

<sup>16</sup>Unbiyuu yu'u lhe'e cuerpu gueni be xxegüiha nna tturba bisínna bedaxxuna ca unnuha, cumu tipar nua atti lacana, nuarca udábana locani, nnela betsutsa belea nua cana ttu nu dica ixuu, chiba uca urecana beríacana lhe'e yo'oha, aníaba ttunttucana lhe chi ancaxxattacana güee lhe bexunnican deyyacana. <sup>17</sup>Iyába ca nu se'e lhe'e yiesi Éfeso binacana gue nu ucaha, benni Israel lhe ca nu dittuba lhe. Lacana nna usilhabaquinna. Denua nna nuarca iyábacana rinnecana rávana: “Xxeni ra le Jesús Benni Bananie ri-na.”

<sup>18</sup>Iixeru ca benni chi güia lecani Jesús risincana riguixxi'acana aníba lo benni gue nu bittu anca tsee chi bencana. <sup>19</sup>Anáguaixa ca nu beni gue güesa uchecana ca libro ca nu dia locani gue nu bedheticanaha qui bettecana ca nua lo gui aníba lo iyába ca benni se'e nía. Atti bebeacana lidhaca ca libro biteha nna gualíana attiba medi gayua (50) mili belhi plata. <sup>20</sup>Larcala nna tu diaba racaru ixe ca benni ria le ca tisa gue Benni Bananie ri-na, rule'e lo ancaque tisa ra xxeni le lhe.

<sup>21</sup>Dequide chi ute uca iyá unní nna ucattebani Pablo tsabi lo yu gue Macedonia, lo yu gue Acaya lhe. Níala nna esínbi lhe'e yiesi Jerusalén. Rágabi:

—Dequide chi güiaya Jerusalén nna unguaba duelha tsiya lhe'e yiesi Roma. <sup>22</sup>Laniala nna udhelhabi chupa ca bi'ini run sina

lenbiha tsiacabi Macedonia. Ca bi'iniha nua lácabi Timoteo lenbi Erasto. Pablo nna isáru be'anbi lo yu gue Asia.

### Lhe'e yiesi Éfeso risatsacana

<sup>23</sup> Lania nua uca ttu elha utilha xeni lhe'e yiesi Éfeso lo ni'a gue ca benni rudaxxu neda gue Jesús. <sup>24</sup> Ttu unbiyuu lána Demetrio nua udulona leni elha utilhaha. Cumu lána runna leni plata lisi xunaxi teequinna láni Diana. Xxeni belhi roca'ana sinaha gue ca nu runcana nua. <sup>25</sup> Demetrio nna beaxittebana ca nu runi sina gueniha leni adí ca nu runi loesi sina runnaha, nianna ráttebana ca nua:

—Ca unbiyuu se'e-ni, lebi'i nna gua yuxeabale sina runri-ni nna tseeba roca'anna belhi gueri. <sup>26</sup> Ttiaca nnanna nna lebi'i nna gua rienbinle lhe gua rilábinle lhe gue nu runi nu lána Pablo-na, lana nna requina rána dequi ca diosi ca nu runi leni nári nna läga anca ca unná diosi. Larcala ixe ca benni chi uxí yiena, läga sunru lhe'e yiesi Éfeso-ni requina runna aná, anáguauba runna lhe'e iyába ca yiesi se'e daca Asia lhe. <sup>27</sup> Läga sunru ruxunnina gue ca sina gueri-ni dhu sicana, anáguauba ruxunnina gue yo'o gue nan xunaxi ra xxeni leni gueri lá Diana-ni bitturu etábiquinne, lä tsiarguaba le adí ca benni se'e lo yu gue Asia lhe adí ca nu se'e yiesi lo yu-ni lhe gue ben-na.

<sup>28</sup> Atti bienquin nua nu rána nna bisa'atsitsiabaquinna. Nianna uresi'attebacana rácana:

—¡Xxeni ra le Diana gue ca nu Éfeso-ni!

<sup>29</sup> Iyába ca benni se'e lhe'e yiesiha biganna lecani, ttu xxia xeniba ancacana uta'acana bedaxxucana benni lá Aristarco lenbi benni lá Gayo. Ca bi'iniha nua daa daca lo yu gue Macedonia. Ancacabi benni ria tiaba leni Pablo. Lacana nna ure na'ayattebacana ca bi'iniha guase'ecana atta rise'ecana rugüiacana ca laní runi yiesiha. <sup>30</sup> Pablo nna uxacattebabí ga'abi atta se'e ca nua qui inne lenbi ca benni se'e nía, ttiaca adí ca benni chi ria le Jesús läga begüeelhacabi bi'iniha ga'abi nía. <sup>31</sup> Anáguauba ttulhe ca benni anca uxtisi gue Asia se'e tsee leni Pablo, udhelhattebacana ttu nu güia guayún bi qui bittu satta'abi atta yu'u ca nua. <sup>32</sup> Ca nu yu'u nía nna riyalhabacana: nu subi rá ttuna, nu subi redená a ttuna. Aníaba runcana yu'ucana cumu chi bichixxi lecani. Adí benni nna nibala yu ca nua bi lo ni'a gue se'ecana nía. <sup>33</sup> Ttiaca ttulhe ca benni Israel se'e nía nna besigattebacana ttu unbiyuu lána Alejandro qui ibigana innena edín cana. Unnuha nna bettátteba náni bele'enna ca nu

riyyiyaha qui eyaca sicana qui iyieni innena edína ca nu Israel lo ca benni gue yiesiha.<sup>34</sup> Ttiaca atti utedaaquinna dequi nu Israelba nua, atti uresi'atteba iyábacana tu ttu chupa uraguaba, rácana:

—¡Xxeni ra le Diana gue ca nu Éfeso-ni!

<sup>35</sup> Dequide chi udá nu runi ca sitsi gue yiesiha beaca si ca nu yu'u ribesi'aha nna laniala nna udulona unnena rána:

—Benni Éfeso, lebi'i gua yuxebale, iyába benni yucana dequi ri'i ca benni Éfeso-ni ancari benni nu tsitsiba rapari yotu gue diosi Diana gueri-ni, benni anque benni ra xxeni leni, tsitsiguuba rapari retratu gue ben-na daa iyyabaaha bisía yies lo yu-ni lhe.<sup>36</sup> Cumu läganu te innána dequi läga gualí nu ria-ni, larcala lebi'i nna siru gualtse'e balha, bittu cuenta unle ttu bixa.<sup>37</sup> Cumu ca unbiyuu guadaxxule-ni nna lägabi chi ulanacana ttu bixa lhe'e yotu-na, bittuguuba rigúacana bala'ana gue xunaxi gueri-na lhe.<sup>38</sup> Ganna si Demetrio-na lenna ca nu riben lenna sina-na te elha utilha guecani leni nuxa benni, gua dicaba uncana unná lhe'e yo'o lagüi-na lo ca xueda-na qui quixxi'acana bixa gue ritilhacana.<sup>39</sup> Gansi lebi'i bixarba attu nu subi rinnabale aca nna gua dicaba gaxiri iyába benni ro'o yo'o lagüi-na qui lhatsirba inneri gue bixa raca lele.<sup>40</sup> Cumu aní nna ruxunnibana gueri udelhacana cu'eri dequi ancari nu rutsatsa benni lo ni'a gue nu uca nasá. Ttirca innába tisacana ri innácana: “¿Bi lo ni'a gue runle aná? Ri'i nna ¿bila innári? Cumu läga yuri bi lo ni'a gue risatsa benni.”

<sup>41</sup> Uluxaba rána anía nna bechú tisattebana benni.

### Pablo betebi lo yu te láni Macedonia leni Grecia attu libe

**20** Dequide chi ute elha utilhaha nna laniala uxi Pablo ca benni chi ria le Jesús qui bettipabi le ca bi'iniha. Lenla nna bechú tisabi ca bi'iniha, atti bedáttebabí deyyabi daca Macedonia.<sup>2</sup> Dequide güequibi itúba ca nía tsitsiba unnebi bettipabi le ca benni se'e nía, laniala nna deyyabi deca lo yu gue Grecia.<sup>3</sup> Níaba be'anbi tsunna beo. Chitteba redú tseebi odaxxubi barco qui tsiabi deca Siria nna atti binabi dequi runi ca nu Israel udaxxucan bi uttican bi. Laniala nna bequibi, ni'ababi deyyabi betebi Macedonia.<sup>4</sup> Ca unbiyuu deyya lenbiha nna lácabi Sópater, dabi lhe'e yiesi Berea, ancabi xi'ini bi'ini lá Pirro; Aristarco lenbi bi'ini lábi Segundo nna dacabi lhe'e yiesi Tesalónica, bi'ini lábi Gayo nna dabi lhe'e yiesi Derbe. Níaguuba sela Timoteo lhe a chupa ca bi'ini daa daca lo yu

gue Asia lhe ttu bi'iniha nna lábi Tíquico, attu bi'iniha nna lábi Trófimo.<sup>5</sup> Ca bi'iniha nna beneruttebacabi deyyacabi lhe'e yiesi Troas. Nía liba uledacabi ri'itu.<sup>6</sup> Ri'itu nna dequide liba atti chi utee laní atti ro ca benni Israel ttaxtila nu bittu levadura dia lennaha, lania liba beríatu lhe'e yiesi Filipos leni barco. Lhe'e gayu sába nna guaxentu cabi lhe'e yiesi Troas atta be'antu gasi sá.

### **Pablo benbi beacani ttu uncuiti uttina lhe'e yiesi Troas**

<sup>7</sup> La sá bedú ni'a xumanu nna bese'ettebatu ttu reba qui goturse gue Benni Bananie ri-na. Pablo nna udulottebabí unnebi belisabi ca benni chi ria le Jesús. Cumu etteyú dilaba nua chi edábi, nuarca bisábi unnebi leni ca benni se'e nía axta bisía riloela.<sup>8</sup> Iyábatu se'etu lhe'e yo'o do güetsaa atta ralha ixeru gui.<sup>9</sup> Nía nutsa ttu unbiyuu cuiti lána Eutico dona ro'o ventana gue yo'oha. Cumu iságala bisá Pablo unnebi nuarca bita bisiela lo uncuitiha. Ttiaca bedaxxu tsitsitoba bisielana nuarca tuttíru ubinnina lo yu. Yadhagala nua xxeni cumu nu eyonna coali nua. Larcala nu yattiba anca nua gualidhacan na.<sup>10</sup> Laniala nna guadi Pablo uxuabi iqui uncuitiha, atti utesbi lhe'eni. Nianna rábi ca benni se'e nía:

—¡Bittu gasinle! Guanca ban bunni.

<sup>11</sup> Dequide unnuha nna beopitteba Pablo attu libe lhe'e yo'o do güetsaa qui ulha'abi ttaxtilaha utocabi rse gue Benni Bananie ri-na. Labi nna bededú lo dacababi bedennebi, axta liba daa ridulí xieni. Lenla nna deyyabi.<sup>12</sup> Adí ca bi'iniha nna bechettebacabi uncuiti biyinnaha lisni, cumu anca banba nua. Larcala adí ca be'o le ca bi'iniha.

### **Pablo deyu'ubi neda besinbi lhe'e yiesi Mileto**

<sup>13</sup> Ri'itu nna beneruttebatu deyyatutu bodaxxutu barco besintu ro'o yiesi te láni Asón, cumu nía chi anca eti'atu Pablo qui odaxxu lento bi barco. Lababi uca lebi edá ni'abi esínbi axta nía.<sup>14</sup> Atti chi besá loestu lento bi lhe'e yiesi Asón nna nía bodaxxutteba lento bi barco deyyatutu daca lhe'e yiesi re ro'o indattoo te láni Mitilene.<sup>15</sup> Beriabatu nía nna betteyú sá nna utettebatu ro'o yu te láni Quío. Bequi sá nna utettebatu ro'o yu te láni Samos. Attu sába bisátu leni barcoha nna bisíntu lhe'e yiesi Mileto.<sup>16</sup> Aníaba bentu cumu Pablo nna chiba boquinni iquibi ete xeababi Éfeso qui bittu isábi lo yu

gue Asia, cumu runna duelha guebi esínxibi lhe'e yiesi Jerusalén, tircala aca nna chila rebi nía atti isía sá Pentecostés.

**Pablo rechú tisabi leni ca nu lo gue ca benni ria le Jesús se'e Éfeso.**

<sup>17</sup> Atti chi bisíntu lhe'e yiesi Mileto nna Pablo nna uxttebabí ca benni deaparu elha rieni anca nu lo gue ca benni ria le Jesús se'e lhe'e yiesi Éfeso. <sup>18</sup> Atti chi bisíntu lhe'e yiesi Mileto nna Pablo nna uxttebabí ca benni deaparu elha rieni anca nu lo gue ca benni ria le Jesús se'e lhe'e yiesi Éfeso.

—Lebi'i nna gua yuxéabale gaxasná benia atti chi bisíntu lhe'e ca yiesi se'e lo yu te láni Asia-ni. <sup>19</sup> Itú ttuba atti urea len lebi'i, benba sina gue Benni Bananie ri-na len si'ile, yalhaguuba uresia guele lhe biyúguuba elha disa gue nu rele ca nu Israel-na udhacacana neti lhe. <sup>20</sup> Ttiaca läga bedhea lasia quixxi'atia le ca tisa nu gua dica ixuucana len lebi'i, bele'ebatia le aníba lo benni lhe coa lhe'e lisbale lhe. <sup>21</sup> Ca benni Israel lhe ca benni dittu lhe benia duelha guecani rpea cana oduxiyyancana odaxxucana neda gue Tata Do Iyyabaaha, tsia lecani Jesucristu, Benni Bananie ri-na lhe. <sup>22</sup> Nnanna nna deyya'aya lhe'e yiesi Jerusalén, cumu duelhaba runi Espíritu gue Tata Do Iyyabaaha quia eyya nía. Ttiaca neti nna niba lä yua bixa satea nía. <sup>23</sup> Sunruba nu yua nna Espíritu gue Tata Do Iyyabaaha rixxi'enie neti, lhe'e ttu ttu ca yiesi atta tsia yua nna ugüecana neti lhe quixxacana neti lisiyya lhe. <sup>24</sup> Ttiaca neti nna tsa lägabi racatia cadirba bi satea, nigua lä runia cua tseea elha nabani quia-ni qui bittu gattia lhe. Nu runla nna duelhaba runia ruttipa lasia qui e'eyua ulhuxa sina betee Jesús Benni Bananie ri-na len neti, delába quixxi'aya ca tisa tsee gue nu redá le Tata Do Iyyabaaha rute len ri'i.

<sup>25</sup> 'Nnanna nna neti nna chi yua, ni ttule ca nu chi utixxi'atia le gue gaxasná rinnabia Tata Do Iyyabaaha lä iláruinle neti attu libe.

<sup>26</sup> Larcala nasá nna rixxi'atia le, läga tulha quia nua gansi nuxale tsia nitti, <sup>27</sup> cumu neti nna tsa lägabi bedhea lasia lä utixxi'abatia le iyá nu chi ga'anani Tata Do Iyyabaaha unie len lebi'i. <sup>28</sup> Larcala nnanna nna rulisa le, gualtse'e tsitsi, gualuyú ca benni rule'enle nna atta chi bodú Espíritu gue Tata Do Iyyabaaha le acale nu lo gue ca bi'in-na. Attiba ttu benni rapa carne'e tsitsi gualuyú ca benni chi anca gue Jesús, cumu leni reni belali Benniha lo ya crusiba nna benie aca ca bi'in-na guee. <sup>29</sup> Neti nna yuxéabá, dequi de gansi chi deyya'aya nna lania isía ca benni du lecani attiba ca sagueo ledha-na uncana ulhuxacana ca benni ria le Jesús, tsaba bittu

satúaquinna ca bi'in-na.<sup>30</sup> La lhe'e ca benni sela len lebi'iba iría ca güen lhasi dhi yiecana ca bi'in-na qui tsiacabi sanocabi cana.  
<sup>31</sup> Larcala tsitsi gualtse'e. Gualorexxa lele neti nna itú ribesba delo tsunna ida rela resába bittu bedú sia rutea elha rieni len ttu ttule.

<sup>32</sup> 'Nnanna nna xa benni ria le Jesús, las ná Tata Do Iyyabaaha rodha'ana le. Rodha'anguabale len ca tisa rixxi'a gue elha tsee chi bedaa le benna betee len ri'i lhe. Cumu ca tisa-na ancaque benni ra xxeni lee guaca gueque use'e tsitsique le lo neda gue Benni Bananie ri-na, unque dhíle iyá nu chi rá Tata Do Iyyabaaha ugüe ca benni guee lhe.<sup>33</sup> Neti nna lägabi udá lasia belhi guele, niguaba xo nuxa attu benni lhe.<sup>34</sup> Lebi'i gua yuxebale, leni ni'a nába neti urenia sina qui uyo'a nu beasatia lenia adí ca benni use'e len netiha.<sup>35</sup> Satíaba bele'etia le ria, aní cuenri sina qui te nu uteri len ca benni bittu te guecani. Orexxa leri ca tisa unne Jesús, Benni bananie ri, atti re: "Adílaba tseeanca gansi ri'i uteri nu reasani ca benni, attichula ri'i dhíri nu utee benni."

<sup>36</sup> Dequide uluxa rá Pablo anía nna bedútteba xibibi unnebi leni Tata Do Iyyabaaha leni iyába ca benni se'e nía.<sup>37</sup> Nianna iyábacabi urescabi. Atti utesxebacabi yieni Pablo betsá locabi xxagabi.  
<sup>38</sup> Tsitsiba se'e si'icabi lo ni'a gue de rá Pablo bitturu uyú loescabi attu libe. Laniala nna deyya lencabi bi'iniha guaru'uncabi axta atta bodaxxubi barco.

### Pablo deyyabi Jerusalén

**21** Dequide chi bechú tisa loestu laniala nna bodaxxutu barco, ttu lixxaba diatu bisíntu lo yu re lagüi indattoo te láni Cos. Betteyú sá nna bisíntu lo yu re lagüi indattoo te láni Rodas, nía bededátu nna bisíntu lhe'e yiesi re ro'o indattoo te láni Pátara.<sup>2</sup> Ro'o yiesi Pátara nna beti'atu ttu barco deyyana daca lo yu gue Fenicia, lo nua nna beopitu deyyatu.<sup>3</sup> Atti deyu'utu neda deyyatu lo indattooha nna nía bilentu lo yu re lagüi indattoo te láni Chipre, rena daca ná rabesa gueri. Ri'itu nna deyyabatu besintu daca lo yu gue Siria. Ttiaca cumu barco deyya lentoха nna bete nua bodha'anna yua lhe'e yiesi Tiro re ro'o indattooha, larcala nna labíaba guaditu.<sup>4</sup> Nía guattí'atu ca benni ria le Jesús. Len ca bi'inihaba bisátu ttu gasi bisa. Ca bi'iniha nna chi utixxi'ani Espíritu gue Tata Do Iyyabaaha cabi larcala rácabi Pablo bittu eyyabi lhe'e yiesi Jerusalén.<sup>5</sup> Gua dobana gasi bisa use'etu nía nna laniala nna

beríatu lhe'e yiesiha. Níaba dedaa ca bi'iniha lento itupa lenbacabi ca nuila guecabiha lhe ca unto guecabiha lhe. Atti chi besintu ro'o indattooha nna bedútteba xibi iyábatu, atti unnettebatu belisatu Tata Do Iyyabaaha.<sup>6</sup> Laniala nna bechú tisa loestu atti beopittebatu lo barcoha. Ca bi'iniha nna bequittebacabi deyyacabi.

<sup>7</sup> Ri'itu nna beríabatu lhe'e yiesi Tiro nna besinttebatu lhe'e attu yiesi te láni Tolemaida re ro'o indattoo. Nía liba uluxa neda guetu dedaatu lo indattoo. Laniala nna betetu rátu padiuxi ca benni chi ria le Jesús se'e nía. Níaba be'antu lencabi ttu sá.<sup>8</sup> Betteyú sá nna beríatteba lento Pablo deyyatu lhe'e yiesi Cesarea. Nía güiatu lisi Felipe, bi'ini requi rixxi'a ca tisa gue Jesús. Bi'iniha nua ttu ca benni gasi bese'e qui uncabi yuda ca bi'ini bedheti ca tisa bele'e Jesús. Ri'itu nna níaba be'antu lisbiha.<sup>9</sup> Felipe nna se'e ttapa xi'iniunnábi ancacabi nu rbani. Ca bi'iniha nna rixxi'acabi ca tisa rute Tata Do Iyyabaaha lencabi.<sup>10</sup> Ixe ubisa chi uca se'etu nía, atti bisía ttu profeta lábi Agabo, dabi daca lo yu gue Judea.<sup>11</sup> Bi'iniha nna dabi güenalhi ri'itu. Atti bisíabi atta se'etuha nna bedaxxuttebabu yieti ridhí lhe'e Pablo, nianna bexxicatteba ni'a nábi nua, atti rábi ri'itu:

—Espíritu gue Tata Do Iyyabaaha rixxi'e re: “Lhe'e yiesi Jerusalén udaxxu ca benni Israel nu beaca gueni yieti-ni, atti uxxicacan na qui salhu'ucan na las ná ca nu dittu.”

<sup>12</sup> Atti bienintu nu rá bi'iniha nna ri'itu lento ca benni se'e lhe'e yiesi Cesarea nna belisattebatu Pablo qui bittu eyyabi Jerusalén.

<sup>13</sup> Ttiaca labi nna becabibi rábi:

—Bittu unle dhu si'i lasia leni nu ribesle na. Neti nna gua duba uxxicacana neti lhe o utticana neti lhe lhe'e yiesi Jerusalén lo ni'a gue Jesús Benni bananie ri-na.

<sup>14</sup> Ri'itu nna biyúbatu bittuba rudo nagabi guetu nna laniala nna bitturu bentu duelha guebi, atti ráttebatu bi:

—Nu innába Benni Bananie ri-na aca ganna.

<sup>15</sup> Dequide nua nna bese'etseettebatu, atti deyyattebatu Jerusalén.<sup>16</sup> Laniala nna udá ttu chupa ca benni ria le Jesús se'e lhe'e yiesi Cesarea len ri'itu. Ca bi'iniha bechecabi ri'itu lisi benni lábi Mnasón. Bi'iniha beaca lasbi Chipre. Labi nna ixeru ida chi anca ria lebi Jesús. Bi'iniha nua betee ganna atta be'antu.

### Pablo besinbi lhe'e yiesi Jerusalén

<sup>17</sup> Atti besintu lhe'e yiesi Jerusalén, ca benni ria le Jesús se'e nía nna attulade re'o lecabí, chi se'etseecabi ribedacabi ri'itu.

<sup>18</sup> Betteyú sá nna güiattebatu leni Pablo lisi Jacobo. Níaba se'e iyába ca benni chi deaparu elha rieni anca nu lo gue ca benni ria le Jesús. <sup>19</sup> Dequide rá Pablo ca bi'iniha padiuxi, lenla nna udulobi utixxi'enbi ca bi'iniha iyába nu chi beni Tata Do Iyyabaaha leni ca benni dittu atti requibi rixxi'enbi cana ca tisa gue Jesús. <sup>20</sup> Atti bienini ca bi'iniha nu rá Pablo nna ráttebacabi: “¡Xxeni ra le Tata Do Iyyabaaha!” Nianna rácabi Pablo:

—Biyúrga, xa betsito, gua yuxeabalu ixeru mil ca benni Israel chi ria lecani Jesús. Ca unná nna runcana duelha dhoru tisa gue ca ley boca'ana Tata Do Iyyabaaha leni Moisés. <sup>21</sup> Ca unná nna chi binacana dequi iyába ca nu Israel se'e lhe'e ca yiesi gue ca benni dittu rule'enlu cana dequi bitturu udocana tisa gue nu rá lo ca ley-na. Anáguba rálú cana dequi bitturu cue senni ca unto anca unbiyuu-na lhe bitturguaba uncana ca nu labiri runri ri'i ca benni Israel lhe. <sup>22</sup> ¿Bila unri nnanna? Guasiatte ca unná nii, cumu chi binacana dequi chi besíalu. <sup>23</sup> Larcala tseeba anca gansi unlu nu innátu-ni: Ni ttapa ca unbiyuu se'e-ni ca nu chi begüee tisa lo Tata Do Iyyabaaha ulhuxacana nu chi rácana uncana. <sup>24</sup> Uchecana güia lencana ro'o yotu-na, gualsattí cuerpu guele qui eyacale nu nari lo Tata Do Iyyabaaha. Lu nna quixalu gue nu ga'ana ute ca unná qui aca ugá iquicani. Aná beni qui ugüia iyá benni läga gualí nu chi binacana rácana runlu, cumu iláquinna lu nna gua rudobalu tisa gue ca ley boca'ana Tata Do Iyyabaaha leni Moisés. <sup>25</sup> Ca benni dittu chi ria le Jesús, chiba udhelhatu sitsi lencabi atta rixxi'entu cabi nu chi boquinna iquitu uncabi: Lacabi nna suntteba bitturu gocabi elha go gue nu rutecana úna leni ca nu rácana anca diosi-na, bitturguaba gocabi reni lhe niguaba bela gue nimala utti bidí yienni lhe. Anáguba bitturu isácabi nu bittu anca latselacabi lhe.

<sup>26</sup> Betteyú sá nna uchetteba Pablo ittapaba ca unbiyuha ro'o yotuha, atti utítteba cuerpu guecabi qui eyacacabi nu nari lo Tata Do Iyyabaaha. Lenla nna uta'abi lhe'eli'a gue yotuha qui quixxi'abi bixa sá sadona gasi bisa quii cuerpu guecabi, cumu lania nna utee ttu ttucabi úna.

**Ca nu Israel daa Asia betsatsacana ca  
benni qui ugüecana Pablo Jerusalén**

<sup>27</sup> Ya merba sadona gasi bisa guecabi, attirba chi biláni ttu chupa ca nu Israel dacana daca lo yu gue Asia Pablo dubi lhe'eli'a gue yotuha. Atti betsatsattebacana ca benni. Ca unnuha nna bedaxxuttebacana Pablo. <sup>28</sup> Ribesi'anica rávana:

—¡Benni Israel, gualtáxxirga nii! Unní nua unbiyuu nu requi lhe'e iyába ca yiesi-na rigu'u tisana ca benni qui cu'u ni'acani ca benni gueri lhe ca ley boca'ana Tata Do Iyyabaaha leni Moisés lhe yotu gueri-ni lhe. Güea chiguaba bega'ana ca nu dittu lhe'eli'a gue yotu-ni lhe. Ca unná nna bencana bitsiga yotu anca le'a gueri-ni.

<sup>29</sup> Anía rávana cumu chi biláquinna bi lhe'e yiesiha, requi lenbi Trófimo bi'ini beaca lasbi Éfeso. Lacana nna racaquinna ga chiba uchebi bi'iniha lhe'eli'a gue yotuha.

<sup>30</sup> Larcala nna iyába ca nu se'e lhe'e yiesiha bisatsattebacana diacana bitupacana atta du Pablo, atti bedaxxuttebacana bi'iniha u'uyacana bi bebeacan bi atta do yotuha. Nianna bottottebacana ca puertaha. <sup>31</sup> Chitteba rutticana bi'iniha atti bina nu lo gue ca soldado gue Roma dequi iyába ca benni se'e lhe'e yiesiha risatsacana. <sup>32</sup> Laniala nna beaxtteleba nua ca soldado gueniha leni adí ca nu banani ca nua, atti bigaatteba lenna ca nua diacana bisíncana atta se'e ca nu rugüecana Pablo. Bilálibani ca benni ca soldadoha leni nu lo gue ca nua nna lania liba bese'e sicana rugüecana Pablo. <sup>33</sup> Atti bisína nu lo gue ca soldadoha atta du Pablo nna unnabiattebana bedaxxucana bi'iniha bexxicacan bi leni chupa cadena. Laniala nna atti unnaba tisana nuxa anca Pablo lhe gue bixa ben bi'iniha lhe. <sup>34</sup> Ttiaca ca nu se'e nía nna güea güeaba rávana. Nuarca niba lä guadú tsee le nu lo gue ca soldadoha bixa nua rá ca nua cumu de riyaxxattacana. Laniala nna benna mandadu ca soldado gueniha echecana Pablo lhe'e yo'o atta ru'ucanaha.

<sup>35</sup> Atti bisín lencana bi'iniha atta anca chiniepia nna bijatteba ca soldadoha Pablo cumu de runi ca nu denalhaha ugüecana bi'iniha.

<sup>36</sup> Iyába ca nu denalhaha ribesi'acana rávana:

—¡Gualutti unná!

### Pablo runbi exúbi lo ca benni Israel

<sup>37</sup> Atti chi diacana uga'acana Pablo lhi'u atta ru'u ca soldadoha nna laniala nna rábi nu lo gue ca nua:

—¿Si guaca inne lania cuinalu sattito?

Unnuha nna becabina rán bi:

—¿Si gua rinnebalu tisa griego? <sup>38</sup> ¿Anla läga lu nua ttu nu Egipto bedú disana lo ca nu rinnabia-na ttuha, nianna biríana leni ttapa mili ca unbiyuu beni soldado gueni, dia lenna ca nua daca lo yu bisi atta nuttu benni se'e?

<sup>39</sup> Pablo nna ráttebabí nua:

—¡Dica! Benni Israelba neti. Yiesi atta beaca lasia nna te láni Tarso, ancana ttu yiesi ra xxeni leni baba lo yu te láni Cilicia. Larcala nna ochiba uná begüeelha neti innea ulisa ca benni se'e-ni.

<sup>40</sup> Nu baninna ca soldadoha nna:

—O, ba rá nua.

Begüeelhan bi unnebi. Labi nna udulíttebabí udúbi lo ca chicoha, atti bettátteba nábi bele'enbi ca benni se'e nía qui eyaca sicana. Atti chi beaca si ca nua nna belisattebabí cana leni tisa hebraica rábi cana:

**22** —Xa tata xeni lhe betsito lhe nnanna nna gualudo nagale gue nu innía ecabia gue cuinale.

<sup>2</sup> Atti bienini ca benni unne Pablo tisa hebraica nna laniala nna beaca sichatticana. Labi nna unnettebabí rábi:

<sup>3</sup> —Neti nna anca ttu benni Israel. Ulia lhe'e yiesi te láni Tarso nu baba lo yu te láni Cilicia, ttiaca lhe'e yiesi Jerusalén-niba bixenia. Larcala nna niba güiaya scuela atta rule'e Gamaliel-na. Ucana nu bele'enna neti atti ttiba rába lo ca ley boca'ana Tata Do Iyyabaaha leni ca benniola gueriha. Neti nna benia duelha unia nu dica ixuu lo Tata Do Iyyabaaha itú iqui itú lasia attiba runbale nnanna. <sup>4</sup> Ca ttu sáha nna neti nna beríalaya ca benni bedaxxu neda gue Jesús qui uttia cabi. Nuila lhe unbiyuu lhe ca bi'iniha bedaxxua bedheaya lisiyya. <sup>5</sup> Bixxudi xeni rinnabia-na lenna iyába ca benni chi deaparu elha rieni gueri-na biyú locani gue nu benia. Laguabacana betecana sitsi denia diaya utea leni ca benni Israel se'e lhe'e yiesi Damasco qui utecana lisensi quia udaxxua ca benni ria le Jesús uxica cabi echea cabi lhe'e yiesi Jerusalén-ni qui gocabi ttu bede'elu.

<sup>6</sup> "Ttiaca atti yu'a neda diaya nna chitteba deoba isína lhe'e yiesi Damasco, attiba tu retin ts'i'inu (12) resá, attirba lhaba ucaxxe ttu xieni daa iyyabaaha uyu'e sabi'aba. <sup>7</sup> Neti nna ubixxilotteba lo yu. Nianna atti bientia ts'i'i ttu benni re neti: "Saulo, Saulo, ¿biaca neti denalhalu rudhaca si'ilu?" <sup>8</sup> Neti nna unnaba tisattebra: "¿Núleonna tata?" Tsi'i Benniha nna becabittebe re: "Neti nua Jesús, gue Nazaret Benni denalhalu rudhaca si'ilha." <sup>9</sup> Ca nu dia lania nna usilhabaquinna biláquinna xieniha, ttiaca lägabi bienquinna ts'i'i Benni rulise netiha. <sup>10</sup> Neti nna unnaba tisattebra Benniha: "¿Bi raca lelu unia, tata?" Benni Bananie ri-na ráttebe neti: "Beadha nna güia lhe'e yiesi Damasco-na. Na quixxi'aquinna lu iyá nu chi ga'ana unlu." <sup>11</sup> Ttiaca cumu xieniha nna tsaba becalhe loa, larcala lärga bilátia dhaya. Ca benni dia laniaba nalhicana náya qui bisína lhe'e yiesi Damasco.

<sup>12</sup> 'Nía do ttu unbiyuu lábi Ananías. Ancabi ttu benni ribequi xenbi Tata Do Iyyabaaha, rudobi tisa gue ca ley bodha'ana Tata Do Iyyabaaha leni Moisés lhe. Iyába ca benni Israel se'e nía rinne tseecana gue bi'iniha. <sup>13</sup> Ananías nna bitattebabí bettenalhibi neti. Bisíababi nna ráttebabí neti: "¡Saulo, betsito quia, chiba dica elenlu attu libe!" Laniatteba nna belatia, atti biláttebatia Ananías. <sup>14</sup> Labi nna ráttebabí neti: "Tata Do Iyyabaaha gue ca benniola gueriha chi becuae lu qui unalu nu raca lee unlu, qui ilenlu Jesús Benni runi nu anca tsee lo Ben-na lhe qui iyieninlu ca tisa rinne cuinaga Ben-na lhe. <sup>15</sup> Cumu lu acalu benni quixxi'a ca tisa gue Ben-na leni iyárecha ca benni gue nu chi bilenlu lhe gue nu chi bieninlu lhe. <sup>16</sup> Larcala nna bitturu cuedalu. Guadhatte qui gadilu inda, unnaba lo Benni Bananie ri-na dhie elha xen lasi gue ca tulha guelha."

<sup>17</sup> 'Dequila atti bequia besíaya lhe'e yiesi Jerusalén-ni nna güiatteba lhe'e yotu-na güenne len Tata Do Iyyabaaha, <sup>18</sup> atti lhaba bele'etia Benni bananie ri-na, re neti: "Begüe lelu biría lhe'e yiesi Jerusalén-ni cumu ni nna läga udo naga ca unná ca tisa quia rinnelha." <sup>19</sup> Neti nna rpettebe: "Xa Tata, ca unní gua yuxebacana dequi neti nua riaya atta sia ca yo'o atta rudheti ca benni Israel ca tisa gue Tata Do Iyyabaaha ralheaya ca benni ria lecabí lu radheaya cabi lisiyya, rugoa cabi ttu bede'elu lhe. <sup>20</sup> Anáguuba attibetticana Esteban, benni utixxi'abi iyába nu uca atti güequilu yies lo yu-niha, neti nna níaguuba dua lania ria: O, betticana bi'iniha, axtaba udúa utua tseea xo ca nu betticana bi'iniha." <sup>21</sup> Ttiaca Benni Bananie

ri-na re neti: “Güia, cumu neti idhelha lu lhe'e ca yiesi se'e idittu atta se'e ca benni bittu anca benni Israel.”

<sup>22</sup> Ca nu se'e nía nna bedaa ttoníarba begüeelhacana unnebi, atti bededulottebacana bedebesi'acana rácana:

—¡Gualutti unná lärgabi ralhunna dho banna!

<sup>23</sup> Ttiaca cumu tu se'ebacana ribesi'acana, ribeacana ca xocaniha rigu'unacana cana lhe ruelhacana yu lo be lhe <sup>24</sup> laniala nna beni nu lo gue ca soldadoha mandadu uga'acana Pablo lhi'u lhe'e yo'o atta ru'ucanaha qui quincana bi'iniha, anía liba nna dhi ro'obi bixa lo ni'a gue do le ca nua bi. <sup>25</sup> Ttiaca atti chi xicaquinna bi qui quincan bi, laniala nna unnaba tisabi ttu ca nu banani ttu xxia ca soldadoha rábi nua:

—¿Si guaga'anaba lo ley-na utíale ugüele ttu benni gue Roma, nu bittu chi ulealile gansi gualí ancana nu te tulha gueni?

<sup>26</sup> Atti bienini nua nu rá Pablo nna deyyattebana guattixxi'enna nu lo guecaniha rána nua:

—¿Bila anca nu un cuinalu nnanna? Unbiyuu-na nna nu Romaba unná.

<sup>27</sup> Laniala nna diatteba nu lo gue ca soldadoha atta du Pablo, atti unnaba tisattebana bi'iniha rán bi:

—¿Si gualí ancalu benni Roma?

Pablo nna becabittebabi gueni rábi na:

—Bila.

<sup>28</sup> Unnuha nna rátteban bi:

—Neti nna xxeni belhi utixa qui chiba uca udáya uca benni Roma.

Pablo nna becabittebabi gue nua rábi na:

—Neti nna atti ulilia anca benni Roma.

<sup>29</sup> Unnuhaba bina ca nu chi se'e tsee nía qui ugüecana Pablo nna xeaba ubiattacana atta du bi'iniha. Anáguaba nu lo gue ca soldadoha lhe usitteinna cumu de chi bexxicana bi'iniha leni cadena.

### **Pablo betsá dubi lo ca nu runi elha uxtisi gue ca benni Israel**

<sup>30</sup> Betteyú dila nna nu lo gue ca soldadoha nna raca leni una tseena bixa gue rusía le ca nu Israel Pablo. Nuarca udhasittebana cadena xica ná bi'iniha. Nianna benttebana mandadu uxicana ca

bixxudi anca nu loha leni iyába ca nu runi elha uxtisiha. Lana nna uleattebana Pablo, guadúna bi'iniha lo ca nua.

**23** Pablo nna begüiattebabi ttu lhixxaba lo ca nu runi elha uxtisiha, atti ráttebabi cana:

—Xa betsito, neti nna itú tturba doa yies lo yu-ni, lägabi racatia dequi chi benia ttu nu lä dica ixuu lo Tata Do Iyyabaaha.

<sup>2</sup>Ananías nu anca bixxudi xeni rinnabiah nna benttebana mandadu ca nu se'e gaxxa atta du Pablo ugüecana ro'o bi'iniha.

<sup>3</sup>Ttiaca Pablo nna becabittebabi gueni rábi na:

—¡Tata Do Iyyabaaha ugüe ro'olu xa nu ni lo ni tisaba runi dequi ancalu nu runi nu anca tsee! Inqui doxalu-na qui unlu elha uxtisi quia attiba rába lo ca ley-na, lu nna rigu'ula ni'alu ca ley-na rinnabialu ugüecana ro'a.

<sup>4</sup>Ca nu se'e nía nna unnettebacana rácana Pablo:

—¿Si aná dica innelu ulisalu benni anca bixxudi xeni rinnabia gue Tata Do Iyyabaaha?

<sup>5</sup>Pablo nna ráttebabi cana:

—Xa betsito, läga yu neti ganna bi'in-na anca bixxudi xeni rinnabia, cumu lo ca sitsi atta dia ca tisa gue Tata Do Iyyabaaha nna rá: “Bittu quelu iqui nu rinnabia gue lo yies guelha.”<sup>a</sup>

<sup>6</sup>Laniala nna utedeenbi, salhe ca nu runi elha uxtisiha nna ancacana ca nu te lácani saduceo a salhe ca nua nna ancacana ca nu te lácani fariseo. Labi nna unnettebabi idisa rábi cana:

—Xa betsito, neti anca ttu benni fariseo, datíaya ca benni fariseo lhe ttiaca lebi'i nna runle elha uxtisi quia cumu de xen lasia reacani ca benni chi uttina.

<sup>7</sup>Suntteba uca uluxa unne Pablo rábi anía nna udulotteba ca fariseo lencana ca saduceo bitilha tisa len loescani, atti ulha'atteba lhe'e loescani <sup>8</sup>cumu ca saduceo nna rácana dequi läga gualí reacani ca benni chi uttina, bittuguuba gualí se'e ingeli gue Tata Do Iyyabaaha lhe bittuguuba gualí se'e espíritu lhe. Ttiaca ca fariseo nna gue iyába unní ria lecani. <sup>9</sup>Ca nu se'e nía nna biyyattebacana. Ttu chupa ca nu rule'e nu rá lo ca ley bodha'ana Moisés ancacana fariseo se'e nía nna udulíttebacana unnedícana rácana:

---

<sup>a</sup> 23:5 Éxodo 22:28

—Unbiyuu du-ni nna lägabi rati'atu ttu bixa nu lä anca tsee chi ben-na. Gaxa ttu espíritu o ttu ingeliba unne lenie unná. Gansi anía anca, ri'i nna läga dica ese'e disari lo Tata Do Iyyabaaha.

<sup>10</sup> Ttiaca ca benni se'e nía nna adílabo biyyiyacana. Larcala nna nu lo gue ca soldadoha nna usitteinna qui lä uduyacana Pablo de ugüebacan bi. Laniala nna uxina ttu chupa ca soldadoha qui ebeacana Pablo lo ná ca nu se'e nía eche dacabacan bi lhe'e atta ru'u ca soldadoha.

<sup>11</sup> Bequi ulha nna bele'ettaba lo Benni bananie ri-na leni Pablo. Nianna re bi'iniha:

—Tsitsi udú, Pablo, cumu attiba chi unnelu utixxi'alu quia Jerusalén-ni, anáguaba innelu quixxi'alu quia lhe'e yiesi Roma.

### Ca nu Israel relecani utticana Pablo

<sup>12</sup> Betteyú sá nna uyu'utteba ttu chupa ca nu Israel unnecana gue gaxasná uncana qui utticana Pablo. Lacana nna boca'an tsitsicana tisa masquiba cu'iquixa guecani tsa bittu gocana etta, niguaba lä i'iyacana inda lhe axta liba dequide gansi chi betticana Pablo.

<sup>13</sup> Guatela chua (40) ca unbiyuu begüee tisa uncana anía. <sup>14</sup> Laniala nna güiacana leni ca bixxudi anca nu loha, leni ca benni teru elha rieni guecaniha lhe. Nianna rávana ca nua:

—Ri'itu nna chi begüeetu tisa aní lo Tata Do Iyyabaaha tsa bittu gotu axta liba dequide chi bettitu Pablo-na. <sup>15</sup> Nnanna nna lebi'i lenle adí ca benni runi elha uxtisi-na, gualgási nu anca nu lo gue ca soldado-na saxxína Pablo uxxedila udún na lole. Ocadiba gualgás na dequi lebi'i nna rdacale cuequili tseele bixa beni unná. Ri'itu nna chi se'e tseetu gatsi lotu ro'o neda-na qui gansi chi utena yu'una neda dana atta se'ele-ni nna uttittebatu na.

<sup>16</sup> Ttiaca xi'inbiyuu dana Pablo nna binabana nu rá ca nua. Laniala nna güiana atta do Pablo lhe'e atta ru'u ca soldadoha guattixxi'enna bi'iniha nu rá ca nua. <sup>17</sup> Pablo nna uxttebabu ttu ca nu banani ca soldadoha rábi na:

—Uche uncuiti du-ni lo nu anca nu lo guele-na qui quixxi'enna na ttu tisa chi binana.

<sup>18</sup> Unnua nna uchettebana uncuitiha guadúna lo nu anca nu lo guecaniha. Nianna ráttebana nua:

—Pablo nu te lisiiya-na uxna neti. Nianna unnabana len neti ettedha'ana uncuiti du-ni len cuinalu qui quixxi'enna lu ttu tisa.

<sup>19</sup> Laniala nna ulhí nu lo gue ca soldadoha ná uncuitiha dia lenna nua attu atta subi. Nía liba nna unnaba tisana nua rán na:

—¿Bi raca lelu gálu neti?

<sup>20</sup> Uncuitiha nna ráttebana:

—Ca nu Israel-na chi unne len loescani qui innábacana leni cuinalu tsia lenlu Pablo-na uxlea sadúlu bi lo ca nu runi elha uxtisi-na. Lacana nna ocadiba innácana dequi cuequili chaticana bixa benbi. <sup>21</sup> Cuinalu nna bittu tsia lelu gue ca unná cumu guatela chua (40) ca unbiyuu tse'e ucatsi locani ro'o nedaha ribedacana Pablo, lacana nna chi boca'an tsitsicana tisa masquiba cu'uquixa guecani rávana dequi tsa bittu gocana etta, niguaba lä i'iyacana inda lhe axta liba dequide chi betticana Pablo. Nnanna nna chi bese'etseecana, a suntteba ribedacana bixa inná cuinalu.

<sup>22</sup> Nu lo gue ca soldadoha nna ráttebana uncuitiha:

—Tsa nuttu nu quixxi'enlu bixa chi rálu neti.

Nianna bedhelhattebana nua.

### **Ca soldado checana Pablo lhe'e yiesi Cesarea atta do nu rinnabia lá Félix**

<sup>23</sup> Laniala nna uxi nu lo gue ca soldadoha chupa ca nu banani ca soldadoha rán cana ose'etseecana chupa gayua (200) ca soldado dha ni'acani, a gayuna yu'u tsii (70) ca nu sia coayu nna a chupa gayua (200) ca nu deni iyya ttuni do nu tutsi loni nna qui iríacana tsiacana lhe'e yiesi Cesarea retin jaa rela. <sup>24</sup> Benguana mandadu udú tseecana ttu coayu qui dho Pablo cu'eni lhe. Nianna ráguabana ca soldado gueniha lhatsiru tsia lencana bi'iniha qui isín tsee lencan bi lo nu rinnabia Félix. <sup>25</sup> La len ca unnuhatteba nna udhelhana ttu sitsi nu rinne loni rána:

<sup>26</sup> “Neti, Claudio Lisias, ridhelha len cuinalu ttu padiuxi, xa tata Félix, benni rinnabia do lhe'e yiesi Cesarea. <sup>27</sup> Ca benni Israel-na bedaxxucana unbiyuu udhelha len cuinalha. Lacana nna uxacattebacana utticana unná, ttiaca neti nna atti bina dequi anca unná benni Roma nna güiatteba lenia ca soldado quia-na guadiláya na. <sup>28</sup> Neti nna cumu uxaca una naga bixa xiyya runcana gueni, nuarca uchetteba na guadúa na lo ca benni runi elha uxtisi guecaniha qui una bixa lo ni'a gue bedaxxucan na. <sup>29</sup> Atti bisína lania na lo ca nua nna bientia runcana xiyya gueni dequi rigu'u ni'ani ca ley guecaniha. Ttiaca tsa lägabi te bixa lo ni'a gue ralha

unná gattina, niguaba gattana lisiyya lhe.<sup>30</sup> Neti nna chi bina dequi rdaca ca nu Israel-na uttican na. Lo ni'a gue unnuha nna nuarca udhelha na len cuinalu. Chiguaba unne lania ca nu rудelha iyyacana unná ettetsa ducana lo cuinalu qui aní lolu innácana bixa beni unná. Güedesaabari ttu bixa sá.”

<sup>31</sup> Ca soldadoha nna benbacana attiba chi rá nu lo guecaniha cana uncana, laniala nna gualeacana Pablo uchecan bi lo relaha dia lencan bi, axtaba lhe'e yiesi nu te láni Antípatris bisín lencan bi. <sup>32</sup> Betteyú dila nna bequitteba ca soldado dia ni'acaniha besincana lhe'e yo'o atta biríacana. A suna ca nu sia cu'e coayuhaba dia lencana Pablo. <sup>33</sup> Atti bisíncana lhe'e yiesi Cesarea nna begüeettabacana nu rinnabia lá Félix sitsi nojacanaha, bedúttebacana Pablo loni lhe. <sup>34</sup> Uluxaba belaba nua lo sitsiha nna unnaba tisattebana Pablo gaxa beaca lasbi. Dequide chi utixxi'a Pablo dequi ancabi benni baba lo yiesi Cilicia nna rátteba nu rinnabiahha bi'iniha:

<sup>35</sup> —Gudoga naga guelu gansi chi bisía ca nu rудelha iyyacan lu.

Laniala nna benna mandadu uga'acana Pablo lhe'e yo'o lagüi atta udo Herodes, use'ecana nu gapan bi lhe.

### Pablo runbi exúbi lo nu rinnabia lá Félix

**24** Dequide guadona gayu ubisa nna lania liba bisína Ananías nu anca bixxudi xeni rinnabia gue ca benni Israel lhe'e yiesi Cesarea lenna attu chupa ca benni teru elha rieni guecaniha. Cheeguabacana ttu nu yu gue ley te láni Tértulo qui inne nua cuenta guecani. Bisínbacana nna güiattebacana lo nu rinnabia Félix guattixxi'aquinna nua bixa beni Pablo. <sup>2</sup> Atti chi gualeacana Pablo nna udulotteba Tértulo bedúna tisa lo Félix rána nua:

—Xquixaba cuinalu, xa tata Félix, cumu de cuinalu nna chi se'e tseetu. Xquixaru cuinalu cumu de rinnabia tseelu nuarca ixeba nu tsee chi uca lhe'e ca yiesi guetu-na. <sup>3</sup> Gaxaba se'etu lhe gaxaba requitu lhe chi redibaatu nu tsee run cuinalu xa tata Félix, larcala nna rutetu xquixaru len cuinalu. <sup>4</sup> Ttiaca qui bittu utsáxxatta cuinalu nna rinnaba lolu udochí nagalu guetu ttu satti. <sup>5</sup> Ri'itu nna chi guatti'atu unbiyuu du-ni rutsatsana ca benni, lana nna requina rilha'ana lhe'e loesi ca nu Israel se'e itúba yies lo yu-ni. Laguabana rinneruna lo ttu xxia ca nu ria lecani ttu nu udo lhe'e yiesi Nazaret. <sup>6</sup> Anáguauba runguabana qui itsiga yotu anca le'a guetuha lhe.

Denua nna bentu untu elha uxtisi gueni attiba rá lo ca ley guetuha. <sup>7</sup> [Ttiaca bisíatteba Lisias nu anca nu lo gue ca soldado-na lenna ca soldado gueniha bettetúacana unná lo nátu. <sup>8</sup> Lana nna udhelhana ca nu rудelha iyyacana Pablo-na qui utsá du cana lo lu.] Cuinalu nna atti unlu elha uxtisi gueni, lania nna ttedeenlu iyába nu rátu runi unná anca gualí.

<sup>9</sup> Adí ca nu Israel se'e nía nna unnettebacana rácana dequi gualíba nu rá Tértulo.

<sup>10</sup> Laniala nnabettá ná nu rinnabiah bele'enna Pablo qui innebi. Pablo nna unnettebabí rábi:

—Neti nna yua chi anca cuinalu xueda gue yies-ni delo ixe ida, denuala nna itú iqui itú lasia innea ecabia gue ca nu rудelha iyyacana neti lo cuinalu. <sup>11</sup> Cuinalu nna guacaguaba itsatsa ni'alu qui una tseelu, neti nna chi ucaba tu tsil'inu (12) ubisa besina lhe'e yiesi Jerusalén qui sadú xibia cuequi xenia Tata Do Iyyabaaha. <sup>12</sup> Ca benni Israel-ni nna lägabi chi bettetti'acana neti ritilha tisa lania nuxa benni, o rutsatsa benni ro'o yotuha lhe niguuba lhe'e ca yo'o atta rudhetitu ca tisa gue Tata Do Iyyabaaha lhe niguuba ca lo neda se'e lhe'e yiesiha lhe. <sup>13</sup> Larcala ca benni se'e ni nna lägaga dhacana cuequiciana nu runcana xiyya quia. <sup>14</sup> Nu dhírguuba ro'a innía nna gualíba diaya lo neda gue Jesús runia sina gue Tata Do Iyyabaaha, Benni güia le ca benniola guetuha, nu rá ca nu rудelha iyyacana neti dequi ancana attu neda subi. Neti nna guaríaba lasia iyába nu rá lo ca ley bodha'ana Tata Do Iyyabaaha leni Moisés, nu rá lo ca sitsi bodha'ana ca benni uca profetaha lhe. <sup>15</sup> Xenguuba lasia gue nu rá Tata Do Iyyabaaha attiguuba xen le ca benni se'e-ni, delába eyacani ca benni chi uttina, nu bedú taba leni lhe nu lä bedú taba leni lhe. <sup>16</sup> Denua nna runia duelha runia nu anca tsee lo Tata Do Iyyabaaha lhe lo ca benni lhe.

<sup>17</sup> Neti nna dequide chi uca ixe ida güequia yiesi dittu nna begu'utteba neda deyya besina lhe'e yiesi quia Jerusalén qui saru'una tu latti belhi leni ca benni quia ca nu bittu te guecani, salhu'a úna gue Tata Do Iyyabaaha lhe. <sup>18</sup> Unnuhaba runia dua ro'o yotuha dequide chi utí cuerpu quia qui beaca nu nari lo Tata Do Iyyabaaha attiba ga'ana lo ca ley guetu-na, atti biláni ttu chupa ca nu Israel daa daca lo yu te láni Asia-na neti, tsa läganu ixe benni se'e len neti nía, bittuguuba runia resi lhe. <sup>19</sup> Ca nua dica tse'ecana nii qui innáacana bixa do lecani neti. <sup>20</sup> Gansi bittuba nna

ca nu se'e niba inná sangacana, ¿bi nu lä anca tsee guatti'acana chi benia atti betsá dua lo ca nu runi elha uxtisi gue ca benni Israel-na? <sup>21</sup> Sunruba nu benia nna atti dua locaniha nna unnea idisa rpea cana: “Lebi'i nna runle elha uxtisi quia nnanna cumu de ria lasia eyacabani ca benni chi uttina.”

<sup>22</sup> Atti bienini Félix nu rá Pablo, uchulottebana elha uxtisiha, cumu chiba yuxebana gaxasná anca gue neda gue Jesús. Nianna ráttebana ca nu se'e nía:

—Gansi chi liba bisía Lisias nu lo gue ca soldadoha, lania liba una tseea gaxasná anca guele.

<sup>23</sup> Laniala nna beni Félix mandadu nu banani ca soldadoha eche dacabana Pablo lhe'e yo'o atta rapacana bi'iniha. Ugüelhana bi'iniha tsequi labi lhe bittu usunana tsia ca benni ancabien bi'iniha nía sanalhicabi bi'iniha lhe sadha'ancabi nu reasinbi lhe.

<sup>24</sup> Dequide ute ttu chupa ubisa nna bedesintteba Félix lenna nuila gueni lá Drusila. Nuilaha nna ancana benni Israel. Félix nna udhelhattebana nu güia guaxxína Pablo qui udá nagani quixxi'a bi'iniha gue gaxasná ria lebi Jesucristuha. <sup>25</sup> Ttiaca atti utixxi'ani Pablo-na gue raca duelha un benni nu anca tsee lo Tata Do Iyyabaaha, gue aca gueri innabiali elha rieni gueri lhe gue gansi chi bisía sá atti utsá duri lo Tata do Iyyabaaha qui unie elha uxtisi gueri lhe. Félix nna usittebinna. Nianna ráttebana Pablo:

—¡Chinca, beyya! Güedeaxba lu nuçaxa gansi chi nattitia.

<sup>26</sup> Cumu rulabaguaba le Félix raquinna nicaga guteba Pablo ttu latti belhi len lana qui ebeana bi'iniha lisiyya, nuarcala ixe libe uxna bi'iniha unne lenna bi. <sup>27</sup> Dequide uca chupa ida nna Félix nna bedhanna ucana nu rinnabia. Lo ladini nna beta'a ttu nu lána Porcio Festo. Ttiaca cumu Félix nna rdacana eya'an tseena leni ca nu Israel, larcala nna bodha'anbana Pablo lhe'e lisiyya.

### Pablo rinnababi lo Festo tsiabi lo César nu rinnabia lo yu gue Roma

**25** Dequide chi beyonna ubisa bisína Festo lhe'e yiesi Cesarea nu re lo yu gue Judea qui edí ladini, laniala nna udána diana lhe'e yiesi Jerusalén. <sup>2</sup> Ca bixxudi anca nu loha lencana ca nu lo gue ca benni Israel nna güiattebacana guattixxi'aquinna Festo iyába nu runcana xiyya gue Pablo. <sup>3</sup> Nianna rácana Festo:

—O chiba uná.

Bedhelha Pablo-na lhe'e yiesi Jerusalén attu libe. Aníaba rácana cumu chi rulaba lecani dhu nocana bi'iniha qui uttican bi gansi chi deyu'ubi neda deyyabi.<sup>4</sup> Ttiaca Festo nna becabittebana guecani rán cana:

—Cesarea liba te Pablo lisiyya,níaguaba chi rulaba lasia eyya'aya tu uxxe güisa.<sup>5</sup> Ca nu anca nu lo guele-na, gua dicaba dhacana len neti tsia lania cana Cesarea, nía liba nna udelha iyyacana Pablo, gansi unná chi benna ttu nu lä anca tsee.

<sup>6</sup> Festo nna bisáruna attu xxunu o attu tsii ubisa lhe'e yiesi Jerusalén. Lenla nna deyyana lhe'e yiesi Cesarea. Betteyú dila nna bedotseetebana lo xxila atta ridona runna elha uxtisi lhe'e yo'o lagüiha. Nianna udhelhattebana ca nu güia guaxxícana Pablo qui utsá dubi loni.<sup>7</sup> Atti chi besin lencana Pablo atta do Festo nna ca nu Israel daa lhe'e yiesi Jerusalén se'e nía nna ubigattebacana bedelha iyyacana bi'iniha gue nu rácana dequi chi benbi xxeniba anca nu runcana xiyya guebi, ttiaca lägabi ria lí nu rácanaha.<sup>8</sup> Pablo nna unnettebabí rábi cana:

—Neti nna lägabi chi bexxía leni ca ley guetu-na, niguaba leni yotuha lhe niguaba leni César nu rinnabia lo yu gue Roma lhe.

<sup>9</sup> Ttiaca cumu Festo nna rdacana eya'antseena leni ca benni Israel, nuarca unnaba tisana Pablo rána bi'iniha:

—¿Si guadúlu tsialu Jerusalén qui nía liba unia elha uxtisi guelu?

<sup>10</sup> Pablo nna becabittebabi rábi na:

—Inqui niba chi dua lo ttu ca nu rinnabia gue César atta dica aca elha uxtisi quia nna cumu anca benni Roma. Cuinalu nna gua yuxebalu neti nna lägabi chi benia ni ttu nu bittu anca tsee len ca benni Israel.<sup>11</sup> Gansi neti chi bexxía o benia ttu nu ralha gattia nna lägabi dhu disa neti gattia. Ttiaca gansi bittuba lí nu run ca unná xiyya quia nna läganu te innabiana qui etea las ná ca unná. Nnanna nna innába lo cuinalu: “Bette neti atta do César, unnuá liba unna elha uxtisi quia.”

<sup>12</sup> Festo nna unnaba tisattebana ca nu teru elha rieni gueni rise'e cu'eniha bixa anca nu unna. Lenla nna rána Pablo:

—Luba chi unnabalu tsialu satsá dulu lo César. Larcala nna tsiabalu atta do César ganna.

### Pablo betsá dubi lo nu rinnabia te láni Agripa

<sup>13</sup> Guadobana ttu chupa ubisa nna nu rinnabia lána Agripa lenna Berenice nna güiattebacana lhe'e yiesi Cesarea guagüecana Festo ttu padiuxi. <sup>14</sup> Cumu biságala Agripa lenna Berenice nía nuarca utixxi'attebani Festo nua gue Pablo, rán na:

—Asíquirla ni te ttu unbiyyu lisíyya nu bodha'ana Félix atti bedhan ladiniha. <sup>15</sup> Atti güiaya lhe'e yiesi Jerusalén nna ca bixxudi anca nu lona lencana ca nu teru elha rieni gueni gue ca benni Israel nna unnabattebacana len neti innabiaya bixa anca nu sate Pablo-na gue nu rácana dequi chi benna. <sup>16</sup> Ttiaca neti nna becabitteba guecani rpea cana: “Ca uxtisi gue Roma lägabi labi ca unná innabiaca gatti ttu benni gansi bittuba chi betsá du nua lo xueda lenna ca nu rudelha iyyacan na qui ecabina gansi gualí benna nu runcana xiyya gueniha.” <sup>17</sup> Larcala atti bita ca nu Israel-na ni nna neti nna tsa lägabi uleda. Betteyú dila nna bedotteba lo xxila quia lhe'e yo'o lagüi-ni, nianna udhelhatteba ca nu güia gualeacana Pablo. <sup>18</sup> Ttiaca ca nu rudelha iyyacana unná bisía ni nna tsa lägabi rudelhacana cu'e ni niba ttu nu lä anca tsee chi belaba lasia dequi chi benna. <sup>19</sup> Nu rárbacana nna dequi Pablo-na rigu'u ni'ani nu ria lecani, requina rixxi'ana gue ttu unbiyyu lána Jesús chi utti, ttiaca lana nna requina rána dequi gualíba anca banba nua. <sup>20</sup> Neti nna tsaba läga reseltia gaxasná un lania na. Laniala nna unnaba tisa na rpea na: Gansi gua raca leni tsiana lhe'e yiesi Jerusalén qui nía liba aca elha uxtisi gueni. <sup>21</sup> Ttiaca lana nna unnabattebana tsiana satsá duna lo César nu rinnabia xeni do lhe'e yiesi Roma. Nioca nuarcala benia mandadu bodoga'a dacabacan na lhe'e lisíyya-na, axta liba gattitia nna lania liba nna ebeaya na qui idhelha na tsiana atta do César.

<sup>22</sup> Laniala nna rá Agripa:

—Neti lhe racaguuba lasia udo naga gue unbiyyu-na.

Festo nna becabittebana rána:

—Uxxedilaha iyieninlu gueni ganna.

<sup>23</sup> Betteyú dila nna Agripa lenna Berenice nna attulade beocuru xo tsee guecani, tsitsiba xeni ra lecani diacana lhe'e yo'o lagüiha lencana ca nu banquinna ca soldadoha lhe ca nu anca nu lo gue

yiesiha lhe. Festo nna udhelhattebana nu güia guaxxína Pablo.

<sup>24</sup> Nianna unnettebana rána:

—Xa tata Agripa benni anca nu rinnabia, iyábale ca benni se'e lhe'e yo'o lagüi-ni nasá lhe ni du unbiyuu-ni lole. Iyába ca nu Israel-na chi bitacana betteyucana neti rinnabacana gatti unná. Aníaguaba rácana atti güiaya lhe'e yiesi Jerusalén, unnuhaguaba redenáicana Cesarea-ni lhe. Tsaba bittu redí lecani ribesi'acana rinnabacana gatti unná. <sup>25</sup>Ttiaca neti nna lägabi chi guatt'iaya ttu bixa chi beni unná qui ralhana gattina. Lana nna chiguuba unnabana tsiana satsá duna lo César benni anca nu rinnabia xení gue Roma. Neti nna chiba boquinni iquia idhelha na nía. <sup>26</sup>Ttiaca cumu de bittu chi biría lítia gaxasnonna anca gueonna qui anáchu udoa lo sitsi idhelha leni benni rinnabia xení quia, nuarcala guaxxíá na bedúa na lole, lo cuinalu lhe xa tata Agripa, qui anáchu nna dequide itsatsa ni'ale gueni nna chi yua bixa udoa lo sitsi. <sup>27</sup>Cumu läga saxxína idhelha ttu nu te lisiyya las ná attu nu subi nianna bittu quixxi'aya bixa lo ni'a gue ruelha iyyacan na.

### Pablo rixxi'abi nu chi guatebi lo nu rinnabia te láni Agripa

**26** Laniala nna rá Agripa Pablo:

—Guacaba innelu qui quixxi'alu bixa benlu.

Pablo nna ulidhatteba nábi lo nu rinnabia te láni Agripa:

<sup>2</sup>—Tsapaba re'o lasia nasá de rinne lania cuinalu, xa tata Agripa, benni rinnabia, qui ecabia gue iyába nu run ca nu Israel-na xiyya quia dequi benia, <sup>3</sup>cumu cuinalu nna gua yuxebalu gue iyába nu labitu runtu ri'itu ca benni Israel, gue nu ritilha tisatu-ni lhe. Larcala rinnaba leni cuinalu udo besiba nagalu quia.

<sup>4</sup>Iyába ca benni Israel-na gua yuxebacana gaxasná benia desdeba atti anca uncuiti, tantuba lhe'e yiesi quia lhe lhe'e yiesi Jerusalén lhe. <sup>5</sup>Ca unná nna axta ttuali chi anca biaquinna neti. Larcala gansi raca lecani nna guacaba quixxi'acana gue nuxa anca. Neti nna anca ttu benni fariseo, chi selo len ca benni ca nu tsitsiba runi dho tisa gue nu ria letu, gue nu dia lo ca ley guetu-na lhe.

<sup>6</sup>Nnanna nna dua lhe'e yo'o lagüi-ni raca elha uxtisi quia de xen lasia gue ca tisa chi begüee Tata Do Iyyabaaha leni ca benniola guetuha. <sup>7</sup>Iyába tsil'inu (12) xxiatu ri'itu ca benni datíatu bi'ini lá Israel xen letu gue nua, nuarcala rela resába satíaba ribequi xentu Tata Do Iyyabaaha, laca ribedatu isía sá aca nua. La lo ni'a

gue unnuha bunni bettelu'u ca nu Israel-na neti lo uxtisi, xa tata Agripa.<sup>8</sup> Lebi'i nna ¿biaca rulaba lele dequi bittu aca gue Tata Do Iyyabaaha unie eyacani ca nu yatti-na?

<sup>9</sup>'Neti nna ucatia ca tu ttuha dequi tseeba anca bicala udhaca ca benni ria le Jesús Benni Nazaret.<sup>10</sup> Aníaba benia lhe'e yiesi Jerusalén: ixe ca benni ria le Jesús bedheaya lhe'e lisiyya cumu chi bete ca bixxudi anca nu lo-na lisensi len neti. Atti rutticana ca bi'iniha nna neti nna rpetteba cana dequi tseeba anca nu runcana.<sup>11</sup> Ixe libe güiaya guadhaca si'acabi lhe'e ca yo'o atta rudhetitu ca tisa gue Tata Do Iyyabaaha. Neti nna bedhaca disa cabi qui quecabí iqui Jesús. Cumu de chi biláxxatta lasia nna axtaba lhe'e ca yiesi dittu güiaya guanoa ca bi'iniha.

<sup>12</sup>'Lacabi nua denalha diaya daca lhe'e yiesi Damasco leni sitsi bete ca bixxudi anca nu lo-na len neti atta rutecana lisensi quia unia attiba racaba lasia.<sup>13</sup> Ttiaca atti yu'a neda diaya, xa tata Agripa, attiba tu retin ts'i'inu (12) resá lhaba bilátia ttu xieni daa iyyabaaha, rigu'urle xieni atti tatubisa-na, uyu'e sabi'aba atta diaya lenia ca nu dia lania.<sup>14</sup> Dequide chi ubixxi lo iyábatu lo yu nna nianna bienttebatia ttu ts'i'i unnee tisa hebreo re neti: "Saulo, Saulo, ¿biaca neti denalhalu rudhaca si'ilu? Ttiaca la luba rila guelu runlu aná attiba ttu nu la labana ruse'e ni'ani lo tu clavu."<sup>15</sup> Laniala nna atti unnaba tise rpe: "¿Nú leonna tata?" Lee nna becabittebe re: "Neti nua Jesús gue Nazaret, Benni denalhalu rudhaca si'ilha.<sup>16</sup> ¡Nnanna nna beadha udú ra! Denuala nna chi bele'e loa lenlu qui unlu sina quia, qui acalu benni quixxi'alu gue nu chi biyú lolu nnanna lhe gue nu chi daba uyú lolu unia lhe.<sup>17</sup> Neti nna godilába lu lo ná ca benni Israel-na, lo ná ca benni dittu-na lhe. Atta se'e ca nu dittu-na idhelha lu tsialu.<sup>18</sup> Lu nna idhalhu locani qui ttedaaquinna uncana nu anca tsee, qui bitturu uncana nu lä anca tsee. Análiba nna eríacana lo ná nu xxegüiha qui odaxxucana neda gue Tata Do Iyyabaahaba. De tsia lecani neti nna dhia elha xen lasi gue ca tulha guecani chi bencana, dhíguabacana nu tsee chi ga'ana dhi ca benni chi ulequiesi Tata Do Iyyabaaha anca guee lhe."

<sup>19</sup>'Larcala nna xa Tata Agripa, benni rinnabia, bedoba tisa gue Benni unnee iyyabaaha belise neti.<sup>20</sup> Nuarcala nna udulotteba utixxi'atia ca benni se'e lhe'e yiesi Damasco. Lenla nna utixxi'atia ca benni se'e lhe'e yiesi Jerusalén lhe itúba daca lo yu te láni Judea lhe. Aníaguaba benia len ca benni dittu lhe. Iyába ca benni rixxi'atia

cana odú xiyyanca qui odaxxucana neda gue Tata Do Iyyabaaha, lacana nna dhulocana uncana nu anca tsee qui anáchu ule'e lo gualí chi bodú xiyyanca gue nu lä anca tsee chi bencana.<sup>21</sup> Lo ni'a gue unnuhaba unná bedaxxu ca benni Israel-na neti ro'o yotuha, atti uxacattebacana utticana neti.<sup>22</sup> Ttiaca Tata Do Iyyabaaha nna gua racaba lanie neti axta nnanna larcala gua requirba rixxi'aya ca tisa gue Jesús leni iyáxeaba ca benni, nu ra xenba leni lhe nu lä ra xenba leni lhe. Neti nna ni ttu libe bittu chi utixxi'aya ni ttu tisa nu bittu unnee ca profetaha, nu unne Moisés lhe. Cumu ca bi'iniha lí chi utixxi'acabi rácabi:<sup>23</sup> “Cristuha nna labíaba gattie. Bennihaba Benni primerba eyacani ería lhe'e baa atta yu'u ca nu yatti-na, qui quixxi'anie ca benni guee anca benni Israel-na lhe ca benni dittu-na lhe ca tisa anca attiba xieni gue gasná odile cana.”

<sup>24</sup> Lagüiba du Pablo rinnebi rábi anía recabibi gue nu runcana xiyya guebi nna unnetteba Festo bendisana rána:

—¡Iquibalu raca, Pablo! ¡De rudhetixxattabalu nu rá lo ca sitsi-na nuarca chi richixxi lelu!

<sup>25</sup> Pablo nna becabittebabi rábi na:

—Lägabi raca iqui neti, xa tata Festo. Nu anca lhixxaba rixxi'aya, iyába ca tisa rinnea-ni nna ancacana nu gualí.<sup>26</sup> Naba do tata Agripa benni rinnabia-na. Gua yuxebabi gualíba nu ria-ni, denuala nna itú iqui itú lasia rinnea aníba lobi. Neti nna yuxeba labi nna gua yubabi iyába nu rinnea-ni, cumu läga atta gatsi uca nu ria-ni.<sup>27</sup> Tata Agripa, ¿si gua ria lelu gue nu unne ca benni uca profeta gue Tata Do Iyyabaaha? Neti nna gua yuba cuinalu nna gua riaba lelu.

<sup>28</sup> Agripa nna becabittebana rána:

—Ganna la a saro'otte událu tsia lasia guelu aca ttu benni tsia le Cristuha.

<sup>29</sup> Pablo nna ráttebabí na:

—Locaba acani Tata Do Iyyabaaha si isáru lhe o lätterba isá lhe ladiba itupa lenlu iyá ca benni bienini se'e-ni tsia lele qui acale attiba neti, ttiaca läga ria le aní uxxicacana nále atti xica ca náya-ni leni cadena.

<sup>30</sup> Laniala nna bedulí Agripa lenna Festo lhe Berenice lhe adírba ca nu sia lencana nía lhe.<sup>31</sup> Dequide chi beríacana nía diacana attu atta subi nna rátteba loescani:

—Unbiyuu-na nna lägabi chi beni unná ttu nu udelhiyyan na qui gattina, niguuba gattana lisiyya lhe.

<sup>32</sup> Agripa nna ráttebana Festo:

—Gua dicaba odilári unná ttirca bittuba chi unnabana tsiana aca elha uxtisi gueni lo César.

### Pablo yu'ubi neda diabi lhe'e yiesi Roma

**27** Atti chi boquinna iquicani idhelhacana ri'itu lo yu gue Italia, laniala nna botecana Pablo lenbi adí ca nu te lisiyyaha las ná ttu nu banani ca soldado te láni Julio. Ca nua nua te lácani: ca soldado gue nu rinnabia do Roma. <sup>2</sup>Laniala nna gopitu lo ttu barco gue yiesi nu te láni Adramitio. Unnuha nua chi du tseena ro'o indattoo gue yiesi Cesarea qui tsiana daca ro'o ca yiesi se'e ro'o indattoo gue lo yu gue Asia. Níaguaba daa Aristarco len ri'itu. Bi'iniha nua beaca lasibi yiesi Tesalónica nu re lo yu te láni Macedonia. <sup>3</sup>Betteyú sá nna bisínttebatu ro'o indattoo re ro'o yiesi Sidón. Julio nna tseeba bedú leni leni Pablo, begüeelhabana bi'iniha guannalhibi ca benni se'e tsee lenbi se'e nía qui betecabi nu reasinbi. <sup>4</sup>Biríabatu ro'o yiesi Sidón nna diattebatu. Ttiaca cumu ru'uxxatta be lo barcoha nna nioca bosía lotu daca atta re be cu'e lo yu gue Chipre re lagüi indattooha cumu de daxxatta be deca atta diatuha. <sup>5</sup>Dequide utetu lo indattoo re gaxxaba daca ro'o yu gue Cilicia len Panfilia nna bisínttebatu ro'o yiesi te láni Mira nu re ro'o indattoo baba lo yu gue Licia.

<sup>6</sup>Nu banani ca soldado checana ri'ituha nna guatti'attebana ttu barco nu beaca gue yiesi te láni Alejandría du nía. Unnuha nna diana daca lo yu gue Italia. Nianna belhopittebana ri'itu lo nua, atti diattebatu attu libe. <sup>7</sup>Ixe ubisa uyu'utu neda lo indattooha cumu de dia besi barcoha. Chibuca udátu utetu ro'o yiesi nu te láni Gnido. Ttiaca cumu de daxxatta be daca atta diatuha nna nuarca bodaxxutteba barcoha daca ro'o yu te láni Salmón, cumu níarba gua re be. Níala guatseequina daca cu'e lo yu gue Creta re lagüi indattooha. <sup>8</sup>Sa ro'o indattoo gue lo yu gue Cretaba diatu. Chibuca bisíntu ttu atta do risin ca barco. Atta bisíntuha nna te láni Ca Puerto Tsee, rena gaxxaba atta re yiesi te láni Lasea.

<sup>9</sup>Cumu chigalá bisá yu'u barcoha neda lo indattoo, nuarca ttu níarba requitu nna chi ute ca sá atti rutte ubina lhe'e ca benni Israel, chiguaba bisía ca beo atti racaxxatta iyya be lhe. Larcala chi ruxunnina guetu bixa satetu ganna si ttu tsiabatu leni barcoha lo

indattooha. Laniala nna utixxi'ani Pablo ca benni daa lo barcoha rábi cana:

<sup>10</sup>—Xa tata, neti nna ritedaatia dequi yalha nu sateri gansi ttuna diabari, cumu chi ruxunnina udelha lattiri ca yua-ni lhe barco-ni lhe anáguaba ri'i lhe ruxunniguana gueri gattiri.

<sup>11</sup> Ttiaca nu banani ca soldado dia lentuha nna bedorla nagani gue nu rudhana barcoha lhe gue nu beaca gueni nua lhe attichula gue nu rá Pablo. <sup>12</sup> Cumu atta se'etuha nna lägabi ttega tsee anca nía qui eya'antu cuedatu tte iyya beha, anía uca nna nuarcala attiba la iyába ca nu daa lhe'e barcoha boquinna iquicani usigubatu tsiatu, qui nicaga guasinbatu ro'o yiesi Fenice nu re lo yu gue Creta. Unnuha nna rena daca sudoeste leni noroeste, cumu nía anca ttu atta risin ca barco qui tse'etu cuedatu laca tte ca beo che iyya be.

**Nu guate Pablo yu'ubi neda diabi  
Roma atti uca iyya be lo indattooha**

<sup>13</sup> Lacana nna ucaquinna dequi guacaba usiguitu tsiatu de chi biría ttu be lhadhigaba daa daca sur. Nuarcala nna belhopittebacana iyya idí'i nu runna ribeda barcoha, atti biríattebatu sa ro'o indattoo gue lo yu gue Cretaba diatu. <sup>14</sup> Ttiaca locarba bi bisá attirba chi biría ttu iyya be idí te láni Nordeste. Unnuha nna uyu'uttebana lo barcoha, <sup>15</sup> atti bennertteba loni nua. Ca nu rudhá barcoha nna lärga udáicana tsia nua daca atta daa iyya beha, nuarca begüeelha chibacana uchena nua. <sup>16</sup> Aníaba che beha ri'itu betetu sa cu'eba ttu lo yu güexxa re lagüi indattooha lána Claudia. Nía liba nna lätterba be raca. Lania liba nna chibuca udá ca nu banani barcoha belhopicana chalupa na'aya barcoha lo nua. <sup>17</sup> Dequide chi belhopicana chalupaha lo barcoha nna bexxicattebacana ca tuu sabi'aba barcoha qui bittu iseloxxi nua. Nianna belhidattebacana ca lari daa iqui nua cumu rasquinna qui lä inipa nua ca belhucu yuxi te láni Sirte re lhe'e indattooha, atti begüeelhattebacana u'uya beha barcoha. <sup>18</sup> Cumu de adíla idí raca iyya beha nna nuarca betteyú sá nna udulottebacana bedelhacana ca yua sia lo barcoha lhe'e indattooha. <sup>19</sup> Atti beyonna ubisaha nna bodidaxxuttebacana ca lorsina barcoha bedegu'unacana. <sup>20</sup> Ixe ubisa chi uca bittu rule'e lo tatubisa-na, niguuba ca beli-na lhe. Cumu de adílabo de idí chi bisía iyya beha nna larcala ri'itu nna tsaba chi ruxxen letu dequi gattibatu.

<sup>21</sup> Ttiaca cumu ixe bisa chi uca bittu yetta chi utotu, laniala nna udulí Pablo udúbi salhe gue iyába ca nu sia lo barcoha, nianna rábi cana:

—Nala gualyú, xa tata se'e-na, bedo yuba nagale quia bittu biríari lo yu te láni Creta. Ttirca bienbinle nna lägabi dia latti ca yuha noja barco-ni, bittuguaba elha disa ruyúri lhe. <sup>22</sup> Ttiaca nnanna nna rpeale: ¡Bittu gasinle! ¡Tsitsi gualebequi lele! ¡Läga gattile! Suntteba barco-ni ise'e lona. <sup>23</sup> Cumu bisíala ucaxxe ttu ingeli gue Tata Do Iyyabaaha, Benni bananie neti lhe rixuunie neti lhe <sup>24</sup> nianna re neti: “Bittu gasinlu, Pablo, cumu labíaba satsá dulu lo César nu rinnabia do lhe'e yiesi Roma. Larcala de lurba nna iyába ca nu daa lenlu lhe'e barco-na gualábacana bittu gatticana.” <sup>25</sup> Larcala, xa benni se'e-ni, tsitsi gualebequi lele cumu neti nna ruxxenba lasia gue nu rá Tata Do Iyyabaaha, unba Benna nu chi rá ingeli unne lanie netiha. <sup>26</sup> Ttiaca barco-ni nna labíaba satságana ro'o ttu yu re lagüi indattoo-ni.

<sup>27</sup> La ulha atti guadona stobisa chi na'aya iyya beha barcoha nna níaba diatu lo indattoo te láni Adriático. Attiba tu retin tsil'inu (12) lo rela nna utedaani ca nu riben sina lo barcoha dequi chi deoba isíntu atta anca yu. <sup>28</sup> Laniala nna berixxi biacana attixarua lhi'u re indattooha, a rerua yu'u xxupa (36) metroba re indaha nía. A saro'ogarba udátu leni barcoha nna atti bodorixxibiattebacana attu libe. Lania nna a sunruba gasierua (27) metro re indaha nía. <sup>29</sup> De rasbaquinna qui lä inipa barcoha iqui ca iyya sia lhe'e indattooha nna nuarca ulhidattebacana ttapa ca iyya id'i daca xani'a nua qui ucuedacana nua. Laca rinnabacana leni Tata Do Iyyabaaha qui yuba tsani. <sup>30</sup> Ttiaca ca nu riben sina lo barcoha nna chi runcana chadi sigácana lo nua, larcala chi ulhídacana chalupaha. Lacana nna ocadiba runcana dequi ugahacana ca iyya ca nu runcana ribeda barcoha daca lola nua. <sup>31</sup> Ttiaca Pablo nna utixxi'attebinbi nu banani ca soldadoha leni iyába ca soldadoha rábi cana:

—Gansi ca unná bittuba eya'ancana lo barco-ni nna lebi'i nna läga lhále.

<sup>32</sup> Laniala nna uchú ca soldadoha ca tuu nalha chalupaha qui ubinni nua lhe'e indattooha.

<sup>33</sup> Atti chi daa tsaniha nna rátteba Pablo iyába ca nu daa lhe'e barcoha chinca gocana yetta. Nianna rábi cana:

—Chi uca stobisa bittu chi utole yetta cumu de rulaba lele gue bixa sateri.<sup>34</sup> Nnanna nna rinnaba lole, gualgo yetta gansi gua rdacale lhále. Cumu neti yua nna läga gattiri, ni ttu itsiquile-na lägabi dhaca.

<sup>35</sup> Dequide la unne Pablo nna bedaxxuttebabí ttu ttaxtila atti begüeettababí xquixaru leni Tata Do Iyyabaaha aníba lo iyába ca nu sia lo barcoha. Nianna ulha'attebabí ttaxtilaha utobi.<sup>36</sup> Laniala nna bebequi tsitsi lecani atti utotteba iyábacana ttaxtila.<sup>37</sup> Delo iyátu nna chupa gayua yu'u gayuna yu'u xxupa (276) benni nua sia lo barcoha.<sup>38</sup> Dequide chi uluxa utocana bedaa belbaquinna bedelhattebacana ca cutensi xuxtilaha lhe'e indattooha qui goatsi di'i gue barcoha.

<sup>39</sup> Atti chi guaniha nna läga beaca bien ca nu riben sina lo barcoha gaxa nua se'etu, sunruba ro'o ttu belhucu yuxi gue ttu lo latsi riláquinna. Laniala nna boquinna iquicani uncana duelha usigacana barcoha nía.<sup>40</sup> Lacana nna uchúttebacana ca tuu do iqui ca iyya ca nu rucuedacana nua qui binna ca nua lhe'e indattooha, atti udhasittebacana ca yaga ca nu rodequicana barcoha. Laniala nna ulhidhacana ca lari daa iqui nua qui tsu'u be lhe'ecani. Unnuha nna udulottebana ubigana ro'o yu te lagüi indattooha.<sup>41</sup> Ttiaca merba lhe'e ttu belhucu yuxi xua lhe'e indaha bisín nua. Tsaba uxudi xin nua lhe'e yuxiha. Laca daca cu'e nua nna diana riyuyana cumu de rettetsu'uba inda nu ridulí lo indattooha idí cu'e-ni.<sup>42</sup> Ca soldadoha nna uxacattebacana utticana ca nu te lisiyya checanaha qui bittu uxunnicana dequide chi beríacana lhe'e indaha.<sup>43</sup> Ttiaca nu banani ca soldadoha nna de odilána Pablo nna nuarca bittu begüeelhana utticana ca nua. Benlana mandadu rán ca nua:

—Ca benni gua racaba guecani utácana lo indaha nna lo ca unnuha chadhicana xxuacana lo indaha qui eríacana esíncana atta chi anca yu.<sup>44</sup> Atta bittuba raca guecani utácana lo indaha nna leni ca yaga o breta salha'a gue barcohoba exúacana loni qui aca eríacana lo indattooha. Anía liba nna ulátu, iyábatu lhatsirba beríatu besintu atta chi te yu.

### Nu guate Pablo lo yu re lagüi indattoo te láni Malta

**28** Dequide chi ulá iyábatu lo indattooha nna laniala binatu,  
lo yu re lagüi indattoo atta bisíntuha nna te láni Malta.<sup>2</sup> Ca benni beaca lascani nía nna tseeba biyúcana ri'itu. Cumu yalhagala

raca iyya lhe racaxxatta idilha lhe nuarca beontteba ca nua ttu cue gui, atti uxttebacana iyábatu qui botsa'atu ro'o te.<sup>3</sup> Pablo nna bettupattebabu ttu chupa yaga bisi, qui cuia lo guiha. Ttiaca atti diabi udelhabi yagaha lo guiha nna utá ttu belha yu'u lhe'e nua gui, atti xeaba bería nua utoya'ana nábi.<sup>4</sup> Atti biláni ca benni gue nía belhaha nalhana yien ná Pablo nna rátteba loescani:

—Nu runi elhuttiba unbiyuu du-ni. Nuarca masquiba ulána bittu uttina lo indattoo-na, diosi runi elha uxtisi gueri-ni nna läga utee bala'ana dhorna yies lo yu-ni.

<sup>5</sup> Ttiaca Pablo nna becuibitteba nábi qui ubinna belhaha lo guiha. Labi nna tsa lägabi uxacabi.<sup>6</sup> Iyába ca benni se'e nía ribedacana iláquinna tsu'u gui nábi o ttu nnelaba ibixxi lobi gattibi lhe. Dequide chi uca isá se'ecana ribedacana bixa aca, bilábaquinna bittubabi uxaca Pablo nna laniala bodilába lecani redenácana: “Gaxxa diosiba anca bi'in-ni.”

<sup>7</sup> Gaxxaba nía se'e ca lo yu gue ttu unbiyuu lábi Publio, ancabi nu rinnabia lo yu te láni Malta. Labi nna uxbi ri'itu lhe'e yo'o guebiha, nianna tseeba biyúbi ri'itu tsunna ubisa.<sup>8</sup> La laniaguuba nua te tata gue bi'iniha lo ta'a ranina yu'una xxilhá, ruchú ya'ana lhe'eni lhe. Pablo nna uta'attebabu atta te benni raniha. Dequide unnebi leni Tata Do Iyyabaaha nna bexxúatteba nábi iquini. Benni raniha nna beacattebana.<sup>9</sup> Atti chi bina adí ca benni rani se'e nía gue nu ucaha nna güiattebacana atta do Pablo. Ca unnuha nna iyábacana beacacana.<sup>10</sup> Attulade tsee biyú ca benni se'e nía ri'itu. Atti chi deoba edátu nna betettebacana iyába nureasintu gue neda guetu.

### Pablo bisinbi lhe'e yiesi Roma

<sup>11</sup> Dequide chi uca tsunna beo se'etu lo yu gue Malta nna laniala beopitu lo ttu barco gue yiesi Alejandría nu bisiana udúna nía itúttuba atti raca iyya beha. Unnuha nua sia xinni ca diosi cuachi te lácani Cástor nna Pólux nna.<sup>12</sup> Atti bisíntu atta risin ca barco ro'o yiesi te láni Siracusa nna níaba bisátu tsunna ubisa.<sup>13</sup> Nía udulo barcoha diana sa ro'o indattoohaba ni bisínbatu ro'o yiesi Regio. Betteyú dila nna biríatteba be daca sur, larcala a chupa sába nna chi bisíntu ro'o yiesi nu te láni Puteoli.<sup>14</sup> Nía beti'atu ttu chupa ca benni ria le Jesús. Ca bi'iniha nna bechecabi ri'itu be'antu ttu xmanu liscabiha. Anía liba nna chibuca bisíntu lhe'e yiesi Roma.<sup>15</sup> Ca benni ria le Jesús se'e lhe'e yiesi Roma nna atti chi binacabi

guetu nna biríattecababi dacabi betteledacabi ri'itu, axtaba atta te láni Foro Gue Apio. Adícabi nna bisíacabi bedaa atta te láni Tsunna Ca Taberna. Atti biláni Pablo ca bi'iniha se'ecabi nía nna begüeettebabí Tata Do Iyyabaaha xquixarue, laniala bebequi tsitsi lebi.<sup>16</sup> Atti bisíntu lhe'e yiesi Roma nna nu banani ca soldadoha nna betena iyába ca nu te lisiyya cheenaha las ná nu lo gue ca soldado gue Roma. Pablo nna begüeelhabacana bi'iniha udobi yabalebi lhe'e attu yo'o subi, a ttuba ttu soldado udonia upan bi.

### **Pablo riguixxi'abi ca tisa gue tata Jesús lhe'e yiesi Roma**

<sup>17</sup> Dequide guadona tsunna ubisa se'etu nía nna uxitteba Pablo ca benni anca nu lo gue ca benni Israel se'e lhe'e yiesi Roma. Atti chi bisía ca nua atta dobiha nna ráttebabí ca nua:

—Xa betsito, neti nna lägabi chi bedhacatia ca benni gueriha, niguaba lä rigu'u ni'aya nu bele'eni ca benniola gueriha ri lhe. Delo nna bedaxxu ca benni gueri-na neti lhe'e yiesi Jerusalén, nianna betecana neti las ná ca benni gue Roma-ni se'e nía.<sup>18</sup> Ca unnuha nna dequide chi utsatsa ni'acani quia nna uxacattebacana ulhácana neti cumu läga guati'acana bixa benia nu dica ralha gattia.<sup>19</sup> Ttiaca ca benni Israel nna läga uxielhacana. Anioca nna unnaba utecana neti lo ná César nu rinnabia do lhe'e yiesi Roma-ni, qui unna elha uxtisi quia. Lo ni'a gue unnuha bunni larca dua-ni, läga de re lasia udelha iyya ca benni gueri anca benni Israel.<sup>20</sup> Larcala nna uxia cuinale qui inne lania le, qui unbia loesri lhe. Neti nna lo ni'a gue de xenba lasia gue nu xen leri ri'i ca benni Israel, nuarca dua ni xica ca náya-ni leni cadena.

<sup>21</sup> Ca unnuha nna ráttebacan bi:

—Ri'itu nna lägabi sitsi gue ca benni se'e lo yu gue Judea chi uxítu nu rinne loni guelu, niguaba ca benni Israel daa nía lhe lägabi chi utixxi'aquinna ri'itu dequi requilu bixa runlu, bittuguaba rinne güecana guelu lhe.<sup>22</sup> Ttiaca ri'itu nna raca letu udo nagatu bixa innálú cumu lhe'e iyába ca yiesi-na rigu'u ni'acani ca benni sela len lu chi bedaxxu neda gue Jesús.

<sup>23</sup> Nioca nna bedúcana ttu sá qui tsiacana sanne lencana Pablo lhe'e yo'o atta dobiha. La sá nna güiatteba ixeru ca benni. Dilatte udulobi, ni ulhaba sá dubabi rixxi'enbi ca nua gue gaxasná rinnabia Tata Do Iyyabaaha. Labi nna rudaxxu ni'abi nu rá lo ca ley boca'ana Moisés, nu rá lo ca sitsi bodha'ana ca benni uca profetaha lhe

duelhaba run Pablo qui tsia le ca benni se'e nía Jesús.<sup>24</sup> Ttu chupa ca benni nna güiaba lecani gue nu rá Pablo, ttiaca adícana nna läga güia lecani.<sup>25</sup> Cumu de bittu ttudi rulaba lecani gue nu rá Pablo, nuarca udulottebacana bencana eyyacana. Laniala nna atti rá Pablo cana:

—Gualíba nu rá Espíritu gue Tata Do Iyyabaaha profeta Isaías nu utixxi'enbi ca benni uca benniola gueriha. Espírituha nna re bi'iniha:

<sup>26</sup> Güia atta se'e ca benni se'e-na, lu nna gus cana:

“Masquiba tticaxa rudo nagale,  
ttiaca bittu sadú lele,  
masquiba tticaxa ugüiale,  
ttiaca läga ilenle.

<sup>27</sup> Cumu lastoo ca unná nna chiba beacana tsitsi attiba ttu iyya.

Ca nagaquinna nna attisiba tsaba tocana,  
ca iyya loquinna nna attisiba yayabacana.

Aná nna qui bittu iláquinna  
niguaba lä iyienquinna lhe  
lä ttedaaguubaquinna lhe  
qui bittu eyequicana odaxxucana neda quia-na  
neti nna eyonia cana.”<sup>a</sup>

<sup>28</sup> Nnanna nna raca lasia una le:

—Atta se'e ca benni dittu-naba tsiatu sattixxi'entu cana ca tisa rixxi'a gue gaxasná rodilá Tata Do Iyyabaaha ca benni qui bittu tsia nitticana, cumu ca unná nna gudoba nagacani gue nu quixxi'entu cana.

<sup>29</sup> [Atti rá Pablo anía nna güequitteba ca nu Israel, tsitsiba chi ritilha tisa len loescani deyyacana.]

<sup>30</sup> Gua doxeabana chupa ida udo Pablo lhe'e yo'o unnaba gannabiha. Níaba risina iyába ca benni ria ranalhican bi'iniha.

<sup>31</sup> Labi nna itú iqui itú lebi rixxi'abi gue gaxasná rinnabia Tata Do Iyyabaaha, rixxi'abi gue Jesucristu Benni bananie ri-na lhe. Tsa läganu biría usuna.

---

<sup>a</sup> 28:26-27 Isaías 6:9-10

# Sitsi udhelha Pablo atta se'e ca benni ria le Jesús lhe'e yiesi Roma

**1** Neti, Pablo, anca benni rixuu lo sina gue Jesús Benni anque Cristu. Tata Do Iyyabaaha uxie neti aca apóstol, ulequiesie neti qui tsequia quixxi'aya ca tisa guee,<sup>2</sup> ca tisa-ni nua begune ca benni uca profeta guee atti nía. Ca bi'iniha nna bencabi ca tisa-na lo ca sitsi gue Ben-na.<sup>3</sup> Ca tisa-ni nna rixxi'aque gue Xi'inie Jesucristu Benni bananie ri. Atti bita Benniha yies lo yu-ni uque Benni attiba ri'i, datie David.<sup>4</sup> Espíritu gue Tata Do Iyyabaaha bele'e loe anca Benniha Benni ra xxeni lee, Xi'ini Tata Do Iyyabaaha lhe atti beaquin Benniha berié lhe'e baa atta yu'u ca nu yatti-na.<sup>5</sup> De Jesucristuha nna bedaa le Tata Do Iyyabaaha betee ttu elha tsee len ri'itu acatu apóstol guee, qui tsequitu quixxi'entu iyába ca benni bittu anca benni Israel ca tisa guee, qui anáchu de tsia lecanie nna udocana tisa guee. Iyonni runtu cumu raquintu guee.<sup>6</sup> Anáguba lebi'i lhe selaguale len ca bi'in-ni. Chiguaba uxi Tata Do Iyyabaaha le qui acale benni gue Jesucristu.

**7** Runia lo sitsi-ni ridhelha guele, iyábale ca benni racani Tata Do Iyyabaaha guele se'e lhe'e yiesi Roma-na. Lebi'i nna chi uxie le acale benni se'e riesi chi anca guee. Cuina Tata gueri do iyyabaaha lenie Jesucristu Benni bananie ri edá leque aca lenque le, unque tse'ele xen su lee lhe.

## Tsitsiba nu run Pablo tsabi lhe'e yiesi Roma

**8** Primerba nu runia nna lolaba Jesucristuha rudettia atti rutea xquixaru len Tata Do Iyyabaa quiaha gue iyábale, cumu iyába lhe'e ca yiesi-na chi rixxi'a ca benni lebi'i nna tsitsiba ria lele Jesús.

**9** Tata Do Iyyabaaha, Benni itú iqui itú lasia rixuua lo sina guee rixxi'aya ca tisa gue Xi'inie Jesús, guayuxeabe satíaba rexxa lasia le atti rinnea rulise.<sup>10</sup> Neti nna satíaba rinnaba lo Tata Do Iyyabaaha gansi lee raca lee nna cuina le aca lanie neti qui aca ita etenalhia le.

**11** Cumu neti nna attulade rdaca uyúa le, qui unia le yuda dhíle nu tsee utee Espíritu gue Tata Do Iyyabaaha guele, qui tse'e tsitsi chattile lo neda gue Ben-na.<sup>12</sup> Nu diatia ria-ni nna ancana: qui tulapaba uttipale loesri cumu lebi'i lhe neti lhe ttuba ria leri Jesús.

<sup>13</sup> Ca benni ria le Jesús, neti nna raca lasia unale, ixe libe chi uxaca ita atta se'ele-na, ttiaca axta nnanna bittu chi uca ita cumu ixeba nu bedheana loa. Neti nna rdaca ita atta se'ele-na qui use'a adí benni tsia lecani Jesús, attiba chi bese'a ca benni ria le Ben-na lhe'e adí ca yiesi atta se'e ca benni bittu anca benni Israel. <sup>14</sup> Cumu neti nna daa loa quixxi'aya ca tisa rixxi'a gue Jesús len iyába benni, len ca benni rinne tisa griego lhe len ca benni bittu rinne tisa griego lhe len ca benni te elha rieni guecani lhe len ca benni bittu te elha rieni guecani lhe. <sup>15</sup> Larcala nna anáguaba lebi'i ca benni se'e lhe'e yiesi Roma-na, neti nna tsitsiba chi re lasia quixxi'atia le ca tisa gue Jesús.

<sup>16</sup> Cumu neti nna tsa lägabi rettutia gue ca tisa gue Jesús, cumu ca tisa-na anaque elha ra xxen le gue Tata Do Iyyabaaha. Ca tisa-ni rixunie rodile iyába ca benni ria lecanie, primertteba ca benni Israel-na rodile, rodiláguabe ca benni bittu anca benni Israel-na lhe. <sup>17</sup> Cumu ca tisa gue Jesús rixxi'acanie ri ráque: De tsiaba leri Tata Do Iyyabaaha Benniha nna runie acari benni bitturu tulha gueni te. Acaba attiba dia lo ca sitsi gue Ben-na atta rá: “Benni runi nu anca tseeha nna de tsiaba le nua Tata Do Iyyabaaha nuarca aca banna ttu dia lii lo Ben-na.”<sup>a</sup>

### Tata Do Iyyabaaha utee elha disa gue ca benni runi nu lä anca tsee

<sup>18</sup> Cumu iyyabaaha li acaxxe elha disa utee Tata Do Iyyabaaha gue ca nu lä duta leni runi nu lä anca tsee-na. Nu lä anca tsee runi ca unná nna rudheana lo benni qui bittu tsia lecani gue nu anca gualí. <sup>19</sup> Lacana nna chiba biláquinna nu rule'e lo gualíba do Tata Do Iyyabaaha, cuinaba Ben-na chi benie biláquinna unnuha. <sup>20</sup> Cumu nu bittu rilen benni gaxasná anca Tata Do Iyyabaaha, chi yuri-na atti rilenri iyába nu benie, larcala atti ure yies lo yu-niha li chi rilenri Benniha anque Dios lhe Benni ra xxeni leni lhe. Larcala nna bittu te ro'o ca nu runi nu lä anca tsee-na innávana dequi bittu yucana gue Tata Do Iyyabaaha. <sup>21</sup> Lacana nna masquiba chi yucana do Ben-na, läga rapacana Ben-na respeto atti dica gapacane respeto de anque Dios, lä ruteguabacana xquixaru len Ben-na lhe. Delába unnuha nna gue nu lä dica ixuula rulaba lecani, larcala nna beacacana nu diti chulha leni. <sup>22</sup> Masquiba lacana rá dequi

---

<sup>a</sup> 1:17 Habacuc 2:4

ancacana nu te elha rieni gueni, ttiaca nu dití lä caa elha rieni  
gueniba beacacana.

<sup>23</sup>Lacana nna bitturu ulequi xencana Tata Do Iyyabaaha Benni  
bittu re elhutti guee, Benni ru'u xieni ga'ana tsee guee lhe.  
Benlacana ca nu bittu gualí anca diosi anca attiba anca ca benni re  
elhutti gueni, ca nu anca atti anca ca nimala sia xxilaquinna lhe ca  
nu anca atti anca ca belha ra'aya lhe'equinna lhe ca nu anca atti  
anca ca nimala sia ttapa ni'a nácani lhe. Lo ca unnná la bedú xibicani.

<sup>24</sup>Lo ni'a gue unnuha nna bedhá iqui Tata Do Iyyabaaha cana,  
tsaba begüeelhe cana bencana nu satsa ridá lecani. Benba len la loes  
labacana nu runi rettuinri. Tsaba bechucha bettabicana ca cuerpu  
guecani. <sup>25</sup>Lacana nna lugarquiba tsia lecani gue nu anca gualí  
anca gue Tata Do Iyyabaaha, gue nu bittu anca gualíla ria lecani. Ca  
nu beni Tata Do Iyyabaaha se'e yies lo yu-ni la rapacana respeto,  
rudú xibicani locani lhe attichula Tata Do Iyyabaaha, Benni beni  
iyácea. ¡Lee anque Benni ralhe cuequi xenri lee ttu dia lii! Amén.

<sup>26</sup>Denua nna bedhá iqui Tata Do Iyyabaaha cana, begüeelhe  
cana bencana nu satsa ridá lecani nu runi rettuin benni. Axtaba ca  
nuila-na bitturu risávana ca unbiyuu guequinna, len la loes nulaba  
cani risá loescani, runcana nu bittu ga'ana uncana. <sup>27</sup>Anáguaba  
ca unbiyuu-na, bedhanguabacana risávana ca nuila guequinna  
attiba chi ga'ana uncana. Ritenicana de ridá lecani uni len loesi la  
unbiyuuba cana nu satsa re lecani uncana. La len loesi unbiyuuba  
cani runcana nu runi rettuin benni. Denua nna ratecana ruyúcana  
elha disa ralhacana dhicana de bencana nu lä anca tsee.

<sup>28</sup>Cumu de boquinna iquicani bittu raca duelha etábiquinna  
Tata Do Iyyabaaha, de tua nna bedhá iquie cana begüeelhe cana  
belaba lecani gue nu lä dica ixuu, qui bencana nu satsa bittu dica  
uncana. <sup>29</sup>Lacana nna iyáloba nu lä anca tsee do lecani runcana,

[risávana nu subi subiba lhe]

lä duta lecani lhe

ridáxxatta lecani gatta guecani lhe

rudhaca güecana benni lhe

ancacana nu rutía dixxatta lecani lhe

ancacana nu rutti benni lhe

ancacana nu rila elha utilha lhe

ancacana nu run leni lhe

<sup>30</sup>[ancacana nu rinne satsa lhe]

ancacana nu rinne güe gue benni lhe  
 ancacana nu bittu raca uyú Tata Do Iyyabaaha lhe  
 ancacana nu rudhaca disacana benni lhe  
 ancacana nu yopini la labacana lhe  
 ancacana nu ttaba lhe  
 ancacana nu rotsi'nu leni runicana nu lä anca tsee lhe  
 ancacana nu bittu rudo tisa gue ca tata nan guecani lhe  
<sup>31</sup> ancacana nu ditu bittu rienini lhe  
 ancacana nu bittu run nu rinnecana lhe  
 ancacana nu bittu racani, gue niba ttu benni lhe  
 ancacana nu bittu ridí elha xen lasi lhe  
 ancacana nu bittu ratúa leni lhe.

<sup>32</sup> Ca unní nna gua yuxebacana gue nu chi rá Tata Do Iyyabaaha.  
 Lee nna re, ca nu runi aná nna ralhabacana gatticana. Ttiaca lacana  
 nna läga sunru rusiguicana runcana aná, sinuqui re'o lecani gue adí  
 ca nu runi loesi nu runcan-na.

### Tata Do Iyyabaaha unie elha uxtisi gue ca benni ttulapaba

**2** Larcala lu nna nuxaba ancalu, tsa lägabi ro'olu te innálu  
 dequi bittubi runlu. Lu nna atti rудelha iyyalu ttu benni, la  
 luba nua runlu racalu nu te tulha gueni, cumu la loesi nu runi nu  
 rудelha iyyalu haguuba runlu. <sup>2</sup> Ri'i nna gua yubari, runba Tata Do  
 Iyyabaaha elha uxtisi gue ca benni attiba raxxíbana anca lixxa gue  
 ca nu runie aná. <sup>3</sup> Lu nu rудelha iyyalu ca benni runi nu lä anca  
 tsee-na, ttia la loes nu run ca unna guaba runlu, tsa bittu uxten  
 lelu lhálu lo elha disa utee Tata Do Iyyabaaha. <sup>4</sup> Atti runlu aná nna  
 rigu'uba ni'alu nu tsee redá le Tata Do Iyyabaaha unie len lu, Ben-na  
 anque Benni tsee lhe Benni pasensi lhe Benni bittu risa'axxini lhe  
 denuala nna bittu chi betee elha disa guelu. Lu nna bittu ritedeenlu,  
 iyába ca nu tsee run Ben-na lenlu nna runie cana qui oduxiyyanlu  
 odaxxulu neda guee. <sup>5</sup> Ttiaca lu nna de ancalu ttu nu ditu, bittu  
 rieninlu oduxiyyanlu, ttu diabalu la luba rudianti chietti elha disa  
 guelu nu dhílu atti dhi ca benni elha disa, gansi chi bisía sá acaxxe  
 Tata Do Iyyabaaha qui unie tulapaba elha uxtisi gue ca benni.

<sup>6</sup> Lania utee nu ralha ca benni dhicana gue nu beni coa  
 ttuttucana. <sup>7</sup> Lee nna utee elha nabani gatta ttu dia lii gue ca benni  
 se'e ruchía runi nu anca tsee de ridá lecabí cuequi xen Tata Do  
 Iyyabaaha cabi, cumu raca lecabí acacabi benni iyapa respeto lo

Ben-na lhe benni aca bani ttu dia lii lhe.<sup>8</sup> Ttiaca ca nu rese'e disa lo Ben-na, ca nu bittu rudo tisa gue nu anca gualí, gue nu lä anca tsee la rudocana tisa. Lee nna ugüe cana elha disa lä tsu'ubia cumu risa'anie lencana.<sup>9</sup> Iyába ca benni runi nu lä anca tsee-na tsitsiba nu satecana, uyúcana elha disa lhe. Lola ca benni Israel-na sate aná, anáguaba ca benni bittu anca benni Israel-na lhe.<sup>10</sup> Ttiaca iyába ca benni runi nu anca tsee-na, cuequi xen Tata Do Iyyabaaha cana, unie acacana benni iyapa respeto loe lhe utee elha xen lasi lencana lhe lola ca benni Israel-na daneru, anáguaba ca benni bittu anca benni Israel-na lhe.<sup>11</sup> Cumu ttuba anca iyábari lo Tata Do Iyyabaaha.

<sup>12</sup> Iyába ca benni, bittu te ley bodha'ana Moisés guecani tsia nitti gansi uncana nu bittu anca tsee, masquiba bittu yucana nu rá lo ca ley-na. Iyába ca benni te ley guecani runi nu bittu anca tsee, cuinaba ca ley-na unque elha uxtisi guecani.<sup>13</sup> Cumu läga ca nu sunruba rudo nagacani nu rá lo ca ley-na anca benni tsee lo Tata Do Iyyabaaha, ca benni nu gualí rudo tisa gue nu rá lo ca ley-na liba ancacana benni tsee lo Ben-na.<sup>14</sup> Ca benni bittu anca benni Israel-na lägabi ley bodha'ana Moisés te guecani. Titúbacana natteba runcana nu rá lo ca ley-na masquiba bittu yucana gue nu rá locani, lacana nna rule'e locana guannalu yubacana gue nu dia lo ca ley-na, cumu titúbacana ritedaaquinna gaxa te nu anca tsee lhe gaxa te nu bittu anca tsee lhe. La labacana runcana nu runi ca ley-na.<sup>15</sup> Lacana nna len nu runcana rule'e locana chi yu'u nu rá lo ca ley-na lhe'e lastoocani. Cumu elha rieni guequinnaba rixxi'enna cana, unní nna ancana nu gualí. La nu rulaba lequinnaba rudelha iyyan cana guadú, a guadú nna rán cana tseeba anca nu runcana.<sup>16</sup> Anába aca gansi chi bisía sá inná Tata Do Iyyabaaha uni Jesucristuha elha uxtisi gue nu runi gatsi ca benni, unbe attiba rába ca tisa gue Benniha requia rixxi'aya-ni.

### Ca benni Israel te ley bodha'ana Moisés len lacana

<sup>17</sup> Lu rálu ancalu benni Israel, chi ruxxen lelu gue ca ley bodha'ana Tata Do Iyyabaaha leni Moisés, tsitsiba nu runlu de ancalu benni gue Tata Do Iyyabaaha lhe.<sup>18</sup> Lu nna chiba yulu nu raca le Ben-na unlu, cumu ca ley-naba rule'ecanie lu, larcala yulu gaxa te nu anca tsee.<sup>19</sup> Anáguaba lu nna chi rudhaca lelu ancalu nu neru lo ca nu bittu yucana neda gue Tata Do Iyyabaaha anca

attiba nu xua loni, rálú ancalu attiba ttu xieni rudani gue ca nu requi atta chulha bittu ancabiani Ben-na lhe.<sup>20</sup> Rudhaca lelu ancalu nu rule'eni ca benni bittu yu-na, ancalu nu rudú elha rieni iqui ca benni bittu chi te elha rieni guecani lhe de te ley-na guelu, cumu lo Ben-na daa elha rieni, rixxi'a gue nu anca gualí lhe.<sup>21</sup> Gansi lu rule'enlu adí benni, ¿biacala bittu rudheti lola lu nu rule'elha? Lu nu ridúlu rixxi'alu rálú bittu dica lhanari, nianna ¿biacala rilánu?<sup>22</sup> Lu nu ridúlu rálú bittu dica isá ttu benni nu bittu anca latselani, nianna ¿biacala lu nna risálu nu bittu anca latselalu? Lu nu bittu raca uyúlu ca nu bittu gualí anca dios, nianna ¿biacala ribanalu nu te lhe'e ca yotu gue ca unná ganna?<sup>23</sup> Tsitsiba nu runlu de te ley nu bodha'ana Tata Do Iyyabaaha leni Moisés guelu, ttiaca de bittu rudolu tisa gue nu rá lo Ben-na, lu nna ruchucha ruttabibalu Tata Do Iyyabaaha.<sup>24</sup> Nuarcala nna gualíba nu rá lo ca sitsi gue Ben-na atta rá: "Ca benni bittu anca benni Israel-na rinne güecana gue Tata Do Iyyabaaha lo ni'a gue nu runle, lebi'i ca benni Israel."<sup>a</sup>

<sup>25</sup> Gualí galá nu ruren senni nu runcana leni ca unbiyuu Israel qui rule'e lo ancacana gue Tata Do Iyyabaaha, rixuuna len luu gansi gua rudolu tisa gue ca ley bodha'ana Moisés, ttiaca gansi bittuba rudolu tisa gue nu rá lo ca ley-na, lu nna ancabalu attiba ca nu bittu ren senni nu runcana leni ca unbiyuu Israel.<sup>26</sup> Ca nu bittu ren senni rudo tisa gue nu rá lo ca ley-na, reacana nu reni senni de rudona tisa gue ca ley-na, masquiba bittu gualí ren senni nu runcana leni ca unbiyuu Israel.<sup>27</sup> Benni rudo tisa gue nu rá lo ca ley-na, masquiba bittu ren senni, unnuha udelha iyyan lu, lu nu Israel, masquiba ren senni nu runcana leni ca unbiyuu Israel lhe te ley-na guelu lhe ttiaca läga rudolu tisa gue Ben-na.<sup>28</sup> Cumu läga de anca xudi ixná ttu benni nu Israel, nianna ancana nu gualíga ancana benni Israel, niguaba de uren senni qui rule'e lo ancana benni gue Tata Do Iyyabaaha lhe.<sup>29</sup> Benni gualíga ancana nu Israel, lana nna ancana nua lhi'u lhe'eli lastooni. Anáguauba nu ren senni, nu runcana leni ca unbiyuu Israel, lhi'u lhe'e lastooli-ni ribe senni. Espíritu gue Tata Do Iyyabaahaba runie nua, läga ca ley dia lo sitsi-na runi unná. Benni ancana aná, läga lo ca benni se'e yiesi lo yu-ni ribe xeni-na, lo Tata Do Iyyabaaha liba ribe xeni nua.

---

<sup>a</sup> 2:24 Isaías 52:5

**3** Gansi anía anca, ¿bi ribe xen ttu benni ancana nu Israel? ¿Bi ttu nu tsee dhi ttu benni de ren senni nu runcana leni ca unbiyyu Israel? <sup>2</sup>Ixe nu tsee dhi ca benni Israel-na. Nu primertteba nna ancana: Len ca benni Israel bodha'ana Tata Do Iyyabaaha ca tisa biría ro'o cuina guee. <sup>3</sup>Nianna gansi ttulhe ca nu Israel-na bitturu udocana tisa gue nu rá ca tisa gue Tata Do Iyyabaaha bodha'ane las nácani, ¿si de unnuha nna bitturu un Ben-na nu chi re unie? <sup>4</sup>¡Tsa läga un Ben-na aná! Delába unnuha nna Tata Do Iyyabaaha anque benni satíaba runie nu chi re, masquiba iyá benni ancacana nu run leni, attiba rába lo ca sitsi guee-na atta rá:

Lu ancalu benni rinne nu anca gualí,  
dhabalu lo ca nu uni elha uxtisi guelu lhe.<sup>a</sup>

<sup>5</sup>Ttiaca gansi nu lä anca tsee runri-na rixuuna qui rule'e lo anca Tata Do Iyyabaaha Benni runi nu raxxína anca tsee, nianna ¿bila innári? ¿Si innári dequi läga run tsee Ben-na atti rute elha disa gueri? (Neti nna rinneba attiba rinne ca benni se'e yies lo yu-ni.) <sup>6</sup>Tsa läga un Tata Do Iyyabaaha aná, cumu gansi Ben-na bittuba runie nu dica unie, lania nna ¿tti modu unie elha uxtisi gue ca benni se'e yies lo yu-ni? <sup>7</sup>Ttiaca gansi nu run lasiaha ancana nu rixuu qui rule'e lo anca Tata Do Iyyabaaha Benni rinne nu anca gualí, anque Benni ra xxeni lee lhe ¿biacala sna ruelha iyyaba benni neti dequi anca nu runi nu lä anca tsee ganna? <sup>8</sup>Gansi anía anca, ¿biacala lä gá loesri: “Unlari nu lä anca tsee qui salía tseenri”? Attiba rá ttulhe ca benni xalhaba runcana xiyya guetu dequi requitu rinnetu aná. Ca unná nna ralhabacana dhicana elha disa ute Tata Do Iyyabaaha.

### Iyába ca benni se'e yies lo yu ancacana nu te tulha gueni

<sup>9</sup>Nianna ¿si ri'itu ca benni Israel ancatu benni runi nu anca tseeru atti adí ca benni? ¡Dica! Cumu chi beacaba ria, ca benni Israel-na lhe ca benni bittu anca benni Israel-na lhe iyábari ancari nu runi nu lä anca tsee lo Tata Do Iyyabaaha. <sup>10</sup>Lo ca sitsi gue Ben-na rá:

Läganu benni te ancana nu tsa bittu runi nu lä anca tsee lo  
Tata Do Iyyabaaha.

Niba ttuna nuttu te.

---

<sup>a</sup> 3:4 Salmo 51:4

<sup>11</sup> Läganu benni te radú leni gue nu anca gue Tata Do  
Iyyabaaha,

nuttuguuba nu benni te runi eguilana Ben-na lhe.

<sup>12</sup> Iyábacana chi bequiettacana lo neda gue Ben-na,  
ttuba chi binitti iyábacana.

¡Tsa läganu te uni nu anca tsee,  
niba ttuna nuttu te!<sup>a</sup>

<sup>13</sup> Libácani ancana attiba baa du yali ro'oni,<sup>b</sup>  
leni lhusacani ridí yiecana,

attiba anca inda dhua belha anca ca tisa riría ro'ocani.<sup>c</sup>

<sup>14</sup> Satíaba riguecana lhe rinne dícana lhe.<sup>d</sup>

<sup>15</sup> Ruxunnibacana diacana rutticana benni lhe.

<sup>16</sup> Gaxaba diacana rutse'e locana lhe runcana qui ratexxatta  
benni lhe.

<sup>17</sup> Ca unná nna tsa läga yucana gaxasná tse'e tseecana len  
benni.<sup>e</sup>

<sup>18</sup> Tsaba bittu elha rasi gue Tata Do Iyyabaaha yu'u lhe'e  
lastoocani.<sup>f</sup>

<sup>19</sup> Ttiaca ri'i nna yuri, iyába nu rá lo ca ley gue Tata Do  
Iyyabaaha rinnee gue ca nu rinnabia ley-na cana, rinnee rulise  
cana qui eyaca si ro'o iyáacana. Aná nna oquinni iqui iyácea benni  
ancacana nu te tulha gueni lo Tata Do Iyyabaaha. <sup>20</sup> Cumu läganu  
benni te ancana nu bitturu tulha gueni te lo Tata Do Iyyabaaha de  
runna nu rá lo ca ley-na. Cumu ca ley-na sunruba rixuuque qui yuri  
ri'i ancari nu runi nu lä anca tsee.

### Tata Do Iyyabaaha runie ri benni bitturu tulha gueni te de ria lerie

<sup>21</sup> Ttiaca nnanna chi rule'en Tata Do Iyyabaaha ri gaxasná runie  
qui reacari benni tsee loe, lärga ca ley-na rixuunie qui rigúe ca  
tulha gueri-na. Unní riría lína leni nu rá lo ca ley-na lhe nu rá lo ca  
sitsi boca'an ca profetaha lhe. <sup>22</sup> Nnanna nna Tata Do Iyyabaaha  
reonie ri benni bitturu tulha gueni te de ria leri Jesús Benni anque  
Cristu. Lee nna len iyába ca benni ria lecani Jesús runie aná. Ttuba  
anca iyába benni loe, <sup>23</sup> cumu iyába benni ancacana nu chi beni nu  
lä anca tsee. Larcala nna bittubi elha ralhari edí baari xieni ga'ana

<sup>a</sup> 3:10-12 Salmo 14:1-3; 53:1-3

<sup>b</sup> 3:13 Salmo 5:9

<sup>c</sup> 3:13 Salmo 140:3

<sup>d</sup> 3:14 Salmo 10:7

<sup>e</sup> 3:15-17 Isaías 59:7-8

<sup>f</sup> 3:18 Salmo 36:1

tsee gue Tata Do Iyyabaaha.<sup>24</sup> Ttiaca de anca Ben-na benni tsee, anátteba redá lee runie reaca ca benni benni bitturu tulha gueni te, de utti Jesús Benni anque Cristu qui utixe nu dica quixari.<sup>25</sup> Tata Do Iyyabaaha udhelhe Jesucristuha qui uttie lo ya crusiba, belali reni guee qui bebe nu risa'ani Tata Do Iyyabaaha. Reniha nna rixuue qui ridí Tata Do Iyyabaaha elha xen lasi gue ca benni ria lecani Jesús. Aná beni Benniha qui bele'e lo anque Benni runi nu anca tsee, de anque Benni re tsee leni larcala bexxulha lee gue ca tulha ben ca benni ttuha.<sup>26</sup> Benie aná de raca lee ule'e loe len ri'i tiempu se'eri nnanna gaxasná runie reonie ri'i benni bitturu tulha gueni te. Cumu attiba lee anque benni bittu te tulha guee, anáguaba runie ca benni ria lecani Jesús benni bitturu tulha gueni te.

<sup>27</sup> Nianna ri'i ca benni Israel, ¿gala guaga'ari nu runri ttabaha? ¿Si chiba bitúa nua? ¿Biaca bitúa nua? ¿Si de rudori tisa gue ca ley boca'ana Moisés? ¡Dica! De riaba leri Jesús, nuarca bitúa nua.<sup>28</sup> Larcala nna boquinna iquitu rátu: Tata Do Iyyabaaha runie ca benni benni bitturu tulha gueni te de ria lecani Jesús, läga de runcana nu rá lo ca ley boca'ana Moisés.<sup>29</sup> ¿Si suntteba ca benni Israel-na anca Dios guecani Tata Do Iyyabaaha? ¿Si läba ancaguaba Ben-na Dios gue ca benni bittu anca benni Israel-na? Gualí galá, anáguaba anque Dios guecani lhe<sup>30</sup> cumu tturba Tata Do Iyyabaaha do. Lee runie ca benni Israel nu reni senni, nu runcana leni ca unbiyuu Israel, benni bitturu tulha gueni te de tsia lecani Jesús. Anáguaba ca benni bittu anca benni Israel nu bittu reni senni, nu runcana leni ca unbiyuu Israel lhe runguabe cana benni bitturu tulha gueni te de tsia lecani Jesús.<sup>31</sup> Nianna ¿si rigúabari lidhaca ca ley-na de ria leri Jesús? ¡Dica! Nu runlari nna rutelari adí lidhaca ca ley-na de ria leri Jesús.

### Abraham ucabi benni güia lebi Tata Do Iyyabaaha

**4** Nianna ¿bila biría leni Abraham bi'ini uca benniola gueriba de güia lebi Tata Do Iyyabaaha?<sup>2</sup> Cumu gansi Abraham be'eyubi ucabi benni bitturu tulha gueni te de ucabi benni beni nu anca tsee lo Tata Do Iyyabaaha, lania nna guateba ro'obi ulequi xen lebi lo ca benni, ttiaca bittu dica unbi anía lo Tata Do Iyyabaaha.<sup>3</sup> Cumu lo ca sitsi gue Tata Do Iyyabaaha rá: “De güiaba le Abraham Tata Do Iyyabaaha, nuarca ulequi Benniha bi bala'ana ancabi benni

bitturu tulha gueni te.”<sup>a</sup> <sup>4</sup> Attiba ttu benni riben sina, ridíba lhiaxani gue sina runna läga anca nua ttu nu cuentaba ridína. Ruteba nu beaca gueni sinaha lhiaxani cumu daa nua gueni gue sina bennaha. <sup>5</sup> Ttiaca benni ria leni Tata Do Iyyabaaha masquiba bittu chi benna ni ttu nu anca tsee, de tsiaba leni Benniha anque Benni runie ca benni runi nu lä anca tsee-na benni bitturu tulha gueni te, Tata Do Iyyabaaha nna ribequie nua bala'ana ancana benni bitturu tulha gueni te. <sup>6</sup> Anáguaba unnee David gue salía tseena ca benni ribequi Tata Do Iyyabaaha bala'ana chi ancacana benni bitturu tulha guecani te, de güia lecani Ben-na bittu de bencana nu anca tsee. <sup>7</sup> David nna rábi:

¡Carbáru ca benni ridí Tata Do Iyyabaaha elha xen lasi gue  
nu lä anca tsee chi bencana,  
ruxxúlha lee gue ca tulha guecani lhe!

<sup>8</sup> ¡Carbáru ca benni bittu ulu'uni Tata Do Iyyabaaha cuenta ca  
tulha guecani!<sup>b</sup>

<sup>9</sup> Nianna ¿si sunteba ca nu Israel reni senni, nu runcana leni ca unbiyuu Israel, rá Tata Do Iyyabaaha, carbárucana, aca? ¿Si anáguaba ca benni bittu anca benni Israel bittu reni senni-na aca? La chiba rári, Abraham, de güia lebi Tata Do Iyyabaaha, nuarca ulequi Ben-na bi bala'ana, ancabi benni bitturu tulha gueni te. <sup>10</sup> Nianna ¿inúca ulequi Tata Do Iyyabaaha Abraham bala'ana ancabi benni bitturu tulha guebi te? ¿Si dequide atti chi rebi senni, nu runcana leni ca unbiyuu Israel, aca? ¿Si atti bittu chi rebi senni, aca? Tata Do Iyyabaaha ulequie Abraham bala'ana ancabi benni bitturu tulha guebi te antisla atti cuebi senni. <sup>11</sup> Dequide lania liba nna urebi senni qui uca nua ttu nu bele'e lo gualí chi ancabi benni bitturu tulha guebi te de ria lebi Ben-na. Anioca nuarca anca Abraham tata gue iyába ca benni chi reni Tata Do Iyyabaaha bala'ana ancacabi benni bitturu tulha gueni te de ria lecabí Ben-na, masquiba bittu recabi senni. <sup>12</sup> Ttiaca anáguaba anca Abraham tata gue ca benni Israel, ca nu bittu sunru recabi senni, sinuqui anáguaba riaguuba lecani attiba güia le tata gueri Abraham Tata Do Iyyabaaha atti bittu chi rebi senni.

**Ca benni ria lecabí Tata Do Iyyabaaha  
dhicabi nu utee Benni len lacabi**

<sup>13</sup>Cumu läga de bedo Abraham tisa gue ca ley boca'ana Tata Do Iyyabaaha len Moisés, nuarca begüee Tata Do Iyyabaaha tisa lenbi lhe len ca benni datíabi lhe utee len lacabi attiba interés yies lo yu-ni, sinuqui de güiaba le Abraham Tata Do Iyyabaaha, larcala ucabi benni bitturu tulha guebi te. <sup>14</sup>Cumu gansi suntteba ca nu rudo tisa gue ca ley-na ralhacana dhicana interés, lania nna cuentarba ria leri Tata Do Iyyabaaha, bittuguaba daca tisa chi begüee Tata Do Iyyabaaha leni Abraham lhe. <sup>15</sup>Cumu ca ley-na runque rute Tata Do Iyyabaaha elha disa gueri gansi chi bittu rido tisa queque, ttiaca atta bittu ley-na te, bittuguaba te ttu bixa uni qui dhíri elha disa de ritsari tisa gueni.

<sup>16</sup>Larcala, de riaba le ca benni Tata Do Iyyabaaha, denuaba nna utee nu chi re utee. Análiba nna eya'an tsitsi ca tisa chi begüee len Abraham, len ca benni datía bi'iniha lhe. De tsiaba lecabí Tata Do Iyyabaaha Benniha nna cuentaba utee nu chi begüee tisa utee len lacabi. Läga sunru ca nu Israel rudo tisa gue ley-na dhicana unná, sinuqui anáguaba ca nu bittu anca benni Israel ria lecani Tata Do Iyyabaaha attiba güia le Abraham bi'ini ancabi tata gue iyábari. <sup>17</sup>Attiba rá lo ca sitsi gue Tata Do Iyyabaaha atta rinnee rulise Abraham: “Neti bodúa lu acalu tata gue ixeru ca benni tse'e yies lo yu-ni.”<sup>a</sup> Denua nna anca Abraham tata gue iyábari lo Tata Do Iyyabaaha benni güia lebi guee. Tata Do Iyyabaaha anque benni runie reacani ca nu yatti-na, runie rise'e nu bittu chi te lhe.

<sup>18</sup>Abraham, tsitsiba güia lebi gue nu rá Tata Do Iyyabaaha, labi nna udobi uledabi, bexxen lebi gue nu bitturu dica dhobi cuedabi. Denua nna ucabi tata gue ixeru benni, ucaba attiba chi rá Tata Do Iyyabaaha atti re bi'iniha: “Lu acalu tata gue ixeru benni.”<sup>b</sup>

<sup>19</sup>Abraham läga guaxxaquinbi besiguibabi güia lebi, masquiba ritedeenbi dequi chiba bisía sá bitturu aca isía xi'inbi lenbi nuila guebiha, de chi anquinbi attiba ttu gayua (100) ida. Anáguaba Sara chiguaba uxubi, larcala lärga dica uja xi'inbi. <sup>20</sup>Tsa läga bedú chupana le Abraham aquinbi bittu tsia lebi gue nu chi rá Tata Do Iyyabaaha unie, sinuqui adíla güia lebi. Leni unnuha nna ulequi

---

<sup>a</sup> 4:17 Génesis 17:5    <sup>b</sup> 4:18 Génesis 15:5

xenbi Tata Do Iyyabaaha. <sup>21</sup> Labi nna chiba yuxaababi, Tata Do Iyyabaaha anque benni ra xxeni lee, unbe iyá nu chi begüee tisa re unie. <sup>22</sup> Denua nna ulequi Tata Do Iyyabaaha Abraham bala'ana ancabi benni bitturu tulha gueni te de güia lebi Ben-na.

<sup>23</sup> Lo ca sitsi gue Tata Do Iyyabaaha rá: “Ulequi Benniha bi bala'ana ancabi benni bitturu tulha gueni te.” Läga sunru len Abraham bixuu ca tisa-na, <sup>24</sup> sinuqui anáguaba rixuu nu rá lo ca sitsi-na len ri'i. De güia leri Tata Do Iyyabaaha, Benni belhidhe Jesús Benni bananie ri-na lhe'e baa atta yu'u ca nu yatti-na, lee nna cuequie ri bala'ana ancari benni bitturu tulha gueni te. <sup>25</sup> Tata Do Iyyabaaha betee Jesús uttie lo ya crusicha lo ni'a gue ca tulha gueri, benie beacani Ben-na lhe qui runie racari benni bitturu tulha gueni te.

### Gualábari de chi ancari benni bitturu te tulha gueni

**5** Larcala ri'i nna de güia leri Tata Do Iyyabaaha nuarca chi benie ancari benni bitturu te tulha gueni. De nu guate Jesucristu Benni bananie ri-na, nuarca chi se'e tseeri len Ben-na. <sup>2</sup> De Cristuharguaba nna chi yali lo neda gueri isínri lo Tata Do Iyyabaaha cumu de ria lerie, qui anáchu nna redí baari nu tsee redá le Ben-na rute gueri, lo elha tseeha benni se'e rearí nnanna. Anáguaba chi re'o leri cumu xen leri dhíri nu ga'ana tsee ra xxeni lee gue Tata Do Iyyabaaha. <sup>3</sup> Läga sunru gue unní chi redaca leri, sinuqui anáguaba redaca leri atti ruyúri elha disa, cumu nu ruyúri elha disa-na runi racari benni ruchía lo nu rateri. <sup>4</sup> Nu ruchíari lo nu rateri-na runi racari nu ridá riría tsee lo Tata Do Iyyabaaha. Nu ridári riría tseeri lo Ben-na runi racari nu ruxxenru leni dhi nu chi rá Ben-na utee. <sup>5</sup> Nu xen leri gue Tata Do Iyyabaaha nna läga runi unná ettuinri, cumu Espíritu gue Ben-na, Benni chi betee len ri'i, tsapa runie ridí tamari elha si'i le gue Tata Do Iyyabaaha.

<sup>6</sup> Cumu atti se'eri ancari benni bittu guaca, nu bittu aca gueni gaxasná unna qui lhána, lania bisía Cristu, la sá atti chi ga'anani Tata Do Iyyabaaha, qui uttie cuenta gueri, ri'i ca nu runi nu lä anca tsee. <sup>7</sup> Gualíba, läga cuenta anca iría ttu benni erú iqui erú leni elha nabani gueni qui gattina cuenta gue attu benni runi nu anca tsee, larba ganna si do ttu benni tsitsiba tsee du leni, cuenta gue nua liba ni cadiga güiríaba attu benni eyaxinna gattina. <sup>8</sup> Ttiaca Tata Do Iyyabaaha bele'e loe racanie gueri, denua nna atti sna ancabari

nu runi nu lä anca tsee, Cristuha uttie qui utixe nu dica quixari.

<sup>9</sup> Adílaba nnanna cumu chi beni Tata Do Iyyabaaha ancari benni bitturu tulha gueni te de utti Cristuha belali reni guee lo ya crusihá, de nua nna nuarca lhári lo elha disa ute Tata Do Iyyabaaha.

<sup>10</sup> Cumu attila ancari nu bittu raca uyúri Tata Do Iyyabaaha, lee nna udhelhe xi'inie Jesucristu qui leni elhutti gue Benniha nna beaca tseeri lenie. Adílaba nnanna de chi ancari benni se'e tsee leni Tata Do Iyyabaaha, lee nna godilábe ri de beacani Jesucristuha. <sup>11</sup> Läga sunru odilá Ben-na ri, sinuqui anágua de redaca leri gue nu runi Tata Do Iyyabaaha de nu beni Jesucristu Benni bananie ri-na, cumu Ben-na beni beaca tseeri len Tata Do Iyyabaaha.

### **Pablo rinnebi gue nu beni Adán, gue nu beni Cristuha lhe**

<sup>12</sup> Larcala nna ttuba benni nua beni tulha. Lo ni'a gue unnuha nna uta'a nu lä anca tsee-na yies lo yu-ni. Tulha-na cheena elhutti gue benni. Anioca nna iyába ca benni raticana, cumu iyábacana runcana tulha. <sup>13</sup> Atti bittu chi bisía ley boca'ana Tata Do Iyyabaaha len Moisés, laniali chi runi ca benni tulha yies lo yu-ni, ttiaca Tata Do Iyyabaaha läga ulu'unie cuenta ca tulha ben ca benni, cumu lägabi ley chi te lania qui quixxi'enna ca benni läga anca tsee nu runcana. <sup>14</sup> Ttiaca desdeba ca benni use'e atti udo Adán, axtaba atti bisía Moisés, labíaba utticana de bencana tulha, masquiba tulha ben ca nua läga anca nua loesi tulha ben Adán, cumu lana nna utitsana tisa gue nu beni Tata Do Iyyabaaha mandadu unna. Adán ucana attiba lixxina Cristu Benni chi ga'ana isía yies lo yu-ni.

<sup>15</sup> Ttiaca tulha beni Adán, niba saro'o bittu raxxína ancana atti anca nu tsee bedaa le Tata Do Iyyabaaha betee gueri cuentaba. Cumu lo ni'a gue tulha beni ttuba Adán, ixeru benni ratti, ttiaca nu tsee bedaa le Tata Do Iyyabaaha benni gueri nu cuentaba bete lenri de utti ttuba Jesucristuha cuenta gueri, xxeniru ancana. Unní ancana nu runi salía tseena ixeru benni. <sup>16</sup> Nu tsee bedaa le Tata Do Iyyabaaha betee gueri, ni saro'o bittu raxxínna leni tulha beni ttuba Adán. Cumu lo ni'a gue ttuba tulha beni Adán, Tata Do Iyyabaaha re ancari nu te tulha gueni, ttiaca Tata Do Iyyabaaha, masquiba raca ixe ca tulha gue benni, lee nna bedaa lee betee elha tsee-na lenri qui racari benni bitturu tulha gueni te. <sup>17</sup> Cumu gansi lo ni'a gue de utitsa ttuba Adán tisa gue Tata Do Iyyabaaha udulo ratti ca benni, anágua de nu guate ttuba Jesucristuha adíla de te elha xen

lasi guaca banba ca benni ttu dia lii, ca nu ridí tama elha tsee redá le Tata Do Iyyabaaha rute lencana, lägabi ttu nu tsee chi bencana qui runie cana benni bitturu tulha gueni te lhe.

<sup>18</sup> Larcala attiba de lo ni'a gue utitsa ttuba Adán tisa gue Tata Do Iyyabaaha unnuha beni uca iyába benni nu dhi elha disa ute Ben-na, anáguaba nu tsee beni ttuba Jesucristuha ucana nu beni aca iyába benni nu bitturu tulha gueni te, qui gatta elha nabani ttu dia lii guecani. <sup>19</sup> Cumu attiba ttuba Adán nua bittu bedona tisa gue Tata Do Iyyabaaha, lo ni'a gue unnuha nna iyába benni ucacana nu te tulha gueni. Aníaguaba de bedo ttuba Jesucristuha tisa gue Tata Do Iyyabaaha, ixeru benni beacacana nu bitturu tulha gueni te.

<sup>20</sup> Ley boca'ana Tata Do Iyyabaaha leni Moisés bisíana qui guaniru adí ca tulha runi ca benni, ttiaca attiba guani adí ca tulha-na, aníaguaba adílabo de bedá le Tata Do Iyyabaaha guatúa lee ca benni, <sup>21</sup> qui attiba tulha-na unnabiana qui bisíia elhutti gue ca benni, anáguaba elha tsee gue Tata Do Iyyabaaha redá lee rute lenri rinnabiana reacari benni bitturu tulha gueni te qui aca banri ttu dia lii, de nu beni Jesucristu Benni bananie ri-na.

### Chiba ulári lo ca tulha-na de chi babari len Jesucristu

**6** Nianna ¿bila innári? ¿Si na rusiguibari runri nu lä anca tsee qui edáchatti le Tata Do Iyyabaaha unie adí nu tsee lenri? <sup>2</sup> ¡Locachirba bitturu! Cumu ri'i nna chiba ancari attiba ttu nu chi utti, attisiba lärga nurua ri te qui unri nu lä anca tsee. Larcala, ¿ittirua modu tse'eri usiguiru unri nu lä anca tsee? <sup>3</sup> Lebi'i nna gua yuxebale, iyábari ca nu chi udi inda qui bele'e lo chi ancari ttuba benni len Jesucristuha, anáguaba attisiba selaguardi Ben-na uttiri atti uttie. <sup>4</sup> Larcala atti udiri indaha attisiba uttibari, ttuba bigatsiri leni Cristuha lhe qui attiba belhidha Tata gueri do iyyabaaha Benniha lhe'e baa atta yu'u ca nu yatti-na len elha ra xxeni lee guee, anáguaba unie len ri'i qui eyacari benni cubi bitturu tse'eri unri nu benri ttuha.

<sup>5</sup> Cumu gansi biselari Cristuha atti uttie, anáguaba selari Ben-na beaquinri atti beacanie. <sup>6</sup> Ri'i nna chiba yuri, nu ucari ttuha nna chiba utá nua lo ya crusihha len Cristuha, aníaliba nna bitúa nu ridá le cuerpu gueri-na unna qui bitturu acari attiba nu tto'o lo sina runi nu rába nu lä anca tsee-na. <sup>7</sup> Cumu ttu nu ria le Cristuha, gansi chi uttina, chiba ulá nua lo ca tulha-na. <sup>8</sup> Larcala gansi ri'i chi uttiri

len Cristuha, anáguaba tse'eri uxxen leri ri'i nna guase'ebari leni Ben-na. <sup>9</sup>Ri'i nna chiba yuri, Cristuha nna dequide beacanie berié lhe'e baa atta yu'u ca nu yatti-na, tsa lärga gattie attu libe, lärga dha elhutti-na uttina Ben-na attu libe. <sup>10</sup>Cumu atti utti Cristuha nna ttu libeba uttie qui ttu tsaba utixe gue ca tulha gue ca benni se'e yies lo yu-ni. Nnanna nna doe banie, do banie qui rixuue lo Tata Do Iyyabaaha. <sup>11</sup>Anáguaba lebi'i acadinle dequi chiba uttile qui bitturu tse'ele unle tulha, ttiaca se'e banbale qui ixuule lo Tata Do Iyyabaaha, de chi ancale benni se'e len Jesucristu Benni bananie ri.

<sup>12</sup>Larcala nna bittu ugüelhale usigui tulhana innabiana cuerpu guele-na nu rise'e lobana yies lo yu-ni, bitturu dhielhale unle nu ridále cuerpu guele-na. <sup>13</sup>Bitturu ixuinle cuerpu guele-na qui ixuuna unle nu bittu anca tsee. Nu unlale nna tsa gualutsá du lo Tata Do Iyyabaaha de chi ancale benni beacani dequide chi uttile. Gualute itú cuerpu guele-na len Ben-na qui ixuule unle nu anca tsee. <sup>14</sup>Aná nna lärga dhaa nu bittu anca tsee-na innabiana le unle nu raca leni, cumu lärga se'ele runle nu rá ca ley boca'ana Moisés, lebi'i nna chiba se'e lále, redibaale elha tsee redá le Tata Do Iyyabaaha rute len lebi'i.

### Lebi'i nna chi ancale benni runi nu anca tsee

<sup>15</sup>Nianna ¿bila anca nu unri? Cumu de chi se'e lhári redibaari elha tsee redá le Tata Do Iyyabaaha rute lenri. ¿Si unbari nu bittu anca tsee de bitturu rinnabia ca ley-na ri? ¡Dica, tsa lärga unri aná! <sup>16</sup>Lebi'i nna gua yubale, gansi lebi'i ito'ole lo sina gue ttu benni qui tse'ele udole tisa gueni, lania nna nu tto'o lo sina gue nu rudole tisa guenihaba ancale. Anía bunni, gansi lebi'i se'ele rudole tisa unle nu lä anca tsee-na, unná nna elhutti guebale cheena, gansi lebi'i se'ele rudole tisa gue Tata Do Iyyabaaha, unnuha nna runi racale benni runi nu anca tsee. <sup>17</sup>Ttiaca xquixaru Tata Do Iyyabaaha, masquiba ttuha ucale attiba nu tto'o lo sina lo nu lä anca tsee-na, nnanna nna lebi'i nna itú iqui itú lele rudole tisa gue nu anca gue Tata Do Iyyabaaha chi bele'equin ca benni le. <sup>18</sup>Dequide chi ulále lo nu lä anca tsee-na, bitturu ancale attiba nu tto'o lo sina loni, nnanna nna lebi'i nna chi ancale benni rixuu lo Tata Do Iyyabaaha runi nu anca tsee. <sup>19</sup>Neti nna rinneba rulisa le rixuutia nu run ca benni se'e yies lo yu-ni, qui sadú lele gue nu ria, cumu lebi'i nna de bittu chi se'e tsitsile lo neda gue Tata Do Iyyabaaha nuarca bittu chi radú tsee

lele gue nu rixxi'atia le. Lebi'i nna attiba bixuinle cuerpu guele-na qui benle nu lä anca tsee lhe nu satsa lhe anáguaba nnanna gualute itú cuerpu guele-na qui ixuuna unle nu anca tsee, qui anáchu acale benni chi se'e riesi anca gue Tata Do Iyyabaaha.

<sup>20</sup> Lebi'i nna atti ancale attiba nu tto'o lo sina lo nu bittu anca tsee-na, lania nna läga ancale nu daa loni uni nu anca tsee. <sup>21</sup> Nianna ¿bi ttu nu tsee uxíle gue nu benle ttuha? Nu runna rettuinle nnanna. Unnuha nna sunruba elhutti che nua guele. <sup>22</sup> Ttiaca nnanna lebi'i nna lärga ancale attiba nu tto'o lo sina lo nu bittu anca tsee-na, nu rixuu lo sina gue Tata Do Iyyabaahaba chi ancale. Nu tsee ridíle gue unní nna ancana: chi ulequiesi Tata Do Iyyabaaha le qui acale benni guee, acale nu gatta elha nabani gueni ttu dia lii lhe. <sup>23</sup> Cumu elhuttiba chee ca tulha runri-na gueri, ttiaca nu tsee redá lee Tata Do Iyyabaaha rute cuentaba len ri'i nna ancana elha nabani gatta ttu dia lii gueri de chi ancari gue Jesucristu Benni bananie ri.

### Ley-na ancana len ca benni attiba ttu nu rutsá náni

**7** Ca benni ria le Jesús, yu gue nu rá lo ca ley boca'ana Tata Do Iyyabaaha len Moisés, lebi'i nna chiba yule, ca ley-na rinnabiacaña ca benni sunruba atti se'e bancana yies lo yu-ni. <sup>2</sup> Attiba ttu nuila chi betsá náni, tsaba xicani ley-na nua lenna unbiyuu gueniha laca do nua banna ttiaca gansi unbiyuuh gattina, lania nna rilába nuilaha lo ley xiquinna-na leni unbiyuu gueniha. <sup>3</sup> Larcala gansi nuilaha dho lenna attu unbiyuu subi atti sna do banba unbiyuu gueniha, nu requi manniba aca nua, ttiaca gansi unbiyuuh gattina lania nna rilába nuilaha lo ley-na, larcala nna lärga nu requi manni aca nua gansi edína attu unbiyuu subi.

<sup>4</sup> Anáguaba lebi'i ca benni ria le Jesús, atti racale benni gue Jesucristuha nna lebi'i nna attisiba nu yattiba chi ancale len Ben-na lo ca ley-na, qui acale benni banani attu nu subi. Nnanna nna gue Cristuha Benni beacani bería lhe'e baa atta yu'u ca nu yatti-naba chi ancale, qui anáchu tse'ele unle nu anca tsee lo Tata Do Iyyabaaha. <sup>5</sup> Cumu atti sna se'ebari runri nu bittu anca tsee raca le cuerpu gueri, ca ley-na bixuuque bedienque leri qui udáchatti leri benri nu lä anca tsee. Unnuha nna elhuttiba utila nua gueri. <sup>6</sup> Ttiaca nnanna chiba ulári lo ca ley-na, lärga lee rinnabie ri, cumu attiba ttu nu yatti chi ancari loe. Análiba nna chi se'e lári qui ixuuri lo Tata Do

Iyyabaaha, qui tse'eri unri nu raca lee Espíritu gue Ben-na lo ttu neda cubi, bitturu tse'eri lo neda yaxxuha atta rinnabia ca ley-na ri.

### Nu bittu anca tsee runri rilána elhutti gueri lo Tata Do Iyyabaaha

<sup>7</sup> Nianna ¿bila innári? ¿Si innári dequi nu lä anca tseeba anca ca ley boca'ana Tata Do Iyyabaaha len Moisés? Dica, läga anía anca, cumu ttirca lä ca ley-na, neti nna läga ubina bi nua anca nu bittu anca tsee. Attiba anca, neti nna tsa läga ubina ganna bittuba anca tsee dha leri nu anca gue benni subi ttirca bittuba rá lo ley-na: “Bittu dha lelu nu anca gue benni subi.”<sup>a</sup> <sup>8</sup> Ttiaca tulhana, atti biyúna nu rá lo ca ley-na, lana nna uca tipattebana benna nu raca leni. Lana nna benna qui udá lasia benia iyáloba nu lä anca tsee. Ttirca bittuba ley te, nu bittu anca tsee-na läga ancana tulha, nu yattiba ancana. <sup>9</sup> Ttuha nna chi doa yu'u elha nabani quia atti bittu chi yua nu rá lo ca ley-na, ttiaca atti chi yua gue bixa run ca ley-na mandadu aca, lania nna beacani nu bittu anca tsee-na, neti nna uca nu yatti lo Tata Do Iyyabaaha. <sup>10</sup> Anioca nna utedaatia, ca ley ca nu dica utee elha nabani quia lo Tata Do Iyyabaaha, elhuttila utilacana quia. <sup>11</sup> Cumu nu lä anca tsee-na, uca tipana bixuinna ca ley-na qui uxíyiena neti, la ca ley-naba bixuinna qui benna uca nu yatti lo Tata Do Iyyabaaha. <sup>12</sup> Larcala, ca ley-na ancaque tisa gue Tata Do Iyyabaaha, anáguba ca tisa ga'ana mandadu unri dia loque lhe ancaque tisa tsee lhe tisa dica ixuu lhe.

<sup>13</sup> Nianna ¿si innári dequi nu anca tseeha utile elhutti quia? ¡Dica! Läga anía anca, nu lä anca tsee beniaba utilana elhutti quia, anioca bele'e lo nu lä anca tsee-na ancana tulha. Nu lä anca tsee-na bixuinna ca ley-na qui bettina neti, análiba nna bele'e lo ca ley-na, nu lä anca tsee-na ancana ttu tulha xeni. <sup>14</sup> Gua yubari, ca ley-na ancaque tisa gue Tata Do Iyyabaaha, ttiaca neti nna ancaba benni gue yies lo yu-ni, ancaba attiba ttu nu tto'o lo sina lo nu lä anca tsee-na.

<sup>15</sup> Neti nna bittu radú lasia gue bixunni ratea, cumu läga runia nu raca lasia unia, nu tsa bittu raca uyúa, unnuhala runia. <sup>16</sup> Gansi nu runia-na ancana nu bittu raca lasia unia, unná runi roquinna iquia tseeba anca ca ley gue Tata Do Iyyabaaha. <sup>17</sup> Larcala nna lärga netiunná anca nu runi nu bittu anca tsee-na, nu lä anca tsee re lhe'an bunna runi qui runia aná. <sup>18</sup> Neti nna guayúba, lhe'e cuerpu

---

<sup>a</sup> 7:7 Éxodo 20:17; Deuteronomio 5:21

quia-ni, diatia ria, lhe'e lastooa-ni tsa lägabi nu tsee yu'u. Cumu masquiba raca lasia unia nu anca tsee, ttiaca bittu raca unia na.  
<sup>19</sup> Läga runia nu tsee raca lasia unia, nu lä anca tsee bittu raca lasia unia, unnala runia. <sup>20</sup> Gansi runia nu bittu raca lasia unia, lärga neti nua runia nua, nu lä anca tsee yu'u lhe'e cuerpu quia-niba runi runia nua.

<sup>21</sup> Larcala nna neti ritedaatia, atti raca lasia unia nu anca tsee, nu lä anca tsee-na la ratti'aya du tseeba-na runna runia nu bittu anca tsee. <sup>22</sup> Cumu neti nna itú iqui itú lasia re'o lasia ca ley gue Tata Do Iyyabaaha. <sup>23</sup> Ttiaca neti nna ritedaatia cuerpu quia-ni nna attu nu subila rinnabian-na, unnonna nu lä anca tsee-na, lana nna redú disana lo nu tsee rulaba le elha rien quia-na unna tsaba anquinna neti attiba ttu nu te lisiyya.

<sup>24</sup> ¡Carusil'iru neti! ¿Nú odilána neti lo nu lä anca tsee ridá le cuerpu quia-ni unna nu cheena neti lo elhuttiha? <sup>25</sup> Xquixaba Tata Do Iyyabaaha, lee nna godilábe neti de nu beni Jesucristu Benni bananie ri-na. Larcala neti nna raca lasia udoa tisa gue nu rá lo ca ley gue Tata Do Iyyabaaha, ttiaca cuerpu quia-ni nna nu lä anca tsee-na la runna.

### Läga tsia nitti ca benni se'e runi nu rá Espíritu gue Tata Do Iyyabaaha

**8** Nnanna nna lärga tsia nitti ca benni chi anca gue Jesucristuha, [ca benni bitturu se'e runi nu raca le cuerpu guecabi, lacabi nna nu rába Espíritu gue Tata Do Iyyabaaha se'ecabi runcabi.] <sup>2</sup> Cumu Espíritu gue Tata Do Iyyabaaha Benni rute elha nabani gueri de chi ancari benni gue Jesucristuha, Ben-na chi bodile neti lo ca tulha quia lhe lo elhuttiha lhe ca unná nna lärga rinnabiacana neti. <sup>3</sup> Tata Do Iyyabaaha benie nu bittu udá ca ley boca'ana Moisés unque, cumu de ancari benni runi nu lä anca tsee nuarca bittu udári udori tisa gue ca ley-na. Tiaca Tata Do Iyyabaaha udhelhe xi'inie Jesús, Benniha uque benni attiba ri'i ca nu runi nu lä anca tsee, análiba nna uca uttie lo ya crusiba cuenta gueri, ca nu runi nu lä anca tsee, qui anáchu nna de nu beni Benniha nna beluxa Tata Do Iyyabaaha nu rá tsitsi leni gue tulha-na. <sup>4</sup> Benie aná qui ridári runri nu anca tsee runi ca ley-na mandadu unri, ri'i nna lärga se'eri runri nu raca le cuerpu gueri-na unri, se'ebari runri nu rá Espíritu gue Tata Do Iyyabaaha. <sup>5</sup> Cumu ca nu se'e runi nu racaba le cuerpu guecani,

suntteba gue nu ridá le cuerpu guecani do lecani uncana, ttiaca ca nu se'e runi nu raca le Espíritu gue Tata Do Iyyabaaha, gue nu anca gue Ben-naba rulaba lecani uncana.<sup>6</sup> Cumu gansi suntteba gue nu ridá le cuerpu gueri-na ulaba leri, rilaba elhutti gueri lo Tata Do Iyyabaaha, ttiaca gansi ulaba leri gue nu anca gue Espíritu gue Tata Do Iyyabaaha, lania nna gatta elha nabani gueri ttu dia lii lo Ben-na, tse'eri xen su lee lhe.<sup>7</sup> Ca nu rulaba lecani uncana nu ridá le cuerpu guecani, nu lä raca uyú Tata Do Iyyabaahaba anca ca nua, cumu lä ridáguabacana uncana nu rá lo ca ley-na lä racaguaba lecani udocana tisa gue ca ben-na lhe.<sup>8</sup> Larcala, ca benni se'e rudo tisa gue nu raca le cuerpu guecani, läga aca uncana nu radi le Tata Do Iyyabaaha.

<sup>9</sup> Ttiaca lebi'i nna lärga se'ele runle nu ridá le cuerpu guele-na, sinuqui nu rába Espíritu gue Tata Do Iyyabaaha runle, gansi gua do Espíritu gue Ben-na lhe'e lastoole. Nu bittuba do Espíritu gue Tata Do Iyyabaaha lhe'e lastooni, läga anca nua gue Cristuha.<sup>10</sup> Ttiaca gansi Cristuha doe lhe'e lastoole, lania nna guanca banba espíritu guele-na, de chi beni Tata Do Iyyabaaha le benni runi nu anca tsee loe, cumu cuerpu guele-na libunna chi ancana yatti lo Tata Do Iyyabaaha, lo ni'a gue de ancana nu runi nu lä anca tsee.<sup>11</sup> Gansi Espíritu gue Tata Do Iyyabaaha Benni belhidhe Jesucristuha lhe'e baa atta yu'u ca nu yatti-na doe lhe'e lastoole, Benni beni beacani Ben-na guaba utee elha nabani gue cuerpu guele-na, cuerpu nu ratti yies lo yu-ni. Unná unie len Espíritu guee do lhe'e lastoole-na.<sup>12</sup> Larcala nna ca benni ria le Jesús, ri'i nna chi daa lori tse'eri udori tisa, ttiaca bittu tse'eri udori tisa gue nu raca le cuerpu gueri-ni unri.<sup>13</sup> Cumu gansi lebi'i se'ele rudole tisa runle nu ridá le cuerpu guele-na, tsia nittibale, ttiaca gansi lebi'i se'ele rixuinle Espíritu gue Tata Do Iyyabaaha qui rudhanle runle nu lä anca tsee runleha, lanialiba nna gatta elha nabani guele ttu dia lii lo Tata Do Iyyabaaha.

<sup>14</sup> Iyába ca benni runi nu rá Espíritu gue Tata Do Iyyabaaha ancacabi xi'ini Ben-na.<sup>15</sup> Cumu lebi'i nna läga uxíle Espíritu gue Tata Do Iyyabaaha qui edese'ele edeacale nu tto'o lo sina gue elha rasi-na, sinuqui uxíle Espíritu-na qui acale xi'ini Tata Do Iyyabaaha, cumu Espíritu gue Ben-na runie rinneri rári: “¡Tata xisto quia!”<sup>16</sup> Cuinaba Espíritu gue Tata Do Iyyabaaha rixxi'enie espíritu gueri, ri'i chi ancari xi'ini Tata Do Iyyabaaha.<sup>17</sup> De chi ancari xi'inie, anáguuba chi ancari benni ralhari dhíri nu chi begüee tisa utee

lenri, iyába nu uxí Cristuha anáguaaba ancana gueri, ri'i nna chi rateri nnanna loesi nu guate Benniha qui anáchu itupari Benniha cuequi xeni Tata Do Iyyabaaha.

<sup>18</sup> Neti nna rudhaca lasia, elha disa ruyúri nnanna tsa läga dhana acana atti modu de xxeni anca elha tsee xeni ga'ana tsee utee Tata Do Iyyabaaha gueri tiempu chi daba isía. <sup>19</sup> Iyába ca nu beni Ben-na se'e yies lo yu chi se'ecana ubeda isía sá atti ule'e lo Tata Do Iyyabaaha nupaxa anca xi'inie. <sup>20</sup> Cumu iyába ca nu beni Ben-na se'e yies lo yu binitti nu tsee ancacana, läga lacana uca lecani uca aná, sinuqui Tata Do Iyyabaahaba chi boca'ane aca aná, ttiaca guateba ttu elha xen lasi guecani, <sup>21</sup> godilábe cana lo nu lä anca tsee runi rinitticana nu anquinna cana attiba nu tto'o lo sina, qui anáchu galhacana tse'ecana atta ga'ana tsee tse'e ca xi'inie Tata Do Iyyabaaha odile. <sup>22</sup> Ri'i nna yuri, axta nnanna iyába ca nu beni Tata Do Iyyabaaha se'e yies lo yu, ribesdicana de ruyúcana elha disa, attiba ttu nuila rutía lhe'eni cu'u xi'inni. <sup>23</sup> Läga sunru ca nu beni Ben-na se'e yies lo yu ratecana, anáguaaba rateri ri'i ca benni chi uxíri Espíritu gue Tata Do Iyyabaaha, Benni rule'e lo nu tsee ute Tata Do Iyyabaaha lenri, tsitsiguuba nu racani lhi'u lhe'e lastoori laca se'eri ribedari isía sá edí Tata Do Iyyabaaha ri qui acari xi'inie, lania nua odile ca cuerpu gueri-ni. <sup>24</sup> Ri'i nna de xen leri gue nu rá Tata Do Iyyabaaha, nuarca bodilá Ben-na ri. Ttiaca gansi chiba uxíri nu ribedari dhíriha, lania nna lärga anca nua nu se'eri ribedari dhíri, cumu ttu nu chiba uxíri lärga dica tse'eri cuedari nua.

<sup>25</sup> Ttiaca gansi se'ebari ribedari nu bittu chi uxíri, ri'i nna len pasensiba tse'eri cuedari nua.

<sup>26</sup> Anáguaaba unná rateri, Espíritu gue Tata Do Iyyabaaha raca lanie ri atti bittu guacari innábari lo Tata Do Iyyabaaha, cumu ri'i nna bittu yuri bixa innábari. Ttiaca cuinaba Espíritu gue Tata Do Iyyabaaha runie ruegu lo Ben-na qui aca lanie ri len ttu ts'i'i nu bittu aca gueri quixxi'ari na len tisa. <sup>27</sup> Tata Do Iyyabaaha Benni yuxeabe iyába nu raquin lhi'u lhe'e lastoo ca benni, yuxeabe bixa nua raca le Espíritu guee-na, cumu suntteba nu raca le Tata Do Iyyabaaha unie len ca benni chi anca guee rinnaba Espíritu guee-na loe.

<sup>28</sup> Ri'i nna guayúbari Tata Do Iyyabaaha runie qui iyába nu rateri rixuuna runi qui salía tseenri ri'i ca benni raquinri guee, ca nu chi uxie lo neda guee attiba chi ga'ananie aca. <sup>29</sup> Cumu desdeba atti nía chi yu Tata Do Iyyabaaha nupaxa aca benni guee, ca bi'linihaguuba

chi ga'ananie acacabi atti anca xi'inie Jesucristuha, qui anáchu aca Benniha Benni lo gue iyába ca benni tsia lecabí Ben-na attiba ri'i.

<sup>30</sup> Ca benni chi ga'ananie acacabi xi'inie nna ca bi'iniaguaba uxie lo neda guee, ca benni uxie lo neda guee nna benie acacabi benni bitturu tulha gueni te, ca benni benie acacabi benni bitturu tulha gueni te nna benie acacabi benni inná xxeni leni lo Ben-na.

<sup>31</sup> Nianna ¿bila anca nu innári gue delo iyá unní? Gansi Tata Do Iyyabaaha due len ri'i, tsa läganu dhana bixa udhaquinna ri.

<sup>32</sup> Tata Do Iyyabaaha nna berú iqui berú lee Jesucristuha Benni anque cuinaga xi'inie, qui betee Benniha uttie cuenta gue iyábari. Larcala, ¿tti modu lä ute Ben-na itupa len xi'inie-na iyába nu te guee len ri'i? <sup>33</sup> ¿Nú eyaxinna innábana aca elha uxtisi gue ca benni chi becuae Tata Do Iyyabaaha anca guee? Inqui cuinaba Tata Do Iyyabaaha chi re, ri'i chi ancari benni bitturu tulha gueni te.

<sup>34</sup> Nianna ¿nú nua eyaxinna udelha iyyan ri? Nuttuba xa. Cumu cuinaba Jesucristuha uttie cuenta gueri, güeaniba beacanie lhe lee nna doe daca lhuitta derechu gue Tata Do Iyyabaaha rinnabe lo Benniha aca lanie ri. <sup>35</sup> ¿Nú dhana unna qui bitturu acani Cristuha gueri? ¿Si atti uyúri elha disa, aca? ¿Si atti bittu aca uyú benni ri, aca? ¿Si atti uríala benni ri, aca? ¿Si atti bittu te gori, aca? ¿Si atti bittu te bixa ucuri, aca? ¿Si atti ruxunnina gueri bixa dhacari, aca? ¿Si atti runcana uttican ri leni espada, aca? <sup>36</sup> Attiba dia lo ca sitsi gue Tata Do Iyyabaaha atta rá:

Lo ni'a guelu iyába ca sá-na ruxunnina guetu gattitu.

Attiba rudhacacana ttu carne'e nu chi ga'ana gattina aníaba runcana len ri'itu.<sup>a</sup>

<sup>37</sup> Ttiaca ri'i nna guardabari lo iyába nu rateri de du Jesucristu benni racaxxattanie gueri len ri'i. <sup>38</sup> Cumu neti nna yuxeba, tsa läganu dhana unna qui bitturu aquin Tata Do Iyyabaaha gueri. Ni elha nabán gueri lhe niguaba elhuttiha lhe niguaba ca ingeli-na lhe ni ca nu rinnabiana lhe niguaba ca be xxegüi ra xxeni lequinna lhe niguaba nu rateri nnanna lhe niguaba nu sateri lhe'e ca sá chi daba lhe. <sup>39</sup> Ni nu se'e axta liali lhe ni nu se'e axta lhi'u yuli lhe niguaba attu bixarua de lo iyá nu beni Tata Do Iyyabaaha lhe tsa bittu dhana unna qui bitturu acani Tata Do Iyyabaaha gueri de nu guate Jesucristu Benni bananie ri.

---

<sup>a</sup> 8:36 Salmo 44:22

### Tata Do Iyyabaaha uxie ca benni Israel

**9** Neti nna de anca benni ria lasia Cristuha nuarca rinneba nu anca gualí, läga run lasia. Espíritu gue Tata Do Iyyabaaha Benni do lhe'e lastooa-ni nna guarixxi'abanie neti guancaba nu rinnea-na nu anca gualí. <sup>2</sup>Neti nna tsitsiba racatetia, satíaba rudú guatena lhe'e lastooa-ni lhe. <sup>3</sup>Cumu axtaba risía racatia, masqui quixa quia lo Tata Do Iyyabaaha, aca ttu nu irlines Cristuha lhe gansi unnuha ixuu uni qui lhá ca benni quia anca benni Israel-na. <sup>4</sup>Lacabi ancacabi ca benni datía Israel, ancacabi ca benni bedí Tata Do Iyyabaaha qui acacabi xi'ini Ben-na lhe lee nna udíbe len lacabi leni elha ra xxeni le ga'ana tsee guee. Len ca bi'in-na nua bete Ben-na ca ley begüee Moisés, boca'an tsitsie ca tisa begüee len lacabi lhe utixi'aguabanie cabi gaxasná ulhacabi guee qui cuequi xencabi Ben-na lhe gue nu tsee chi begüee tisa utee len lacabi lhe. <sup>5</sup>Lacabi ancacabi ca benni datía ca benniola uca nu lo gueri use'e atti nía, anáguaba Cristuha lhe lotia gue ca bi'iniha guaba dee atti ulie yies lo yu-ni. Lee anque Dios rinnabia iyácea. Ben-na satía cuequi xenrie. Amén.

<sup>6</sup>Tata Do Iyyabaaha nna lägala run Benniha nu chi begüee tisa unie len ca benni Israel-na, gueba nna läga iyá ca benni Israel-na ancacabi benni becuae Ben-na acacabi benni guee. <sup>7</sup>Bittuguuba iyá ca benni datía Abraham ancacana xi'ingabi, sinuqui Tata Do Iyyabaaha re Abraham: "Ca xi'ini Isaac acacana benni datíalu."<sup>a</sup> <sup>8</sup>Unní nna runna ritedeenri, läga de datía ttu benni Abraham nuarca ancana xi'ini Tata Do Iyyabaaha. ¡Dica! Sunruba ca benni beaca xi'ini bi'in-ni begüee Tata Do Iyyabaaha tisa aca xi'ini Abraham, gualíga ancacabi xi'ini Tata Do Iyyabaaha. <sup>9</sup>Cumu Tata Do Iyyabaaha begüee tisa len Abraham re bi'iniha: "Attu idaha ita, attiba tu nnanna lania nna isía ttu xi'ini Sara-na."<sup>b</sup>

<sup>10</sup>Ttiaca läga sunru unnuha uca, anáguaba Rebeca bijaguuba xi'ini, ca cuachi ulu'ubia nna ucacana xi'ini Isaac bi'in-ni anca benniola gueri. <sup>11</sup>Ca untoha nna läga chi uli ca nua, bittuguuba chi bencana ttu nu anca tsee o ttu nu bittu anca tsee lhe qui anáchu nna be'an tisa, Tata Do Iyyabaaha runie nu chi ga'ananie unie, lee nna raxie ca benni raca lee raxie, läga de bencana ttu bixa nu anca tsee. <sup>12</sup>Tata Do Iyyabaaha re Rebeca: "Xi'inlu nu xeni-na ixuuna lo

<sup>a</sup> 9:7 Génesis 21:12    <sup>b</sup> 9:9 Génesis 18:10

sina gue nu güexxa-na.”<sup>a</sup> <sup>13</sup>Ucaba attiba dia lo ca sitsi gue Tata Do Iyyabaaha: “Neti nna ucatia gue Jacob, Esaú nna bittu ucatia gueni.”<sup>b</sup>

<sup>14</sup>Nianna ¿si de unnuha nna innári dequi läga anca tsee nu run Tata Do Iyyabaaha? ¡Dica! Tsa läga dica innári anía. <sup>15</sup>Cumu Tata Do Iyyabaaha re Moisés: “Neti nna satúa lasia benni aca lasia satúa lasia na, esi'ibatia benni aca lasia esi'itia na lhe.”<sup>c</sup> <sup>16</sup>Larcala nna läga ratúa le Tata Do Iyyabaaha ttu benni cumu de raca leni satúa le Ben-na na, niguaba de runna duelha runna ttu bixa lhe qui satúa le Ben-na na, sinuqui Tata Do Iyyabaaha liba ratúa lee ca benni redá lee satúa lee. <sup>17</sup>Lo ca sitsi gue Tata Do Iyyabaaha rixxi'a rá Benniha unnee re Faraón nu unnabia yiesi lá Egipto: “Neti bodúa lu qui acalu nu rinnabia. Lu ixuutia qui ule'e loa neti anca nu ra xxeni leni, aníaliba nna una iyánea benni se'e yies lo yu-ni nuxa anca.”<sup>d</sup> <sup>18</sup>Larcala, Tata Do Iyyabaaha ratúa lee ca benni raca lee satúa lee, laguabe runie qui reaca tsitsi lastoo ca benni raca lee unie tsitsi lastoocani, qui bittu tsia lecanie.

<sup>19</sup>Ttiaca lebi'i nna innába tisale neti innále: “Gansi anía anca, ¿biacala rудelha iyye ca benni lo ni'a gue nu runcana? Cumu tsa läganu te dhana edúna lo nu re lee Tata Do Iyyabaaha unie.”

<sup>20</sup>Lebi'i nna ¿nú ancale qui redú disale lo Tata Do Iyyabaaha? ¿Si guaca gue ttu yedhu yu góna ttu nu ben-na na? ¿Biaca neti aníla benlu?<sup>e</sup> <sup>21</sup>Cumu nu run yedhuha nna guacaba gueni unna len gunaha nu racaba leni, la leni gunahaba unna ttu canti tsee nu ixuuna dhona atta ga'ana tsee, attu-na nna acana nu ixuuna attiba rixuu adí ca lorsina benni te lhe'e yo'o.

<sup>22</sup>Anáguaba Tata Do Iyyabaaha, lee nna uxacabe ule'e loe elha risa'a iqui guee len ca benni, ule'e loe len ca benni lee anque Benni ra xxeni leni lhe. Lee nna betto bechíabe uxíbe elha xen lasi, lägabi bedhaque ca nu ralha dhi elha disa chi ga'ana tsia nitti. <sup>23</sup>Anába benie qui bele'e loe elha ra xxeni le ga'ana tsee guee len ca benni besi'inie, lee nna chiba ga'ananie acacana nu edí baa nu tsee utee len lacana. <sup>24</sup>Ri'i nua ancari ca benni uxi Tata Do Iyyabaaha, läga sunru ca benni Israel becuae Ben-na, anáguaba becuae ca benni bittu anca benni Israel.

<sup>a</sup> 9:11-13 Génesis 25:23

<sup>b</sup> 9:11-13 Malaquías 1:2-3

<sup>c</sup> 9:15 Éxodo 33:19

<sup>d</sup> 9:17 Éxodo 9:16

<sup>e</sup> 9:20 Isaías 45:9

<sup>25</sup> Lee nna benbe attiba rába lo sitsi boca'ana profeta Oseas, atta rá:

Ca benni bittu anca nu lo yiesi quia,

neti nna upea cana:

“Lebi'i ancale nu lo yiesi quia.”

Ca benni bittu racatia guecani nna upea cana:

“Lebi'i ancale benni racatia gueni.”<sup>a</sup>

<sup>26</sup> La lo yu atta se'e ca benni rá Tata Do Iyyabaaha cana:

“Lebi'i nna läga benni lo yies quia-na le”,

la níaguaba nua gá Benniha cana:

“Lebi'i gatta lále xi'ini Tata Do Iyyabaaha Benni doe banie.”<sup>b</sup>

<sup>27</sup> Anáguauba profeta Isaías, utixxi'aguabi gue ca benni Israel-ni, rábi:

Masquiba tticaxa ixe ca benni Israel-na raca,

attiba yuxi re ro'o indattoo-na,

sunruba ttulhe cana lhá.

<sup>28</sup> Cumu Benni bananie ri-na chitte deoba unie elha uxtisi nu  
chi re unie gue ca benni se'e itúba yies lo yu-ni.”<sup>c</sup>

<sup>29</sup> Attiba chi rá profeta Isaías ttua:

“Ttirca bittuba boca'ana Benni bananie ri-na,

Benni ra xxeni le-na lhe ttu chupa ca benni datíari,

lania nna chiba uluxari attiba yiesi lá Sodoma lenna yiesi lá  
Gomorra.”<sup>d</sup>

### Ca benni Israel bittu güia lecani Cristuha

<sup>30</sup> ¿Bila innári ganna? Ca benni dittu bittu anca benni Israel, ca nu bittu runi gaxasná qui uncana nu anca tsee lo Tata Do Iyyabaaha, de güia lecani Benniha nna ca unnuala chi beni Ben-na nu bitturu tulha gueni te. <sup>31</sup> Ttiaca ca benni Israel, ca nu beni duelha uncana nu rá lo ca ley betee Tata Do Iyyabaaha len Moisés, qui acacana nu bitturu tulha gueni te, tsa läga udácana e'eyucana acacana nu bitturu tulha gueni te. <sup>32</sup> Nianna ¿biaca lä udácana? Cumu läga bencana acacana nu bitturu tulha gueni te de tsia lecani Tata Do Iyyabaaha, sinuqui lacana güia lecani dequi de unbacana nu anca tsee nna acacana nu bitturu tulha gueni te lo Tata Do Iyyabaaha. Denua nna nuarca bichecucana leni “iyya nu re qui ichecucana”. <sup>33</sup> Attiba rá Tata Do Iyyabaaha lo ca sitsi guee-na atti utixxi'e gue Cristuha re:

<sup>a</sup> 9:25 Oseas 2:23

<sup>b</sup> 9:26 Oseas 1:10

<sup>c</sup> 9:27-28 Isaías 10:22-23

<sup>d</sup> 9:29 Isaías 1:9

Neti cuequia lhe'e yiesi Sión ttu iyya nu ichecule iqui-ni, ttu iyyattoo nu urixxiettana le.

Cristuhaba Benniha anque iyyaha.

Ttiaca ca benni tsia lecani Benniha nna tsa läga un Benniha ettuin ca nua.<sup>a</sup>

**10** Ca benni ria le Jesús, neti nna nu racaruni lastooa-ni lhe nu rinnaba lo Tata Do Iyyabaaha lhe ancana odile ca benni quia anca benni Israel. <sup>2</sup> Neti nna yuxeba, lacana nna tsitsiba nu runcana gue Tata Do Iyyabaaha, ttiaca läga runcana nu ga'anani Ben-na anca uncana. <sup>3</sup> Cumu bittu raca lecani oquinna iquicani, sunruba Tata Do Iyyabaaha anque Benni runie aca ca benni nu bitturu tulha gueni te. Lacana nna la labacana reguila lecani uncana acacana nu bitturu tulha gueni te, läga rudo nagacani uncana nu runi Benniha mandadu aca qui unie cana nu bitturu tulha gueni te. <sup>4</sup> Cumu ca ley boca'ana Tata Do Iyyabaaha len Moisés, beda Cristuha belhuxa loe nu rá loque. Nnanna nna iyába ca benni tsia lecani Cristuha nna lee unie qui acacana benni bitturu tulha gueni te.

<sup>5</sup> Moisés benbi lo sitsi rixxi'abi gue gaxasná uni benni qui acana nu bitturu tulha gueni te lo Tata Do Iyyabaaha, labi nna rábi: “Benni dhana unna iyá nu rá lo ca ley-na, guaca banbana de udonisa gue iyá nu rá lo ca ben-na.”<sup>b</sup> <sup>6</sup> Ttiaca benni tsia leni Cristuha nna de tsiaba leni Benniha nna acana nu bitturu te tulha gueni lo Tata Do Iyyabaaha. Unnuha nna läga dica aquin lhi'u lhe'e lastooni: “¿Nú tsopi iyyabaaha qui unna chadi Cristuha?”<sup>c</sup> <sup>7</sup> Bittuguuba dica innána: “¿Nú chadi lhe'e belha'a chulha nu bittu ganca lhuxana qui salhidhana Cristuha lagüi gue ca nu yatti-na?”<sup>d</sup> Nianna ¿bila rá lo ca sitsi gue Tata Do Iyyabaaha? ¿Läba ganna rá?: “Gaxxaba atta dulu se'e ca tisa-na, ro'obalu lhe lhi'u lhe'e lastoobalu lhe yu'u ca tisa-na.”<sup>e</sup> Ca tisa-na ben-na requitu rixxi'atu, ca ben-na raca duelha tsia lelu. <sup>9</sup> Gansi lu dhi ro'olu innelu innálu Jesús anque Benni bananie lu, tsia lelu itú iqui itú lelu Tata Do Iyyabaaha belhidhe Benniha lhe'e baa atta yu'u ca nu yatti-na, lania nna gualábalu. <sup>10</sup> Cumu len lastoori ria leri Tata Do Iyyabaaha, qui runie ri benni bitturu tulha gueni te, len ro'ori nna riria tisa rixxi'ari ri'i nna ria leri Jesucristuha. Análiba nna odile ri.

<sup>a</sup> 9:33 Isaías 28:16    <sup>b</sup> 10:5 Levítico 18:5    <sup>c</sup> 10:6-8 Deuteronomio 30:12-14

<sup>11</sup> Lo ca sitsi gue Tata Do Iyyabaaha rá: “Ni ttu ca benni ria le Ben-na tsa läga unie ettúquinna.”<sup>a</sup> <sup>12</sup> Cumu lo Tata Do Iyyabaaha, ttuba anca ca benni Israel-na len ca benni bittu anca benni Israel, la ttuba Ben-na anque Benni bananie iyába benni, lee nna tsapa rute tame nu reasani iyába ca benni rinnaba loe. <sup>13</sup> Ráguba lo ca sitsi guee-na: “Iyába ca benni innába lo Benni bananie ri-na qui odilá Ben-na cana, godilába Ben-na cana.” <sup>14</sup> Ttiaca ¿gasná innábacana lo Ben-na gansi bittuba chi güia lecani Ben-na? ¿Gasná tsia lecani Ben-na, gansi bittuba chi bienquinna gue Ben-na? ¿Gasná iyienquinna gue Ben-na, gansi nuttuba te quixxi'enna cana gue Ben-na? <sup>15</sup> ¿Gasná tsiacana quixxi'acana gue Ben-na, gansi nuttuba te idhelan cana? Attiba rá lo ca sitsi gue Tata Do Iyyabaaha: “Attula de tsee rule'e atti risía ca benni rixxi'a ca tisa gue Tata Do Iyyabaaha.”<sup>b</sup>

<sup>16</sup> Ttiaca läga iyá ca benni ria lecani gue ca tisa gue Jesús. Raxxíbana attiba rá profeta Isaías atti rábi: “Tata, ¿núrlaba ria leni gue nu rixxi'atu-ni?”<sup>c</sup> <sup>17</sup> Larcala nna atti rienin ca benni ca tisa gue Cristu lania nna ria lecani Tata Do Iyyabaaha.

<sup>18</sup> Ttiaca neti nna rinnaba tisa ria: ¿Si gualí bittu chi bienquinna ca tisa-na? ¡Chiba biyienquinna ca tisa-na! Cumu lo ca sitsi gue Tata Do Iyyabaaha rá:

Iyába ca benni se'e itúba yies lo yu-ni bienquinna ca tisa  
utixxi'a ca benni güequi utixxi'a ca tisa-ni.  
Axtaba lhe'e ca yiesi se'e axta xi'a gue yies lo yu-ni bisín ca  
tisaha.<sup>d</sup>

<sup>19</sup> Neti nna rinnaba tisa attu libe ria: ¿Si bittuba utedaani ca benni Israel-na gue nu utixxi'a ca bi'iniha aca? ¡Utedaagalaquinna! Cumu lola Moisés unnebi rábi aní rá Tata Do Iyyabaaha:

Neti unia gapale malisi gue ttu yiesi nu bittu anca yies quia,  
unia ise'enle de unia yuda ttu yiesi diti bittu raca leni  
iyieninna.<sup>e</sup>

<sup>20</sup> Lixxaba utixxi'a profeta Isaías ca tisa unnee Tata Do Iyyabaaha atti re:

Ca nu bittu reguilacana netiha labettetti'acana neti,  
len ca nu bittu rinnaba tisacana netiha la bele'e loa.<sup>f</sup>

<sup>a</sup> 10:11 Isaías 28:16

<sup>b</sup> 10:15 Isaías 52:7

<sup>c</sup> 10:16 Isaías 53:1

<sup>d</sup> 10:18 Salmo 19:4

<sup>e</sup> 10:19 Deuteronomio 32:21

<sup>f</sup> 10:20 Isaías 65:1

<sup>21</sup> Rixxi'aguaba Isaías gue ca benni Israel-na rábi, aní rá Tata Do Iyyabaaha: “Betú sába daa náya raxia ca nu diti bittu rienini, lä rudo tisa quia.”<sup>a</sup>

### Tata Do Iyyabaaha läga tsa ulu'u ni'e ca benni Israel na

**11** Denuala nna rinnaba tisa ria: ¿Si ulu'uba ni'a Tata Do Iyyabaaha ca benni guee anca benni Israel-na? ¡Dica, läga bedhá iquie ca unná! Cumu neti lhe ancaguaba benni Israel, anca benni datía Abraham lhe benni baba len ca benni datía Benjamín lhe. <sup>2</sup>Läga ulu'u ni'a Tata Do Iyyabaaha ca benni guee anca benni Israel, ca nu desdeba atti nía becuae aca benni guee. Lebi'i nna guayúbale gue nu rá lo ca sitsi gue Tata Do Iyyabaaha atta rixxi'a gue nu guate profeta Elías, bi'iniha nna tsitsiba unnebi rulisabi Tata Do Iyyabaaha gue nu run ca benni Israel-na. Labi nna rábi: <sup>3</sup>“Tata, chibetticana ca profeta gueluha, chi betse'elocana ca becoa gueluha lhe. A sunruba neti be'ana, nnanna nna rdacaguabacana utticana neti.”<sup>b</sup> <sup>4</sup>Ttiaca Tata Do Iyyabaaha becabie re Elías: “Neti chi ulequiesia gasi mil ca benni quia ca nu bittu chi bedú xibicani lo nu rá ca benni dios lá Baal-na.”<sup>c</sup> <sup>5</sup>Anía guabunni nnanna guase'eguaba ttu chupa ca benni chi bedaa lee Tata Do Iyyabaaha becuae. <sup>6</sup>Labe redá lee rucue ca benni, läga de ancacana nu runi nu anca tsee nuarca rucue cana, cumu gansi rucue cana de ancacana nu runi nu anca tsee, lania nna lärga anca nu run Ben-na nu redá lee cuentaba rute len ri'i.

<sup>7</sup> Larcala, ca nu Israel-na läga udávana e'eyucana acacana benni bitturu tulha gueni te lo Tata Do Iyyabaaha, ca benni becuae Ben-na liba ucacana benni bitturu tulha gueni te. Adívana nna benba Ben-na ucacana nu dhiti qui bittu güia lecani. <sup>8</sup>Attiba dia lo ca sitsi gue Tata Do Iyyabaaha atta rá: “Labe benie qui ucacana nu lä caa elha rieni gueni, benie cana attiba nu xua loni lhe attiba nu cuesu lhe”. Aníaba ancacana axta nnanna.<sup>d</sup> <sup>9</sup>David bi'ini uca nu unnabia gue ca benni Israel unnebi rábi:

Ca laní runcan-na eyacacana attiba ttu yalhi lhe attiba ttu  
yexxa lhe

<sup>a</sup> 10:21 Isaías 65:2

<sup>b</sup> 11:3 1 Reyes 19:10

<sup>c</sup> 11:4 1 Reyes 19:18

<sup>d</sup> 11:8 Deuteronomio 29:4; Isaías 29:10

qui iyinnacana loni, lania nna dhicana elha disa ralhacana dhicana.

<sup>10</sup> Eyacaguaba ca iyya loquinna nu xua bea loni lhe qui bitturu iláquinna, edoruba cu'ecani ttu dia liiba lhe.<sup>a</sup>

### Tata Do Iyyabaaha odile ca benni bittu anca benni Israel

<sup>11</sup> Neti nna rinnaba tisa ria: ¿Si tsaba dia nitti ca benni Israel-na? ¿Si bitturba eyequicana odaxxucana neda gue Tata Do Iyyabaaha? ¡Dica, läga anía anca! Delaba unnuha nna lo ni'a gue de lä bedo ca nu Israel-na tisa nna odilá Tata Do Iyyabaaha ca benni bittu anca benni Israel-na, aníaliba nna qui rapa ca nu Israel malisi nianna dha lecani lhácana. <sup>12</sup> Nianna gansi de bexxi ca benni Israel-na bencana nu lä anca tsee, lo ni'a gue nua nna bisía ttu elha tsee gue ca benni se'e yies lo yu-ni, ¿tiliga tsee aca gansi chi bea ca benni Israel-na bequicana odaxxucana neda gue Tata Do Iyyabaaha?

<sup>13</sup> Ttiaca tetia ttu nu upeale lebi'i ca benni bittu anca benni Israel. Cumu de anca apóstol udhelha Tata Do Iyyabaaha len lebi'i ca benni bittu anca benni Israel, larcala nna tsitsiba rugüea lidhaca sina runia-ni. <sup>14</sup> Runia aná qui nicadiga guapaba ca benni quia anca benni Israel-na malisi guele, lania nna nicadiga güegüe'lhaba lecani odaxxucana neda gue Tata Do Iyyabaaha qui lhá ladiba ttu chupacana. <sup>15</sup> Cumu gansi nu ulu'u ni'a Tata Do Iyyabaaha ca benni Israel-na, unnuha bixuuna beni qui beaca tsee leni Ben-na adí ca benni se'e yies lo yu-ni, adílaba de tsee aca atti olábie ca benni Israel-na attu libe. Unnuha ancana attiba ttu benni chi utti nianna eyaquinna attu libe. <sup>16</sup> Gansi ttaxtila benni raca primera ririesie qui raque gue Tata Do Iyyabaaha, anáguaba itúba cua ttaxtila rexxaha anque gue Ben-na. Gansi lhu ttu yaga chi biriesna qui acana gue Tata Do Iyyabaaha, anáguaba ca xiqui yagaha chiguuba anca ca nua gue Ben-na.

<sup>17</sup> Ri'itu ca benni Israel-na ancatu attiba ttu ya olivo tsee, ca nu ulu'u ni'a Tata Do Iyyabaaha nna ancacana attiba ca xiqui biruu gue yagaha, qui lebi'i ca benni bittu anca benni Israel anca attiba lixxina ya olivo, nu benoni atta biruu ca xiqui ya olivo tseeha. Anía uca nna redibaale elha tsee anca gue ca benni Israel-na, attiba ca

---

<sup>a</sup> 11:9-10 Salmo 69:22-23

xiqui ya olivo nu anca lixxina olivo tseeha redibaacana elha nabani rute lhu yagaha.<sup>18</sup> Larcala bittu unle ttaba aquinle dequi lebi'i ancale attiba xiqui tseeru gue yaga-na atti ca xiqui-ni biruuha. Ttiaca gansi lebi'i ribequixen lele, gualorexxa lele läga lebi'i rutele elha nabani gue lhu-na sinuqui lhu-na la rutena elha nabani guele.

<sup>19</sup> Gansi lebi'i innále: "Gualígala, ttiaca denuala nna nuarca biruu ca xiqui yagaha qui ri'itu nna benoentu lo xiqui ya olivuha."

<sup>20</sup> Gualígala, lacana biruucana lo xiqui yagaha de bittu güia lecani Tata Do Iyyabaaha, lebi'i nna de riarba lele Ben-na nuarca benoenle lo xiqui ya olivo tsee-na. Larcala nna bittu unle ttaba, nu unlale nna gualgásini gue nu aca gansi itúale lo xiqui ya olivo tsee-na.<sup>21</sup> Cumu gansi Tata Do Iyyabaaha bittu uzie elha xen lhasi gue ca benni anca cuinaga xiqui yaga tseeha de bittu güia lecani Ben-na, anágua lebi'i bittuguuba dhie elha xen lasi guele gansi udhanle ria lele Ben-na.<sup>22</sup> Gualugüiarga, Tata Do Iyyabaaha anque ttu Benni tsee, ttiaca anágua lebi'i anque Benni rute elha disa gue ca benni. Anque ttu Benni rute elha disa gue ca benni te tulha gueni ttiaca len lebi'i nna anque Benni tsee, gansi gusiguile tse'ele utele lidhaca nu tsee runie len lebi'i, cumu gansi bitturba utele lidhaca nu runie len lebi'i nna ttu tsaba cua Ben-na le lo yaga tsee atta siale-na.<sup>23</sup> Gansi ca benni Israel-na edú locana tsia lecani Tata Do Iyyabaaha, Benniha nna osia dacabe cana atta utúe canaha, cumu xxeni ra le Ben-na qui unie enoquinna attu libe atta bitúacanaha.<sup>24</sup> Cumu lebi'i ca benni bittu anca benni Israel, ancale attiba xiqui ya olivo nu anca lixxina ya olivo tseeha, lebi'i nna birecule lo yaga atta sialeha, nianna bedo Ben-na le lo ya olivo tseeha qui benoenle atta bittu dica cuialeha, larcala nna titialiga unie len ca benni Israel-na, cumu ri'itu ancatu cuinaga xiqui ya olivo tseeha, ri'itu ebía dacabatu lo ya olivo nu anca ya guetu attu libe.

### **Odilába Tata Do Iyyabaaha ca benni Israel-na**

<sup>25</sup> Ca benni ria le Jesús, neti nna raca lasia unale gue nu run Tata Do Iyyabaaha bittu chi bina ca benni, qui bittu unle ttaba aquinle dequi tsitsiba chi yule. Chiba ga'ana aca ttulhe ca benni Israel-na nu diti bittu tsia lecani Tata Do Iyyabaaha, axta liba eda'a ca benni bittu anca benni Israel udaxxucana neda gue Tata Do Iyyabaaha, lania liba nna tsia le adí ca benni Israel-na Ben-na.<sup>26</sup> Dequide lania

liba nna odilá Tata Do Iyyabaaha iyába ca benni Israel-na, attiba dia lo ca sitsi gue Ben-na atta rá:

Lhe'e yiesi Sión iría Benni odile ca benni datía Jacob,  
Benniha nna cue nu lä anca tsee runcana.<sup>a</sup>

<sup>27</sup> Rágua Beniha: Unní tisa chi begüeaa gue nu unia len cana.

Neti nna cuaya ca nu lä anca tsee runcana.<sup>b</sup>

<sup>28</sup> Ca benni Israel-na, de bittu ria lecani ca tisa rixxi'a gue Jesús nuarca bittu se'e tseecana len Tata Do Iyyabaaha. Uca aná qui salía tseena lebi'i ca benni bittu anca benni Israel. Ttiaca Tata Do Iyyabaaha racabanie guetu ca benni Israel-na, lo ni'a gue de becuae ca benniola guetuha acacabi Benni guee. <sup>29</sup> Cumu Tata Do Iyyabaaha nna tsaba rinnee. Gansi chi raxie ttu benni lo neda guee, tsaba raxie nua, gansi chi redá lee rute ttu nu tsee len ttu benni, läga regúe nua. <sup>30</sup> Lebi'i ca benni bittu anca benni Israel, läga bedole tisa gue Tata Do Iyyabaaha ttua, ttiaca nnanna de bittu rudo ca nu Israel-na tisa gue Ben-na, de nua nna nuarca ratúa le Ben-na le. <sup>31</sup> Aníagua bunna anca len ca benni Israel-na nnanna lacana ancacana nu bittu rudo tisa gue Tata Do Iyyabaaha, de unnuha nna lebi'i nna ancale nu ratúa le Ben-na, qui anáchu nnanna attiba ratúa le Ben-na le, anáguaba satúa lee ca benni Israel-na. <sup>32</sup> Cumu laba Tata Do Iyyabaaha benie aca iyábari nu bittu bedo tisa, qui aníaguaba nna dhie elha xen lasi gue iyábari.

<sup>33</sup> ¡Cattipa xxeni anca ca elha tsee gue Tata Do Iyyabaaha, cattipa xxeni anca elha rieni te guee lhe nu ritelínie-na lhe! Ni ttu benni bittu aca gueni ttedeenna gue nu re lee Ben-na unie, nuttuguuba nu te dhana quixxi'ana gue nu roquinna iqui Ben-na runie lhe.

<sup>34</sup> Cumu, tsa läganu te yu-na gue nu rulaba le Benni bananie ri-na, nuttuguuba nu te aca gueni gána Ben-na bixa anca nu unie lhe.<sup>c</sup>

<sup>35</sup> Nuttuguuba nu chi begüeena Tata Do Iyyabaaha ttu bixa lhe qui anáchu lee nna eyequie osi'e gueni utee ttu bixa cuentaba len lana.<sup>d</sup>

<sup>36</sup> Cumu Tata Do Iyyabaahaba benie iyába, labe rute elha naban guecani lhe guebe ancacana lhe. Larcala ¡Ben-na cuequi xeni lee ttu dia lii! Amén.

<sup>a</sup> 11:26 Isaías 59:20

<sup>b</sup> 11:27 Jeremías 31:33-34

<sup>c</sup> 11:34 Isaías 40:13

<sup>d</sup> 11:35 Job 41:11

## Gaxasná dica uni ca benni chi ria le Jesús

**12** Larcala nna ca benni ria le Jesús, neti nna rinnaba len lebi'i gualunchi lo ni'a gue Tata Do Iyyabaaha, gualutsadú itúttele lo Ben-na, attiba ttu úna gue ttu nu bani chi biriesi radi le Ben-na dhie baneda. Cumu unná anca nu radi le Tata Do Iyyabaaha unle loe itú iqui itú lele cuequi xenle Ben-na.<sup>2</sup> Bitturu tse'ele unle atti labi ca benni se'e yies lo yu-ni runcana tiempu se'eri nnanna. Nu unlale nna gualotsia la nu rulaba lele-na qui aníaliba nna dhale otsiale nu chi labile runle. Lanialiba nna ttedeenle gue bixa raca le Tata Do Iyyabaaha unle, Benniha raca lee unle nu anca tsee, nu radi lee lhe nu anca ida'a lhe.

<sup>3</sup>Tata Do Iyyabaaha bedaa lee bodúe neti aca apóstol. Denua nna te ro'a rpea iyábale, ni ttule bittu aquinle ulaba lele dequi ancale nu yuru atti adí benni cumu läga anía anca. Nu unlale nna cua ttu ttule gualulaba tsee lele gue nu anca guele, coa ancaba elha ria lee guele chi betee Tata Do Iyyabaaha len lebi'i.<sup>4</sup> Attiba cuerpu gue ttu benni ttuba anca itúbana, ttiaca ixeba ca nu anca cuerpu gueri-ni, ca unná nna läga ttudi anca sina runi iyácana.<sup>5</sup> Anágua brí'i, masquiba raca ixeri, ttiaca ttuba cuerpu ancari len Cristuha, iyábari den loesri attiba ni'a ná cuerpu gue ttuba benni.

<sup>6</sup>Tata Do Iyyabaaha nna yayabale anca ca elha tsee betee len ri'i, coa nu bedába lee bete len ttutturi. Gansi Benniha bedá lee betee elha tsee lenri quixxi'ari ca tisa rixxi'anie ri, innebari coa riaba leri Tata Do Iyyabaaha.<sup>7</sup> Gansi len atturi betee elha tsee gueri acari benni uni yuda adí benni, unnuhaba unri itú iqui itú leri. Gansi len atturi betee elha tsee gueri acari benni ule'eni adí benni ca tisa gue Tata Do Iyyabaaha, unnuhaba udo leri unri,<sup>8</sup> gansi len atturi betee elha tsee gueri acari benni uttipari le adí benni, unnuhaba udo leri unri, gansi len atturi betee elha tsee gueri acari benni utee nu te gueri len adí benni, erú iqui erú leri uteri nu reasani benni, gansi len atturi betee elha tsee gueri acari nu lo gue adí benni, lhatsiru unri nu daa lori unri, gansi len atturi betee elha tsee gueri acari nu esí'i leni ca benni bittu te nu reasaquinna ri'i nna redacata leri atti uteri nu reasaquinna.

<sup>9</sup>Itú iqui itú lele aquinle gue benni, bittu ni lo ni tisaba innále dequi raquinle guecani. Gualudo lele unle nu anca tsee, gualcu'u ni'ale iyáloba nu lä anca tsee.<sup>10</sup> Aquin gue loesle len si'ile attiba

raquinle gue ttu betsile, gualtsiale gue loesle lhe gualgapa loesle respeto lhe.<sup>11</sup> Gualuttipa lele gualuni nu daa lole unle, bittu gaxale, itú iqui itú lele gualcueni lo sina gue Tata Do Iyyabaaha.

<sup>12</sup> Gualedaca lele gue nu chi xen lele utee Tata Do Iyyabaaha len lebi'i, gualutto gualuchía atti ratele ruyúle elha disa lhe. Tsa bittu udú sile innele len Tata Do Iyyabaaha.

<sup>13</sup> Gualun yuda ca benni ria le Jesús len nu reasaquinbi, lhatsiru gualuni len ca benni yu'u neda daa eya'an satti lhe'e lisle lhe.

<sup>14</sup> Gualnnaba lo Tata Do Iyyabaaha salía tseena ca benni bittu raca uyúcanle-na, bittu quele iquicani, gualnnabala aca len Ben-na cana.

<sup>15</sup> Gualtse'e gualedaca lele len ca benni se'e redaca lecani, gualcuesi len ca benni se'e ribesna lhe.

<sup>16</sup> Lhatsiru gualtse'e len loesle, bittu unle ttaba. Nu unlale nna ttuba gualuni ancale len ca benni bittu ancacabi nu ra xxen leni. Bittu unle dequi ancale nu yuxxatta.

<sup>17</sup> Nuxa benni uni nu lä anca tsee len lebi'i nna bittu aquinle osi'ile gueni unle nu lä anca tsee len lana. Gualunla duelha gualuni nu anca tsee lo iyába benni. <sup>18</sup> Gaxaba bedaa dhale gualun duelha tse'ele lhatsiru len iyába benni. <sup>19</sup> Ca benni ria le Jesús, bittu eyequile bixa udhaquinle benni beni nu bittu anca tsee len lebi'i, nu unlale nna gualoca'an nua las ná Tata Do Iyyabaaha. Cumu lo ca sitsi gue Ben-na rá: "Netiba ralha utea elha disa gue ca unná, len netiba quixacana gue nu bencana rá Benni bananie ri-na."<sup>a</sup>

<sup>20</sup> Larcala, "gansi nu lä raca uyún luha ritunna begüee nua nu gona, gansi rebis nua, begüee nua inda i'iyana. Cumu gansi lu unlu anía, nu lä raca uyún luha nna exinanina de ettúbinna gue nu bedhacan lu." <sup>21</sup> Bittu dhielhalu ixúyielu unlu nu lä anca tsee, sinuqui benla nu anca tsee, qui dhalu udú ni'alu iqui nu lä anca tsee-na.

### Gualdo tisa gue ca nu rinnabia-na

**13** Iyába benni raca duelha udocana tisa gue ca uxtisi rinnabiana, cumu läganu te ancana uxtisi lä bodúba Tata Do Iyyabaaha na, iyába ca uxtisi-na Tata Do Iyyabaahaba rose'ecana. <sup>2</sup> Larcala, benni redú disana lo ca uxtisi-na, lo Tata Do Iyyabaahaba nua redú disana, cumu de bose'e ca unná. Ca benni rese'e disa lo ca

---

<sup>a</sup> 12:19 Deuteronomio 32:35

unná nna elha disa guebacani rilacana.<sup>3</sup> Cumu ca nu rinnabia-na läga se'ecana qui unniesquinna ca benni runi nu anca tseena, sinuqui se'ebacana qui unniesquinna ca nu runi nu lä anca tseena. Gansi bittuba rdacalu gasinlu lo ca nu rinnabiana, lu nna lhatsiru bedú lelu, lania nna guanaba ca nu rinnabiana lu nna tseeba anca nu runlu.<sup>4</sup> Cumu ca unná rixuuni Tata Do Iyyabaaha qui runie salía tseen lu. Ttiaca gansi lu unlu nu lä anca tsee, lania liba nna gasinlu locani, cumu läga cuenta chi uxí ca unná derechu acacana nu rinnabia, lacana se'ecana qui ixuuni Tata Do Iyyabaaha cana, utecana elha disa ralha benni runi nu lä anca tsee.<sup>5</sup> Larcala raca duelha udori tisa gue ca uxtisi-na, läga sunru qui bittu utecana elha disa gueri, anáguaba de chi yuri ri'i nna daa lori udori tisa guecani.<sup>6</sup> Denuala nna rixa benni belhi nu ruquixacan ri deyya yo'o lagüii, cumu ca uxtisi-na se'ebacana qui uncana sina anca gue Tata Do Iyyabaaha, larcala satíaba unnaba anca sina guecani runcana.

<sup>7</sup> Gualquixa nu dalole quixale len ca nu rinnabia-na. Gansi dale gue güequixana, gualquixa iyá nu ralhale quixale lenna, gansi ralhale utele belhi nu ralha benni utena gue yiesi, gualquixa nua, benni ralhana gapale na respeto, gualgapana respeto, benni ralhana inne tseele gueni nna gualnne tsee gueni.

### Ri'i nna daa lori aquin gue loesri

<sup>8</sup> Gualquixa iyá nu dale gue benni, aquin gue loesle nna cumu benni racani gue nuxaba benni, gue ca ley gue Tata Do Iyyabaaha nua rudona tisa.<sup>9</sup> Lo ca ley gue Ben-na rá: “Bittu isálu nu bittu anca latselalu<sup>a</sup>, bittu utilu benni lhe<sup>b</sup> bittu lhanalu lhe<sup>c</sup> bittu un lelu lhe<sup>d</sup> bittu dha lelu nu anca gue attu benni subi lhe.”<sup>e</sup> Iyába ca tisa-ni lenque adírba ca ley-na, ttuba tisa reacaque len tisa nu rá: “Aquinlu gue nuxaba benni attiba raquinlu gue la luba.”<sup>f</sup> <sup>10</sup> Cumu nu aquinri gue nuxaba benni, läga ancana nu bittu anca tsee len ca benni. Larcala, benni racani gue nuxaba benni, nu rá lo ca ley-na nua rudona tisa gueni.

<sup>11</sup> Iyonni gualuni, cumu chiba yule bixa tiempu-ni se'eri nnanna chiba bisía ura elhidha iquiri, cumu gaxxaba chi daa ribiga isía sá esía Cristuha odile ri. Lärga birua isá reasa attiba atti udulori ria

<sup>a</sup> **13:9** Éxodo 20:14

<sup>b</sup> **13:9** Éxodo 20:13

<sup>c</sup> **13:9** Éxodo 20:15

<sup>d</sup> **13:9** Éxodo 20:16

<sup>e</sup> **13:9** Éxodo 20:17

<sup>f</sup> **13:9** Levítico 19:1

leri Ben-na. <sup>12</sup> Atta se'eri nnanna ancana attiba lo rela, chiba diana ritena, atta do Cristuha nna ancana attiba resá, ri'i nna chitteba deoba isía sá atti eyyari nía. Larcala nna chinca oca'anri ca nu lä anca tsee runri na, bitturu unri nu run ca nu se'e lhe'e chulha-na, nu unlari nna ese'e tseelari unri nu anca tsee qui acari nu se'e atta yu'u xieni, attiba ttu soldado chi bedú tsee. <sup>13</sup> Tse'ebari unri nu anca tsee, attiba runi ttu benni requi resá. Bittu acari nu roxxatta atta raca laní, lä acaguabari nu dusi lhe bittu tsequi manniri lhe bittu unri nu satsa ridá leri unri lhe bittu tsu'uri utilha lhe bittu gapa malisi gue loesri lhe. <sup>14</sup> Nu unlale nna itú iqui itú lele gualuni atti runi Jesucristu Benni bananie ri, bittu aquinle ulaba lele gue gaxasná unle qui aca nu lä anca tsee ridá le cuerpu guele-na.

### **Ca benni ria le Jesús bittu inne güee gue loesle**

**14** Gansi isía ttu benni bittu chi du tsitsi lo neda gue Tata Do Iyyabaaha atta se'ele, gualgásna ttena lhe'e yo'o, ttiaca bittu ttilha tisa lenle-na gue nu rulaba lele. <sup>2</sup> Se'e ca benni ria lecani guacaba gocana iyába nu dica go benni, ttiaca se'e ca benni bittu chi se'e tsitsi lo neda gue Tata Do Iyyabaaha, lacana nna sunruba nu rada benni rocana. <sup>3</sup> Benni ro iyáloba nu dica go benni, läga dica cu'u ni'ani benni bittu ro iyáloba, nu bittu ro iyáloba nu ro benni nna bittuguaba dica inne güena gue nu ro iyáloba nu dica go benni. Cumu chiba belabi Tata Do Iyyabaaha cana attiba ancabacana. <sup>4</sup> Lu nna läganu ancalu qui cualu bala'ana gue benni rixuu lo sina gue attu benni subi. Nu baninna unnuha liba daa loni innána gansi guarun tsee nua aca bittuba run tsee nua aca. Ttiaca unnuha nna güeya'an tseebana lo nu baninna na, cumu xxeni ra le Benni bananie ri-na qui unie dhu tsitsina.

<sup>5</sup> Anáguaba se'e ca benni racaquinna dequi se'e ca sá ancacana sá xeni lo Tata Do Iyyabaaha, se'e adí benni nna racaquinna dequi ttuba anca iyába ca sá-na. Cua ttuttu le oquinna iquile gue nu rulaba lele, gansi unnuuba anca tsee len lebi'i. <sup>6</sup> Benni rána dequi te ttu sá ancana sá xeni atti adí ca sá-na, de Benni bananie ri-naba nua run nua rugüena lidhaca sáha, nu bittu rutena lidhaca sáha nna de Benni bananie ri-naguuba nua run nua runna anía. Benni ro iyáloba nu dica gori nna Benni bananie ri-naba ribequi xenna cumu rutena xquixaru len Tata Do Iyyabaaha atti rona nua, benni bittu ro iyá nu

dica gori nna runba nua anía qui ribequi xenna le Benni bananie ri-na, unnuha nna ruteguabana xquixaru len Tata Do Iyyabaaha.

<sup>7</sup> Cumu ni ttu benni bittu ancana nu banani elha nabani gueni, nuttuguaba nu benni te ancana nu banani elhutti gueni lhe. <sup>8</sup> Larcala atti se'e banri nna se'e banri qui ixuuri lo Benni bananie ri-na, atti gattiri nna gattiri qui ixuuri lo Benni bananie ri-na. Larcala nna si la se'e banri o si la gattiri lhe gue Benni bananie ri-naba ancari. <sup>9</sup> Cumu de unnuha xa nna utti Cristuha, beacanie lhe qui anáchu anque Benni banani ca benni yatti-na, ca benni bani lhe.

<sup>10</sup> Lu nna ¿biaca rinne güelu gue adí ca benni ria le Jesús? ¿Biaca ca unná rigu'u ni'alu? Guayúbalu nna iyábari utsá duri lo Cristuha qui unie elha uxtisi gueri. <sup>11</sup> Cumu lo ca sitsi gue Tata Do Iyyabaaha rinne Benniha re:

Attiba gualíba doa bania, rá Benni bananie ri-na anáguaba  
gualí udú xibi iyánea benni loa,

iyába benni dhi ro'ocani innácana gualíba neti anca Dios.<sup>a</sup>

<sup>12</sup> Larcala, coa ttutturi oteri cuenta lo Tata Do Iyyabaaha gue nu benri.

<sup>13</sup> Larcala nna bitturu dica inne güe gue loesri. Lebi'i nna nu unlale nna gualuni duelha bittu unle ttu nu uni ichecu ttu benni ria le Jesús lo neda gue Tata Do Iyyabaaha, lo ni'a gue unnuha nna eyequi nua unna nu lä anca tsee. <sup>14</sup> Neti anca ttu benni ria lasia Jesús Benni bananie ri, yuxeba lägabi te ttu bixa nu titúbana reacana nu anca tsiga, ttiaca gansi ttu benni rulaba leni anca ttu bixa tsiga, tsigaba anca nua len lana cumu de rulaba leni anía.

<sup>15</sup> Ttiaca gansi lo ni'a gue elha go rolha rido si'i ttu benni ria le Jesús attiba luu, unnuha runi rule'e lo, lu nna lärga raquinlu gue nua. Bittu unlu tsia nitti ttu benni utti Cristuha lo ni'a gueni, sunruba de raca lelu golu elha go nu radi lelu. <sup>16</sup> Bittu unle ttu nu uniinne güe benni gue nu tsee runle-na cumu ancale benni guee.

<sup>17</sup> Cumu atti rinnabia Tata Do Iyyabaaha ri, lägabi runna duelha gue bi rori lhe gue bi ri'ari lhe. Nu racaru duelha unri nna ancana tse'eri unri nu anca tsee, tse'e tsee len loesri lhe tse'eri edaca leri lhe iyába unní runi Espíritu gue Tata Do Iyyabaaha. <sup>18</sup> Benni rixuu lo sina gue Cristuha runi aná nna nu ru'u le Tata Do Iyyabaaha nua run nua, anáguaba ru'u le benni gue nu runna lhe.

---

<sup>a</sup> 14:11 Isaías 45:23

<sup>19</sup> Larcala, unri duelha usiguiri unri nu uni tse'e tsee len loesri, use'e tsitsi loesri lo neda gue Tata Do Iyyabaaha lhe. <sup>20</sup> Bittu unlu tse'elosina chi beni Tata Do Iyyabaaha lhe'e lastoo ca benni lo ni'a gue nu rolu. Gualíba iyába nu rori ancana nari, ttiaca bittu anca tsee gansi lo ni'a gue nu roluha nna ichecu ttu benni lo neda gue Tata Do Iyyabaaha. <sup>21</sup> Adíla tsee bittu gole bela, lä i'iya guabale vinu lhe bittuguuba unle ttu nu uni ichecu ttu benni ria le Jesús lo neda gue Tata Do Iyyabaaha. <sup>22</sup> Gansi lu raquinlu dequi tseeba anca nu runlu, suntteba lu nna Tata Do Iyyabaaha nna yule nua. ¡Carbáru benni bittu ruelha iyya nu rulaba leniha na gue nu rudhaca leni anca tsee runnaha! <sup>23</sup> Ttiaca benni rulaba chupa leni atti rona ttu bixa, la laba nua runna racana nu te tulha gueni, cumu atti rona nua läga ria leni itú iqui itú leni gansi gualí anca nua nu anca tsee, iyába nu runri gansi bittuba ria tsitsi leri gue Tata Do Iyyabaaha gualíba anca nua nu anca tsee, ri'i nna tulhaba nua chi runri.

### Lhatsiru gualtse'e loesle

**15** Ri'i ca benni chi se'e tsitsi lo neda gue Tata Do Iyyabaaha, daa lori unri yuda ca benni bittu chi se'e tsitsi lo neda gue Ben-na, bittu aquinri unri suna nu re'oba leri. <sup>2</sup> Cua ttutturi daa lori unri nu tsu'u le ca benni, nu dica ixuu len lacana lhe nu uni qui tse'e tsitsicana lo neda gue Tata Do Iyyabaaha lhe. <sup>3</sup> Cumu ni Cristuha atti udoe yies lo yu-ni bittu benie suna nu re'oba lee, sinuqui guatebe attiba dia lo ca sitsi gue Tata Do Iyyabaaha atta rá: “Netiba guaxacatia gue iyába nu lä anca tsee unne ca benni besía le can lu.”<sup>a</sup> <sup>4</sup> Iyába nu uca lo ca sitsi gue Tata Do Iyyabaaha ca tu atti nía, ucaque lo sitsi qui ule'ecanie ri gue nu unri, qui anáchu nna de elha xen lasi rute ca tisa-na len ri'i nna cuequi tsitsi leri tse'eri uchíari cuedari nu rá Tata Do Iyyabaaha. <sup>5</sup> Tata Do Iyyabaaha Benni rote elha xen lasi lenri, Benni raca lanie ri qui ruchíari se'eri ribedari lhe Benniha unie tse'e tsee len loesle, qui tse'ele unle atti ben Jesucristuha. <sup>6</sup> Aná nna iyábale ttulapaba cuequi xenle Tata Do Iyyabaaha Benni anca Tata gue Jesucristu Benni bananie ri.

---

<sup>a</sup> 15:3 Salmo 69:9

**Ca benni bittu anca benni Israel chi runacana ca tisa gue Jesús**

<sup>7</sup>Larcala, gualulabi loesle attiba belabi Cristuha ri, qui anáchu cue xeni Tata Do Iyyabaaha. <sup>8</sup>Neti nna rixxi'atia le ria: Cristuha bite yies lo yu-ni qui bixuue lo ca nu Israel-na, análiba nna guaxxína nu rá tisa begüee Tata Do Iyyabaaha len ca benniola gueri use'e atti nía, qui anáchu be'e lo anca Tata Do Iyyabaaha beni runi nu chi re. <sup>9</sup>Bitaguaba Cristuha yies lo yu-ni qui ulequi xen ca benni bittu anca benni Israel Tata Do Iyyabaaha de anque benni ratúa lee ri, ucaba attiba rá lo ca sitsi gue Ben-na atta rá:

Denuala nna cuequi xenia lu lo ca benni bittu anca benni Israel,  
ulha guelu lhe.<sup>a</sup>

<sup>10</sup>Attu re lo ca sitsi-na redenne rá:

¡Ca benni bittu anca benni Israel, gualedacani len ca benni Israel anca gue Tata Do Iyyabaaha!<sup>b</sup>

<sup>11</sup>Ráguba attu re lo ca sitsi na:

Gualcuequi xen lee Tata Do Iyyabaaha iyábale ca benni bittu anca benni Israel,  
iyáxeaba benni innávana:  
“¡Xeni ra le Tata Do Iyyabaaha!”<sup>c</sup>

<sup>12</sup>Rinneguba profeta Isaías attu re lo ca sitsi gue Tata Do Iyyabaaha rábi:

Isía ttu Benni datía Isaí,  
Benniha innabie ca benni bittu anca benni Israel,  
lacana nna uxten lecani Benniha.<sup>d</sup>

<sup>13</sup>Cuina Tata Do Iyyabaaha benni rute elha xen lasi gueri, unie tse'ele edaca lele, unie tse'ele tsee len loesle lhe de ria lele Ben-na. Aná nna cuina Espíritu gue Ben-na aca lanie le qui uxten tsitsiru lele adí gue Tata Do Iyyabaaha.

**Pablo rixxi'abi tisa gue Tata Do Iyyabaaha len ca benni dittu**

<sup>14</sup>Ca benni ria le Jesús attiba neti, neti nna chi xen lasia lebi'i nna chi ancale benni tsitsiba tsee du leni, nu tsitsiba chi te elha rieni gueni lhe nu chi yu udú elha rieni iqui loesni lhe. <sup>15</sup>Neti nna

<sup>a</sup> 15:9 2 Samuel 22:50; Salmo 18:49

<sup>b</sup> 15:10 Deuteronomio 32:43

<sup>c</sup> 15:11 Salmo 117:1    <sup>d</sup> 15:12 Isaías 11:10

itú iqui itú lasia reaxtia runia lo sitsi-ni atta rulisale rorexxa lele gue nu chi yule qui bittu ixulhinle na. Runia aná cumu Tata Do Iyyabaaha beda lee boca'ane las náya,<sup>16</sup> aca benni ixuu lo sina gue Jesucristuha atta se'e ca benni bittu anca benni Israel. Sina runia-ni nna ancana nu runi ttu bixxudi, neti nna rixxi'atia cana ca tisa gue Tata Do Iyyabaaha qui anáchu utsá dua ca benni bittu anca benni Israel-na lo Ben-na ancacabi attiba ttu úna radi le Ben-na ridié baneda, benni chi se'e riesi-ni Espíritu gue Ben-na lhe.

<sup>17</sup> Neti nna guateba ro'a cuequi xen lasia gue sina runia lo Tata Do Iyyabaaha, de anca benni baba len Jesucristuha. <sup>18</sup> Cumu neti nna tsa läga reaxtia innea gue bixarua attu nu subi, suntteba gue nu ben Cristuha len neti rinnea. Ben-na rixuunie neti qui rixxi'atia ca benni bittu anca benni Israel ca tisa gue Tata Do Iyyabaaha qui udocabi tisa gue Ben-na. Lacabi rudocabi tisa gue Ben-na de bienquinbi ca tisa gue Ben-na rinnea, de biláquinbi nu beni Ben-na benia lhe<sup>19</sup> de biláquinbi ca milagru lhe ca nu runi reban le benni lhe beni Espíritu gue Tata Do Iyyabaaha leni elha ra xxeni le guee. Neti nna uduloa rixxi'aya ca tisa gue Cristuha desdeba lhe'e yiesi Jerusalén, ni bisíaba axtaba lhe'e ca yiesi se'e lo yu te láni Ilírico. Itúba ca daca nía chi utixxi'aya ca tisa gue Ben-na. <sup>20</sup> Neti nna satíaba runia duelha quixxi'aya ca tisa gue Cristuha atta bittu chi bienin ca benni ca tisa gue Ben-na ni ttu libe, qui bittu quixxi'aya ca tisa gue Ben-na atta chi udulo attu benni subi rixxi'ana que. <sup>21</sup> Adíla tsee nna runba attiba dia lo ca sitsi gue Tata Do Iyyabaaha atta rá:

Ca benni tsa bittu chi binacana gue Ben-na iláquinne,  
ca benni tsa bittu chi bienquina gue Ben-na sadú lecani guee.<sup>a</sup>

### Pablo rebequi lebi tsiasi España

<sup>22</sup> Lo ni'a gue de requia rixxi'aya ca tisa gue Cristuha itúba ca daca ná nuarca bittu chi uca ita atta se'ele-na, masquiba ixe libe chi benia ita. <sup>23</sup> Ttiaca nnannarguaba ita cumu chiba utixxi'aya ca tisa gue Jesús lhe'e iyába ca lhe'esi se'e itúba lo ca yu se'e-ni. Cumu ixe ida chi anca rdaca ita etennalhia le. <sup>24</sup> Larcala nna rulaba lasia ttea atta se'ele-na atti yu'a neda diaya España. Nianna dequide chi beaca xen lasia tseeba chi udoa ttu satti len lebi'i nna xen lasia lebi'i nna gutebale gue neda quia qui isína España. <sup>25</sup> Ttiaca nnanna

---

<sup>a</sup> 15:21 Isaías 52:15

lola Jerusalén eyya'aya, qui satea úna nu bete ca benni len neti len ca benni chi anca gue Tata Do Iyyabaaha se'e nía. <sup>26</sup>Cumu ca benni ria le Jesús se'e lo yu gue Macedonia lencabi ca benni se'e daca Acaya lhe belabale cabi tseeba anca uttupacabi belhi qui idhelhacabi gue ca benni bittu te guecani se'e lhe'e yiesi Jerusalén. <sup>27</sup>Lacabi nna boquinna iquicabi tseeba anca uttupacabi saro'o belhi qui idhelhacabi gue ca bi'iniha. Aníaba bencabi cumu daba locabi uncabi yuda ca bi'ini bittu te guecani se'e Jerusalén. Cumu gansi lacabi, ca benni bittu anca benni Israel, redíbaacabi elha tsee bete Tata Do Iyyabaaha gue ca benni Israel, anáguuba lacabi ralhaguabacabi uncabi ca bi'in-na yuda len nu te guecabi yies lo yu-ni. <sup>28</sup>Larcala, dequide gansi chi uluxatia nu ga'ana unia, chi betea len ca bi'iniha belhi denoja-ni lhe lania nna dhaya tsiyaya España, atti yu'a neda diaya nía, lania nna ttea atta se'ele-na qui ettennalhia le. <sup>29</sup>Neti nna yuxeaba, gansi chi bisíaya atta se'ele-na, lania nna iyábari edí baari elha tsee xení utee Cristuha gueri atti iyieninle quixxi'aya ca tisa gue Ben-na.

<sup>30</sup>Ca benni ria le Jesús, rinnaba lole gualun chi lo ni'a gue Jesucristu Benni bananie ri, gualun chi lo ni'a gue elha si'i le rute Espíritu gue Tata Do Iyyabaaha lenri lhe unle neti yuda innábari lo Tata Do Iyyabaaha aca lanie neti. <sup>31</sup>Gualinnaba lo Ben-na qui odile neti lo ná ca nu bittu ria le Jesús se'e lo yu te láni Judea. Gualinnabaguaba lo Ben-na qui dhi ca benni ria le Jesús se'e lhe'e yiesi Jerusalén úna nu dechea utea lencabi itú iqui itú lecabí. <sup>32</sup>Aná nna Tata Do Iyyabaaha aca lanie neti ita ettennalhia le, tsitsiba eyo'o lasia atti isíaya atta se'ele-na, neti nna tseeba eyaca lasia de eyaca xen lasia chi doa len lebi'i. <sup>33</sup>Cuina Tata Do Iyyabaaha Benni runie se'e tseeri aca lanie iyáxeale. Amén.

### Pablo ridhelhabí ttu padiuixi gue ca benni ria le Jesús

**16** Neti nna raca lasia quixxi'atia le gue benni nuila lá Febe ria le Jesús, labi nna ancabi ttu benni runbi sina gue Tata Do Iyyabaaha len ca benni ria le Jesús se'e lhe'esi lá Cencreas. <sup>2</sup>Lebi'i nna lhatsiru unle lenbi atti isíabi lhe'e lisle, attisiba Benni bananie ri-naba Benniha bisíaya atta se'ele, cumu aná daa lo ca benni ria le Jesús uyú loescabi. Larcala nna gualunbi yuda len bixa reasinbi, cumu labi nna ixe benni chi benbi yuda, anáguuba chi benbi neti yuda lhe.

<sup>3</sup> Gualgásí Priscila-na lenbi unbiyuu guebi lá Aquila-na padiuxi cuenta quia, lacabi ancacabi umpanieru quia lo sina gue Jesucristuha. <sup>4</sup> Lacabi nna bexunnina guecabi gatticabi lo ni'a gue de bodilácabi neti, denua nna läga sunru neti rpea cabi xquixaru cabi, sinuqui anáguuba iyába ca benni ria le Jesús bittu anca benni Israel. <sup>5</sup> Gualgásiguuba ca benni ria le Jesús ritupa lhe'e yo'o gue Priscila-na lenbi Aquila-na padiuxi cuenta quia. Gualgásiguuba Epeneto bi'ini racatia guebi-na padiuxi cuenta quia, labi ancabi bi'ini primero güia le ca tisa gue Cristu lhe'esi lá Acaya. <sup>6</sup> Gualgásí María-na padiuxi cuenta quia, labi nna tsitsiba yuda chi benbi le. <sup>7</sup> Gualgásí padiuxi cuenta quia bi'ini lá Andrónico lenbi bi'ini lá Junias ca bi'ini anca benni Israel attiba neti. Lacabi chi güia lecabí Cristuha primero atti neti, ca bi'in-na ancacabi apóstol yopiruni ca benni, chi uttacabi lisiyya len neti lhe.

<sup>8</sup> Gualgásí bi'ini lá Amplias-na padiuxi cuenta quia, labi ancabi ttu bi'ini racatia guebi de ancabi benni baba len Benni bananie ri-na. <sup>9</sup> Gualgásí bi'ini lá Urbano-na padiuxi cuenta quia, labi ancabi ttu umpanieru quia lo sina gue Jesucristuha, anáguuba Estaquis bi'ini racatia guebi-na lhe gualgásbi padiuxi cuenta quia. <sup>10</sup> Gualgásí bi'ini lá Apeles-na padiuxi cuenta quia, bi'in-na ixe libeba chi bele'e lobi gualíba ancabi ttu benni ria le Cristuha, gualgásiguuba padiuxi cuenta quia ca bi'ini se'e lhe'e lisi bi'ini lá Aristóbulo-na lhe. <sup>11</sup> Gualgásí padiuxi cuenta quia bi'ini lá Herodión anca benni Israel attiba neti, anáguuba gualgásí padiuxi cuenta quia ca benni se'e lhe'e yo'o gue bi'ini lá Narciso-na lhe lacabi ancaguabacabi benni ria le Benni bananie ri-na. <sup>12</sup> Gualgásí bi'ini lá Trifena lenbi bi'ini lá Trifosa padiuxi cuenta quia, lacabi ancacabi benni run sina gue Benni bananie ri-na, anáguuba bi'ini nuila ria le Jesús lá Pérsida, bi'in-na tsitsiba chi bixuubi lo sina gue Benni bananie ri-na. <sup>13</sup> Gualgásí benni lá Rufo padiuxi cuenta quia, labi ancabi ttu benni chi becuae Benni bananie ri-na, anáguuba gualgásí padiuxi cuenta quia nan guebi-na lhe cumu labi ancabi attiba nan quia. <sup>14</sup> Gualgásí padiuxi cuenta quia bi'ini lá Asíncrito, bi'ini lá Flegonte lhe bi'ini lá Hermas lhe bi'ini lá Patrobas lhe bi'ini lá Hermes lhe adírba ca benni ria le Jesús se'e len ca bi'in-na lhe. <sup>15</sup> Gualgásí padiuxi cuenta quia bi'ini lá Filólogo lhe bi'ini lá Julia lhe bi'ini lá Nereo lhe anáguuba dana bi'in-na lhe bi'ini lá Olimpas lhe iyába ca bi'ini ria le Jesús se'e len ca bi'in-na lhe.

<sup>16</sup> Gualgás loesle padiuxi cuenta quia, utsá lo xxaga loesle attiba labi ca benni ancacabi gue Tata Do Iyyabaaha runcabi. Iyába ca benni ria le Cristuha ridhelha cabi ttu padiuxi guele.

<sup>17</sup> Ca benni ria le Jesús, rinnaba len lebi'i udole cuidadu len ca benni requi-na, ca nu requi rilha'a lhe'e loes ca benni, lacana nna runcana rinittile lo neda gue Tata Do Iyyabaaha de rule'equinna le nu bittu raxxína leni nu chi bele'entu le. Gualeriesi ca unná.

<sup>18</sup> Cumu lacana läga ancacana nu rixuu lo sina gue Jesucristu Benni bananie ri. Suntteba gue nu ridá lecani rulaba lecani. Lacana nna tsitsiba lhe'e daa ro'ocani rinnecana ca tisa tsee qui ridiyie cana ca benni sattiba ridielha rixúyie. <sup>19</sup> Lebi'i nna iyába benni chi yucana ancale benni rudo tisa gue ca tisa gue Jesús. Neti nna tsitsiba re'o lasia gue nu runle, ttiaca neti nna rdaca acale nu te elha rien gueni qui unle nu anca tsee, bittu qui unle nu lä anca tsee. <sup>20</sup> Tata Do Iyyabaaha Benni runie qui se'e tsee len loesri, ya mertte unie dhale lo nu xxegüiha, qui utsutsa len ni'a le-na. Jesucristu Benni bananie ri aca lanie le. <sup>21</sup> Timoteo bi'ini raca umpanieru quia lo sina gue Tata Do Iyyabaaha ridhelhabi ttu padiuxi guele, anáguuba Lucio lhe Jasón lhe Sosípater lhe ridhelaguabacabi ttu padiuxi guele, lacabi ancacabi benni Israel attiba neti. <sup>22</sup> Neti benni lá Tercio bi'ini runi lo sitsi ridhela Pablo guele, ridhelaguuba ttu padiuxi guele de anca benni babaguuba len Benni bananie ri.

<sup>23</sup> Bi'ini lá Gayo, ridhelhabi ttu padiuxi guele, labi rute gannabi lisbi-ni qui doa, anáguuba rutebi lisbi-ni qui ritupa ca benni ria le Jesús lhe. Ridhelaguuba Erasto, bi'ini den belhi gue yies-ni ttu padiuxi guele, anáguuba bi'ini lá Cuarto lhe ridhelaguabi ttu padiuxi guele.

<sup>24</sup> [Cuina Jesucristu Benni bananie ri-na aca lanie iyábale. Amén.]

### Pablo ribequi xenbi Tata Do Iyyabaaha

<sup>25</sup> Ribequi xenia Tata Do Iyyabaaha benni raca guee runie rise'etsitsi chattile lo neda guee, attiba rába ca tisa gue Jesucristuha rixxi'aya-ni. Nu rixxi'aya-ni nna ancana nu raxxína leni nu rule'eni Tata Do Iyyabaaha ri, nu bittu chi yu benni gueni desdeba atti nía. Unnonna te gatsinie atti deobali cue yies lo yu-ni. <sup>26</sup> Ttiaca nnanna chiba yuri gue nu te gatsi-ni Ben-na, cumu lo ca sitsi boca'ana ca benni uca profeta gue Tata Do Iyyabaaha nía rixxi'a gue nua,

attiba benba Tata Do Iyyabaaha Benni ttu tsaba doe mandadu. Nu chi ga'ananie unie te gatsinie nna chiba bina ca benni se'e lhe'e iyába ca yiesi se'e yies lo yu-ni nua, qui anáchu tsia lecani Tata Do Iyyabaaha, udocana tisa guee lhe. <sup>27</sup> Tata Do Iyyabaaha benni sunruba lee anque benni yu te elha rieni guee, Benniha cuequi xenri lee ttu dia lii de nu beni Jesucristuha. Amén.

# Sitsi primero udhelha Pablo atta se'e ca benni ria le Jesús lhe'e yiesi Corinto

**1** Neti Pablo, Tata Do Iyyabaaha bedaa lee bodúe neti aca apóstol gue Jesús Benni anque Cristu. Neti lenia Sóstenes bi'ini ria le Jesús attiba ri'i, <sup>2</sup> ridhelhatu sitsi-ni guele lebi'i ca benni ria le Tata Do Iyyabaaha se'e lhe'e yiesi Corinto. Lebi'i chi ancale benni se'e riesi anca gue Tata Do Iyyabaaha de chi babale len Jesús Benni anque Cristu. Biaxile acale benni se'e riesi anca gue Tata Do Iyyabaaha lenle iyába ca benni se'e bi'acanaba ria le Jesucristu Benni bananie ri. Ben-na anque Benni bananie cabi, anáguaba ri'i lhe. <sup>3</sup>Cuina Tata gueri do iyyabaaha lenie Jesucristu Benni bananie ri aca lenque le, unque tse'ele xen su lee lhe.

## Pablo rutebi xquixaru len Tata Do Iyyabaaha

<sup>4</sup>Satíaba rutea xquixaru len Tata Do Iyyabaaha gue lebi'i, de redá lee raca lanie le de chi babale len Jesús Benni anque Cristu. <sup>5</sup>Cumu de babale len Ben-na nuarca bete Tata Do Iyyabaaha iyáloba elha tsee te guee len lebi'i, qui anáchu teru elha rieni guele lhe resela runle rinnele lhe. <sup>6</sup>Unní rule'e lo, ca tisa utixxi'entu le gue Cristuha nna anque nu gualí. <sup>7</sup>Aná nna lärgabi reasinle attu elha tsee rute Tata Do Iyyabaaha laca se'ele ribedale isía sá esía Jesucristu Benni bananie ri. <sup>8</sup>Laguabe use'e tsitsie le axta atti isía sá lhuxa, qui bittubi te bixa lo ni'a gue itisale atti isía sá esía Jesucristu Benni bananie ri. <sup>9</sup>Tata Do Iyyabaaha anque benni runi nu chi re. Lee uxie le qui tse'ele len xi'inie Jesucristu Benni bananie ri.

## Ca benni ria le Jesús se'e lhe'e yiesi Corinto bilha'a lhe'e loescabi

<sup>10</sup>Ca benni ria le Jesús, rinnaba lole gualun chi lo ni'a gue Jesucristu Benni bananie ri, ttuba gualese'e, bittu ila'a lhe'e loesle. Lhatsiru gualtse'e. Ttuba gualulaba lele lhe ttuba anca nu aquinle lhe. <sup>11</sup>Rpea le aná, lebi'i ca benni ria le Jesús, cumu chi utixxi'ani ca benni se'e lisi Cloé-na neti, lebi'i nna se'e tilhaba len loesle, <sup>12</sup>delába ttulhele nna rále: "Neti anca benni baba len Pablo", attu lhele nna rále: "Neti anca benni baba len Apolo", attu lhele nna rále: "Neti anca benni baba len Cefas", attu lhele nna rále: "Neti anca benni baba len Cristu." <sup>13</sup>¿Biaca rále aná? ¿Si la'a lhe'e loesi

Cristuha? ¿Si neti Pablo utáya lo ya crusí qui uxá gue nu lä anca tsee benle? ¿Si neti Pablo betti láya atti udile inda, aca? <sup>14</sup>Xquixaru Tata Do Iyyabaaha lärga nuruha nuxale begadi neti inda, sunruba Crispo lenna Gayo-na begadía inda. <sup>15</sup>Aná nna bittubi tenle innále dequi neti Pablo betti láya atti udile inda. <sup>16</sup>Begadiguaba inda ca benni se'e lisi Estéfanás. Dequide ca bi'in-na nna bitturu rexxa lasia gansi begadirua nuxaruha inda. <sup>17</sup>Cumu läga udhelha Cristu neti ugadía benni inda. Udhelhaba Benniha neti quixxi'aya ca tisa guee-na. Neti nna läga rixxi'aye leni tisa elha loesi tisa rinne ca nu te elha rieni guequinna qui bittu itúa lidhaca elhutti uxí Cristu lo ya crusíha.

### **Cristu rule'e loe elha rieni gue Tata Do Iyyabaaha**

<sup>18</sup>Ca tisa rixxi'a gue nu guate Cristu atti uttie lo ya crusíha ancaque attiba tisa nu bittu elha rieni gueni tee len ca benni dia nitti. Ttiaca len ri'i ca benni lhá bittu tsia nitti, ca tisa-na ancaque nu ra xxeni lee gue Tata Do Iyyabaaha. <sup>19</sup>Lo ca sitsi atta dia ca tisa gue Tata Do Iyyabaaha re:

Unia initti elha rieni gue ca nu ra tee elha rieni guequinna,  
cu'u ni'aya nu yu ca nu rá dequi ancacana nu yu lhe.<sup>a</sup>

<sup>20</sup>Nianna ¿nala ca nu rá dequi teru elha rieni guecaniha ganna? ¿Nala nu rá dequi yuxxatta gue nu dia lo ca sitsi-na lhe? ¿Nala nu rinnexxatta gue nu yuna gue nu anca gue yies lo yu-niha lhe? Tata Do Iyyabaaha benie aca elha rieni gue ca nu se'e yies lo yu-ni, attiba elha rieni gue nu bittu xieni gueni tee. <sup>21</sup>Cumu Tata Do Iyyabaaha anque nu yu gue nu runie, boca'ane bittu eyonbia ca nu se'e yies lo yu-ni Ben-na leni elha rieni anca gue yies lo yu-ni. Nu ben lee nna guadiba lee odile ca benni tsia lecanie len ca tisa rixxi'atu, masquiba rá ca benni dequi anca ca tisa-na nu anca gue ca nu lä caa xieni gueni.

<sup>22</sup>Ca tisa-na ancaque gue nu lä caa xieni gueni len ca benni Israel-na, cumu ribedacana iláquinna milagru xxeni, anáguaba len ca benni ca nu rinne tisa griego lhe cumu reguilacana iyienquinna ca tisa elha gue nu tee elha rieni gueni. <sup>23</sup>Ttiaca ri'itu nna rixxi'abatu gue Cristu benni utá lo ya crusíha. Unná runi rido dini ca nu Israel-na. Ca nu bittu anca benni Israel-na nna rácana dequi nu rixxi'atu ancana gue nu lä caa xieni gueni. <sup>24</sup>Ttiaca ca benni chi

---

<sup>a</sup> 1:19 Isaías 29:14

uxi Tata Do Iyyabaaha acacana benni guee, si ancacana benni Israel o si benni rinne tisa griego lhe Cristuha anque Benni rule'e loe elha ra xxeni le gue Tata Do Iyyabaaha, elha rieni gue Benniha lhe.

<sup>25</sup> Cumu nu beni Tata Do Iyyabaaha rule'e ancana gue nu lä caa elha rieni gueni, ttiaca unnala ancana gue nu teru elha rieni gueni attichula nu anca gue ca nu rá dequi te elha rieni gueni se'e yies lo yu-ni. Anáguba nu rule'e len ca benni dequi Tata Do Iyyabaaha bittu anque Benni ra tsitsi lee, unnala ancana nu ra tsitsiru leni atti nu ra tsitsi le delo iyácea ca benni.

<sup>26</sup> Ca benni ria le Jesús, gualorexxa lele, atti uxi Tata Do Iyyabaaha le acale benni guee, ttu chuparba le ancale ca nu rá ca benni se'e yies lo yu-ni gua tee elha rieni gueni, ttu chuparguabale ancale benni ra xxeni leni lhe nu datía benni rapa adí benni respeto lhe. <sup>27</sup> Ttiaca Tata Do Iyyabaaha becuae ca benni rá ca benni se'e yies lo yu-ni ancacana nu bittu tee elha rieni gueni qui unie ettuin ca nu rá ancacana nu texxatta elha rieni gueni, becuae ca benni rá ca benni bittu ancacana nu ra tsitsi leni qui unie ettuin ca nu ra tsitsi leni lhe. <sup>28</sup> Tata Do Iyyabaaha becuae ca benni bittu rixuu, ca nu rigu'u ni'a ca benni se'e yies lo yu-ni, delába ca benni bittu daca, qui cue nu ra xxeni le gue ca nu rá ancacana benni ra xxeni leni. <sup>29</sup> Aná nna nuttu nu benni tee unna ttaba lo Tata Do Iyyabaaha. <sup>30</sup> Tata Do Iyyabaaha benie ancale benni baba len Jesús Benni anque Cristu. Benguabe qui bete Benniha elha rieni guee lenri lhe benguabe beni Benniha qui acari benni tsee loe lhe acari benni se'e riesi anca guee lhe benguabe aca Benniha benni odile ri lhe. <sup>31</sup> Análiba nna saxxína nu rá lo ca sitsi gue Tata Do Iyyabaaha atta rá: "Nu raca leni cue xenna unna cue xeni Benni bananie ri-na gue nu ben Ben-na."<sup>a</sup>

### Pablo riguixxi'abi gue elha rieni gue Tata Do Iyyabaaha

**2** Ca benni ria le Jesús, neti nna atti bisíaya atta se'ele-na qui utixxi'atia le gue nu run Tata Do Iyyabaaha, lägabi unne neti ca tisa rinne ttu nu yuxxatta, niguaba ca tisa elha lhe. <sup>2</sup> Neti nna boquinna iquia atti doa len lebi'ihä tsa bittu innea gue attu bixaruha, suntteba nu anca gue Jesús Benni anque Cristu innea, quixxi'aya gue Jesús benni utá lo ya crusiba. <sup>3</sup> Atti bisíaya len lebi'ihä nna läga re tsitsi lasia, rixidiba de rasbatia. <sup>4</sup> Ca tisa unnea atti utixxi'atia le

---

<sup>a</sup> 1:31 Jeremías 9:24

gue Jesús, läga ancaque ca tisa rinne ttu nu yuxxatta qui ixú yiele. Leni elha ra xxen le gue Tata Do Iyyabaahaba lhe leni Espíritu gue Ben-naba lhe unnea qui güia lele,<sup>5</sup> qui anáchu lebi'i nna tsia lele Jesús de xen lele elha ra xxen le gue Tata Do Iyyabaaha, bittu de xen lele ca tisa rinne ca benni tee elha rieni guecani.

### **Espíritu gue Tata Do Iyyabaaha rule'enie ri gue nu bittu yu benni**

<sup>6</sup> Gualí galá, rinnebatu ca tisa rinne ttu nu tee elha rieni gueni atti rulisatu ca benni chi se'e tsitsi lo neda gue Tata Do Iyyabaaha. Tiaca läga rixuintu elha rieni anca gue yies lo yu-ni, niguaba nu anca gue ca nu rinnabia guequinna lhe cumu ca unná nna lhuxabacana. <sup>7</sup> Ca tisa gue nu tee elha rieni gueni rinnetu-ni nna ancaque nu anca gue Tata Do Iyyabaaha bittu ritedaani benni. Elha rieni guee te gatsinie nna atti deobali cue yies lo yu-ni chi ga'ananie acana nu edí baari. <sup>8</sup> Unní unni bittu utedaani ca nu rinnabia se'e yies lo yu-ni, cumu ttirca ute daabaquinna lania nna läga betácana lo ya crusi Benni bananie ri Benni ra xxeni lee-na. <sup>9</sup> Attiba rá lo ca sitsi gue Tata Do Iyyabaaha:

Nu bittu chi bienini benni lhe nu bittu chi biláni benni lhe  
nu niba lati ulaba le benni gueni lhe  
chi se'e tsee-ni Tata Do Iyyabaaha utee len ca benni  
racaquinna guee.<sup>a</sup>

<sup>10</sup> Ca unnuonna chi beni Tata Do Iyyabaaha bele'eni Espíritu guee-na ri. Cumu Espíritu guee-na ritsatsa ni'e iyába, axta nu rulaba lhi'u lee Tata Do Iyyabaaha yu Ben-na.

<sup>11</sup> Cumu, ¿nú yuna bixa racani lhi'u lhe'e lastoo ttu benni? Sunruba Espíritu yu'u lhi'u lhe'e lastoo ttu benni yuna bixa raquinna. Anáguba len Tata Do Iyyabaaha, sunruba Espíritu guee-na yue bixa rulaba lee. <sup>12</sup> Ri'i nna läga elha rieni anca gue ca benni se'e yies lo yu-ni uxíri. Espíritu betee Tata Do Iyyabaaha liba uxíri qui ttedeenri gue iyá nu tsee chi bedaa le Tata Do Iyyabaaha bete len ri'i. <sup>13</sup> Rinnebatu gue unní len tisa bele'eni Espíritu gue Tata Do Iyyabaaha ri'itu, läga leni tisa bedhetitu len ca nu te elha rieni guecani se'e yies lo yu-ni rinnetu. Aná nna rixxi'atu nu anca gue Espíritu gue Tata Do Iyyabaaha len ca benni chi yu'u Espíritu gue Ben-na lhe'e lastoocabi.

---

<sup>a</sup> 2:9 Isaías 64:4

<sup>14</sup> Nu bittuba yu'u Espíritu gue Tata Do Iyyabaaha lhe'e lastooni nna rigu'uba ni'ani nu anca gue Espíritu gue Tata Do Iyyabaaha. Nu anca gue nu lä caa xieni gueniba anca Ben-na len lana, bittuguuba radú leni gue Ben-na lhe cumu Espíritu gue Tata Do Iyyabaaha liba runie radú leri gue nu anca guee. <sup>15</sup> Ttiaca benni yu'u Espíritu gue Tata Do Iyyabaaha lhe'e lastooni, guacaba gue nua itsatsa ni'ani gue iyáloba ttu bixa. Lana nna läganu te aca gueni itsatsa ni'ani gueni. <sup>16</sup> Attiba rá lo ca sitsi gue Tata Do Iyyabaaha:

¿Nú rite deenna gue bixa rulaba le Benni bananie ri-na?

¿Nú aca gueni ule'enna Ben-na lhe?<sup>a</sup>

Ttiaca ri'i nna ritedaabinri unná cumu te elha rieni gue Cristuha gueri.

### Neti Pablo lenia Apolos ancatu benni rixuu lo sina gue Cristu

**3** Ca benni ria le Jesús, neti nna läga uca ulisa le attiba rulisa ca benni chi rudo tisa gue Espíritu gue Tata Do Iyyabaaha. Belisaba le attiba rulisa ca benni se'e runi nu anca gue yies lo yu-ni, cumu lania nna attiba ttu unto chica'a ancale lo neda gue Cristu. <sup>2</sup> Bele'ebatia le ca tisa dica ttedeenle. Attiba ttu unto rasi, xisiba risela ri'iyana, bittu elha go, aníaguuba lebi'i, cumu läga chi ritedeenle gue nu rpea le lania, niguuba nnanna lhe läga ritedeenle gue nu rpea le. <sup>3</sup> Cumu sna se'ebale runle attiba run ca benni se'e yies lo yu-ni. Lebi'i nna laca sna se'erbale rapale malisi lhe sna ritilharba len loesle lhe sna ancabale benni runi attiba runi ca benni se'e yies lo yu-ni. Runbale attiba runi nuxaba benni. <sup>4</sup> Lebi'i nna atti rále: "Neti anca benni baba len Pablo", adíle nna rále: "Neti anca benni baba len Apolos". Atti rále aná nna runbale attiba runi nuxaba benni se'e yies lo yu-ni.

<sup>5</sup> Nianna ¿nú raquinle anca Apolos? O ¿Nú raquinle anca neti Pablo? Sunruba benni rixuu lo sina gue Tata Do Iyyabaaha ancatu. Lee nna bixuunie ri'itu qui güia lele Benni bananie ri-na. Coa ttutubatu runtu sina chi boca'ane untu. <sup>6</sup> Neti utixxi'atia le ca tisa-na primero attiba ttu benni uda xua. Apolos nna bele'enbi le adí attiba ttu benni rudo inda nu chi yada. Ttiaca Tata Do Iyyabaahaba runie rise'e tsitsile lo neda guee. <sup>7</sup> Larcala nna tsa läganu nuxa anca nu rixxi'a ca tisa-na primero, niguuba nu rule'e chatti adí lhe.

---

<sup>a</sup> 2:16 Isaías 40:13

Sunruba Tata Do Iyyabaaha anque Benni xeni. Labe runi rise'e tsitsi ca benni lo neda guee. <sup>8</sup>Lo Tata Do Iyyabaaha ttuba anca benni rixxi'a ca tisa guee-na primero leni benni rule'enbi ca benni ca tisa guee-na adí masquiba cua ttutubacana dhicana lhiaxa gue coa sina benbacana. <sup>9</sup>Neti Pablo lenia Apolos, irpabatu ancatu benni rixuu lo sina gue Tata Do Iyyabaaha. Lebi'i nna ancale attiba lo yu gue Ben-na nu runie sina loni, ancale attiba ttu yo'o die rucoe lhe.

<sup>10</sup>Tata Do Iyyabaaha bedaa lee bete ttu elha tsee len neti rixxi'aya ca tisa guee-na, neti anca attiba ttu benni raca gueni rucoana yo'o. Neti utixxa cimientu gue yo'oha, attu benni subi nna diana rucoana iqui nua. Ttiaca coa ttuttu benni daa loni ugüiana gaxasná diana rucoana iqui nua qui ttedeenna gansi gua diana rucoa tseena. <sup>11</sup>Jesucristu anque cimientu. Larcala nna nuttu nu aca gueni quixxana attu cimientu subi iqui cimientu chi utixxa Tata Do Iyyabaaha. <sup>12</sup>Iqui cimientu-ni nna guacaba ucoa ca benni leni oro o leni plata lhe o leni iyya ga'ana tsee lhe o leni yaga lhe o leni te gue xua lhe o leni iyyaxtila lhe. <sup>13</sup>Ttiaca sina ben ttuttu benni nna gule'e loba gue nua gansi chi bisía sá aca elha uxtisi gue ca benni, cumu labíaba tte nua lo gui, qui iría lolia sina gue ttuttu benni. Guiha uni ule'e lo gansi guanca sinaha nu anca tsee o si bittuba lhe. <sup>14</sup>Gansi nu becoa ttu benni uchíana bittubi dhacana atti ttena lo gui, bi'ini becoa nua nna dhibabi lhiaxabi. <sup>15</sup>Ttiaca gansi nu becoa ttu benni itebana, lania nna unnittibana nu ralhana dhína. Benni becoa nua nna gualábana attiba ttu nu ulá lo gui.

<sup>16</sup>¿Si bittuba yule, lebi'i ancale yotu gue Tata Do Iyyabaaha, Espíritu gue Benniha nna doe lhe'e lastoole? <sup>17</sup>Lebi'i ancale yotu anca le'a gue Tata Do Iyyabaaha. Denua nna gansi nuxa utse'e lona yotu-na, lee nna utse'e loguabe na.

<sup>18</sup>Ni ttule bittu dhi yie la lebi'iba. Gansi nuxale raquinle ancale benni te elha rieni gueni yies lo yu-ni, gualuni dequi benni bittu te elha rieni guebani ancale, qui anía liba nna e'eyule acale nu gualíga te elha rieni gueni. <sup>19</sup>Cumu elha rieni anca gue yies lo yu-ni nna nu bittu ixuuba anca unna lo Tata Do Iyyabaaha. Lo ca sitsi gue Ben-na rá:

Ca benni rácana te elha rieni guequinna la leni elha  
resi'nu guequinnaba runi Tata Do Iyyabaaha  
riyaxxucana.<sup>a</sup>

---

<sup>a</sup> 3:19 Job 5:13

<sup>20</sup>Ráguba lo ca sitsi guee-na:

Gua yuxeba Benni bananie ri-na, tsa lägabi ixuu nu rulaba le  
ca nu rá te elha rieni guequinna.<sup>a</sup>

<sup>21</sup>Larcala nna ni ttule bittu unle ancale nu ra xxeniru leni de ancale  
nu baba leni nuxa benni, cumu guebale anca iyába nu te. <sup>22</sup>Pablo  
lhe Apolos lhe Cefas lhe yies lo yu lhe elha nabani gueri-n lhe  
elhuttiha lhe tiempu se'eri nnanna lhe tiempu chi daba lhe guebale  
anca iyába unná. <sup>23</sup>Lebi'i nna ancale gue Cristu, Cristu nna anque  
gue Tata Do Iyyabaaha.

### Pablo riguixxi'abi gue ca apóstol

**4** Larcala lebi'i nna raca duelha ulaba lele, ri'itu nna sunruba  
benni rixuu lo sina gue Cristu ancatu, ancatu benni bodha'ana  
Tata Do Iyyabaaha lento quixxi'atu gue nu te gatsinie ca tu atti  
nía. <sup>2</sup>Attu nna: Ca benni bodha'ana Tata Do Iyyabaaha lencabi  
ule'equinbi ca benni, raca duelha ule'e locabi ancacabi benni runi  
nu daa locabi uncabi. <sup>3</sup>Neti nna lägabi retábitia gansi lebi'i innele  
gue bixa runia, niguaba lä retábitia gansi ca benni se'e lhe'e yo'o  
lagüi uncana elha uxtisi gue nu runia lhe. Niguaba neti lä innea gue  
nu runia. <sup>4</sup>Läquiga de yua bittubi chi benia ttu nu lä anca tsee,  
nianna innía: Neti anca nu bittu tulha gueni te. Cumu Benni bananie  
ri-na liba runie elha uxtisi quia. <sup>5</sup>Larcala nna nuttu nu unle elha  
uxtisi gueni antisla isía sá ga'ana aca elha uxtisi. Gualcueda esía  
Benni bananie ri-na. Lee nna guabeabe lolia nu te gatsi lhe'e atta  
anca chulha, quixxi'e nu raquin lhi'u lhe'e lastoo ttuttu benni lhe.  
Lania nna uni Tata Do Iyyabaaha cue xen ca benni ralha cue xení.

<sup>6</sup>Ca benni ria le Jesús, rixxi'atia le gue nu runia lhe gue nu runi  
Apolos lhe qui salía tseenle. Rpea le aná qui nu rugüiale guetu nna  
ixuuna udhetile bittutte bedále unle nu bittu ga'ana lo sitsi gue  
Tata Do Iyyabaaha, qui aná nna bittu unle ttaba de babale len ttu  
benji rixuu lo sina gue Tata Do Iyyabaaha, nianna cu'u ni'ale  
attubi. <sup>7</sup>¿Cumu nú rán le dequi rerle bala'ana atti adí ca benni? ¿Bi  
nua te guele nna ancana nu bittu bete Tata Do Iyyabaaha? Gansi  
Bennihaba betee nu te guele nna nianna, ¿biacala runle ttaba  
attisiba lebi'iba utila nu te guele?

---

<sup>a</sup> 3:20 Salmo 94:11

<sup>8</sup> ¡Lebi'i nna guannalu dequi chiba te iyá nu ridá lele gatta guele! ¡Chiba ancale nu texxatta gueni! ¡Lärgabi reasinle ri'itu cumu gue nu rinnabiaba chi run lele! Locala gualí chi ancale nu rinnabia qui anáchu ri'itu nna acaguabatu nu innabia len lebi'i. <sup>9</sup> Neti racatia nna ri'itu ca apóstol gue Jesús, xubana liba bese'e Tata Do Iyyabaaha ri'itu. Attiba ttu nu chi boquinna iquicani gattina ancatu. Chiba beacatu nu runi ruxisi iyába ca benni se'e yies lo yu-ni atti rugüiacana ri'itu, anáguaba ca ingeli-na lhe. <sup>10</sup> ¡Lo ni'a gue Cristu nna rá benni dequi ancatu attiba ttu nu lä caa xieni gueni, laca lebi'i nna raquinle dequi ancale nu tsitsiba yu de ria lele Cristu! ¡Ri'itu ancatu nu bittu run tsitsi, lebi'i nna ancale nu yalha tsitsi runle! ¡Ancatu nu rigu'u ni'a benni, lebi'i nna yalha rapacan le respeto! <sup>11</sup> Axtaba lora nnanna ratetu rituintu, rebistu inda lhe. Chi anca tsuya xotu lhe rugüe ca benni ri'itu lhe bittu listu do lhe. <sup>12</sup> Tuttírba ratu letu ribentu sina qui te nu gotu. Ca nu riguecana iquitu nna rátu cana: “Tata Do Iyyabaaha aca lanie le.”

Gua ruchíabatu lo nu rudhaca benni ri'itu gansi chi ruría lacan ri'itu lhe. <sup>13</sup> Ca nu rinne güe guetu nna rulisatu cana len tisa tsee. Axtaba lora nnanna ca benni nna runcana dequi ancatu ttu nu tsiga gue yies lo yu-ni, ancatu attiba ixi rigu'una ca benni lhe.

<sup>14</sup> Läga runia nu ria-ni lo sitsi ridhelha guele qui unia ettuinle. Runia unní lo sitsi qui leni unní nna rudúa elha rieni iquile. Rulisa le attiba xi'inia ca nu racatia guecani. <sup>15</sup> Masquiba tse'e ttu tsii mil nu ule'enna le ca tisa gue Cristu, ttiaca läganu ixe tata guele se'e. Netiba anca tata guele lo neda gue Jesús Benni anque Cristu, de utixxi'atia le ca tisa gue Ben-na primero. <sup>16</sup> Larcala nna rinnaba lole, unle atti runia.

<sup>17</sup> Lo ni'a gue unní nna udhelha Timoteo atta se'ele-na. Labi nna racatia guebi attiba xi'inia, ancabi nu rudo tisa lo sina gue Benni bananie ri. Labi orexxabi lele gue gaxasná runia de anca benni gue Cristu. Unnába rule'etia iyába ca benni ria le Jesús se'e lhe'e ca yiesi atta ritea. <sup>18</sup> Ttulhele nna tsitsiba ttaba chi runle, cumu raquinle dequi lärga nuruha neti ita ettenalhia le. <sup>19</sup> Ttiaca güitategaba ettenalhia le gansi Benni bananie ri-na aca lee. Lania nna ugúia sanga gue ca nu tsitsiba gue nu xxeni chi run lequinna gansi gualíquinna te elha ra xxen le gue Tata Do Iyyabaaha guecani, ¿si sunruba guacacana innecana, aca? <sup>20</sup> Cumu ca benni rinnabia Tata Do Iyyabaaha, läga sunru guacacana innecana, sinuqui unri nu

rinneri len elha ra xxen le gue Tata Do Iyyabaaha.<sup>21</sup> Lebi'i nna ¿bi raca lele? ¿Si ita atta se'ele na len ya lhadhi? ¿Si ita aca si'itia le len tisa si'i le, aca?

### Pablo rinnababi cuequiescana benni chi bexxí

**5** Lebi'i nna daa tisa guele rá benni dequi sela nu requi satsa len lebi'i. Nu satsa runi unná nna niba ca benni bittu anca bien Tata Do Iyyabaaha lä reaxquinna uncana aná, delába edo lencana nuila berupa gue tata guecani.<sup>2</sup> Lebi'i nna gua runrule gue nu tsitsiba xxeni chi ra leni, lugar quiba unnuha nna rána odú xiyyanle lo ni'a gue de beni unná aná. Gualcuequies unná len lebi'i.<sup>3</sup> Neti nna masquiba lä nu cuinaga du len lebi'i atta se'ele-na, ttiaca lastooa-ni nna gua dube len lebi'i. Chiba benia elha uxtisi boquinna iquia bixa unle len benni beni aná, attisiba naba dua len lebi'i.<sup>4</sup> Gansi chi bitupale quiinnele gue nu ucana, elha ra xxeni le gue Jesucristu Benni bananie ri nna gua dube len lebi'i, neti lhe gua duba lastooa-ni len lebi'i, lania nna Jesucristu Benni bananie ri nna utee derechu lenle<sup>5</sup> qui utele nu bexxí-na las ná nu xxegüiha, delába bixa satena qui tse'e lo iyá nu satsa ridá le cuerpu gueni runna. Anía liba nna lha espíritu gueni gansi chi besía Jesús Benni bananie ri.

<sup>6</sup> Läga anca tsee racale nu ttaba, cumu lebi'i nna chiba yule, saro'oru levadura runna regué betsi itúba cua ttaxtila.<sup>7</sup> Larcala gualcua iyába nu lä anca tsee run rinittile-na nu anca attiba levadura yaxxu nu runi rinitti cua, qui acale ttaxtila uca len cua cubi nu bittu levadura dia lenna. Lebi'i chi ancale benni bitturu sela nu lä anca tsee cumu Cristu benni anque carne'e anca úna gue laníte láni Pascua chi betticane qui utixe nu ga'ana quixari.<sup>8</sup> Denua nna ri'i nna unbari laníha, len ttaxtila bittu dia lenna levadura, bittu unri laní-na len ttaxtila dia lenna levadura yaxxu. Unní dienna innána, dhi ro'ori gue nu runri lhe inneri nu anca gualí lhe bitturu unri iyáloba nu lä anca tsee, niguaba nu satsa lhe.

<sup>9</sup> Lo attu sitsi nu chi udhelha gueleha nna rulisa le rpea le bitturu iselale ca nu requi manni-na.<sup>10</sup> Neti nna läga ria le tsa bittu iselale ca benni bittu ria le ca tisa gue Jesús se'e yies lo yu-ni: ca nu ancacana nu requi manni, ca ubana lhe ca nu ridáxxatta lecani gattaru adí bixaruha guecani lhe ca nu rudú xibicani lo ca nu bittu gualí anca diosí lhe. Cumu gansi anía nna raca duelha iría le yies lo yu-ni qui bitturu iselale ca unná.<sup>11</sup> Nu rpea le lo sitsiha nna ancana:

Bitturu iselale ca benni rácana dequi ancacana benni ria le Jesús nianna requi mannicana, ridáxxatta lecani gattaru adí bixaruha guecani lhe ria lecani ca nu bittu gualí anca diosi lhe ancacana nu rinne güee gue benni subi lhe nu ri'a lhe ubana lhe. Len ca benni runi aná nna ni yetta bittu edole go lenle cana.<sup>12-13</sup> Neti nna lägabi elha ralha unia elha uxtisi gue ca nu bittu ria le ca tisa gue Jesús. Cumu ca benni bittu ria le Jesús, gunba Tata Do Iyyabaaha elha uxtisi guecani. Ttiaca lebi'i daa lole unle elha uxtisi gue ca benni ria le Jesús. Larcala nna gualcuequiesi benni becxxí-na len lebi'i.

### **Bittu salhu'u loesle lo ca uxtisi bittu ria lecani Jesús**

**6** Atti ritilha len loesle nna lugar quiba tsiale innábale aca elha uxtisi guele lo ca benni ria le Jesús, lo ca benni anca uxtisi bittu ria le Jesús la diale rinnabale aca elha uxtisi guele.<sup>2</sup> Lebi'i nna gua yuxebale, ca benni chi anca gue Tata Do Iyyabaaha, isía sá atti uncabi elha uxtisi gue ca benni se'e yies lo yu-ni. Gansi ca nu se'e yies lo yu-ni unle elha uxtisi guecani, ¿biaca lä dhale unle elha uxtisi gue ttu elha utilha güexxa?<sup>3</sup> ¿Lä gua yubale nna axta ca ingeli-na unri elha uxtisi guecani? Gansi anía nna ¿si nu anca gue yies lo yu-ni chiga lä aca gueri unri elha uxtisi gueni?<sup>4</sup> Larcala nna gansi te elha utilha guele lo ni'a gue ttu bixa ratele yies lo yu-ni, ¿biaca diale aca elha uxtisi guele lo ca nu bittu dica tsia le ca benni ria le Jesús guecani?<sup>5</sup> Rpea le aná qui ettuinle. ¿Si niba ttu benni teru elha rien gueni lä caa len lebi'i ca benni ria le Jesús qui unna elha uxtisi guele?<sup>6</sup> Delába unnuha nna läga sunru ritilha len loesle, sinuqui ria le ralhu'u loesle lo ca benni anca uxtisi bittu ria le Jesús.

<sup>7</sup> Lebi'i nna bala'anaba rigúale ru'u le ritilha len loesle. ¿Biaca lä ugo uchíabale lo nu rudhaca güee benni le? ¿Biaca lä ridí xenbale atti rigúacana nu anca guele?<sup>8</sup> Ttiaca lebi'i la unná rudhaca güele ca benni, rigúale nu anca guecani. Axta ca benni ria le Jesús rudhacale aná.

<sup>9</sup> Lebi'i nna gua yubale nna ca nu runi nu lä anca tsee-na lägabi elha ralhacana dhicana nu tsee dhi ca benni rinnabia Tata Do Iyyabaaha. ¡Bittu dhielhale ixú yiele!

Ni ca nu requi manni-na lhe

ni ca nu rudú xibicani lo ca nu bittu gualí anca diosi-na lhe  
ni ca nu risá nu bittu anca latselacani lhe  
niguaba ca unbiyuu risácana la loesi unbiyuuba cana lhe

<sup>10</sup> niguaba ca ubana-na lhe  
 niguaba ca nu ridáxxatta lecani gatta bixala nua guecani lhe  
 niguaba ca nu dusina lhe  
 niguaba ca nu rinne güee gue attu benni lhe  
 niguaba ca nu ridí yie ribana daca lona lhe  
 bittubi elha ralhacana dhicana nu tsee dhi ca benni rinnabia Tata  
 Do Iyyabaaha. <sup>11</sup> Anába beni ttulhele ca tu ttua. Ttiaca nnanna nna  
 Jesucristu Benni bananie ri-na leni Espíritu gue Tata Do Iyyabaa  
 gueri-na benque chi ancale nu nari, benque ancale nu se'e riesi anca  
 gue Tata Do Iyyabaaha lhe benque bese'e tseele len Ben-na lhe.

### **Lebi'i ancale attiba yotu atta do Espíritu gue Tata Do Iyyabaaha**

<sup>12</sup> Lebi'i nna rinnele rále: "Iyába guacaba unia." Ttiaca neti ria:  
 läga iyonna ancana nu dica ixuu. Gualíba, guacaba un benni iyába,  
 ttiaca bittu dica dhielhari innabia ttu bixa ri qui unri nu lä anca  
 tsee. <sup>13</sup> Elha go-na ancana nu dia lhe'eri. Lhe'eri nna ancana nu  
 ridí baneda elha go-na. Irpabacana ulhuxaba Tata Do Iyyabaaha  
 cana. Ttiaca cuerpu gueri-ni nna läga anca unná nu ixuinri qui  
 tsequi manniri. Cuerpu gueri-ni ancana gue Tata Do Iyyabaaha,  
 Tata Do Iyyabaaha nna anque Benni bananie na. <sup>14</sup> Attiba beni Tata  
 Do Iyyabaaha beacani Cristu qui beríe lhe'e baa atta yu'u ca nu  
 yatti-na, aníaguaba unie eyaquinri leni elha ra xen lee guee.

<sup>15</sup> Lebi'i nna gua yuxebale, cuerpu guele-na ancaguabana  
 cuerpu gue Cristu. ¿Si ixuubatia nu anca cuerpu gue Cristu qui  
 uquetia na leni cuerpu gue ttu nuila requi rutto'o cuerpu gueni qui  
 eyacana ttuba cuerpu len lana? ¡Tsatte bittu! <sup>16</sup> La gua yubale,  
 unbiyuu risána ttu nuila rutto'o cuerpu gueni nna ttuba benni reaca  
 nua lenna nua. Cumu lo ca sitsi gue Tata Do Iyyabaaha rá: "Ttuba  
 benni reaca irpabacana."<sup>a</sup> <sup>17</sup> Ttiaca benni ancabi gue Cristu, ttuba  
 benni reaca espíritu guebi len Espíritu gue Benniha.

<sup>18</sup> Bittu tsequi mannilé. Gualibietta lo unná, cumu bixaba attu  
 tulha runi ttu benni, lägabi re'an nua lhe'e cuerpu gueni, ttiaca  
 nu risána ttu nu bittu anca latsela-ni lhe'e cuerpu gueniha nua  
 roca'anna nu lä anca tsee runna. <sup>19</sup> Gua yuxebale nna lebi'i ancale  
 yotu atta do Espíritu gue Tata Do Iyyabaaha. Benniha unná doe  
 lhe'e lastoole. Tata Do Iyyabaaha betee Ben-na len lebi'i. Denua

---

<sup>a</sup> 6:16 Génesis 2:24

nna lebi'i lärga ancale nu banani lebi'i,<sup>20</sup> cumu lebi'i nna len nu te lidihaca-ni uyo'o Tata Do Iyyabaaha le. Larcala nna gualuni nu anca tsee len ca cuerpu guele-na, qui cuequi xen le Tata Do Iyyabaaha.

**Pablo rixxi'abi gaxasná un ca benni se'e latselacani,  
anágua ba ca benni bittu se'e latselacani lhe**

**7** Nnanna ecabia gue nu rinnaba tisale neti lo sitsi udhelhale len netiha. Gualí galá tseeba anca gan bittuba utsá nále.<sup>2</sup> Ttiaca lo ni'a gue de nnelaba rixúyie benni tsequi mannicana, nuarca coa ttuttu unbiyuu dho lenna nuila gueni, coa ttuttu nuila nna dho lenna unbiyuu gueni.<sup>3</sup> Unbiyuuha nna daa loni ga'adhi lenna nuila gueniha, nuilaha nna daa loni ga'adhi lenna unbiyuu gueniha.<sup>4</sup> Lärga gue nuila-na anca cuerpu gueni, cumu gue unbiyuu guenihaba chi ancana. Niguaba unbiyuu-na bitturu anca cuerpu guen-na gueni, cumu gue nuila guenihaba chi ancana.<sup>5</sup> Bittu aquinle udá guele atti tsu'u cu'e loesle, larba ganna irupabale ttuba ese'ele oquinna iquile bittu tsu'u cu'e loesle ttu tiempu qui aca tse'erle innele len Tata Do Iyyabaaha. Lenla nna ese'ele juntu attu libe, qui bittu dhi yie nu xxegüiha le de lä ridále uchíale lo nu ridále cuerpu guele.

<sup>6</sup> Nu anca quiba unní rinnea ria aní, läga rpea le gualunttiga aná.<sup>7</sup> Galá neti nna nuaba quia iyába benni nuttu nu dho lenna attiba neti, ttiaca Tata Do Iyyabaaha chi bete elha tsee gue ttuttu benni. Ttulhe benni uxícana elha tsee utsá nácani, a ttulhe benni uxícana elha tsee bittu utsá nácani.

<sup>8</sup> Neti nna rulisa le ca unbiyuu se'e ttuba-na, lenle ca nuila bidabi-na. Tseeba anca ganna eya'an ttubale attiba neti.<sup>9</sup> Ttiaca gan bittuba ridále lo nu ridá le cuerpu guele-na unna nna tseerla anca utsá nále attichula tse'ele uyúle elha disa gue nu ridá lele unle.

<sup>10</sup> Nnanna nna rulisa le ca benni chi betsá nále-na. Lebi'i ca nuila, bittu ela'ale len ca unbiyuu guele-na. Nu rinnea-ni nna ancana nu runi Tata Do Iyyabaaha mandadu unri, läga anca unní nu anca quia.<sup>11</sup> Gansi ttu nuila ela'ana leni unbiyuu gueniha, lana nna ttubana eya'anna bittu otsá náni attu libe. Gan biba nna unna duelha eyaca tseena leni unbiyuu gueniha. Aníaguaba lebi'i ca unbiyuu, bittu udhequile ca nuila guele-na.

<sup>12</sup> Adfíle nna upea le nu racabatia, bittu nu rá Tata Do Iyyabaaha: Gansi ttu unbiyuu ria leni Jesús do lenna ttu nuila bittu ria leni

Jesús, bittu ela'ana leni nuila gueniha, gansi unnuha nna gua racaba leni dho lenna na.<sup>13</sup> Gansi ttu nuila ria leni Jesús do lenna ttu unbiyuu bittu ria leni Jesús, bittu ela'ana len nua gansi unnuha nna racaba leni dho lenna na.<sup>14</sup> Cumu unbiyuu bittu ria leni Jesús reacana nu nari lo Tata Do Iyyabaaha de anca nuila gueniha nu ria leni Jesús. Anáguuba nuila bittu ria leni Jesús reacana nu nari lo Tata Do Iyyabaaha de do lenna unbiyuu ria leni Jesús. Cumu gan biba nna ca xi'incaniha nna nu tsigaba anca ca unnuha lo Tata Do Iyyabaaha, laca nnanna nna guancaba ca unnuha nu se'e riesi chi anca gue Ben-na.<sup>15</sup> Ttiaca gansi nuila o unbiyuu bittu ria leni Jesús rdacabana ela'ana leni nu do lenna na ela'abacana. Lania nna lärgabirua daa lo unbiyuu ria le Jesús dhoru lenna nulaha, anáguuba nuila ria le Jesús lhe cumu Tata Do Iyyabaaha nna uxbe ri qui tse'e len loesri lhatsiru.<sup>16</sup> Lu nna nuila, läga yulu gansi guadálu unlu qui lhá unbiyuu guelha bittu tsia nittina gansi na doba lenlu na. Niguaba lu, unbiyuu, läga yulu gansi guadálu unlu qui lhá nuila guelha bittu tsia nittina gansi na doba lenlu na.

<sup>17</sup> Coa ttuttule nna gualtse'e gaxasná chi boca'ana Tata Do Iyyabaaha tse'ele. Attiba se'e atti uxi Tata Do Iyyabaaha le acale guee aníaba gualtse'e. Unníba rpea iyába ca benni ria le Jesús uncabi.<sup>18</sup> Gansi ttu unbiyuu Israel chiba ren senni, nu runcana leni ca unbiyuu Israel, atti uxi Tata Do Iyyabaaha na acana guee, bittu ucatsina ancana anía. Gansi ttu unbiyuu bittu chi ren senni atti uxi Tata Do Iyyabaaha na acana guee, aníaba na ancana, bittu cuena senni.<sup>19</sup> Cumu lägabi raca duelha si ren senni, nu runcana leni ca unbiyuu Israel, o si bittu ren senni. Nu racaru duelha nna ancana, udori tisa gue nu beni Tata Do Iyyabaaha mandadu unri.<sup>20</sup> Coa ttuttule nna na ancabale gaxasná ancale atti uxi Tata Do Iyyabaaha le acale guee.<sup>21</sup> Gansi ancalu benni tto'o lo sina atti uxi Tata Do Iyyabaaha lu acalu guee, bittu ulaba lelu gue nua, ttiaca ganna gua dicaba lhálu nna ben duelha qui lhálu.<sup>22</sup> Benni ancana nu tto'o lo sina atti biaxina güia leni Benni bananie ri-na, benni requi laba chi ancana de babana len Ben-na. Anáguuba benni bittu ancana nu tto'o lo sina atti biaxna, benni tto'o lo sinaba chi ancana gue Cristu nnanna.<sup>23</sup> Leni nu te lidhacani uyo'e le. Denua nna bittu dhielhale acale nu tto'o lo sina gue ca benni.<sup>24</sup> Larcala nna ca benni ria le Jesús, coa ttuttule nna na ancabale attiba ancale atti uxi Tata Do Iyyabaaha le acale guee.

<sup>25</sup> Gue ca nu rbani-na, lägabi tisa chi bodha'an Benni bananie ri-na len neti gue gaxasná tse'ecana. Ttiaca netiba utea ttu elha rieni nu anca quiba lencana, cumu de anca benni guatúa le Benni bananie ri-na neti, nuarca xen le ca benni gue nu ria. <sup>26</sup> Neti nna racatia, lo ni'a gue elha disa ruyúri ca sá se'eri nnanna tseeba ancana se'eba ca benni attiba se'ecana. <sup>27</sup> Gansi do lenlu nuila nna bittu ela'alu. Gansi nuttuba nuila do lenlu nna bittu aquinlu quilalu nuila guelu. <sup>28</sup> Gansi utsá nálu nna läga tulha nua unlú. Anáguaaba nu rbaniha läga tulha nua un nua gansi utsá náni. Ttiaca ca nu rutsá náquinna elha richacha iquiba te guecani yies lo yu-ni. Unnuonna bittu raca lasia satecana.

<sup>29</sup> Neti nna raca lasia upea le, lebi'i ca benni ria le Jesús, lärgabirua isá se'eri, chiba dabigana gueri. Larcala nna ca nu chi betsá náquinna tse'ecana uncana attisiba nuttuba nuila do lencana. <sup>30</sup> Ca benni se'e ubesi-na uncana attisiba bittuba se'e si'icana. Ca nu se'e güexisi-na uncana attisiba bittuba re itta lecani. Ca nu ro'o guecani-na uncana attisiba bittubabi te guecani. <sup>31</sup> Ca nu se'e redí baa nu te yies lo yu-ni nna gualtse'e gualuni attisiba bittubabi redí baale. Cumu yies lo yu rilenri-ni nna gualuxattena.

<sup>32</sup> Neti nna rdaca bittu tse'ele ichacha iquile gue nu te yies lo yu-ni. Uncuiti bittu chi betsá nániha nna rudoru le nua unna nu anca gue Benni bananie ri-na, unna nu re'o le Ben-na lhe. <sup>33</sup> Ttiaca nu chi betsá nániha nna richacha iquini gue nu anca gue yies lo yu-ni, gue tixaca unna nu re'o le nuila gueniha lhe. <sup>34</sup> Anáguaaba läga ttudi anca leni nuila chi betsá nániha leni nuila anca nurbaniha. Nu rbaniha nna rulababa le nua unna nu re'o le Benni bananie ri-na, qui aca cuerpu gueniha leni espíritu gueniha nu se'e riesi anca gue Tata Do Iyyabaaha. Ttiaca nu chi betsá nániha nna rulabarla le nua gue nu te yies lo yu, qui unna nu radi le unbiyuu gueniha lhe. <sup>35</sup> Rpeba le aná qui salía tseenle, läga de rudheaya le utsá nále. Ribale aná qui tse'ele unle nu anca lhatsiru, udo lele unle itú iqui itú lele nu anca gue Benni bananie ri-na lhe.

<sup>36</sup> Gansi ttu benni raquinna läga anca tsee chi dia rite ida gue xi'iniunnániha atti anca utsá ná nua, na utsába ná nua, gansi aníaba rulaba leni anca tsee unna cumu utsá ná nua nna läga anca nua tulha. <sup>37</sup> Ttiaca gansi ttu benni chiba boquinna iquini, na dobinna xi'iniunnániha ancana nu rbani, tseeba nua, ladiba lana du tsitsina leni nu raquinna nuttu nu duna rudo duelhan na, sinuqui aníaba

raquinna unna len xi'iniunnániha.<sup>38</sup> Larcala nna tseeba nua ute ttu benni xi'iniunnániha leni unbiyuu, ttiaca tseeru anca bittu utena xi'iniunnániha leni unbiyuu.

<sup>39</sup> Nuila chi betsá náníha nna gue unbiyuuhaba anca nua laca do bani unbiyuuhaba. Ttiaca gansi gatti unbiyuuhaba nna gua dicaba edí nuilaha attu unbiyuu raca leni edína, ladiba anca nua nu ria leni Jesús. <sup>40</sup> Masquiba neti racatia tseerla salíanna gansi bittu otsá náni. Unná rulaba lasia cumu yua nna Espíritu gue Tata Do Iyyabaaha do lhe'e lastooa-niba runie rinnea aná.

**Pablo rinnebi gue bela gue ca nimala rute ca  
benni úna len ca nu bittu gualí anca diosi**

**8** Nnanna nna innea gue bela gue ca nimala rutti ca benni rutecana úna lo becoa gue ca nu bittu gualí anca diosi. Gualíba iyábari chi yuri gue unná, ttiaca nu chi yuri-na runna racari nu ttaba. Ttiaca gansi aquin gue loesri, unná runi rise'e tsitsiri lo neda gue Tata Do Iyyabaaha. <sup>2</sup>Benni raquinna ancana nu chi yuxxatta, saro'oru nua chi yuna. <sup>3</sup>Ttiaca benni raquinna gue Tata Do Iyyabaaha, Tata Do Iyyabaaha anca biabanie nua.

<sup>4</sup>Nnanna innea gue gansi gua dica gori bela gue ca nimala rutti ca benni rutecana úna lo becoa gue ca nu bittu gualí anca diosi-na. Ri'i nna gua yuxeabari tsa läganu anca ca nu rá benni anca diosi sia yies lo yu-ni, tturba ttu Dios do, delába Tata Do Iyyabaaha.

<sup>5</sup>Masquiba se'e ixe ca nu rácana anca diosi iyyabaaha lhe yies lo yu-ni lhe cumu gualí galá ixeba diosi lhe ca nu rá benni ancacana nu baninna cana lhe se'e,<sup>6</sup> ttiaca len ri'i nna ttuba Dios do, delába Tata gueri do iyyabaaha. Lee benie iyá nu se'e, ri'i nna se'eri qui ixuuri loe. Anáguba ttuba Benni bananie ri do, delába Jesús Benni anque Cristu. De lee nna se'e iyá nu se'e, anáguba ri'i lhe.

<sup>7</sup>Ttiaca läga iyá benni yucana unní. Ttulhele atta benbiale bedú xibile lo ca nu bittu gualí anca diosi-na ttua, axta nnanna atti role bela gue nimala utti nu betecana úna lo becoa gue ca unná, sna rulababa lele dequi gualíba bani ca nu rácana anca diosi-na. De ancale nu bittu se'e tsitsi lo neda gue Tata Do Iyyabaaha nna rulabatteba lele ancale nu anca tsiga lo Tata Do Iyyabaaha de utole belaha. <sup>8</sup>Gualí galá, läga elha go-na runna ancari nu tsu'uru le Tata Do Iyyabaaha. Cumu lägabi te iría lenri gansi gori belaha, niguuba lägabi unitiri gansi bittu gori na lhe. <sup>9</sup>Ttiaca gualgüia qui bittu aca

nu du yali lole-na nu uni un ca benni bittu chi se'e tsitsi lo neda gue Jesús tulha.<sup>10</sup> Cumu gansi ilen ttu benni bittu chi du tsitsi lo neda gue Tata Do Iyyabaaha luu nu chi yurulu gueonni dolu go etta atta do becoa gue nu rá ca benni ancana diosi-na, ¿läba ganna udúban nua goguabana elha go uca gue nu betecana úna lo nu rácanaanca diosiha?<sup>11</sup> Lania nna lo ni'a guelu de ancalu nu chi yu, tsia nitti benni bittu chi du tsitsi lo neda gue Tata Do Iyyabaaha, nu uttiguuba Cristuha cuenta gueni.<sup>12</sup> Atti runle rulaba chupa le ca benni ria le Jesús bittu chi se'e tsitsi lo neda gue Tata Do Iyyabaaha, lo Cristuhaba Benniha runle nu lä anca tsee.<sup>13</sup> Larcala, gansi de roa elha goha nna rinitti benni ria leni Jesús, tsala bitturu goa bela qui bittu unia un nua nu lä anca tsee.

### Pablo rixxi'abi gue nu guaca gue ttu apóstol unna

**9** ¿Si läba ganna gua du yali guaba loa unia nu racatia anca tsee? ¿Si läba neti anca apóstol benni chi ga'anani Jesús ichea ca tisa guee? ¿Si läba neti chi bilátia Jesús Benni bananie ri-na? ¿Si läba de sina runia gue Benni bananie ri-na, lebi'i nna ancale benni chi ria leni Ben-na?<sup>2</sup> Gansi leni adí benni bittu anca apóstol, ttiaca len lebi'i nna gualíba anca apóstol. Cumu de chi ancale benni baba len Benni bananie ri-na, unná rule'e lo gualí anca apóstol.

<sup>3</sup> Unní anca nu recabia gue ca nu rinnecana quia: <sup>4</sup> Ri'itu nna guateguuba derechu guetu i'iya gotu nu utele. <sup>5</sup> Teeguuba derechu guetu icheetu ca nuila guetu ria le Jesús gaxaba diatu attiba runi adí ca benni bedheti ca tisa bele'e Jesús-na lhe ca betsi Jesús lhe Cefas-na lhe. <sup>6</sup> ¿Si sun netiba lenia Bernabé-na labíaba cuentu sina len ni'a nátu qui te nu gotu, aca? <sup>7</sup> Lebi'i gua yubale läganu soldado te rudaxxuna nu anca gueni qui dhína nu reasinna tsiana utilha. Nuttuguuba nu te reada ya besuli, nianna bittu rona besuli ribía lo nua. Nuttuguuba nu te yu'inna carne'e nianna bittu redí baana ca unnuha. <sup>8</sup> Bittu aquinle ga suna gue nu rulaba le ca benni se'e yies lo yu-niba unní rulaba lasia ria aní, anágua rá lo ca ley bodha'ana Moisés. <sup>9</sup> Lo ca ley-na rá: "Bittu cu'u le yextsina ro'o ca u'una ru'u iqui xua xuxtila-na." Läga sunru gue ca u'una-n nua rulaba le Tata Do Iyyabaaha atti re anía. <sup>10</sup> Guebari nua rulaba le Benniha re anía. De lo ni'a guebari nna re aná lo ca ley-na, cumu nu relha'a lo yuha lenna nu run tsee xuaha, xenba le ca nua edícana lena gue sina runcana. <sup>11</sup> Ri'itu, attiba ttu nu uda xua nninni ancatu

cumu chi bettedha'antu ca tisa gue Tata Do Iyyabaaha len lebi'i. Larcala, ¿si yalhaba xxen nua gansi dhítu saro'o nu te guele yies lo yu-ni? <sup>12</sup>Gansi adí ca nu requi rixxi'a ca tisa-na tee derechu guecani ridícana saro'o nu te guele, ri'itu nna ¿si läba teerla derechu guetu dhítu nu utele?

Ttiaca ri'itu nna tsa lägabi chi rátu le: "Lebi'i nna daba lole ute le nu reasintu." Gua ruchíabatu lo iyá nu ratetu, de runtu qui bittubi te bixa unna tsaya lo ca tisa gue Cristu. <sup>13</sup>Lebi'i nna gua yubale, ca benni rixuucana lhe'e yotu-na, nu anca gue yotu-naba rocana. Ca benni runi sina lo becoa-na, ralhaguabacana rocana nu ribía lo becoa-na. <sup>14</sup>Anáguba chi boca'ana Jesús aca: Ca benni rixxi'a ca tisa gue Ben-na aca bancabi len nu rute ca benni rienquinna ca tisa-na. <sup>15</sup>Ttiaca neti nna tsa lägabi chi rpea le utele len neti, lä runguuba nu ria-ni lo sitsi-ni qui utele nu ralha dhia. Cumu tseerla anca len neti gattia attichula itúa nu runi do tseea de rixxi'aya ca tisa-ni bittubi ridía. <sup>16</sup>Neti nna lägabi runia gue nu ra xxeni leni de rixxi'aya ca tisa gue Jesús, cumu chiba anca mandadu quixxi'aya ca tisa-na. Carusi'iru neti gansi bittuba quixxi'aya ca tisa gue Ben-na. <sup>17</sup>Gansi neti rixxi'aya ca tisa-na cumu de racaba lasia, guateba lhíaxa. Ttiaca gansi de rido duelhaba nuarca requia rixxi'aya ca tisa-na, lania nna läga runia nua de raca lasia, sinuqui de boca'anba Tata Do Iyyabaaha sina-ni len neti. <sup>18</sup>Nianna, ¿bila nua anca lhíaxa ralha dhia ganna? Nu tsee ralha dhia ancana: Do tseea bittu ridía belhi gue de requia rixxi'aya ca tisa gue Jesús, delába bittu rinnaba ute ca benni nu ralha dhia.

<sup>19</sup>Masquiba läganu denna ro'a innabiana neti bixa unia, qui dhaba tsiaru le adí benni Cristu nna nuarca raca nu rudo tisa rixuu lo iyába ca benni. <sup>20</sup>Atti doa len ca benni quia anca benni Israel-na, runba attiba runcana qui ridáya ria lecani Jesús. Qui dhaba tsia lee ca benni rudocana tisa gue ca ley boca'ana Moisés, nuarca runia dequi sna rudoba tisa gue ca ley-na, masquiba läga gualí rinnabiaru ca ley boca'ana Moisés neti. <sup>21</sup>Atti doa len ca benni bittu te ley guecani nna runguuba dequi bittuguaba te ley quia, qui ridáya ria lecani Jesús. Masquiba läga gualí anca nu requi la lo ley gue Tata Do Iyyabaaha, cumu neti anca nu rudo tisa gue ley gue Cristuha. <sup>22</sup>Atti doa len ca benni bittu chi se'e tsitsi lo neda gue Jesús, benguuba anca attiba lacana qui udáya use'etsitsicana. Benba anca attiba anca iyábacana qui chibuca udáya ulá ttu chupacana. <sup>23</sup>De

runba qui tsia le ca benni ca tisa gue Jesús nuarca runia iyába unná, qui galha dhia nu tsee rá ca tisa-na lhe.

<sup>24</sup>Lebi'i nna gua yubale atti ritta ca benni gue güexunni, ixebacana ritupa qui ruxunnicana, ttiaca tturba benni ridána ridína ttu elha tsee. Lebi'i nna gualuttipa lele lo neda gue Tata Do Iyyabaaha qui dhalé dhíle elha tsee ute Ben-na. <sup>25</sup>Iyába ca nu ritta-na chi rese'e tseecana qui quittacana, tsa lärga runcana ni ttu nu unna unnitticana. Lacana runcana aná qui dhacana dhicana ttu corona nu rise'e lobana, ttiaca ri'i nna chi ruttipa leri qui dhíri ttu corona bittu ise'e lo. <sup>26</sup>Neti nna läga cuenta diaya ruxunnia attiba ttu nu bittu yuna gaxa isínna bittuguuba rutiaya attisiba benba rittilha lenia lhe. <sup>27</sup>Nu runla nna ruttea elha disa cuerpu quia-ni runia duelha gueni udonia tisa quia, qui läbi aca netila nu requi rixxi'atia ca benni ca tisa gue Jesús, bittu dhia elha tsee.

### Pablo rixxi'abi gue nu ben ca benni Israel qui bittu unri aná

**10** Ca benni ria le Jesús, neti nna bittu raca lasia ixulhinle gue nu guate ca benniola gueriha. Iyábacabi be'ocabi neda denalhacabi bea udá xequicabiha, iyáguabacabi betecabi lhe'e Indattoo Xinaaha lhe. <sup>2</sup>Lacabi nna ucacabi benni ubi inda de be'ocabi neda lhe'e xula gue beaha lhe de utecabi lhe'e indattooha lhe. Anía liba nna ucacabi benni baba len Moisés. <sup>3</sup>Anágua, iyáguabacabi utocabi la ttuba elha go udhelha Tata Do Iyyabaaha, <sup>4</sup>la ttuguuba inda udhelha Ben-na u'uyacabi lhe. Cumu u'uyacabi inda biría lhe'e iyyattoo udhelha Tata Do Iyyabaaha dedaa deyu'u neda len lacabiba. Cristuhaba Benniha anque iyyattooha. <sup>5</sup>Tiaca guate salhe ca bi'iniha bencabi nu bittu re'o le Tata Do Iyyabaaha. Denua nna nuarca níaba utticabi lo yu bisiha.

<sup>6</sup>Iyába unní uca qui acana ttu nu ugüiari. Aníachu nna bittu dha leri unri nu lä anca tsee attiba ca bi'iniha udá lecabí uncabi nu lä anca tsee. <sup>7</sup>Larcala nna bittu udú xibile lo ca nu bittu gualí anca diosí-na, bittu unle atti ben ttulhe ca bi'iniha. Attiba rá lo ca sitsi gue Tata Do Iyyabaaha: “Ca benni nna bebíattecacana utocana lhe u'uyacana lhe atti udulíttecacana uyu'ucana güitta güexisi.”<sup>a</sup> <sup>8</sup>Bittuguuba tsequi manniri unri atti ben ttulhe ca bi'iniha. De unnuha nna lhe'e ttu sába utti tsunna erúa milcabi

---

<sup>a</sup> 10:7 Éxodo 32:6

(23.000). <sup>9</sup> Bittuguaba utse'enri Benni bananie ri-na atti beni ttulhe ca bi'iniha. Lo ni'a gue unnuha nna utticabi de utisi belha cabi.

<sup>10</sup> Bittuguaba inne güeri gue Tata Do Iyyabaaha atti unne güee ttulhe ca bi'iniha. Lo ni'a gue unnuha nna belhuxa ingeli udhelha Tata Do Iyyabaaha cabi.

<sup>11</sup> Iyába unná guate ca bi'iniha qui acana nu ugüiari. Ucana lo sitsi, qui ri'i ca benni se'e ca sá lhuxa-ni bittu unri atti ben ca bi'iniha. <sup>12</sup> Larcala, benni rudhaca leni chi du tsitsina lo neda gue Tata Do Iyyabaaha, udonia cuidadu qui bittu ixú yiena unna nu bittu anca tsee. <sup>13</sup> Lebi'i nna lägabi chi guatele ttu nu bittu chi guate adí benni. Tata Do Iyyabaaha anque Benni dica uxten lerie. Lee nna läga uguelhe satele ttu nu bittu dhale uchiale loni. Delába unnuha nna gansi chi bisía satele ttu bixa nna cuinaba lee aca lanie le uchiale qui anáchu dhale lo nua.

<sup>14</sup> Larcala nna ca benni ria le Jesús racatia gueni, gualiriesi lhe'e nu anca gue ca nu bittu gualí anca diosi-na, bittu udú xibile lo ca unná. <sup>15</sup> Rinnea rulisa le cumu ancale benni radú leni. Gualitsatsa ni'ale gue nu ria le-ni gansi guancana nu gualí. <sup>16</sup> Atti rori rse gue Benni bananie ri-na, ri'i nna ruteri xquixaru len Tata Do Iyyabaaha gue vinu ri'ariha, lania nna riselari reni gue Jesús. Atti rori ttaxtila benni rilha'ari-na, ri'i nna riselari cuerpu gue Ben-na. <sup>17</sup> Masquiba raca ixeri, iyábari rori la ttuba ttaxtila. Denuala nna ttu benniba anca iyábari.

<sup>18</sup> Gualugüiarga gue nu run ca benni Israel-na. Atti rocana bela gue ca nimala rutticana qui rutecana úna lo becoa gue Tata Do Iyyabaaha, Tata Do Iyyabaaha Benni ridí baneda úna rite lo becoaha nua riselacana. <sup>19</sup> Leni nu ria-ni nna läga diatia ria le dequi te lidhaca ca nu bittu gualí anca diosi-na, niguaba lä diatia ria le dequi bela ribía lo becoa gue ca unná ancana nu gualí te lidhaca-ni. <sup>20</sup> Nu ria-ni nna ancana: gansi chi rutti ca benni bittu anca biani Tata Do Iyyabaaha ttu nimala qui utevana úna lo becoa gue ca diosi quecani, len ca be xxegüiba rutecana nua, läga len Tata Do Iyyabaaha rutecana nua. Neti nna bittu raca lasia iselale ca be xxegüi-na de gole nu rutecana len ca unná. <sup>21</sup> Bittu aca i'iyale vinu atti role rse gue Benni bananie ri-na, nianna lenla nna ede'eyaguabale nu anca gue ca be xxegüi-na. Bittu dica ebíale ro'o mexa du atta sia ca benni rocana rse gue Benni bananie ri-na, nianna lenla nna edebíale ro'o mexa atta sia ca nu rocana rse

gue ca be xxegüi-na. <sup>22</sup> ¿Si rdacari unri aná qui utse'enri Tata Do Iyyabaaha aca? ¿Si adírla tsitsi ra leri atti Ben-na aca?

**Iyába nu unle gualun na qui  
cuequi xen benni Tata Do Iyyabaaha**

<sup>23</sup> Lebi'i nna rinnele rále: "Iyába guacaba unia." Ttiaca neti ria: Läga iyonna ancana nu dica ixuu. Gualfba, guacaba un benni iyába, ttiaca läga iyá unná runna tse'e tsitsiri lo neda gue Tata Do Iyyabaaha. <sup>24</sup> Ni ttule bittu unle suntteba nu unna salía tseenle, sinuqui unguale qui salía tseena adí benni. <sup>25</sup> Gualgoba iyába bela rito'o lhe'e atta raca i'iya-na, bittu innába tisale gue ga daa belaha qui bittu unna ulaba lele gue nua. <sup>26</sup> Cumu,

gue Tata Do Iyyabaahaba itúba yies lo yu-ni leni iyába nu  
se'e loni.<sup>a</sup>

<sup>27</sup> Gansi gaxi ttu benni bittu ria leni ca tisa gue Jesús lhe'e lisni qui gole etta lenna lebi'i nna racaba lele tsiale, gualgoba iyába nu usiana lole. Bittu innába tisale ga daa nu goleha, qui bittu ulaba lele gue nua. <sup>28</sup> Ttiaca gansi quixxi'en nuxa benni le: "Belaha nna ancana gue nimala betticana betecana úna lo becoa gue ca diosi guecani", lebi'i nna bittu gole nua lo ni'a gue nu utixxi'enna leha, qui bittu udú chupana le nua. <sup>29</sup> Rinnea gue nu ulaba le benni utixxi'enna leha, bittu rinnea gue nu ulaba lele.

Cumu, ¿biaca ettesuna attu benni subi unia nu raca lasia de rulaba leni bittuanca tsee nu runia? <sup>30</sup> Gansi neti guaruteba xquixaru leni Tata Do Iyyabaaha gue nu roa nna ¿biacala itúa bala'ana quia de roa nu betea xquixaru leni Tata Do Iyyabaaha gueni? <sup>31</sup> Larcala atti role ttu bixa lhe atti i'iyale ttu bixa lhe atti runle ttu bixaba lhe gualun qui cuequi xen benni Tata Do Iyyabaaha. <sup>32</sup> Bittu unle ichecu ni ttu benni, ni ca benni Israel-na lhe ni ca benni bittu anca benni Israel-na lhe niguaba ca benni ria le Jesús lhe. <sup>33</sup> Anágua ba neti, leni iyába nu runia, runia duelha re'o le iyába benni, läga reguila unia suna nu salía tseebana neti, runba nu salía tseena adí benni qui anáchu odilá Tata Do Iyyabaaha cana.

---

<sup>a</sup> **10:26** Salmo 24:1

# 11 Gualun atti runia, attiba neti runia atti beni Cristu.

**Pablo rixxi'abi gue gaxasná un iqui ca nuila-na atti ritupa ca benni rudú xibicani lo Tata Do Iyyabaaha**

<sup>2</sup>Tsitsiba yopitia le lebi'i ca benni ria le Jesús, de satíaba rexxa lele neti, de gua rudobale tisa runle attitteba bele'etia leha lhe.

<sup>3</sup>Nnanna nna raca lasia unale, Cristu anque Benni rinnabia iyába ca unbiyuu-na. Ca unbiyuu-na nna ancacana nu rinnabia gue ca nuila guecani. Tata Do Iyyabaaha nna anque Benni rinnabia gue Cristu.

<sup>4</sup>Iyába unbiyuu rudhea iquini atti rixxi'ana ca tisa bete Tata Do Iyyabaaha len lana o rinnena len Benniha lhe rigu'uba ni'a nua Benni anca nu rinnabia gueniha. <sup>5</sup>Gansi ttu nuila bittuba rudhea iquini gansi chi rinnena len Tata Do Iyyabaaha o rixxi'ana tisa bete Tata Do Iyyabaaha len lana, rigu'uba ni'a nua nu rinnabian na, attisiba begába xiga iqui nua. <sup>6</sup>Cumu gansi bittuba rudhea iqui ttu nuila nna tsala ugá iquini gan nía. Gansi rettúbani nuilaha ichuu itsiquini o ugá xiga iquini, ixxúala lari iquini ganna. <sup>7</sup>Unbiyuu-na nna läga dica udhea iquini cumu lana rule'e lona gaxasná anca Tata Do Iyyabaaha, rule'e lona nu ra xxeni lee gue Ben-na lhe ttiaca nuila-na rule'e lona nu ra xxeni le gue unbiyuu-na. <sup>8</sup>Cumu läga lhe'e cuerpu gue nuila-na biría unbiyuu beni Tata Do Iyyabaaha primero, nuila-n liba biríana cuerpu gue unbiyuu-na. <sup>9</sup>Läga ben Tata Do Iyyabaaha unbiyuu-na lo ni'a gue nuila. Nuila-n liba unná benie na lo ni'a gue unbiyuu-na. <sup>10</sup>Denuala nna labíaba udhea iqui ca nuila-na lo ni'a gue ca ingeli-na qui ule'e lo gua rapabacana respeto ca unbiyuu guecani. <sup>11</sup>Ttiaca len ri'i ca benni ria leri Jesús, unbiyuu-na nna läganu na do gansi nuttuba nuila-na do, anáguuba nuila-na, läganu na do gansi nuttuba unbiyuu-na do. <sup>12</sup>Cumu attiba gualíba nuila-na biríana cuerpu gue unbiyuu-na, aníaguuba gualí nuila-nba rigu'una unbiyuu-na. Iyá bunni nna Tata Do Iyyabaahaba runie na.

<sup>13</sup>Lebi'iba gualná sanga, ¿si guanca tseeba dhu ttu nuila innena len Tata Do Iyyabaaha bittu udhea iquini? <sup>14</sup>¿Läba ganna la elha rien gueri-nba gua rule'e binna ri guateba rule'e uguelha ca unbiyuu-na ittúnna itsiquicani? <sup>15</sup>ttiaca nuila-na ttu nu tsee unná anca len lacana aca ttunna itsiquicani. Lacana nna chiba anca ittúnna itsiquicani qui ixuuna udheana iquicani. <sup>16</sup>Gansi nuxa raca

leni itsatsa ni'ani gue nu ria-ni nna neti nna upea le, ri'itu nna anába labitu runtu, lägabi labitu untu attu nu subi, niguaba adí ca benni ria le Tata Do Iyyabaaha lhe.

### **Pablo rixxi'abi gue lhatsiru un ca benni atti rocabi rse gue Jesús**

<sup>17</sup> Leni nu upea le nnannarguaba nna bittu aca innía tseeba anca nu runle, cumu läga runle nu dica ixuu gansi chi ritupale qui cuequi xenle Tata Do Iyyabaaha, nu runleha nna runnittila nua le. <sup>18</sup> Nu primerba upea le nna ancana, neti nna chi bina dequi lebi'i nna gansi chi ritupale qui cuequi xenle Tata Do Iyyabaaha, rilha'atteba lhe'e loesle. Neti nna racatia gaxa gualíba aníaba runle. <sup>19</sup> Cumu labíaba ila'a lhe'e loesle, qui anáchu ule'e lo gaxa se'e nu gualíga runi nu rá Tata Do Iyyabaaha. <sup>20</sup> Larcala nna atti ritupale qui gole rse gue Jesús, lärga gualínle rse gue Benniha nua role, <sup>21</sup> cumu atti ralha gole etta nna coa ttutubale ridú lottebale role elha go cheele. Ttulhe benni nna ritunbacana se'ecana, laca adíle nna axtaba ridusinle. <sup>22</sup> ¿Läba gan gua doba lisse atta tsu'ule i'iyale lhe gole lhe? ¿Bi gue rigu'u ni'ale ca benni ria le Tata Do Iyyabaaha, runle rettuin ca benni bittu te gueni lhe? ¿Bila upea le gue nu runle-ni? ¿Si inníba dequi tseeba anca nu runle? ¡Dica! Tsa läga innía dequi tseeba anca nu runle.

### **Atti uto rse Jesús lenie ca benni rudheti nu rulhe'e laní Pascua**

*(Mt. 26:26-29; Mr. 14:22-25; Lc. 22:14-20)*

<sup>23</sup> Neti nna nu bele'ebin Jesús neti chi bele'etia le: La ela atti bete Judas Jesús Benni bananie ri-na las ná ca nu uttican Benniha, lee nna bedaxxue ttaxtila, <sup>24</sup> dequide re Tata Do Iyyabaaha xquixarue nna ulha'attebe lhe'e ttaxtilaha, nianna re: “[Gualgo lhe guali’iya lhe.] Ben-ni anque cuerpu quia, benni utea gatti lo ni'a guele. Aná unle qui exxa lele neti.” <sup>25</sup> Aníaguaba benie, dequide chi uto rseque, bedaxxuttebe copa ta'a vinu lhe'eniha, nianna re: “Vinu ta'a lhe'e copa-ni ancana nu raxxína nu dia-ni tisa cubi rugüe Tata Do Iyyabaaha len ca benni. Len reni quia oca'an tsitsia tisa-na. Aní unle, atti i'iyale unní nna exxa lele neti.” <sup>26</sup> Larcala nna atti gole ttaxtila-ni lhe i'iyale vinu-ni lhe lebi'i nna rixxi'ale gue utti Jesús lo ni'a gueri. Anába unle axta liba esié.

<sup>27</sup> Larcala nna nuxaba benni bittu rutena lidhaca rse gue Jesús atti rona ttaxtila-na lhe ri'ana vinu-na lhe lana nna racana nu che tulha gue nu runna de rigu'u ni'ani cuerpu gue Jesús, reni belali Benniha lhe. <sup>28</sup> Denua nna atti deobali gole ttaxtila-na lhe i'iyale vinu-na lhe coa ttuttule itsatsa ni'ale gue nu runle. <sup>29</sup> Cumu benni nu ladiatteba rona ttaxtilaha lhe ri'ana vinuha lhe bittu rugüena lidhaca cuerpu gue Jesús, unnuha nna de rona lhe ri'ana lhe rseha anía, rílaba gueni dhína elha disa ute Tata Do Iyyabaaha. <sup>30</sup> Lo ni'a gue unná nna rani ixele, chi ancale si'i lhe ixeguale chi utti lhe.

<sup>31</sup> Ttiaca gansi itsatsa ni'a tseeri gue nu anca gueri, lania nna lägabi te bixa lo ni'a gue utee Ben-na elha disa gueri. <sup>32</sup> Atti rute elha disa gueri nna runie nua qui iyieninri udori tisa. Anía nna bittu udelha iyye ri lenri ca nu bittu ria le Jesús se'e yies lo yu-ni.

<sup>33</sup> Larcala nna lebi'i ca benni ria le Jesús attiba neti, gansi chi ritupale qui gole rse gue Jesús, gualcueda loesle. <sup>34</sup> Gansi chiba rituni nuxale nna tsala gualgottela lhe'e lisle qui bittu utee Tata Do Iyyabaaha elha disa guele lo ni'a gue nu runle atti ritupale go rsele.

Gue adí bixarua te innía nna guannebari gueonna gansi chi bisíaya atta se'ele-na.

**Pablo rixxi'abi gue ca elha tsee rute  
Espíritu gue Tata Do Iyyabaaha**

**12** Ca benni ria le Jesús, neti raca lasia unale gue nu anca gue ca elha tsee rute Espíritu gue Tata Do Iyyabaaha len ttutturi.

<sup>2</sup> Lebi'i nna gua yubale, atti bittu chi ria lele Jesús, tsaba xuaba lole ridielhale denole ca xunaxi biría rá benni dequi anca diosí-na.

<sup>3</sup> Larcala nna raca lasia unale nnanna: “Ni ttu benni chi yu'u Espíritu gue Tata Do Iyyabaaha lhe'e lastooni, aca quena iqui Jesús.”

Bittuguaba aca inná ni ttu benni: “Jesús anque Benni bananie neti”, gansi bittuba yu'u Espíritu gue Tata Do Iyyabaaha lhe'e lastooni.

<sup>4</sup> Ixe lo ca elha tsee te, ttiaca la ttuba Espíritu gue Tata Do Iyyabaaha rute ca ben-na len ri'i. <sup>5</sup> Ixe loguaba sina gue Tata Do Iyyabaaha te unri, ttiaca la ttuba Benni bananie ri-na rixuuri lo sina guee. <sup>6</sup> Ixe loba nu runri, ttiaca la ttuba Tata Do Iyyabaaha raca lanie iyábari qui runri nua. <sup>7</sup> Len coa ttutturi runi Tata Do Iyyabaaha rule'e lo elha tsee rute Espíritu guee-na, qui rixuinri Ben-na runri nu salía tseena iyábari. <sup>8</sup> Ttulhe benni nna rute Espíritu-na elha tsee guecabí qui acacabi nu rinne tisa gue nu te elha rieni gueni.

Adí benni nna rute Espíritu-na elha tsee guecabi qui acacabi  
nu rule'e gue nu ritelíquinbi gue nu anca gue  
Tata Do Iyyabaaha.

<sup>9</sup> Adí benni nna rute Espíritu-na elha tsee guecabi qui acacabi  
benni ria lecabí aca nu rinnabacabi aca,  
adí benni nna rute Espíritu-na elha tsee guecabi qui runcabi  
reaca ca benni rani-na.

<sup>10</sup> Adí benni nna rute Espíritu-na elha tsee lencabi qui runcabi  
milagru,  
adí benni nna rute Espíritu-na elha tsee lencabi qui  
quixxi'acabi nu rá Tata Do Iyyabaaha,  
adí benni nna rute Espíritu-na elha tsee lencabi qui  
ttedaaquinbi gue nu yu'u Espíritu gue Tata Do  
Iyyabaaha lhe'e lastooni lhe gue nu yu'u espíritu  
gue nu xxegüiha lhe'e lastooni lhe  
adícabi nna rute Espíritu-na elha tsee lencabi qui innecabi  
attu tisa subi rute Tata Do Iyyabaaha,  
adícabi nna rute Espíritu-na elha tsee lencabi qui quixxi'acabi  
bixa dia le ca tisa rute Tata Do Iyyabaaha rinne  
adí ca benni.

<sup>11</sup> Iyába unní runi ttuba Espíritu, delába Espíritu gue Tata Do  
Iyyabaaha. Lee rute, len ttuttu ca benni nu racanie anca tsee  
lencana.

**Ca benni ria le Jesús, masquiba raca ixecabi,  
ttuba benni ancacabi len Ben-na**

<sup>12</sup> Cuerpu gue ttu benni nna ixe loba ancana, ttiaca masquiba  
raca ixe ca nua, ttu cuerpuba anca iyábacana. Aníaguaba ca benni  
baba len Cristu, ttuba chi ancacabi len Ben-na. <sup>13</sup> Iyábari chi udiri  
inda qui ucari ttuba cuerpu. Anába beni Espíritu gue Tata Do  
Iyyabaaha lenri ca benni Israel, len ca benni bittu anca benni  
Israel-na lhe len ca benni tto'o lo sina lhe len ca benni bittu tto'o lo  
sina lhe. Iyábari uxíri la ttuba Espíritu gue Tata Do Iyyabaaha.

<sup>14</sup> Cuerpu gue ttu benni nna läga tturu nua anca, ixe loba ancana.

<sup>15</sup> Gansi ni'aniha innána: "Cumü läga anca ná, larcala nna läga anca  
gue cuerpu-ni", läga de unnuha nna bitturu anca nua gue cuerpuha.

<sup>16</sup> Gansi naganiha innána: "Cumü läga anca neti iyya lo, larcala nna  
läga anca gue cuerpu-ni", läga de unnuha nna bitturu anca nua gue

cuerpuha. <sup>17</sup>Ttirca itúba cuerpu-na ancana iyya lo, lania nna ¿bila leni iyieninri? Ttirca itúba cuerpu-na ancana naga, lania nna ¿bila leni urenri? <sup>18</sup>Ttiaca Tata Do Iyyabaaha besíe cuerpu-na ttuttu ca nu reasinna atta ucaba lee. <sup>19</sup>Ttirca iyába ca nu anca cuerpu-na ttu loba ancacana, lania nna lägabi cuerpu te. <sup>20</sup>Gualíba ixe nu ancana cuerpu-na raca, ttiaca ttuba cuerpu anca iyábana.

<sup>21</sup>Iyya lori-na nna läga aca gána ca nári-na: "Lägabi reasatia le." Niguaba iquiri-na bittu dica gána ca ni'ari-na: "Bittu reasatia le." <sup>22</sup>Delába unnuha nna ca nu raquinri dequi bi guabi rixuu nu anca cuerpu-na la reasaruinri cana. <sup>23</sup>Ca nu raquinri bittutte lidhaca-ni te nu anca cuerpu gueri-na, ancacana nu rugucu tseeruri xocani. Ca nu bittu raca leri iláni benni sia cuerpu gueri-n la nna ruyú si'iruri, <sup>24</sup>laca ca nu sia cuerpu gueri rule'e tseeru-na nna lägabi reasacani ca unná uyú tseeri cana. Ttiaca Tata Do Iyyabaaha anába benie cuerpu gueri-ni qui uyú tseeruri ca nu raquinri bittutte lidhaca-ni te gue cuerpu gueri. <sup>25</sup>Unná runi se'e tsee len loesi iyába ca nu anca cuerpu-na qui cua ttuttu-na ichacha iqui gue loesni. <sup>26</sup>Gansi ttu ca nu anca cuerpu gueri-na bixa rdacana, iyába ca nu sia cuerpu-na ratecana. Gansi ttu ca nu anca gue cuerpu gueri-na, ruteruri lidhaca-ni, iyába adí ca nu anca cuerpu-na se'e tseecana len nu ruteruri lidhaca-niha.

<sup>27</sup>Lebi'i ancale cuerpu gue Cristu. Coa ttuttule chi te ttu sina runle attiba ttuttu ca nu anca cuerpu gueri-na chi runcana yayabale sina. <sup>28</sup>Len lebi'i ca benni ria le Jesús bose'e Tata Do Iyyabaaha,

primertteba ca benni chi ga'anani Jesús iche ca tisa guee lá  
apóstol,

berupa nna ca benni rixxi'a ca tisa rute Tata Do Iyyabaaha  
len lacabi,

beyonna nna ca benni aca maestru ule'e ca tisa guee-na,  
lenla nna ca benni runi milagru,

dequila nna daa ca benni reoni ca benni rani,  
ca benni uni yuda adí benni lhe

ca benni rigu'ucana neda ca benni len nu uncana lhe  
ca benni rinne ixe lo tisa subi rute Tata Do Iyyabaaha lhe.

<sup>29</sup>Läga iyári ancari apóstol,

bittuguaba iyári ancari benni rixxi'a ca tisa rute Tata Do  
Iyyabaaha lhe

läguuba iyári ancari maestru lhe

bittuguaba iyári anca benni runi milagru lhe.

<sup>30</sup>Läguaba iyári uxíri elha tsee qui eyonri ca benni rani-n lhe  
bittuguaba iyári rinneri attu tisa subi rute Tata Do Iyyabaaha  
lhe

bittuguaba iyári raca gueri quixxi'ari nu dia le ca tisa subi  
rute Tata Do Iyyabaaha rinne ca benni-n lhe.

<sup>31</sup>Lebi'i nna gualuni duelha dharu lele dhíle ca elha tsee ixuuru.  
Nnanna nna quixxi'atia le gue attu nu ancana tseerla.

### Nu raquin gue loesri anca nu xxenru

**13** Gansi neti bete Tata Do Iyyabaaha elha tsee quia innea ixe lo  
tisa rinne ca benni se'e yies lo yu-ni, ca tisa rinne ca ingeli-na  
lhe ttiaca bittu racatia gue ca benni, lania nna ancaba attiba ttu  
iyya nu cuentaba rigu'u ts'i'ini o attiba attu iyya nu suntterba ruidu  
runna. <sup>2</sup>Gansi neti bete Tata Do Iyyabaaha elha tsee quia qui  
quixxi'aya ca tisa rute len neti, ritedaatia gue iyá nu te gatsinie  
bittu yu benni gueni lhe anca nu te elha rieni gueni yu iyáxeaba lhe  
anca nu ria tsitsi leni atti innea upea ca i'iya-na tsiacana satsiacana  
attu re nna guacaba nua, ttiaca gansi bittuba racatia gue ca benni,  
neti nna tsa lägabi daca lania. <sup>3</sup>Gansi quidhia iyába nu te quia len  
ca benni bittu te gueni, utea cuerpu quia-ni qui itena lo gui lhe tsa  
lägabi ixuu nu unia gansi bittuba racatia gue ca benni.

<sup>4</sup>Benni racani gue ca benni nna ancabi nu pasensi,  
nu du tsee leni lhe  
nu bittu rapa malisi lhe  
nu bittu runi ancana nu ra xxeni leni lhe  
nu bittu runi ttaba lhe.

<sup>5</sup>Bittuguaba ancabi nu lä duta leni,  
bittuguaba do lebi suntteba nu anca guebi lhe  
bittuguaba rise'enbi cuenta lhe  
bittuguaba rigu'u lebi lhe.

<sup>6</sup>Bittuguuba re'o lebi gue ca nu runi nu lä anca tsee-na lhe  
gue nu anca tsee runi ca benni liba re'o lebi.

<sup>7</sup>Benni racani gue ca benni nna ancabi benni satíaba ridí elha  
xen lasi  
gue iyába ria lebi lhe  
iyába xen lebi salía tseena lhe  
iyába rugo ruchíabi loni lhe.

<sup>8</sup> Isía sá nna chuloba elha tsee ridí ca benni rixxi'acabi ca tisa rute Tata Do Iyyabaaha. Lhuxaguaba elha tsee ridí ca benni rinnecabi ca tisa subi lhe itúaguaba elha tsee ridí ca benni qui te elha rieni guecabi lhe ttiaca nu raquin gue loes ri-na, tsa läga lhuxana. <sup>9</sup> Cumu nu yuri nnanna nna läga ancana ida'a, bittuguaba rixxi'ari ida'a ca tisa rute Tata Do Iyyabaaha lhe. <sup>10</sup> Iyába nu bittu anca ida'aná itúa, gansi chi bisía sá esía Benni unie iyába ida'a.

<sup>11</sup> Atti anca unto chica'a rinneba attiba rinne ttu unto, rulababa lasia attiba rulaba lee ttu unto lhe ritedaabatia attiba ritedaani ttu unto lhe. Atti liba bisía uca unbiyuu xeni nna bodha'ana runia atti runi ttu unto. <sup>12</sup> Nnanna nna läga chi ancibia tseenri nu anca gue Tata Do Iyyabaaha, rilábinrie attiba nu rilá lo ttu iyyaguana bitturu rilá tsee loni. Ttiaca isía sá atti ilenrie aníga lori. Nnanna nna läga ritedaatia iyá, ttiaca isía sá atti unbiaga Tata Do Iyyabaaha, attiba lee anca bienie itúxeaya. <sup>13</sup> Tsunna lo nu bittu itúa len ri'i: nu ria leri Tata Do Iyyabaaha, nu xen le rie-na lhe nu raquin gue loesri-na lhe ttiaca nu raquin gue loesri-nba anca nu xxenru gue delo iyunna ca unná.

### Pablo rixxi'abi adí gue ca elha tsee rute Espíritu gue Tata Do Iyyabaaha

**14** Gualun duelha acale benni raquin gue loesni, gualudháguaba lele dhíle ca elha tsee rute Espíritu gue Tata Do Iyyabaaha lhe. Ttiaca gualudháru lele dhíle elha tsee nu uni acale benni rixxi'a ca tisa rute Tata Do Iyyabaaha len lebi'i. <sup>2</sup> Cumu nu rinne attu tisa subi, läga len benni nua rinnebi, len Tata Do Iyyabaahaba Benniha rinnebi. Larcala tsa läganu ritedeenna gue nu rábi, cumu rinnebabi ca tisa bittu yu benni rute Espírituha len labi. <sup>3</sup> Ttiaca benni rixxi'a ca tisa rute Tata Do Iyyabaaha len labi nna rixxi'ababi ca tisaha len ca benni qui tse'e tsitsicabi lo neda gue Tata Do Iyyabaaha, qui ruttipabi lecabí lhe qui rutebi elha xen lasi lencabi lhe. <sup>4</sup> Benni rinne attu tisa subiha nna la laba bi'iniha runbi ridú tsitsibi, ttiaca benni rixxi'a ca tisa rute Tata Do Iyyabaaha len labi nna runbi rise'e tsitsi ca benni ria le Jesús.

<sup>5</sup> Neti nna ridá lasia innee iyále attu tisa subi, ttiaca tseerla anca quixxi'ale ca tisa rute Tata Do Iyyabaaha len lebi'i, cumu benni rixxi'a ca tisa rute Tata Do Iyyabaaha nna xxenru anca sina runbi atti benni rinne attu tisa subi. Güen galá ttirca dequide innebi tisa

subiha nna eyequibi quixxi'abi nu dia le nua qui use'e tsitsibi ca benni ria le Jesús.

<sup>6</sup> Ca benni ria le Jesús, ttirca neti ita atta se'ele-na innea attu tisa subi, lägabi ixuu nua lenle gansi bittuba quixxi'atia le nu bele'en Tata Do Iyyabaaha neti, o gan bittuba quixxi'atia le nu ritedaatia anca gue Ben-na lhe gan bittuba quixxi'atia le ca tisa bete Ben-na len neti lhe gan bittuba ule'etia le nu raca lee idetile lhe. <sup>7</sup> Attiba anca ca nu rixuuni benni qui rulhacana, delába nu anca pipi-na lenna nu lána arpa-na. Gansi bittuba uncana ulha tsee ca unná ¿tti modu sadú le benni bix nua rulha lencan ca unná? <sup>8</sup> Attiba lo ttu elha utilha xeni, gansi bittuba cu'u tsee tsi'i trompetaha ¿tti modu ttedaani ca benni qui ese'e tseecana itilhacana? <sup>9</sup> Anágua bunna anca len lebi'i. Gansi rinnebale attu tisa subi nu bittu yu benni, ¿tti modu sadú lecani gue bix nua rále? Cumu attisiba be-nba nua rulisale. <sup>10</sup> Gualí galá ixeloba ca tisa rinne benni te yies lo yu-ni, ttiaca ttuttu ca tisa-na te nu diaquinna innáacana. <sup>11</sup> Gansi neti bittuba radú lasia nu dia le ca tisa rinne benni duha nna attiba benni dittuba anca len bi'iniha. Anágua bi'iniha attiba benni dittu ancabi len neti. <sup>12</sup> Denua nna lebi'i ca benni ridá lele dhíle elha tsee ruta Espíritu gue Tata Do Iyyabaaha, gualun duelha qui dhi lenbale ca elha tsee ixuuru qui use'e tsitsile ca benni ria le Jesús.

<sup>13</sup> Larcala nna benni rinne attu tisa subi-na innábabi len Tata Do Iyyabaaha aca guebi quixxi'abi bixa dia le nu rábiha. <sup>14</sup> Cumu gansi neti rinnea len Tata Do Iyyabaaha len attu tisa subi, espíritu quia-nba unná rinnee, ttiaca elha rien quia-ni nna läga ritedeenna gue nu ria. <sup>15</sup> ¿Bila unia ganna? Inneba leni Tata Do Iyyabaaha leni espíritu quia-ni gan nía, inneguaba lenie len elha rieni quia-ni lhe, ulhaguaba guee leni espíritu quia-ni lhe ulhaguaba guee leni elha rieni quia-ni lhe. <sup>16</sup> Cumu gansi lu rutelu xquixaru leni Tata Do Iyyabaaha len espíritu guelha, ¿tti modu ecabi benni bittu chi yu tsee gue nu runluha innábi: "Amén" gue nu rutelu xquixaruha gan läga radú lebi gue bix nua rálulta? <sup>17</sup> Lu nna tseeba betelu xquixaru len Tata Do Iyyabaaha, ttiaca attu nua nna tsa läga benlu dhu tsitsi nua. <sup>18</sup> Neti nna rutea xquixaru len Tata Do Iyyabaaha, de netiba nu rinnerua attu tisa subi atti nuxabale. <sup>19</sup> Ttiaca len ca benni ria le Jesús tseerla anca len neti innea gayu tisa radú le benni qui ixuuna ule'etia ca benni, attichula innea tsii mil tisa subi bittu ritedaani ca benni.

<sup>20</sup> Ca benni ria le Jesús, bitturu ulaba lele attiba rulaba le ca unto-na. Gualacaba attiba ttu unto bittu yu unná nu lä anca tsee, ttiaca gualulaba lele atti rulaba le benni xeni. <sup>21</sup> Lo ca sitsi atta dia ca tisa gue Tata Do Iyyabaaha rinnee re: “Neti ixuutia ca benni dittu rinne attu tisa subi qui ulisacana ca benni quia-na, ttiaca ni anía lä iyienquinna quia.”<sup>a</sup> <sup>22</sup>Larcala nna nu rinne benni attu tisa subi nna ancana ttu senni rute Tata Do Iyyabaaha len ca benni bittu chi ria le Jesús, bittu len ca benni chi ria le Ben-na. Ttiaca rixxi'ari ca tisa rute Tata Do Iyyabaaha nna ancana ttu senni rute len ca benni chi ria le Jesús, läga len ca benni bittu chi ria le Ben-na. <sup>23</sup>Ttirca iyábale ca benni ria le Jesús innele attu tisa subi gansi chi se'ele ttu reba, nianna ga'a ca benni bittu ria leni Jesús o ca benni bittu chi yu tseebi gue nu runle, ¿läba ganna acabin ca unnuha dequi iquibale raca? <sup>24</sup>Ttiaca gansi iyábale se'ele rixxi'ale ca tisa rute Tata Do Iyyabaaha len lebi'i atti ga'a benni bittu ria le Jesús o ga'a benni bittu chi yu tsee gue nu runle, lana nna atti iyeninna iyá nu rinnele nna ¿läba ganna oquinnaba iquini ancana nu runi nu lä anca tsee, ralhabana dhína elha disa ute Tata Do Iyyabaaha lhe godúxiyyabanna gue ca tulha gueniha lhe? <sup>25</sup>De tsanni lo nu yu'u gatsi lhi'u lhe'e lastooni, lana nna udú xibini lo Tata Do Iyyabaaha cuequi xenna le Ben-na, atti innána: “Gualíba du Tata Do Iyyabaaha len lebi'i.”

### **Lhatsiru unle atti ritupale udú xibile lo Tata Do Iyyabaaha**

<sup>26</sup> Nianna ca benni ria le Jesús, ¿bila nua unri? Gansi chi se'ele ttu reba nna guacaba ulha ttulhele ttu salmo, attu lhele nna ule'enle adí benni o quixxi'ale nu raca le Tata Do Iyyabaaha una ca benni lhe o innele attu tisa subi lhe o quixxi'ale bixa dia le nu rá benni rinne tisa subiha lhe. Iyonni unle qui tse'e tsitsi iyába ca benni ria le Jesús lo neda gue Tata Do Iyyabaaha. <sup>27</sup>Gansi innele attu tisa subi nna ttu o chupabale innele, axta bedaa tsunnale guaca innele. Coa ttutubale innele nna labía du ttu benni ritedaani gue ca tisa subi-na lhe qui quixxi'abi bixa dia le nu unneleha. <sup>28</sup>Ttiaca gan nuttuba benni ritedaani nu dia le ca tisa subi-na du len lebi'i nna síba gualeaca, bittu innele tisa subi aní lo ca benni se'e lhe'e atta

---

<sup>a</sup> 14:21 Isaías 28:11-12

ritupale. Nu unlale nna coa ttuttabale gualnne tisa subi lhi'u lhe'ele len Tata Do Iyyabaaha.

<sup>29</sup> Anáguba ca bi'ini rinne ca tisa rute Tata Do Iyyabaaha, ttu o chupabacabi innee, axta bedaa tsunnabacabi. Adícabi nna unalhicabi gansi guanca tsee nu rá ca bi'iniha. <sup>30</sup> Gansi Tata Do Iyyabaaha quixxi'anie attu bi'ini re nía nu raca lee una ca benni, benni du rinneha nna eyaca sibi qui aca innee attu bi'iniha.

<sup>31</sup> Anía nna guacaba innee iyále cua ttuttabale ca tisa rute Tata Do Iyyabaaha len lebi'i, qui iyábale idetile lhe cuequi tsitsiru lele lhe.

<sup>32</sup> Ca bi'ini rixxi'a ca tisa rute Tata Do Iyyabaaha len lacabi-na, la labacabi rinnabiacabi elha tsee rute Espíritu gue Ben-na len lacabi.

<sup>33</sup> Cumu Tata Do Iyyabaaha läga anca Ben-na Dios radi lee gue nu ladihaba runna ttu bixa, ancaba Ben-na benni radi lee unri lhatsiru ttu bixa.

Attiba chi labi adí ca benni ria le Jesús se'e lhe'e adí ca yiesi runcabi gansi chi se'ecabi ttu reba, <sup>34</sup> ca nuila-na nna síba acacabi gansi chi se'e iyábale ttu reba, cumu lägabi ga'ana innecabi. Nu unlacabi nna udá iquicabi attiba rá lo ca ley gue Tata Do Iyyabaaha. <sup>35</sup> Gansi rdacacabi unacabi gue ttu bixa nna lhe'e yo'o guecabiha innába tisacabi ca unbiyuu guecabiha, cumu läga anca tsee innee ttu nuila lagüi raca yotu.

<sup>36</sup> Gualorexxa lele, läga len lebi'i udulo ca tisa gue Tata Do Iyyabaaha, niguuba sunru lebi'i chi binale Ben-na lhe. <sup>37</sup> Gansi nuxale raquinle ancale benni rinne ca tisa rute Tata Do Iyyabaaha len lebi'i, o si raquinle ancale benni runi nu rá Espíritu gue Tata Do Iyyabaaha, lana nna labía oquinna iquini, ca tisa runia lo sitsi-ni nna ancaque nu beni Benni bananie ri-na mandadu unri. <sup>38</sup> Nu bittuba oquinna iquini gualí anca Ben-na tisa gue Tata Do Iyyabaaha, lee nna bittuguuba innee gualí anca nua benni guee.

<sup>39</sup> Larcala nna ca benni ria le Jesús, gualun duelha acale benni quixxi'a ca tisa rute Tata Do Iyyabaaha len lebi'i, bittuguuba usuna le inne ca benni attu tisa subi lhe. <sup>40</sup> Ttiaca iyába unná lhatsiru gualun na, lixxasu gualun na.

### Cristu beacanie dequide uttie

**15** Ca benni ria le Jesús, raca lasia orexxa lele ca tisa gue Jesús utixxi'atia leha, ca tisa-na Ben-na güia lele lhe se'e tsitsile ria

lele lhe. <sup>2</sup>Gansi usiguile tsia tsitsi lele ca tisa-na attiba chi utixxi'atia leha, lania nna gualábale. Gan biba nna cuentarba güia lele tisa-na.

<sup>3</sup>Neti nna lola nu racaru duelha unale utixxi'atia le attiba bele'equinna neti, delába Cristu uttie lo ni'a gue ca tulha runri attiba ga'ana lo ca sitsi gue Tata Do Iyyabaaha. <sup>4</sup>Lee nna bigatsie lhe'e baa, beyonna ubisa nna beacanie attiguaba rá lo ca sitsi gue Tata Do Iyyabaaha, <sup>5</sup>nianna bele'e loe len Cefas, lenla nna bele'e loe len iyába tsil'inu ca bi'ini bedheti nu bele'e. <sup>6</sup>Dequila nna ttu libeba bele'e loe leni guatela gayu gayua ca benni ria lecabí Ben-na. Ixecabi sna se'e banrubacabi, adícabi nna chiba utticabi. <sup>7</sup>Lenla nna bodile'e loe len Jacobo, delola nna bodile'e loe leni iyába ca bi'ini bedheti ca tisa bele'e.

<sup>8</sup>Dequide liba chi bele'e loe len iyába ca bi'in-na, lania liba nna bele'e loe len neti, attiba ttu unto bexxa nu uli ya'aba, aníába anca. <sup>9</sup>Neti anca nu bittu daca gue delo iyá ca apóstol, tsa lägabi elha ralha aca apóstol de güequia bería laya ca benni ria le Tata Do Iyyabaaha. <sup>10</sup>Ttiaca de besi'ibani Tata Do Iyyabaaha neti nna nuarca anca nu anca. Nu besi'inie neti nna läga ancana ttu nu bittu bixuu, delába unnuha nna rixuurla lo sina guee atti adí ca bi'ini bedheti ca tisa bele'e Jesús-na. Masquiba läga neti runia sina-na, cuinaba Tata Do Iyyabaaha resi'inie neti raca lanie neti raca sina-na. <sup>11</sup>Ttiaca lägabi daa lenna si lacabi lhe si neti lhe la ca tisa-nba ben-na rixxi'atu, la ben-na gua bunna güia lele lhe.

### Gualíba eyacani ca nu yatti-na

<sup>12</sup>Nianna gansi ri'itu rixxi'atu rátu: "Cristuha beacabanie beríabe lhe'e baa atta yu'u ca nu yatti-na", ¿galasná nna rá ttulhele dequi bittu gualí reacani ca nu yatti-na? <sup>13</sup>Cumu gansi bittuba reacani ca nu yatti-na, bittuguuba beacani Cristu gan nía. <sup>14</sup>Ttirca bittuba beacani Cristu, lania nna tsa lägabi daca ca tisa requitu rixxi'atu-ni, bittuguabi daca nu ria lele Ben-na lhe. <sup>15</sup>Gansi gualí anía anca, ri'itu nna nu güen lasi rixxi'a gue Tata Do Iyyabaahaba ancatu gan nía, de rixxi'atu rátu: "Tata Do Iyyabaaha benie beacani Cristu." Cumu gansi bittuba gualí reacani ca benni yatti-na, lania nna bittuguuba gualí beni Tata Do Iyyabaaha beacani Cristu. <sup>16</sup>Cumu gansi bittuba reacani ca nu yatti-na, niguuba Cristu bittu beacanie. <sup>17</sup>Gansi Cristu bittuba beacanie, nu ria lele Ben-na, tsa lägabi daca-na, sna ancabale nu te tulha guele lhe. <sup>18</sup>Ttirca anía anca, ca

benni utti ria lecabi Cristu, dia nittiba ca bi'iniha gan nía.<sup>19</sup> Gansi sunruba atti se'eri yies lo yu-ni ixuu nu xen leri Cristu, lania nna delo iyá benni se'e yies lo yu-ni, ri'iba ancari ca nu inneru benni gueni innácana: “¡Carusi'irucana! Cuentarba ria lecani Cristu.”

<sup>20</sup> Ttiaca gualíba beacanie Cristu beríe lhe'e baa atta yu'u ca nu yatti-na. Labe anque Benni primerba beacani. Unní rule'e lo gualíba eyacani ca benni chi utti güia lecabi Ben-na.<sup>21</sup> Cumu attiguaba lo ni'a gue nu beni ttu benni, delába Adán, uta'a elhuttiha yies lo yu-ni, aníaguaba de nu beni ttu benni, delába Cristu, eyacani ca nu yatti-na.<sup>22</sup> Attiba iyábari gattiri de datíari Adán, aníaguaba iyábari atta babari len Cristu, eyaca banri attu libe.<sup>23</sup> Aní aca atti eyacani ca benni: primerba Cristu beacanie, dequide liba gansi chi besía Cristu attu libe, lania liba eyacani ca benni anca guee.<sup>24</sup> Dequide unnuha nna isía sá atti lhuxa yies lo yu Cristuha nna ulhuxé iyába ca nu lä raca uyúcane, delába ca nu rinnabia lhe ca nu ra xxeni lecani lhe ca nu ra tsitsi lecani lhe lania nna ote itúba nu rinnabie las ná Tata gueri do iyyabaaha.<sup>25</sup> Cumu Cristu labíaba innabie axta liba dhee lo iyá ca nu bittu raca uyúcane.<sup>26</sup> Nu bittu raca uyúne ulhuxé xubana nna ancana elhuttiha.<sup>27</sup> Lo ca sitsi gue Tata Do Iyyabaaha rá: “Lee nna iyába bete las ná Cristu qui innabie cana.”<sup>a</sup> Atti rá Ben-na iyába boca'ane las ná Cristuha qui innabie cana, läga sela Tata Do Iyyabaaha, cumu lee anque Benni bete iyá las ná Cristu qui innabie cana.<sup>28</sup> Gansi chi rinnabia Cristu iyába, lania nna la laba Benni anque Xi'ini Tata Do Iyyabaaha, eyacaguabe Benni innabia Tata Do Iyyabaaha. Anía liba nna a suntteba Tata Do Iyyabaaha Benni benie rinnabia Cristu iyába aque Benni rinnabia xeni gue delo iyácea.

<sup>29</sup> Gansi bittuba gualí reacani ca nu yatti-na, ¿bi lunna run ca nu readi inda cuenta gue ca nu chi utti-na? Ganna bittu xa reacaquin ca unná, ¿biacala readi ca benni inda cuenta gue ca unná ganna?<sup>30</sup> Anáguaba ri'itu, ¿biacala qui satíaba ruxunnina guetu bixa dhacatu de requitu rixxi'atu gue Jesús gansi bittuba gualí eyacani ca nu chi uttina?<sup>31</sup> Ca benni ria le Jesús, neti nna ttuttu sába ruxunnina quia gattia. Nu ria-ni nna ancana nu gualí attiba gualítia redaca lasia de ancale benni gue Jesucristu Benni bananie ri.<sup>32</sup> Ttirca bittuba gualí reacani ca nu yatti-na, ¿bila te biría lania

---

<sup>a</sup> 15:27 Salmo 8:6

bitilha tisa lania ca benni lhe'e yiesi Éfeso attiba ttu nu ritalha len nimala gue i'iyattoo? Gansi anía anca, ri'i nna unbari attiba rá ttulhe benni: “¡Gobari lhe i'iyabari lhe cumu uxxeaba gattiri!”<sup>33</sup> Bittu dhielhale ixú yiele, cumu attiba rá ca benni: “Nu riselari nu run nu lä anca tsee, runi rinnitti nu tsee labiri runri.”<sup>34</sup> Gualedoni nibisa, bitturu unle nu lä anca tsee. Qui ettúbinle nna ria: Ttulhele nna läga chi anca bienle Tata Do Iyyabaaha.

**Pablo rixxi'abi gasná anca cuerpu deche ca benni  
yatti-na gansi chi beacaquinna**

<sup>35</sup> Ttulhele nna gaxa gua rinnaba tisabale rále: “¿Gasná aca eyacani ca nu yatti-na? ¿Galasná anca cuerpu dechecana esíacana?”

<sup>36</sup> ¡Lebi'i ancale nu dití bittu rienini! Nu radale-na, läga re'eyu beotsi iquini gansi bittuba usuna.<sup>37</sup> Läga beotsi re'eyuha nua reada benni. Nninniha liba nua rada benni, si xua xuxtila o si bixarba attu nninni lhe.<sup>38</sup> Tata Do Iyyabaaha runie cana attiba raca lee, coa ttuttu nu rada benni runie rule'ecana yayalee.<sup>39</sup> Läga iyá ca cuerpu-na ancacana ttudi. Yalee anca cuerpu rapa benni, yaguabalee anca cuerpu rapa ca nimala-na lhe yaguabalee anca cuerpu rapa ca binni-na lhe yaguabalee anca cuerpu rapa ca belha yu'u lhe'e inda-na lhe.<sup>40</sup> Anáguaba se'eguaba cuerpu anca gue iyyabaaha, se'eguaba cuerpu anca gue yies lo yu-ni lhe. Tseeba rilenri ancacana, ttiaca yalee anca ca nu anca gue iyyabaaha len ca nu anca gue yies lo yu-ni.<sup>41</sup> Yalee anca xieni gue ubisa-na, yaguabalee anca xieni gue beo-na lhe yaguaba lee anca xieni gue ca beli-na lhe. Axtaba ca beli-na cua ttuttucana sia xieni guecani.

<sup>42</sup> Anáguabunna anca gansi chi beacani ca benni yatti-na. Cuerpu rigatsiha nna ancana nu usu, cuerpu eyacaniha nna ancana nu bittu usu.<sup>43</sup> Cuerpu rigatsiha nna ancana ttu nu bitturu raca tseenri-na, nu eyacaniha nna ancana ttu nu ru'u xieni gueni. Cuerpu rigatsiha nna ancana nu bitturu fuerza gueni tee, nu eyacaniha nna ancana nu ra xxeni leni.<sup>44</sup> Nu igatsiha nna ancana cuerpu anca gue yies lo yu-ni, nu eyacaniha nna ancana cuerpu anca gue iyyabaaha. Cumu attiba te cuerpu anca gue yies lo yu-ni, anáguaba te cuerpu anca gue iyyabaaha.

<sup>45</sup> Lo ca sitsi gue Tata Do Iyyabaaha rá: "Adán uca unbiyuu udo primero. Lana nna ucana benni uyu'u elha nabani gueni."<sup>a</sup> Ttiaca Adán bisía xubana nna delába Cristu, lee nna anque Espíritu rute elha nabani gue ca benni. <sup>46</sup> Läga lo cuerpu anca gue iyyabaaha bisía, cuerpu anca gue yies lo yu-ni liba bisía primero, lenla nna daa nu anca gue iyyabaaha. <sup>47</sup> Benni udo primeraha nna ancabi gue yies lo yu-ni, len yuba ucana, Benni berupa nna delába Cristu anque gue iyyabaaha. <sup>48</sup> Attiba cuerpu gue Adán ucana leni yu, aníaguaba anca ca cuerpu gue ca benni se'e yies lo yu-ni, attiguaba anca cuerpu gue Cristu Benni anca gue iyyabaaha, aca ca cuerpu gueri gansi chi se'eri iyyabaaha. <sup>49</sup> Attiba nnanna rule'eri attiba anca benni beni Tata Do Iyyabaaha len yuha, aníaguaba eyacari attiba anca benni anca gue iyyabaaha.

<sup>50</sup> Ca benni ria le Jesús, neti nna raca lasia upea le, cuerpu gueri-ni nu anca len bela lhe reni lhe läga aca eta'ana atta rinnabia Tata Do Iyyabaaha, cuerpu nu usu-na läga aca eta'ana atta dhona itienna ttu dia lii. <sup>51</sup> Nnanna nna quixxi'atia le gue ttu nu bittu chi yu benni. Läga iyári gattiri, ttiaca iyábari otsia Tata Do Iyyabaaha ca cuerpu gueri-na, <sup>52</sup> gansi chi bisía cuesi trompeta nu cuesi xubana, lhe'e ttu lharu, ttu risá rutticu loriru aca nua. Cumu cuesi xa trompetaha, ca nu yatti-na nna eyacattebaquinna leni ttu cuerpu nu bitturu usu. Anáguaba ri'i ca benni sna se'e banba otsiatteba Tata Do Iyyabaaha cuerpu gueri. <sup>53</sup> Cumu raca duelha eyaca cuerpu nu rusu anca gue yies lo yu-ni nu bitturu usu, cuerpu ratti-na nna eyacana nu bitturu gatti. <sup>54</sup> Gansi chi beaca cuerpu gueri nu rusuna, nu bitturu usu, cuerpu ratti-ni nna eyacana nu bitturu gatti, lania nna saxxína aca nu rá lo ca sitsi gue Tata Do Iyyabaaha atta rá:

Belhuxaba Tata Do Iyyabaaha elhuttiha,  
udábe loni.<sup>b</sup>

<sup>55</sup> Atturu gueni, xa elhutti,  
¿gala guaga'alu nu ra xxeni leluha?  
¿Gala guaga'alu nu rixuinlu qui rutelu elha disaha?<sup>c</sup>

<sup>56</sup> Tulha runri-na ancana nu rixuuni elhutti-na qui te ro'oni ruttinri, ca ley-na rixuuni ca tulha runri-na qui ruedelha iyyacan ri. <sup>57</sup> Ttiaca xquixaba Tata Do Iyyabaaha De Jesucristu Benni anque Benni bananie ri-na, lee nna raca lanie ri qui ridári lo nu lä anca tsee-na

lenna elhutti-na. <sup>58</sup>Larcala nna lebi'i ca benni ria le Jesús racatia gueni, tsitsi gualtse'e lo neda gue Tata Do Iyyabaaha, bittu udhanle ria lele Ben-na, satía gualudo chatti lele cuenle sina gue Benni bananie ri-na. Lebi'i nna chiba yule, de babale len Benni bananie ri-na, läga cuenta runle sina gue Ben-na.

### **Pablo rinnebi gue belhi ritupa qui tsia Jerusalén**

**16** Nnanna nna innea gue belhi ritupa qui dhi ca benni chi anca gue Tata Do Iyyabaaha. Lebi'i nna gualunba attiba chi bodha'ana un ca benni ria le Jesús se'e lo yu gue Galacia. <sup>2</sup>Cua ttuttu sá redú ni'a xumanu cuequies ttuttule ttu latti belhi gue cua nu uxíbale gue sina benle. Unnuha nna cua tseele na qui gansi chi bisíaya nna bittu tsequile güettupa belhi. <sup>3</sup>Gansi chi bisíaya atta se'ele-na, lania nna idhelha ca benni chi becueeleha lhe'e yiesi Jerusalén, qui saca'ancabi belhi chi bettupaleha. Neti nna guteba sitsi len lacabi nu rixxi'a loni nuxa ancacabi. <sup>4</sup>Gansi raca duelha tsiaya, anáguuba lacabi dhaguacabi len neti.

### **Pablo rixxi'abi gue bixa rulaba lebi unbi**

<sup>5</sup>Neti nna dequeide liba ttea lo yu gue Macedonia, lania liba nna isíaya lhe'e yiesi Corinto-na cumu labíaba ttea na. <sup>6</sup>Lania nna qui nicadiga güeya'anba atta se'ele-na ttu satti, o si itúba atti raca idilha lhe. Anáchu lebi'i nna unle neti yuda gue neda quia qui tsiaya attu ladu. <sup>7</sup>Neti nna bittu raca lasia nu yu'u nedaba ttea atta se'ele-na. Raca lasia isá lenba len lebi'i, gansi Benni bananie ri-na aca lee. <sup>8</sup>Ttiaca nnanna nna sna eya'anruba lhe'e yiesi Éfeso-ni axta atti isíia laní Pentecostés. <sup>9</sup>Cumu nnannala chi bealga lo neda quia qui aca quixxi'arua ca tisa gue Jesús, masquiba anáguuba se'e ixe ca nu bittu raca uyúcana neti.

<sup>10</sup>Gansi isíia Timoteo atta se'ele-na, gualuni qui dho tseebi len lebi'i, cumu labi nna sina gue Benni bananie ri-n guaba runbi attiba neti. <sup>11</sup>Larcala nna ni ttule bittu cu'u ni'ale bi. Delába unnuha nna gualunla bi yuda qui lhatsiru besiru usiguibi neda guebi, anáchu nna dhabi esíabi atta doa-ni. Cumu neti nna doa ribeda bi leni adí ca benni ria le Jesús.

<sup>12</sup>Bi'ini ria le Jesús lá Apolos-ni, yalha ruegu benia lobi itabi len adí ca benni ria le Jesús etenalhicabi le. Labi nna bittu uca lebi, ttiaca lenla nna güitababi nucaxa gapabi lo neda.

### Ni rulhuxa Pablo nu rábi ca benni se'e Corinto

<sup>13</sup> Bittu tse'e xulhale, lä udhanguale ria lele Jesús lhe. Gualcuequi ria lele lhe tsitsi gualuni lhe. <sup>14</sup> Iyába nu runle, gualun na len si'i lee.

<sup>15</sup> Ca benni ria le Jesús, lebi'i nna gua yubale ca benni datía Estéfanas ancacabi ca benni primero güia lee Jesús se'e lo yu gue Acaya. Lacabi nna tsaba se'ecabi runcabi yuda ca benni se'e riesi chi anca gue Tata Do Iyyabaaha. <sup>16</sup> Neti nna raca lasia udá iquile gue ca benni loes ca bi'in-na, iyába ca benni runi yuda rixuucabi lo sina gue Tata Do Iyyabaaha lhe. <sup>17</sup> Re'o lasia bisía Estéfanas lenbi Fortunato lhe Acaico lhe atta doa-ni, cumu lacabi bencabi neti yuda nu bittu uca unle de nuttule se'e-ni. <sup>18</sup> Lacabi beni bebe itta lasia, anáguba lebi'i lhe. Larcala nna gualgapa respeto ca benni loesi ca bi'in-na. <sup>19</sup> Ca benni ria le Jesús se'e lo yu gue Asia ridhelhacabi ttu padiuxi guele. Aquila lenbi Priscila, iyába ca benni ria le Jesús rittupa lhe'e yo'o guecabiha lhe ridhelhacabi ttu padiuxi guele len si'i le gue Jesús. <sup>20</sup> Iyába ca benni ria le Jesús se'e-ni ridhelhacabi ttu padiuxi guele. Gualgás loesle padiuxi attiba labi ca benni ancacabi gue Tata Do Iyyabaaha runcabi.

<sup>21</sup> Netiga Pablo, leni náya-nga runia letra quia lo sitsi-ni qui ridhelha ttu padiuxi len lebi'i.

<sup>22</sup> Tsia nittiba nu bittu raquinna gue Jesús Benni bananie ri-na. ¡Betaa, Benni bananie ri'itu!

<sup>23</sup> Cuina Jesús Benni bananie ri-na aca lanie le. <sup>24</sup> Neti nna racalhatia guele len si'i le gue Jesucristu. Amén.

# **Sitsi berupa udhelha Pablo atta se'e ca benni ria le Jesús lhe'e yiesi Corinto**

**1** Neti Pablo anca apóstol chi ga'anani Jesús Benni anque Cristu iche ca tisa guee cumu anába bedaa le Tata Do Iyyabaaha unie. Irupaba Timoteo, bi'ini ria le Jesús attiba ri'i, ridhelhatu sitsi-ni guele lebi'i ca benni chi anca gue Tata Do Iyyabaaha ritupa lhe'e yiesi Corinto qui ribequi xenle Ben-na, lenle adí ca benni se'e riesi chi anca gue Tata Do Iyyabaaha se'e itúba lo yu gue Acaya. <sup>2</sup>Cuina Tata gueri do iyyabaaha lenie Jesucristu Benni bananie ri edá leque aca lenque le lhe unque tse'ele xen su lee lhe.

## **Tata Do Iyyabaaha rute elha xen lasi lenri**

<sup>3</sup>Cuequi xenri Benni anca Dios lhe Tata lhe gue Jesucristu Benni bananie ri. Lee anque Tata gueri Benni ratúa lee ri, Tata Do Iyyabaa Benni satíaba rute elha xen lasi lenri lhe. <sup>4</sup>Ben-na rute elha xen lasi lenri atti rateri ruyúri elha disa lo ni'a gue bixaba rateri, qui anáguaba ri'i nna aca gueri uteri elha xen lasi len iyába ca benni ruyú elha disa. Uteri elha xen lasi lencana, loesi elha xen lasi rute Tata Do Iyyabaaha len ri'i. <sup>5</sup>Cumu attiba Cristu guate biyúe elha disa, anáguaba ri'itu de ancatu benni guee nna ratexxatatu ruyútu elha disa, anáguaba de lee nna redíxxattatu elha xen lasi. <sup>6</sup>Ri'itu nna ratetu ruyútu elha disa qui redíle elha xen lasi, qui lhále bittu tsia nittile lhe. Tata Do Iyyabaaha rute elha xen lasi guetu qui anáguaba lebi'i gattaguaba elha xen lasi guele. Análiba nna dhale uchíale lo ca loesi elha disa ruyútu-ni. <sup>7</sup>Ri'itu nna tsitsiba xen letu lebi'i nna gua se'e tsitsibale, cumu yutu nna attiba ratele ruyúle elha disa len ri'itu, anáguaba redíle elha xen lasi ridítu.

<sup>8</sup>Lebi'i ca benni ria le Jesús, ri'itu nna raca letu unale gue tsitsiba nu guatetu biyútu elha disa lo yu te láni Asia. Unnuha ucana ttu elha disa xení biyútu nu tsaba bitturu ridátu uchíatu loni, larcala nna bisía uquintu dequi bitturba eríatu nía bantu. <sup>9</sup>Ri'itu nna uquintu dequi tsaba chi boquinna iquicani gattitu. Ttiaca unnuha bixuuna len ri'itu qui uxxen letu Tata Do Iyyabaaha benni runie reacani ca nu yatti-na, qui bitturu uxxen letu gue nu anca guetu. <sup>10</sup>Tata Do Iyyabaaha bodile ri'itu. Lee nna godilábe ri'itu lo ca elha disa xení che elhutti. Xen letu nna gusiguibe odile ri'itu.

<sup>11</sup> Lebi'i unle ri'itu yuda innábale aca len Tata Do Iyyabaaha ri'itu, aná nna ixeru benni utecana xquixaru len Tata Do Iyyabaaha de ugüiacabi nu tsee ute Ben-na len ri'itu cumu ixe benni rinnabacana len Ben-na aca lanie ri'itu.

### Biacá bittu chi uca tsia Pablo lhe'e yiesi Corinto

<sup>12</sup> Ri'itu nna nu runna ribe xentu nna ancana, bittutte ttu bixa unna udelha iyyan ri'itu, cumu len iyába ca benni se'e yies lo yu-ni len lebi'i itilalhe guase'ebatu runtu nu anca tsee runbatu atti runi benni chi anca gue Tata Do Iyyabaaha, ridíba ro'otu gue nu runtu. Läga elha rien anca gue ca benni se'e yies lo yu-ni rixuintu qui runtu aná, Tata Do Iyyabaahaba raca lanie ri'itu. <sup>13</sup> Lo sitsi ridhelhatu guele-na, lägabi runtu loni ni ttu nu bittu sadú lele atti ulabale na. Neti nna xen lasia güisíaba sá atti sadúga lele gue nu rá lo ca sitsi-na, <sup>14</sup> attiba chi ritedeenle nnanna saro'o gue nu rátu, cumu gansi chi bisía sá esía Jesús Benni bananie ri, lebi'i ancale nu uni edaca letu ri'itu nna ancatu nu uni edaca lele.

<sup>15</sup> De xen lasia gue nu ria-ni nna nuarca ucatia etenalhia primerla lebi'i, qui anáchu eberu itta lele de etenalhia le chupa libe. <sup>16</sup> Neti nna belaba lasia ttea etenalhia le gansi chi yu'a neda diaya Macedonia, atti dedaaya nna etea atta se'ele-na attu libe. Lania nna lebi'iba unnale gue neda quia qui usiguiá tsiaya deca Judea. <sup>17</sup> Lebi'i nna ¿si raquinle dequi nnelaba botsíaya nu rulaba lasia unia atti bebequi lasia unia aná? ¿Si raquinle anca benni nu sattiba rána: "Guaca", lenla nna redenána: "Bittu aca", attiba run ca benni gue yies lo yu-ni? <sup>18</sup> Tata Do Iyyabaaha benni runi nu re gua yuxabe, ri'itu nna lägabi ancatu nu primero rátu le: "Guaca", lenla nna redenátu: "Bittu aca". <sup>19</sup> Jesucristu xi'ini Tata Do Iyyabaaha Benni rixxi'a Silvano-na lhe Timoteo-na lhe neti lhe ca tisa guee-na len lebi'i, läga anca Ben-na nu primero re: "Guaca", lenla nna edenee: "Bittu aca". Len Cristu ca tisa riguixxi'atu satíaba ancaque gualí, <sup>20</sup> cumu lee runie raca iyáxeaba nu chi begüee Tata Do Iyyabaaha tisa unie. Larcala nna de Cristu rári: "Amén". Atti rári aná nna ribequi xenri Tata Do Iyyabaaha. <sup>21</sup> Ben-na runie se'e tsitsitu lhe se'e tsitsile lhe de chi babari len Cristu. Tata Do Iyyabaaha becúee ri acari gue Cristu. <sup>22</sup> Ben-na berenie ri senni qui rule'e lo chi ancari guee, delába ulu'e Espíritu guee lhe'e lastoori. Unná runi rule'e lo guadíbari iyá nu chi re utee.

<sup>23</sup>Neti nna de guatúaba lasia le, nuarca bittu chi bita lhe'esi Corinto atta se'ele-na attiba chi rpea leha, cumu bittu raca lasia ulisa le len tisa idí. Tata Do Iyyabaaha nna gua yuxabe gualíbatia nu ria-ni. <sup>24</sup>Läga de rdaca ri'itu innabiatu le innátu: “Aníttiga tsia lele”, cumu chiba se'e tsitsile ria lele Cristuha. Rdacaba ri'itu untu le yuda qui tse'ele edacaru lele.

**2** Denua nna nuarca boquinna iquia bittu ita ettenalia le attu libe qui bittu edese'e si'ile. <sup>2</sup>Cumu gansi neti unia tse'e si'ile nna ¿núla unna edaca lasia gansi läba lebi'i ca benni unia tse'e si'i?

<sup>3</sup>Denuala nna larca benia lo sitsi udhelha guele, qui atti isíaya atta se'ele-na, bittu unle dho si'a, lebi'i ca benni dica unle edaca lasia. Neti nna yuxeaba, atti doa redaca lasia nna lebi'i nna aníaguaba redaca lele. <sup>4</sup>Ttiaca atti benia lo sitsiha, ribesia de rulaba lasia guele lhe de richachaxxatta iquia guele lhe. Neti nna läga benia lo sitsi udhelha gueleha qui tse'e si'ile. Benba nua qui ttedeenle de ya de racatia guele.

### **Pablo rulisabi ca benni se'e Corinto dhicabi elha xen lasi gue benni beni use'e si'icabi**

<sup>5</sup>Benni beni use'e si'iriha nna läga sunru neti beni unná dho si'a, anáguaba lattiba la beale uni unná tse'e si'ile. Ttonába nu ria de bittu raca lasiatte lo bedáya len nu ria. <sup>6</sup>Care'aba nu chi rá ixele unna qui quixana gue nu ben-na. Bitturubi udhaquinle na. <sup>7</sup>Nu unlale nna gualdhíla elha xen lasi gueni, gualeon leni lhe qui lä udhá iqui unná ria leni Jesús de relenxxattabinna gue nu ben-na. <sup>8</sup>Larcala nna rinnaba lenle gualuni qui ttedeenna gua racabinle gueni. <sup>9</sup>Denuala nna benia lo sitsi udhelha gueleha atta rinne gue nu ria-ni, cumu unnuha uni ule'e lo gansi gua se'erle udole tisa gue iyá nu rpea le. <sup>10</sup>Larcala nna nuxa dhíle elha xen lasi gueni gue ttu bixa ben-na, neti nna guadíba elha xen lasi gue nua. Gansi te ttu bixa dhíri elha xen lasi gueni, neti nna de lebi'iba nna uxía elha xen lasi gueni aní lo Cristu. <sup>11</sup>Análiba nna bittu dhaa nu xxegüiha lori, cumu ri'i nna chiba yuri gaxasná rulaba leni unna len ri'i.

### **Ca benni rixxi'a ca tisa cubi**

<sup>12</sup>Atti bisína lhe'e yiesi lá Troas qui quixxi'aya ca tisa gue Cristu, Benni bananie ri-na, masquiba tseeba udhalie lo neda quia qui quixxi'aya ca tisa guee-na nía, <sup>13</sup>ttiaca cumu länu Tito bil'ini ria

le Jesús attiba ri'i biyúa nía, neti nna bittu uca xen lasia. Denua nna nuarca bechú tisa loes lania ca bi'ini se'e nía, qui diaya daca Macedonia.

### Pablo rutebi xquixaru len Tata Do Iyyabaaha

<sup>14</sup>Ttiaca xquixaba Tata Do Iyyabaaha satíaba runie ridátu de babatu len Cristu. Lee nna rixuunie ri'itu qui runa ca benni ca tisa guee-na. Ca tisa rixxi'a gue nu anca guee-na, Ben-na dia risina lhe'e iyába yiesi anque attiba ttu nu rure tsee daa tsi'ini itúba lhe'e ttu yo'o. <sup>15</sup>Cumu ri'itu ancatu attiba ttu nu rure ixixxi rute Cristuha lo Tata Do Iyyabaaha. Ancabatu attiba ttu nu rure ixixxi, dia risinna atta se'e ca benni rilácana lhe atta se'e ca benni dia nitti lhe. <sup>16</sup>Len ca benni dia nittina nu rixxi'atu nna ancana nu rure attiba rure nu yatti che elhutti guecani, len ca benni rilá nna nu rixxi'atu ancana attiba ttu nu rure tsee che elha nabani guecani. Larcala nna läganu te dhana unna loesi sina runtu-ni gansi bittuba du Cristuha len lana. <sup>17</sup>Cumu ri'itu nna läga requitu güerixxi ca tisa gue Jesús qui dhítu belhi atti runi ixe benni. Guayuxeaba Tata Do Iyyabaaha, ri'itu nna rinnebatu nu anca gualí cumu ancatu benni udhelha Ben-na, benni baba len Cristu lhe.

### Pablo rabi: “Ri'itu quixxi'entu ca tisa cubi”

**3** Atti rátu aná nna ¿si rquinle dequi bededú lo dacabatu attu libe la ri'ibatu rixxi'entu le dequi ri'itu ancatu nu runi nu tsee? O, ¿raca duelha ule'entu le sitsi rixxi'a loni nuxa ancatu? O, ¿innábatu lenle utele sitsi lento nu rixxi'a loni nuxa ancatu attiba run ttulhe ca nu requi-na? ¡Dica! <sup>2</sup>Lebi'i ancale attiba sitsi rixxi'a loni gue nuxa ancatu yu'u lhi'u lhe'e lastootu. Nuxaba benni rilenna gaxasná runle raquinna tseeba anca sina bentu len lebi'i. <sup>3</sup>Lebi'i rule'e lo ancale attiba sitsi beni Cristu letra loni. Ri'itu bixuunie attiba ttu lápiz qui uca letra lo sitsi-na, läga len tinta uca letra loni, leni Espíritu gue Tata Do Iyyabaaha Benni doe anque Benni bani uca letra loni. Bittuguuba uca ca tisa-na lo iyya bata lhe. Lhi'u lhe'e lastoo benni liba ucaeque.

<sup>4</sup>Ri'itu nna xenba letu gue nu rátu-ni lo Tata Do Iyyabaaha de babatu len Cristu. <sup>5</sup>Gua yubatu, läga ancatu nu ridá runi ttu bixa. Tata Do Iyyabaahaba raca lanie ri'itu qui ridátu runtu ttu bixa.

<sup>6</sup>Labe chi benie acatu benni ixuunie quixxi'a ca tisa cubi gue nu chi

begüee tisa unie len ca benni. Tisa cubi rixxi'atu-ni nna läga anca ben-na nu dia lo ca ley bodha'ana Moisés. Ancaba ben-na nu anca gue Espíritu gue Tata Do Iyyabaaha. Cumu ca ley-na rüdelhiyyaba ca ben-na ri qui gattiri ttu tsaba. Espíritu gue Tata Do Iyyabaaha nna rute elha nabani gueri.

<sup>7</sup> Ca ley uca lo ca iyya boca'ana Tata Do Iyyabaaha leni Moisés, ca benni rüdelha iyyaque ri qui gattiri, ucaque benni ra xxeni leni ga'ana tsee. Larcala atti beche Moisés ca iyyaha atta se'e ca benni Israel, niba lä uca ugüia ca nua lo bi'iniha cumu racalaa lobi de uyu'u xieni gue nu xxeni ra le Tata Do Iyyabaaha, masquiba nu racalaa lo Moisés chila dia nua renitti lona. <sup>8</sup> Gansi aníali de xxeni ra le ca ley uxí Moisés, ¿ttiliga xxeni ra le nu runi Espíritu gue Tata Do Iyyabaaha len ri'i? <sup>9</sup> Gansi aníali de xxeni ra le ca ley dia lo ca iyya uxxí Moisés, ca benni rüdelha iyyaque ri gattiri, adílaba de xxeni ra le ca tisa cubi, ca benni rixxi'acanie ri Tata Do Iyyabaaha rigúe ca tulha gueri qui reonie ri benni tsee. <sup>10</sup> Cumu ca ley ca benni uca nu ra xxeni leque-na, lärga ancaque nu ra xxeni leni gansi ruquetiri que leni ca tisa cubi-na, ca tisa cubi-naba ancaque benni raru xxeni leque. <sup>11</sup> Gansi ca ley benni sattirba bechíaque-na ucaque nu ra xxeni leni, adílaba de nu ra xxeni leni anca ca tisa cubi ca benni tsa bittu lhuxa-na.

<sup>12</sup> Larcala de xen letu gue ca tisa-na nuarca rinnetu itú iqui itú letu. <sup>13</sup> Ri'itu läga runtu atti beni Moisés. Labi nna betto lobi len ttu lari qui bittu iláni ca benni Israel gaxasná deyya renitti lo nu racalaa gue xieni uyu'u lobiha. <sup>14</sup> Ttiaca ca benni Israel nna bittu uca lecani sadú lecani nu rá ca tisa-na. Nuarcala nna axtaba nnanna gansi chi rulabacana nu rá ca tisa boca'an Tata Do Iyyabaaha len lacana atti nía, attisiba sna xuaba lariha locani. Cumu ria liba lecani Cristu lania liba ritúa lariha locani. <sup>15</sup> Axtaba nnanna gansi chi rulabacana lo ca sitsi atta dia ca tisa boca'an Tata Do Iyyabaaha leni Moisés, attisiba lariaba nua rixúatteba lo lastoocani. Unnuha bittu rugüelhana sadú lecani. <sup>16</sup> Ttiaca atti ria leri Benni bananie ri-na, lari nu bittu rugüelhana ttedeenriha nna ritúattebana.

<sup>17</sup> Cumu Benni bananie ri-naba Ben-na anque Espíritu, larcala nna Benni do Espíritu gue Benni bananie ri-na lhe'e lastooni nna chi ancana Benni ulá lo nu rüdelha iyyan-na. <sup>18</sup> Larcala iyábari atta bitturu xua lariha lori, chi rule'e lori nu xxeni ra le Benni bananie ri-na attiba ttu iyyaguana rigu'u xieni. Ri'i nna diari resíari reacari

attiba lee. Sá sába diari rule'e lori nu xxeni ra le Benniha. Unní runi Benni bananie ri anca Espíritu-na.

### **Ca tisa gue Jesucristu ancaque benni dacaru**

**4** Denua nna nuarca bittu redil retu cumu Tata Do Iyyabaaha besi'inie ri'itu betee sina-ni len ri'itu, tsequitu quixxi'atu ca tisa guee-ni. <sup>2</sup>Larcala, iyába nu lä anca tsee run gatsi benni, nu runna rettuinri lo benni, chi ulu'u ni'atu. Ri'itu nna lägabi ancatu nu resi'linu ridí yie, lä rixxi'aguabatu nu bittu raxxína len ca tisa gue Tata Do Iyyabaaha lhe. Lugar quiba unnuha nna aní lo Tata Do Iyyabaaha rixxi'abatu suntteba nu anca gualí. Anába runtu qui rodha'antu las ná ca benni oquinna iquicani tseeba anca nu runtu. <sup>3</sup>Ttiaca gansi ca tisa gue Jesús rixxi'atu-ni ancaque nu te gatsi xua lari iquie nna suna len ca nu dia nittinaba unná anca Ben-na aná qui bittu sadú lecani gue nu rá ben-na. <sup>4</sup>Nu xxegüi anca dios rinnabia yies lo yu-ni bochulhana elha rieni gue ca benni bittu ria le Tata Do Iyyabaaha. Benna cana attiba nu xua loni qui bittu iláquinna xieni gue ca tisa gue Jesús, delába bittu sadú lecani nu rá ca tisa riguixxi'a gue nu xxeni ra le Jesús Benni anque Cristu. Lee anque attiga anca Tata Do Iyyabaaha. <sup>5</sup>Ri'itu nna läga rixxi'atu nu anca guetu len lebi'i. Rixxi'abatu gue Jesús Benni anque Cristu. Ratu lee anque Benni bananie ri, ri'itu nna ancatu nu rixuu qui rixxi'entu le ca tisa gue Ben-na de raquintu gue Jesús. <sup>6</sup>Cumu Tata Do Iyyabaaha Benni unnabie uyu'u xieni atta chulha<sup>a</sup>, la Ben-na guaba benie uyu'u xieni guee lhe'e lastoori, qui anáchu ri'itu nna untu ttedaani adí benni gue nu xxeni ra le Tata Do Iyyabaaha, Benniha nua rilenri ru'u xieni guee lo Cristu.

### **Nu rate ca benni rixxi'a ca tisa gue Jesús**

<sup>7</sup>Ttiaca ca tisa te xxatta lidhacaque rixxi'atu-ni nna yu'uque lhe'e lastootu, ri'itu nu ancatu attiba ttu yedhu yu nu bittu ruchía. Análiba nna qui ule'e lo Tata Do Iyyabaaha anque Benni tsitsiba ra xxeni lee, läga ri'itu ancatu nu ra xxeni leni. <sup>8</sup>Ri'itu nna gaxaba diatu ruyútú elha disa, ttiaca gua ridábatu ruchíatu loni. Teeguaba elha richacha iqui guetu lhe ttiaca läga redil retu. <sup>9</sup>Denocan ri'itu lhe ttiaca läga sunru ri'itu se'e, guadúba Tata Do Iyyabaaha len

---

<sup>a</sup> **4:6** Génesis 1:3

ri'itu. Riguíncana ri'itu iyya lhe ttiaca läga ridacana uttican ri'itu.

<sup>10</sup> Gaxaba diatu nna ruxunnina guetu utticana ri'itu attiba betticana Jesús, qui anáchu nna rule'e loguaba do banba Jesús len ri'itu.

<sup>11</sup> Cumu ri'itu nna laca sna se'e bantu yies lo yu-ni nna satíaba ruxunnina guetu gattitu lo ni'a gue de requitu rixxi'atu ca tisa gue Jesús. Unná runi nna satíaba rule'e lotu len cuerpu rapatu-ni nu isíaba sá luxana, Jesús anque Benni bani. <sup>12</sup> Larcala nna ri'itu se'etu ro'o iyya ro'o bela'aba gattitu de rixxi'atu ca tisa gue Jesús, laca lebi'i nna ridíle elha nabani gatta ttu dia lii guele.

<sup>13</sup> Lo ca sitsi gue Tata Do Iyyabaaha nna rá: “De güia lasia Tata Do Iyyabaaha nuarca unnea.”<sup>a</sup> Anáguaba ri'itu de güia letu Ben-na nuarca rinnetu. <sup>14</sup> Ri'itu nna yubatu, Tata Do Iyyabaaha Benni benie beacani Jesús Benni bananie ri, gunbe eyaquitu attiba benie beacani Jesús. Itupaba lento le echee atta doe. <sup>15</sup> Iyábunna ratetu de runtu salía tseenle, qui attiba ixeru benni dia ridí elha tsee ruta Tata Do Iyyabaaha de rienquinbi ca tisa gue Ben-na, aníaguuba ixeguaba benni utecana xquixaru len lee, innávana: “Lu ancalu Benni ra xxeni leni.”

<sup>16</sup> Denuala nna nuarca bittu redil retu, masquiba cuerpu guetu-ni diana ratu leni, ttiaca Espíritu do lhi'u lhe'e lastootu nna ttu ttu sába die ridíe adí fuerza. <sup>17</sup> Nu ratetu se'etu yies lo yu-ni nna ancabunna nu gua ridábatu loni, sattiba riteonna, ttiaca nu tsee dhítu gue nu ratetu-ni ancana ttu nu xxeni, nu edí baatu ttu dia liiba iyyabaaha. <sup>18</sup> Ri'itu nna lägabi rusía lotu nu rilenri anca gue yies lo yu-ni, rusíaba lotu nu bittu rilenri anca gue iyyabaaha. Cumu nu rilenri te yies lo yu-ni nna riluxa bunna ttiaca nu bittu rilenri anca gue iyyabaaha nna läga lhuxa nua.

### Iyyabaaha edíri attu cuerpu cubi gueri

**5** Cuerpu gueri-ni ancana attiba ttu yo'o bittu ritiani nu doni benni ttu sattiba. Ttiaca gua yubari gansi yo'o-ni ise'elona, Tata Do Iyyabaaha nna gutebe ttu yo'o gueri nu bittu beni benni, delába attu cuerpu gueri nu itíani ttu tsaba iyyabaaha. <sup>2</sup> Denuala nna nuarca renne leri laca se'eri lhe'e cuerpu rapari-ni, cumu rdacari eta'ari lhe'e cuerpu ute Tata Do Iyyabaaha lenri. <sup>3</sup> Aná nna läga tse'eri lä caaba cuerpu gueri, cumu chiba te tsee ttu cuerpu cubi

---

<sup>a</sup> 4:13 Salmo 116:10

anca gue iyyabaaha dhíri lania. <sup>4</sup>Laca se'eri yies lo yu-ni lhe'e yo'o nu anca cuerpu gueri-ni nna renne leri ruyúri elha disa. Ri'i nna läga rdacari eríari lhe'e cuerpu rapari-ni, rdacabari eta'ari lhe'e cuerpu ute Tata Do Iyyabaaha lenri. Aná nna elha nabani gatta ttu dia lii gueri iyyabaaha unie lhuxa nu anca elhutti gueri yies lo yu-ni. <sup>5</sup>Laba Tata Do Iyyabaaha chi bose'e tsee ri qui aca iyá unní lenri. Chi bete Espíritu guee-na lenri qui aca xen leri gunbe iyá nu chi re unie.

<sup>6</sup>Larcala satíaba xen suba leri se'eri, masquiba yubari laca se'eri yies lo yu-ni len cuerpu rapari-ni nna idittuba se'eri len atta do Benni bananie ri. <sup>7</sup>Laca se'eri yies lo yu-ni, ri'i nna de riaba lerie nuarca ruxxen lerie, läga de chi rilenrie. <sup>8</sup>Denuala nna xen suba leri se'eri. Ri'i nna raquinri tseeru anca eríari lhe'e cuerpu rapari yies lo yu-ni qui eyyari atta do Benni bananie ri-na. <sup>9</sup>Larcala nna rudo leri runri nu radi le Benni bananie ri-na laca se'eri yies lo yu-ni lhe atti esínri iyyabaaha lhe. <sup>10</sup>Cumu raca duelha utsá du iyári lo atta do Cristu runie elha uxtisi, qui ttu tturi nna dhíri nu ralhari coa ancaba nu benri atti use'eri yies lo yu-ni, si ancana nu tsee o si nu bittu anca tsee lhe.

### **Pablo rixxi'enbi ca benni gaxasná eyaca tseecana len Tata Do Iyyabaaha**

<sup>11</sup>Larcala nna ri'itu nna de yu'u elha rasi gue Tata Do Iyyabaaha lhe'e lastootu, nuarca runtu duelha tsia le Benni Ben-na. Tata Do Iyyabaaha gua yuxabe gaxasná du letu. Neti nna ruxxen lasia anáguauba lebi'i guna tseebale gaxasná du letu. <sup>12</sup>Läga daa ri'itu attu libe rixxi'entu le dequi ri'itu ancatu nu runi nu tsee qui eya'an tseetu len lebi'i. Ri'itu nna runbatu qui cuequi xen lele gue nu runtu. Aná nna te ro'ole ecabile gue ca nu runi ttaba gue nu racana ancacana, ttiaca bittu rugüicana gue gaxasná anca lhi'u lhe'e lastooocani lo Tata Do Iyyabaaha. <sup>13</sup>Gansi ca benni rácana dequi ri'itu ancatu nu raca iquini, Tata Do Iyyabaaha guayúbe bi gue runtu aná. Ttiaca gansi len lebi'i nna ancatu nu rinne lhatsiru attiba ancaba gueni nna runbatu aná qui salía tseenle. <sup>14</sup>Cumu nu racani Cristuha gueri, rudo besina ri'itu untu nu runtu-ni. Cumu chiba yuxeabatu Cristuha uttie lo ni'a gue iyábari. De unnuha nna iyábari ancari benni uttiguuba lenie. <sup>15</sup>Cristu uttie lo ni'a gue iyába benni, qui ca benni chi te elha nabani guecani lo Tata Do Iyyabaaha nna

bitturu tse'ecana uncana nu racaba lecani, sinuqui tse'ecana uncana nu raca le Cristu Benni uttie lhe beacanie lhe lo ni'a guecani.

<sup>16</sup> Larcala nna ri'itu nna bitturu ulaba letu gue nuxa benni attiba rulaba le ca benni se'e yies lo yu-ni. Masquiba ca tu ttua nna belaba letu gue Cristu attiba rulaba le ca benni se'e yies lo yu-ni gue Ben-na, ttiaca nnanna nna lärga anía rulaba letu guee. <sup>17</sup> Larcala nna benni chi babana len Cristu nna chi beacana ttu benni cubi. Iyába nu run nua ttua nna chi boca'anna. Benni cubiba chi ancana nnanna. <sup>18</sup> Iyába unná nna ancana nu runi Tata Do Iyyabaaha len ri'i. De nu guate Cristu lo ya crusiba, beni Tata Do Iyyabaaha beaca tseeri lenie. Lee nna boca'ane lento quixxi'entu ca benni gaxasná eyaca tseecana lenie. <sup>19</sup> Delába Tata Do Iyyabaaha bixuunie Cristu qui benie eyaca tsee ca benni len lee. Lee nna uxíe elha xen lasi gue ca tulha guecani. Len ri'itu nna boca'ane quixxi'entu ca benni gaxasná eyaca tseecana lenie.

<sup>20</sup> Larcala nna ri'itu ancatu benni udhelha Cristu quixxi'atu ca tisa guee, attisiba Tata Do Iyyabaahaba Ben-na rinnee lenle atti rixuunie ri'itu rinnetu rátu: "Cristuha udhelhe ri'itu gátu le gualeaca tsee len Tata Do Iyyabaaha." <sup>21</sup> Cristu nna lägabi ben Benniha ni ttu nu lä anca tsee. De lo ni'a guebari nna bejúa Tata Do Iyyabaaha Benniha yua lo ni'a gue ca tulha gueri, qui de nu guate Benniha nna beoni Tata Do Iyyabaaha ri benni tsee loe.

**6** Ri'itu ancatu benni runi yuda lo sina gue Tata Do Iyyabaaha, denua nna rinnabatu lenle bittu udelha lattile elha tsee bete Tata Do Iyyabaaha lenle. <sup>2</sup> Cumu lo ca sitsi guee-na rinnee re:

Neti nna bienbatia guelu la sá atti chi ga'anatia iyientia guelu,  
la sá ga'ana lháluha nna ucaba lania lu.<sup>a</sup>

Gualuyurga, nnanna nua tiempu tsee. ¡Nasá nua anca sá lhá ca benni qui bittu tsia nitticana!

### Nu guate Pablo de rixxi'abi ca tisa gue Jesús

<sup>3</sup> Ri'itu nna lägabi runtu ttu bixa nu uni ichecu ca benni lo neda gue Tata Do Iyyabaaha, qui bittubi teequinna inne güecana gue sina gue Tata Do Iyyabaaha runtu-ni. <sup>4</sup> Nu runlatu nna rule'e lotu leni bixaba runtu, ri'itu nna ancatu benni runi sina gue Tata Do Iyyabaaha. Ancatu benni rugo ruchíatu

---

<sup>a</sup> **6:2** Isaías 49:8

atti ruyútu elha disa,  
 atti bixa reasintu lhe  
 lo iyába nu ratetu lhe  
<sup>5</sup> atti ritsacana lhe'etu lhe  
 atti rattatu lisiyya lhe  
 atti risatsa benni rebi'a nocana ri'itu lhe.

Ruchíatu lo ca sina tsitsi lhe  
 lo atti rebequitu bisiel a lhe  
 lo atti rutte bina lhe'etu lhe.

<sup>6</sup> Rule'e lo guatú ancatu benni bitturu runtu nu lä anca tsee,  
 yutu gue nu anca gualí lhe  
 ancatu benni du pasensi leni lhe  
 ancatu benni du tsee leni lhe.

Rule'e lotu du Espíritu gue Tata Do Iyyabaaha len ri'itu lhe  
 ancatu nu gualígani racani gue ca benni lhe

<sup>7</sup> rixxi'atu nu anca gualí lhe.

Ancatu benni rule'e lo elha uca lani ra xxeni le gue Tata Do  
 Iyyabaaha lhe.

Cumu beoni Tata Do Iyyabaaha ri benni tsee loe.

Ri'itu nna rutsá dutu lo ca benni attiba soldado deni iyá lo nu  
rixuinna ritilhana.

<sup>8</sup> Guadú nna rapacana ri'itu respeto, a guadú nna rigu'u  
 ni'acani ri'itu.

Guadú nna tseeba rinnecana guetu, a guadú nna rinne güecan  
 guetu.

Guadú nna rácan dequi runba letu, ttiaca guancabatu benni  
 rinne nu gualí.

<sup>9</sup> Ruyúcan ri'itu attiba ttu nu bittu ancibiaquinna ttiaca  
 guanca biatsittabaquinna ri'itu.

Lacana runcana dequi chiba uttitu, ttiaca requi banbatu.

Rugüeguabacan ri'itu, ttiaca läga rattitu.

<sup>10</sup> Rule'e attisiba se'e si'itu, ttiaca satíaba se'etu redaca letu.

Ancabatu benni bittu te gueni, ttiaca ixe benni runtu racacana  
 nu tee gueni len Tata Do Iyyabaaha.

Guannalu tsaba bittubabi te guetu, ttiaca len Tata Do  
 Iyyabaaha iyába te guetu.

<sup>11</sup> Lebi'i ca benni ria le Jesús se'e Corinto, lhixxa suba unnetu  
 belisatu le, lägabi bedhea letu. Iyába nu yu'u lhi'u lhe'e lastootu chi

utixxi'entu le. <sup>12</sup>Lägabi rudhea letu len lebi'i lebi'i bunna rudhea lele len ri'itu. <sup>13</sup>Nnanna nna rinnaba lenle, attiba ttu tata rinnabana len ca xi'inni. Gualosi'i guetu, bittu udhea lele lento, attiba ri'itu bittu rudhea letu len lebi'i.

### Ri'i ancari yotu gue Tata Do Iyyabaaha

<sup>14</sup>Bittu utsequi tisa guele len ca benni bittu ria le Cristu:  
cumu läga ttudi anca nu anca tseena len nu lä anca tseena lo  
Tata Do Iyyabaaha.

Bittuguuba raxxína xieni-na len chulha-na.

<sup>15</sup>Cristu nna läga aca dho tsee Ben-na len nu xxegüiha.

Bittuguuba dica isela ttu nu ria leni Cristu len ttu nu bittu ria  
leni Ben-na lhe.

<sup>16</sup>Anáguuba läga raxxína ca nu bittu gualí anca diosi-na leni  
yotu gue Tata Do Iyyabaaha.

Ri'i ancari yotu gue Tata Do Iyyabaaha Benni bani.

Tata Do Iyyabaaha nna re lo ca sitsi atta dia ca tisa guee-na:  
“Neti nna dhua lencana, tsequia atta se'ecana lhe.

Neti aca Dios guecani, lacana nna acacana benni quia.”<sup>a</sup>

<sup>17</sup>Denuala nna nuarca unne Tata Do Iyyabaaha re:

“Gualiría lhe'e atta se'e ca nu bittu ria lequinna  
gualiries ca unná,

bittu sattanale nu anca tsiga lhe

neti nna gulabiba le.<sup>b</sup>

<sup>18</sup>Lania nna neti aca Tata guele,

lebi'i nna aca le xi'inbiyuua lhe xi'iniunnáya lhe.

Aná rá Benni bananie ri-na, Benni rinnabia iyánea.”<sup>c</sup>

**7** Lebi'i ca benni ria le Jesús racatia guele, unní chi ga'anani Tata Do Iyyabaaha unie len ri'i. Denua nna nuarca cuari iyánea nu lä anca tsee runi ritsiga cuerpu gueri-na lo Tata Do Iyyabaaha, nu runi ritsiga espíritu do lhe'e lastoori-na lhe. De yu'u elha rasi gue Tata Do Iyyabaaha lhe'e lastoori, larcala ttuttu sá iriesri lhe'e nu lä anca tsee qui acaruri benni radi le Ben-na.

<sup>a</sup> 6:16 Levítico 26:12; Ezequiel 37:27

<sup>b</sup> 6:17 Isaías 52:11

<sup>c</sup> 6:18 2 Samuel 7:14; 1 Crónicas 17:13

### Redaca le Pablo de bodú xiyyana ca benni gue Corinto

<sup>2</sup> Gualgüelha eyo'otu lhe'e lastoole attu libe. Ni ttule lägabi chi bedhaquintu, nuttuguaba nule chi dia nitti lo ni'a gue nu bentu lhe läbiguaba chi uxí yietu le lhe. <sup>3</sup> Läga rpea le aná qui udelhiyya le. Attiba chi rpea le ttua, lebi'i nna lhi'u lhe'e lastooliha yu'ule. Masquiba bixa aca neti nna guadúba len lebi'i, atti se'e banri yies lo yu-ni lhe sila gattiri lhe. <sup>4</sup> Neti nna itú iqui itú lasba rinnea len lebi'i. Ttsitsiba nu runia atti rixxi'atia benni gue nu runle. Lebi'i runi redíxxatta elha xen lasi, attulade redú itta lasia lagüi lo atti ratetu ruyútu iyáloba elha disa.

<sup>5</sup> Desdeba atti bisíatu lo yu gue Macedonia-ni nna tsa lägabi chi beaca letu, cumu gaxaba nua diatu nna rati'atu te utilha. Chi begüeecana ri'itu lhe uxítu elha rasi lhe. <sup>6</sup> Ttiaca Tata Do Iyyabaaha Benni rute elha xen lasi len ca benni se'e si'li-na nna bote elha xen lasi lento atti bisía Tito atta se'etu-ni. <sup>7</sup> Läga sunru de bisíabi atta se'etu ni bedítu elha xen lasi, anáguba de biyútu labi nna tsitsiba tsee re lebi lo ni'a gue nu runle. Labi utixxi'enbi ri'itu lebi'i nna attulade rdacale ilenle ri'itu attu libe, chi se'ele re leninle gue nu ucaha lhe chi richacha iquile quia lhe. Iyonna beni nna chi redacaru lasia adí.

<sup>8</sup> Masquiba use'e si'ile lo ni'a gue nu rá lo sitsi udhelha gueleha, nnanna nna lärgabirua raca guatetia gue nua. Ttu laniaba uca guatetia de bina use'e si'ile lo ni'a gue nu rá lo sitsiha, masquiba läga isá use'e si'ile. <sup>9</sup> Nnanna nna re'o lasia, ttiaca läga de use'e si'ile. Neti nna re'o lasia de beni nu use'e si'ileha bodú xiyyanle gue nu runleha. Laba Tata Do Iyyabaaha uca lee use'e si'ile, larcala nna lägabi chi ben ri'itu qui satele de lo ni'a gue nu bentuha.

<sup>10</sup> Cumu nu rise'e si'iri anca gue Tata Do Iyyabaaha nna runna rodú xiyyanri. Unnuha nna runi rodilá Ben-na ri. Larcala nna läga dica aca guatenri gue nu runi Tata Do Iyyabaaha rise'e si'iri. Ttiaca gansi rise'e si'iri attiba rise'e si'i ca benni se'e yies lo yu-ni nna elhuttiba che unná gueri lo Tata Do Iyyabaaha. <sup>11</sup> ¡Gualgüiarga! Nu beni Tata Do Iyyabaaha use'e si'ileha nna tonáli nu beni nua:

chi benna bichacha iquile gue nu ucaha lhe  
 chi benna utixxi'ale bixa lo ni'a gue benle anía lhe  
 chi benna bise'enle gue nu ucaha lhe  
 chi benna uyu'u elha rasi lhe'e lastoole lhe

chi benna tsitsiba uquinle ttixa aca uyúle neti lhe  
 chi benna uquinle quia lhe  
 chi benna bebequi lele bixa anca nu unle leni nu te tulha  
 gueniha lhe.

Iyába nu benle-na rule'e lo läga lebi'i ancale nu te tulha gueni gue nu ucaha.<sup>12</sup> Larcala nna läga de belaba lasia gue benni te tulha guen-na, atti benia lo sitsi udhelha atta se'ele-na, niguaba de belaba lasia gue benni guate biyú elha disa lo ni'a gue nu beni benni te tulha gueni gue nu ucaha lhe. Benba lo sitsi-na qui aní lo Tata Do Iyyabaaha ule'e lo lebi'i nna richachalha iquile guetu.<sup>13</sup> Unní anca nu rote elha xen lasi lento.

Ttiaca läga sunru elha xen lasi-ni uxítu, adírla bedaca letu bilentu de attula tsee re le Tito, cumu lebi'i nna iyábale bettipale lebi qui do tseebi.<sup>14</sup> Aná nna läga benle ettútia gue nu ria cumu chila rpea Tito, lebi'i nna attulade tsee du lele. Delába unnuha nna attiba gualíbintu bixa rátu le, aníaguaba guaxxína gualíba iyá nu rátu Tito gue bixa lo ni'a gue yopixxattintu le.<sup>15</sup> Tito nna adílaba raquinbi guele atti rexxa lebi lebi'i nna iyábale bedole tisa, atti rexxa lebi gue itú rixidibale rasinle atti guatsále bi lhe.<sup>16</sup> Neti nna re'o lasia nnanna de ancale nu itú iqui itú lasia xen lasia gueni.

**Pablo rulisabi ca benni gue Corinto qui  
 erú iqui erú lecabí utecabí úna**

**8** Lebi'i ca benni ria le Jesús, nnanna nna raca letu quixxi'entu le gue nu tsee run Tata Do Iyyabaaha len ca benni ria le Jesús ritupa lhe'e ca yiesi se'e lo yu gue Macedonia-ni.<sup>2</sup> Lacabi nna lagüi lo tsitsiba nu ratecabí ruyúcabi elha disa, chi se'ecabi redaca lecabí. Denua nna masquiba ancacabi benni nu ttuttíru bittu te gueni, ttiaca chi bedáru lecabí betecabí úna leni nu te guecabí.<sup>3</sup> Neti anca nu begüia loa, lacabi nna itú iqui itú lecabí betecabí coa teba guecabí. Xxenirla chi betecabí atti nu dica utecabí cumu anába bedá lecabí bencabi.<sup>4</sup> Tsitsiba use'e diticabí unnabacabi len ri'itu qui ugüelhatu cabi igutsacabi ca benni rute úna tsia atta se'e ca benni chi se'e riesi anca gue Tata Do Iyyabaaha se'e lhe'e yiesi Jerusalén.<sup>5</sup> Lacabi nna xxenrula anca nu betecabí atti nu xen letu utecabí. Primerba rácabi: "Guase'ebatu untu nu innába Jesucristuha." Anáguaba nna: "Guase'eguatu untu nu innále lhe." Benbacabi attiba raca le Tata Do Iyyabaaha.

<sup>6</sup> Denuala nna nuarca unnabatu len Tito usiguibi uttupabi úna nu utele itú iqui itú lele, delába nu chi udulobi ruttpabi axta ttua.

<sup>7</sup> Lebi'iba ancale nu neru runi iyába atti adí benni:

ancale nu riaru lele Tata Do Iyyabaaha lhe  
 ancale nu reselaruni rinne lhe  
 ancale nu yuru lhe  
 ancale nu jertte runle yuda lhe  
 ancale nu racaruni guetu lhe.

Denuala nna anáguaba nnanna lebi'iba nu itú iqui itú lele uteru xxeni úna qui dhi ca benni reasani.

<sup>8</sup> Neti nna läga rpea le aná de runia le mandadu bixa unle. Rixxi'abatia le gue gaxasná run adí benni, lacana nna chi rudo lecani rutecana itú iqui itú lecani nu reasani adí benni, qui anáguaba lebi'i nna ule'e lole gansi gualíguinle raquinle gue adí benni. <sup>9</sup> Cumu lebi'i nna chiba yule ya de tsee run Jesucristu Benni bananie ri-na len ca benni. Lee nna anque Benni texxatta guee. De ucabanie guele nna uque Benni bittu te gueni atti bite yies lo yu-ni. Uca Benniha benni bittu te gueni qui anía liba nna ucale nu gatta gueni iyyabaaha. <sup>10</sup> De runba qui salía tseenle nuarca rpea le nu racatiaanca tsee unle. Lebi'i nna ida utehali nna tseeba chi udulole betele úna, läga sunru biriequile aca aná, sinuqui benle na itú iqui itú lele. <sup>11</sup> Nnanna nna gualusigui itú iqui itú lele gualuni nu chi rále unleha axta qui lhuxana. Attiba udulole benleha berú iqui berú lele betele úna, anáguaba nnanna gualutteba coa teba guele. <sup>12</sup> Cumu nu gualíguinna rerú iqui rerú leni rutena úna, Tata Do Iyyabaaha nna ridíbe baneda ttixaba rutena coa teba gueni, cumu Tata Do Iyyabaaha läga rinnaba Benniha nu bittu te gueri.

<sup>13</sup> Neti nna läga ria le gualute nu reasin benni gattatama gueni, laca lebi'i nna se'ele reasa guele. <sup>14</sup> Nnanna nna lebi'i nna tsapa te guele larcala nna guacaba utele nu reasani adí benni, attu sá nna cunná acacana nu gattatama gueni, lania nna utecana nu reasinle. Aná nna ttulapaba tse'e iyále. <sup>15</sup> Attiba rá lo ca sitsi gue Tata Do Iyyabaaha atta riguixxi'a gue lena bani lá "maná" daa iyyabaaha: "Läbiguuba bexxa gue nu bediga xxeniha, niguuba lä beasa gue nu bediga saro'orba lhe."<sup>a</sup>

---

<sup>a</sup> 8:15 Éxodo 16:18

### Tito lenbi a chupa ca benni diacabi Corinto

<sup>16</sup>Neti nna rutea xquixaru len Tata Do Iyyabaaha de benie richacha iqui Tito gue salía tseenle, attiguaba neti richacha iquia gue salía tseenle. <sup>17</sup>Labi nna guadiba lebi idhelha bi atta se'ele-na, cumu tsitsiguuba rdacabi itabi güenalhi le, nnanna nna lababi uca lebi dabi ettenalibi le. <sup>18</sup>Len Tito idhelatu ttu unbiyuu ria le Jesús. Gue bil'in-ni nna tseeba rinne ca benni ria le Jesús ritupa lhe'e iyá ca yiesi-na de tseeba rixxi'abi ca tisa gue Jesús. <sup>19</sup>Güeaniba, laguaba ca benni ria le Jesús ritupa lhe'e ca yies-na becueecabi bi'in-na itabi len ri'itu qui unbi yuda uttupatu úna utte ca benni. Nu runtu-ni nna ancana nu runi ribequi xen ca benni le Tata Do Iyyabaaha, anáguba qui rule'e lo ri'itu nna redába letu runtu sina-ni qui aca ca benni yuda. <sup>20</sup>Labi nna dabi len ri'itu qui aná nna bittu utetu lo neda inne benni guetu gue bixa run lento úna ruttpatu-ni cumu xxeni ben-na. <sup>21</sup>Ri'itu nna läga sunru lo Tata Do Iyyabaaha runtu untu nu anca tsee, sinuqui runguabatu untu nu anca tsee lo ca benni.

<sup>22</sup>Ridhelhaguabatu attu bi'ini ria le Jesús attiba ri'i len ca bi'in-na. Labi nna ixe libe chi bele'e lobi ancabi benni radi lebi runbi sina-ni, itú iqui itú lebi runbi yuda lhe. Adílabaa nnanna de ancale benni xenxxatta lebi gueni nna itú iqui itú lebi unbi yuda. <sup>23</sup>Gansi nuxa benni innába tisana gue Tito-ni, lebi'i nna góale cana bi'in-na ancabi umpanieru quia. Labi rixuutia qui runtu le yuda. A chupa ca bi'ini ria le Jesús daa len Tito-na ancacabi benni udhelha ca benni ria le Jesús ritupa lhe'e adí ca yiesi-ni. Sina nu runcabi nna anca nu runi qui ribequi xen ca benni Cristu. <sup>24</sup>Larcala nna qui una adí ca benni ria le Jesús ritupa lhe'e adí ca yiesi-na lebi'i nna gualíba raquinle gue ca benni ria le Jesús, gualule'e lo len ca bi'in-na, lebi'i nna gualíba raquinle gue ca benni ria le Jesús, qui anáchu nna bittu aquin benni dequi cuentaba rinne tseetu guele.

### Pablo rinnebi adí gue úna ruttpacabi

**9** Gue unle yuda ca benni chi ancacabi gue Tata Do Iyyabaaha nna lägabi raca duelha unia lo sitsi quixxi'atia le gue gaxasná unle, <sup>2</sup>cumu chiba yua lebi'i nna ancale benni raca leni uni yuda. Neti nna tsitsiba nu runia satíaba rpea ca benni se'e lo yu gue Macedonia-ni, lebi'i ca benni se'e lo yu gue Acaya, ida utehali

bebequi lele unle yuda. Ca benni gue Macedonia-ni nna ixerucabi bebequi lecabí unguabacabi yuda de binacabi gue nu re lele unle. <sup>3</sup>Nnanna nna ridhelha ca benni ria le Jesús atta se'ele-na qui aca xen lhasia lebi'i nna chiba se'e tseele utele úna. Análiba nna qui iría lí nu ria atti ya de nu runia rixxi'aya gue nu re lele unle, <sup>4</sup>quila ita ttulhe ca benni gue Macedonia-ni len neti atta se'ele-na, nianna etetti'acabi le bittu se'e tseele len úna guele. Unnuha unna ettuintu de ancale nu xen letu ute nu chi rále utele. Anába ria de bittu raca lasia innía lebi'iba nua ettúxxattinle. <sup>5</sup>Denuala nna nuarca ucatia unia duelha innába len ca bi'iní ria le Jesús nneru gácabi itacabi atta se'ele-na, qui uncabi yuda itupa úna nu chi rále uteleha qui chi te tsee nua atti isíatu. Análiba nna ule'e lo anca úna gueleha nu rerú iqui rerú lele rutele, bittu nu duelhaba runle rutele.

<sup>6</sup>Gualorexxa lele ca tisa-ni: Nu rada xxeni xua nna xxeniguaba lena redí nua, nu bittu rada xxeniha nna bittuguaba xxeni lena redí nua. <sup>7</sup>Coa ttuttule nna utele nu rerú iqui rerú lele utele, bittu yu'u ttucaba lele lhe bittu exiyinle gue nu rutele lhe cumu Tata Do Iyyabaaha racanie gue benni rute len elha redaca le. <sup>8</sup>Tata Do Iyyabaaha anque benni ra xxeni lee. Gunbe tsani iyá lo nu tsee rute guele qui gattatama nu ixuinle. Aná nna satíaba te tama guele, qui edá lele un tseerule adí len ca benni. <sup>9</sup>Lo ca sitsi gue Tata Do Iyyabaaha rixxi'a gue ttu benni rute tama, atta rá:

Labi nna bete tamabi nu te guebi len ca benni reasani.

Larcala nna nu tsee ben bi'iniha nna tsaba läganu ixulhinna nua.<sup>a</sup>

<sup>10</sup>Tata Do Iyyabaaha Benni rute nninni rada ttu benni, rute nu ro bi'iniha lhe. Lee nna gutebe iyácea nu reasinle qui unle iyá lo nu tsee, udienguabe adí nu edíle gue nu tsee runle lhe. <sup>11</sup>Aná nna gatta iyá lo elha tsee guele qui ute tamale nu reasin ca benni. Úna rutele saca'antu-na anque nu uni ute ca benni xquixaru len Tata Do Iyyabaaha. <sup>12</sup>Cumu úna rutele-na läga sunru ixuu benna dhi ca benni chi se'e riesi anca gue Tata Do Iyyabaaha nu risalocabi, anáguaba ixuu Ben-na qui utecabi adí xquixaru len Tata Do Iyyabaaha. <sup>13</sup>Ca benni dhi úna-ni nna cuequi xencabi le Tata Do Iyyabaaha gue nu runle. Cumu lebi'i nna läga sunru rále ria lele ca tisa gue Cristu, sinuqui rudoguabale tisa gue nu rá ca

---

<sup>a</sup> 9:9 Salmo 112:9

tisa-na. Anáguaba chi redá lele rutele nu reasaquinbi lhe nu reasani iyába benni lhe.<sup>14</sup> Lacabi nna innábaguabacabi aca len Tata Do Iyyabaaha le de racaquinbi guele, cumu ya de xxeni elha tsee bete Tata Do Iyyabaaha len lebi'i.<sup>15</sup> Xquixaba Tata Do Iyyabaaha, de ya de xxeni anca elha tsee rute lenri, ri'i nna niba lä reselinri gaxasná quixxi'arie.

**Pablo recabibi gue ca benni rulaba lecani  
bittu run tseebi sina gue Cristu**

**10** Cuinaba neti Pablo innea ulisa le attiba unne Cristu belise ca benni. Leni tisa tsee lhe len tisa si'i lhe rinnaba lenle udo nagale quia, masquiba rá benni dequi atti dua len lebi'i nna anca ttu benni rasini, attiliba dua idittu nna reaxtia run disa rinnea rulisa le.<sup>2</sup> Rinnaba lenle bittu unle inne dia ulisa le gansi chi bisíaya atta se'ele-na. Cumu neti nna duttila dhaca lania ca nu rinne rá dequi ri'itu nna attiba run ca benni bittu anca bieni Tata Do Iyyabaaha se'e yies lo yu-ni runtu.<sup>3</sup> Gualíba ancatu benni se'e yies lo yu-ni, ttiaca läga atti ritilha ca soldado se'e yies lo yu-ni ritilha ri'itu.<sup>4</sup> Cumu nu rixuintu ritilhatu nna läga anca unná atti anca nu rixuuni ca soldado se'e yies lo yu-ni atti ritilhacana, delába unnuha nna elha raca lani ra xxeni lee gue Tata Do Iyyabaahaba rixuintu qui rutse'e lotu iyáloba nu ra tsitsi leni rixuuni nu xxegüiha.<sup>5</sup> Rulhuxaguabatu nu rulaba le ca nu rese'e disa lo Tata Do Iyyabaaha lhe rulhuxaguabatu iyáloba elha ttaba gue ca nu dia rusuna qui bittu un bia ca benni Ben-na lhe. Runguabatu qui otsia ca benni iyába nu rulaba lecani qui oquinna iquicani udocana tisa gue Cristu.<sup>6</sup> Ri'itu nna se'e tilhatu itatu qui bixa udhacatu ca nu bittu rudo tisa-na, dequide chi bedole tisa gue iyá nu anca ubole tisa gueni.

<sup>7</sup> Lebi'i nna suntteba gue gaxasná anca lolia gue ca benni rugüiale. Gansi nuxale rulaba leni gualí chi ancana gue Cristu, anáguaba dica ulaba leni, ri'itu nna ancaguabatu gue Cristu attiba lana.<sup>8</sup> Neti nna lägabi rettutia gansi rite lo bedáya de ribequi xen lasia gue ladia bete Benni bananie ri-na. Cumu betebe laditu qui untu tse'e tsitsile lo neda gue Tata Do Iyyabaaha, läga bete Ben-na laditu qui untu tsia nittile.<sup>9</sup> Neti nna bittu raca lasia ulaba lele aquinle ga runniastia le leni nu rá lo ca sitsi ridhelha atta se'ele-na.<sup>10</sup> Ttulhe benni nna rácana dequi tsitsiba idí rinnea lo ca

sitsi ridhelha-na, ttiaca atti du cuinaga neti len lebi'i nna anca ttu nu bittu re tsitsi leni, rinne nu bittu retábinle gueni.<sup>11</sup> Ca benni rá dequi runtu aná nna raca lasia unacana, ri'itu nna attiba rinnebatu lo ca sitsi ridhelhatu atti se'etu idittu, anába innetu gansi chi bisíatu atta se'ele-na.

<sup>12</sup>Ri'itu nna läga eyaxintu utsen ts'i'itu ca nu requi rudá tisa dequi ancacana nu run tsee, lä ragutsaguabatu cana lhe. Ca unná nna nu lä caa elha rien gueniba anca ca unná, cumu la labacana rigu'ubia loescani, roquinni iquicani nuxacana anca nu raru xxeni leni lhe.<sup>13</sup> Ri'itu nna lägabi runtu ttaba tte bedátu lo nu chi ga'ana untu. Requibatu rixxi'atu ca tisa gue Tata Do Iyyabaaha bedaa atta chi boca'an Ben-na tsiatu, larcala nna bisíatu atta se'ele-na.

<sup>14</sup>Ttirca bittuba bita primer ri'itu atta se'ele-na lania nna guanari dequi rite bedábatu atta chi ga'ana tsiatu. Ttiaca ri'ibatu ancatu nu primero bisía rixxi'a ca tisa gue Cristu len lebi'i.<sup>15</sup> Ri'itu nna läga runtu ttaba gue sina beni attu benni subi, untu attisiba ri'ibatu beni sinaha, tte lo bedátu leni nu chi ga'ana untu. Delába unnuha nna ri'itu nna xenba letu lebi'i nna coa diabale riaru lele Cristu, aníaguaba dia rixeni sina guetu daca atta se'ele-na.<sup>16</sup> Lania nna aca tsiatu satixxi'atu ca tisa gue Cristu lhe'e ca yiesi se'e nu rearu gue atta se'ele-na, ttiaca läga ga'atu atta chi se'e ca benni rixxi'a ca tisa gue Jesús, nianna untu ttaba attisiba ri'ibatu utixxi'entu ca bi'ininha ca tisa gue Jesús primero.<sup>17</sup> Nu raca leni unna ttaba nna unna ttaba gue nu run Benni bananie ri-na len lana, bittu gue nu run la labana.<sup>18</sup> Cumu läga benni rinne rána dequi lana ancana nu runi nu anca tsee re'an tseena lo Tata Do Iyyabaaha, benni inná Benni bananie ri-na ancabi benni runi nu anca tsee liba eya'an tseebi lo Ben-na.

### Pablo runbi rexúbi lo ca nu bittu gualí anca apóstol

**11** Rinnaba lenle dhíle elha xen lhasi quia de rinnea attiba rinne ttu nu richixxi leni. Duelhaba gualuni gualuchía lo nu rinnea-ni.<sup>2</sup> Neti nna tsitsiba nu runia rapa sunale. Tata Do Iyyabaahaba runie rulaba lasia guele aná. Cumu attiba ttu nu rbani chi nabana qui dho lenna ttuba unbiyuu, aníaba chi ancatia le len Cristu. Qui utsá dua le lo Ben-na, ancale nari attiba ttu nu rbani ancana nari, nuttu nu unbiyuu chi belisana.<sup>3</sup> Ttiaca rastia cadirba ixú yiele satele attiba guate Eva uxielhana uxí yie belha na leni nu botsi'inu leni. Anáguaba lebi'i cadirba dhielhale ixú yiele lania

nna iganna iquile bitturu udo lele itú iqui itú lele suntteba nu anca gue Cristu.<sup>4</sup> Cumu ttirca risía attu nu subi rixxi'enna le nu bittu raxxína leni nu chi utixxi'entu le gue Jesús, attisiba doba attu Jesús subi. Lebi'i nna jeru rudo nagale gue nua, nnela ridielhale ridíle attu espíritu subi nu bittu anca Espíritu gue Tata Do Iyyabaaha Ben-ni chi uxíleha. Anáguaba ridielhale rudo nagale attu tisa subi nu bittu raxxína leni ca tisa gue Jesús chi binaleha lhe.<sup>5</sup> Neti nna racatia läga anca ca nu rá dequi ancacana apóstol ra xxeni leni nu raru xxeni leni atti neti.<sup>6</sup> Cumu masquiba anca nu lä reselani inne, ttiaca netiba anca nu yuru. Nu ria-ni nna ixe libeba lhe leni iyába nu runtu lhe chi bele'e lotu-na.

<sup>7</sup> ¿Nianna si nu lä anca tseeba nua benia bittu bequixa le atti utixxi'atia le ca tisa gue Tata Do Iyyabaaha? Neti nna chi belhidaga lasia qui uca ulequi xen lele.<sup>8</sup> Neti nna attiba utúa sigába belhi uxielha uxía bete adí ca benni ria le Jesús ritupa lhe'e adí ca yiesi qui bixuutia laca runia sina gue Tata Do Iyyabaaha len lebi'i.<sup>9</sup> Atti urea len lebi'ihha nna bisía atti beasatia nu goa, ttiaca ni ttule lägabi unnaba nu beasatia. Ca benni ria le Jesús daa daca Macedonia betecabi nu reasatia. Neti nna duelhaba benia bittu betsitsitia le. Anába usiguia unia.<sup>10</sup> Attiba gua yuxeba Cristuha neti nna rinneba nu anca gualí, anáguaba gualítia, tsa nuttu nu te lo yu gue Acaya dhana cuana nu runi ribequi xen lasia de bittu uquixa gue rixxi'aya ca tisa gue Cristu.<sup>11</sup> Atti ria aná nna ¿si raquinle bittuba racatia guele? ¡Dica! Tata Do Iyyabaaha gua yuxeabe attulade racatia guele.

<sup>12</sup> Nu runia-ni nna usiguiba unia-na, bittu uquixa, qui análiba nna bittu idhalia lo neda gue ca nu runi ttaba requi rá dequi ttuba ancacana len ri'itu cumu runguabacana loesi sina runtu.<sup>13</sup> Ca unná nna läga gualí ancacana apóstol. Nu requi uxí yieba ancacana, cuentaba runcana dequi ancacana apóstol gue Cristu.<sup>14</sup> Unní nna läga anca unní nu uni ebaninri, cumu la nu xxegüihaba run leni dequi reacana ingeli du lhe'e xieni attiba ca ingeli gue Tata Do Iyyabaaha.<sup>15</sup> Larcala nna läga dica ebaninri gansi ca nu runi sina gue nu xxegüihaba run lecani dequi ancacana nu rixxi'ani ca benni nu anca tsee. Ca unná nna isíaba sá dhicana elha disa gue coa nu lä anca tseeba runcana.

### Nu guate Pablo lo ni'a gue de utixxi'abi ca tisa gue Jesús

<sup>16</sup> Neti nna rpea le attu libe: Bittu raca lasia nuxale aquinle ga racaba iquia, ttiaca gansi lebi'i rulaba lele aná nna gualugüelha neti innea ulisa le attiba rinne ttu nu raca iquini qui aná nna unguuba saro'o ttaba gue sina runia-ni. <sup>17</sup> Nu ria-ni nna läga anca unní nu rá Tata Do Iyyabaaha neti innea. De xxenba lasia gue nu runia nna nuarca runia ttaba, runba attiba runi ttu nu raca iquini. <sup>18</sup> De ixeba ca nu runi ttaba gue nu rácana raca guecani runcana, nuarca anáguauba neti unguuba saro'o ttaba gue nu runia. <sup>19</sup> ¡Lebi'i nna tsapaba tsee rapale pasensi rudo nagale gue ca nu lä caa elha rien guequinna guarule'ele ancale nu te elha rien gueni nna! <sup>20</sup> Anáguauba tsapaba tsee ruchíale lo ca nu runcana dequi lebi'i ancale nu tto'o lo sina guecani:

rigúacana lo nále nu te guele lhe  
rudhacacana le attiba racaba lecani lhe  
runcana ttaba lole lhe  
ralhicana gui lole lhe.

<sup>21</sup> Masquiba rettutia, ridí ro'a ria dequi ri'itu nna yalhattela benni sil'ile ucatu len lebi'i, läga bedhacatu le atti rudhaca ca unná le.

Gansi adí ca nu requi na reaxquinna rácana dequi ancacana nu runi nu anca tsee, anáguauba neti eyaxguatia inne tseea gue nu runia, masquiba rinnea attiba rinne ttu nu raca iquini.

<sup>22</sup> Gansi ca unná ancacana benni rinne tisa hebreo, anáguauba neti ancaguuba nu rinne tisa hebreo,  
gansi ca unná ancacana benni Israel, anáguauba neti ancaguuba benni Israel,  
gansi ca unná ancacana benni datía Abraham, anáguauba neti ancaguuba benni datía Abraham.

<sup>23</sup> Gansi rácana ancacana nu requi rixxi'a ca tisa gue Cristu, ttiaca netila anca nu ribenru rixxi'aru ca tisa gue Ben-na, masquiba rieni rinnea attiba rinne nu raca iquini atti ria aná.

Cumu netiba anca nu runrúa duelha ribenrúa lo sina gue Cristu atti ca unná,  
ixerguuba libe chi utta lisiyya atti ca unná lhe tsitsirguuba chi utíncana neti lhe ixerguuba libe chi uláya lo elhuttiha lhe

<sup>24</sup> gayu libeguaba chi utín ca benni quia anca benni Israel-na neti len yeti, rilhidacana rerua yu'u jaa (39) libe quia.

<sup>25</sup> Tsunna libeguaba chi bexuacana neti yaga,  
chi besiacana neti iyya ttu libe lhe  
tsunna libeguaba chi uláya bittu uttia de uxudi ca barco ca nu diaya locaniha lhe'e indattoo lhe  
chi bettea ttu ela leni ttu sá lo indattoo atta ridú líxxatta loni lhe.

<sup>26</sup> Ixe libeguaba chi uyu'a neda atta ruxunnina quia iche yoo neti,  
ruxunnina quia bixa satea lo ná ca ubana lhe  
ruxunnina quia bixa satea lo ná ca benni lo yies quia anca benni Israel lhe  
ruxunnina quia bixa satea lo ná ca benni dittu lhe  
ruxunnina quia bixa satea lhe'e ca yies-na lhe  
ruxunnina quia bixa satea atti requia lo yu bisi lhe  
ruxunnina quia bixa satea lo indattoo lhe  
ruxunnina quia bixa satea lo ná ca benni run lecani rávana  
dequi riaguaba lecani Jesús attiba ri'i lhe

<sup>27</sup> retú resábatia de ratexxatta lo sina lhe  
ixe libe rebequia bisiela lhe  
ratea lo nu ritunia lhe lo nu rebisia inda lhe  
ixe libe rutte ubina lhe'a lhe  
ratea lo idilha de bittu nu guadi lo nu ucua te lhe.

<sup>28</sup> Dequide iyá nu chi ratea-ni nna ttu ttu sába richacha iquia gue iyába ca benni ria le Jesús ritupa lhe'e ca yies-na. <sup>29</sup> Gansi nuxa benni bixa rdacana, anágua ba neti ruyúguaba elha disa. Ridodíguatia atti runi ttu benni ichecu attu benni lo neda gue Tata Do Iyyabaaha lhe.

<sup>30</sup> Gansi raca duelha unia ttaba nna larba gue nu rule'e lo dequi neti anca attiba ttu nu bittu ra tsitsi leni guaca unia ttaba. <sup>31</sup> Benni anca Dios lhe Tata lhe gue Jesús Benni bananie ri, lee ralhe cuequi xenri lee ttu dia liiba. Gua yuxabe läga run lasia. <sup>32</sup> Atti udoa lhe'e yiesi Damasco, nu rinnabia du cu'e nu rinnabia xxeni lá Aretas bese'ena ca güensina ro'o puerta do atta rita'a benni lhe'e yiesiha qui udaxxucana neti. <sup>33</sup> Ttiaca lhe'e ttu sumiba ulu'u ca benni neti qui belhidacabi neti ro'o ttu ventana do lhe'e de'e iyya cua sabi'aba

yiesiha. Anía liba uca nna uláya lo ná ca nu re lecani udaxxucana neti.

### Pablo rixxi'abi gue nu ben Tata Do Iyyabaaha bilenbi

**12** Gualíba lägabi riría len benni runna ttaba gue nu runna.  
**12** Ttiaca raca duelha quixxi'aya gue nu chi bele'etia, nu beni Benni bananie ri-na bilátia. <sup>2</sup>Neti nna ancabiatia ttu unbiyuu ria leni Cristu. Chi uca sitá ida atti uche Cristu bi'iniha axta nu beyonna iyyabaaha. Neti nna bittu yua, sunruba Tata Do Iyyabaaha yue, si suntteba espíritu gue bi'iniha güia nía, aca. Si itupaba cuerpu gue bi'iniha uche benniha nía, aca. <sup>3</sup>Gua yuba netiba nua unbiyuu uche Cristu lo yu ga'ana tsee atta do Tata Do Iyyabaaha, ttiaca bittu yua si itupa cuerpu quia-ni, aca, suntteba espíritu quia-ni uchée nía, aca. Sunruba Tata Do Iyyabaaha yue. <sup>4</sup>Nía bientia ca tisa nu bittu eseltia gaxasná quixxi'aya que, nu bittu dica quixxi'a ni ttu benni lhe. <sup>5</sup>Gue nu bilátia liba nna gua dica cuequi xen lasia, ttiaca gue nu anca quia nna bittu cuequi xen lasia. Larba gue anca ttu nu bittu ra tsitsi leni, gua dica unia ttaba. <sup>6</sup>Gansi neti unia ttaba nna läga gue nu lä caa elha rieni gueni nua runia, cumu neti nna rinneba nu anca gualí. Ttiaca läga unia ttaba qui bittu ulaba le benni quia anca nu raru xxeni leni atti nu riláquinna runia lhe nu rixxi'aya lhe. <sup>7</sup>Nu bele'en Tata Do Iyyabaaha neti nna anque ttu nu ga'ana tsee xxeni. Larcala nna qui bittu tte lo bedáya unia ttaba gue nu bilátiaha nna begüeelhe uta'a ttu nu anca attiba ttu sitsi cuerpu quia-ni. Ttu be xxegüiha bunna rugüena neti qui bittu tte lo bedáya unia ttaba. <sup>8</sup>Tsunna libe chi unnaba len Benni bananie ri-na cue nu ratea-ni, <sup>9</sup>ttiaca Ben-na nna re neti: "Beaca xen lelu. Guadúba len lu, cumu elha ra xxen le quia-na rule'e loe len ca benni ancacana nu bittu ra tsitsi leni." Larcala nna neti itú iqui itú lasia runia ttaba gue anca ttu nu bittu ra tsitsi leni, qui aná nna satíaba tsu'u elha ra xxen le gue Cristu lhe'e lastooa. <sup>10</sup>Denuala nna larca re'o lasia atti ratea ttu nu runi aca nu bittu ra tsitsi leni,

atti nuxa rusía leni neti lhe  
 atti bittu tee nu reasatia lhe  
 atti ruría la benni neti lhe  
 atti ruyúa elha disa lo ni'a gue Cristu lhe  
 cumu atti anca attiba ttu nu bittu ancana nu rea lasi, lania la  
 anca nu run tsitsiru.

### Pablo richacha iquibi gue ca benni se'e lhe'e yiesi Corinto

<sup>11</sup> Lebi'i nna chi benle duelha quia runia attiba runi ttu nu raca iquini. Cumu lebi'i liba anca nu dica inne tsee gue nu runia. Neti nna läga anca nu ra güexxaru leni lo ca benni rá dequi ancacana apóstol ra xxeni lequinna masquiba anca ttu nu bittu daca. <sup>12</sup> Atti urea len lebi'ihha nna benba nu bele'e lo neti anca apóstol. Ucaba benni bechía lo iyába nu guatea, benba qui uca ca milagru len lebi'i lhe benba qui bele'e lo nu ra xxeni le gue Tata Do Iyyabaaha len lebi'i lhe. <sup>13</sup> Neti nna lägabi chi benia dequi ancale nu güexxaru atti adí ca benni ria le Jesús ritupa lhe'e adí ca yiesi-na, sunruba bittu uca lasia utele len neti nu beasatia. ¡Gualdhí elha xen lasi quia gansi unná anca nu lä anca tsee benia len lebi'i!

<sup>14</sup> Gualgüiarga, chi bedú tseea qui ita atta se'ele-na. Ni eyonna libe ita etenalhia le. Ttiaca bittu raca lasia ichacha iquile quia gue nu reasatia. Neti nna läga delha denoa nu te guele. Lebi'i bunna denoa, nuarca delha atta se'ele-na. Cumu ca tata-na liba daa locani quilacana nu reasani ca xi'inquinna läga ca xi'inquinna daa locani quilacana nu reasani ca tata-na. <sup>15</sup> Len neti nna tseeba anca itú iqui itú lasia unni loa iyá nu te quia, anáguaba lhuxa lo sina runia len lebi'i lhe qui salía tseenle, masquiba laca neti diarua racatia guele, lebi'i nna dialale rixulhinle neti. <sup>16</sup> Neti racatia, lebi'i nna gua rábale: "Gualí galá läga ucana nu beni ichacha iquiri gueni", ttiaca ttulhele nna rále dequi aníaba beguila lasia benia qui uca uxí yieya le. <sup>17</sup> Lebi'i nna ¿si raquinle dequi rixuutia ca benni ridhelha atta se'ele-na qui aca dhi sigáya belhi guele? <sup>18</sup> Neti nna unnaba len Tito qui itabi etenalhibi le. Len bi'in-na udhelhaguaba attu benni riaguaba le Jesús. Tito nna ¿si bettettúabi nu anca guele? ¡Dica! ¡Lägabi run ri'itu aná! Irupabatu ttuba anca nu rulaba letu, ttuba anca nu runtu lhe.

<sup>19</sup> Lebi'i nna ¿si raquinle dequi runbatu qui exútú lole? Ttiaca läga anía anca. Delába unnuha nna rinnebatu aní lo Tata Do Iyyabaaha de ancatu benni baba len Cristu. Iyába nu runtu-ni nna ancana nu uni tse'e tsitsile lo neda gue Tata Do Iyyabaaha, lebi'i ca benni raquintu gueni. <sup>20</sup> Neti nna richacha iquia cadirba bittuba se'ele runle nu raca lasia unle atti isíaya ettenalhia le, anáguaba neti bittuguaba unia lenle attiba rulaba lele unia atti isíaya atta se'ele-na. Richacha iquia qui läga yu'ule utilha,

qui läga se'ele rutía di le loesle lhe  
 qui läga se'ele rise'en loesle lhe  
 qui läga se'e la'a lhe'e loesle lhe  
 qui läga yu'ule güedelha iyya loesi lhe  
 qui läga yu'ule güenne sigá gue loesile lhe  
 qui läga se'ele runle ttaba lhe  
 qui läga se'ele güeaba anca nu run ttuttule lhe.

<sup>21</sup> Richacha iquia qui lä atti ita attu libe atta se'ele-na, uni Tata Do Iyyabaaha ettútia guele. Lania nna dhu si'i lasia lhe cuesia lhe gue ixele de lebi'i nna axta ttua runle nu lä anca tsee, nianna bittu rodú xiyyanle qui odha'anle ca nu satsa runle-na,

nu requi mannile-na lhe  
 nu redí baale nu lä anca tsee ridá lele lhe.

### Len ca tisa-ni rulhuxa Pablo runbi lo sitsi

**13** Ni eyonna libe ita atta se'ele-na. Iyába bixa guacaba elha uxtisi gueni, ladiba se'e chupa o tsunna benni begüia locani gue nu uca. <sup>2</sup> Atti berupa libe bita atta se'ele-na, lania belisaba ca nu ttu benla nu lä anca tsee-na, anáguba adí ca nu runi aná lhe. Nnanna doa idittu nna rulisa cana attu libe. Atti ita attu libe atta se'ele-na, bittu satúa lasia ca nu beni nu lä anca tsee ttuha, niguaba nuxarua lhe. <sup>3</sup> Cumu lebi'i nna raca lele ttedeenle gansi gualíga Cristuha Benniha rinne atti rinnea. Cristu läga anca Ben-na attiba ttu nu bittu ra tsitsi leni qui bittu eyaxanie bixa udhaque le, sinuqui nu ra xxeni lee anca Ben-na len lebi'i. <sup>4</sup> Gualíba utti Benniha lo ya crusi, uque attiba ttu benni bittu ra tsitsi leni, ttiaca nnanna doe banie rule'enie ri elha ra xxeni lee gue Tata Do Iyyabaaha. Anáguba ri'itu, ancaguabatu attiba ttu nu bittu ra tsitsi leni attiba uca Benniha lo ya crusiha, ttiaca de babatu len Cristu, elha ra xxeni lee gue Tata Do Iyyabaaha runie yu'u elha nabani guetu, qui aná nna ixuutu len lebi'i.

<sup>5</sup> La lebi'iba gualtsatsa ni'a gue nu anca guele, qui ttedeenle gansi gualí ria tsitsi lele Jesús. Gualcu'u bia la lebi'iba. ¿Si bittuba ritedeenle yu'u Jesús Benni anque Cristu lhe'e lastoole? Gansi bitturba Benniha yu'u lhe'e lastoole nna lebi'i nna lärga gualínle ria lele Ben-na. <sup>6</sup> Neti nna xenba lasia lebi'i nna guate daabinle gualíba ancatu benni chi ga'anani Tata Do Iyyabaaha iche ca tisa guee. <sup>7</sup> Ri'itu nna rinnabatu lo Tata Do Iyyabaaha qui bittu unle nu lä

anca tsee. Läga runtu aná qui ule'e lo ri'itu ancatu nu ridá lo sina runtu-ni qui eya'an tseetu. Rinnabatu loe qui lebi'i nna unle nu anca tsee, masqui ule'e lo dequi ri'itu nna ancatu nu bittu líntu len nu runtu.<sup>8</sup> Cumu ri'itu nna läga aca guetu udú situ sina runi ca tisa riguixxi'a nu anca gualí. Sunruba raca guetu runtu rexú ca tisa riguixxi'a nu anca gualí.<sup>9</sup> Larcala nna re'o letu atti ancatu attiba ttu nu bittu ra tsitsi leni, qui anía nna ancale nu run tsitsi. Ri'itu nna usiguibatu innábatu lo Tata Do Iyyabaaha aca lanie le qui e'eyule acale nu se'e tsitsi lo neda guee.<sup>10</sup> Denua nna runia lo sitsi ridhelha atta se'ele-na nnanna doa idittu, qui gansi chi bisíaya atta se'ele-na bittu udhaca disa le, cumu Benni bananie ri-na bodha'ane las náya use'e tsitsia ca benni lo neda guee, läga boca'an Ben-na las náya qui quinia ca benni iyya lo neda guee.

<sup>11</sup> Ca benni ria le Jesús, qui ulhuxa nu rpea le-ni, lebi'i nna gualcuequi itta lele,  
gualun duelha tse'e tsitsile lo neda gue Tata Do Iyyabaaha lhe gualuttipale loesle lhe  
ttuba anca nu gualulaba lele lhe  
lhatsiru gualtse'e len loesle lhe.

Tata Do Iyyabaaha Benni racanie gueri-na guadúbe len lebi'i. Lee runie se'eri xen su lee.<sup>12</sup> Gualgás loesle padiuxi attiba labi ca benni chi anca gue Tata Do Iyyabaaha runcabi.<sup>13</sup> Iyába ca benni chi se'e riesi anca gue Tata Do Iyyabaaha se'e-ni ridhelhacabi ttu padiuxi guele.

<sup>14</sup> Jesucristu Benni bananie ri-na aca lanie le, anáguaba satíaba acani Tata Do Iyyabaaha guele lhe satíaba dho Espíritu guee len iyábale lhe. Amén.

# **Sitsi udhelha Pablo atta se'e ca benni ria le Jesús lhe'e yiesi Galacia**

**1** Neti, Pablo anca apóstol benni che ca tisa gue Jesús. Läga benni se'e yies lo yu-ni bodúna neti aca apóstol, niguaba la lacana udhelhacana neti lhe. Jesucristuhaba bodúe neti, lenie Tata gueri do iyyabaaha, Benni benie beacani Jesús. <sup>2</sup> Neti lenia iyába ca benni ria le ca tisa gue Jesús se'e len neti nii ridhelhatu sitsi-ni guele, iyábale ca benni ria le Jesús se'e itúba daca Galacia. <sup>3</sup> Tata gueri do iyyabaaha lenie Jesucristu Benni bananie ri edá leque aca lenque le, unque tse'ele xen su le lhe. <sup>4</sup> Jesucristuhaba uxielhabe betticane lo ni'a gue ca tulha gueri. Anía uca qui bodile ri lo nu lä anca tsee raca yies lo yu-ni. Benbe attiba raca le Tata Do Iyyabaaha Benni anque Tata gueri. <sup>5</sup> ¡Benniha innári anque Benni ra xxeni lee ttu dia lii! Amén.

## **Sunruba ttu tisa te anque benni gualí rixxi'a gue Cristuha**

<sup>6</sup> Raca guatelhabatia bina dequi lebi'i nna ririeschile Tata Do Iyyabaaha, Benni uxie le qui acale guee de ucaxxattin Cristuha guele. Lebi'i nna attu tisa subila chi rudo nagale, lärga rudo nagale gue ca tisa tsee rixxi'a gue Cristuha. <sup>7</sup> Läga gualí te attu tisa subi. Gueba nna se'ele ca nu rucannacana iquile, rdacacana otsiacana ca tisa rixxi'a gue Cristu. <sup>8</sup> Ttiaca gansi nuxa benni o masquiba ri'itu lhe o ttu ingeli daa iyyabaaha lhe isíana quixxi'enna le attu tisa subi nu bittu raxxína leni nu chi utixxi'entu leha, attulade xxeni anca elha disa ute Tata Do Iyyabaaha gueni. <sup>9</sup> Nu chi rpea le ttuha nna unnuhaguaba rpea le nnanna: attulade xxeni anca elha disa ute Tata Do Iyyabaaha gue nuxaba isía quixxi'enna le attu tisa subi nu bittu raxxína leni ca tisa tsee rixxi'a gue Cristuha, delába ca tisa chi güiia leleha.

<sup>10</sup> Atti rinnea ria aní nna: “¿Bi raca lasia? ¿Si raca lasia eya'an tseea leni ca benni, aca? ¿Len Tata Do Iyyabaaha, aca? ¿Si requiba runia nu tsu'u le ca benni, aca?” Cumu gansi requirba runia nu tsu'u le ca benni, lania nna lärga anca nu rixuu lo sina gue Cristuha.

## **Cristuhaba betee ca tisa rixxi'a Pablo**

<sup>11</sup> Raca lasia quixxi'atia le, xa benni ria le Jesús, ca tisa rixxi'aya gue Ben-na nna läga ancaque tisa botsi'inu le ca benni se'e yies lo

yu-ni,<sup>12</sup> cumu läganu benni bele'enna neti Ben-na, nuttuguaba nu betene len neti lhe. Jesucristuhaba bele'enie neti Ben-na.<sup>13</sup> Lebi'i nna chiba binale gue bixa benia ca tu ttuha atti anca nu ria leni attiba ria le ca benni quia anca benni Israel. Lania nna tsitsiba nu benia güequia bería laya ca benni chi anca gue Tata Do Iyyabaaha, benia ulhuxa cabi.<sup>14</sup> Netiba uca nu bedaxxu tsitsirua nu labi ca benni quia runcana atti delo iyába ca nu ttubatia, cumu tsitsiba benia aca iyá nu labi ca benniola quiaha runcana.<sup>15</sup> Ttiaca Tata Do Iyyabaaha nna chi becuae neti atti deobali galia, de anque Benni si'i le nna ucanie quia, nuarca uxie neti lo neda guee.<sup>16</sup> Atti uca lee nna benie benbiaya Xil'inie Jesús qui anáchu tsiaya quixxi'atia ca benni bittu anca benni Israel ca tisa gue Ben-na. Neti nna tsa läganu güiaya sannaba tisa bixanca nu unia,<sup>17</sup> lä güiaguaba lhe'e yiesi Jerusalén sannaba tisa ca bi'líni bedheti ca tisa bele'e Jesús ucacabi primero atti neti lhe. Nu benla nna diatteba deca lo yu te láni Arabia, lenla nna bequia besíaya lhe'e yiesi Damasco.

<sup>18</sup> Dequide liba ute tsunna ida nna güiaya lhe'e yiesi Jerusalén qui benbiaya Pedro. Len labi udoa tsinu (15) sá.<sup>19</sup> Ttiaca tsa läganu adí ca bi'líni bedheti ca tisa nu bele'e Jesús bilátia, sunruba Jacobo<sup>a</sup> betsi Benni bananie ri-na biyúha.<sup>20</sup> Tata Do Iyyabaaha gua yube, nu runia lo sitsi-ni nna ancana nu gualí. Neti nna lägabi run lasia.

<sup>21</sup> Lenla nna dedaaya deca lo yu te láni Siria leni lo yu te láni Cilicia.<sup>22</sup> Ca benni ria le Jesús se'e itúba deca Judea nna läga chi anca biaquinbi neti lania.<sup>23</sup> Sunruba rienincabi rávana: "Nu requi ruría lan ri ttuha nna nnanna nna requina riguixxi'a-na ca tisa ria leri gue Jesús. Ca tisa-ni nua uxacana ulhuxana ca tu ttuha."<sup>24</sup> Lacabi nna ribequi xencabi le Tata Do Iyyabaaha de nu benie len neti.

### Adí ca apóstol uxielhabacabi isela Pablo cabi

**2** Dequide ute sitá (14) ida nna güia dacaba lhe'e yiesi Jerusalén lenia Bernabé, decheguaba Tito lhe.<sup>2</sup> Neti nna güiaya cumu Tata Do Iyyabaaha bele'en loe neti nianna re neti, raca duelha tsiaya Jerusalén. Nía unne lania suntteba ca benni anca nu lo gue ca benni ria le Jesús, utixxi'atia cabi ca tisa gue Jesús, rixxi'atia ca benni bittu anca benni Israel. Anía liba nna uca xen lasia gue sina

---

<sup>a</sup> 1:19 Ttuba dia le ca tisa Jacobo lhe Santiago lhe.

chi benia lhe nu runia nnanna lhe läga ancana sina nu bittu ixuu. <sup>3</sup>Lania nna ni Tito bi'ini dabi len netiha, ancalabi benni griego nna bittu uca duelha guebi cuebi senni, nu runcana leni ca unbiyyu Israel. <sup>4</sup>Unní uca cumu ttulhe ca benni rácana dequi riaguaba lecani Jesús, sigába biselacana ri'itu qui ulhatsicana gaxasná runri, ri'i ca benni chi requi lá de chi babari len Jesucristu. Cumu rdacacana uncana duelha gueri udori tisa gue ca ley boca'ana Moisés. <sup>5</sup>Ca unnuha nna ni saro'o bittu bedo nagatu gue nu rácana, cumu raca letu ttua tsee lhi'u lhe'e lastoole suntteba ca tisa riguixxi'a nu anca gualí gue Jesús.

<sup>6</sup>Ca benni anca nu loha, ca benni raru xxeni lecabicha, ni ttu nu cubi lä bele'equinbi neti qui ule'a. Masquiba ancacabi nu lo, ttiaca len neti nna lägabi duelha runna gue nuxa ancacabi, cumu lo Tata Do Iyyabaaha nna ttuba anca iyábari. <sup>7</sup>Nu benla ca bi'iniha nna boquinna la iquicabi gualíba len netiba chi boca'ana Tata Do Iyyabaaha quixxi'atia ca benni dittu-na ca tisa gue Jesús, attiguuba benie len Pedro, boca'ane len bi'iniha quixxi'enbi ca benni Israel-na ca tisa gue Jesús. <sup>8</sup>Cumu Tata Do Iyyabaaha ben-ni bodúe Pedro acabi apóstol gue ca benni Israel-na, Ben-naguaba bodúe neti aca apóstol gue ca benni dittu-na. <sup>9</sup>Lania nna Jacobo lhe Cefas<sup>a</sup> lhe Juan lhe ca bi'ini anca nu lo gue ca benni ria le Jesús, atti boquinna iquicabi gualíba Tata Do Iyyabaahaba bedaa lee bete elha tsee-ni len neti, bedaxxuttebacabi náya lenia Bernabé-ni. Anía bencabi qui ule'e lo gua se'ebacabi len ri'itu qui tsiatu satixxi'atu ca tisa gue Jesús atta se'e ca benni dittu-na, laca lacabi nna rixxi'encabi ca benni Israel-na ca tisa-na. <sup>10</sup>Sunruba unnabacabi len ri'itu exxa letu ca benni bittu te guecani, qui uttupatu latti nu reasaquinbi. Neti nna unnába nu satíaba runia duelha runia.

### Pablo rega'abi lo Pedro gue nu runbi

<sup>11</sup>Atti bita Pedro lhe'esi Antioquía nna lania bega'aya lobi gue nu runbi, cumu bittu runbi nu dica ixuu. <sup>12</sup>Cumu atti chi bisigababi nna gua robabi len ca benni bittu anca benni Israel, ttiaca atti bisía ca benni udhelha Jacobo nna beriesttebabí ca benni bittu anca benni Israel, lärga utobi yetta len ca bi'in-na, cumu rasinbi qui lä

---

<sup>a</sup> **2:9** Pedro nna Cefas nna ttuba dia lecani; Pedro ancana tisa griego nna Cefas-na ancana tisa arameo.

quisa ca benni Israel bi ca nu run duelha cueni senni ca unbiyuu Israel.<sup>13</sup> Adí ca benni Israel ria le Jesús se'e nía nna atti biláquinbi nu run Pedro nna aníaguaba bencabi, nilo ni tisaba runcabi nu rácabi. Axtaba Bernabé bixú yiebi benbi anía.<sup>14</sup> Ttiaca atti bilátia bittu runcabi attittiga rá ca tisa rixxi'a gue Cristu, laniala nna aníba lo iyá ca benni ria le Jesús bedhaca disa Pedro, rpea bi: "Inqui lu nna ancalalu nu Israel nna läga runlu atti run ca bi'in-na, attiba runi benni dittula runlu, ¿biacala ca benni dittu-na runlu duelha guecani uncana attiba runi ca benni Israel-na?"

<sup>15</sup> Ri'i nna attili uliri ancari benni Israel, läga ancari benni dittu, ca nu rári runi nu lä anca tsee. <sup>16</sup> Gua yubari läga de runi benni nu rá lo ca ley boca'ana Moisés larcala anca benni nu bittu tulha gueni te lo Tata Do Iyyabaaha. De riaba leni Jesucristu nuarca ancana benni bitturu te tulha gueni lo Ben-na. Aníaguuba ri'i, chiguuba güia leri Jesucristu qui acari benni bitturu te tulha gueni lo Tata Do Iyyabaaha, läga de rudori tisa gue nu rá lo ca ley-na. Cumu ni ttu benni bittu ancana nu bittu te tulha gueni lo Tata Do Iyyabaaha de rudona tisa gue nu rá lo ca ley-na.

<sup>17</sup> Ttiaca gansi ri'i raca leri acari benni bittu te tulha gueni lo Tata Do Iyyabaaha de ria leri Cristu, nianna saxxacari dequi aníaguuba ri'i ancaguabari nu runi nu lä anca tsee, gansi anía anca, nianna ¿Si Cristu anque benni runie qui ancari nu te tulha gueni? ¡Dica, läga anía anca! <sup>18</sup> Cumu gansi neti chi ulu'u ni'aya nu ria lasia ttuha, nianna eyequia elhidha nua attu libe qui udoa tisa gueni nna laniarguaba nna anca nu te tulha gueni. <sup>19</sup> Cumu neti nna attisiba bettiba ca ley boca'ana Moisés neti, larcala attisiba lärganu neti do qui udoa tisa gue ca ley-na, qui anáchu aca dhoa ixuua lo Tata Do Iyyabaaha. <sup>20</sup> Attisiba leni Cristuhaba nua chi utáya lo ya crusi. Larcala attisiba lärganu neti do, Cristuhaba doe lhe'e lastooa. Doa anca bania nnanna de ria lasia Xi'ini Tata Do Iyyabaaha. Lee nna de ucanie quia nuarca bete cuerpu guee qui uttie lo ni'a quia. <sup>21</sup> Neti nna bittu raca lasia cu'u ni'aya elha tsee bedaa lee Tata Do Iyyabaaha bete len neti, cumu gansi dicaba acari benni bitturu tulha gueni te lo Tata Do Iyyabaaha de udoi tisa gue ca ley-na, lania nna Cristuhaba nna cuentarba utti Benniha ganniha.

**Sunruba de tsia leri Tata Do Iyyabaaha  
acari benni bitturu tulha gueni te**

**3** ¡Lebi'i, benni Galacia, lä caa elha rieni gueni! ¿Núchiaga uxí yiena le nna lä riaru lele gue nu anca gualí-na? Inqui lhixxa suba utixxi'entu le gue Jesucristu Benni utti lo ya crusihlo ni'a gueri. <sup>2</sup>Suntteba unní raca lasia quixxi'enle neti: ¿Si uxíle Espíritu gue Tata Do Iyyabaaha de bedole tisa gue nu rá lo ca ley boca'ana Ben-na len Moisés, aca? ¿Si de güia lele ca tisa bieninle rixxi'a gue Cristuha, aca? <sup>3</sup>¡Cattiparba ditile qui sadú lele! Lebi'i nna Espíritu gue Tata Do Iyyabaahaba uca lanie le atti udúlole diale lo neda gue Ben-na. Nnanna nna anátteba rdacale e'eyule acale benni tsee lo Tata Do Iyyabaaha. <sup>4</sup>Iyába nu chi guatele lo neda gue Jesús, ¿si cuentarba chi guatele nua? ¡Gaxa dica, läga cuenta chi guatele nua! <sup>5</sup>Tata Do Iyyabaaha Benni rute Espíritu guee-na len lebi'i, runie ca milagru aní lole lhe ¿si runie nua de rudole tisa gue nu rá lo ca ley-na, aca? ¿Si de ria lele gue ca tisa bieninle rixxi'a gue Cristuha, aca?

<sup>6</sup>Gualgüiarga, Abraham güia lebi Tata Do Iyyabaaha, Ben-na nna ulequibe bi'linita bala'ana, de nua nna re anca Abraham benni bitturu tulha guebi te lo Ben-na.<sup>a</sup> <sup>7</sup>Larcala nna lebi'i nna raca duelha unale, ca benni ria lecabí Tata Do Iyyabaaha nna xi'ini Abrahamba raca ca bi'linita de ria lecabí attiba güia le Abraham. <sup>8</sup>Ttu boca'anla Tata Do Iyyabaaha lo ca sitsi guee-na gue nu unie, lee nna re: Ca benni bittu anca benni Israel, de tsiaba lecanie nna unie aca ca nua benni bitturu tulha gueni te. Utixxi'aguabanie Abraham re bi'linita: "De ria lelu neti nna nuarca aca lenia ca benni se'e lhe'e iyába ca yiesi se'e itúba yies lo yu-ni."<sup>b</sup> <sup>9</sup>Larcala nna ca benni ria lecabí Tata Do Iyyabaaha, ca bi'linita raca lanie cabi lencabi Abraham bi'ini güia lebi Tata Do Iyyabaaha.

<sup>10</sup>Ttiaca iyába ca benni racaquinna dequi de udocana tisa gue nu rá lo ca ley boca'ana Moisés nianna acacana benni bitturu tulha gueni te lo Tata Do Iyyabaaha, ca unnuha nna unbe cu'u quixa guecani. Cumu lo ca sitsi gue Ben-na rixxi'a rá: "Tata Do Iyyabaaha unie cu'u quixa gue iyába ca benni bittu dhacana udocana tisa gue iyá nu rá lo ca ley-na."<sup>c</sup> <sup>11</sup>Ri'i nna chiba yuri nnanna läganu te

---

<sup>a</sup> 3:6 Génesis 15:6    <sup>b</sup> 3:8 Génesis 12:3    <sup>c</sup> 3:10 Deuteronomio 27:26

dhana e'eyuna acana nu bitturu tulha gueni te lo Tata Do Iyyabaaha de udonia tisa gue nu rá lo ca ley-na, cumu lo ca sitsi gue Ben-na rinne rá: "Benni runi nu anca tseeha nna de tsiba le bi'iniha Tata Do Iyyabaaha nuarca aca banbi lo Ben-na."<sup>a</sup> <sup>12</sup> Ca ley boca'ana Tata Do Iyyabaaha leni Moisés, läga rinnabaque tsia leri Tata Do Iyyabaaha. Delába unnuha nna rálaque: "Nu dhana udonia tisa gue iyá nu rá lo ca ley-na nna guaca banbana."<sup>b</sup>

<sup>13</sup> Cumu ri'i nna Cristuhaba bete elha naban guee qui bodile ri lo ca ley-na, qui bittu cu'u quixa gueri de bittu rudori tisa gue nu rá lo ca ben-na. Cristuhaba ulu'u utixe cuenta gueri qui bodile ri. Cumu lo ca sitsi gue Tata Do Iyyabaaha nna rá: "Iyába ca nu ritácana lo ya crusi, ancacana nu rigu'u riguixa guecani."<sup>c</sup> <sup>14</sup> Uca aná qui ca benni bittu anca benni Israel dhíguabacana nu tsee bete Tata Do Iyyabaaha leni Abraham de nu guate Jesucristuha. Análiba nna qui de tsiba leri Ben-na, ri'i nna dhíri Espíritu guee, Benni chi begüee tisa utee len ri'i.

### **Ca ley betee Tata Do Iyyabaaha len Moisés läga rigúaque lidhaca ca tisa chi begüee Ben-na len Abraham**

<sup>15</sup> Benni ria le Jesús, quixxi'atia le ttu nu run ca benni se'e yies lo yu-ni: Gansi ttu benni roca'anna lo sitsi unna ttu bixa, nianna cu'u láni xani'a nua, tsa läganu te aca gueni cuana nu rá lo nua, niguuba ubienna adí iqui nu chi rá lo nua lhe. <sup>16</sup> Aníaguaba uca leni Abraham. Len bi'iniha begüee Tata Do Iyyabaaha tisa, leni benni anque benni datía bi'iniha lhe. Lo ca sitsi gue Tata Do Iyyabaaha nna lägabi rá: "Ca benni aca nu datíalu"<sup>d</sup>, cumu läga rinnee gue ixe benni, sinuqui gue ttuba benni rinnee re: "Benni datíana lu", Cristuhaba Benniha bedettie atti re anía. <sup>17</sup> Nu raca lasia innía nna ancana: Tisa begüee Tata Do Iyyabaaha leni Abraham, tsitsiba boca'ane na. Denuala nna bittu udá ca ley boca'ana Moisés ca benni bisía ttapa gayua yu'u rerua (430) ida dequila lania cuaque lidhaca ca tisa chi begüee Tata Do Iyyabaaha leni Abraham. <sup>18</sup> <sup>9</sup> Cumu gansi de udobari tisa gue nu rá lo ca ley boca'ana Moisés dhíri interés nu chi rá Tata Do Iyyabaaha utee len ri'i, lania nna lärga dhíri nua de chi begüee tisa leni Abraham utee nua cuentaba

<sup>a</sup> 3:11 Habacuc 2:4

<sup>b</sup> 3:12 Levítico 18:5

<sup>c</sup> 3:13 Deuteronomio 21:23

<sup>d</sup> 3:16 Génesis 12:7

len ri'i. Ttiaca lee nna de chi begüee tisa, nuarca cuentaba bete nua leni Abraham, denuala nna aníaguaba unie len ri'i.

<sup>19</sup> Gansi anía anca, ¿bila ixuu ca ley-na ganna? De lo ni'a gue nu lä anca tsee runri naba bete Tata Do Iyyabaaha ca ley. Ca ley-na bixuuque bedaa axta atti bisía Benni datie Abraham. Benniha nua chi begüee Tata Do Iyyabaaha tisa idhelhe yies lo yu-ni. Ca ingeli gueehaba bixuunie qui betecabi ca ley-na leni Moisés. Moisés nna ucabi benni utixxi'a ca ley-na len ca benni. <sup>20</sup> Ttiaca atti begüee Tata Do Iyyabaaha tisa leni Abraham nna cuinaga lee unnee leni Abraham. Lärga nurua attu benni bixuunie qui ottena ca tisa gueeha. Cumu tturbe anque Tata Do Iyyabaaha.

<sup>21</sup> Gansi anía anca, ¿si rigu'uba ni'a ca ley boca'ana Moisés tisa chi begüee Tata Do Iyyabaaha len Abraham? ¡Dica, läga anía anca! Cumu ttirca guadába ttu ca ley-na uteque elha nabani gueri ttu dia lii nna lania nna guacabari benni bitturu tulha gueni te lo Tata Do Iyyabaaha de udori tisa gue nu rá lo ca ley-na. <sup>22</sup> Ttiaca lo ca sitsi gue Tata Do Iyyabaaha nna rá: Iyába benni ancacana attiba nu te lisiyya lo ni'a gue nu lä anca tsee runcana. Larcala nna sunruba ca benni ria lecabí Jesucristuha dhicabi nu chi rá Tata Do Iyyabaaha utee lencabi.

<sup>23</sup> Atti bittu chi bisía sá tsia leri Cristuha nna attiba ttu nu tee lisiyya ancani ca ley-na ri, tsaba rapaque ri axta liba atti bisía sá bele'e lo Tata Do Iyyabaaha Cristuha, lania liba ulári lo ca ley-na.

<sup>24</sup> Larcala nna ca ley-na ucaque attiba ttu benni upanri, laque ulu'que ri neda qui benbiari Cristu, qui de tsia leri Benniha nna acari benni bitturu tulha gueni te. <sup>25</sup> Nnanna chi bisía Cristu Benni ria leri-na, lärgabi reasinri gapa ca ley-na ri, <sup>26</sup> cumu de chi ria lele Jesucristu, larcala iyábale ancale xi'ini Tata Do Iyyabaaha.

<sup>27</sup> Iyábale atta chi udile inda de ancale benni baba len Cristuha nna chi beacale attiba Benniha. <sup>28</sup> Lärgabi runna gue nuxa ancale nnanna si ancale benni Israel, aca, benni dittu aca, si ancale nu tto'o lo sina aca, nu bittu tto'o lo sina aca, si ancale nuila aca, unbiyuu aca, cumu iyábale la ttuba benni chi ancale nnanna de ancale benni baba len Jesucristu. <sup>29</sup> De chi ancale gue Cristuha nna benni datía Abraham guaba chi ancale. Larcala ancaguabale benni dhi interés nu chi begüee Tata Do Iyyabaaha tisa utee leni Abraham.

## Nnanna chi ancari xi'ini Tata Do Iyyabaaha

**4** Arcaguaba lasia upea le: Laca nu dhi interésiha sna ancabana unto, ttuba anca nua len ttu benni tto'o lo sina, masquiba lana chi ancana nu beaca gueni iyába nu te gue tata gueniha.<sup>2</sup> Sna rudoba nua tisa gue ca nu be'ana ruyúcan-na, gue ca nu rapacana nu anca gueniha lhe axta liba isía sá chi ga'anani tata gueniha dhína nu ralhana.<sup>3</sup> Anáguaaba guateri ttuha attiba ttu unto ancari lania. Larcala attiba ttu nu tto'o lo sina ucari, bedori tisa gue ca nu bittu gualí anca diosi-na.<sup>4</sup> Ttiaca atti chi bisía tiempu ga'anani Tata Do Iyyabaaha idhelhe Xi'inie Jesús yies lo yu-ni, laniala nna udhelhe Benniha. Benniha nna ttu nUILABA ulu'une. Lee nna uque Benni bedo tisa gue ca ley boca'ana Moisés.<sup>5</sup> Anioca nna bisía Benniha bete elha nabani guee qui bodile ca benni se'e rudo tisa gue ca ley boca'ana Moisés. Anía liba nna beon xi'ini Tata Do Iyyabaaha ri.<sup>6</sup> De chi ancari xi'inie nna nuarca udhelhe Espíritu gue Xi'inie lhe'e lastoori. Espírituha Ben-na rinnee atti rári Tata Do Iyyabaaha: “¡Tata xisto quia!”<sup>7</sup> Larcala lebi'i nna lärga ancale benni tto'o lo sina gue ca ley-na, xi'ini Tata Do Iyyabaahaba chi ancale. De chi ancale xi'inie nna dhíguabale interés nu chi rá Ben-na utee de nu guate Cristuha.

### Pablo richacha iquibi gue ca benni se'e Galacia

<sup>8</sup> Ttiaca ca tu ttuha atti bittu chi ancabienle Tata Do Iyyabaaha, nu tto'o lo sinaba ancale gue ca nu bittu gualí anca diosi-na. Ca unnába bedole tisa bixuule locani.<sup>9</sup> Nnanna nna de chi ancabienle Tata Do Iyyabaaha, o tseerla innía Ben-na chi ancabiene le. Nianna, ¿gasná nua nna rdaca dacabale eyequile odidole tisa gue ca nu bittu gualí anca diosi-na ca nu bittu lidhacani te qui edeacale nu tto'o lo sina guecani?<sup>10</sup> Lebi'i nna sna rutebale lidhaca ca sá laní-na, ca beo cubi-na lhe ca laní raca lhe'e ca ida-na lhe.<sup>11</sup> ¡Neti nna rixxusatia guele, cadirba bittubabi bixuu sina benia, lania nna cuentarba bele'etia le!

<sup>12</sup> Ca benni ria le Jesús, rinnaba lenle unle atti runia, cumu neti nna benba atti runle. Lebi'i nna lhatsirba biyúle neti lania.<sup>13</sup> Gua yuxebale, lo ni'a gue isagüe rdacahaba nuarca uleda atta se'ele-na. Lania primerba utixxi'atia le ca tisa gue Jesús.<sup>14</sup> Isagüe bilenle rdacaha nna läga ben nua cu'u ni'ale neti, bittuguaba bixinle neti

lhe. Delaba unnuha nna attiba nu belabi ttu ingeli gue Tata Do Iyyabaaha belabile neti, attisiba cuinaba Jesucristuhaba Benniha bisía atta se'ele.<sup>15</sup> ¿Bila uca len elha redaca le guele tee lania? Neti nna rorexxa lele nu benle lania: ttirca nu uca nna axtaba ca iyya lole ulequile betele len neti.<sup>16</sup> Nnanna nna ¿si bitturba raca uyúle neti de utixxi'atia le nu anca gualí?

<sup>17</sup> Ca nu rucannacana iquile requi na nna runcana dequi richachalhaba iquicani guele, ttiaca läga gualíquinna. Sunruba rdaca ca unná ebequiescan le len neti qui dequila nna suntteba lacana udo nagale guecani.<sup>18</sup> Tseeba anca ichacha iqui ca unná guele, ladiba anca nua nu uni qui salía tseenle. Gueba nna satía anía uncana len lebi'i, bittu suntteba gansi chi doa len lebi'i.<sup>19</sup> Ca xi'into quia, lo ni'a guele nna ruyúa elha disa attu libe attiba ttu nuila rutía lhe'eni cu'u xi'inni. Anába usiguiusatea axta liba isía sá innabia Cristuha lhe'e lastoole.<sup>20</sup> Attulaba rdaca nnannatte chila dua len lebi'i qui otsia tsi'a latsirba ulisa le, cumu bittu yua bixa unia len lebi'i.

### **Agar leni Sara ancacana nu raxxína leni nu dia le chupa ca tisa boca'an Tata Do Iyyabaaha**

<sup>21</sup> Lebi'i, ca benni rdacale udole tisa gue nu rá lo ca ley boca'ana Moisés, gualquixxi'en neti: ¿si bittuba chi bieninle nu rá lo ca ley-na?<sup>22</sup> Cumu lo ca sitsi gue Tata Do Iyyabaaha rá: Abraham use'e chupa xi'in biyuubi, ttu nua ancana xi'ini Agar nuila tto'o lo sina guebiha, attu nua nna ancana xi'ini latselabi lá Sara bi'ini bittu tto'o lo sina.<sup>23</sup> Gueba nna xi'in biyuubi uli leni nuila tto'o lo sina guebiha nna ulba nua cumu de labacabi uca lecabí gali nua, xi'ini nuila anca latselabi bi'ini bittu tto'o lo sinaha nna ulba nua cumu aníaba chi begüee Tata Do Iyyabaaha tisa leni Abraham.<sup>24</sup> Nu guate ca nuilaha raxxína len chupa ca tisa begüee Tata Do Iyyabaaha. Ttu tisaha anque ca ley uxí Moisés iqui i'iya lá Sinaí. Tisaha nna raxxína anque attiba nuila tto'o lo sina lá Agar, lana ancana attiba nan gue ca benni tto'o lo sina, ca nu daa locani udocana tisa gue nu rá lo ca ley-na.<sup>25</sup> Agar ancana attiba i'iya Sinaí do lo yu te láni Arabia. Lana raxxína ancana attiba yiesi Jerusalén re yies lo yu-ni nnanna cumu yies-ni nna ancana attiba nu tto'o lo sina lenna iyába ca benni se'e loni de ancacana nu raca duelha gueni uncana iyába nu rá lo ca ley-na.<sup>26</sup> Ttiaca Jerusalén anca gue

iyyabaaha nna anque attiba Sara nuila bittu tto'o lo sinaha. Bi'iniha nna ancabi attiba nan gueri, ri'i ca nu bittu daa lori unri nu rá lo ca ley-na. <sup>27</sup> Cumu lo sitsi gue Tata Do Iyyabaaha nna rá:

Bedaca lelu, lu, nuila bittu raca uja xi'inni,  
uresi'a de re'oba lelu, lu nu bittu ancabienlu gaxasná rutía  
lhe'e ttu nuila cu'u xi'inni.  
Cumu adíla ixe xi'ini nuila bedhá iquicaninha raca attichula  
nuila do len unbiyuuhá.<sup>a</sup>

<sup>28</sup> Larcala, ri'i ca benni ria le Jesús, ancari attiba Isaac. Bi'iniha nna ulbi de begüee Tata Do Iyyabaaha tisa len Abraham gali ttu xi'inbi, anáguuba lebi'i, de chi begüee Tata Do Iyyabaaha tisa leni Abraham nna nuarca ancaguabale xi'inbi. <sup>29</sup> Cumu attiba uca lania, anáguuba raca nnanna. Xi'ini Abraham nu uli de aníaba uca lecabí, bittu uca uyúna betsini nu Espíritu gue Tata Do Iyyabaaha beni qui ulina. <sup>30</sup> Ttiaca, ¿bi rá lo ca sitsi gue Tata Do Iyyabaaha? Lo ca sitsi-na rá: "Ulea nuila tto'o lo sina-na lenna xi'inin-na lhe'e yo'o guelha, cumu tsa lägabi elha ralha xi'ini unná dhína salhe interés ralha xi'ini nuila bittu tto'o lo sina-na dhína."<sup>b</sup> <sup>31</sup> Larcala nna ri'i nna xa benni ria le Jesús, läga ancari xi'ini nuila tto'o lo sina, xi'ini nuila bittu tto'o lo sinahaba ancari.

### Requi lári cumu Cristuha bodile ri

**5** Cristuha chi bodile ri qui tsequi lári. Denuala nna tsitsi gualtse'e, bittu dhielhale edeacale attiba nu tto'o lo sina gue ca ley boca'ana Moisés.

<sup>2</sup> Gualdo nagale quia. Neti Pablo rinnea rulisa le. Gansi sna rurenbale senni nu runcana leni ca unbiyuu Israel. Lania nna tsa lägabi ixuu len lebi'i elhutti gue Cristuha. <sup>3</sup> Rixxi'atia le attu libe: nuxaba unbiyuu ureni senni, nu runcana leni ca unbiyuu Israel, lana nna labíaba raca duelha udona tisa gue iyárechaba nu rá lo ca ley boca'ana Moisés. <sup>4</sup> Lebi'i, ca nu raquinle dequi de ubole tisa gue ca ley-na nuarca e'eyule acale nu bitturu tulha gueni te lo Tata Do Iyyabaaha, chiba biriesle Cristuha, chiguaba bennittile elha tsee bedaa le Tata Do Iyyabaaha bete guele lhe. <sup>5</sup> Ttiaca ri'itu nna de riaba letu Jesucristuha lhe de Espíritu gue Tata Do Iyyabaahaba lhe xen letu e'eyutu acatu benni bitturu tulha gueni te. <sup>6</sup> Cumu ri'i

<sup>a</sup> 4:27 Isaías 54:1    <sup>b</sup> 4:30 Génesis 21:10

atta chi ancari benni baba len Jesucristu, lärgabi daca si ancari nu ren senni nu labi ca unbiyuu Israel runcana o si bittu ren senni nu runcana leni ca unbiyuu Israel. Nu daca nna ancana ria leri Jesús, unnu runi raquin gue loesri.

<sup>7</sup> Lebi'i nna tseeba diale lo neda gue Tata Do Iyyabaaha. <sup>8</sup> ¿Núla bixa rán le qui bitturu udole tisa gue nu anca gualí? <sup>9</sup> Cumu läga Tata Do Iyyabaaha benni uxie le lo neda guee udhelhe nu uxí yienä lebi'i. <sup>10</sup> ¡Gualudo cuidadu! Lebi'i nna gua yuxebale, saro'oru levadura runna radha lhe'e itúba cua ttaxtila. <sup>11</sup> Neti nna xxenba lasia Benni bananie ri-na, lebi'i nna läga otsiale nu rulaba lele. Ttiaca nu requi rucannana iquile-na, guteba Tata Do Iyyabaaha elha disa gueni, nuxaba ancana.

<sup>11</sup> Ca benni ria le Jesús, gansi neti sna requirba rpea benni dequi raca duelha cuecabi senni, nu labi ca unbiyuu Israel runcana, loesi nu runi ca benni Israel, lania nna lärga usia le ca benni neti. Ttirca sna requirba rinnea anía nna lärgabi iyien dícani ca benni gue nu ria. Unná nna rien dilaquinna ria: Chiba utixa Cristuha lo ya crusihá nu dica quixari. <sup>12</sup> ¡Ca nu requi rucannacana iquile-na, locala tsala ichecule atta rigu'ule senni-na!

### Gualtse'e gualudo tisa gue Espíritu gue Tata Do Iyyabaaha

<sup>13</sup> Lebi'i, ca benni ria le Jesús, uxiba Tata Do Iyyabaaha le qui tse'e lále, qui bitturu innabia ca ley boca'ana Moisés-na le. Ttiaca bittu aquinle de chi se'e lále-na guacaba unle nu racaba lele. Nu unlale nna gualuni nu anca tsee len loesle de raquin gue loesle, <sup>14</sup> cumu iyába nu rá lo ca ley boca'ana Tata Do Iyyabaaha leni Moisés rido tisa gueque gansi chi rudori tisa gue tisa rá: "Aquinlu gue adí benni attiba raquin gue la luba."<sup>a</sup> <sup>15</sup> Ttiaca gansi goya'a loesiba lhe go loesiba lhe ru'ule gualdo cuidadu qui lä ulhuxa loesle.

<sup>16</sup> Larcala nna ria: gualtse'e gualudo tisa gue Espíritu gue Tata Do Iyyabaaha, tsa bittu unle nu lä anca tsee ridá lele unle. <sup>17</sup> Cumu nu lä anca tsee ridá le cuerpu gue ttu benni unna läga raca uyú nua Espíritu gue Tata Do Iyyabaaha. Anáguba Espíritu gue Tata Do Iyyabaaha, läga raca uyúe nu lä anca tsee ridá le cuerpu gue ttu benni unna. Irupaba ca unní rese'e disa lo loescani larcala nna läga

raca unle nu raca lele.<sup>18</sup> Ttiaca gansi lebi'i unle nu rá Espíritu gue Tata Do Iyyabaaha, lania nna lärga rinnabia ca ley-na le.

<sup>19</sup> Lebi'i nna gua yuxebale, ca unní anca nu lä anca tsee ridá le ca benni uncana:

reQui mannicana,  
risácana nu bittu anca latselacani lhe  
runcana iyáloba nu satsa ridá lecani uncana lhe  
<sup>20</sup> rudú xibicani lo ca nu bittu gualí anca diosi lhe  
runcana gue güesa lhe  
rutía di lecani lhe  
rigu'u lecani lhe  
run yiecana lhe  
xalhaba risa'aquinna lhe  
ruttilhacana benni lhe  
rilha'acana lhe'e loes benni lhe  
runcana rise'e ixe cue benni lhe,  
<sup>21</sup> rapacana malisi lhe  
rutticana benni lhe  
ancacana nu dusi lhe  
rite bedáacana ri'a rocana atta raca laní lhe  
runruguabacana adí ca loesi nu lä anca tsee-ni lhe.

Neti nna rixxi'atia le, attiguaba chi rpea le ttuha, ca nu runi aná nna lägabi elha ralhacana dhicana nu ute Tata Do Iyyabaaha len ca benni rinnabie.

<sup>22</sup> Ttiaca nu tsee runi Espíritu gue Tata Do Iyyabaaha len ri'i nna ancana:

Acari benni raquin gue loesni,  
nu redaca leni lhe  
nu tee elha xen lasi gueni lhe  
benni pasensi lhe  
benni du tsee leni lhe  
benni resi'ini adí benni lhe  
benni uxten leri gueni lhe  
<sup>23</sup> benni si'i le lhe  
benni ridá rinnabiana elha rieni gueni lhe.  
Tsa lägabi ley te usunana unri ca loesi nu tsee-ni.

<sup>24</sup> Ca benni chi anca gue Cristuha nna chiba boca'ancana iyába nu lä anca tsee runcana, nu satsa ridá lecani uncana lhe attisiba chiba betávana iyába nua lo ya crusi.

<sup>25</sup> Gansi Espíritu gue Tata Do Iyyabaaha rute elha nabani gueri, anáguba tse'eguabari udori tisa gue Espíritu-na. <sup>26</sup> Bittu acari nu ttaba, niguaba lä unri ise'en loesri lhe lä gapaguaba malisi gue loesri lhe.

### Un loesri yuda

**6** Ca benni ria le Jesús, gansi nuxttule ilenle ttu benni ria le Jesús runna nu lä anca tsee, lebi'i ca benni chi rudoru tisa gue Espíritu gue Tata Do Iyyabaaha unle nua yuda qui edú tsitsina. Leni tisa si'i leba ulisale na. Coa ttuttule nna gualudhaca lele, qui läbi aca isíaguaba tsu'ubiale, nianna ixú yiele unle nu lä anca tsee. <sup>2</sup> Gualun yuda loesle atti bixa ratele. Cumu atti runle anía nna rudole tisa gue nu beni Cristuha mandadu unle. <sup>3</sup> Cumu nu raquinna dequi ancana nu ra xxenru leni, ttiaca läga gualí anía anca, la unnuhaba nua ridí yie la labana. <sup>4</sup> Coa ttuttule gualugüiaxatsee gue nu runle. Gansi tseeba anca nu runleha nna lania liba nna guate ro'ole eyo'o lele gue nu runleha. Ttiaca bittu cu'ubiale nu runleha leni nu runi adí benni, <sup>5</sup> cumu cua ttutu benni te nu daa loni unna.

<sup>6</sup> Nuxaba benni rudhetina ca tisa gue Tata Do Iyyabaaha, daba loni ugüena benni rule'enbi naha latti gue iyába nu tsee te gueni.

<sup>7</sup> Bittu dhi yie la lebi'iba, cumu Tata Do Iyyabaaha nna läganu dhana dhi yiena benniha. Lebi'i nna gua yubale, nu radaba benni, unnuhaba redína. <sup>8</sup> Aníaguaba lebi'i gansi unle nu lä anca tsee ridá lele, unnuhaba unna tsia nittle, nu runi nu anca tsee radi le Espíritu gue Tata Do Iyyabaaha nna Espírituhaba utee elha nabani gatta ttu dia lii gueni. <sup>9</sup> Larcala nna bittu saxxaquinri unri nu anca tsee, cumu gansi bittuba edíreri nna guasiaba sá dhíri nu tsee gue nu runri. <sup>10</sup> Denua nna atti aca un tseeri nna un tseeri leni nuxaba benni, ttiaca lola leni ca benni ria le Jesús un tseeri.

### Len ca tisa-ni riluxa rinne Pablo

<sup>11</sup> Gualgüiarga, aníli de xxeni anca ca letra runi cuinaga neti lo sitsi-ni qui idhelha guele.

<sup>12</sup> Iyába ca nu rdaca eya'an tseecana len benni, ca unnuha nua runcana duelha guele tsu'ule senni, nu runcana leni ca unbiyyu

Israel. Lacana runcana aná qui bittu usia le benni cana atti quixxi'acana: Cristuha nna chiba utixe nu dica quixari gue ca tulha gueri atti uttie lo ya crusinha.<sup>13</sup> Cumu ni ca nu yu'u senni, lä rudoacana tisa gue nu rá lo ca ley boca'ana Moisés. Lacana nna sunruba raca lecani tsu'ule senni, qui dhacana innácana dequi lebi'i uchúle saro'o yieti, delába senni, nu runcana leni ca unbiyuu Israel.<sup>14</sup> Neti nna niba saro'o bittu runia ulhopi lasia gue attu bixa, gan läba gue nu guate Jesucristu Benni bananie ri lo ya crusinha. Larcala de nu guate Benniha lo ya crusinha nna nu raca yies lo yu-ni nna attiba nu yattiba chi ancana len neti, anáguaba neti de nu guate Cristu lo ya crusinha attisiba nu yattiba anca lo nu anca gue yies lo yu-ni de bitturu runia na.<sup>15</sup> Cumu gansi chi babari len Jesucristu nna tsa lägabi daca si yu'u senni, o si bittu lhe. Nu daca nna ancana eyacari benni cubi lo Tata Do Iyyabaaha.<sup>16</sup> Iyába ca benni runi atti ria-ni nna Tata Do Iyyabaaha unie tse'ecabi xen su lee, satúa le Ben-na cabi lhe. Anáguaba unie len ca benni Israel gualíga anca guee.

<sup>17</sup> Bedaa nnanna bitturu raca lasia nuxaruha etennana elha richacha iqui quia, de ria lele nu rule'eni nu subi le, cumu neti nna chi se'e ca berusi cuerpu quia-ni gue nu ratea de requia rixxi'aya gue Jesús Benni bananie ri.

<sup>18</sup> Ca benni ria le Jesús, cuina Jesucristu Benni bananie ri edá lee aca lanie le. Amén.

# Sitsi udhelha Pablo atta se'e ca benni ria le Jesús lhe'e yiesi Éfeso

**1** Neti Pablo anca apóstol gue Jesucristuha. Tata Do Iyyabaaha boquinna iquie aca apóstol. Runia lo sitsi-ni ridhelha guele, lebi'i ca benni se'e riesi anca gue Tata Do Iyyabaaha, ca benni rudo tisa gue Jesucristuha se'e lhe'e yiesi Éfeso-na. <sup>2</sup>Cuina Tata gueri do iyyabaaha lenie Jesucristu Benni bananie ri-na aca lenque le, unque tse'ele lhatsiru lhe.

<sup>3</sup>Xxeni ra lee Tata gueri do iyyabaaha, tata gue Jesucristu Benni bananie ri-na. Lee nna chi uca lanie ri betee len ri'i iyába elha tsee anca gue iyyabaaha, de ancari benni baba len Cristuha. <sup>4</sup>Tata Do Iyyabaaha chi becuae ri qui acari benni gue Cristuha attili lani cue yies lo yu-ni, qui acari benni se'e riesi anca guee lhe benni chi anca nari lo Benniha lhe. <sup>5</sup>De ucanie gueri nna nuarca desdeba atti níali chi ga'ananie edíe ri qui eyacari xi'inie, de nu guate Jesucristuha. Lee nna aníaba bedaa lee aca. <sup>6</sup>Denuala nna satíaba ribequi xenri Tata Do Iyyabaaha, cumu anque Benni ratúa lee ri'i, lee nna chi uca lanie ri leni elha tsee gue iyyabaaha de chi ancari benni baba len xi'inie Jesucristu, Benni racanie guee. <sup>7</sup>Leni reni gue Benniha nna bodilá Tata Do Iyyabaaha ri, uxíe elha xen lasi gue ca tulha gueri lhe. Análi de xxeni anca elha tsee gue Tata Do Iyyabaaha. <sup>8</sup>De racaxxattanie gueri nna chi betee itúba elha rieni reasinri, chi udhalie iquiri qui sadú leri lhe. <sup>9</sup>Tata Do Iyyabaaha nna benie qui ttideenri nu chi ga'ananie aca nu bittu chi yu benni. Iyába unní nna unie-na leni Jesucristuha. <sup>10</sup>Gansi chi bisía sá nna acaba iyába nu chi ga'ananie aca. Tata Do Iyyabaaha nna ottupe iyánea ca nu se'e iyyabaaha lhe ca nu se'e yies lo yu-ni lhe qui innabia Cristuha cana.

<sup>11</sup>De ancari benni baba len Cristuha nna nuarca ralhari dhíri elha tsee utee Tata Do Iyyabaaha, cumu ttu ga'analani Ben-na gaxie ri. Iyába unní nna ancana nu chi ga'anani Tata Do Iyyabaaha aca. Lee nna runbe iyába nu rulaba lee anca tsee. <sup>12</sup>Ben-naba uca lee, qui ri'itu ca benni Israel ca nu primerba bexxen letu Cristuha nna cuequi xentu lee de anque benni ra xxeni lee. <sup>13</sup>Anáguaba lebi'i, atti bieninle ca tisa rixxi'a nu anca gualí-na, ca tisa tsee rixxi'a gue gaxasná rodilá Tata Do Iyyabaaha ri qui bittu tsia nittiri, lebi'i nna güiatteba lele Cristuha. Lania nna uxíttebale Espíritu gue Tata Do

Iyyabaaha, Benni chi begüee tisa idhelhe. Cumu Espíritu-na runie rule'e lo gualiba chi ancale benni gue Tata Do Iyyabaaha.<sup>14</sup> Espíritu bete Benniha len ri'i-na anque Benni runi rule'e lo gualiba dhíri elha tsee nu utee Tata Do Iyyabaaha len ri'i. Ri'i nna dhíri nua gansi chi bisia sa odile ri'i ttu tsaba ca benni chi anca guee, qui aníachu nna iyábari cuequi xenri Ben-na de anque Benni ra xxeni lee.

**Pablo rinnababi lo Tata Do Iyyabaaha  
qui aca lanie ca benni ria le Jesús**

<sup>15</sup> Larcala neti nna desdeba atti bina lebi'i nna chi ria lele Jesucristu, Benni bananie ri-na, raquinle gue iyába ca benni se'e riesi chi anca gue Tata Do Iyyabaaha lhe<sup>16</sup> tsaba bittu rudusia rutea xquixaru leni Tata Do Iyyabaaha guele, satíaba rinnaba lo Benña qui aca lenie le gansi chi rinnea leni Ben-na.<sup>17</sup> Rinnabaguaba lo Dios gue Jesucristu Benni bananie ri, Tata gueri ra xxeni lee do iyyabaaha qui utee Espíritu guee-na guele. Ben-na nna utee itú elha rieni reasinle, unie ttedaaatseenle gue nu anca guee lhe qui anáchu nna unbiatseele Ben-na.<sup>18</sup> Rinnabaguaba lo Tata Do Iyyabaaha idhalie iquile qui ttedeenle gue nu xxen lele dhíle, de unnuhala nna uxie le acale benni guee, anáguaba qui ttedeenle gue elha tsee xeni ute Benniha gue ca benni se'e riesi chi anca guee lhe.

<sup>19</sup> Rinnabaguaba loe qui unie ttedeenle gue gaxasná anca elha ra xxeni le guee, gue gasná rixuunie elha ra tsitsi le guee qui raca lanie ri, ri'i ca benni ria lerie. Elha ra xxen lee gue Ben-na nua bele'e loe leni itú iqui itú lee,<sup>20</sup> atti benie beacani Cristuha belhidhe Benniha lhe'e baa atta yu'u ca nu yatti-na. Nianna bodoe Benniha daca ladu ná derechu guee atta doe iyyabaaha.<sup>21</sup> Bodúe Benniha aque nu rinnabia xeni gue iyáxea ca nu rinnabia lhe ca nu ra xxeni lecani lhe ca nu ra tsitsi lecani lhe aque nu rinnabia gue iyába ca nu runi anca nu lo lhe ca nu runi mandadu lhe si se'ecana lo bea-na lhe si se'ecana yies lo yu lhe läga sunru nnanna rinnabia Ben-na, anáguaba innabie tiempu chi daba isía.<sup>22</sup> Iyáxeaba bete Tata Do Iyyabaaha las ná Cristuha qui innabie cana, bodúe Benniha aque nu innabia ca benni ria lecanie lhe. Attiba iqui ttu benni, unnuha rinnabia-na cuerpu gueni, anía anca Cristuha.<sup>23</sup> Ca benni ria lecabí Benniha nna ancacabi cuerpu gue Cristuha, Bennihaba runie qui racacabi benni anca ida'a suu attiba anca Ben-na. Labe runi qui raca iyáxeaba nu se'e ida'a suu.

## De Jesucristuhaba nna bodilá Tata Do Iyyabaaha ri

**2** Jesucristuhaba betee elha nabani guele atti ancale attiba nu yatti de güequile benle nu lä anca tsee, de ucale nu lä rudo tisa gue Tata Do Iyyabaaha lhe. <sup>2</sup> Anába benle, güequile benle nu lä anca tsee runi ca nu se'e yies lo yu-ni. Use'ebale benle nu rába nu xxegüi rinnabia ca be xxegüi requi lo be-na. Unnuonna rinnabia lhe'e lastoo ca nu lä rudo tisa gue Tata Do Iyyabaaha. <sup>3</sup> Anáguba beni iyábari ca tu ttuha, attiba beni ca unná, benbari nu ucaba leri, benbari nu lä anca tsee ridá le cuerpu gueri-ni lhe nu lä anca tsee belaba leri lhe. Denuala nna ralhabari dhíri elha disa xeni la tsu'u bia attiba adí benni. <sup>4</sup> Ttiaca Tata Do Iyyabaaha nna anque benni ratúaxxatta lee, tsitsiba racanie gueri. <sup>5</sup> Denuala nna atti ancari attiba nu yatti de se'eri runri nu bittu anca tsee, lee nna betee elha nabani gueri, itupa lenri Cristuhaba atti benie beaquin Benniha. Larcala nna de guatúaba le Tata Do Iyyabaaha le, nuarca bodile le. <sup>6</sup> Benniha nna benie beaquinri len Cristuhaba atti belhidhe Benniha lhe'e baa atta yu'u ca nu yatti-na, benie qui tse'eri len Benniha iyyabaaha lhe. <sup>7</sup> Anába uca lee benie qui ule'e loe elha ratúa lee xeni guee bedá lee betee len ri'i, gansi chi bisía tiempu nu chi daba isía, cumu de chi ancari benni gue Cristuhaba nuarca besi'inie ri. <sup>8</sup> Larcala nna de guatúárba le Tata Do Iyyabaaha le nuarca bodile le qui bittu tsia nittile, atti güia lele Ben-na. Läga lebi'i beni ttu bixa nu tsee qui lhále, Tata Do Iyyabaahaba dedaa lee bodile le cuentaba. <sup>9</sup> Läga de runri nu anca tsee rodilá Ben-na ri, qui bittu unle ttaba innále dequi de runbari nu anca tsee nuarca rodilá Ben-na ri. <sup>10</sup> Cumu Tata Do Iyyabaahaba benie ri, chiba ancanie unri nu anca tsee de ancari benni gue Jesucristuhaba, attiba chi ga'ananie unri desdeba ttuha.

### Jesucristuhaba benie ese'e tsee iyába benni leni Tata Do Iyyabaaha

<sup>11</sup> Denuala nna gualorexxa lele lebi'i ca benni bittu anca benni Israel, ca benni teni ca benni Israel-na láni: "Nu bittu reni senni nu labi ca unbiyuu Israel runcana, loesi nu runi senni leni ca unbiyuu Israel." Unnuha nna la labacana runi nua. <sup>12</sup> Lania nna läganu Cristuhaba du len lebi'i, läbiguuba babale lo yiesi gue ca benni Israel lhe. Bittuguuba yule gue ca tisa begüee Tata Do Iyyabaaha gue nu tsee unie lhe. Lebi'i nna suntteba aná se'ele yies lo yu-ni, tsaba lägabi te ttu bixa uxxen lele, nuttuguuba Tata Do

Iyyabaaha du len lebi'i lhe. <sup>13</sup>Ttiaca nnanna nna de chi ancale benni baba len Jesucristuha, lebi'i ca benni use'e idittu len Tata Do Iyyabaaha, Benniha nna chi benie bebígale gaxxa len lee de reni belali Jesucristuha atti uttie. <sup>14</sup>Cristuha benie beaca tsee len loesri. Lee benie beaca ca benni Israel-na len ca benni bittu anca benni Israel-na benni la ttuba lo yiesi. Utúe nu runna bittu raca uyú loesriha, cumu unnuua nua rilha'ana lhe'e loesri. <sup>15</sup>Atti uttie lo ya crusiha nna utúe ca ley boca'ana Moisés, ca nu rixxi'a bipaxa daa lo benni unna. Aníaba benie qui bose'e tsee ca benni bittu se'e tsee len loescaniha, delo chupa xxia benni nna ttu xxiaba benni cubi beonie. <sup>16</sup>Cristuha benie beaca tseeri len Tata Do Iyyabaaha atti uttie lo ya crusiha, lania benie beaca tsee len loesi irpa loba ca benni bittu se'e tsee len loescaniha, qui beacari attiba ttuba.

<sup>17</sup>Cristuha bite utixxi'anie iyába benni ca tisa guee-na. Ca tisa gue Ben-na runi rese'e tseeri, utixxi'e ca tisa-na leni ca benni Israel lhe leni ca benni dittu lhe. <sup>18</sup>De Jesucristuharba nna si ancari benni Israel o si bittu lhe iyábari chi yali lo neda gueri ibigari lo Tata Do Iyyabaaha. Cumu la ttuba Espíritu gue Benniha yu'u lhe'e lastoo iyábari. <sup>19</sup>Larcala nna lebi'i nna lärgaga ancale benni dittu bittu se'e lo yiesi gueni, chiba ancale benni baba lo yiesi gue ca benni se'e riesi anca gue Tata Do Iyyabaaha, benni se'e lisi Bennihaba chi ancale nnanna. <sup>20</sup>Lebi'i ancale attiba ttu yo'o bicoa iqui ttu cimientu ca benni uca profetaha lencabi ca bi'ini bedheti ca tisa bele'e Jesús ancacabi attiba cimientu gue yo'oha. Jesucristuha nna anque attiba iyya nu ribe rideñ tsitsina yo'oha, <sup>21</sup>De Jesucristuhaba nna tseeba dia ricoa yo'oha. Unnuha nna diabana radhana, axta liba e'eyuna acana ttu yotu anca le'a gue Benni bananie ri-na. <sup>22</sup>Anágua lebi'i ca benni bittu anca benni Israel, de Jesucristuhaba nna chi ancale benni baba leni ca benni Israel qui acale attiba lisi Tata Do Iyyabaaha atta do Espíritu gue Benniha.

**3** Lo ni'a gue unnuha bunni nna neti Pablo tea lisiyya, de requia rixxi'atia le ca tisa gue Jesucristuha, lebi'i, ca benni bittu anca benni Israel. <sup>2</sup>Neti racatia nna lebi'i nna chiba binale, Tata Do Iyyabaaha nna de anque benni ratúa lee nuarca boca'ane sina-ni las náya, qui anáchu quixi'atia le ca tisa guee-ni. <sup>3</sup>Tata Do Iyyabaaha benie guadú lasia gue nu chi ga'ananie unie, attiba chi rixxi'atia le saro'o lo sitsi-ni. Unní nua bittu chi yuri ca tu ttuha. <sup>4</sup>Gansi chi belabale lo sitsi-ni nna guate daatteinle, neti nna chi yua gue nu

chi ga'anani Cristuha unie, nu bittu chi yu benni ca tu ttuha. <sup>5</sup> Ca tu atti nía nna läga beni Tata Do Iyyabaaha ttedaani ca benni use'e lania gue nu chi ga'ananie unie, ttiaca nnanna nna leni Espíritu guee-na chi benie ttedaani ca apóstol guee-na lhe ca profeta guee-na lhe gue nu chi ga'ananie unie. <sup>6</sup> Nu bittu utedaani ca benni nna ancana: Ca benni bittu anca benni Israel-na, de tsia lecani Jesucristuha lhe de acacana benni gue Ben-na lhe dhíguabacana nu ralha ca benni Israel-na dhicana, acaguabacana la ttuba benni len ca bi'in-na lhe. De Jesucristuha nna dhíguabacana nu chi begüee Tata Do Iyyabaaha tisa utee len ca benni Israel-na lhe.

<sup>7</sup> Neti nna lägabi elha ralha aca benni quixxi'a ca tisa gue Jesucristuha, ttiaca Tata Do Iyyabaaha nna chi anque benni ratúa lee, lee nna benne ttu elha tsee quia, delába betee sina-ni len neti. Aná nna bele'e loe anque Benni ra xxeni leni. <sup>8</sup> Delo iyá ca benni se'e riesi anca gue Tata Do Iyyabaaha nna netiba anca nu xubana bittu daca, ttiaca lee nna betee elha tsee-ni len neti qui quixxi'atia ca benni bittu anca benni Israel ca tisa guee-ni, rixxi'atia cana gue nu ga'ana tsee bittu lhuxa te gueri len Cristuha. <sup>9</sup> Boca'ane len neti quixxi'atia iyácea benni gue nu chi ga'ananie aca. Tata Do Iyyabaaha, Benni beni iyácea nu se'e bittu benie ttedaani benni gue unnuha ca tu atti nía, <sup>10</sup> qui anáchu nnanna nna ca benni ria le ca tisa gue Jesucristuha nna runcabi rule'e lo elha rieni ra xxeni leni te gue Tata Do Iyyabaaha leni ca nu rinnabia lhe leni ca nu ra xeni leni lhe se'e lo bea-na. <sup>11</sup> Atti deobali cue yies lo yu-ni chi ga'anani Tata Do Iyyabaaha unie unní, leni Jesucristu Benni bananie ri-na benie nu chi ga'ananie unie. <sup>12</sup> De ria leri Jesucristuha, nuarca de ben-narba nna gua yali lo neda gueri qui ribigari lo Tata Do Iyyabaaha. <sup>13</sup> Larcala nna rinnaba lenle, bittu aquinle eyadi gále lo neda gue Tata Do Iyyabaaha de ratea ruyúa elha disa lo ni'a guele, cumu unná ancana ttu nu tsee len lebi'i.

<sup>14</sup> Denuala nna rudú xibia lo Tata Do Iyyabaaha, Tata gue Jesucristu, Benni bananie ri. <sup>15</sup> Lee benie iyáxeaba nu se'e iyyabaaha lhe yies lo yu-ni lhe. <sup>16</sup> Rinnaba lo Tata Do Iyyabaaha qui unie cuequi tsitsi Espíritu guee-na lele leni elha ra xxeni lee ga'ana tsee guee na. <sup>17</sup> Rinnabaguaba loe unie dho Cristuha lhe'e lastoole de ria lele Ben-na, anáguuba qui acale benni se'e tsitsi racaruni gue loesni lhe <sup>18</sup> qui acale benni dhale sadú lele lenle iyába ca benni se'e riesi chi anca gue Tata Do Iyyabaaha, Cristuha nna itú iqui

itú le Benniha racanie guele.<sup>19</sup> Rinnabaguaba lo Ben-na qui unie ttedeenle gaxasná anca elha si'i le gue Ben-na. Elha si'i le gue Ben-na anque ttu nu xxeni, ttu nu bittu ridári ttedeenri gaxasná anque. Qui gansi chi udále ttedeenle gue elha si'i le gue Ben-na nna lania nna acale nu rapa itúba nu anca Ben-na.

<sup>20</sup> Tata Do Iyyabaaha anque Benni ra xxeni lee. Guacaba guee unie ttu nu xxenirla attichula nu rinnabari o nu rulaba leri. Runie unná leni elha ra xxeni lee guee runi sina lhi'u lhe'e lastoori.<sup>21</sup> De ancari benni gue Jesucristuha, iyábari ca benni ria leri Ben-na, ttu dia lii cuequi xenri Tata Do Iyyabaaha, nnanna lhe ca sá chi daba lhe. Amén.

### Ttuba anca ca benni chi baba len Cristuha

**4** Neti Pablo bi'ini te lisiyya lo ni'a gue de requia rixxi'aya ca tisa gue Jesucristu Benni bananie ri, rinnaba lenle gualtse'e gualuni nu anca tsee de chi ancale benni biaxi qui acale gue Tata Do Iyyabaaha.<sup>2</sup> Bittu unle gue nu ra xxeni leni, gualaca nu du tsee leni, nu du pasensi leni lhe leni si'i le gualdhí elha xen lasi gue loesle.<sup>3</sup> Espíritu gue Tata Do Iyyabaaha aca lanie le qui ttuba udú lele, gualuni duelha qui bittu ila'a lhe'e loesle. Análiba nna tse'e tsee len loesi iyábale.<sup>4</sup> Cumu ttuba benni anca iyábari, la ttuguaba Espíritu gue Tata Do Iyyabaaha do lhe'e lastoori lhe iyábari attiba chi biexiri acari benni gue Tata Do Iyyabaaha, la ttuguaba nu xen leri dhíri lhe.<sup>5</sup> Ttuba Benni bananie ri lhe ttuba Jesucristuha ria le iyábari lhe ttu lorguaba boca'ana Benniha radi iyábari inda lhe.<sup>6</sup> Tturba Tata Do Iyyabaaha do, Benna anque Tata gue iyábari. Lee anque Benni rinnabia iyánea, rixuunie iyábari qui runri nu raca lee unri lhe doe lhe'e lastoo iyábari lhe.

<sup>7</sup> Ttiaca cua ttu tturi chi uxíri elha tsee, cua bedába le Cristuha betee len ri'i, qui ixuuri lo sina guee. <sup>8</sup> Larcala nna rá lo ca sitsi gue Tata Do Iyyabaaha atta rixxi'a gue nu beni Cristuha:

Atti beopie güetsaa nna dechebe ca nu bedaxxue,

betee elha tsee gue ca benni lhe qui ixuucana lo sina guee.<sup>a</sup>

<sup>9</sup> ¿Bi dia-ni nu rá: “Beopie güetsaa”? Diabani unná innána primerba guadi Benniha bite axta lireeha gue yies lo yu-ni.<sup>10</sup> Jesús, Benni guadi bita yies lo yu-ni nna. Benniha guaba Ben-na beopie guadoe axta güetsaa gue iyyabaaha qui unie ilá bi'acanaba lee

---

<sup>a</sup> 4:8 Salmo 68:18

anque Benni ra xxeni leni.<sup>11</sup> Laguabe rose'e ca benni runi sina guee lhe ttulhecabi ancacabi apóstol, a ttu lhecabi nna ancacabi profeta, adícabi nna ancacabi benni requi riguixxi'a ca tisa guee, a ttu lhecabi nna ancacabi ca bi'in-ni ruyú ca benni ria lecabi guee rule'eguabaquinbi ca benni ca tisa guee-na.<sup>12</sup> Iyába ca bi'in-ni nna chi beni Tata Do Iyyabaaha cabi benni chi yu gue nu uncabi lo sina guee, qui anáchu use'etsitsicabi ca benni ria le Jesucristuha ca bi'ini anca attiba cuerpu gue Ben-na.<sup>13</sup> Análiba nna dha iyári e'eyuri acari attiba ttuba benni de ria leri Cristuha, qui ttedeenri gue iyá nu anca gue Xi'ini Tata Do Iyyabaaha lhe. Anía liba nna acari benni se'e tsitsi lo neda guee, axta liba isínri acari atti anca Cristuha.<sup>14</sup> Lania nna bitturu acari attiba unto nu riatteba leni gue bixaba rácan na. De unnuha nna diaru lencan na daca na lhe daru lencan na daca ni lhe leni attu elha rieni subi rule'equinna na, lana nna rixúyiettebana ria leni gue nu bittu anca gualí, nu nnelaba rotsi'inu le ca nu güen lasi-na.<sup>15</sup> Larcala nna ri'i nna nu unlari nna quixxi'alini ca benni gue nu anca gualí leni si'i le. Ttuttu sá diari runri nu anca tsee axta qui e'eyuri acari attiba Cristuha, Benniha anque nu lo gue iyá ca nu ria lecanie, attiba iqui ttu benni.<sup>16</sup> Ri'i ancari attiba cuerpu gue Cristuha. Lee runie se'eri rixuuri atta dicta ixuuri. Ttutturi nna run yuda loesri, unníba daa lori unri, ri'i ca benni riaga leni Benniha. Anía nna iyábari diari riaru leri Benniha, rise'etsitsiruri lo neda gue Ben-na lhe de raquin gue loesri.

### **Lebi'i eyacale attiba ttu benni cubi**

<sup>17</sup> De anca benni gue Jesucristu, Benni bananie neti, nuarcala nna rinnaba len lebi'i: Bitturu tse'ele unle nu lä anca tsee runi ca benni bittu ria lecani Tata Do Iyyabaaha, cumu ca unná nna se'ebacana runcana nu lä anca tsee rulaba lecani.<sup>18</sup> Tsaba chulhacani ca unná leni nu rulaba lecani. Lägabi elha nabani rute Tata Do Iyyabaaha te guecani, cumu run tsitsi lastoocani lä ria lecani Ben-na de ancacana nu lä caa xieni gueni.<sup>19</sup> Lärgabirua rettucani ca unná, tsaba chi bedona lecani runcana nu lä anca tsee, ruxunnibacana diacana runcana iyáloba nu satsa.<sup>20</sup> Ttiaca lebi'i nna läga aná bidetile gue Cristuha,<sup>21</sup> gansi gualíga chi bieninle gue Benniha lhe chi bele'equinna le nu anca gualí lhe delába ca tisa rixxi'a gue Benniha,<sup>22</sup> gualcua nu lä anca tsee benle atti bittu anca bienle Tata Do Iyyabaaha. Bitturu unle nu satsa lhe nu lä anca

tsee ridá lele unle-na lhe.<sup>23</sup> Gualgüelha Tata Do Iyyabaaha otsie elha rieni guele-na.<sup>24</sup> Gualotsia nu runle qui eyacale ttu benni cubi, lebi'i nna beni Tata Do Iyyabaaha le attiba anque, qui acale benni runi nu anca lhatsiru lhe nu runi nu dica ixuu lhe nu chi se'e riesi lhe'e nu lä anca tsee lhe.

<sup>25</sup> Larcala nna bitturu un lele, suntteba nu anca gualí gualinne len ca benni, cumu iyábari chi ancari ttuba cuerpu baba leni Cristuha.

<sup>26</sup> Gansi ise'enle nna bittu ixegüile unle nu lä anca tsee,<sup>a</sup> bittuguaba ise'enle etú sába ni chadiba ubisa lhe.<sup>27</sup> Bittu dhielhale dhiyie nu xxegüiha le.

<sup>28</sup> Nu runi ubana nna bitturu lhanana, nu unlana nna cuenna ttu sina lhatsiru len ni'a náni qui aníachu nna te nu utena len ca benni bittu te guecani.

<sup>29</sup> Bittu innele tisa satsa, suna tisa dica ixuuba gualnne qui ixuuna use'e tsitsina ca benni, anáchu nna odú tseele le ca benni iyienini nu innele. <sup>30</sup> Bittu unle dhu si'i le Espíritu gue Tata Do Iyyabaaha, cumu Espíritu-na runie rule'e lo gualíba chi ancale benni gue Tata Do Iyyabaaha, axta liba gansi chi bisía sá odilá Ben-na ri ttu tsaba.

<sup>31</sup> Gualcua iyá nu runi ancale nu si'irulhaba rise'ele, nu xalhaba rise'enle-na lhe nu cuentaba run disale-na lhe nu rinne dile-na lhe nu xalhaba runle xiyya gue benni lhe gualcúa iyába nu bittu anca tsee lhe. <sup>32</sup> Nu unlale nna acale benni si'i le du tsee leni leni iyá benni, gualdhí elha xen lasi gue loesle, attiba Tata Do Iyyabaaha uxíe elha xen lasi gueri de nu guate Cristuha.

### Gualuni atti runi benni chi se'e lhe'e xieni

**5** Lebi'i nna chi ancale xi'ini Tata Do Iyyabaaha ca nu racaxxattanie guele, de nua nna gualuni atti runi Benniha.  
<sup>2</sup> Gualtse'e gualaquin gue iyába benni attiba ucani Jesús gueri. Benniha nna ucaba lee bete elha nabani guee qui uttie lo ni'a gueri. Lee nna uque attiba ttu úna nu rure xixxi lo Tata Do Iyyabaaha.  
<sup>3</sup> Lebi'i nna gualuni atti runi benni se'e riesi chi anca gue Tata Do Iyyabaaha, qui bittu dha tisa guele ancale nu rutsá ro'oni nutti nuttiba, niguaba lä innácana dequi lebi'i runle iyáloba nu satsa lhe o si innácana dequi ancale nu ridáxxatta leni gatta gueni lhe.  
<sup>4</sup> Bittuguaba innele tisa satsa lhe niguaba tisa lä diquixuu lhe

<sup>a</sup> 4:26 Salmo 4:4

bittuguaba innele tisa güitta nu rinne tisa satsa lhe cumu läga raxxínainnele aná. Delába unnu a nna gualugüie Tata Do Iyyabaaha xquixarue.<sup>5</sup> Cumu lebi'i nna guayúbale, ni ttu ca nu requi manni-na lhe ni ttu ca nu runi nu satsa-na lhe bittu ralhacana dhicana elha tsee dhi ca benni rinnabia Cristuha lhe Tata Do Iyyabaaha lhe. Niguaba ca benni ridá xxatta lecani gatta guecani lhe cumu unnaba anca diosi guecani.<sup>6</sup> Tsa bittu ugüelhale dhi yiecanale leni ca tisa lä dica ixuu, cumu lo ni'a gue unná nna utee Tata Do Iyyabaaha elha disa gue ca nu lä rudo tisa guee.<sup>7</sup> Larcala nna bittu iselale unle nu run ca unná.<sup>8</sup> Cumu atti bittu chi benbiale Cristuha nna attiba nu requi lhe'e chulhaba ancale de güequile benle nu satsa, ttaca nnanna nna de chi ancale benni gue Jesucristuha nna chiba requile lhe'e xieni. Larcala nna gualuni nu anca tsee de chi ancale benni se'e lhe'e xieni.<sup>9</sup> Cumu ca benni requi lhe'e xieni nna ancacana benni ratúa leni adí benni, nu runi nu anca tsee lhe nu rinne nu anca gualí lhe.<sup>10</sup> Gualtsatsa ni'a qui ttedeenle gaxasná anca nu radi le Benni bananie ri-na.<sup>11</sup> Bittu igutsale unle nu satsa run ca nu requi lhe'e chulha-na, delába unnuha nna gualcuequi la nu runicana lolia qui una ca benni, satsaba anca nu runi ca unná.<sup>12</sup> Cumu rettulinri rinneri gue nu run ca nu bittu rudo tisa-na atta gatsi.<sup>13</sup> Ttiaca iyába nu raca atta gatsiha runa benni, gansi chi ribequi xianiha nua lolia.<sup>14</sup> Denuala nna rá ca benni:

Bebani lu nu anca attiba nu ti'edhi,  
guadha lagüi gue ca benni anca attiba nu yatti-na,  
Cristuha nna gudanbe guelu.

<sup>15</sup> Larcala nna tsitsi gualudo cuidadu gue gaxasná se'ele. Bittu tse'ele unle attiba runi nu bittu elha rieni gueni te, gualtse'e gualuni atti runi benni te elha rieni gueni.<sup>16</sup> Gualuni duelha gualuni nu anca tsee, nnanna gua racaru, cumu ca sá se'eri nnanna nna lärga anca ca unní sá tsee.<sup>17</sup> Larcala nna gualiyienini bittu acale nu dití, gualuni qui ttedeenle bi nua raca le Benni bananie ri-na unle.<sup>18</sup> Bittu i'iyale nu unna dhusinle, cumu unnuha nna unna unle bixaba nu bittu anca tsee. Lebi'i nna gualugüelha Espíritu gue Tata Do Iyyabaaha tsu'e itú lhi'u lhe'e lastoole qui innabie le.<sup>19</sup> Gualuttipa le loesle len ca salmo-na, gualulha gue Tata Do Iyyabaaha lhe. Itú iqui itú lele gualulha gue Jesús, Benni bananie ri-na,<sup>20</sup> Satía gualugüie Tata Do Iyyabaaha Benni anque Tata guerixquixaru gue iyátte, de nu beni Jesucristu Benni bananie ri-na.

<sup>21</sup> De te elha rasi guele lo Cristuha nna gualudo tisa gue loesle. <sup>22</sup> Lebi'i, ca benni nuila, udoles tisa gue ca unbiyuu guele-na attiba rudole tisa gue Jesús Benni bananie ri-na. <sup>23</sup> Cumu ca unbiyuu anca latsela ca nuila-na ancacana nu lo gue ca nuila anca latselacani, attiba Cristuha anque Benni lo gue ca benni ria lecanie. Lee anque attiba iqui ca benni chi ria lecanie, ca bi'in-na nna ancacabi attiba cuerpu gue Ben-na, laguabe rodile ca bi'in-na lhe. <sup>24</sup> Larcala nna attiba ca benni ria lecabri Cristuha rudocabi tisa gue Ben-na, aníaguaba un ca nuila-na, udocana tisa gue iyá nu inná ca unbiyuu guequinna. <sup>25</sup> Lebi'i nna ca unbiyuu, aquinle gue ca nuila guele-na, attiba racani Cristuha gue ca benni ria lecanie, de unnuha nna nuarca bete elha nabani guee qui uttie cuenta gueri, <sup>26</sup> aníaba benie qui ucari benni se'e riesi anca guee, lee nna bixunie ca tisa guee-na qui beonie ri benni anca nari lo Tata Do Iyyabaaha, unnuha nua rule'e lori atti radiri inda, <sup>27</sup> qui gansi chi benie utsá duri loe nna ancari benni ru'uni xieni ga'ana tsee gueni, nu bittu runi nu lä anca tsee lhe nu bittu tulha gueni te lhe nu tsa chi anca nari lhe cumu ri'i nna ancari benni se'e riesi anca guee, nu runi ttaga'a nu anca tsee. <sup>28</sup> Aníaguaba nua lebi'i ca unbiyuu, aquinle gue ca nuila guele-na attiba raquinle gue cuerpu guele-na. Nu raquin gue la labana nna racaguabin nua gue nuila gueniha. <sup>29</sup> Cumu läganu benni te bittu raca uyúna cuerpu gueni, delába nua nna rotseelana lhe ruyútseelana cuerpu gueni lhe aníaguaba unná runi Cristuha, lee nna ruyú tsee ca benni guee, <sup>30</sup> cumu ri'i ancari benni selarie, attiba sitta gue cuerpu guee lhe bela gue cuerpu guee lhe. <sup>31</sup> "Denua nna unbiyuuh nna udhába iqui nua tata gueniha lhe nan gueniha lhe qui utsá náni leni nuila aca latselani, lania nna attiba ttuba benni eyaca ca unnuha."<sup>a</sup> <sup>32</sup> Xxeniba anca nu diale ca tisa rixxi'aya-ni, läga ritedaatseenri gueni, delába nu rixxi'a gue Cristuha lenie ca benni chi ria lecanie. <sup>33</sup> Larcala nna lebi'i ca unbiyuu, coa ttu ttule aquinle gue ca nuila guele-na attiba raquinle gue la lebi'iba. Lebi'i nna ca nuila, gualgapa respeto ca unbiyuu guele-na.

### Gaxasná dica udú le ca tata lhe ca xi'incani lhe

**6** Lebi'i ca benni se'e tata nan gueni, de chi ancale benni gue Jesucristuha nna gualudo tisa gue ca tata guele-na lhe gue ca

<sup>a</sup> 5:31 Génesis 2:24

nan guele-na lhe cumu unní anca nu dica unle. <sup>2</sup>Lo ca ley gue Tata Do Iyyabaaha nna rá: “Gapalu respeto tata guelha lhe nan guelha lhe cumu ley-ni anque benni che elha tsee guelu, <sup>3</sup>qui anáchu salía tseenlu lhe itienlu lhe yies lo yu-ni.”<sup>a</sup>

<sup>4</sup>Lebi'i nna ca tata, bittu utse'enle ca xi'inle-na sinuqui gualule'elaquinna lhe gualunla qui udheticana lhe nu raca le Benni bananie ri-na uncana.

<sup>5</sup>Lebi'i nna ca benni tto'o lo sina, len respeto lhe len elha rasi lhe gualdo tisa gue ca nu banquinna le yies lo yu-ni, itú iqui itú lele gualuni nu racana attisiba sina gue Jesucristuhaba nua runle.

<sup>6</sup>Bittu suntteba gansi chi se'e ca nu banquinna le-na jertteba ugüe lele qui eya'an tseele lencana. Lebi'i ancale nu tto'o lo sina gue Jesucristuhaba, itú iqui itú lele gualuni nu raca le Tata Do Iyyabaaha.

<sup>7</sup>Itú iqui itú lele gualcuen sina, attiba ttu nu tto'o lo sina gue Benni bananie ri-na, bittu attiba ttu nu tto'o lo sina que ca benni se'e yies lo yu-ni. <sup>8</sup>Cumu guayuxebale Benni bananie ri-na gutebe ttu nu tsee gue ttu tturi gue coa ancaba nu tsee benri, si ancari benni tto'o lo sina, o si bittu ancari benni tto'o lo sina.

<sup>9</sup>Anáguaba lebi'i ca benni beaca xxana ca sina-na, lhatsiru gualuni len ca nu tto'o lo sina guele-na, bitturu cuentaba udhaca disale cana, gualorexxa lele, lebi'i lhe lacana lhe la ttuba Benni do iyyabaaha anque Benni bananie le. Ttuba daca iyábari lo Benniha.

### Gualtse'e tsitsi lo neda gue Tata Do Iyyabaaha

<sup>10</sup>Qui ulhuxa nu rpea le-ni nna tsitsi guatse'e lo neda gue Benni bananie ri-na. Tsitsi gualudaxxu elha ra xxen le gue Ben-na.

<sup>11</sup>Gualuni atti runi ttu soldado duna nucuna ca xoni anca leni iyya qui bittu acana güee atti itilhana, denna iyába nu rixxuina lhe aníaguaba lebi'i gualudaxxu itú nu ra tsitsi lee gue Tata Do Iyyabaaha, qui anáchu dhale tsee'e tsitsi le lo nu lä anca tsee re le nu xxegüiha udhacan le. <sup>12</sup>Cumu ri'i nna läga len ca benni se'e yies lo yu-ni ritilhari, len ca nu lo gue ca be xxegüi requi lo bea-na liba unná ritilhari, len ca nu rinnabia gue ca be xxegüi lhe ca nu xxegüi runi mandadu atta raca nu lä anca tsee anca gue yies lo yu-ni. <sup>13</sup>Larcala nna gualudaxxu itú elha ra xxeni le gue Tata Do Iyyabaaha, qui dhale uchíale lo nu satele gansi chi bisía ca sá uyú

---

<sup>a</sup> 6:2-3 Éxodo 20:12

ca benni elha disa, dequide chi udále lo nu sateleha nna lebi'i nna chi tse'e tsitsirle.

<sup>14</sup>Tsitsi gualtse'e, suntteba nu anca gualí gualnne, attiba ttu soldado chi du tseena di sinchu lhe'eni qui tsiana itilhana. Gualtse'e gualuni nu anca tsee, attiba ttu soldado chi du tseena ta iyya lo cu'ebani qui bittu acana güee gansi chi bitilhana. <sup>15</sup>Gualese'e tsee qui iríale tsiale satixxi'ale ca tisa gue Jesucristuha, ca tisa runi qui rese'e tseeri len Tata Do Iyyabaaha. <sup>16</sup>Tsitsi gualtsia lele Tata Do Iyyabaaha qui dhale lhále lo nu re lee nu xxegüiha udhacanle, cumu unná ancana attiba ttu escudo che ttu soldado nu bittu ugüelhana aca nua güe. <sup>17</sup>Attiba ruxxen le ttu soldado bittubi dhacana de yu'u iquini cascu gueniha, aníaguaba lebi'i gualuxxen tsitsi lele godilába Jesucristuha le qui bittu tsia nittile. Gansi chi run nu xxegüiha dhiyienle nna gualixuuni ca tisa gue Tata Do Iyyabaaha qui ecabile gueni, cumu ca tisa gue Ben-na ancaque attiba espada ruta Espírituha len lebi'i. <sup>18</sup>Larcala nna satía gualtse'e gualnne len Tata Do Iyyabaaha, Espíritu gue Ben-na aca lanie le atti se'e ditile rinnabale lo Ben-na nu raca lele, gue nu reasa lhe. Satía gualtse'e tenná, bittu saxxaquinle, gualnnaba aca lani Tata Do Iyyabaaha ca benni se'e riesi chi anca gue Ben-na.

<sup>19</sup>Gualnnabaguaba len Tata Do Iyyabaaha aca lanie neti lhe qui utee ca tisa dica innea, qui eyaxtia quixxi'aya ca tisa bittu chi yu benni gueni lhe delába ca tisa rixxi'a gue Jesucristuha. <sup>20</sup>Cumu Tata Do Iyyabaahaba udhele neti qui aca benni quixxi'a ca tisa guee-na, lo ni'a gue unnuha nna tea lisiyaa. Gualnnaba len Benniha aca lanie neti qui bittu gastia quixxi'aya ca tisa guee-na, attiba daa loa unia.

### Pablo rechú tisabi ca benni se'e lhe'e yiesi Éfeso

<sup>21</sup>Tíquico bi'ini ria le Jesús attiba ri'i, benni rudo tisa rixuu lo sina gue Tata Do Iyyabaaba, labi quixxi'enbi le gue iyába nu runia lhe iyába nu ratea lhe. <sup>22</sup>Denuala nna ridhelha bi atta se'ele-na qui quixxi'enbi le gue gaxasná se'etu, qui odú ittabi lele lhe. <sup>23</sup>Tata gueri do iyyabaaha lenie Jesucristu Benni bananie ri-na unque tse'ele xen su lee, unque aquin gue loesle lhe tsia tsitsiru lele guee lhe. <sup>24</sup>Laque aca lenque iyába ca benni racani ttu dia liiba gue Jesucristu Benni bananie ri-na. Amén.

# **Sitsi udhelha Pablo atta se'e ca benni ria le Jesús lhe'e yiesi Filipos**

**1** Neti Pablo lenia Timoteo ancatu benni rixuutu lo sina gue Jesús Benni anque Cristu. Runtu lo sitsi-ni ridhelhatu gue iyábale ca benni chi anca gue Tata Do Iyyabaaha babale len Jesucristu se'e lhe'e yiesi Filipos, len ca benni anca nu lo guele-na lhe ca benni bese'e qui uncabi le yuda lhe. <sup>2</sup>Tata gueri do iyyabaaha lenie Jesucristu Benni bananie ri-na edá leque aca lenque le, uteque elha xen lasi lenle lhe.

## **Pablo rutebi xquixaru len Tata Do Iyyabaaha gue ca benni ria le Jesús se'e Filipos**

<sup>3</sup>Satíaba gansi chi rexxa lasia le nna rutea xquixaru len Tata Do Iyyabaaha guele. <sup>4</sup>Satíaba gansi chi rinne lanie nna rinnaba aca lanie iyábale. Neti nna re'oba lasia runia aná, <sup>5</sup>cumu lebi'i nna desdeba atti bieninle ca tisa gue Jesús axtaba nnanna runle neti yuda qui runa adí benni ca tisa gue Benna. <sup>6</sup>Neti nna xen lasia, Tata Do Iyyabaaha Benni u duloe runie nu tsee lhi'u lhe'e lastoole, usiguibe unie unná ida'a su axta atti esía Jesús Benni anque Cristu. <sup>7</sup>Gualíbatia tseeba anca rulaba lasia gue iyábale aná de satíaba yu'ule lhe'e lastooa, cumu iyábale redí baale len neti elha tsee rute Tata Do Iyyabaaha gueri, atti tea lisiyya lhe atti rutsá dua lo ca uxtisi qui runia exuu ca tisa gue Jesús, rixxi'atia cana ca tisa gue Benna ancaque nu gualí. <sup>8</sup>Guayuxeaba Tata Do Iyyabaaha, attiba racani Jesús Benni anque Cristu guele, aníaba raca tsitsiatia guele. <sup>9</sup>Rinnaba lo Tata Do Iyyabaaha unie aca chiattin gue loesle adí, unie sadíru lele gue nu anca guee lhe gattaru elha rieni guele lhe <sup>10</sup>qui satíaba aca guele ucuele nu anca tsee. Anía liba nna acale benni nari nu bitturu runi nu lä anca tsee qui bittu bi te bixa lo ni'a gue itisale gansi chi besía Cristu. <sup>11</sup>Jesucristuha unie acale nu tsapaba uni nu anca tsee, qui cuequi xxen ca benni Tata Do Iyyabaaha, innácana Ben-na anque Benni ra xxeni lee.

## **Pablo rábi: Cristuhaba rudo lasia ixúa loe laca do bania**

<sup>12</sup>Lebi'i, ca benni ria le Jesús, raca lasia unale, iyába nu chi guatea nna ancana nu rixuu qui ria le adí benni ca tisa gue Jesús.

<sup>13</sup>Larcala nna iyába ca soldado se'e ro'o yo'o lagüii leni adírba benni lhe chi yucana, neti nna de requiba rixxi'aya gue Cristu, nuarca tea lisiyya. <sup>14</sup>Atti biyuu ca benni ria le Jesús tea lisiyya, ixerucabi de xen lecabí Benni bananie ri-na chi bebequi rearu lecabí bitturu rasquinbi rixxi'acabi ca tisa gue Tata Do Iyyabaaha.

<sup>15</sup>Gualíba ttulhe benni nna requicana rixxi'acana ca tisa gue Cristu de rutía diba lecani neti lhe de runbacana ichúcana loa lhe, adí benni nna de tseebaquinbi riguixxi'acabi ca tisa-na. <sup>16</sup>Ca nu rutía di lecani neti nna läga de elha tseequinna rixxi'acana ca tisa gue Tata Do Iyyabaaha; runbacana aná qui richúcana loa, racaquinna de runcana aná nna uyúrua adí elha disa lhe'e lisiyya-ni. <sup>17</sup>Ttiaca adí ca benni nna de racabaquinbi quia nuarca rixxi'acabi ca tisa-na cumu yubacabi Benni bananie ri-naba bodúe neti qui edí edenia ca tisa guee-na. <sup>18</sup>Ttiaca lägabi duna. Si de tseequinna o si de bittu lhe labíaba gue Cristuhaba rixxi'acana. Unná nna runna re'o lasia.

Chi eyo'orla lasia adí, <sup>19</sup>cumu neti yua nna de rinnabale lo Tata Do Iyyabaaha aca lanie neti, de raca leni Espíritu gue Jesús Benni anque Cristu neti lhe larcala iyába unní nna uni lháya lhe'e lisiyya-ni. <sup>20</sup>Nu ridá lasia lhe xen lasia aca lhe bittu isía sá ettútia gue nu runia. Sinuqui attiba satíaba runia, usiguiba nnanna itú iqui itú lasia ule'e loa len nu runia, Cristuha anque Benni ra xxeni lee, sila gattia o sila dho banruha lhe. <sup>21</sup>Cumu neti nna laca do bania nna Cristuhaba rudo lasia ixuua lo sina guee, gansi gattia nna salía tseerlana neti. <sup>22</sup>Ttiaca laca do bania nna rixuurua rixxi'aya gue Jesús Benni anque Cristu qui tsia le adíru benni ca tisa gue Ben-na. Larcala nna bittu yua bi anca tseeru len neti. <sup>23</sup>Tsitsiba anca len neti ucueea delo chupa ca unní: ttu rita racatia nna güenrula anca gattia qui eyya'aya atta do Cristu, cumu unní ancana ttu nu tseeru len neti. <sup>24</sup>Attu nna de lebi'i nna racarla duelha dho banruha yies lo yu-ni. <sup>25</sup>Neti nna chiba uca xen lasia, yuba nna eya'anruba len lebi'i qui unia le yuda usiguile tse'e tsitsi chiattile lo neda gue Tata Do Iyyabaaha, qui eyo'o chiatti lele de ria lele Jesús lhe. <sup>26</sup>Larcala nna güitarba atta se'ele-na attu libe. Lania nna eyo'oru lele de ilenle nu runi Jesús Benni anque Cristu len neti.

<sup>27</sup>Suntteba nu raca lasia unle nna: gualtse'e gualuni atti raxxína rá ca tisa gue Cristuha. Aná nna si ita atta se'ele-na lhe si requia idittu lhe raca lasia iyientia inná benni, lebi'i nna gua se'e tsitsibale,

ttuba anca nu rulaba lele lhe. Iyábale ttuba rudo duelhale runle qui tsia le adí benni ca tisa gue Jesús.<sup>28</sup> Tsa bittu gasinle lo ca nu lä raca uyúcan le-na. Nu run ca unná ancana nu rule'e lo lacana nna dia nittibacana. Unnágua ba ancana nu rule'e lo lebi'i nna gua labale läga tsia nittle. Unní ancana nu uni Tata Do Iyyabaaha.<sup>29</sup> Tata Do Iyyabaaha bedaa lee uca lanie le tsia lele Cristu, ttiaca anágua ba bedaa lee satele lo ni'a gue Ben-na.<sup>30</sup> Lebi'i nna ratebale loesi nu begüiale guateha, unnuha guabunna runale ratea nnanna lhe.

### Elhida ga leri atti belhida ga le Cristu

**2** Larcala nna gansi guare tsitsiba lele de babale Cristuha, gansi guateba elha xen lhasi guele de racani benna guele lhe gansi guadúba Espíritu gue Ben-na len lebi'i lhe gansi gua ruyú si'iba loesle lhe gansi gua ratúaba le loesle lhe<sup>2</sup> lania nna ittaru odúle lasia gansi ttuba anca nu rulaba lele, ttuba raquin gue loesle lhe ttuba anca nu raca lele lhe ttuba anca nu raquinle unle lhe<sup>3</sup> Tsa bittu unle ttaba atti bixa runle niguaba qui cue xenle lhe. Nu unlale nna: gualudá iquile gue nu rá benni, gualuni dequi yurla cana atti lebi'i.<sup>4</sup> Ni ttule bittu ulaba lele gue suntteba nu anca guele qui tse'e tseele, gualulabaguaba lele gue gasná tse'e tsee adí benni.

<sup>5</sup> Gualulaba lele atti belaba le Jesús Benni anque Cristu.

<sup>6</sup> Benniha nna masquiba satíaba anque Dios,  
lee nna bittu benie duelha,  
lee ancabe ttuba len Tata Do Iyyabaaha.

<sup>7</sup> Nu benbe nna la labe belhida gaa lee,  
nianna uque attiba ttu benni tto'o lo sina,  
uque attiba anca nuxaba benni.

<sup>8</sup> Atti anque benni attiba ri'i nna  
bedába iquie gue Tata Do Iyyabaaha,  
bedoe tisa uttie lo ya crusihá,  
masquiba anca nua ttu elhutti nu runi ettuinri.

<sup>9</sup> Denuala nna beni Tata Do Iyyabaaha aca Benniha Benni ra  
xxeniru lee gue delo iyánea,

begüee ladi Benniha qui uque Benni rinnabia xení gue delo  
iyánea ca nu rinnabia,

<sup>10</sup> qui anáchu nna de ra xxeni le Jesús,  
iyába ca nu se'e iyyabaaha lhe  
ca nu se'e yies lo yu lhe ca nu yu'u lhi'u yu lhe

udú xibicani lo Ben-na.

<sup>11</sup> Nianna iyáxea cana dhi ro'ocani Jesucristuha anque Benni bananie ri,  
qui ule'e lo Tata gueri do iyyabaaha anque Benni ra xxeni lee.

### Lhatsiru gualuni qui acale xieni gue ca benni se'e yies lo yu-ni

<sup>12</sup> Larcala nna ca benni ria le Jesús racatia gueni, lebi'i nna satíaba rudole tisa gue nu ria, ttaca bittu sunru atti doa len lebi'i, nnanna doa idittu nna adíla gualudo tisa gue nu ria. Gualgapa Tata Do Iyyabaaha respeto, gualtse'e gualuni nu anca tsee qui ule'e lo gualí chi bodilá Ben-na le, <sup>13</sup> cumu Tata Do Iyyabaahaba runie qui roquinna iqui le unle nu raca lee, laguabe raca lanie le qui ridále runle tua lhe.

<sup>14</sup> Bittu inne bexeale gansi chi bixa runle, lä itilha tisaguaba len loesle lhe <sup>15</sup> qui bittu te ro'o benni innána ancale nu te tulha gueni o nu runi nu lä anca tsee lhe. Gualtse'e gualuni atti runi benni chi anca xi'ini Tata Do Iyyabaaha anca nari lo Ben-na lagüi gue ca benni lä du ta leni runi nu lä anca tsee se'e yies lo yu-ni. Gualtse'e gualuni nu anca tsee lagüi gue ca unná attiba ca beli na rigu'u cana xieni yies lo yu-ni. <sup>16</sup> Tsitsi gualtse'e gualuni nu rá ca tisa gue Tata Do Iyyabaaha, ca Ben-na ruteque elha nabani gatta ttu dia lii gueri, qui gansi chi besía Cristuha nna lebi'i uni eyo'o lasia de yua nna läga cuenta betú besátia güequia bele'etia le. <sup>17</sup> Masqui utticana neti, elhutti quia nna acana ttu úna utea len Tata Do Iyyabaaha itupa leni nu tsee runle lo Ben-na de ria lele, cumu unná ancana úna rutele len Ben-na. Neti nna attulade eyo'o lasia gansi anía aca, unguaba qui edaca lee iyábale len neti lhe. <sup>18</sup> Anágua lebi'i guale'o lele, gualedacani len neti lhe.

### Pablo rixxi'abi gue Timoteo lenbi Epafrodito

<sup>19</sup> Gansi Jesús Benni bananie ri aca lee nna güidhelhattegaba Timoteo ettenalhibi le, qui eyaca xen lasia atti quixxi'enbi neti gue gaxasná se'ele, <sup>20</sup> cumu nutturu attu benni dotia ulaba leni atti rulaba lasia. Labi nna gualíguinbi richacha iquibi guele. <sup>21</sup> Adí benni nna suntteba rulaba lecani gue nu anca guecani, läga rulaba lecani gue nu anca gue Jesús Benni anque Cristu. <sup>22</sup> Lebi'i nna gua yuxebale tseeba rudú le Timoteo. Attiba rixuin ttu tata ttu xi'inni rixuubi len neti, tsitsiba yuda runbi neti rixxi'atu ca tisa gue Jesús.

<sup>23</sup> Larcala nna cuantusiba una bixa anca nu satea, idhelhatteba bi atta se'ele-na. <sup>24</sup> Neti nna xenba lasia guacaba len Benni bananie ri-na neti qui itattegába cuinaga neti ettenalhia le.

<sup>25</sup> Lebi'i udhelhale Epafroditó bi'ini ria le ca tisa gue Jesús attiba ri'i qui unbi neti yuda leni nu reasatia. Labi nna runbi sina gue Tata Do Iyyabaaha len neti, tsitsiba se'etu attiba ttu soldado. Nnanna nna racatia tseeba anca edhelha bi'in-ni len lebi'i attu libe. <sup>26</sup> Labi nna rdaca lhababi ilenbi iyábale, tsitsiba richacha iquibi de binale unbi. <sup>27</sup> Gualíba unbi, a saro'oba lä uttibi. Ttiaca Tata Do Iyyabaaha guatúaba lee bi, läga sunru labi guatúa le Benniha, guatúaguaba lee neti lhe qui bitturu dho si'a adí dequi de nu chi do si'a-ni. <sup>28</sup> Denua nna edhelhatteba bi, qui gansi chi bilenle bi nna eyo'o lele. Aná nna lätterba dhoa ichacha iquia. <sup>29</sup> Itú iqui itú lele gualgas bi tseeba anca chi besíabi. Labi nna ralhabi gále bi aná cumu ancabi benni baba len Benni bananie ri-na, gualgapa bi respeto lenbi adí ca benni runi atti runbi lhe. <sup>30</sup> Bi'in-ni nna a saro'oba lä uttibi lo ni'a gue de runbi sina gue Cristu. Lababi berú iqui berú lebi elha nabán guebi qui bitabi benbi neti yuda, cumu lebi'i nna bittu uca unle neti yuda de idittuba se'ele.

### Pablo rixxi'abi Cristuha anque benni dacaru

**3** Nnanna nna ca benni ria le Jesús attiba neti, a suna unníba reasa upea le: gualedacani de ancale benni baba len Benni bananie ri-na.

Neti nna lägabi ritisitia runia lo sitsi-ni attu libe nu chiba ria le, cumu ancana nu raca duelha unale qui bittu ixú yiele. <sup>2</sup> Gualudo cuidadu leni ca nu runi nu lä anca tsee requi-na. Ca nu rávana dequi ancacana nu requi rixxi'a ca tisa gue Jesús, ca nu requicana rávana dequi raca duelha cue senni ca unbiyuu, nu run ca unbiyuu Israel, qui acacana benni gue Tata Do Iyyabaaha. <sup>3</sup> Tiaca ri'ilá unní nna nu gualíga ancari benni gue Tata Do Iyyabaaha, cumu cuinaba Espíritu gue Ben-na runie rudú xibiri loe. Ri'i nna redaca leri de babari len Jesús Benni anque Cristu, läga xen leri lhári de nuxa ancari lhe o si gansi guayu'uri senni lhe. <sup>4</sup> Masquiba neti nna guateguaba ro'a uxten lasia odilá nu runia na neti. Ttiaca gansi nuxa raquinna dequi nu runna lhe nu ancana lhe uni qui lhána, adílabá neti teerla ro'a uxten lasia odilá unná neti. <sup>5</sup> Neti nna anca benni Israel, berencana neti senni nu runcana leni ca unbiyuu Israel, atti uca xxunu ubisa

ulia. Datíaya ca benni gue Benjamín lhe anca benni hebreo de anca tata nan quia benni hebreo lhe. Neti nna uca nu baba len ca benni fariseo, ca nu tsitsiba runcana dho tisa gue ca ley boca'ana Moisés.

<sup>6</sup> Ttsitsiba bedona lasia dho tisa gue nu rá lo ca ley-na. Denuala nna guanoa ca benni ria le Jesús qui udhaca güea cabi. Ni ttu benni bittu te ro'oni inne güena quia cumu netiba nu bedorua tisa gue iyátte nu rá lo ca ley-na, benba attiba rába lo ley-na aca.

<sup>7</sup> Ttiaca nnanna nna iyába nu racatia ancana nu te lidhacani len neti ttuha, ancana nu bittu lidhacani te len neti, de chi ria lasia Cristuha. <sup>8</sup> Anáguba nnanna. Iyába ttu bixa runia ancana nu bittu daca, cumu nu daca len neti nna ancana benbiaya Jesucristu Benni bananie neti. De Cristuha nna iyába nu racatia anca nu te lidhacani len neti boca'ana. Iyába nua nna runia ancana attiba ttu ixi qui dhaya dhoa len Cristu, <sup>9</sup> qui aca benni du len Ben-na lhe. Läga anca benni tsee de bedoa tisa gue ca ley boca'ana Moisés, sinuqui anca benni tsee de ria lasia Cristu. Tata Do Iyyabaaha runie anca benni tsee de ria lasie. <sup>10</sup> Neti nna rdaca unbia tseerua Cristu, dhia elha ra xxen lee bete Tata Do Iyyabaaha len Benniha qui beacanie dequide uttie lhe rdaca guaba satea loesi nu guate Benniha lhe dhielha utticana neti attiguuba uxielha Bennihabetticane lhe. <sup>11</sup> Anía liba nna nicadi ga güeyacabatia gansi chi beacani ca nu yatti-na.

### Pablo runbi duelha e'eyubi acabi atti raca le Cristu

<sup>12</sup> Neti nna läga ria dequi chi udáya benbiaga iyá nu anca gue Cristu, bittuguaba ria dequi chi anca nu runi ttaga'a nu anca tsee lhe. Ttiaca diaba rusigui qui nicaga guadába e'eyua aca atti raca lee Jesucristuha. Denuala nna benie uca benni guee. <sup>13</sup> Ca benni ria le Jesús, neti nna läga ria le chi udáya be'eyua aca atti raca le Benniha aca. Nu diala runia nna ixulhatia gue iyába nu chi benia ttuha, duelhaba runia tsaba rusía loa nu chi daba, <sup>14</sup> qui anáchu isína e'eyua atta raca le Tata Do Iyyabaaha e'eyua. Lania nna dhia ttu elha tsee nu ralha dhia iyyabaaha. Tata Do Iyyabaaha uxie ri qui dhíri elha tseeha de ancari benni baba leni Jesús Benni anque Cristu. <sup>15</sup> Larcala iyábari atta chi se'e tsitsiri lo neda gue Jesús, aná ulaba leri. Gansi lebi'i se'ele rulaba lele dequi läba aná anca, Tata Do Iyyabaaha gunbe qui ttedeenle läga anca tsee nu rulaba leleha. <sup>16</sup> Ttiaca raca duelha tse'eri usiguiri unri iyába nu chi yuri raca le Tata Do Iyyabaaha unri.

<sup>17</sup> Ca benni ria le Jesús, gualtse'e gualuni atti runia. Gualgüia gue ca benni se'e runi attiba bele'enttule unleha lhe. <sup>18</sup> Cumu na requi ixeru ca nu rigu'u ni'acani bixa lo ni'a gue utti Jesús lo ya crusihá. Unná rule'e lo lacana ancacana nu bittu raca uyúcana Benniha. Neti nna ixeru libe chi utixxi'atia le gue nu run ca unná, nnanna nna ribesnia rixxi'atia le attu libe gue nu runcana. <sup>19</sup> Ca unná nna dia nittibacana de runcana aná. Nu ridá le cuerpu guebacani anca dios guecani. Tsitsiba ttaba runcana gue nu dica ettúquinna runcana. Suntteba gue nu anca gue yies lo yu-ni do lecani. <sup>20</sup> Ri'i nna chi ancari benni baba iyyabaaha, nía guaba dedaa Benni se'eri ribedari esíe odile ri lhe. Benniha nua Jesucristu Benni bananie ri. <sup>21</sup> Ben-na otsie ca cuerpu gueri-ni ca nu reaca yu, qui eyonie cana atti anca cuerpu ga'ana tsee guee. Unní unie leni elha ra xxen le guee rixunie rinnabie iyáxeaba nu tee.

### Pablo ruttipabi le ca benni ria le Jesús

**4** Larcala nna lebi'i ca benni ria le Jesús attiba neti, ca nu raca xxattatia gueni. Neti nna rdaca lhaba ilátia le, cumu lebi'i ancale nu runi redaca lasia lhe nu runi rule'e lo te lidhaca sina runia gue Tata Do Iyyabaaha lhe. Gualusigui gualtse'e tsitsi lo neda gue Tata Do Iyyabaaha de chi babale len Benni bananie ri-na.

<sup>2</sup> Rinnaba len benni nuila lá Evodia, anáguaba len benni nuila lá Síntique lhe eyaca tseecabi, oquinna iquicabi ttuba ese'ecabi de chi ancacabi benni baba len Benni bananie ri-na. <sup>3</sup> Anáguaba lu, bi'ini raca umpanieru quia, lu nu bittu rudhá iquilu neti lo sina gue Jesús, rinnaba lenlu unlu yuda ca benni nuila-ni. Ca bi'in-ni nna tsitsiba guatecabi len neti utixxi'atu ca tisa gue Jesús, lencabi Clemente lhe adírba ca bi'ini bencabi neti yuda lhe. Ca bi'in-ni nna chiba dia lácabi lo libro atta dia lá ca benni gatta elha nabani guecabi ttu dia lii iyyabaaha.

<sup>4</sup> Satía gualtse'e guale'o lele de chi ancale benni baba len Benni bananie ri-na. Rpea le attu libe: ¡Satía gualtse'e guale'o lele!

<sup>5</sup> Lhatsiru gualuni qui iláni iyá benni lebi'i nna ancale benni du tsee leni. Gualorexxa lele chi daa ribiga esía Benni bananie ri-na. <sup>6</sup> Bittu ichacha iquile gue ttu bixa. Nu unlale nna gualoca'an iyá las ná Tata Do Iyyabaaha gansi chi rinne len lee. Gualinnaba loe nu reasinle lhe anáguaba gualgási Ben-na xquixarue lhe. <sup>7</sup> Lania nna Tata Do Iyyabaaha unie gatta elha xen lhasi guele, elha xen lasi-ni nna unie

ulaba tsee lele lhe bittu cuenta bitti acabinle unle lhe de chi ancale benni baba len Jesús Benni anque Cristu. Elha xen lasi-ni nna anque ttu nu xxeni, ni ttu benni bittu dhana ttedeenna gue gaxasná anque.

### **Gualulaba lele gue nu anca tsee**

<sup>8</sup>Lebi'i, ca benni ria le Jesús, nu reasa upea le nna ancana:

gualulaba lele gue iyá nu anca gualí,  
gue iyá nu rapa benni respeto lhe  
gue iyá nu anca lhixxa lhe  
gue iyá nu anca ttaga'a tsee lhe  
gue iyá nu radi le benni lhe  
gue iyá nu anca lhatsiru lhe.

Gualulaba lele gue iyá nu ga'ana tsee lhe  
gue iyá nu rinne tsee benni gueni lhe.

<sup>9</sup>Gualusigui gualuni nu chi bele'etia le, nu rpea le unle lhe nu bieninle rinnea lhe nu bilenle runia lhe. Lania nna Tata Do Iyyabaaha Benni rute elha xen lasi lenri guadúbe len lebi'i.

### **Pablo rugüebi xquixaru ca benni gue Filipos**

<sup>10</sup>Re'o juisia lasia lo Benni bananie ri-na cumu lebi'i nna chi bedulole rulaba lele quia attu libe. Läga ria dequi lebi'i nna chi bixulhinle neti, sinuqui de bittuba chi uca unle neti yuda. <sup>11</sup>Läga ria aná de reasatia ttu bixa nnanna. Neti nna chiba bidetia raca xen lasia leni nu teerba quia. <sup>12</sup>Guanca biabatia neti dhoa bittu te bixa len galha sá, guanca biaguabatia dhoa te iyá nu reasatia lhe. Chiba bideti neti utsá dua lo bixaba ratea, seadi yiela lhe o si ritunia lhe si texxatta quia lhe o si tsa bittu te quia lhe. <sup>13</sup>Bixaba ratea nna gua ridába ruchíaya loni cumu Cristuhaba rudú tsitsie neti. <sup>14</sup>Ttiaca lebi'i nna tseeba benle benle neti yuda lagüi lo atti doa ruyúa elha disa.

<sup>15</sup>Lebi'i, ca benni se'e lhe'e yiesi Filipos-na, gua yuxaabale atti chi uduloba rixxi'atia le ca tisa gue Jesús, tsa lärga nurua benni ria le Jesús bencana neti yuda dequide atti beríaya atta se'ele lo yu gue Macedonia-na. Sunruba lebi'i bosí'ile gue nu utixxi'atia le ca tisa-na.

<sup>16</sup>Masquiba sna doba lhe'e yiesi Tesalónica, lebi'i nna udhelharbale ttu chupa libe yuda len neti qui bixuutia gue nu reasatia. <sup>17</sup>Läga ria aná de do lasia dhichattia nu rutele. Nu rdacaba neti nna udianchattile iqui nu tsee te guele len Tata Do Iyyabaaha. <sup>18</sup>Iyába

nu reasatia chi te quia nnanna. Care'aba yuda udhelhale quia leni Epafroditona chi te quia, axtala rexxa quia nnanna. Nu udhelhale len neti nna ancana attiba ttu úna sela nu rure xixxi betele len Tata Do Iyyabaaha. Unná ancana ttu úna re'o le Benniha ridíe.<sup>19</sup> Tata Do Iyyabaaha ute tame iyá nu resinle de babale len Jesús Benni anque Cristu, cuaxxeniba anca elha tsee guee te.<sup>20</sup> ¡Tata gueri do iyyabaaha garie ttu dia lii lee anque Benni ra xxeni lee! Amén.

**Pablo lenbi ca benni se'e atta dobihacabi  
padiuxi len ca benni se'e Filpos**

<sup>21</sup> Gualgási iyá ca benni chi se'e riesi anca gue Tata Do Iyyabaaha ca bi'ini chi babacabi len Jesús Benni anque Cristu padiuxi cuenta quia. Ca benni ria le Jesús se'e len neti nii lhe ridhelhacabi ttu padiuxi guele.<sup>22</sup> Iyába adí ca benni chi se'e riesi anca gue Tata Do Iyyabaaha se'e lhe'e yiesi Roma-ni, ca bi'ini riben sina lhe'e yo'o gue César nu rinnabia gue yies-ni ttila ridhelhacabi ttu padiuxi guele.<sup>23</sup> Cuina Jesucristu Benni bananie ri edá lee aca lanie iyá xeale. Amén.

# Sitsi udhelha Pablo atta se'e ca benni ria le Jesús lhe'e yiesi Colosas

**1** Neti Pablo anca apóstol benni chi ga'anani Jesús Benni anque Cristu iche ca tisa guee, cumu anába bedaa le Tata Do Iyyabaaha unie. Neti lenia Timoteo, bi'ini ria le Jesús attiba ri'i,<sup>2</sup> runtu lo sitsi-ni guele, lebi'i ca benni ria le Jesús se'e lhe'e yiesi Colosas-na. Lebi'i ancale benni gualígani se'e tsitsi lo neda gue Cristu, ancale benni chi se'e riesi anca gue Tata Do Iyyabaaha lhe.

Cuina Tata gueri do iyyabaaha lenie Jesucristu Benni bananie ri-na aca lenque le, unque tse'ele lhatsiru lhe.

## Pablo rinnababi ute Tata Do Iyyabaaha elha nabani gue ca benni ria le Jesús se'e Colosas

<sup>3</sup> Satíaba rinnetu leni Tata Do Iyyabaaha, tata gue Jesucristu Benni bananie ri'i rugüetue xquixaru guele<sup>4</sup> cumu binatu tsitsiba ria lele Jesús Benni anque Cristu, raquinle gue iyá ca benni chi riesi ancacabi gue Tata Do Iyyabaaha lhe.<sup>5</sup> Lebi'i nna runle aná cumu de chi xen lele dhíle elha tsee chi tua tsee guele iyyabaaha. Attili bieninle ca tisa rixxi'a nu anca gualí, delába ca tisa gue Jesús, laniali chi binale dhíle elha tsee-na.<sup>6</sup> La ca tisa gue Jesús bisía atta se'ele-na, la Ben-na guaba unná chi runa ca benni se'e bi'a canaba yies lo yu-ni. Ca tisa-na ben-na runque runi ca benni nu anca tsee, ttu ttu sába nna diarguaba rani adí ca benni ria lecani ben-na lhe aníagua nua guatele atti binale gualíba resi'in Tata Do Iyyabaaha le.<sup>7</sup> Ca tisa rinnea-ni nua bele'eni bi'ini lá Epafras-na le, bi'ini raquintu guebi-na. Labi nna runbi ri'itu yuda rule'enbi le cuenta guetu. Bi'in-na nna gualíguinbi du tsitsibi lo neda gue Cristu.<sup>8</sup> Laguabi utixxi'enbi ri'itu gue lebi'i nna tseeba raquin gue loesle, cumu de do Espíritu gue Tata Do Iyyabaaha len lebi'i.

<sup>9</sup> Nuarcala ri'itu nna desdeba atti binatu gue gaxasná se'ele nna tsa bittu rudú situ rinnabatu leni Tata Do Iyyabaaha aca lanie le, qui anáchu unie ttedaatseenle gue nu raca lee unle, utee itú elha reni reasinle lhe idhalie iquile qui sadú tsee lele gue gaxasná anca nu anca guee lhe.<sup>10</sup> Análiba nna qui tse'ele unle nu anca lhatsiru atti dica uni ttu benni chi anca gue Jesús Benni bananie ri-na, qui satía unle nu re'o lee lhe. Delaba unle iyáloba nu anca tsee, e'eyule

unbia tseele Tata Do Iyyabaaha lhe.<sup>11</sup> Rinnabaguatu loe cuequi tsitsie lele leni elha ra xxeni lee guee, qui anáchu nna dhale uchiale lo elha disa daa uyúle, qui bittu saxxaquinle.<sup>12</sup> Leni elha redaca lee gualgási Tata gueri do iyyabaaha ixquixarue de chi benie acari benni ralha dhi nu anca interés utee len ri'i ca benni chi se'e riesi anca guee se'e lhe'e xieni,<sup>13</sup> Ben-na bodile ri lo atta chulha rinnabia nu xxegüiha, nianna bodúe ri atta rinnabia Xi'inie Jesucristu, Benni racanie guee.<sup>14</sup> Leni elhutti gue Benniha bodile ri qui bittu tsia mittiri, anía liba nna uxí Tata Do Iyyabaaha elha xen lasi gue iyá nu lä anca tsee benri.

### Cristu anque benni du primerba gue iyá xea

<sup>15</sup> Jesucristuha anque atti anca Tata Do Iyyabaaha, Benni bittu rilenrie. Cristu ancaguabe Benni ra xxeniru lee leni delo iyátte nu ben Tata Do Iyyabaaha. Lee nna chila doe atti ure yies lo yu-ni.

<sup>16</sup> Leni Cristuha beni Tata Do Iyyabaaha iyába ca nu se'e iyyabaaha lhe yies lo yu-ni lhe nu rilenri lhe nu bittu rilenri lhe. De Bennihaba nna se'e ca nu rinnabia-na, ca nu ra xxeni lequinna lhe ca nu anca nu lo-na lhe ca nu anca uxtisi-na lhe. Iyá bunna beni Tata Do Iyyabaaha len Cristuha, guebe ca unná lhe.<sup>17</sup> Nucala do Cristuha atti use'e iyáxeaba nu se'e, labe denie lhe rinnabie lhe iyába.

<sup>18</sup> Ben-na anque nu lo gue ca benni ria lecanie. Lee anque iqui ca bi'in-na, ca bi'in-na nna ancacabi cuerpu gue Ben-na. Ben-na anque Benni udo primerba, laguabe anque Benni primerba beacani gue ca nu yatti-na, qui aque Benni ra xxeni lee gue delo iyácea.<sup>19</sup> Cumu anába uyu'u le Tata Do Iyyabaaha aca, labe uca lee aca Cristu Benni ra xxeni lee attiba lee.<sup>20</sup> Leni Cristuha beni Tata Do Iyyabaaha bese'e tsee iyába nu se'e yies lo yu-ni lhe nu se'e iyyabaaha lhe lanie. Beaca tsee lenie ca unná de reni belali Cristu lo ya crusinha.

<sup>21</sup> Ca tu atti nía nna lebi'i nna nu dittuba ancale lo Tata Do Iyyabaaha, läga uca uyúle Ben-na. Use'e tilhaba lenle Ben-na cumu de bittu belaba tsee lele, de benle nu lä anca tsee lhe.<sup>22</sup> Ttiaca Cristuha uque benni attiba ri'i uttie lo ya crusinha, qui leni elhutti gue Benniha nna beni Tata Do Iyyabaaha beaca tseele lanie qui utsá dule loe chi ancale benni chi riesi lhe'e nu lä anca tsee, benni anca nari lhe nu bitturu tulha te gueni lhe.<sup>23</sup> Larcala raca duelha usiguile tse'e tsitsile leni nu chi güia lele. Tsa bittu udhanle uxxen lele edí baale nu rá ca tisa gue Jesús chi bieninle. Ca tisa-na ben-na

chi runa ca benni se'e bi'a cana yies lo yu-ni. Neti Pablo anca benni bodú Tata Do Iyyabaaha quixxi'aya ca tisa guee-na.

### Pablo runbi yuda ca benni ria le Jesús

<sup>24</sup>Nnanna nna re'o lasia lagüi lo nu ratea de lo ni'a guele, Leni elha disa ruyúa ni rodha'aya nu reasa sate Cristuha lo ni'a gue ca benni chi ria lecanie, cumu lacabi anca cuerpu gue Ben-na. <sup>25</sup>Tata Do Iyyabaaha bodúe neti aca benni rixuu rixxi'a ca tisa guee len ca benni ria lecani Jesús. Boca'ane sina-ni len neti qui quixxi'aya ca tisa guee-ni ida'a su attiba daa loa unia qui salía tseenle. <sup>26</sup>Ca tisa-ni nua te gatsini Tata Do Iyyabaaha axta atti nía. Nnanna nna chi benie qui sadú le ca benni chi riesi anca guee bixa dia le ca tisa-ni. <sup>27</sup>Cumu raca lee Ben-na ttedeenle, lebi'i ca benni bittu ancale benni Israel, gue elha tsee xeni guee te gatsinie ca tu atti nía. Nu te gatsinie nna ancana: Cristu chi doe lhe'e lastoole. Ben-na anque Benni runi uxten lele guadíbale nu tsee ribedari edí baari iyyabaaha.

<sup>28</sup>Ri'itu nna requitu rixxi'atu ca tisa gue Cristu. Iyába benni rudutu elha rieni iquicabi, rule'entu cabi lhe leni elha rieni, qui gansi chi betsá dutu cabi lo Tata Do Iyyabaaha nna chi ancacabi benni be'eyu beda'ani beni nu raca le Ben-na de babacabi len Cristu. <sup>29</sup>Denua nna neti nna runia sina-ni itú iqui itú lasia, cumu Cristuhaba ribequi tsitsie lasia leni elha ra xxeni lee guee rute len neti.

**2** Neti nna raca lasia unale, tsitsiba ratea richacha iquia guele, gue ca benni se'e lhe'e yiesi Laodicea-na lhe gue adí ca benni bittu chi anca biaquinna neti lhe <sup>2</sup>raca lasia unale qui ebequi rea lele. Lania nna ttuba ese'ele de raquin gue loesle, qui gatta itú recha elha rieni guele lhe. Aníachu nna ttedaatseenle gue ca tisa te gatsini Tata Do Iyyabaaha bittu utedaani ca benni use'e atti nía. Gue Cristuba Benniha bittu ute daaquinna. <sup>3</sup>Len Ben-na saxxacari iyáloba nu te lidhacani anca gue elha rieni na lhe nu runi ritelínri lhe. <sup>4</sup>Rixxi'atia le unní qui nuttu nu dhi yienle leni ca tisa ridí yie. <sup>5</sup>Masquiba nuttu neti du len lebi'i, ttiaca satíaba rexxa lasia le. Neti nna re'o lasia runa lhatsirba se'ele, tsitsiba se'ele ria lele Cristuha lhe.

### Leni Cristuha te elha nabani gueri

<sup>6</sup>Larcala nna attiba chi güia lele Jesucristu anque Benni bananie ri, aníaguaba nna gualtse'e gualuni nu raca lee Ben-na. <sup>7</sup>Tsitsi gualtse'e lo neda gue Ben-na, itú iqui itú lele gualtsia lele Ben-na lhe gualtse'e gualuni attiba chi bidetile lhe bittu udú sile ugüele Tata Do Iyyabaaha ixquixarue lhe.

<sup>8</sup>Gualuyú guele. Bittu ugüelhale dhi yie ca nu requina le leni ca tisa elha nu bittu lidhaca-ni te. Gue nu rulaba lee ca benni se'e yies lo yu-ni bunna rinne ca unná. Gue nu anca gue yies lo yu-niba rudaxxu ni'acani, läga rudaxxu ni'a ca unná gue nu rá Cristu.

<sup>9</sup>Cumu Cristu Benni uque benni attiba ri'i, atti bite yies lo yu-ni nna anque itútteba atti anca Tata Do Iyyabaaha. <sup>10</sup>Larca lebi'i nna tsa lärgabi reasinle qui acale benni gue Tata Do Iyyabaaha cumu chiba babale len Cristu. Benniha anque nu lo gue iyába ca nu anca nu rinnabiana, ca nu ra tsitsi lequinna lhe. <sup>11</sup>De chi babale len Cristu nna nuarca chi ancale attiba benni ren senni, unná nna läga ancana loesi nu runi ca unbiyuu Israel. Cumu nu ribequi senni ca unbiyuu runi Cristuha nna ancana, Benniha utúe itú recha nu lä anca tsee ridá lele runleha. <sup>12</sup>Atti udile indaha nna lania bigatsile lhe'e baa leni Cristuha. Aníaguaba nna beacaguabinle attu libe attiba Benniha, cumu de güia lele anca Tata Do Iyyabaaha Benni ra xxeni lee. Lee benie beaquin Cristu, belhidhe Benniha lhe'e baa atta yu'u ca nu yatti-na. <sup>13</sup>Ca tu ttuha nna lebi'i attiba benni yattiba ucale lo Tata Do Iyyabaaha cumu ucale nu runi nu bittu anca tsee, de bittu ancale nu ribe senni attiba ca unbiyuu Israel-na lhe. Nnanna nna chiba beni Tata Do Iyyabaaha beaquinle lenle Cristuha atti uxíe elha xen lasi gue iyába nu lä anca tsee benleha. <sup>14</sup>Tata Do Iyyabaaha nna chiba utúe sitsi nu dia loni iyába nu lä anca tsee benriha, cumu unnuha nua rудelha iyyan ri. Atti utá Jesucristuha lo ya crusih, lania utúe nua. Bennihaba utixa nu dica quixari. <sup>15</sup>Anía liba nna utúe nu runi ra tsitsi lee iyárecha ca nu rinnabia lhe ca nu ra xxeni lecani lhe gue nu xxegüiha. Atti utá Cristuha lo ya crusih lania ude locani, nianna benie bettuquinna aní lo iyá benni.

<sup>16</sup>Larcala nna läganu dica inne güeena guele gue nu role lhe gue nu lä role lhe niguaba gue nu dica i'iyale lhe gue nu lä dica i'iyale lhe niguaba gue biaca bittu runle casu gue ca sá laní-na lhe attiba gansi chi redá beo cubi lhe gue bixa sá dica edí lee benni lhe.

<sup>17</sup> Iyába unní nna ancana suntterba lixxina benni chi te tisa isía, nu anca gualígaha nna anque Cristu. <sup>18</sup> Bittu dhielhale utsiatta ca nu runi ancacana nu si'i le rudú xibicani lo ca ingeli-na le lo neda gue Tata Do Iyyabaaha, qui lä unnitile elha tsee ralha le dhíleha. Cumu ca unná nna cuentaba racana dequi rule'equinna ttu bixa. De unnuha nna runcana dequi tsitsiba xxeni ra lecani leni nu rulaba lecani anca gue la labacana. <sup>19</sup> Ca unná nna läga se'ecana leni Cristu. Benniha anque benni rinnabie itúba cuerpu guee, delába ri'i ca benni ria lerie. Attiba yieti ro'o loesi itúba nu anca cuerpu gueri, anáguba yietie len ri'i. Lee runie tse'e tsitsi chiettiri lo neda guee attiba raca le Tata Do Iyyabaaha.

<sup>20</sup> Lebi'i nna attisiba uttiguabale atti utti Cristu. Denua nna nuarca litturu rudole tisa unle nu rotsi'inu le ca nu runi nu anca gue yies lo yu-ni. Gansi anía anca, nianna, ¿biacala nna rudole tisa gue ca nu rá: <sup>21</sup> "Bittu canalu unná lhe bittu golu unná lhe bittu udaxxulu unná lhe"? <sup>22</sup> Iyába nu rávana lhe nu rule'ecana lhe rinnena gue nu isíaba sá luxana cua diaba benni rixuinna na, cumu ancabana nu ruxxe le ca benni se'e yies lo yu-ni. <sup>23</sup> Gualígala guannalu dequi guateba lidhaca nu rule'e ca unná, cumu duelhaba runcana acacana benni rudoru leni gue nu anca gue yotu. Runcana ancacana nu si'i le lhe nu rutte elha disa cuerpu guecani lhe ttiaca läga ridá unná cuana nu lä anca tsee ridá lecani uncana.

### Nu dica un ttu benni chi te elha nabani gueni lo Tata Do Iyyabaaha

**3** Larcala nna ganna si gualínle chi ancale benni beacani len Cristuha, gualusía lole nu anca gue iyyabaaha atta do Cristu daca ná derechu gue Tata Do Iyyabaaha. <sup>2</sup> Gualulaba lele gue nu anca gue iyyabaaha, bittu ulaba lele gue nu anca gue yies lo yu-ni. <sup>3</sup> Cumu lebi'i nna leni nu anca gue yies lo yu-ni nna chiba uttile, leni Cristuha liba ancale benni te elha nabani gueni ttu dia lii, Benniha nua tua tsee-ni Tata Do Iyyabaaha. <sup>4</sup> Gansi chi beacaxxe Cristu, benni rute elha nabani gueri-na dedee iyyabaaha, anáguba lebi'i eyacaxxeguale lenie se'ele atta ru'u xieni ga'ana tsee guee.

### Bittu unle nu lä anca tsee, gualunle nu anca tsee

<sup>5</sup> Larcala nna chinca gualcua lhe'e iquile nu lä anca tsee gue yies lo yu-ni:

bittu tsequi mannile,  
 bittu unle nu utsiganle lo Tata Do Iyyabaaha lhe  
 bittu ulaba lele gue nu lä anca tsee ridá lele unle lhe  
 bittu dhaa lele gatta nu te gue attu benni subi guele lhe.

Cumu nu ridá leri acari nu teru gueni nna reacana attiba ttu diosi len ri'i. <sup>6</sup> De lo ni'a gue unná nna isía sá ute Tata Do Iyyabaaha elha disa xeni la tsu'ubia gue ca nu bittu rudocana tisa guee. <sup>7</sup> Lebi'i nna iyába unná benle ca tu ttuha atti requile runle nu lä anca tsee. <sup>8</sup> Ttiaca nnanna nna chinca gualcua nu cuentaba rilá xxaxxaba lele-na:

nu rise'en loesle-na lhe  
 nu rutía di lele-na lhe  
 nu riguele-na lhe  
 ca tisa satsa rinnele-na lhe.

<sup>9</sup> Bitturu un lele aníba lo loesle cumu lebi'i nna lärga nu se'ele ttuha se'ele nnanna chiba bodha'anle nu lä anca tsee benleha, lärga dica unrule aná. <sup>10</sup> Tata Do Iyyabaaha chi benie beacale benni cubi, ttuttu sá runie diale acale attiba lee. Anía liba nna qui e'eyule un bia tseele. <sup>11</sup> Ttu benni chi becubi nna lärgabi runna gue nuxa anca nua:

si ancana benni Grecia,  
 o si ancana benni Israel,  
 si ancana nu ren senni nu runcana leni ca unbiyuu Israel,  
 o si bittu lhe  
 si ancana benni te elha rieni gueni,  
 o si nu lä caa elha rieni gueni lhe  
 si ancana benni tto'o lo sina,  
 o si benni bittu tto'o lo sina lhe.

Cumu nu racaru duelha nna Cristuha anque benni xeni. Benniha anque benni rinnabie iyá, doe lhi'u lhe'e lastoo iyári lhe.

<sup>12</sup> Tata Do Iyyabaaha racanie guele. Benniha becuae le qui acale benni se'e riesi lhe'e nu lä anca tsee. Larcala nna gualaca benni ratúa leni, nu du tsee leni lhe nu du si'i leni lhe nu bittu runi gue nu ra xxeni leni lhe nu rapa pasensi gue ca benni lhe. <sup>13</sup> Gualuchía lo nu rudhaca loesle lhe gualdhí elha xen lasi gue loesle gansi bixa runi gue loesle lhe. Attiba beni Cristu uxíe elha xen lasi guele, lebi'i nna aníaguuba gualuni. <sup>14</sup> Delo iyátte nna unníba nu racaru duelha aca, delába aquin gue loesle cumu nu raquin gue loesri-na runna rise'e tsee len loesi beni qui ttuba tse'e iyábari. <sup>15</sup> Elha xen lasi rute

Cristuha nna innabie lhe'e lastoole qui tse'e tseele, cumu de nuala nna uxi Tata Do Iyyabaaha le qui acale ttuba benni len lee. Gualute xquixaru lenie gue nu runie len lebi'i.

<sup>16</sup> Satía tsu'u ca tisa gue Cristuha leni itúnea elha tsee gue Ben-na lhe'e lastoole. Gualule'en loesle lhe gualuttipa le loesle lhe leni elha rieni rute Tata Do Iyyabaaha. Gualute xquixaru len Ben-na, itú iqui itú lele, gualulha gue Benna leni ca salmo lhe leni ca nu rulhale guee lhe. <sup>17</sup> Exxa lele Jesús Benni bananie ri-na, atti unle ttu bixa o innele lhe cumu de Benniha nna rugüele Tata Do Iyyabaaha ixquixaru.

### Nu daa lo ca benni chi ria le ca tisa gue Jesús uncana

<sup>18</sup> Lebi'i ca benni nuila chi betsá náni, gualudo tisa gue nu inná ca unbiyuu guele-na, cumu aná ga'ana uni ca benni ria le Jesús Benni bananie ri. <sup>19</sup> Anáguaba lebi'i, ca unbiyuu chi betsá náni, aquinle gue ca nuila guele-na, bittu udhaca güelee cana.

<sup>20</sup> Lebi'i, ca uncuiti, gualudo tisa gue iyá nu rá tata guele lhe nan guele lhe cumu aná ru'u le Cristu.

<sup>21</sup> Lebi'i ca tata lhe ca nana lhe bittu udhaca si'ile ca xi'inle-na qui bittu saxyacaquinna.

<sup>22</sup> Lebi'i ca nu tto'o lo sina gue ca benni, gualudo tisa gue iyá nu inná ca benni anca xxanle se'e yies lo yu-ni, bittu sunru atti rise'ecana rugüiacana guele qui eya'an tseele locani, sinuqui itú iqui itú lele gualuni sina guecani, cumu lebi'i nna guayúbale Tata Do Iyyabaaha nna doe rugüie guele. <sup>23</sup> Bixaba unle nna gualun na itú iqui itú lele, attisiba sina gue Jesús Benni bananie ri-naba nua runle, bittu gue ca benni se'e yies lo yu-ni. <sup>24</sup> Lebi'i nna chiba yule guadíbale nu ute Jesucristu Benni bananie ri-na guele cumu sina gue Bennihaba runle. <sup>25</sup> Ttiaca nu runi nu lä anca tsee nna dhiba nua elha disa ralhana dhína de benna nu lä anca tsee, cumu Tata Do Iyyabaaha nna ttulapaba run Benniha elha uxtisi.

**4** Lebi'i ca benni xxana lhatsiru gualudú lele len ca nu tto'o lo sina guele-na, gualuni nu anca tsee lencana. Gualorexxa lele anáguaba lebi'i lhe Tata Do Iyyabaaha anque Benni bananie le.

<sup>2</sup> Satía gualudo lele gualinnaba leni Tata Do Iyyabaaha, bittu tse'e xulhale, gualugüe Benniha ixquixaru. <sup>3</sup> Gualinnabaguaba lenie guetu qui idhalie neda guetu quixxi'atu ca tisa gue Cristu te gatsi bittu chi yu benni desdeba atti nía. Cumu de lo ni'a gue ca tisa-ni

nna tea lisiyya. <sup>4</sup> Gualinnaba guaba leni Tata Do Iyyabaaha qui aca lanie neti quixxi'aya ca tisa-ni lhixxa su attiba daa loa unia.

<sup>5</sup> Lhatsiru gualtse'e leni ca nu bittu chi ria lecani Jesús. Gualuni duelha gualuni iyá nu dica unle ttuttu sá. <sup>6</sup> Satía lhatsiru innele lhe nu dica chadi le benni lhe qui anáchu te ro'ole ecabile gue ca nu innába tisacana le.

**Pablo ridhelhabi ttu padiuxi gue ca benni ria  
le Jesús se'e lhe'e yiesi Colosas**

<sup>7</sup> Bi'ini ria le Jesús lá Tíquico, bi'ini raquinri guebi-na. Labi ancabi ttu benni rudo tisa, tsitsiba runbi neti yuda lo sina gue Jesús. Bi'in-ni quixxi'enbi le gue gaxasná doa-ni. <sup>8</sup> Denuala nna ridhelha bi atta se'ele-na qui quixi'enbi le bixa ratetu, qui odú ittabi lele lhe. <sup>9</sup> Edhelhaguaba leni Tíquico-na bi'ini raquinri guebi lá Onésimo beaca lasbi lo yies guele-na, labi ancabi ttu benni ria le Jesús rudo tisa. Lacabi quixi'aquinbi le iyá nu raca nii.

<sup>10</sup> Aristarco, bi'ini te lania lisiyya-ni ridhelhabi ttu padiuxi guele. Anáguaba Marcos primu gue Bernabé-ni, ridhelhaguabi ttu padiuxi guele. Neti nna chiba utixxi'atia le gue Marcos-ni. Gansi itabi etenalhibi le nna lhatsiru uyúle bi. <sup>11</sup> Anáguaba Jesús, bi'ini láguaba Justo, ridhelhaguabi ttu padiuxi guele. Delo iyá ca benni Israel ria le Jesús, sunruba ca bi'in-ni sela len ca benni runcabi ri'itu yuda rixxi'atu gue gaxasná anca elha rinnabia gue Tata Do Iyyabaaha. Larbacabi gua rute elha xen lasi len neti. <sup>12</sup> Anáguaba Epafras-ni ridhelhaguabi ttu padiuxi guele. Bi'in-ni ancabi ttu benni guele, runbi sina gue Jesús Benni anque Cristu. Labi nna satíaba rinnababi guele lo Tata Do Iyyabaaha qui acale nu se'e tsitsi lo neda gue Ben-na, nu runi itú iqui itú leni iyá nu raca le Ben-na aca lhe. <sup>13</sup> Neti nna yuxeba yalha richacha iquibi guele, gue ca benni se'e lhe'e yiesi Laodicea-na lhe gue ca benni se'e lhe'e yiesi Hierápolis lhe. <sup>14</sup> Lucas bi'ini anca doctor racaxxatinri guebi-ni, lenbi Demas ridhelhacabi ttu padiuxi guele.

<sup>15</sup> Gualugüe ttu padiuxi ca benni ria le Jesús attiba ri'i se'e lhe'e yiesi Laodicea-na. Gualugüeuaba ttu padiuxi Ninfas-na lenbi adí ca benni ria le Jesucristu ritupa lhe'e lisbi-na lhe. <sup>16</sup> Dequide chi uluxa belabale lo sitsi-ni nna gualidhelha na qui ulaba ca benni ria le Jesús ritupa lhe'e yiesi Laodicea-na. Anáguaba sitsi nu udhelha len lacabih, idhelha guabacabi nua qui ulabale na. <sup>17</sup> Gualgási

Arquipo-na unbi duelha unbi sina lhatsiru nu chi bodha'ana Jesús Benni bananie ri-na las nábi.

<sup>18</sup> Neti Pablo, leni naya-ni runia letra atta riluxa nu dia lo sitsi-ni qui ridhelha ttu padiuxi len lebi'i. Gualorexxa lele neti nna lisiyyaba tea. Tata Do Iyyabaaha aca lanie lebi'i. Amén.

# Sitsi primero udhelha Pablo atta se'e ca benni ria le Jesús lhe'e yiesi Tesalónica

**1** Neti Pablo, lania bi'ini<sup>a</sup> lá Silvano lhe bi'ini lá Timoteo lhe ridhelhatu sitsi-ni guele lebi'i ca benni ria le Jesús ritupa lhe'e yiesi Tesalónica. Lebi'i nna chi ancale benni baba len Tata gueri do iyyabaaha, leni Jesucristu Benni bananie ri lhe. Cuina laque aca lenque le, unque tse'ele lhatsiru lhe.

## Pablo rutebi xquixaru len Tata Do Iyyabaaha gue nu run ca benni se'e Tesalónica de ria lecabí Jesús

<sup>2</sup> Satíaba rutetu xquixaru len Tata Do Iyyabaaha gue iyábale, de rexxa letu le atti rinnetu lenie. <sup>3</sup> Satíaguaba rexxa letu le lo Tata gueri do iyyabaaha gue iyá nu runle cumu ria lele Jesucristu, gue runle ca benni yuda de raquinle guecani lhe gue ruchíale lo nu ratele cumu xen lele Jesucristu Benni bananie ri lhe.

<sup>4</sup> Lebi'i ca benni ria le Jesús attiba ri'itu, Tata Do Iyyabaaha racanie guele, ri'itu yutu labe chi becuae le qui acale benni guee. <sup>5</sup> Cumu atti utixxi'entu le ca tisa tsee gue Jesucristuha, läga sunru leni tisa utixxi'entu le Ben-na, cheeguaba Ben-na elha ra xxen lee gue Espíritu gue Tata Do Iyyabaaha. Ri'itu nna itú iqui itú letu yutu anca nu ratu leha nu gualí. Gua yubale gue gasná bedú letu atti use'etu len lebi'i de bentu qui salía tseenle.

<sup>6</sup> Lebi'i nna runbale attiba runtu, attiba runi Jesús Benni bananie ri-na lhe. Masquiba guatele biyúle elha disa lo ni'a gue nu bedhaca Benni le cumu de güia lele ca tisa gue Jesús Ttiaca Espíritu gue Tata Do Iyyabaaha benie qui bedaca lele. <sup>7</sup> Anioca nna ucale benni rugüia ca benni ria le Jesús se'e lo yu te láni Macedonia lhe Acaya lhe gue gaxasná runle qui aníachu diacabi runcabi. <sup>8</sup> De lebi'i nna chi bina ca benni se'e lo yu te láni Macedonia lhe Acaya lhe ca tisa gue Jesús Benni bananie ri. Anáguaba lhe'e adí ca yiesi lhe chi yu benni gue gasná ria lele Tata Do Iyyabaaha. Larcala nna lärga biruha uca duelha quixxi'entu cana gue nu runle. <sup>9</sup> Cumu cuinaba lacana rixxi'aquinna ri'itu gue gasná benle len ri'itu atti bisíatu len lebi'iha, gue gaxasná uca bedhequile ria lele ca nu bittu gualí anca

<sup>a</sup> 1:1 Silas bi'ini láguaba Silvano.

diosi qui güia lele Dios Benni do iyyabaaha lhe qui runle nu raca lee Ben-na unle lhe. Bennarguaba nna gualí anque Dios, doe banie lhe.<sup>10</sup> Anáguaba rixxi'acana, lebi'i nna se'ele ribedale esía xi'inie Jesús dedee iyyabaaha. Benniha nua belhidha Tata Do Iyyabaaha lhe'e baa atta yu'u ca nu yatti-na. Jesús anque Benni rodile ri qui bittu dhíri elha disa la tsu'ubia chi daba isía ute Tata Do Iyyabaaha gue ca benni.

**Pablo rexxa lebi atti benbi sina gue Tata Do  
Iyyabaaha lhe'e yiesi Tesalónica**

**2** Lebi'i ca benni ria le Jesús attiba ri'itu gua yuxebale läga cuenta bita ri'itu atta se'ele-na.<sup>2</sup> Atti deobali isíatu atta se'ele-na, lebi'i nna chi binale gue iyába nu chi bedhaca ca benni ri'itu lhe'e yiesi Filipos-na, chi bedhaca güee cana ri'itu lhe chi utilhaxxatta lencana ri'itu lhe. Ttiaca Tata Do Iyyabaaha nna ucaba lanie ri'itu, ulequitsitsibe letu, qui udátu utixxi'entu le itú iqui itú letu ca tisa gue Jesús, masquiba tticaxa besuna benni lhe bese'e disa cana lotu lhe.<sup>3</sup> Cumu lägabi utixxi'a ri'itu tisa bittu anca gualí len lebi'i, bittuguaba bi re letu untu ttu bixa nu lä anca tsee len lebi'i lhe läbiguaba bettexxí yietu le lhe.<sup>4</sup> Delába unnuha nna ri'itu nna rinnebatu attiba rinne benni chi bedhaca le Tata Do Iyyabaaha guadábana unna sina guee, nioca nna udhelhe ri'itu quixxi'atu ca tisa guee-ni. Ri'itu nna anába rinnetu, läga run ri'itu qui eyo'o le benni gue nu rátu, runba ri'itu qui eyo'o le Tata Do Iyyabaaha gue nu rinnetu, cumu lee ritsatsa ni'e iyácea bixa raquin lhi'u lhe'e lastoori.<sup>5</sup> Lebi'i nna gua yubale, lägabi uca ri'itu nu atsacaba tsee daa ro'oni len lebi'i qui ixúyiele, bittuguaba beguila letu untu xiyya gue ttu bixa de ridá letu dhítu belhi lhe. Tata Do Iyyabaaha nna gua yuxeabe.<sup>6</sup> Bittuguaba runtu qui cu'u benni ri'itu biba lhe niguuba lebi'i lhe niguuba nuxarua benni lhe masquiba nna guatebana innábatu unle nu raca letu, de ancatu apóstol gue Cristu.<sup>7</sup> Delába unnuha nna ucalatu benni si'i le len lebi'i, attiba ttu nana ruyú si'i xi'inni.<sup>8</sup> De racabintu guele nna larcala nna uquintu läga suntteru ca tisa gue Tata Do Iyyabaaha quixxi'entu le, anáguaba berú iqui berúguaba letu elha nabani guetu utetu cuenta guele de raca si'ibintu le.<sup>9</sup> Gua rexxaba lele, lebi'i ca benni ria le Jesús attiba ri'itu, gue gasná guatetu urentu sina rela resába, qui bisela

nu utotu. Anía liba nna bittu bi betsitsintu ni ttule laca rixxi'entu le ca tisa gue Tata Do Iyyabaaha.

<sup>10</sup>Lebi'i lhe Tata Do Iyyabaaha lhe ancale benni biyú lole gue ucabatu benni du ta leni lhe benni runi nu anca tsee lo Tata Do Iyyabaaha lhe len lebi'i ca benni ria le Jesús. Tsa läga betetu lo neda inne güe benni guetu. <sup>11</sup>Gua yuguabale, ri'itu nna benbatu len lebi'i attiba runi ttu tata len xi'inni: chi ulequi tsitsitu lele lhe beteguabatu elha xen lasi len ttuttule lhe <sup>12</sup>belisaguabatu le qui udú lhatsiru lele atti du le benni chi anca gue Tata Do Iyyabaaha lhe. Lee chi uxie le qui edíbaale nu ga'ana tsee te atta rinnabie.

<sup>13</sup>Denua nna satíaba rugüetu xquixaru Tata Do Iyyabaaha, cumu atti bieninle ca tisa gue Ben-na utixxi'entu leha nna bedoba nagale, güiaba lele gua liba anca ben-na tisa gue Tata Do Iyyabaaha, läga uquinle anca ca tisa-na nu anca gue ca benni se'e yies lo yu-ni ucabinle gua liba anca ben-na tisa gue Tata Do Iyyabaaha, Ben-na unná runie sina lhe'e lastoole, lebi'i ca benni ria lele Jesús. <sup>14</sup>Lebi'i, ca benni ria le Jesús attiba ri'itu, atti guatele biyúle elha disa de bitturu uca uyú ca benni gue lo yies gueleha le, lania guatele attiba guate ca benni ancacabi gue Tata Do Iyyabaaha ria lecabí Jesús Benni anque Cristu ritupa lhe'e yiesi re lo yu te láni Judea, la ca benni quia anca benni Israelba besía lecani ca bi'iniha. <sup>15</sup>Ca nu Israel-na nuabetticana Jesús Benni bananie ri. Aníaguaba bencana leni ca benni uca profeta gue Tata Do Iyyabaaha use'e atti nía lhe chi bería lacana ri'itu lhe lo iyába benni rese'e disacana lhe bittu runcana nu re'o le Tata Do Iyyabaaha lhe. <sup>16</sup>Lacana nna rusunacana quixxi'entu ca benni bittu anca benni Israel ca tisa gue Jesús qui lhávana bittu tsia nitticana. Runcana aná nna la labacana diacana rudian adí tulha guecani axta qui dhacana utsa'aquinna Tata Do Iyyabaaha. Denuala nna utee elha disa dica ixuu guecani.

**Pablo raca lebi sannalhibi ca benni ria le  
Jesús se'e lhe'e yiesi Tesalónica attu libe**

<sup>17</sup>Lebi'i, ca benni ria le Jesús attiba ri'itu, atti biriestu le ttu sattiha nna masquiba nutturu le bilentu, ttiaca satíaba rexxa letu le, rdacalhabatu ilentu le attu libe lhe. <sup>18</sup>Denuala nna runtu itatu atta se'ele-na. Neti Pablo ixe libe chi benia ita, ttiaca nu xxegüiha nna bedheana lo neda quia. <sup>19</sup>Cumu, ¿núla nua raquinle anca nu unna qui dhítu nu xen letu lhe nú unna edaca letu lhe nú unna cue

xentu lo Jesús Benni bananie ri gan läba lebi'i nua atti utsá dule lo Benniha gansi chi besié? <sup>20</sup>Lebi'i ancale nu runi redaca letu lhe nu runi ribe xentu lhe.

**3** Atti bitturu udátu uchíatu de nutturle chi biyútu nna boquinnatteba iquitu eya'ana suntteba neti lania Silas lhe'e yiesi Atenas, <sup>2</sup>nianna udhelhattebatu betsiri Timoteo-na, bi'ini runi sina gue Tata Do Iyyabaaha, selaguabi ri'itu rixxi'abi ca tisa gue Cristu itabi atta se'ele-na qui use'etsitsibi le, uttipabi lele lhe. Anáchu nna tsiahatti lele Jesús, <sup>3</sup>qui bittu eyadi gaa ni ttule lo ni'a gue elha disa ruyúle-na cumu lebi'i nna chiba yule anába te sateri. <sup>4</sup>Atti se'elitu len lebi'ihha nna chi utixxi'entu le ri'i nna labíaba uyúri elha disa. Unnuha bunni chi raca nnanna lebi'i nna chiba yule. <sup>5</sup>Denuala nna atti bitturu udáya uchíana nna udhelhatteba Timoteo etegüiabi qui aca xen lasia gansi gua riaru lele Jesús, cumu rastia quila biaca bi uni nu xxegüiha dhi yien le udhequile ria lele Jesús. Lania nna sina bentuha nna bittubi ixuuna.

<sup>6</sup>Tiaca nnanna nna chiba besía Timoteo atta se'etu-ni dedaabi atta se'ele-na. Labi nna rixxi'enbi ri'itu gue tseeba ria lele Jesús, ancale benni racani gue adí benni lhe satíaba rexxa lele ri'itu itú iqui itú lele lhe rdacalhabale uyúle ri'itu lhe attiguaba ri'itu rdacatu uyútu le. <sup>7</sup>Larcala nna lebi'i ca benni ria lele Jesús attiba ri'itu, lagüiba atti texxatta elha richacha iqui guetuha lhe ruyútu elha disa lhe bedíruntu ttu elha xen lasi xeni de binatu dequi lebi'i nna tsitsiba ria lele Jesús. <sup>8</sup>De yutu lebi'i nna tsitsiba se'ele lo neda gue Jesús Benni bananie ri-na, ttuttíru be'o elha nabán guetu. <sup>9</sup>Gue unnuha nna bittu rede'entu tisa qui utetu xquixaru leni Tata Do Iyyabaaha guele lhe gue de yatterba chi benle bebe itta letu lhe atti rise'etu rudú xibitu lo Ben-na. <sup>10</sup>Rela resába rinnabatu len Tata Do Iyyabaaha, runtu duelha qui aca lanie ri'itu ilentu le attu libe. Laníha nna ule'entu le adí qui ede'enle ria lele Jesús.

<sup>11</sup>Cuinaba Tata gueri do iyyabaaha Benni anque Dios gueri lenie Jesús Benni bananie ri cu'uhe ri'itu neda itatu atta se'ele-na.

<sup>12</sup>Anáguaba cuinaguuba Jesús Benni bananie ri-na unie acachatti ruin gue loesle, gue iyába benni lhe attiba ri'itu raquintu guele.

<sup>13</sup>Laguabe unie cuequi tsitsi lele qui acale nu riesi lhe'e nu lä anca tsee, bittu tulha gueni te lo Tata gueri do iyyabaaha gansi chi besía Jesús Benni bananie ri, lanie iyába ca benni chi se'e riesi ancacabi guee.

### Gualuni nu re'o le Tata Do Iyyabaaha

**4** Nnanna nna lebi'i ca benni ria le Jesús attiba ri'itu, rinnabatu len le lhe rulisatu le lhe gualun chi lo ni'a gue Jesús Benni bananie ri, gualtse'e gualuni attiba bele'entu le unle qui chadi le Tata Do Iyyabaaha gue nu runle. Attiba runle nnanna aníaba gualunchatti. <sup>2</sup>Lebi'i nna chiba yule gue nu chi utixxi'entule unle, Jesús Benni bananie ri bete derechu len ri'itu qui ule'entu le gue nu unle. <sup>3</sup>Tata Do Iyyabaaha nna raca lee iriesle lhe'e nu lä anca tsee qui acale guee, larcala bittu tsequi mannile. <sup>4</sup>Coa ttu ttule utsá nále len latselale, cumu aná ru'u le Tata Do Iyyabaaha, gapaguuba le respeto latselale lhe. <sup>5</sup>Bittu udona lele sun ixúbinle cana un lenle cana nu ridá le cuerpu guele-na, attiba runi ca benni bittu anca biani Tata Do Iyyabaaha. <sup>6</sup>Ni ttu le bittu udhaca güele ttu betsi loesle, bittuguuba utsá ro'ole latsela nua lhe cumu Jesús Benni bananie ri ugüé ca nu uni anía ttu elha disa xeni, attiba chi rátu le lhe belisatu le lhe. <sup>7</sup>Tata Do Iyyabaaha läga uxie ri qui unri nu satsa, uxba Benniha ri qui acari nu riesi lhe'e nu lä anca tsee. <sup>8</sup>Larcala nna nuxa bittu iyieninna udona tisa gue ca tisa rule'etu-ni nna läganu xa benni nua rigu'u ni'a nua; Tata Do Iyyabaaha Benni bete Espíritu guee len ri'i, Bennihaba nua rigu'u ni'a nua.

<sup>9</sup>Lebi'i nna lägabi reasinle unto lo sitsi idhelhatu len lebi'i atta gátu le aquin gue betsi loesle, cumu chiba bele'eni Tata Do Iyyabaaha le aquin gue loesle. <sup>10</sup>Cumu anába runle leni iyába ca benni chi ria le Jesús se'e lo yu te láni Macedonia. Ttiaca rinnabatu lole, lebi'i ca benni ria le Jesús attiba ri'itu, acaruinle gue ca bi'in-na adí. <sup>11</sup>Gualuni duelha tse'e tseele len adí benni, gualulaba lele gue nu anca guele lhe gualcueni sina leni ni'a nále lhe attiba chi rátu le unle. <sup>12</sup>Aná gualuni quini tsia le ca benni bittu ria le Jesús guele, qui bittubi eyasa guele lhe.

### Bixa aca atti esía Jesús Benni bananie ri

<sup>13</sup>Lebi'i ca benni ria le Jesús attiba ri'itu. Ri'itu nna raca letu unale bixa sate ca benni yatti-na, qui bittu tse'e si'ile, attiba ca benni bittu ria le Jesús bittu xen lecani eyacani ca nu yatti-na. <sup>14</sup>Cumu attiguuba ria leri gualíba utti Jesús nianna beacanie attu libe, aníaguuba ria leri uni Tata Do Iyyabaaha, eyacani ca benni chi utti ria lecabí Jesúis qui esíacabi len Ben-na.

<sup>15</sup> Denuala nna rixxi'entu le ca tisa utixxi'en Jesús ri'itu. Ri'i ca benni bani atta sna se'erbari yies lo yu-ni atti esía Jesús, läga lo ri'i eneruri lo ca benni chi utti-na. <sup>16</sup> Cumu cuinaba Jesús Benni bananie ri eyadie dedee iyyabaaha, tsitsiba dedo ts'i'e runie mandadu, iyenguuba ts'i'i ingeli anca benni loha lhe iyenguuba cu'u ts'i'i trompeta gue Tata Do Iyyabaaha lhe. Lania nna primerba ca benni utti ria lecabí Jesús, eyacani. <sup>17</sup> Lenla nna dedaa ri'i ca benni bani sna se'erbari yies lo yu-ni, tulapaba olhopi Tata Do Iyyabaaha ri lenri ca bi'iniha lo bea-na, qui eti'ari Jesús Benni bananie ri lo be. Aníaba tse'e lenri Benniha ttu dia liiba. <sup>18</sup> Larcala nna gualute elha xen lasi len loesle leni ca tisa-ni.

**5** Lebi'i ca benni ria le Jesús attiba ri'itu, lägabi reasinle unia lo sitsi idhelha len lebi'i gue nucaxa aca aná lhe bixa sá lhe. <sup>2</sup> Cumu lebi'i nna chiba yuxebale, Jesús Benni bananie ri, esíe la sá bittu xen lele esíe, attiba runi ttu ubana iyyaba le benni risinna rachadina liscani lo rela. <sup>3</sup> Gansi chi inne ca benni innácan: "Iyábari chi se'e tseeri." Lärganu bi udhaquin loesni, laniala nna ttulhaba isía ttu elha disa xeni gue ca benni, attiba rate ttu nuila ttulhaba risía rutía lhe'eni qui cu'u xi'inni. Lo nua nna tsa läganu dhana lhána. <sup>4</sup> Ttiaca lebi'i, ca benni ria le Jesús attiba ri'itu, bittu acale nu se'e xulha leni qui lä iyyaba lele esía Jesús, lania nna satele attiba rate ca benni iyyaba lecani risinna ubana guecani. <sup>5</sup> Cumu iyábale chi ancale benni se'e lhe'e xieni, benni anca gue resá lhe, läga ancale benni se'e lhe'e chulha, niguuba gue lo rela lhe. <sup>6</sup> Larcala nna ri'i nna udori cuidadu, bittu acari attiba nu ti'edhi attiba adí benni. Nu unlari nna acalari benni tenná daa leni. <sup>7</sup> Ca nu ra'adhina ra'adhibacana lo rela. Ca nu ri'ana nna ru'ucana ri'acana lo rela. <sup>8</sup> Ttiaca ri'i nna cumu ancari benni gue resá, satía tse'eri yaan lee, delába bittu bitti unri. Acalari attiba ttu soldado yadina iyya qui bittubi dhacana, iyya yadi nua ancana nu ria tsitsi leri Jesús lhe raquinri gue adí benni lhe. Cascu nu rigu'u iqui nua nna ancana nu xen leri godilába Tata Do Iyyabaaha ri <sup>9</sup> Tata Do Iyyabaaha nna läga uxi Benniha ri lo neda guee qui utee ttu elha disa xeni gueri lo ni'a gue ca tulha benriha, uxba Benniha ri qui odile ri leni iyá nu guate Jesucristu Benni bananie ri lo ya crusicha. <sup>10</sup> Jesucristu uttie cuenta gueri qui tse'eri len lee gansi chi besíe, si se'eri banri lhe si chi uttiri lhe ttiaca tse'ebari lenie. <sup>11</sup> Larcala nna gualuttipa le loesle lhe gualcuequi tsitsi le loesle lhe attiba chi runle.

### Ni riluxa ca tisa rulisa Pablo ca benni Tesalónica

<sup>12</sup>Lebi'i ca benni ria le Jesús attiba ri'itu, rinnabatu lenle tsia lele ca benni runi sina gue Tata Do Iyyabaaha se'e len lebi'i, ca bi'in-na ancacabi benni banquinbi le lo neda gue Jesús Benni bananie ri, lacabi rulisacabi le qui bittu unle nu lä anca tsee lhe. <sup>13</sup>Gapale cabi respeto lhe aquinle guecabi lhe de ancacabi benni runi sina gue Tata Do Iyyabaaha. Lhatsiru gualtse'e, bittu ttilha len loesle. <sup>14</sup>Rinnabaguatu lenle, lebi'i ca benni ria le Jesús attiba ri'itu, gualquisa ca nu bittu raca lecani bixa uncana, gualuttipa lee ca nu rdaca eyadi gaa lo neda gue Tata Do Iyyabaaha lhe gualuni yuda ca nu bittu se'e tsitsi lo neda gue Ben-na lhe acale benni pasensi leni iyá benni lhe. <sup>15</sup>Gualudo cuidadu bittu eyequile unle nu lä anca tsee len nu benni nu bittu anca tsee len lebi'i. Nu unlale nna gualuni duelha unle nu anca tsee len loesle, leni iyába benni lhe. <sup>16</sup>Ttu dia lii tse'ele edaca lele. <sup>17</sup>Satía gualnne len Tata Do Iyyabaaha. <sup>18</sup>Gualute xquixaru len Tata Do Iyyabaaha gue bixaba aca, cumu aná raca le Benniha unle de ancale benni ria le Jesús Benni anque Cristu. <sup>19</sup>Bittu udheale lo sina runi Espíritu gue Tata Do Iyyabaaha len lebi'i. <sup>20</sup>Bittu cu'u ni'ale ca tisa ruta Tata Do Iyyabaaha rinne ca benni. <sup>21</sup>Gualtsatsa ni'a iyá nu rieninle, suntteba gue nu anca tsee gualudo tisa gualuni. <sup>22</sup>Tsa bittu unle ni ttu nu bittu anca tsee.

<sup>23</sup>Cuina Tata Do Iyyabaaha Benni ruta elha xen lasi lenri, ttu tsa cuequiesie le lhe'e nu lä anca tsee qui acale nu anca nari loe. Lee cua tsee itúle, delába espíritu guele lhe lastoole lhe cuerpu guele lhe qui se'ele ancale nu bittu tulha gueni te gansi chi besía Jesucristu Benni bananie ri. <sup>24</sup>Tata Do Iyyabaaha benni uxie le acale benni guee anque benni runi nu rinnee, lee nna gunbe iyá nu chi re unie-ni.

<sup>25</sup>Lebi'i ca benni ria le Jesús attiba ri'itu, gualinnaba len Tata Do Iyyabaaha aca lanie ri'itu.

<sup>26</sup>Gualgási ca benni ria le Jesús attiba ri'i padiuxi cuenta quia, attiba labi ca benni ancacabi gue Tata Do Iyyabaaha runcabi.

<sup>27</sup>Rinnaba lenle aní lo Jesús Benni bananie ri, ulabale lo sitsi-ni len iyába ca benni ria le Jesús attiba ri'i.

<sup>28</sup>Jesucristu Benni bananie ri aca lanie le. Amén.

# Sitsi berupa udhelha Pablo atta se'e ca benni ria le Jesús lhe'e yiesi Tesalónica

**1** Neti Pablo, lenia Timoteo lhe Silvano lhe runtu lo sitsi-ni ridhelhatu guele, lebi'i ca benni ria le Jesús ritupa lhe'e yiesi Tesalónica. Lebi'i chi ancale benni baba len Dios Benni anque Tata gueri lhe leni Jesucristu Benni bananie ri lhe. <sup>2</sup>Cuina Tata gueri do iyyabaaha lenie Jesucristu Benni baninie ri aca lenque le, unque tse'ele lhatsiru lhe.

## Pablo rixxi'abi bixa aca atti esía Jesús

<sup>3</sup>Lebi'i ca benni ria le Jesús attiba ri'itu, satíaba raca duelha utetu xquixaru leni Tata Do Iyyabaaha guele. Anía raxxína untu, cumu lebi'i nna ttu diabale riaru lele Jesús, ttu diaguaba cua ttu ttule racaruin gue loesle lhe. <sup>4</sup>Denuala nna ya de rilhopi letu atti rixxi'atu nu anca guele len ca benni ancacabi gue Tata Do Iyyabaaha. Rixxi'entu cabi lebi'i nna ancale benni rugo ruchía lo nu ratele, tsitsiba ria lele Jesús lagüi lo atti rusía le benni le lhe lagüi lo atti ruyúle elha disa lhe. <sup>5</sup>Unní runna rule'e lo, Tata Do Iyyabaaha anque benni runi elha uxtisi lhixxa. Denuala nna rudhaca lee lebi'i ancale benni iselale ca benni rinnabie. Lo ni'a gue unnuha nna ratele nnanna. <sup>6</sup>Tata Do Iyyabaaha runie nu anca tsee; lee nna ute elha disa gue ca nu runcana ruyúle elha disa. <sup>7</sup>Lebi'i ca nu rate ruyú elha disa nna cuabe iyácea nu ratele. Anáguaba unie len ri'itu la sá gansi chi beacaxxe Jesús Benni bananie ri dedee iyyabaaha lhe'e belha gue gui lenie ca ingeli ra tsitsi le guee. <sup>8</sup>Esíe qui utee elha disa ralha ca nu bittu raca lecani tsia lecani Tata Do Iyyabaaha, lä bedoguabacana tisa gue nu rá ca tisa gue Jesús Benni bananie ri lhe. <sup>9</sup>Ca unná nna ttu tsaba dia nitticana atta uyúcana elha disa ttu dia lii. Iru'unacana idittu gue atta do Benni bananie ri lhe gue atta ra xxeni le ru'u xieni ga'ana tsee do Benniha lhe. <sup>10</sup>Unní aca gansi chi bisía sá esía Jesús qui inná ca benni, lee anque Benni ra xxeni leni atti iláquinna ca benni guee se'e riesi lhe'e nu lä anca tsee, iyába ca benni ria lecani Benniha nna eyo'o lecani atti iláquinne. Lebi'i lhe selaguabale len ca bi'iniha cumu güiaba lele gue nu utixxi'entu le gue Benniha.

<sup>11</sup> De unnuha nna satíaba rinnabatu lo Tata gueri do Iyyabaaha aca lanie le cumu labe uxiele lo neda guee. Rinnabaguatu lenie aca lanie le leni elha ra xxeni le guee qui dhale unle iyá nu tsee raca lele unle, iyáloba sina runle de ria le lee lhe. <sup>12</sup> Aná nna ca benni nna cuequi xencana Jesús Benni bananie ri de runle nu anca lhatsiru, Benniha nna gunbe cue xenle. Tata gueri do iyyabaaha lenie Jesucristu Benni bananie ri, anába beda leque unque.

### Antisla esía Jesús, acaxxe nu runi taga'a nu anca satsa

**2** Nnanna nna lebi'i ca benni ria le Jesús attiba ri'itu, raca letu quixxi'entu le gue nu aca atti chi daa isía sá esía Jesucristu Benni bananie ri, gue atti eti'ari Benniha lhe. Rinnabatu lenle, <sup>2</sup>bittu cuenta otsiaxxile attiba chi rulaba lele, lä ugüelhaguabale nuxa cuentaba unniesinna le innána: “Chi bisía sá esía Jesús Benni bananie ri, aní rá Espíritu gue Tata Do Iyyabaaha”, o innána: “Aní chi bienintu rá cana lhe” o “Aní rá lo sitsi udhelha ca nua len ri'itu lhe”. <sup>3</sup>Tsa bittu ugüelhale nuxa dhi yienle, cumu antisla isía sá atti esía Benniha nna iría ixeru benni ese'e disacana lo Tata Do Iyyabaaha, acaxxeguaba unbiyuu ancana nu runi taga'a nu anca satsa lhe nu chi ga'ana tsaba tsia nittina. <sup>4</sup>Unnuha nua iríana edú disana lo Tata Do Iyyabaaha, unna dequi lana ancana nu ra xxeni leni delo iyába ca nu rá benni anca diosi lhe ca nu rudú xibicani locani lhe. Unnuha nna eyaxinna tsiana sadhona lhe'e yotu gue Tata Do Iyyabaaha unna attisiba labana nua anca Dios. <sup>5</sup> ¿Si bittuba rexxa lele utixxi'abatia le nu ria-ni atti dorua len lebi'iha?

<sup>6</sup> Nnanna nna lebi'i nna chiba yule bi nua runi qui bittu aca xxexxi nu runi taga'a nu anca satsaha antisla isía sá chi ga'ana aca xxena. <sup>7</sup> Cumu nu lä anca tsee re lee unbiyuu runi taga'a nu anca satsaha unna nna sigába chi udulo nua racana. A sun reasaba itúa nu bittu rugüelha na acaxxe nua. <sup>8</sup> Dequi de liba ttua nua nna acaxxe unbiyuu runi taga'a nu anca satsaha, nu utti Jesús Benni bananie ri leni be iría ro'e, leni xieni ru'u guee dedee nna ulhuxé na. <sup>9</sup> Unbiyuu runi taga'a nu anca satsaha nna isíana cheena elha ra xen lee gue nu xxegüiha qui unna ca milagru, unna ule'en benni ca nu uni ebaninri lhe. Leni unnuha nna dhi yiena benni. <sup>10</sup> Lana nna unna iyáloba nu lä anca tsee qui dhi yiena ca nu dia nitti, cumu bittu uca lecani tsia lecani gue nu anca gualí qui lhácana. <sup>11</sup> Denuala nna ugüelhaba Tata Do Iyyabaaha ixú yiecana qui tsia

lecani itú iqui itú lecani gue nu bittu anca gualí.<sup>12</sup> Lania nna iyába ca nu bittu uca lecani tsia lecani gue nu anca gualí nna tsiacana atta dhicana elha disa, cumu de be'ola lecani bencana nu bittu anca tsee.

### **Tata Do Iyyabaaha chi becuee ri qui lhári**

<sup>13</sup> Tiaca ri'itu nna satíaba labíaba rutetu xquixaru len Tata Do Iyyabaaha guele, lebi'i, ca benni ria le Jesús, racani Jesús Benni bananie ri-na guecani. Rutetu xquixaru len Tata Do Iyyabaaha cumu Benniha chi becuee le atti deobali cue yies lo yu-ni qui lhále. Lebi'i nna lhále cumu Espíritu gue Ben-na runie le benni se'e riesi lhe'e nu lä anca tsee qui acale nu anca nari loe, de ria lele nu anca gualí lhe.<sup>14</sup> De unnuhala nna uxi Tata Do Iyyabaaha le atti bieninle ca tisa gue Ben-na utixxi'entu leha, qui galhale tse'ele atta ga'ana tsee anca gue Jesucristu Benni bananie ri.<sup>15</sup> Larcala nna lebi'i ca benni ria le Jesús attiba ri'itu, tsitsi gualtse'e, bittu udhá iquile iyá nu chi bele'entu le, niguaba gue nu bentu lo sitsi lhe.

<sup>16</sup> Cuinaba Jesucristu Benni bananie ri lenie Tata gueri do iyyabaaha, de ucacanie gueri nna besi'licanie ri beteque ttu elha xen lasi xeni lenri, runque uxten leri guadíbari nu tsee xen leri dhíri lhe<sup>17</sup> laque unque tse'e tsitsile lhe uttipaque lele lhe qui unle lhe innele lhe iyá nu anca tsee.

### **Pablo rábi ca benni se'e Tesalónica innábacabi lo Tata Do Iyyabaaha aca lanie bi**

**3** Nnanna nna rinnabatu lenle, lebi'i ca benni ria le Jesús attiba ri'itu, gualinnaba lo Tata Do Iyyabaaha aca lanie ri'itu qui yuba isína ca tisa gue Jesús Benni bananie ri lhe'e iyá yiesi, qui ute ca benni lidhaca Ben-na lhe attiba runle rutele lidhaca Ben-na.

<sup>2</sup> Gualinnaba guaba aca lanie ri'itu qui lhátu lo ca benni bittu du ta lecani runi nu bittu anca tsee, cumu läga iyá benni ria leni Jesús.

<sup>3</sup> Ttiaca Jesús Benni bananie ri-na anque benni runi nu rinnee. Lee nna gunbe tse'e tsitsile, guapabe le qui bittubi udhaca ni nu xxegüiha le.<sup>4</sup> Xenba letu, Jesús Benni bananie ri-na guaracaba lanie le qui runle nu chi rátu le unle, gusiguibale unle nu chi bele'entu le lhe.<sup>5</sup> Benni bananie ri-na aca lanie le qui acale benni raquin gue benni attiba racani Tata Do Iyyabaaha gueri, acale benni rugo ruchía lo nu ratena lhe attiba Cristu bego bechie lo nu guate.

### Raca duelha cuenri sina

<sup>6</sup>Lebi'i ca benni ria le Jesús attiba ri'itu, runtu le mandadu gualuni lo ni'a gue Jesucristu Benni bananie ri, iriesle nuxaba benni rana ria leni Jesús bittu raca leni bixa unna bittuguaba runna nu chi bele'entu le unle lhe. <sup>7</sup>Cumu lebi'i nna gua yubale gaxasná unle qui acale nu runi atti runtu. Ri'itu nna lägabi use'etu cuenta atti use'etu len lebi'ihā, <sup>8</sup>bittuguaba utotu elha go gue nuxa benni cuentaba nianna bittu utixatu lhe. Nu benlatu nna tsitsiba urentu sina rela resába qui bittu ucatu nu uni ichacha iquile guetu. <sup>9</sup>Ri'itu nna gua teba ro'otu gátu le unle ri'itu yuda, ttiaca urenbatu sina qui anáchu lebi'i nna ugüiale gaxasná runtu qui aníaguaba unle. <sup>10</sup>Atti use'etu len lebi'ihā nna rátu le: Nu bittu raca leni cuenna sina nna bittuguaba go nua. <sup>11</sup>Ri'itu nna chi binatu, ttulhele nna bitturu ribenle sina. Nu doba lele nna tsequile uga'a guele atta bittu ralhale uga'a guele. <sup>12</sup>Lebi'i atta runle aná nna rulisatu le lhe rinnabatu lenle lhe gualunchi lo ni'a gue Jesucristu, Benni bananie ri, lhatsiru gualuni, gualcuen sina qui te bixa gole.

<sup>13</sup>Lebi'i ca benni ria le Jesús attiba ri'itu, bittu saxxaquinle unle nu anca tsee. <sup>14</sup>Gansi nuxa bittu tsia leni nu rátu lo sitsi-ni nna gualuni qui tsanni lo anca nua nu bittu rudo tisa, bitturu igutsale na lhe qui ettuinna. <sup>15</sup>Ttiaca bittu ise'enle lenna gualudúla elha rieni iquini attiba runle leni adí ca benni ria le Jesús attiba ri'i.

### Ni riluxa nu rá Pablo ca benni se'e lhe'e yiesi Tesalónica

<sup>16</sup>Jesús Benni bananie ri-na anque Benni rute elha xen lasi. Ben-na utee elha xen lasi lenle ttu dia lii, atti bixaba ratele lhe. Cuina Ben-na aca lanie iyá xeale.

<sup>17</sup>Neti Pablo, cuinaga neti runia letra atta riluxa nu dia lo sitsi-ni qui ridhelha ttu padiuxi guele. Aníba runia lo iyá ca sitsi quia ridhelha, aníguaba rigu'u láya xa ni'acani lhe.

<sup>18</sup>Cuina Jesucristu Benni bananie ri-na aca lanie iyárecha le.  
Amén.

# **Sitsi primero udhelha Pablo len Timoteo**

**1** Neti Pablo, anca apóstol gue Jesucristu. Tata Do Iyyabaaha Benni rodile ri qui bittu tsia nittiri, lenie Jesucristu Benni xeni unie nu chi unnee bodúque neti. <sup>2</sup> Na ridhelha sitsi-ni guelu, xa Timoteo. Lu anca attisiba xi'inia de bele'etia lu ria lelu Jesús.

Cuina Tata gueri do iyyabaaha lenie Jesucristu Benni bananie ri, aca lenque lu, satúa leque lu lhe unque dholu lhatsiru lhe.

## **Gualdo cuidadu len ca tisa subi, ca nu bittu raxxína len nu bedhetiri gue Jesús**

<sup>3</sup> Attiba chi unnaba len lu atti udáya diaya lo yu te láni Macedonia, lu nna eya'anchilu lhe'e yiesi Éfeso qui ulisalu ttu chupa ca benni se'e-na, bitturu ule'equinna ca benni bixarua attu tisa subi nu bittu raxxína len nu bele'etia le gue Jesús. <sup>4</sup> Ulisaguabalu cana qui bitturu tse'ecana udo nagacani gue ca cuentu rotsi'inule ca benni lhe bitturu udo lecani innexxattacana gue nupaxa uca benniola guecani lhe. Cumu tsa läga anca ga lhuxa gueonna.

Sunruba runi unna ritilha tisa benni, tsa lägabi rixuu unná qui use'e tsitsincana lo neda gue Tata Do Iyyabaaha de ria lecani Ben-na.

<sup>5</sup> Bodha'ana lu nna de runia ule'enlu cana qui aquin gue loescani, cumu aná runi benni anca lhe'e lastooni nari, nu yuxebana gua runbana nu anca tsee lo Tata Do Iyyabaaha lhe nu gualínna itú iqui itú leni ria leni ca tisa-na lhe. <sup>6</sup> Ttiaca ttulhe ca benni nna lärga runcana aná, ubiattalacana lo neda tsee-na. Gue nu bittu rixuula ru'ucana ritilha tisacana. <sup>7</sup> Rdacacana acacana nu rule'e nu rá lo ca ley gue Tata Do Iyyabaaha, ttiaca niguaba lacana lä radú lecani gue ca tisa rinnecana, niguaba gue nu rule'ecana itú iqui itú lecani lhe.

<sup>8</sup> Ri'i nna gua yubari, tseeba anca ca ley gue Tata Do Iyyabaaha gansi ri'i ixuinri que attiba raca lee Ben-na. <sup>9</sup> Orexxaguaba leri lhe läga uca ca ley-na qui udelha iyyaque ca benni runi nu anca tsee, ucabaque qui udelha iyyaque:

ca nu rese'e disa lo ca ley-na,  
ca nu lä rudo tisa gue Tata Do Iyyabaaha lhe  
ca nu bittu rudú xibicani lo Tata Do Iyyabaaha lhe  
ca nu te tulha guequinna lhe

ca nu rigu'u ni'acani Tata Do Iyyabaaha lhe nu anca le'a gue  
 Ben-na lhe  
 ca nu rutti tata nan guequinna lhe  
 iyába ca nu runi elhutti-na lhe  
<sup>10</sup> ca nu requi manni-na lhe  
 ca unbiyuu runi nu satsa leni la loesi unbiyuuba cana lhe  
 ca nu rudaxxu sigá benni qui uto'ocana lhe  
 ca nu run lequinna lhe  
 ca nu chi bodha'an tisa bitturu un lecani nianna sa runruba  
 lecani lhe  
 iyába ca nu rese'e disa lo ca tisa rixxi'a nu gualí anca gue  
 Tata Do Iyyabaaha rule'eri lhe.

<sup>11</sup> Unní rá ca tisa ga'ana tsee anca le'a betee Tata Do Iyyabaa benni  
 ra xxeni lee na len neti qui quixxi'aya que.

**Pablo rutebi xquixaru len Tata Do  
 Iyyabaaha cumu de guatúa lee bi'iniha**

<sup>12</sup> Jesucristu, Benni bananie ri, rudú tsitsie neti. Rutea xquixaru  
 len Benna cumu xen lee neti, denua nna bodúe neti aca ttu benni  
 un sina guee. <sup>13</sup> Masquiba ca tu ttuha nna uca ttu benni unne güee  
 gue Ben-na, bería laya ca benni ria lecani guee lhe bedhaca si'acabi  
 lhe, ttiaca lee nna guatúaba lee neti cumu läga chi ria lasie lania,  
 bittuguaba yua bixa nua runia lhe. <sup>14</sup> Jesucristu, Benni bananie ri,  
 bedaa lee uca lenie neti qui ria lasie, qui racatia gue adí ca benni  
 lhe cumu de chi dua lenie.

<sup>15</sup> Tisa anca gualí ben-ni rinnea, nu dica tsia le iyácea ca benni:  
 Jesucristu bite yies lo yu-ni qui odile ca benni runi nu lä anca tsee  
 qui bittu tsia nnitticana. Delo iyába ca benni runi nu lä anca tsee,  
 netiba anca nu uttaru tulha gueni. <sup>16</sup> Ttiaca Tata Do Iyyabaaha  
 nna guatúanie neti qui bele'e lo Jesús Benni anque Cristu lee nna  
 ratúanie nuxaba benni. Anioca nna uca benni ugüia ca benni qui tsia  
 lecani Jesucristu, lania nna gatta elha nabani guecani ttu dia liiba.  
<sup>17</sup> Larcala nna satíaba rári: "Xxeni ra lelu, Tata Do Iyyabaa Benni  
 rinnabia ttu dia lii. Lä gattiguabalu lhe lä rilágubani ca benni lu  
 lhe. Tturbalu do ancalu Tata Do Iyyabaa, yulu iyárecha lhe." Amén.

<sup>18</sup> Timoteo, lu ancalu attiba xi'inia. Nnanna nna rodha'ana las  
 nálu nu rpealu-ni, tsa bittu gasinlu unlu sina gue Tata Do Iyyabaaha  
 itú iqui itú lelu, cumu anába chi utixxi'a ca benni unne ca tisa

bete Tata Do Iyyabaaha. Neti nna xenba lasia tseeba unlu sina nu chi ga'ana unlu.<sup>19</sup> Tsitsi güia lelu Jesús, beni nu anca tsee lhe qui bittu bi te nu unna udú xiyyan lu. Cumu ttulhe ca benni de bitturu bedocana tisa uncana nu racaquinna anca tsee, nuarca bedhá iquicani ria lecani gue nu anca gualí.<sup>20</sup> Lhe'e ca unnuha nna nutsa ttu nu lá Himeneo, attu nu lá Alejandro lhe. Lacana nua chi bodha'ana las ná nu xxegüiha, qui ideticana bittu inne güeecana gue Tata Do Iyyabaaha.

**Pablo rixxi'abi nu dica un ca benni ria le Jesús gansi chi  
rise'ecabi rulhacabi gue Tata Do Iyyabaaha**

**2** Lotteba nu rinnaba nna gálú ca benni ria le Jesús, innecabi leni Tata Do Iyyabaaha. Innábacabi nu reasaquinbi lhe innábacabi aca lani Ben-na iyába ca benni lhe utecabi xquixaru leni Ben-na gue iyába lhe.<sup>2</sup> Innábacabi qui aca lanie ca nu rinnabia-na lhe iyába ca uxtisi-na lhe qui anáchu tse'eri lhatsiru, udo leri nu anca gue Tata Do Iyyabaaha lhe gapa loesri respeto lhe.<sup>3</sup> Unní ancana ttu nu tsee, ancana nu re'o le Tata Do Iyyabaaha benni bodile ri qui bittu tsia nnittiri.<sup>4</sup> Cumu Ben-na raca lee lhá iyárecha ca benni qui bittu tsia nnitticana, e'eyucana sadú lecani gue nu anca gualí lhe.<sup>5</sup> Cumu tturba ttu Tata Do Iyyabaa do, tturguaba benni do rose'e tsee ca benni leni Tata Do Iyyabaaha lhe Benniha nua unbiyuu lá Jesús Benni anque Cristu.<sup>6</sup> Lee nua uxielhabe betticane. Anía liba nna utixe gue ca tulha gueri qui lhá iyári bittu tsia nittiri. Unní nua bele'e lo Tata Do Iyyabaaha atti bisía sá chi ga'ananie.<sup>7</sup> Denuala nna bodúe neti aca apóstol qui tsequia quixxi'aya ca tisa gue Jesús, acaguuba benni ule'eni ca benni bittu anca benni Israel-na lhe. Ule'etia cana gue gaxasná tsia lecani ca tisa gue Tata Do Iyyabaaha lhe gue nu anca gualí lhe. Gualíbatia nu ria-ni, läga run lasia.

<sup>8</sup> Larcala nna raca lasia inne ca unbiyuu-na len Tata Do Iyyabaaha gaxaba se'ecana, güetsaa ilidha ná ca unbiyuu runi nu ru'u le Tata Do Iyyabaaha, ca nu bittu risa'aquinna lhe ca nu bittu ritilha tisacana lhe.<sup>9</sup> Anágua ba ca nuila-na lhe lhatsirba ucu xocani attiba raxxína anca tsee. Bittu eyocu tseexxatta xocani sunruba qui ebanin benni, bittuguuba eyon tseexxatta iquicani lhe lä osiaguuba iquicani nu anca leni oro lhe lä cu'uguuba yiencani begá anca leni perla lhe lä ucuguabacana lari dacaxxatta yaxi lhe.<sup>10</sup> Lacana nna tseerla ule'ecana gansi uncana nu anca tsee, attiba run ca nuila

gualígaquinna runcana nu dica ixuu lo Tata Do Iyyabaaha.<sup>11</sup> Ca nuila-na nna siba tse'ecana udo nagacani atti quixxi'a ca benni ca tisa gue Tata Do Iyyabaaha.<sup>12</sup> Neti nna läga rugüelha ca nuila-na ule'equinna ca unbiyuu-na, bittuguuba rugüelha innabiacana ca unbiyuu-na lhe. Delába unnuha nna siba tse'ecana udo nagacani.<sup>13</sup> Cumu primerba Adán beni Tata Do Iyyabaaha, lenla nna benie Eva.<sup>14</sup> Bittuguuba Adán nua uxíyie nu xxegüiha, nuilaha liba nua uxíyie nua, dequide chi bixúyiena nna benttebana nu rá Tata Do Iyyabaaha bittu unna.<sup>15</sup> Ttiaca gualába nuila-na de use'e xi'inni, ladiba gua ria leni Tata Do Iyyabaaha lhe ancana nuila si'i le lhe ancana nuila do riesi lhe'e nu lä anca tsee lhe nu bittu bittiba runna lhe.

### **Gasná dica un benni anca nu lo gue ca benni ria le Jesús**

**3** Tisa anca gualí ben-ni rinnea: Gansi nuxa ttu benni rdacabi acabi nu lo gue ca benni ria le Jesús, tseeba anca sina ridá le bi'iniha unbi.<sup>2</sup> Larcala nna benni anca nu lo gue ca benni ria le Jesús riquina acabi:

ttu nu bittu bi teni ca benni bixa gácan bi,  
nu suntteba ttu nuila dho lenbi lhe  
nu ridá rinnabia elha rieni gueni lhe  
nu rulaba tsee leni gue nu unna lhe  
nu runi nu anca lhatsiru qui gapa benni bi respeto lhe  
nu rute ganna lisni qui eya'an ganna benni lhe  
ttu nu guaca gueni ule'enna adí benni lhe  
<sup>3</sup> ttu nu bittu ancana nu ri'iya lhe  
ttu nu bittu re'o leni ritilha na lhe ttu nu bittu ridá leni belhi lhe.

Benni aca nu loha nna acabi benni du tsee leni,  
nu bittu run disa lhe.

<sup>4</sup> Bi'ini raca guebi rinnabia bi ca benni se'e lhe'e lisbi lhe rulisabi ca xi'inbi qui udocana tisa guebi lhe ria lecan bi lhe.

<sup>5</sup> Cumu benni bittu raca guebi innabiabi ca benni se'e lhe'e lisbi nna läga aca gue nua ule'enna ca benni ria le Tata Do Iyyabaaha.

<sup>6</sup> Bittuguuba dica aca ttu benni bittu chi anca isá bedaxxubi nedá gue Tata Do Iyyabaaha nu lo, cumu quini

lä unbi ttaba nianna initibbi attiba binitti nu  
xxegüiha.

<sup>7</sup> Racaguuba duelha unbi nu anca lhatsiru qui inne tsee ca nu  
bittu ria le Jesús guebi. Anía liba nna bittu cu'u  
ni'acan bi, qui bittu iyinnabi lo yalhi gue nu  
xxegüiha.

**Gasná dica un ca benni realha ladicabi qui  
uncabi yuda ca benni ria le Jesús**

<sup>8</sup> Anágua ca benni rese'e qui uncabi yuda ca benni ria le Jesús,  
lacabi nna acacabi nu gapa benni respeto,  
nu bittu run leni lhe  
nu bittu ancana nu dusi lhe  
nu bittu ridá leni dhi sigána belhi lhe.

<sup>9</sup> Acacabi ca benni nu bittu te bixa uqu'ana tse'e tseecabi lo  
Tata Do Iyyabaaha, nu bittu udhana ria lee ca tisa  
gue Jesús lhe delába ca tisa chi bele'eni Tata Do  
Iyyabaaha cabi nnanna.

<sup>10</sup> Lacabi nna primerxa acacabi ttu prueba qui ule'ena gansi  
gua dica acacabi ca benni un yuda ca benni ria le  
Jesús.

Gansi nuttuba nu cu'u ni'an cabi nna gua dicaba eyyalha  
ladicabi lania.

<sup>11</sup> Anágua ca nuila, acaguabacabi bi'ini gapa ca benni  
respeto,  
nu bittu rinne bittiba gue ca benni nu bittu anca gualí lhe  
nu raca gueni rinnabiana elha rieni gueni lhe  
nu runi iyá nu rána lhe.

<sup>12</sup> Ca unbiyuu realha ladicabi qui uncabi yuda ca benni ria le  
Jesús, acaguabacabi nu dho leni suntteba ttu  
nuila,  
nu rinnabia tsee ca xi'inbi lhe adí ca nu se'e lhe'e yo'o guebi  
lhe.

<sup>13</sup> Cumu ca benni realha ladicabi qui uncabi yuda ca benni ria le  
Jesús run tsee sina daa locabi uncabi nna re'eyucabi rapa benni  
cabi respeto, chi te ttu elha xen lhasi guecabi lhe de chi ria tsitsiru  
lecabi Jesucristu.

<sup>14</sup> Ca tisa-niba runia lo sitsi ridhelha guelu xa Timoteo, masquiba chiguuba ruxxen lasia itattegaba etennalhia lu, <sup>15</sup> cumu gansi isáya nna lania nna chi yulu gaxasná unlu leni ca benni chi baba leni Tata Do Iyyabaaha. Lacabi ancacabi yotu gue Tata Do Iyyabaa benni anca bani. Ancacabi ca benni se'e tsitsi rixxi'a ca tisa anca gualí gue Jesús attiba ttu yati nu du den tsitsina ttu yo'o. <sup>16</sup> Gualíba, xxenba anca gue ca tisa gue Cristuha chi yuri nnanna nu bittu chi yu benni ca tu ttuha:

Jesús bite yies lo yu-ni, uque benni attiba ri'i.

Espíritu gue Tata Do Iyyabaaha bele'e loe gualíba anca Jesús benni runi nu anca tsee.

Biláni ca ingeli gue Tata Do Iyyabaaha Benniha lhe utixxi'acana gue Benniha leni ca nu bittu anca benni Israel-na lhe.

Güia lee ca benni se'e yies lo yu-ni Benniha, bedí Tata Do Iyyabaaha Benniha qui besine attu libe iyyabaaha lhe.

### **Bedo cuidadu len ca benni rixxi'a ca tisa subi**

**4** Espíritu gue Tata Do Iyyabaaha nna lhixxa suba rixxi'e re, atti chi daa ribiga isía sá lhuxa yies lo yu-ni, ttulhe ca benni ria le Jesús bitturu tsia lecani Ben-na. Gue ca benni rixuuni ca be xxegüi ridí yiela udo nagacani, tsia lecani gue nu ule'e ca nua lhe. <sup>2</sup> Ca unnuha nna ancacana nu run leni. Tsaba bitturu raca guattequinna runcana aná, cumu tsaba anca elha rieni guecani chulha. <sup>3</sup> Lacana nna bitturu uguelhacana utsá ná benni, innabiaciona bitturu go benni ttulhe ca elha go chi ga'ana go benni lhe. Tata Do Iyyabaaha nna chiba boca'ane gori nua, cumu atti ro ca benni ria le Jesús yu nu anca gualí nua nna rutecabi xquixaru len Tata Do Iyyabaaha. <sup>4</sup> Iyába nu beni Tata Do Iyyabaaha te yies lo yu-ni nna tseeba ancacana. Läga dica cu'u ni'ari unnuha, gua dicaba gori na, ladiba uteri xquixaru len Tata Do Iyyabaaha. <sup>5</sup> Cumu len ca tisa gue Tata Do Iyyabaaha lhe len ca tisa rinneri rulisari Benna lhe reaca benni rori-na nu anca le'a.

### **Pablo rulisabi Timoteo qui unbi lhatsiru sina gue Jesús**

<sup>6</sup> Gansi lu ule'enlu ca benni ria lecani Jesús attiba chi ria lu-ni, lania nna ancalu ttu benni tseeba rixuu lo sina gue Jesucristuha,

nu tseeba yuna ca tisa ria leri-na lhe nu chi deti tseena gue nu bedhetina lhe. Ca tisa-na ben-na dialu rudo tsitsilu tisa gueque. <sup>7</sup> Bittu udo nagalu gue ca cuentu ca nu rotsi'inu le ca benni, ca nu bittu anca gualí rixxi'a ca benni lhe. Nu unlalu nna benla qui unlu nu re'o le Tata Do Iyyabaaha. <sup>8</sup> Cumu ca benni runi qui aca tsitsi cuerpu gueni nna ttu sattirba ixuu nua len lana, ttiaca unri nu re'o le Tata Do Iyyabaaha nna ancana nu rixuu satíaba gue iyába ttu bixa. Unná ixuu se'eri yies lo yu-ni lhe gansi chi besinri iyyabaaha lhe. <sup>9</sup> Tisa anca gualí ben-ni rinnea, nu dica tsia le iyácea ca benni lhe. <sup>10</sup> Lo ni'a gue unnuha nna ri'i nna rateri, chi ruttipa leri lhe cumu ruxxenba leri un Tata Do Iyyabaaha nu chi re. Lee anque benni bani rodilá iyácea benni se'e yies lo yu-ni, lotteba ca benni ria le Jesús rodile qui bittu tsia nnitticabi. <sup>11</sup> Nu ria-ni bele'eni ca benni, guscana uncana lhe.

<sup>12</sup> Beni qui bittu cu'u ni'a ca benni lu de ancalu uncuiti. Delaba unnuha nna lu nna acalu ttu benni ugüia ca benni ria le Jesús gue nu runlu qui aníaguaba uncabi: inne tseelu lhe un tseelu lhe aca si'inlu ca benni lhe udú tsee lelu lhe tsia lelu Tata Do Iyyabaaha lhe unlu taga'a nu anca tsee lhe. <sup>13</sup> Laca isíaya nna bedo lelu belaba ca tisa gue Tata Do Iyyabaaha aní lo iyá ca benni. Belisa cabi lhe bele'en cabi gaxasná tse'ecabi lhe. <sup>14</sup> Bittu aquinlu lä ixuubinlu elha tsee chi bete Tata Do Iyyabaaha lenlu. Gue unnuha nua utixxi'a ca benni teru elha rieni guecabi atti bexxúa nácabi iquiluha. <sup>15</sup> Ben duelha bedo lelu beni nu ria-ni qui ttedaani iyá ca benni lu nna ttu diabalu ridú tsitsilu lo neda gue Tata Do Iyyabaaha. <sup>16</sup> Lhatsiru bedú lelu, lhatsiru bele'en ca benni lhe. Tsitsi udú beni nu chi rialu unlu. Cumu aná liba nna lhálu bittu tsia nittilu, lháguaba ca benni udo nagacani guelu lhe.

**Pablo rixxi'enbi Timoteo gaxasná unbi len ca benni ria le Jesús**

**5** Bittu innelu tisa idí atti ulisalu ca unbiyuu chi anca benniola-na. Lhatsiru belisa cabi attiba ttu tata guelu. Ca uncuiti-na nna belisa cana attiba rulisalu ttu betsilu. <sup>2</sup> Ca benni nuila chi anca benniola-na, belisa cabi attiba rulisalu ttu nan guelu, ca nuila cuiti-na nna belisa cana attiba rulisalu ttu danlu. Lhatsiru bedú lelu lencana.

<sup>3</sup> Biyú ca nuila bidabi ca nu nuttu nu te ugüian cana. <sup>4</sup> Gansi ttu nuila bidabi guase'eba xi'inbi o xidhoabi lhe primerteba ca

unnuha uncana nu daa locani leni ca benni datíacana se'e lhe'e yo'o guecani qui eguixatticana ttu latti gue nu bodixen ca tata nan guecaniha cana. Cumu unní anca ttu nu tsee, nu re'o le Tata Do Iyyabaaha lhe.<sup>5</sup> Nuila nu gualígá ancabi bidabi chi be'ana atturbabi nna xenba le bi'iniha aca len Tata Do Iyyabaaha bi, labi nna satíaba rinnababi nu reasinbi lo Ben-na, rela resába rinnebi leni Ben-na lhe.<sup>6</sup> Ttiaca nuila bidabi sna redí baarbana nu raca yies lo yu-ni nna sna do banba nua chi ancana nu yatti lo Tata Do Iyyabaaha.<sup>7</sup> Bele'eguabani ca benni chi ria le Jesús nu ria-ni, qui bittu bi ten benni innecana guecabi.<sup>8</sup> Cumu benni bittu rulaba leni gue ca benni datíana, nu bittu richacha iquini gue nu reasani ca benni se'e lhe'e lisni, chiba bedhan nua ria leni Jesús. Adílaba de guate anca nu run nua atti nu bittu anca biani Tata Do Iyyabaaha.

<sup>9</sup> Lo sitsi atta do lá ca nuila bidabi raca yuda-na, sunruba ca nuila bidabi udo leni ttuba unbiyuu chi ancani guate gayuna (60) ida gua dica dho lácabi lo sitsi-na.<sup>10</sup> Ancacabi benni daa tisa guecabi bencabi nu anca tsee, benni bodixen tsee xi'inni lhe bete ganna liscabi be'an benni lhe ucacabi benni utí ni'a ca benni chi se'e riesi anca gue Tata Do Iyyabaaha lhe bencabi yuda ca benni biyú elha disa lhe satíaba bencabi iyába nu dica ixuu lhe.

<sup>11</sup> Bittu udolu lá ca nuila bidabi cuiti-na lo sitsi atta sia lá ca nuila bidabi ralhacabi acacabi yuda. Cumu gansi chi rudúncabi edícabi attu unbiyuu nna rudorlana lecabí otsá nácabi attu libe attichu uncabi sina gue Cristuha.<sup>12</sup> Lania nna racacabi nu te tulha gueni, cumu de bitturu bencabi nu chi racabi Tata Do Iyyabaaha uncabi.<sup>13</sup> Anáguaba diaguacabi rilábicabi racacabi nu lea, nu ribeni utá rería reta'a lhe'e ca yo'o lhe bittu sunru racacabi nu lea, racaguabacabi nu rinne bittiba lhe nu gaxaba nua raga'a gueni lhe rinnecabi nu bittu elha ralhacabi innecabi lhe.<sup>14</sup> Denuala nna raca lasia otsá ná ca nuila bidabi cuiti-na, ose'e xi'incabi lhe innabia lhe'e liscabi lhe. Bittu uncabi nu bittu anca tsee qui bittu te bixa lo ni'a gue inne güe ca nu bittu raca uyucanri-na guecabi.<sup>15</sup> Cumu ttulhe ca nuila bidabi-na chi biriescana lo neda gue Cristu, nu xxegüiha la chi denocana.<sup>16</sup> Gansi ttu benni ria lebi Jesús se'e nuila bidabi datíabi, labi unbi cabi yuda qui bittu ichacha iqui adí ca benni ria le Jesús gue ca bi'iniha. Qui anáchu ca bi'iniha nna aca uncabi yuda ca nuila bidabi tsa nuttu nu banquinbi.

<sup>17</sup> Ca benni teru elha rieni guecabi rinnabia tsee, ralhacabi gapale cabi adí respeto. Adílaba ca bi'ini rixxi'a ca tisa-na lhe ca bi'ini rule'ena lhe. <sup>18</sup> Cumu lo ca sitsi gue Tata Do Iyyabaaha nna rá: "Bittu cu'ulu yexxa ro'o u'una yu'u sna." Anáguuba rinne lo ca tisa-na: "Benni riben sina-na ralhabana dhína nu gaxana gue sá gueni."

<sup>19</sup> Bittu tsia lelu gue bixa run ttu benni xiyya gue ttu ca bi'ini teru elha rieni guecabi na, gansi bittuba se'e chupa o tsunna ca nu begüia locani bixa ben bi'iniha. <sup>20</sup> Ca bi'ini bittuba riani-ni, sna runbacabi nu lä anca tsee lo Tata Do Iyyabaaha, aní lo adí ca benni ria le Jesús utisacabi qui gasquinbi, bittu un adícabi anía.

<sup>21</sup> Aní lo Tata Do Iyyabaaha lhe lo Jesucristu Benni bananie ri-na lhe lo ca ingeli chi becuae Ben-na anca guee-na lhe rinnaba lolu unlu nu rpea lu-ni. Bittu aquinlu un tseerlu leni ttu benni atti leni adícabi, ttuba beni leni iyábacabi. <sup>22</sup> Bittu iyúbaxxinlu uxuxá nálu iqui nuxa benni edú uni sina gue Tata Do Iyyabaaha qui bittu igutsalu nu lä anca tsee bittu yulu run bi'iniha. Beni qui acalu ttu benni bittu tulha gueni te lo Tata Do Iyyabaaha.

<sup>23</sup> De satti belhaba ranilu lhe raca lhe'elu lhe xa Timoteo, bitturu i'yalu suntteba inda, u'uya saro'o vinu.

<sup>24</sup> Ttulhe ca benni runi nu lä anca tsee, rianni lo nu bencana ni la tti aca elha uxtisi guecani. A ttulhe ca benni nna axta liba aca elha uxtisi guecani, lania liba rianni lo nu runcana. <sup>25</sup> Anáguuba rule'e lotteba nu tsee run ca benni. Adí nu tsee bittu rilá runi benni nna güisíába sá ule'e lo nua.

**6** Ca benni ria le Jesús anca nu tto'o lo sina, gapacabi respeto ca benni anca xxancabi, qui bittu inne güee benni gue Tata Do Iyyabaaha, niguaba gue ca tisa rule'eri-ni lhe. <sup>2</sup> Ca benni tto'o lo sina gue ca bi'ini chi ria lecabí Jesús, bittu acaquinbi lä udobacabi tisa gue ca benni anca xxancabi de ttuba chi ancacabi benni ria le Jesús. Nu unlacabi nna ugüela lecabí lo sina gue ca bi'iniha, cumu ca bi'ini dia ribe xeniha nna ancacabi benni ria le Jesús, benni racani Tata Do Iyyabaaha gueni lhe. Ca tisa-ni bele'e lhe utixxi'ani ca benni uncabi lhe.

**Pablo rixxi'enbi Timoteo gue ca benni bittu  
rixxi'a lhixxa ca tisa gue Jesucristuha**

<sup>3</sup> Gansi nuxa benni rule'ena attu tisa subi nu bittu raxxína leni ca tisa rixxi'a nu anca gualí bele'e Jesucristu Benni bananie ri, niguuba lä raxxína nua leni ca tisa rule'ecanie ri runri nu re'o le Tata Do Iyyabaaha lhe <sup>4</sup> unnuha nna nu ttababa nua, tsa läga radú le nua. Lana nna tsaba chi bedona leni ritolha tisana gue nu bittu ixuu. Lo ni'a gue unnuha nna ridú lo ca benni rutía di le loescani, ritolha tisa len loescani lhe rinne güee gue loescani lhe bitturu ria lee gue loescani lhe. <sup>5</sup> Satíaba ru'ucana ritolha tisa len loescani cumu bittu rixuu elha rieni guecani, bittuguaba yucana gue nu anca gualí lhe. Lacana racaquinna dequi uncana nu raca lee Tata Do Iyyabaaha qui aca cue xencana leni belhi rilupicana cu'e benni. Lu nna Timoteo biriesi ca benni run aná, bittu iselalu ca unná.

<sup>6</sup> Gualíba, ridíri ttu elha tsee xeni anca gue Tata Do Iyyabaaha de runri nu raca lee, ladiba ancari benni raca xen leni leni nu tee gueni. <sup>7</sup> Cumu tsa lägabi nujari atti bisíari yies lo yu-ni, bittuguaba bi eyojari atti gattiri lhe. <sup>8</sup> Gansi gua teba nu gori lhe nu ucuri lhe care'aba leni unnuha aca xen leri. <sup>9</sup> Cumu ca benni rdacacana acacana nu te gueni, ttu nnelaba ixúyiecan runcana nu ridá lecani, attiba ttu nu uyu'u yalhi, nianna reacattebacana nu satíaba do leni unna ixe loba nu lä anca tsee ridá lecani. Unná nna ancana nu bittu ixuu. Sunruba runi unná satecana uyúcana elha disa, tsaba dionna rinnina yiencani qui tsia nnitticana. <sup>10</sup> Cumu nu ridá leri belhi-na ancana nu runi uni ttu benni iyáloba nu lä anca tsee. Se'e ca benni ria le Cristuha lo ni'a gue de udá lecani belhi-na bedhancana ria lecani Ben-na. Ttiaca la labacana utila elha disa guecani.

**Pablo rixxi'enbi Timoteo bixa unbi**

<sup>11</sup> Ttiaca lu, Timoteo bi'ini rixuu lo sina gue Tata Do Iyyabaaha, bittu unlu ni ttu nu lä anca tsee chi utixxi'atia lu-ni. Bedola lelu beni nu anca lhatsiru, bedo tisa beni nu tsee anca gue Tata Do Iyyabaaha lhe. Bedo lelu tsiaru lelu Cristuha lhe aquinlu gue adí benni lhe uchíalu lo elha disa uyúlu lhe uca benni si'i le lhe. <sup>12</sup> Itú iqui itú lelu besigui lo neda gue Tata Do Iyyabaaha de ria lelu Cristu. Beni duelha qui gatta elha nabani guelu ttu dia lii. De unnuhala nna uxi Tata Do Iyyabaaha lu, larcala tseeba chi utixxi'alu aní lo

ixeru benni rál cana lu nna chi ria lelu Jesús. <sup>13</sup> Rinnaba lenlu aní lo Tata Do Iyyabaaha Benni rute elha nabani gue iyá nu te yies lo yu-ni, lo Jesucristu benni utixxi'a nu anca gualí atti betsá due lo Poncio Pilato qui un nua elha uxtisi guee lhe <sup>14</sup> bedo tisa beni nu chi benia lu mandadu unlu. Lhatsiru beni iyá nu chi rpea lu-na qui bittu itisalu nnanna lhe atti esía Jesucristu Benni bananie ri lhe. <sup>15</sup> Benniha nna esié atti isía sá chi ga'anani Tata Do Iyyabaaha. Cumu Ben-na anque Benni anca le'a, Benni tturbe do anque Benni ra xxeni lee lhe. Ben-na anque Benni rinnabia anca nu lo gue ca nu rinnabia-na, anque nu lo gue ca nu ra xxeni lequinna lhe. <sup>16</sup> Tturba Ben-na do anque Benni tsa bittu gatti, anque Benni do lhe'e ttu xieni atta nuttu nu dhana ibigana gaxxa de ru'uba xieni lhe. Lee nua tsa nuttu nu benni se'e yies lo yu-ni chi bilenne, nuttuguuba nu dhana ilenne lhe. Ben-na anque Benni ra xxeni lee, anque Benni rinnabia xeni ttu dia liiba lhe. Amén.

<sup>17</sup> Ca bi'ini ancacabi nu te gueni yies lo yu-ni nna belisa cabi qui bittu acacabi nu ttaba, bittuguuba uxxen lecabí gue nu te guecabi lhe cumu reabunna. Adíla tsee nna uxxen lecabí Tata Do Iyyabaaha. Benniha anque benni bani, rute iyá nu reasinri qui te xxeni nu edí baari. <sup>18</sup> Gus cabi uncabi nu anca lhatsiru, acacabi nu runi iyáloba nu tsee lhe. Itú iqui itú lecabí edá lecabí ugüecabi adí benni bixa te guecabi. <sup>19</sup> Anía liba nna udiancabi adí elha tsee guecabi nu uxxen lecabí edí baacabi ca sá chi daba isía, qui gatta nu gualíga anca elha nabani guecabi lhe.

<sup>20</sup> Timoteo, tsitsi upa sina nu chi bete Tata Do Iyyabaaha len lu. Bittu udo nagalu gue ca nu bitti bittiba rinnecana gue nu bittu ixuu. Lä udoguuba nagalu gue ca nu rávana dequi yulhabacana lhe ttiaca läga gualíquinna. <sup>21</sup> Cumu ttulhe benni gue ca unnala bedo nagacani, lacana nna chi bedhancana ria lecani Jesús.

Tata Do Iyyabaaha aca lanie lu. Amén.

# Sitsi berupa udhelha

## Pablo len Timoteo

**1** Neti Pablo, anca apóstol gue Jesucristu, Tata Do Iyyabaaha beda lee bodúe neti qui aca benni quixxi'atia ca benni gue nu chi re unie, lee nna chi begüee tisa unie gatta elha nabani gueri ttu dia liiba de chi ancari benni ria le Jesús Benni anque Cristu. <sup>2</sup> Na ridhelha sitsi-ni atta dolha, xa Timoteo. Neti nna racatia guelu, cumu lu nna ancalu attiba ttu xi'inia.

Rinnaba lo Tata gueri do iyyabaaha, lenie Jesucristu Benni bananie ri, aca lenque lu lhe satúa leque lu lhe unque dholu lhatsiru lhe.

### Pablo rulisabi Timoteo bittu ettuinbi quixxi'abi ca tisa gue Jesús

<sup>3</sup> Rutea xquixaru len Tata Do Iyyabaaha, Benni runia sina guee itú iqui itú lasia cumu bittu bixa te ruqui'ana quia loe. Ca benniola quia use'e axta atti níali aníaguuba bencabi. Rela resába atti rinnea len Tata Do Iyyabaaha nna satíaba rexxa lasia lu. <sup>4</sup> Atti rexxa lasia yade ribesluha nna rdacalhaba uyúa lu. Neti nna eyo'o tsitsia lasia gansi chi bilátia lu. <sup>5</sup> Rexxaguuba lasia, lu nna gualíbinlu itú iqui itú lelu ria lelu Cristuha. Primerteba nan xen guelu Loida güia lebi itú iqui itú lebi, anáguuba nan guelu Eunice lhe. Neti nna xenba lasia aníaguuba ria lelu.

<sup>6</sup> Larcala nna rorexxa lelu, bettipa lelu bixuuni elha tsee bete Tata Do Iyyabaaha len lu atti becxxúa náya iquiluha qui acalu benni uni sina gue Ben-na. <sup>7</sup> Cumu läga bete Tata Do Iyyabaaha Espíritu guee-na len ri'i qui acari nu rasini. Betebe Espíritu guee-na len ri'i qui acari nu re tsitsi leni, qui acari nu si'i le lhe qui acari nu aca gueni innabia elha rieni gueni lhe.

<sup>8</sup> Denuala nna bittu ettuinlu quixxi'alu ca tisa gue Benni bananie ri-na, lä ettúguabinlu quia de tea lisiyaa lo ni'a gue de rixxi'aya ca tisa gue Ben-na lhe. Delába unnuha nna betto bechía lo nu satelu de rixxi'alu ca tisa gue Jesús, attiba neti rutto ruchíaya. Tata Do Iyyabaaha nna guacaba lanie lu. <sup>9</sup> Laguabe bodile ri qui bittu tsia nittiri, uxie ri qui iriesri lhe'e nu lä anca tsee lhe. Läga de benri ttu nu anca tsee nuarca uxie ri, uxbe ri cumu aníaba chi ga'ananie unie. Atti deobali cue yies lo yu-ni, laniali nna boquinna iquie aca

lani Jesús Benni anque Cristuha ri'i. <sup>10</sup> Atti udhelhe Jesucristu Benni bodile ri, lania bele'loe nu tsee runie len ri'i. Benniha nna benie qui bitturu dha elhuttiha uttinri ttu tsaba. Nianna ulequie lolia, ri'i nna gansi tsia leri Jesucristuha lania nna gatta elha nabani gueri ttu dia liiba, lärga gattiri ttu tsa. <sup>11</sup> Tata Do Iyyabaaha bodíe neti qui aca benni quixxi'a ca tisa-ni, aca apóstol lhe benni ule'eni ca benni bittu anca benni Israel-na lhe. <sup>12</sup> Lo ni'a gue unnuha nna ratea iyába nu ratea-ni. Ttiaca tsa lägabi rettutia, cumu yuxeba nuxa anca Benni ria lasia. Neti yua nna anque ttu Benni ra xxeni leni, lee nna guagua tseebe elha nabani quia-ni nu chi bodha'ana las nee axta atti isía sá utsá dua loe.

<sup>13</sup> Besigui beni nu tsee anca gualí chi bele'etia lu, güia lelu Jesús Benni anque Cristu, uquin gue ca benni lhe de chi ancalu benni baba leni Ben-na. <sup>14</sup> Espíritu gue Tata Do Iyyabaaha Benni do lhe'e lastoori, aca lanie lu qui edí edenlu ca tisa rixxi'a nu gualí boca'an Tata Do iyyabaaha las nálu.

<sup>15</sup> Lu nna chiba yulu, iyába ca benni ria le Jesús se'e lo yu te láni Asia bedhá iquicani neti. Aníagua beni Figelo lenna Hermógenes.

<sup>16</sup> Benni bananie ri-na satúa lee ca benni se'e lhe'e yo'o gue Onesíforo, cumu ixe libe bitabibettettipabi lasia, tsa läga bettuinbi quia de xica tea lisiyya. <sup>17</sup> Delába nua nna atti bisíabi lhe'e yiesi Roma-ni, tsaba bittu bedí lebi güequibi beguilabi neti axta liba bettetti'abi neti. <sup>18</sup> Lu nna gua yubalu de ya de yuda beni bi'iniha ri atti use'eri lhe'e yiesi Éfeso. Benni bananie ri-na satúa lee bi'iniha gansi chi bisía sá utsá dubi loe.

### Pablo rulisabi Timoteo uchíabi lo ca elha disa ruyúbi

**2** Lu, xa Timoteo, lu ancalu attisiba xi'inia, tsitsi udú cumu Jesús Benni anque Cristu raca lanie lu. <sup>2</sup> Ca tisa bieninlu unnea aní lo ixeru benni, unnuha bele'eni adí ca benni ruxxen lelu guecani, ca nu rudhaca lelu aca guecani ule'equinna adí ca benni.

<sup>3</sup> Attiba ttu soldado rutsá duna lo nu ratena, aníaguaba lu, bechía lo ca elha disa ruyúlha de ancalu benni baba len Jesús Benni anque Cristu. <sup>4</sup> Ttu benni baxina acana soldado nna läga dica un nua attu sinu subi. Sunruba sinu daa lo nua unna anía liba nna eyo'o lee soldado anca nu loha gue nua. <sup>5</sup> Anáguaba ttu benni sel a lhe'e ca nu ritta, läga dhi nua nu ralhana gue nu dhana iganna gansi bittuba udona tisa unna iyá nu ga'ana unna. <sup>6</sup> Benni ruttipa leni ribenna

sina lo ca yu-na, primerba unnuha ralhana dhína lena ute ca lo yu-na.<sup>7</sup> Belaba tsee lelu gue iyá nu ria-ni, Benni bananie ri-na, guacaba lanie lu qui sadú tsee lelu iyá.

<sup>8</sup> Exxa lelu Jesucristu, benni datía David. Benniha nua belhidha Tata Do Iyyabaaha lhe'e baa atta yu'u ca nu yatti-na. Gue unnuoni requia rixxi'aya.<sup>9</sup> Lo ni'a gue de rixxi'aya ca tisa-ni nna ratea ruyúa elha disa tea lisiyya-ni, axtaba len cadena xicaquinna neti attiba ttu nu beni elhutti, ttiaca tisa gue Tata Do Iyyabaaha nna läga xica benna len cadena atti xicaquinna neti, larcala guacaba quixxi'a benni ben-na.<sup>10</sup> Lo ni'a gue unnuia nna gua ruchíaba lo iyába nu ratea de runia qui salía tseena ca benni chi becuae Tata Do Iyyabaaha, qui anáchu nna lhácabi bittu tsia nnitticabi. Aná nna gatta elha nabani ga'ana tsee guecabí ttu dia lii, de chi ancacabi benni re cuenta leni Jesús Benni anque Cristu.

<sup>11</sup> Tisa anca gualí ben-ni rinnea:

Gansi ri'i ancari nu chi utti leni Jesús, anáguaba tse'eguabari lenie iyyabaaha.

<sup>12</sup> Gansi dhari uchíari lo elha disa ruyúri nna anáguaba innabiaguabari leni Ben-na.

Gansi innári dequi bittu anca bienrie nna anáguaba lee innáguabe lo Tata Do Iyyabaaha dequi bittuguuba anca bienie ri.

<sup>13</sup> Masquiba ri'i bittu runri nu rinneri, ttiaca Benniha nna satíaba runie nu rinnee,  
cumu tsa läga dica otsia Ben-na ca tisa chi unnee.

**Pablo rulisabi Timoteo unbi duelha  
unbi nu ru'u le Tata Do Iyyabaaha**

<sup>14</sup> Borexxa le adí ca benni ca tisa-ni. Gus cana aní lo Tata Do Iyyabaaha bitturu itilha tisacana lo ni'a gue ca tisa nu bittu rixuu, cumu tsa lägabi ixuu nu runcana, sunruba run nua qui bitturu tsia le ca benni rienini guecani. Unnuha uni tsia nitti ca unnuha.<sup>15</sup> Beni duelha beni nu tsu'u le Tata Do Iyyabaaha attiba ttu benni riben tsee sina nu bittu bi te bixa lo ni'a gue ettuinna bele'etseeni ca benni ca tisa rixxi'a nu anca gualí-na lhe.<sup>16</sup> Bittu udo nagalu gue ca benni rinnecana ca tisa lä dica ixu'u anca gue yies lo yu-ni, cumu sunruba rixuu unná qui runna ttu ttu sába dia benni runcana adí nu bittu anca tsee lo Tata Do Iyyabaaha.<sup>17</sup> Ca tisa rule'e ca unná

nna runnitticana ca benni, attiba ttu isagüe nu rodusuna lo güee gue ttu benni axta liba gattina. Ttu ca nu rinne loesi ca tisana nna lána Himeneo, lenna Fileto.<sup>18</sup> Lacana nna chi biriescana lo neda gue Tata Do Iyyabaaha, lärga rule'ecana nu anca gualí, requilacana rinnecana rávana dequi nucala ute atti beacani ca nu yatti-na, leni ca tisa rinnecan-na rucannacana iqui ttu lhe benni, nuarca bitturu ria tsee lecani Jesús.<sup>19</sup> Ttiaca Tata Do Iyyabaaha nna chiba boca'an tsitsie ca tisa rixxi'e gue nu anca gualí runi se'e tsitsiri, lee anque attiba ttu cimientu atta dia loni rixxi'ia rá: "Anca biasani Tata Do Iyyabaaha ca benni anca guee." Ráguba: "Iyába ca bi'ini rácabi ancacabi gue Cristu, iriescabi lhe'e nu lä anca tsee."

<sup>20</sup> Lhe'e ttu yo'o xxeni nna läga suntteru trasti anca leni oro lhe nu anca leni plata lhe se'e nía, se'eguaba nu anca leni yaga lhe nu anca leni guna lhe. Ttulhecana rixuucana gansi chi te ttu laní, a ttulhecana rixuucana ttu ttu sába.<sup>21</sup> Larcala nna gansi nuxa ttu benni bitturba bi runna nu lä anca tsee nna bi'iniha nna ancabi ttu benni chi do riesi qui ixuubi lo Tata Do Iyyabaaha, attiba ttu trasti anca leni oro o leni plata chi riesi qui ixuuna, anía anca benni chi do riesi qui ixuubi unbi iyába nu anca tsee.

<sup>22</sup> Betsiatta lo nu bittu anca tsee ridá le ca uncuiti-na uncana. Bedo lelu beni nu anca tsee lo Tata Do Iyyabaaha, güia lelu Jesucristuha lhe uquin gue adí benni lhe lhatsiru udo leni adí benni lhe. Aná beni leni ca benni chi anca nari lhe'e lastoocabi rinne leni Tata Do Iyyabaaha.<sup>23</sup> Bittu udo nagalu gue ca benni rinne nu lä dica ixuu. Lagua yubalu nna suntterba rilunna ritilha tisa len loes benni.<sup>24</sup> Cumu benni runi sina gue Benni bananie ri-na, läga dica tsequi bi'iniha utilha. Nu unlabi nna acalabi ttu benni un tseebi leni iyába benni, acabi ttu benni raca guebi rule'enbi ca benni lhe ttu benni uchíabi lo nu satebi lhe.<sup>25</sup> Leni tisa tsee ecabibi gue ca nu rese'e disa lo nu anca gualí, qui nicaga gunba Tata Do Iyyabaaha exiyyaquinna udaxxucana neda gue Ben-na qui un biacana nu anca gualí.<sup>26</sup> Lania nna ttedaaquinna qui uxunnicana lo ná nu xxegüiha. Cumu unnuhaba denna cana anquinna cana attiba ttu nu te lisiyya qui runcana nu racaba le nua.

### Aní un ca benni gansi chi deoba sia sá esía Jesús

**3** Timoteo, racaguaba duelha unalu gue nu innía-ni, cumu gansi chi deoba isía sá atti esía Jesucristuha nna tsitsiba nu sate

ca benni.<sup>2</sup> Lania nna tse'e ca benni ca nu suntteba gue nu anca guecani ulaba lecani:

ca nu dha lecani belhi-na lhe  
 ca nu ttaba lhe  
 ca nu uni dequi ancacana nu ra xxeni leni lhe  
 ca nu inne güeecana gue adí ca benni lhe  
 ca nu bittu udochana tisa gue bixa ga tata nan guecaniha cana lhe  
 ca nu niba xquixarulu lä gacana benni lhe  
 ca nu bittu gapacana respeto Tata Do Iyyabaaha lhe niguaba nu anca guee lhe  
<sup>3</sup> ca nu bittu satúa lecani adí benni lhe  
 ca nu bittu dhicana elha xen lasi gue adí ca benni lhe  
 ca nu uncana xiyya gue ca benni lhe  
 ca nu uncana nu racaba lecani lhe  
 ca nu udhaca disaxxattacana ca benni lhe  
 ca nu bittu aca uyúcana nu anca tsee lhe  
<sup>4</sup> ca nu lä lattebacana bixa udhacacana ca benni se'e tsee lencana lhe

ca nu eyaxani uni nu racaba lecani lhe  
 ca nu uni ttaba lhe  
 ca nu uدورلana lecani uncana nu re'oba lecani anca gue yies lo yu-ni attichula acaquinna gue Tata Do Iyyabaaha lhe.

<sup>5</sup> Ca unnuha nna unicana dequi ancacana nu ria yotu runi nu anca gue Tata Do Iyyabaaha,  
 ttiaca nu uncanaha ule'e lona lacana nna läga gualíquinna ria lecani Ben-na.

Lu nna tsa bittu igutsalu ca nu runi aná.

<sup>6</sup> Cumu ca unnonna ratta'acana lhe'e ca yo'o raxxi yiecanca ca nuila ridielha rixú yie runi iyáloba nu bittu anca tsee, ca loesi ca nuila-na nna ttu dia liiba diacana runcana iyába nu satsa raca lecani. <sup>7</sup> Ca unná guabunna satíaba diacana rudheticana attu nu subi, ttiaca tsa läga rdacana ttedaaquinna gaxa te nu anca gualí. <sup>8</sup> Attiba bese'e disa Janes lenna Jambres lo Moisés, anáguba rese'e disa ca benni loesi ca unná lo ca tisa rixxi'a nu anca gualí. Lacana nna ancacana benni rulaba lecani nu bittu anca tsee, lärga ria lecani Tata Do Iyyabaaha atti dica tsia lecani Ben-na, cumu chiba

biriescana lo neda gue Ben-na.<sup>9</sup> Ttiaca läga dhacana uncana aná isá, cumu guate daabani benni guecani ancacana nu lä caa xieni gueni. Aníaba guate ca nu bese'e disa lo Moisés.

### Pablo rulisabi Timoteo usigui bi unbi iyába nu chi bidetibi

<sup>10</sup> Ttiaca lu nna Timoteo, chiba yuxebalu gue iyába nu rule'a,  
gue gaxasná du lasia lhe  
gua yubalu bi nua raca lasia unia lhe  
gue gaxasná ria lasia Jesús lhe  
gue anca benni du pasensi leni lhe  
gue gaxasná racatia gue adí benni lhe  
gue gaxasná ruchíaya lo nu ratea lhe  
<sup>11</sup> gue gaxasná deno ca benni neti rdacacana utticana neti lhe  
gue gaxasná ruyúa elha disa lo nu rudhacacana neti lhe.

Lu nna gua yubalu gue iyába nu guatea lhe'e yiesi Antioquía, lhe'e yiesi Iconio lhe lhe'e yiesi Listra lhe. Lo iyába ca elha disa biyúha nna bodilába Tata Do Iyyabaaha neti.<sup>12</sup> Gualíba, iyába ca benni raca lecani uncana nu ru'u le Jesús Benni anque Cristu, satecana uyúcana elha disa cumu bitturu aca uyú benni cana.<sup>13</sup> Ttiaca ca benni lä du ta lequinna lhe ca nu requi uxí yiena lhe ttu diaba ca unná runcana adí nu bittu anca tsee, ridí yiecani benni lhe rixú yiecani runcana aná lhe.

<sup>14</sup> Lu nna Timoteo, besigui güia lelu gue nu chi bidetilu, gue nu chi xen lelu anca gualí lhe cumu gua yubalu nuxa gue bidetilu,<sup>15</sup> anáguuba atti ancalilu güexxa chi yulu nu rá lo ca sitsi gue Tata Do Iyyabaaha, ca ben-na ruteque elha rieni guelu qui lhálu de ria lelu Jesús Benni anque Cristu. Anía nna bittu tsia nittilu.<sup>16</sup> Iyába nu rá lo ca sitsi gue Tata Do Iyyabaaha ancaque nu biría lhe'e iqui Tata Do Iyyabaaha, ancaque benni rixuu rule'ecanie ri nu anca gualí lhe risáque ri lhe rose'e lhixxaque ri gansi rinittiri lhe rule'ecanie ri gaxasná tse'e tseeri len Tata Do Iyyabaaha lhe<sup>17</sup> qui anáchu benni chi anca gue Tata Do Iyyabaaha nna acabi ttu benni chi bideti tsee qui unbi iyá nu anca tsee.

**4** Aní lo Tata Do Iyyabaaha lhe lo Jesús Benni anque Cristu chi ga'ana esié innabie, qui unie elha uxtisi gue ca benni chi uttina lhe gue ca benni se'e bani lhe rinnaba lenlu,<sup>2</sup> duelha beni utixxi'a ca tisa gue Cristu, atti udo nagacani guelu lhe atti bittu raca lecani udo nagacani guelu lhe. Leni pasensi utixxi'aquinna gue

nu bittu anca tsee runcana, utisacana lhe bettipa lecani lhe lhatsiru bele'equinna.<sup>3</sup> Cumu chi isía sá atti bitturu aca le ca benni udo nagacani ca tisa gue Cristuha rixxi'a gue nu anca gualí rule'eri. Lacana nna unbacana nu ridá lecani, tsialacana satilacana ixe ca nu ule'equinna cana attiba re'oba lecani.<sup>4</sup> Bitturu udo nagacani gue ca tisa rixxi'a nu anca gualí, gue ca cuentu otsi'inu le ca benni la udo nagacani.<sup>5</sup> Ttiaca lu nna Timoteo, uca ttu benni ridána rinnabia elha rieni gueni, bittu bitti unlu. Uchíalu lo ca elha disa daa uyúlu. Utixxi'ani ca benni ca tisa gue Jesús. Lhatsiru beni sina bete Tata Do Iyyabaaha unlu.

<sup>6</sup> Cumu neti nna chi dabiga utticana neti. Elhutti quiaha nna ancana attiba ttu úna dhi Tata Do Iyyabaaha.<sup>7</sup> Neti nna itú iqui itú lasia besiguiba lo neda gue Tata Do Iyyabaaha. Udába lhuxatia sina betee len neti, tsa bittu bedhequia ria lasia Cristuha lhe.<sup>8</sup> Denuala nna chiba tua tsee ttu corona quia, delába elha tsee nu ridí ca benni runi nu anca tsee lo Tata Do Iyyabaaha. Benniha nua ute Jesús Benni anque Cristu len neti gansi chi bisía sá unie elha uxtisi lhatsiru gueri. Läga suntteru neti unne Benniha quia, uteguabe Benniha gue iyába ca benni se'e ribeda esíe.

### Pablo rixxi'enbi Timoteo nu dica unbi

<sup>9</sup> Duelhaba beni utáttegaba bettenalhi neti,<sup>10</sup> cumu Demas nna de ridárba leni nu te yies lo yu-ni nna nuarca bodha'anna neti nna deyyana lhe'e yiesi Tesalónica. Crescente nna daca lo yu te láni Galacia la diabi, Tito nna diabi daca lo yu te láni Dalmacia.<sup>11</sup> A sunruba Lucas gua dorbi len neti. Uchechi Marcos nna utá lenbi-ni, cumu tseeba ixuutia bi quixxi'abi ca tisa gue Jesús.<sup>12</sup> Tíquico nna udhelhaba bi lhe'e yiesi Éfeso.<sup>13</sup> Gansi chi dalu nna ttelu lhe'e yiesi Troas qui ujalu gabana quia boca'ana lhe'e yo'o gue Carpo. Ujalu ca libro quia ca benni dia tisa gue Tata Do Iyyabaaha loque, ca nu reasa ttetia nna ca libro anca leni yetiha.

<sup>14</sup> Alejandro nu raya iyya ru'u lo gui-na, tsitsiba nu chi bedhacana neti. Cuinaba Benni bananie ri-na ugüena elha disa gue nu benna.<sup>15</sup> Anáguaba lu, Timoteo, cuidadu bedo leni unná cumu tsitsiba chi bedú disana lo ca tisa gue Jesús rixxi'ari-na.

<sup>16</sup> Atti primerba betsá dua lo ca uxtisi-na qui unia exúa nna niba ttu ca benni ria le Jesús bittu use'e len neti, iyábacabi bedhá iquicabi neti. Tata Do Iyyabaaha aca lenie cabi qui bittu bi satecabi

de aníala bencabi. <sup>17</sup>Ttiaca Benni bananie ri-na udúbe len neti, bedú tsitsie neti lhe qui udáya utixxi'aya ca tisa gue Cristuha. Anía liba nna qui bienini iyába ca benni bittu anca benni Israel ca tisa-ni. Lee nna bodilábe neti lo ná ca benni attiba ttu nu rilá lo besi. <sup>18</sup>Laba Cristuha odile neti lo iyá nu lä anca tsee, echeguabe neti atta rinnabie iyyabaaha lhe. ¡Lee anque Benni ra xxeni lee ttu dia lii! [Amén].

<sup>19</sup>Bete ttu padiuxi quia leni Prisca-na lhe Aquila-na lhe anáguaba leni iyába ca benni se'e lhe'e yo'o gue Onesíforo. <sup>20</sup>Erasto nna be'anbabí lhe'e yiesi Corinto, Trófimo nna ranba bi'iniha, níaba bodha'ana bi lhe'e yiesi Mileto. <sup>21</sup>Utattegaba antisla isía ca sá aca idilha. Eubulo lhe Pudente lhe Lino lhe Claudia lhe iyába ca benni ria le Jesús se'e-ni ridhelhacabi ttu padiuxi guelu.

<sup>22</sup>Cuina Jesucristu, Benni bananie ri dhue lenlu. Tata Do Iyyabaaha aca lanie lu. Amén.

# Sitsi udhelha Pablo len Tito

**1** Neti Pablo anca benni bodú Tata Do Iyyabaaha ixuunie, anca apóstol benni chi ga'anani Jesucristu iche ca tisa guee lhe. Lee udhelhe neti qui ule'etia ca benni chi becuae tsia lecanie, qui un biacana nu anca gualí nu uni qui uncana nu re'o le Tata Do Iyyabaaha,<sup>2</sup> cumu ri'i nna xen leri gatta elha nabani gueri ttu dia lii. Tata Do Iyyabaaha benni tsa bittu run lee chi begüee tisa atti deobali cue yiesi lo yu-ni utee elha nabani gatta ttu dia lii gueri.<sup>3</sup> Benniha nna benie qui bina ca benni ca tisa guee-ni la sá chi ga'ananie una benni benna. Ca tisaha ben-ni rixxi'aya cumu Tata Do Iyyabaaha benni rodile ri, benie neti mandadu quixxi'aya ca tisa-ni.<sup>4</sup> Ridhelha sitsi-ni guelu xa Tito. Lu ancalu attiba ttu xi'inia, cumu neti bele'etia lu ria lelu Cristuha attiba ria lasia.

Cuina Tata Do Iyyabaaha lanie Jesucristu Benni bodile ri, aca lenque lu lhe xen su le dholu lhe.

## Pablo rixxi'enbi Tito bixa sina unbi lo yu te láni Creta

<sup>5</sup> Bodha'ana lu lo yu re lagüi indattoo te láni Creta-na qui uluxalu sina gue Tata Do Iyyabaaha reasa aca naa. Lu nna benba attiba chi benia lu mandadu unlu, lhe'e ttuttu ca yiesi-na bose'e ca benni teru elha rieni guecabi qui tse'ecabi lo ca benni ria le Cristuha,<sup>6</sup> Bose'e ca benni teru elha rieni guecabi nu bittu daa tisa guebi bixa runbi, ca benni ttuba nuila do lencabi lhe. Ca xi'incabi nna ancacana nu ria le Jesús, nu bittu daa tisa guecani runcana nu bittu anca tsee lhe nu bittu daa tisa guecani rese'e disacana lhe.<sup>7</sup> Cumu benni anca nu lo gue ca benni ria le Cristuha, ancabi nu runi sina gue Tata Do Iyyabaaha. Denua nna:

raca duelha acabi benni bittu daa tisa guebi bixa runbi,  
bittu acabi nu ttaba lhe  
bittu ancabi nu risa'axxini lhe  
bittu acabi nu dusi lhe  
bittu ancabi nu ritilha len nuttiba lhe  
bittu ancabi nu dha lebi xxenru belhi gue nu ralhabí dhibi lhe.  
<sup>8</sup> Delaba unnuha nna acalabi benni ute gannabi lisbi qui  
eya'an ganna benni,  
acabi benni ru'u lebi unbi nu anca tsee lhe

acabi benni ridá rinnabiabi elha rieni guebi lhe  
 acabi nu runi nu anca lhixxa lhe  
 acabi nu do riesi anca gue Tata Do Iyyabaaha lhe  
 acabi nu ridá rinnabia cuerpu guebi lhe  
<sup>9</sup> acabi benni ria tsitsi lebi ca tisa gue Cristuha rixxi'a nu anca  
 gualí attiba chi bidetibi,  
 qui anáchu aca guebi ule'enbi ca benni nu anca lhixxa,  
 unbi oquinna iqui ca nu rese'e disana gualíba ancacana nu  
 bittu rulaba tsee leni lhe.

<sup>10</sup> Cumu ixe benni se'e ancacana nu bittu rudo tisa. Rinnecana  
 nu bittu ixuu lhe ridí yiecaná adí ca benni lhe. Ca nu runi aná nna  
 ancacana benni Israel ca nu rá dequi chi ria lecani Cristuha. <sup>11</sup> Ca  
 unnonna runna duelha bittu ugüelhari ule'equinna ca benni,  
 cumu leni nu bittu dica ixuu rule'ecana tsaba diacana rucannacana  
 iqui iyába ca benni se'e lhe'e ca yo'o, runcana aná sunruba qui raca  
 ridícana belhi.

<sup>12</sup> Gualíbani ttu benni uca profeta guecani nu beaca lasni  
 Creta-na udo atti nía, unnena rána: "Lebi'i, ca benni se'e Creta-ni  
 satíaba run lele lhe runle attiba run ca nimala bittu ritana lhe  
 ancaguabale nu lea lhe nu roxxatta lhe." <sup>13</sup> Unnuha nna gualíbinna.  
 Larcala guadiloru belisa cana qui tsia tsitsi lecani Cristuha.

<sup>14</sup> Belisaguabacana qui bittu udo nagacani gue ca cuentu  
 rotsi'inule ttulhe ca benni Israel-na, niguaba gue nu rule'e ca benni  
 rigu'u ni'acani ca tisa rixxi'a nu anca gualí-na lhe.

<sup>15</sup> Iyába anca tsee len ca benni chi anca nari lhe'e lastoocabi  
 lo Tata Do Iyyabaaha, ttiaca leni ca benni runi nu bittu anca tsee  
 lo Tata Do Iyyabaaha, ca nu bittu ria lecani Cristuha lhe iyába  
 bittu anca tsee len lacana, axtaba nu rulaba lecani bittu anca tsee,  
 bitturguaba raca teequinna runcana nu lä anca tsee lhe. <sup>16</sup> Rácana  
 dequi anca biaquinna Tata Do Iyyabaaha, ttiaca leni nu runcana  
 rule'e lo rigu'uba ni'acani Ben-na. Ancacana benni runi nu bittu  
 raca lee Tata Do Iyyabaaha ilánie lhe nu bittu rudo tisa gue Ben-na  
 lhe nu bittu guaca uni nu anca tsee lhe.

### Pablo rixxi'enbi Tito bixa ule'enbi ca benni

**2** Ttiaca lu nna Tito, bele'en ca benni ria le Cristuha ca tisa rixxi'a  
 nu anca gualí anca gue Ben-na. <sup>2</sup> Bele'eni ca benni unbiyuu chi  
 anca benniola-na

acacabi nu rinnabia elha rieni gueni,  
 acacabi benni gapa ca benni cabi respeto lhe  
 acacabi benni rinne nu gualí lhe  
 acacabi benni ria tsitsi leni Cristuha lhe  
 acacabi nu acani gue adí benni lhe  
 acacabi nu satía uchía lo nu satecabí lhe.

<sup>3</sup> Anáguaba ca nuila chi anca benniola-na, acacabi benni uni  
 nu ru'u le Tata Do Iyyabaaha.

Bittu acacabi nu runi xiyya gue benni lhe  
 bittu acacabi nu dusi lhe.

Lacabi nna acacabi nu ugüia adí benni guecabi qui uncana nu  
 anca tsee,

<sup>4</sup> acacabi nu ule'eni ca nuila cuiti-na acaquinna gue ca  
 unbiyuu guequinna lhe

gue ca xi'inquinna lhe

<sup>5</sup> acacabi nu ridá rinnabia elha rieni gueni lhe  
 acacabi nu uni ttaga'a nu anca tsee lhe

acacabi nu ulaba leni gue lhe'e lisni lhe

acacabi benni tsee lhe

acacabi nu udo nagani gue unbiyuu gueni lhe.

Aná uncabi qui bittu inne güee ca benni gue ca tisa gue Tata  
 Do Iyyabaaha.

<sup>6</sup> Anáguaba ca unbiyuu cuiti-na, belisa cana qui acacana nu  
 innabia elha rieni gueni. <sup>7</sup> Lu nna Tito, satía beni nu anca tsee, uca  
 nu ugüia adí benni gueni qui aníachu uncana. Lhatsiru ule'elu ca  
 tisa gue Tata Do Iyyabaaha qui ule'e lo lu nna bittu run lelu lhe  
 bittu cuenta rinnelu lhe. <sup>8</sup> Tisa tsee nu dica innelu unnee, qui nuttu  
 nubi tenná bixa innána. Aná unlu qui ettúni ca nu rese'e disacana  
 lori cumu bitturu eselquinna bixa lo ni'a gue inne güeecana gueri.

<sup>9</sup> Belisa ca benni tto'o lo sina-na qui udocana tisa gue iyá nu  
 inná ca nu banquinna cana. Satía uncana nu dica tsu'u le ca nu  
 banquinna cana, bittu olhopi ro'ocani ca unná lhe. <sup>10</sup> Bittu udaxxu  
 sigácana ttu bixa te gue ca unná. Nu unlacana nna satía ule'e locana  
 ancacana nu uxten lee benni gueni. Qui nu runcanaha uni ule'e lo  
 nu tsee runi ca tisa gue Tata Do Iyyabaaha Benni rodile ri leni ca  
 benni.

<sup>11</sup> Tata Do Iyyabaaha bele'e loe elha tsee guee leni ca benni atti  
 udhelhe Cristuha yies lo yu-ni qui odile iyába ca benni. <sup>12</sup> Benna

rule'enie ri odha'anri unri nu bittu anca tsee, bitturu udunri unri nu raca yies lo yu-ni lhe. Rule'enie ri dhari innabiari elha rieni gueri lhe unri nu anca lhixxa lhe unri nu tsu'u lee lhe.<sup>13</sup> Aná unri laca se'eri ribedari isía sá ga'ana tsee chi xen leri isíha, delába la sá esía Jesús Benni anque Cristu dedee lhe'e xieni ga'ana tsee guee. Benni anque Dios ra xxeni lee gueri, Benni rodile ri lhe.<sup>14</sup> Lee nna uxielhabebetticane qui utixe gue ca tulha gueri. Anía liba nna lhári lo iyá nu lä anca tsee benri, qui acari benni chi anca nari anca guee lhe nu tsaba udonia leni uni nu anca tsee lhe.

<sup>15</sup> Ca tisa-ni bele'en ca benni ria le Cristuha, lu nna teba derechu guelu ulisalu cabi qui uncabi nu rálu cabi, quisalu ca nu bittu rudocana tisa lhe. Bittu ugüelhalu cu'u ni'acani lu.

### Unní anca nu raca duelha un ca benni ria le Jesús

**3** Borexxa le ca benni ria le Cristuha udá iquicabi gue ca nu rinnabia-na, gue ca uxtisi-na lhe udocabi tisa gue ca unná lhe tse'e tseecabi uncabi iyá nu anca tsee lhe.<sup>2</sup> Bittu inne güeocabi gue ca benni, niguaba itilha tisacabi len ca benni lhe. Nu unlacabi nna un tseecabi, lhatsiru uncabi len iyá benni lhe.<sup>3</sup> Cumu ri'i nna anáguauba benri ttuha:

Ucari benni beni nu bittu ixuu,  
nu bittu bedo tisa lhe.

Ucari benni iquiri ganna lhe  
ucari attiba nu tto'o lo sina gue iyáloba nu satsa raca yies lo  
yu-ni lhe

nu satíaba beni nu bittu anca tsee lhe  
nu upa malisi gue adí benni lhe  
nu bittu uca uyú loesni lhe  
nu betía dile loesni lhe.

<sup>4</sup> Ttiaca bisía sá bele'e lo Tata Do Iyyabaaha Benni bodile ri, elha tsee guee len ri'i, ucanie gueri lhe.<sup>5</sup> Läga de benri nu anca tsee nuarca bodilá Benniha ri, de guatuba le Benniha ri nuarca bodile ri. Lee nna utúe nu lä anca tsee benriha, beonie ri benni cubi. Leni Espíritu guee benie qui ucari attiba nu uli attu libe, delába betee elha nabani cubi gueri.<sup>6</sup> De güia leri Jesucristu, Benni bodile ri, nuarca itú iqui itú le Tata Do Iyyabaaha betee Espíritu guee len ri'i,<sup>7</sup> qui dequide chi uca lanie ri utúe ca tulha guerihha nna chi dica

uxxen leri guaca banbari ttu dia lii loe. Unnua anca interés utee gueri.

<sup>8</sup>Tisa anca gualí ben-ni rinnea. Larcala raca lasia sattibelha orexxalu le ca benni ca tisa-ni qui anáchu ca benni chi ria le Tata Do Iyyabaaha nna satía udo lecabí uncabi nu anca tsee. Cumu ca tisa rixxi'aya-ni ancaque ttu nu tsee dica ixuu len ca benni. <sup>9</sup>Ttiaca bittu udo nagalu gue ca tisa bittu dica ixuu rinne ca benni, niguuba gue ca nu rixxi'a gue nupaxa uca benniola guecani lhe bittuguaba udo nagalu gue ca nu ritilha tisa gue nu dia lo ca ley boca'ana Moisés lhe cumu tsa lägabi ixuu unná bittuguaba cue xenri qui unri aná lhe. <sup>10</sup>Gansi nuxa unna ila'a lhe'e loes ca benni ria le Cristuha, belisa na ttu libe, ulisalha attu libe lhe qui bittu unna anía. Gansi bittuba iyieninna lania liba nna cuequieslu nua, <sup>11</sup>lu nna chiba yulu, unnuha nna chiba biries nua lo neda gue Tata Do Iyyabaaha. La labana rila elha disa gueni cumu de runna nu bittu anca tsee.

### Bedá ca tisa-ni unne Pablo len Tito

<sup>12</sup>Gansi chi udhelha bi'ini lá Artemas-ni o Tíquico-ni atta relha, ben duelha italu lhe'e yiesi Nicópolis. Nía eti'ari cumu nía chi belaba lasia dhoa ganna chi bisía aca dilha. <sup>13</sup>Zenas bi'ini yu gue nu rá ca ley-na lhe Apolos-na lhe bencabi yuda qui bittubi eyasaquinbi gue neda guecabí. <sup>14</sup>Anágua ba ca benni gueri chi ria le Jesús labíaba ule'enlu cabi uncabi nu anca tsee len ca benni qui anáchu uncabi yuda ca benni raca duelha acacabi yuda, aná nna acacabi benni runi nu dica ixuu.

<sup>15</sup>Iyába ca benni se'e-ni len neti ridhelhacabi ttu padiuxi guelu. Beteguuba ttu padiuxi quia len ca benni racaquinbi gueri lhe ria lecabí Cristuha lhe.

Cuina Tata Do Iyyabaaha aca lanie iyábale. [Amén.]

# Sitsi udhelha Pablo len Filemón

**1** Neti Pablo, tea lisiyya lo ni'a gue de requia rixxi'aya ca tisa gue Jesús Benni anque Cristu, neti lania Timoteo bi'ini riaguaba lebi Jesucristuha ridhelhatu sitsi-ni gue cuinalu, xa Filemón. Lu ancalu bi'ini raquintu guelu, bi'ini runguaba sina gue Jesucristuha attiba ri'itu lhe. <sup>2</sup> Ridhelhaguaba sitsi-ni gue ca benni ria lecabí Jesucristu ritupa lhe'e yo'o guelha lhe gue benni nuila lá Apia riaguaba lebi Jesucristu lhe gue Arquipo lhe. Labi nna tsitsiba dubi attiba ttu soldado, tsitsiba dubi rixxi'abi ca tisa gue Jesús attiba ri'itu. <sup>3</sup> Tata gueri do iyyabaaha lenie Jesucristu Benni bananie ri-na redá leque raca lenque le, runque qui tse'ele lhatsiru lhe.

<sup>4</sup> Gansi chi rinnea leni Tata Do Iyyabaaha, satíaba rutea xquixaru lenie guelu, xa Filemón, <sup>5</sup> cumu chi rixxi'en benni neti gue nu runlu. Lu nna raquinlu gue ca benni chi anca gue Tata Do Iyyabaaha, anáguaba tsitsiba dulu ria lelu Jesucristu Benni bananie ri-na lhe. <sup>6</sup> Rinnaba lo Tata Do Iyyabaaha qui nu tsee runlu len ca benni de ria lelu Cristu, unnuha uni qui sadú tsee lelu gue iyá elha tsee guerte de babari len Ben-na. <sup>7</sup> Neti nna attulade re'o lasia lhe rebequi tsitsi lasia lhe de ancalu ttu benni racani gue ca benni, cumu lu xa benni ria lelu Jesucristuha attiba neti, rutelu elha xen lasi leni ca benni chi anca gue Tata Do Iyyabaaha.

<sup>8</sup> Larcala masquiba te derechu quia unia lu mandadu de rapa elha ra xxen le betee Cristu len neti qui unlu nu raca lasia, ttiaca bittu unia aná, <sup>9</sup> cumu de racatia guelu nna tseerla anca lhatsirba innába lenlu. Neti Pablo, chiba anca benniola, niba tea lisiyya lo ni'a gue de requia rixxi'aya ca tisa gue Jesús Benni anque Cristu. <sup>10</sup> Rinnaba lolu olábichilu Onésimo-ni. Lana ancana attiba xi'inia nnanna cumu güiaba leni atti utixxi'atia na ca tisa gue Cristu lhe'e lisiyya atta tea-ni.

<sup>11</sup> Onésimo-ni nna ucabana ttu nu tto'o lo sina bittu bixuuna lenlu ca tu ttuha, ttiaca nnanna nna chi ancana ttu nu ixuu lenlu lhe anáguaba len neti lhe. <sup>12</sup> Na edhelha na len cuinalu attu libe, bolabichi na ucani attisiba netiba nua esíaya lhe'e yo'o guelha. <sup>13</sup> Neti nna gua racabatia odha'ana na len neti qui ixuutia na cuenta guelu laca tea lisiyya lo ni'a gue de requia rixxi'aya ca tisa gue Jesucristuha. <sup>14</sup> Ttiaca läga raca lasia unia nu yu'u iquia gansi lu

nna bittuba raca lelu aca aná, qui nu rinnaba lolu unlu-ni nna bittu unlu na de daba lolu unlu neti yuda, sinuqui itú iqui itú lebalu edá lelu unlu nu raquinlu anca tsee unlu.<sup>15</sup> Onésimo-ni nna cadiga ubiattabana ttu satti len lu, qui gansi chi besiana nna tsaba esiana len lu.<sup>16</sup> Ttiaca lärga sunru benni tto'o lo sina lolu ancana nnanna sinuqui chi ancana attiba ttu betsili nu raquinlu gueni. Neti nna attulade racatia gueni, ttiaca lu nna acarlinlu gueni adí, bittu sunru aquinlu gueni attiba nuxaba benni, sinuqui aquinlu gueni attiba ca benni ria lecabí Jesús Benni bananie ri-na.

<sup>17</sup> Larcala nna gansi gualínlu rálú anca ttu benni dua len luu, bolabichi Onésimo-na attisiba netiba nua bisíaya lhe'e yo'o guelha. <sup>18</sup> Gansi lana bixa benna guelu, o dana guelu lhe neti uquixalu nua. <sup>19</sup> Neti Pablo, rigu'u láya xani'a sitsi-ni. Leni unní nna rucan yienia guaguixaba guelu. Anába ria de bittu raca lasia upea lu, natte itoni lo nu dalu quia cumu lu nna xxenrula dalu quia de utixxi'atia lu ca tisa gue Cristu qui bodilá Ben-na lu. <sup>20</sup> Gualíba, xa Filemón bi'ini ria lee Jesucristu, rinnaba len cuinalu unlu nu ria-ni de ttuba ancari de babari len Benni bananie ri-na. Benchi nu rinnaba lolu-ni qui otelu elha xen lasi len neti de babari len Cristu.

<sup>21</sup> Runia lo sitsi-ni ridhelha lenlu, cumu ruxxen lasia lu nna gunbalu nu rpea lu-ni. Neti yua nna läga sunru nu rinnaba lolu-ni unlu, unrulalu adí nu tsee dequide nu rinnaba-ni. <sup>22</sup> Anáguaba rinnaba len lu, unlu ttu atta eya'ana gansi chi bisíaya lhe'e yo'o guelha, cumu neti nna doa ribeda ecabi Tata Do Iyyabaaha gue nu rinnabale loe. Ben-na unie qui lháya lhe'e lisiyya-ni qui anáchu aca ita atta se'ele-na ettennalhia le.

<sup>23</sup> Bi'ini lábi Epafras ridhelhabi ttu padiuxi guele. Labi ancabi ttu benni te lania lhe'e lisiyya-ni lo ni'a gue de requibi rixxi'abi ca tisa gue Jesús Benni anque Cristu. <sup>24</sup> Anáguaba Marcos, lenbi Aristarco lhe Demas lhe Lucas lhe ridhelhaguabacabi ttu padiuxi guele. Lacabi ancacabi ca bi'ini runguaba sina gue Jesucristu attiba neti.

<sup>25</sup> Cuina Jesucristu Benni bananie ri-na aca lanie le. [Amén.]

# Sitsi uxí ca benni rinne tisa hebreo

**Xi'ini Tata Do Iyyabaaha anque  
benni ra xxeniru lee atti ca ingeli-na**

**1** Ca tu atti nía, ixe libe lhe ixe loba lhe unne Tata Do Iyyabaaha belise ca benniola gueri use'e lania. Lee nna bixuunie ca benni uca profeta guee qui utixxi'acanie ca bi'iniha nu raca lee unacabi. <sup>2</sup>Tiempu nu chi daa riluxa se'eri nnanna nna rixuunie Xi'inie Jesús qui rinnee rulise ri. Xi'inie-nguaba bixuunie benie iyáxeaba nu se'e lo bea-na lhe nu se'e yies lo yu-ni lhe las ná Ben-naguaba bodha'ane iyáxeaba lhe. <sup>3</sup>Xi'inie-ni rule'e loe nu xxeni ra le Tata Do Iyyabaaha. Lee anque itúxeaba attianca Tata Do Iyyabaaha. Anque Benni tsitsiba ra lee, de nua nna leni tisa guebe denie iyáxeaba nu se'e yies lo yu-ni. Benniha nna dequide uttie lo ni'a gue ca tulha gueri qui eyacari nu nari lo Tata Do Iyyabaaha nna beopittebe iyyabaaha qui bedoe daca ladu derechu gue Tata Do Iyyabaaha Benni ra xxeni lee.

<sup>4</sup>Anía uca nna be'eyu Xi'ini Tata Do Iyyabaaha uque Benni ra xxeniru lee atti ca ingeli-na, Tata Do Iyyabaaha nna begüee Ben-na ttu ladi xeni guee nu rule'e lo anque Benni ra xxeniru lee atti ca ingeli-na. <sup>5</sup>Cumu Tata Do Iyyabaaha, tsa lägabi chi re ni ttu ca ingeli guee-na ca tisa re Jesús:

Lu ancalu xi'inia,

nasá rinnea ria:

“Neti bija lu.”<sup>a</sup>

Bittuguaba re nuxa ttu ca ingeli-na:

Neti aca tata guelu,

lu nna acalu xi'inia.<sup>b</sup>

<sup>6</sup>Unneguabe attu libe atti udhelhe yies lo yu-ni Xi'inie benni tturbe donie. Lee nna benie mandadu re:

Iyáxeale, ca ingeli quia-na, gualudú xibile lo Xi'inia-na.

<sup>7</sup>Atti unne Tata Do Iyyabaaha gue ca ingeli-na, lee nna re:

Neti runia reaca ca ingeli quia-na attiba be,

---

<sup>a</sup> 1:5 Salmo 2:7

<sup>b</sup> 1:5 2 Samuel 7:14; 1 Crónicas 17:13

ca benni rixuu lo sina quia-na nna runia reacacana attiba  
belha gue gui.<sup>a</sup>

<sup>8</sup> Ttiaca atti utixxi'e gue Xi'inie-na lee nna re:

Lu ancalu Tata Do Iyyabaa, ttu dia liiba innabialu.

Lu innabiatseelu, attiba ancaba gueni.

<sup>9</sup> Lu nna ru'u lelu nu anca tsee,  
nu lä anca tseeha nna rigu'u ni'alu.

Denuala nna neti benni anca Tata Do Iyyabaa guelu,  
becueea lu benia acalu benni cue ittaru leni atti adí ca nu se'e  
len luu.<sup>b</sup>

<sup>10</sup> Rinneguaba lo ca sitsi gue Tata Do Iyyabaaha atta re:

Lu nna xa Benni banani iyáxea,  
atti udulo ureli yies lo yu-ni nna  
luba ulequilu xlattini,  
cuinabalu benlu ca lo bea-na lhe.

<sup>11</sup> Ca unná nna lhuxabacana, ttiaca lu nna  
satíaba dolu.

Iyába ca unná gaxxucana, iyuyabacana attiba ca xo benni.

<sup>12</sup> Attiba reyapa ttu lari odapal cana,  
attiba rotsía xo benni,  
aníaba otsial cana lhe.

Ttiaca lu nna satíaba acalu nu ancabalu,  
tsa läga lhuxalu.<sup>c</sup>

<sup>13</sup> Tata Do Iyyabaaha nna tsa lägabi chi re ni ttu ca ingeli guee na:

Daca lhuitta derechu quia udo,  
axta liba unia aca ca nu lä raca uyúcan lu-na  
nu udú ni'alu iquicani.<sup>d</sup>

<sup>14</sup> Cumu iyába ca ingeli-na sunruba espíritu rixuu lo sina gue Tata  
Do Iyyabaaha ancacabi. Lee nna ridhelhe ca ingeli-na qui uncabi  
yuda ca benni chi ga'ananie odile.

### Ttu elha tsee xení anca rodilá Tata Do Iyyabaaha ca benni

**2** Larcala nna raca duelha tsitsiru udo nagari gue nu chi bieninri  
gue ca tisa gue Xi'in Tata Do Iyyabaaha qui bittu iriesri lo nedá  
gue Ben-na. <sup>2</sup> Cumu ca tisa bodha'an Tata Do Iyyabaaha udori tisa

<sup>a</sup> 1:7 Salmo 104:4

<sup>b</sup> 1:8-9 Salmo 45:6-7

<sup>c</sup> 1:10-12 Salmo 102:25-27

<sup>d</sup> 1:13 Salmo 110:1

gueque, ca benni utixxi'a ca ingeli-na, ucaque tisa bixuu nu ráque. Larcala ca benni bittu bedo tisa gue nu rá ca tisaha nna uxíbacana elha disa ralhacana dhicana,<sup>3</sup> gansi anía uca, ri'i nna tsa läga lhári lo elha disa ute Tata Do Iyyabaaha gansi bittuba etábinri gue elha tsee xeni chi rá Ben-na unie len ri'i de odile ri lo ca tulha gueri. Gue unní nna cuinaba Jesús Benni bananie ri-na utixxi'e ca tisa-na, lenla nna utixxi'aquin ca benni bina nu rá Ben-na ri, rácabi ri: "Gualíba nu rá Benniha."<sup>4</sup> Güeaniba benguuba Tata Do Iyyabaaha ixe loba ca milagru lhe ca nu runi ebanin benni lhe betee Espíritu guee-na lenri lhe qui iyába unní bele'e lo gualíba nu rá ca tisa guee-na.

### **Jesús uque benni attiba ancari**

<sup>5</sup> Tata Do Iyyabaaha nna läga boca'ane las ná ca ingeli-na qui innabiacabi yies lo yu cubi nu chi daba isía, gue yies lo yuha unní nu rinneri nnanna. <sup>6</sup> Tiaca lo ttu ca sitsi gue Tata Do Iyyabaaha rinne ttu benni rábi Ben-na:

¿Titialiga xeni ra le ca benni se'e yies lo yu-ni nuarca rexxa  
lelu cana?

¿Si daca lhabacana nuarca rexxattinlu cana bala'ana?

<sup>7</sup> Lu nna benlu uca ca benni nu ra güexxaru leni atti ca  
ingeli-na.

Ttiaca luguuba benlu acacana nu ra xxeni leni, nu innabia  
iyáxeaba nu benlu lhe.

<sup>8</sup> Iyába boca'anlu las ná qui innabiacana.<sup>a</sup>

Larcala nna iyáxeaba chi boca'an Tata Do Iyyabaaha las ná ca benni qui innabiacana, tsa lägabi boca'ane lä betebe lencana qui innabiacana. Ttiaca gualíba, axta nnanna lägabi chi rilenri udo iyánea nu te tisa guecani. <sup>9</sup> Ttiaca nnanna rilenri Jesús benni ulhidagaa Tata Do Iyyabaaha lee a saro'otte güexxa atti ca ingeli-na, nnanna nna anque benni ra xxeni lee lhe Benni rapari respeto lhe de nu guate lo ya crusinha. Aníaba beni Tata Do Iyyabaaha cumu besi'inie ri, nuarca udhele Benniha qui uttie cuenta gue iyáxeabi.

<sup>10</sup> Iyába nu se'e Tata Do Iyyabaahaba benie qui se'e-na, guebe ancacana lhe. Larcala nna tseeba anca len Tata Do Iyyabaaha udhelhe Jesús yies lo yu-ni, Benniha nna guate biyúe elha disa. Cumu aníaliba nna belhuxé iyába nu chi ga'ananie unie. Aníaba

---

<sup>a</sup> 2:6-8 Salmo 8:4-6

beni Tata Do Iyyabaaha qui bodilá Jesús ca benni anca xi'ini Ben-na. Análiba nna ixeru benni edíbaacabi elha ra xxeni lee gue Tata Do Iyyabaaha.<sup>11</sup> Cumu Jesús lenie ca benni chi se'e riesi anca gue Tata Do Iyyabaaha leni ca benni reonie nari, la ttuba xi'ini Tata Do Iyyabaaha ancaque. Larcala läga rettuin Jesús atti re ancari betsie.<sup>12</sup> Lo ca sitsi gue Tata Do Iyyabaaha-na rinne Jesús re Ben-na:

Neti quixxi'atia ca betsia-na qui unacana gue nuxa anca cuinalu-na

lagüi gue ca benni se'e ribequi xencana lu ulha guelu lhe.<sup>a</sup>

<sup>13</sup> Ráguae:

Neti nna uxxenba lasia Tata Do Iyyabaaha.<sup>b</sup>

Unneguabe attu libe re:

Niba dua len ca xi'ini Tata Do Iyyabaaha, ca benni chi boca'ane las náya.<sup>c</sup>

<sup>14</sup> Larcala nna de anca ca xi'ini Tata Do Iyyabaaha se'e yies lo yu-ni benni anca leni reni lhe bela lhe anáguaba Jesús ucaguabe benni anca len bela lhe reni lhe qui uca uttie, cumu leni nu guate Benniha lo ya crusihha liba nna beduye nu rinnabiana elhutti-na, unnuha nua nu xxegüiha. <sup>15</sup> Sunruba aná uca bodile iyába ca benni se'e rasini lo elhuttiha, ca nu tu ttuba se'ecana yies lo yu-ni ancacana attiba nu tto'o lo sina gueni. <sup>16</sup> Cumu gua yubari läga ca ingeli-na bita Jesús betenie yuda, ca benni datía Abraham liba bita Ben-na betenie yuda. <sup>17</sup> Denuala nna labíaba uque Benni attiga ancari ri'i ca benni raca betsie, análiba nna be'eyue uque lo Tata Do Iyyabaaha ttu bixxudi xeni rinnabia, bixxudi ratúa lee lhe bixxudi rudo tisa lo sina gue Tata Do Iyyabaaha lhe. Análiba nna qui utixe gue ca tulha gue ca benni de belalie reni guee lo ya crusihha. <sup>18</sup> De anáguaba Benniha cuinaga lee biyúe elha disa atti uxaca be xxegüiha dhiyiene unie nu lä anca tsee, larcala nna güedí güedenbe ca benni ruxunnina guecani ixúyiecana uncana nu lä anca tsee.

### Jesús anque benni ra xxenru lee atti Moisés

**3** Larcala nna ca benni ria le Jesús chi se'e riesi anca gue Tata Do Iyyabaaha, ca benni sela len ca benni uxi Ben-na qui acacabi guee, gualorexxa tsee lele, Jesucristuha anque bixxudi xeni rinnabia, apóstol gue ca tisa ria leri-ni lhe. <sup>2</sup> Jesús anque

<sup>a</sup> 2:12 Salmo 22:22    <sup>b</sup> 2:13 Isaías 8:17    <sup>c</sup> 2:13 Isaías 8:18

Benni rudo tisa gue Tata Do Iyyabaaha benni bodúe Ben-na qui rixuu lo sina guee, attiba Moisés ucabi benni bedo tisa lo sina gue Tata Do Iyyabaaha, labi nna biyúbi iyába ca benni gue Ben-na.

<sup>3</sup> Ttiaca Jesús anque Benni ralharue cue xenie atti Moisés, attiba ttu benni runi ttu yo'o, ribequi xenru benni nu runi yo'oha attichula yo'oha. <sup>4</sup> Iyába ca yo'o-na se'eba nu benna cana, ttiaca Tata Do Iyyabaaha anque Benni beni iyáxeaba nu se'e. <sup>5</sup> Moisés ucabi benni bixuu lo sina gue Tata Do Iyyabaaha, labi nna tsitsiba bedobi tisa, biyúbi ca benni gue Ben-na, labi nna sunruba ucabi ttu benni bixuu qui utixxi'enbi ca benni gue nu inná Tata Do Iyyabaaha. <sup>6</sup> Ttiaca Cristuha nna anque Xi'ini Tata Do Iyyabaaha, lee nna tsitsiba rape ca benni gue Ben-na. Ri'i ancari ca benni gue Tata Do Iyyabaaha ladiba gansi guase'eri ruxxen leri itú iqui itú leri guadíbari nu se'eri ribedariha, gansi guase'eri redaca leri de dhíri nua lhe.

### Tata Do Iyyabaaha chi begüee tisa eta'ari atta edí leri

<sup>7</sup> Denuala nna rá Espíritu gue Tata Do Iyyabaaha:

Gansi nasá iyieninle ts'i'i Tata Do Iyyabaaha innee,

<sup>8</sup> bittu un diti lastoole aquinle lä tsiaba lele gue Ben-na, unle attiba ben ca benni datíale atti use'ecana lo yu bisiha.

Lacana nna bese'e disacana lo Ben-na.

<sup>9</sup> Nía ulu'ubia ca benniola gueleha neti,

masquiba biláquinna ca milagru benia delo chua (40) ida.

<sup>10</sup> Larcala nna bisa'atia lencana,

nianna ria: "Ca unní nna satíaba rulaba lecani gue attu nu subi,

tsaba bittu raca lecani uncana nu raca lasia."

<sup>11</sup> Denuala nna nuarca bisa'atia begüeea tisa ria:

"Tsa bittu eta'acana atta chi ga'anatia tse'ecana edí lecani." <sup>a</sup>

<sup>12</sup> Ca benni ria le Jesús gualdo cuidadu qui bittu aca ni ttule nu lä re latti leni, nu bittu ria leni Tata Do Iyyabaaha benni doe banie lhe cumu unná uni iriesle Ben-na. <sup>13</sup> Nu unlale nna ttu ttu sá gualuttipa le loesle, nasá laca sna se'e banrule qui bittu ixúyiele unle nu lä anca tsee, lania nna eyaca le nu anca lastooni diti bitturu tsia lele gue Tata Do Iyyabaaha. <sup>14</sup> Cumu gansi tse'e tsitsiri bittu

<sup>a</sup> 3:7-11 Salmo 95:7-11

udhanri uxxen leri Ben-na attiba xen lerie atti primerba güia lerie axta atti isía sá lhuxaha, lanialiba nna guancari benni sela edíbaa iyába nu anca gue Cristuha. <sup>15</sup> Gualorexxa lele nu rá lo ca sitsi gue Tata Do Iyyabaaha:

Gansi nasá iyieninle ts'i'i Tata Do Iyyabaaha innee ulise le,  
bittu un diti lastoole aquinle lä tsiaba lele gue Ben-na, unle  
attiba beni ca benni use'e atti nía, lacana nna  
bese'e disacana lo Ben-na.<sup>a</sup>

<sup>16</sup> ¿Nú benni nua, dequide bienquinna unne Tata Do Iyyabaaha, nianna bittu uca lecani udocana tisa guee? ¿Si läba ca unnuha nua ca benni bebea Moisés lo yu te láni Egiptoha? <sup>17</sup> ¿Nú leni nua bisa'ani Tata Do Iyyabaaha chua (40) ida? ¿Si läba len ca nu beni nu lä anca tseeha nua bisa'anie? Ca unnuha nna níaba utticana lo yu bisiha. <sup>18</sup> ¿Nú len nua begüee Tata Do Iyyabaaha tisa bittu eta'acana lo yu atta chi ga'ananie edí lecani? ¿Si läba ca nu lä bedo tisaha nua re anía? <sup>19</sup> Gualíba, läga beta'acana atta edí lecani cumu de bittu güia lecani gue Tata Do Iyyabaaha.

**4** Larcala nnanna gua dicaru eta'ari atta chi begüee Tata Do Iyyabaaha tisa tse'eri edí leri, ttiaca tsitsiba cuidadu udori qui lä eya'ana nux tturi lä dhabana eta'ana atta edí leri. <sup>2</sup> Cumu ri'i lhe chiguaba bieninri ca tisa riguixxi'a gue chi tee atta eta'ari edí leri, attiguaba ca benni Israel. Ttiaca len ca unnuha nna tsa lägabi bixuu bienquinna ca tisaha cumu de bittu güia lecani. <sup>3</sup> Ri'i ca benni chi ria leri Jesús, güeta'abari atta edí leri. Ttiaca gue ca nu bittu güia lecaniha nna unne Tata Do Iyyabaaha re:

Lagüi lo risa'atia nna begüeaa tisa ria:

“Tsa bittu eta'acana atta chi ga'anatia tse'ecana edí lecani.”<sup>b</sup>  
Masquiba atti uluxa beni Tata Do Iyyabaaha yies lo yu-ni li chi bodha'ane atta tse'eri edí leri. <sup>4</sup> Cumu ttu re lo ca sitsi guee Ben-na rixxi'a gue sá gasi-na, rá:

Sá gasi-na bedí le Tata Do Iyyabaaha, la sá-na uluxa benie iyába.<sup>c</sup>

<sup>5</sup> Ráguba lo ca sitsi-na attu libe:

Tsa bittu eta'acana atta chi ga'anatia tse'ecana edí lecani.

<sup>6</sup> Ttiaca sna se'eba adí benni reasa eta'acana atta rá Tata Do Iyyabaaha tse'ecana edí lecani. Cumu ca benni bienini primero ca

<sup>a</sup> 3:15 Salmo 95:7-8

<sup>b</sup> 4:3 Salmo 95:11

<sup>c</sup> 4:4 Génesis 2:2

tisa rixxi'a gue chi tee atta edí lecaniha, läga beta'acana nía de bittu bedocana tisa.<sup>7</sup> Denua nna bete Tata Do Iyyabaaha attu sá lenri qui eta'ari atta tse'eri edí leri, ancana nasá. Attiba rá David ixe ida dequi de atti uca unní. Lo ca salmo-na rinnebi rábi:

Gansi nasá iyieninle ts'i'i Tata Do Iyyabaaha innee,  
bittu acale nu anca lastooni diti bittu ria leni.<sup>a</sup>

<sup>8</sup>Cumu gansi Josué gualíga udábi boga'abi ca benni Israel lo yu atta tse'ecana edí lecani, lania nna lärgaga unne Tata Do Iyyabaaha gue attu sá edí leri nu chi daba isía.<sup>9</sup> Larcala nna guaga'anrubia qui edítsee le ca benni chi anca gue Tata Do Iyyabaaha.<sup>10</sup> Cumu ca benni chi se'e redí lecani len Tata Do Iyyabaaha chiba redí le ca nua gue iyába nu bencana, attiba Tata Do Iyyabaaha beaca lee gue iyába sina benie.<sup>11</sup> Ri'i nna unlari duelha tse'eri atta edí leri, qui bittu sate ni tturi attiba guate ca nu lä bedo tisaha.

<sup>12</sup>Cumu ca tisa gue Tata Do Iyyabaaha anque bani, ra tsitsi leque lhe. Ichúrlaque atti ttu espada ria irpa ladu ro'on, nnela rita'aque axta lhi'u lhe'e lastoori, axta lhi'u lhe'e atta yu'u espíritu gueri lhe ca atta yieti ro'o loesi sitta gueri lhe axta atta yu'u xinni sitta gueri lhe qui ritsatsa ni'e nu rulaba leri, nu racani lastoori-na unna lhe.<sup>13</sup> Iyába ca nu beni Tata Do Iyyabaaha rilánie cana, tsa lägabi te ttu bixa nu bittu rilánie. Lo Ben-na utsadúri qui oteri cuenta gue iyába nu benri.

### Jesús anque bixxudi xeni

<sup>14</sup> Jesús Xi'ini Tata Do Iyyabaaha anque bixxudi xeni gueri. Lee bete'e iyyabaaha, denuala nna unri duelha bittu aquinri udhequiri lä tsiaba leri Ben-na.<sup>15</sup> Jesús Benni anque bixxudi xeni gueri-na gua ratúaba lee ri, de ancari benni nu nnelaba rixúyienna runna nu bittu anca tsee. Cumu anáguuba Ben-na, uxacaguuba nu xxegüiha dhi yiene atti udoe yies lo yu-ni atti guaba runi unná len ri'i nnanna. Ttiaca bittu bixúyie unie ni ttu nu lä anca tsee.<sup>16</sup> Larcala nna xen suba leri chi ibigari lo Tata Do Iyyabaaha, Benni racanie gueri. Qui anáchu esi'i le Ben-na ri, aca lanie ri lhe lagüi lo reasinrie.

**5** Cumu iyába ca benni raca bixxudi xeni, lhe'e ca benni se'e yies lo yu-niba ribe ca bi'iniha qui realha ladibi. Labi nna rutsá dubi ca benni lo Tata Do Iyyabaaha, rutebi úna gue ca benni lo becoa

<sup>a</sup> 4:7 Salmo 95:7-8

gue Ben-na lhe ruttebi bela gue ca nimala rute benni lo becoa-na lhe aníaliba nna ridí Tata Do Iyyabaaha elha xen lasi gue ca tulha gue ca benni.<sup>2</sup> Bixxudi rinnabia xeniha nna ancaguabi benni ruxunnina guebi unbi nu lä anca tsee. Denuala nna ancabi nu ratúa lebi ca benni requi runi nu bittu anca tsee, de ancacana nu bittu te elha rieni guecani.<sup>3</sup> Lo ni'a gue unnuha nna labi nna daa lobi uttibi nimala qui utebi úna gue ca tulha guebi, attiguaba runbi gue ca tulha gue adí ca benni.<sup>4</sup> Tsa läganu benni tee aca guebi titúbabí ogalha ladibi acabi bixxudi xeni. Tata Do Iyyabaaha liba rucue nua rogalhe ladini, attiba benie len Aarón lalibe bodúe bi'iniha qui ucabi bixxudi xeni.<sup>5</sup> Anáguaba Cristu, läga titú Benniha bedúe aque bixxudi xeni, sinuqui Tata Do Iyyabaahaba bodúe Ben-na, lee nna re Jesús:

Lu ancalu Xi'inia,  
nasá rixxi'aya, neti anca tata guelu.<sup>a</sup>

<sup>6</sup> Ráguba Tata Do Iyyabaaha Jesús attu re lo ca sitsi guee-na:

Lu nna ttu dia liiba acalu bixxudi,  
loesi bixxudi uca Melquisedec.<sup>b</sup>

<sup>7</sup> Atti udo Cristu yies lo yu-ni itú ribesbe unnee itú iqui itú lee unnabe lo Tata Do Iyyabaaha re Ben-na:

"Bodilá chi neti lo elhuttiha." Cumu sunruba Tata Do Iyyabaaha anque Benni ra xxeni lee guaca guee unie nu rinnaba Benniha. Tata Do Iyyabaaha nna bienbanie gue Ben-na cumu anque Benni rudo tisa.<sup>8</sup> Masquiba anca Cristu xi'ini Tata Do Iyyabaaha, labíaba guate biyúe elha disa. Aníaliba nna cuinaga lee uque benni biyúe gue gaxasná anca dho tisa,<sup>9</sup> dequide uluxani Jesús iyá nu anca unie, lania nna be'eyue uque benni utee elha nabani gatta ttu dia lii gue iyába ca benni rudo tisa guee,<sup>10</sup> cumu Tata Do Iyyabaaha bodúe Ben-na aque bixxudi xeni attiba Melquisedec.

### Nu sate benni gansi udhanna tsia leni Jesús

<sup>11</sup> Gue nu rátu-ni nna ixeba nu te innátu, ttiaca tsitsiba anca quixxientu le-na, cumu de ancale nu bittu rudo nagani gue nu rátu.

<sup>12</sup> Delo toná chi anca ria lele Jesús, lebi'i nna benni rule'e nu rá ca tisa gue Ben-naba rána chi ancale. Ttiaca lebi'i nna sna reasabinle quixxi'a dacabintu le attu libe gue gaxasná dhu lo benni tsia leni

---

<sup>a</sup> 5:5 Salmo 2:7    <sup>b</sup> 5:6 Salmo 110:4

Tata Do Iyyabaaha. Attiba ttu unto chica'a reasinna xisi, cumu bittu chi dica gona elha go.<sup>13</sup> Iyába ca nu anca attiba unto reasani xisi, bittu rite daaquinna gue gaxa tee nu anca tsee lhe nu bittu anca tsee lhe.<sup>14</sup> Ttiaca ca benni chi se'e tsitsi lo neda gue Tata Do Iyyabaaha nna elha goba chi ralhacabi gocabi, lacabi nna chi raca guecabi ritsatsa ni'acabi, cumu chi anca biaquinbi ga te nu anca tsee lhe ga te nu bittu anca tsee lhe.

**6** Larcala nna chinca oca'anri nu ru'uri rinneri gue ca tisa gue Cristu bidetiri primera, usiguiari tse'e tsitsiri lo neda gue Ben-na. Bitturu eyequiri ededulori edeguixxi'en loesri gue nu chi bele'equinna riha, delába gue gaxasná oduxiyyanri gue nu lä anca tsee benriha, gue gaxasná uxxen leri Tata Do Iyyabaaha lhe<sup>2</sup> gue gaxasná dica gadiri inda lhe gue nu ruxxúa nári iqui ca benni ria le Jesús lhe gue eyacacani ca nu yatti-na lhe gue elha disa ute Tata Do Iyyabaaha ttu dia liiba gue ca nu te tulha guecani lhe.<sup>3</sup> Anába bittu usiguitu ule'entu le, gansi Tata Do Iyyabaaha aca lee.

<sup>4</sup> Cumu ca benni chi rudani xieni gue Tata Do Iyyabaaha lhe'e lastoocani, chi bedí baacana nu tsee bete Tata Do Iyyabaaha lencana lhe chi uxícana Espíritu gue Tata Do Iyyabaaha lhe<sup>5</sup> chi uxícana baneda ca tisa gue Tata Do Iyyabaaha lhe chi yucana gue gaxasná innabie leni elha ra xxeni le guee lhe'e ca sá chi daba isía lhe<sup>6</sup> ca benni-ni nna gansi udhancana tsia lecani Cristuha, lärgaga aca eyequicana odaxxucana neda gue Ben-na attu libe, cumu attisiba cuinaba lacana rotávana xi'ini Tata Do Iyyabaaha lo ya crusinha attu libe, runcana rettuni Benniha aní lo iyá benni lhe.<sup>7</sup> Cumu ca benni ria le Tata Do Iyyabaaha ancacana attiba lo yu nu ri'a itúba inda gue iyya raca balhaxaba libe lo-ni. Lo yuha nna tseeba lena bani rutena gue ca nu ribeni sina loniha, guardibacana elha tsee rute Tata Do Iyyabaaha.<sup>8</sup> Ttiaca gansi lo yuha nna suna yitsiba lhe bibuba lhe re'eyu loni, unnuha nna tsa lägabi ixuu nua. Chiba daa ribigana gue lo yuha dhona gui qui ttu tsaba itena.

<sup>9</sup> Ttiaca lebi'i ca benni raquintu gueni, masquiba rinnetu rátu le aná, yuxeabatu lebi'i nna tseeba salíana le, godilába Tata Do Iyyabaaha le lhe.<sup>10</sup> Cumu Benniha nna anque Benni runi nu anca tsee. Läga ixulhin Ben-na gue nu tsee chi benle, niguuba gue nu runle yuda adí ca benni chi anca gue Ben-na lhe. Atti runle aná nna rule'e lole raquinle gue Tata Do Iyyabaaha, anába diabale runle axta nnanna lhe.<sup>11</sup> Ri'itu nna tsitsiba nu runtu cua ttuttule itú iqui

itú lele usiguile unle aná axta liba isía sá aca ida'a iyá. Anía liba nna dhíle iyácea nu chi xen lele dhíle. <sup>12</sup> Bittu raca letu acale nu lea, nu unlale nna gualunla atti beni ca benni bexxen lecabí Tata Do Iyyabaaha. Ca bi'iniha nna läga bedilrecabi, uledabacabi dhicabi nu chi rá Tata Do Iyyabaaha utee lencabi.

### **Uxxen leri gue ca tisa bodha'an tsitsi Tata Do Iyyabaaha**

<sup>13</sup> Tata Do Iyyabaaha nna atti bodha'an tsitsie tisa guee leni Abraham, la labé bedetti lee cumu nutturu attu nu ra xxeni leni do atti lee, <sup>14</sup> nianna re: "Gualíbatia, neti nna aca tsitsia lania lu, unia tse'e ixe tsitsia ca benni datíalu lhe." <sup>15</sup> Larcala nna uledaba Abraham, tsa läga guaxxaquinbi. Anía liba nna uxíbi nu chi rá Tata Do Iyyabaaha utee lenbi.

<sup>16</sup> Gansi chi rugüe ca benni tisa uncana ttu bixa, lania nna ruedeticana lá ttu benni ra xxeni ru leni atti lacana qui re'an tsitsi tisa chi begüeecanaha. Anía liba nna bittu teni benni bixarua innána. <sup>17</sup> Denua nna bedetti Tata Do Iyyabaaha lee atti boca'an tsitsie tisa chi begüee, cumu uca lee ttedaani ca benni dhi nu utee len lacana, lee nna tsa läga otsie nu chi re, guadúbe unie nua.

<sup>18</sup> Cumu Tata Do Iyyabaaha nna tsa läga run lee, runbe nu chi re unie. Denuala nna boca'an tsitsi tisa guee atti bedetti lee qui begüee lidhaca nu chi re. Larcala nna chi tee ttu elha xen lasi xeni gueri, ri'i ca benni chi se'e len Ben-na qui redí redenie ri. Anáguaba, tsaba chi xen leri guadíbari nu chi re utee lenri. <sup>19</sup> Nu xxen leri dhíri-na ancana nu runi se'e tsitsiri lo neda gue Tata Do Iyyabaaha, unná ancana attiba ttu iyya lána ancla do lo tuu gue ttu barco nu tsitsiba riadana lhe'e indattoo qui bittu ita barcoha. Anáguaba ri'i nu xxen leri dhíri-na dia lenna ri lo Tata Do Iyyabaaha benni do cu'e lari daa lhe'e yotu do iyyabaaha. <sup>20</sup> Cu'e lariha nua uta'a Jesús qui udhalie neda gueri. Benniha nna be'eyue uque bixxudi xeni do ttu dia liiba, loesi bixxudi uca Melquisedec.

### **Ni rixxi'a gue bixxudi te lábi Melquisedec**

**7** Melquisedec ucabi bi'ini rinnabia gue yiesi lá Salem, ucaguabi bixxudi gue Tata Do Iyyabaaha Benni anque Benni ra xxeni lee. Atti dedaa Abraham güiabi bitilhabi dequide udábi lo ca nu rinnabia gue ca yiesi se'e nía, Melquisedec biríabi guatsábi Abraham qui unnababi aca len Tata Do Iyyabaaha bi'iniha. <sup>2</sup> Laniala nna

begüee Abraham bi'iniha tsii gue ttu gayua gue iyába nu beojabi gue ca nu bitilha lenbiha.

Lá Melquisedec dienna innána nu rinnabia runi elha uxtisi tsee. De ucabi nu rinnabia gue yiesi lá Salem, nuarca teeguaba lábi nu rinnabia runi rise'e tsee len loesi benni.<sup>3</sup> Tsa läganu yuna gue nuxa uca tata nan gue Melquisedec, niguaba gue nuxa uca benniola guebi lhe. Nuttuguaba nu yu gue nuca ulbi lhe niguaba gue nucaxa uttibi lhe. Nuarcala labi ancaguababi attiba Xi'in Tata Do Iyyabaaha de ancabi bixxudi do ttu dia liiba.

<sup>4</sup>Nnanna nna Gualúnarga, cattipa nu ra xxeni leni uca Melquisedec, nuarca axtaba benniola gueri Abraham begüeeli bi'iniha tsii gue ttu gayua gue iyába nu beojabi gue ca nu rinnabia bitilha lenbiha. <sup>5</sup>Lo ca ley boca'ana Moisés rixxi'a rá dequi ca benni raca bixxudi datía benni lá Leví labíaba ridícabi tsii gue lo ttu gayua gue iyába nu ridí ca benni gue sina runcana, masquiba raca ca nua benni datíacabi lhe anca ca nua benni datía Abraham attiba lacabi lhe. <sup>6</sup>Ttiaca Melquisedec masquiba bittu ancabi benni datía Leví, labi nna uxíbi tsii gue de lo ttu gayua gue nu denoja Abraham. Melquisedec nna unnababi aca len Tata Do Iyyabaaha Abraham bi'ini chi begüee Tata Do Iyyabaaha tisa unie ttu nu tsee lenbi. <sup>7</sup>Ri'i nna gua yubari, benni ra xxeniru leniha liba nua rinnabana aca len Tata Do Iyyabaaha benni ra güexxaru leniha. <sup>8</sup>Ca bixxudi datía Leví ridí tsii gue de lo ttu gayua nu rute benni, nu re elhutti guebani ancacana, ttiaca lo ca sitsi gue Tata Do Iyyabaaha rixxi'a gue Melquisedec, bi'iniha nna do attiba banbabí. <sup>9</sup>Larcala nna guacaba innári, ca benni datía bi'ini lá Leví ridí tsii gue de lo ttu gayua gue iyába nu ridí benni gue sina runcana, attisiba labacabi nua utixa tsii gue de lo ttu gayua atti utixa Abraham tsii gue de lo ttu gayua leni Melquisedec. <sup>10</sup>Cumu lania nna lhe'e reni gue Abrahamba chi yu'u benni lá Leví atti biría Melquisedec guatsábi Abraham.

### **Jesús anque loesi bixxudi uca Melquisedec**

<sup>11</sup>Ca ley bete Tata Do Iyyabaaha len ca benni Israel, boca'ane que las ná ca bixxudi datía Leví. Ttirca udába ca bixxudiha utúacabi ca tulha gue ca benni, lania nna care'aba loesi bixxudi uca Aarón tse'e, lärga uca duelha isía attu bixxudi subi loesi bixxudi uca Melquisedec. <sup>12</sup>Cumu gansi otsiacana attu lo bixxudi, anágua ba raca duelha otsiaguabacana ca ley-na. <sup>13</sup>Bixxudi subi Benni rinne

ca sitsi gue Tata Do Iyyabaaha guee-na anque Jesús Benni bananie ri-na. Lee nna läga anque Benni datía Leví, sinuqui Ben-na anque Benni datía attu cue benni Israel bittu chi uca ni ttucabi bixxudi. <sup>14</sup> Chiba yuri, lee anque benni datía attu cue ca benni Israel datía Judá. Masquiba atti unne Moisés gue nupa aca bixxudi, tsa lägabi rábi gansi aca ca bi'iniha bixxudi.

<sup>15</sup> Unní nna adíla lhixxa radú leri-na nnanna cumu de chi bisía attu loo bixxudi, loesi bixxudi uca Melquisedec. <sup>16</sup> Jesús be'eyue uque bixxudi, läga de rá lo ca ley-na labíattiga anque benni datie Leví, sinuqui bedúe anque bixxudi de anque Benni ra xxeni leni do ttu dia lii. <sup>17</sup> Cumu Tata Do Iyyabaaha rinnee lo ca sitsi guee-na re Jesús:

Lu nna ttu dia liiba ancalu bixxudi,  
loesi bixxudi uca Melquisedec.<sup>a</sup>

<sup>18</sup> Anioca nuarca bitúa nu rá ca ley boca'an Moisés, de bitturu lheaca ancaque, de bitturu bixuu nu ráque lhe. <sup>19</sup> Cumu ca ley boca'an Moisés tsa läga udáque unque e'eyu ca benni acacana nu anca nari lo Tata Do Iyyabaaha. Denuala nna cuenta gue ca ley-na chi tee attu benni tseeru uxten leri, Benniha runi qui ribigari lo Tata Do Iyyabaaha.

<sup>20</sup> Atti bodú Tata Do Iyyabaaha Jesús aque bixxudi, bedetti lee qui boca'an tsitsi tisa guee. Adí ca bixxudiha nna anátteba bese'ecabi, läga bedetti lee qui eya'an tsitsi tisa rugüe. <sup>21</sup> Ttiaca atti bealha ladi Jesús aque bixxudi, cuinaba Tata Do Iyyabaaha bedetti lee. Cumu lo ca sitsi gue Ben-na re:

Benni bananie ri-na chi re tsa bittu otsia tisa guee, cuinaba  
lee bedetti lee atti begüee tisa re:

“Lu nna ttu dia liiba acalu bixxudi  
loesi bixxudi uca Melquisedec.”<sup>b</sup>

<sup>22</sup> Larcala nna Jesús anque benni ribea loe gue ca tisa begüee Tata Do Iyyabaaha. Lee due re: gualíba tseeru anca ca tisa-na atti ca ley uxí Moisés.

<sup>23</sup> Adí ca bixxudiha nna ixebacabi uca cumu risíaba sá ratticabi, denua nna läga raca usiguicabi tse'ecabi acacabi bixxudi. <sup>24</sup> Ttiaca Jesús, ttu dia liiba anque bixxudi, cumu de bittu gattie, nuarcala nna lärga edú attu bixxudi cuenta gue Ben-na. <sup>25</sup> Denua nna raca gue Jesús rodile ca benni ttu tsaba, ca nu dia ribiga lo Tata Do

---

<sup>a</sup> 7:17 Salmo 110:4    <sup>b</sup> 7:20-21 Salmo 110:4

Iyyabaaha de chi ria lecani Jesús, Ben-na anque Benni do ttu dia liiba, satíaba rinnabe aca len Tata Do Iyyabaaha ca benni.

<sup>26</sup> Larcala nna Jesús anque bixxudi xeni reasinri. Lee anque Benni do riesi anca gue Tata Do Iyyabaaha, Benni bittu runi ni ttu nu lä anca tsee lhe Benni bittu tulha guee te lhe Tata Do Iyyabaaha ulequiesie Benniha lhe'e ca nu runi tulha. Labe anque Benni ra xxeniru lee do iyyabaaha. <sup>27</sup> Lee nna läga anque attiba adí ca bixxudi xeniha. Ca bi'iniha nna raca duelha rutticabi ca nimala ttuttu sá qui rutecabi úna lo becoa gue Tata Do Iyyabaaha. Primerba gue ca tulha guecabi rutecabi úna, lenla nna gue ca tulha run ca benni. Jesús nna ttu libeba betee úna lo Tata Do Iyyabaaha gue ca tulha gueri atti la labe bete elha nabani guee qui uttie lo ya crusihha. <sup>28</sup> Lo ca ley boca'an Moisés nna rá: "Ca benni runi nu lä anca tseeba ese'e aca bixxudi xeni." Ttiaca dequide bete Tata Do Iyyabaaha ca ley boca'ane len Moisés, lee nna bodha'an tsitsie tisa guee, Xi'inie Jesúsba aque bixxudi xeni Benni do ttu dia lii bittu che tulha.

### Jesús anque bixxudi xeni gueri

**8** Nu xxenru gue delo iyá nu datu rixxi'atu-ni nna ancana: Benni anque bixxudi xeni gueri-na anque Benni doe iyyabaaha daca ladu derechu gue Tata Do Iyyabaaha Benni ra xxeni lee-na. <sup>2</sup> Lee anque bixxudi runi sina lhe'e cuinaga yotu do iyyabaaha, yotu nu bedo Tata Do Iyyabaaha, bittu nu bedo ca benni se'e yies lo yu-ni.

<sup>3</sup> Cumu iyába ca bixxudi xeniha bese'ecabi qui utecabi úna leni Tata Do Iyyabaaha, qui uttecabi bela gue ca nimala rutticabi lo becoa gue Ben-na lhe. Denuala nna raca duelha uteguaba Jesús Benni anque bixxudi xeni gueri-na úna. <sup>4</sup> Ttirca sna dobe yies lo yu-ni nna läga aca Benniha bixxudi, cumu sna se'eba bixxudi rutecabi úna attiba rába lo ca ley boca'ana Moisés. <sup>5</sup> Ca bixxudiha nna runcabi sina lhe'e yotu do yies lo yu-ni benni anca lixxina anca atti anca cuinaga yotu do iyyabaa. Cumu atti chi dia Moisés unbi yotu uca len lariha nna Tata Do Iyyabaaha re bi'iniha: "Begüia, beni yotu-na attittiga anca nu bele'etia lu lo lhilhi-na."<sup>a</sup> <sup>6</sup> Ttiaca nnanna sina bodha'an Tata Do Iyyabaaha uni Jesús Benni anque bixxudi xeni gueri-na anca tseeru atti sina beni adí ca bixxudiha. Cumu Ben-na ribea loe gue ca tisa teru lidhacaque chi boca'an tsitsi

---

<sup>a</sup> 8:5 Éxodo 25:40

Tata Do Iyyabaaha len ca benni, atti ca tisa bodha'ane leni Moisés.  
Lee nna re utee ttu nu tseeru lenri.

<sup>7</sup> Cumu ttirca ancaba ida'a ca tisa bodha'an Tata Do Iyyabaaha  
len ca benni Israel primera roha nna lania nna lärga birua raca  
duelha odha'an Ben-na tisa berupa-na. <sup>8</sup> Ttiaca Tata Do Iyyabaaha  
guaxxaque bittu run ca benni nu dica uncana. Denua nna rinne lo  
ca sitsi guee-na rá:

Aní rá Benni bananie le-na:

“Isía sá atti odha'ana attu tisa cubi  
len ca benni datía bi'ini lá Israel,  
len ca benni datía bi'ini lá Judá lhe.

<sup>9</sup> Tisa cubi odha'ana len ca nua nna  
läga anque loesi tisa bodha'ana  
len ca benniola guecaniha

la sá atti bedaxxua nácani qui bebeaya cana las ná ca nu  
Egiptoha.

Ttiaca lacana läga bedocana tisa gue tisa bodha'ana len  
lacana,

larcala bedhá iquia cana”, rá Benni bananie ri-na.

<sup>10</sup> Unní tisa cubi odha'ana len ca benni Israel-na  
ca sá chi daba isía,  
rá Benni bananie ri-na:

“Neti nna unia qui eya'an ca ley quia-ni lhe'e iquicani,  
odha'ana que lhe'e lastoocani lhe.

Neti nna aca Dios guecani,  
lacana nna acacana benni quia.

<sup>11</sup> Lania nna lärga birua raca duelha ule'eni ttu benni attu benni,  
niguaba benni lo yies guenihá lhe  
niguaba betsiniha lhe  
innena gána nua:

Raca duelha unbialu Benni bananie ri-na,  
cumu iyába benni unbiacana neti,  
desdeba nu anca unto chica'a  
axtaba benni chi anca benniola.

<sup>12</sup> Neti nna dhia elha xen lasi gue ca tulha guecani,  
tsa bitturu exxa lasia gue nu lä anca tsee bencana.”<sup>a</sup>

---

<sup>a</sup> 8:8-12 Jeremías 31:31-34

<sup>13</sup> Atti rinne Tata Do Iyyabaaha re odha'ane attu tisa cubi, lania rixxi'ecuabe ca tisa bodha'ane primera de chi uxuque. Cumu nu chi uxuha nna chitteba deoba ttuana.

### Ca úna bete ca benni ttuha läga udácanca cuacana ca tulha guecani

**9** Lo sitsi atta dia ca tisa bodha'an Tata Do Iyyabaaha primera nía rixxi'a gue yotu lari udo yies lo yu-ni, gue gaxasná cuequi xxeni ca benni loe lhe. <sup>2</sup> Salhe lhe'e yotu lariha daa ttu lari, unnuia runna chupa lila'a lhe'e yotuha. Lhe'e benni do primera te lee Atta Anca Le'a. Nía du ttu candeleru, ttu mexa sia ca ttaxtila chi biriesi anca gue Tata Do Iyyabaaha lhe. <sup>3</sup> Lhe'e benni berupa do cu'e atta daa lariha nna te lee Atta Ancaru Le'a. <sup>4</sup> Nía udo ttu becoa anque leni oro, lo Benniha nna rite yala. Níaguaba te i'ina te lee I'ina Atta Yu'u Ca Tisa Bodha'an Tata Do Iyyabaaha. Itúba i'inaha tabie oro. Lhe'e benniha yu'u ttu yedhu chica'a ancaguabana leni oro, atta yu'u elha go te láni maná. Lhe'e i'inaha yu'u garroti gue Aarón nu be'eyu lhaga latinha, ca iyya bata atta dia ca tisa bete Tata Do Iyyabaaha len ca benni Israel lhe. <sup>5</sup> Iqui i'inaha nna sia chupa ingeli lácana querubín ancacana leni oro, cunnuha sia xxilacani. Ca unnuha rule'e locana nía do Tata Do Iyyabaaha. Ca ingeliha nna tsaba daa xxilacani iqui i'inaha, qui yu'uquinna xula atta uxí Tata Do Iyyabaaha elha xen lasi gue ca tulha gue ca benni. Ttiaca nnanna lägabi raca duelha quixxi'aruchua adí gue unní.

<sup>6</sup> Atti chi se'e tsee iyába ca nu anca tse'e lhe'e yotu lariha nna ca bixxudiha nna ttutu sába uta'acabi lhe'e yo'o nu do primera qui runcabi sina daa lo ttu bixxudi unbi. <sup>7</sup> Ttiaca lhe'e attu yo'o Atta Ancaru Le'aha nna sunruba bixxudi xeniha rita'abi nía ttu liberba lhe'e ttu ida. Atti uta'a bixxudiha nía, labía nojabi reni gue ca nimala qui utebi len Tata Do Iyyabaaha, aníaliba nna ridí Ben-na elha xen lasi gue ca tulha guebi, gue ca tulha gue ca benni, gue ca tulha nu lä ritedaaquinna runcana lhe. <sup>8</sup> Leni iyába nu raca lhe'e yotuha nna runi Espíritu gue Tata Do Iyyabaaha ttedeenri, laca sna rixuba yo'o do primera nna läga chi beali lo neda gueri qui ga'ari lhe'e yo'o Atta Ancaru Le'aha. <sup>9</sup> Iyába unní nna ucana ejemplu gue nu raca tiempu se'eri nnanna. Cumu ca úna rute ca bixxudi-na len Tata Do Iyyabaaha, ca bela gue ca nimala ruttecabi lo becoa gue Ben-na lhe tsa läga ridá ca nua uncana aca ca benni nu bitturu tulha gueni te lo Tata Do Iyyabaaha. <sup>10</sup> Cumu iyába nu

uca benni mandadu unna sunruba anca nua gue nu rori lhe gue nu i'iyari lhe gue bipaxa un benni qui eyacari nu anca nari lo Tata Do Iyyabaaha lhe. Iyába unní nna rixuuna sunruba gue nu anca lolia gue Benni, bedaa atti bisía sá botsía Tata Do Iyyabaaha iyáxeaba.

### **Atti uta'a Cristuha iyyabaaha nna cuinaba reni guee betee**

<sup>11</sup> Ttiaca nnanna chiba bisía Cristu, lee anque bixxudi xeni beaca guee ca nu tsee dhíri. Yotu atta doe anque bixxudi, anque yotu tseeru, ida'aru lhe. Läga ca benni se'e yies lo yu-ni bencana yotuha, delába läga anque gue yies lo yu-ni. <sup>12</sup> Cristuha nna ute'e atta re Tata Do Iyyabaaha, chee cuinaba reni guee, läga reni gue chiva noje niguaba reni gue me lhe. Benniha nna ttu libeba ute'e lhe'e yotuha gue ttu dia liiba, qui bodile ri lo ca tulha gueri-na ttu tsaba. <sup>13</sup> Cumu reni gue ca u'unaba lhe reni gue ca chivaba lhe te gue ca vaca güexxa rite lo becoa gue Tata Do Iyyabaahaba lhe rudhedhi ca bixxudiha iqui ca benni anca tsiga lo Tata Do Iyyabaaha qui reacacana nu anca nari. <sup>14</sup> Gansi anía anca adílaba de nu anca nari tsee eyoni reni gue Cristuha ca benni. Lee nna Espíritu do ttu dia lii gue Tata Do Iyyabaahaba uca lanie Ben-na qui bedá lee bete elha nabani guee attiba úna anca nari lo Tata Do Iyyabaaha. Reni gue Ben-na rigúe iyánea nu lä anca tsee yu'u lhe'e lastoori nu icheena ri lo elhuttiha, qui anáchu nna aca ixuuri lo sina gue Tata Do Iyyabaaha Benni doe anque Benni bani.

<sup>15</sup> Larcala Cristuha anque benni due ribea loe gue ca tisa cubi bodha'an Tata Do Iyyabaaha len ri'i nnanna. Benniha nna uttie qui bodile ca benni lo ca tulha bencabi atti se'ecabi rudocabi tisa gue ca tisa betee lencabi primera, análiba nna aca dhi ca benni chi uxie acacabi benni guee nu tsa bittu lhuxa chi re utee lencabi. <sup>16</sup> Cumu attiba gansi chi runi ttu benni lo ttu sitsi atta rixxi'a gaxasná ilha'a ca benni nu te gue bi'iniha, axtaliba dequide chi utti bi'iniha, lanialiba aca uni benni nu rá lo sitsi beni bi'ini uttiha. <sup>17</sup> Cumu lägabi lidhaca sitsiha tee laca sna do banba benni beni nua, dequide liba gatti benni beni nua, lania liba chi ixuu sitsiha. <sup>18</sup> Larcala atti primera boca'an Tata Do Iyyabaaha ca tisa guee len ca benni Israel, labíaba utti ttu nimala, qui reni gue nua nna beni be'an tsitsi ca tisa boca'ane len ca bi'iniha. <sup>19</sup> Denuala nna dequide chi uluxa belaba Moisés iyába nu rá lo ca ley boca'ana Tata Do Iyyabaaha, bedaxxuttebabí ttu ti'a itsa xinaa leni ttu xxica lhaga gue ttu bibu lá

hisopo ulu'ubi lhe'e atta ta'a reni gue ca me leni reni gue ca chiva nutsa inda, atti bedhedhittebabí nua iqui ca sitsi atta dia ca ley, anáguaba iqui iyába ca benni lhe.<sup>20</sup> Nianna rábi ca benni: "Reni-ni runna eya'an tsitsi ca tisa bodha'an Tata Do Iyyabaaha len lebi'i ca nu benie mandadu unle."<sup>a</sup> <sup>21</sup> Bedhedhiguaba Moisés reniha iqui yotuha, iqui iyába ca lorsina rixuu lhe'e nua lhe. <sup>22</sup> Cumu lo ca ley gue Tata Do Iyyabaaha rixxi'a rá, lattiba lä iyába nu tee, leni reni liba acacana nu nari lo Tata Do Iyyabaaha, bittuguaba elha xen lasi tee gue ca tulha gue ca benni gan bittuba ilali reni lhe.

<sup>23</sup> Denua nna nuarca yotu do yies lo yu-ni leni iyába nu se'e lhe'eni nu anca lixxina cuinaga yotu do iyyabaaha labíaba uca duelha utti ca nimala qui bidhedhi reni gue ca nua iqui yotuha leni iyába ca nu se'e lhe'eni qui ucacana nu nari lo Tata Do Iyyabaaha. Ttiaca ca nu se'e iyyabaaha nna reasaquinna attu reni tseeru atti reni gue ca nimala qui eyonna cana nu anca nari. <sup>24</sup> Cumu Cristuha läga ute'e lhe'e yotu beni ca benni se'e yies lo yu-ni, nu anca lixxina cuinaga yotu do iyyabaaha, sinuqui iyyabaaha liba bete'e, attaba doe nnanna qui ribequi loe gueri lo Tata Do Iyyabaaha. <sup>25</sup> Cristuha nna läga beta'a Benniha iyyabaaha qui utee reni guee ixe libe. Bittuguaba runie atti runi bixxudiha guaba nua runi Cristu, lania nna desde atti ure yies lo yu-ni li axta nnanna balhala libe chi utti Ben-na. Ttiaca nnanna atti chi daa lhuxa ca sá se'erí-ni, ttu libeba betsá due bete elha nabán guee uttie qui ttu tsaba utúe ca tulha gueri-na. <sup>27</sup> Attiguaba chi ga'ana sateri ri'i ca benni se'e yies lo yu-ni, suna ttu libeba gattiri, lenla nna daa uni Tata Do Iyyabaaha elha uxtisi gueri,<sup>28</sup> anáguaba Cristuha, ttu libeba bete elha nabán guee uttie qui utúe ca tulha gue ixeru benni. Lenla nna eyacaxxe attu libe, ttiaca bitturu qui quixe gue ca tulha gue ca benni, esíabe qui odile ca benni se'e ribeda esíe.

**Ca ley bodha'ana Moisés läga rdacana cuacana ca tulha gueri**

**10** Cumu lo ca ley boca'ana Moisés, sunruba rinnee gue lixxina benni tsee chi daba ute Tata Do Iyyabaaha len ri'i, läga cuinaga benni gualí dhíriha Ben-na. Nuarcala nna tsa läga dhaa ca

---

<sup>a</sup> 9:20 Éxodo 24:8

ley-na unque aca ca benni ribiga len Tata Do Iyyabaaha nu anca nari, masquiba bittu rudú sicabi ttuttu idaba rutticabi ca nimala qui rutecabi úna lo becoa guee Tata Do Iyyabaaha. <sup>2</sup>Cumu ttirca ridába ca ley-na cuacana ca tulha gue ca benni rute ca úna-na, lania nna lärgabi acaquinbi ancacabi nu te tulha gueni cumu tsaba chi ancacabi benni anca nari, chiguaba bedusicabi rutticabi ca nimala qui utecabi úna lhe. <sup>3</sup>Ttiaca sunruba rixuu úna gue ca nimala rutticabi ttuttu ida qui rorexiana lecabí ancacabi nu te tulha gueni, <sup>4</sup>cumu reni gue ca u'una-na leni reni gue ca chiva-na tsa läga dhacana cuacana ca tulha gue ca benni.

<sup>5</sup>Larcala atti bisía Cristuha yies lo yu-ni, lee nna re Tata Do Iyyabaaha:

Lu nna läga re'o lelu úna rute ca benni, niguaba ca nimala  
rutti ca benni rutecana len luu lhe  
sinuqui netiba betelu cuerpu quia uteana attiba úna lo  
cuinalu.

<sup>6</sup>Bittuguaba radi lelu bela gue ca nimala rite lo becoa guelha lhe

niguaba lä re'o lelu úna rute ca benni qui ttua ca tulha  
guecani lhe.

<sup>7</sup>Laniala unnea ria:

“Niba dua xa Tata Do Iyyabaaha quia.

Neti nna delha qui unia nu ru'u lelu,  
attiba chi ga'ana lo ca sitsi guelha aca len neti.”<sup>a</sup>

<sup>8</sup>Cristuha nna lola re: “Tata Do Iyyabaaha nna läga uyu'u lee ca úna rute benni lenie, ca nimala rutecana qui rutecana lo becoa guee lhe adírba ca úna rutecana lo becoa guee lhe qui quixa ca nua gue ca tulha guecani.” Masquiba anába ga'ana lo ca ley-na un ca benni.

<sup>9</sup>Lenla nna re: “Niba dua xa Tata Do Iyyabaaha, neti nna delha qui unia nu raca lelu aca.” Bedá lania beni Tata Do Iyyabaaha bitturu ixuu ca úna gue ca nimala rutti ca benni rutecana lanie. Nnanna nna Cristuhaba anque úna cubi, Bennihaba uttie qui utixe gue ca tulha gueri. <sup>10</sup>Tata Do Iyyabaaha nna chiba ulequiesie ri qui acari guee de bedo Jesucristuha tisa benie nu rá Ben-na atti bete elha nabani guee qui uttie suntteba ttu libeba, anáguba ttu dia liiba ixuu nu beni Benniha lhe.

---

<sup>a</sup> 10:5-7 Salmo 40:6-8

<sup>11</sup> Iyába ca bixxudi gue ca benni Israel-na ttuttu sába se'ecabi lhe'eli'a gue yotuha runcabi sina daa locabi uncabi, lacabi nna rusiguibacabi ttuttu sába rutecabi la ttuba úna gue ca nimala rutticabi, masquiba ca úna-na tsa läga rdacana cuacana ca tulha gue ca benni. <sup>12</sup> Ttiaca Cristuha Benni anque bixxudi xeni gueri, ttu libeba bete elha nabani guee uttie qui ttu tsaba utixe gue ca tulha gueri, atti bedottebe daca lhuitta derechu gue Tata Do Iyyabaaha.

<sup>13</sup> Nnanna nna níaba doe ribede axta qui uni Tata Do Iyyabaaha aca ca benni lä raca uyúcane nu udú ni'e iquicani. <sup>14</sup> Cumu ttu libeba bete elha nabani gue Benniha, uttie qui benie uca ca benni nu anca nari ttu dia lii lo Tata Do Iyyabaaha, ca bi'iniunná chi se'e riesi anca gue Ben-na. <sup>15</sup> Anágua rá Espíritu gue Tata Do Iyyabaaha rixxi'anie ri atti re:

<sup>16</sup> Benni bananie ri-na re:

“Gansi chi bisía sáha nna unní anca tisa odha'an tsitsia len ca benni quia.

Lhi'u lhe'e lastoocani cu'a ca ley quia-ni.

Unia qui tsu'uque lhe'e elha rien guecani lhe.”<sup>a</sup>

<sup>17</sup> Anágua re:

Tsa bitturu orexxa lasia gue ca tulha guecaniha, niguaba gue ca nu lä anca tsee bencana lhe.<sup>b</sup>

<sup>18</sup> Larcala nna gansi chi uxí Tata Do Iyyabaaha elha xen lasi gue ca tulha gue ca benni, tsa lärgabi runna duelha utticana nimala utecana úna qui gaxa gue ca tulha guecani.

### Bittu udhanri uxxen leri Tata Do Iyyabaaha

<sup>19</sup> Denuala nna ca benni ria le Jesús, de reni gue Jesucristuha ri'i nna chiba yali lo neda gueri qui ga'ari lhe'e yotu do iyyabaaha Atta Ancaru Le'aha atta do Tata Do Iyyabaaha. <sup>20</sup> Lo neda cubiha neda rute elha nabaniha, nía nua tsiari. Nedaha nua udhali Jesucristuha atti bireda rulha gue lari daa salhe lhe'e yotuha qui bisíne Atta Ancaru Le'aha. Unnuá nua benie atti bete elha nabani guee qui uttie lo ya crusicha lo ni'a gueri. <sup>21</sup> Lee anque bixxudi xxeni rinnabia gueri, Benni bananie ca benni chi anca gue Tata Do Iyyabaaha. <sup>22</sup> Denuala nna itú iqui itú leri ibigari lo Tata Do Iyyabaaha cumu de chi ria tsitsi leri Ben-na, de bitturu ancari nu te tulha gueni gue

<sup>a</sup> 10:16 Jeremías 31:33    <sup>b</sup> 10:17 Jeremías 31:34

nu lä anca tsee benriha lhe de chi se'eri ancari nu narixuu attiba ttu nu chi beari cuerpu gueni leni inda tsee. <sup>23</sup> Usiguibari tse'e tsitsiri, tsa bittu udhanri uxxen leri nu chi utixxi'enri ca benni ute Tata Do Iyyabaaha gueri, cumu Benniha nna gutebe nu chi re utee gueri. <sup>24</sup> Unri duelha eguila leri gue gaxasná unri uttipa le loesri qui aquin gue loesri, qui unri nu anca tsee lhe. <sup>25</sup> Bittu aquinri udhequiri lä itupabari, attiba run adí benni rudhá iquicani. Nu unlari nna uttipala le loesri de chi yuri chi daa ribiga isía sá esía Benni bananie ri-na.

<sup>26</sup> Cumu gansi ttu usiguibari unri nu lä anca tsee dequide chi güia leri ca tisa gue Tata Do Iyyabaaha ca tisa rixxi'acanie ri gue nu anca gualí, tsa lärgabirua attu úna te ute benni len Tata Do Iyyabaaha qui dhie elha xen lasi gue ca tulha gueri. <sup>27</sup> A sunruba tse'eri ubeda leni ttu elha rasi xeni elha disa ute Tata Do Iyyabaaha atti unie elha uxtisi gueri, ubeda gui belha idhelha Benniha qui satíaba uttena ca nu lä raca uyúcana Ben-na lhe. <sup>28</sup> Cumu nu rigu'u ni'ani ca ley boca'an Moisés, tsa läga rilá nua lo elhuttiha, gansi se'e chupa o tsunna benni begüia loni rixxi'a gualí anía beni nua. <sup>29</sup> Gansi anía anca, lebi'i nna ¿bi raquinle? ¿Si laba ganna xxenirula anca elha disa ralha ca nu rigu'u ni'acani Xi'ini Tata Do Iyyabaaha, ca nu bittu rugüecana lidhaca reni belali Benniha atti uttie? Reniha nua beni be'an tsitsi tisa cubi bodha'an Tata Do Iyyabaaha len ri'i, benie ucari benni se'e riesi anca gue Ben-na lhe. Tsitsirla anca nu sate ca nu rinne güecana gue Espíritu gue Tata Do Iyyabaaha, Benni raca lanie cana. <sup>30</sup> Ri'i nna guanca biabinri Benni re: "Neti liba ralha utea elha disa xeni gue ca benni, guteba nu ralhacana dhicana."<sup>a</sup> Rágube: "Neti Benni bantia le, gunba elha uxtisi gue ca benni quia."<sup>b</sup> <sup>31</sup> Attulade tsitsi anca nu sateri gansi iyinnari las ná Tata Do Iyyabaaha Benni doe banie!

<sup>32</sup> Gualorexxa lele gue bixa guatele ttuha, atti chi bienbinle ca tisa gue Jesús. Lebi'i nna tsitsiba use'ele bechíale lo elha disa xeni biyúleha. <sup>33</sup> Guadú nna uxacaxxatta lencan le lagüi lo benni, begüeegan le lhe. A guadú nna bigutsale benle yuda ca benni guate loesi nu guateleha. <sup>34</sup> Lebi'i nna besi'iguabinle ca benni utta lisiyya, berú iqui berúba lele begüeelahale utúacana nu te gueleha lhe cumu chiba yule tseerla anca elha tsee nu itíani ttu dia lii te

---

<sup>a</sup> **10:30** Deuteronomio 32:35    <sup>b</sup> **10:30** Deuteronomio 32:36

guele iyyabaaha.<sup>35</sup> Larcala nna bittu udhanle uxxen lele Tata Do Iyyabaaha, cumu gansi guaruxxenba lele Ben-na, lania nna guadíbale nu tsee xeni ralhale dhíle.<sup>36</sup> Larcala nna raca duelha acale benni pasensi, qui dequide chi benle nu raca le Tata Do Iyyabaaha, lania nna dhíle nu chi begüee tisa utee len lebi'i.

<sup>37</sup> Cumu lo ca sitsi gue Tata Do Iyyabaaha rinnee re:

Chitte deoba esía Benni chi ga'ana esía,  
tsa lärga risá Benniha.

<sup>38</sup> Ttiaca benni quia runi nu anca tsee, de riaba leni neti nna  
guaca banbana.

Cumu gansi unnuha eyadi gana lo neda quia, laniarguaba nna  
lärga dho tseea len lana.<sup>a</sup>

<sup>39</sup> Ttiaca ri'i nna läga ancari loes ca nu readigaa lo neda gue Tata Do Iyyabaaha, cumu ca unnuha nna dia nittibacana. Ri'i ancari ca nu lhári de ria leri Ben-na.

**Ni rixxi'a bixa ben ca benni use'e atti nía  
de güia lecabí Tata Do Iyyabaaha**

**11** Atti rári: “Ria leri gue Tata Do Iyyabaaha, ri'i nna ruxxenba leri guadíbari nu se'eri ribedari dhíri. Masquiba bittu chi rilenri nua ttiaca itú iqui itú leri ruxxen leri gualíba dhíri nua.”

<sup>2</sup> Ca benniola gueri use'e atti nía nna de güiaba lecabí gue Tata Do Iyyabaaha, nuarca ucacabi benni guadi lee Ben-na gue nu bencabi.

<sup>3</sup> Ri'i nna de ria leri gue Tata Do Iyyabaaha, larcala yuri lee nna leni tisa unnebe benie lo bea-na lhe yies lo yu-ni lhe. Larcala nna läga ca nu rilenri nnanna bixuuni Ben-na benie ca unná.

<sup>4</sup> Abel, de güiaba lebi gue Tata Do Iyyabaaha, nuarca betebi ttu úna tseeru len Ben-na atti betsibi Caín. Denuala nna nuarca rá Tata Do Iyyabaaha: “Abel ancabi benni runi nu anca tsee”, uxíbe baneda úna gue bi'iniha lhe. Larcala, masquiba chi utti Abel, cumu de ucabi benni güiaba lebi gue Tata Do Iyyabaaha nuarca ri'i nna sna runabari gue nu benbi qui aníaguaba usiguiri unri.

<sup>5</sup> Enoc, de güiaba lebi gue Tata Do Iyyabaaha, nuarca läga uttibi, deyya banbabí len Tata Do Iyyabaaha, larcala läganu bi'iniha guattí'acana. Lo ca sitsi gue Ben-na riguixxi'a rá: “Atti deobali eche Ben-na bi chi daa tisa labi nna benbabí nu guadi le Ben-na.”

---

<sup>a</sup> 10:37-38 Habacuc 2:3-4

<sup>6</sup> Ttiaca gansi bittuba ria leri gue Tata Do Iyyabaaha, tsa läga aca unri nu radi le Ben-na, cumu ca benni ribiga lo Tata Do Iyyabaaha, raca duelha tsia lecani gualíba do Ben-na, gutebe nu ralha ca nu rinnabacana yuda lo Ben-na lhe.

<sup>7</sup> Noé, de güia lebi gue Tata Do Iyyabaaha, nuarca atti unne Benniha re bi'iniha dequi isía sá aca ttu nu aca, masquiba tsa lägabi chi rule'e lo bixa nua aca, bedobabi tisa benbi ttu barco xxeni qui lhá ca benni se'e lhe'e yo'o guebiha lo nua. De güia lebi gue Tata Do Iyyabaaha nuarca benbi qui dia nitti ca benni bittu güia lecani se'e yies lo yu-ni, labi nna ucabi benni uxí Tata Do Iyyabaaha elha xen lhasi gue ca tulha guebi, de güia lebi Ben-na.

<sup>8</sup> Abraham, de güia lebi gue Tata Do Iyyabaaha, nuarca atti uxi benniha bi qui iríabi atta dobiha nna bedobabi tisa biríabi diabi lo yu nu ute Tata Do Iyyabaaha len labi. Labi nna biríababi lo yu guebiha masquiba lä yubi ga nua diabi. <sup>9</sup> De güiaba le Abraham gue Tata Do Iyyabaaha, nuarca ucabi attiba ttu benni dittu atti udobi lo yu nu chi ga'anani Tata Do Iyyabaaha dhibi. Labi nna lhe'e ttu yo'o lariba udobi. Aníaguaba beni Isaac lhe Jacob lhe ca bi'ini chi ga'ana dhíguaba lo yu nu chi rá Tata Do Iyyabaaha utee. <sup>10</sup> Cumu Abraham ribedababi dhobi lhe'e yiesi nu anca tsitsi cimientu guenihá, nu cuinaba Tata Do Iyyabaaha biriequie gaxasná acana, laguabe benie na lhe.

<sup>11</sup> Aníaguaba de güiaguaba le Abraham Tata Do Iyyabaaha, nuarca masquiba chi dienbi lhe masquiba anca Sara nuila nu bittu dica uja xi'inbi lhe labi nna uxíbabí fuerza qui bisía xi'inbi de güia lebi labíaba unba Tata Do Iyyabaaha nu chi re unie. <sup>12</sup> Larcala masquiba chi ancacabi benni chi ux Xu sna bisíaba ttu xi'incabi. Xi'incabiha nua guani xxattabi attiba ca beli sia lo bea-na, attiguaba yuxi re ro'o indattoo-na lhe tsaba bittu dha benni ibabinna cana.

<sup>13</sup> Iyába ca bi'in-na läga chi uxícabí nu rá Tata Do Iyyabaaha utee len lacabi atti utticabi, ttiaca de ria lecabí Ben-na nuarca atti sna se'e banbacabi nna idittuli biláquinbi nu ribedacabi dhicabiha, lacabi nna attulade be'o lecabí de begüiacabi nua. Laniala nna guadú lecani, benni dittu dia yu'u nedaba ancacabi yies lo yu-ni.

<sup>14</sup> Ca benni rinne aná nna lhixxa suba rule'e locabi lacabi nna requibacabi reguilabacabi yiesi nu anca lascabi. <sup>15</sup> Cumu ttirca bittuba bidanquinbi yiesi atta beríacabiha nna sna ucaba bequicabi besincabi nía attu libe. <sup>16</sup> Ttiaca lacabi nna raca lecabí ttu yiesi

tseeru, unní ancana yiesi re iyyabaaha. Denuala nna bittu rettuin Tata Do Iyyabaaha anque Dios guecabi, cumu de chi retseenie ttu yiesi guecabi.

<sup>17</sup> De güia le Abraham Tata Do Iyyabaaha, larca atti ulu'u bia Benniha bi, labi nna bedobabi tisa bedaxxubi xi'inbi Isaac qui uttibi bi'iniha utebi úna lo becoa gue Benniha. Abraham nna berubinbi xi'inbi nu tturbana doenbiha gattina, <sup>18</sup> masquiba chi begüee Tata Do Iyyabaaha tisa re bi'iniha: "Isaac acana nu use'e xi'inni qui tse'e benni datíalu." <sup>19</sup> Abraham boquinna iquibi, Tata Do Iyyabaaha anque Benni ra xxeni lee, Benniha nna gunbe eyacani ca nu yatti-na. Larcala atti chi ulá Isaac bittu uttibi, attisiba lhe'e baa atta yu'u ca nu yatti-naba beadha bi'iniha, qui bedí Abraham bi attu libe.

<sup>20</sup> De güia le Isaac Tata Do Iyyabaaha nuarcala unnababi aca len Benniha Jacob lhe Esaú lhe. Utixxi'enbi cabi guacaba len Tata Do Iyyabaaha cabi ca sá chi daba isía. <sup>21</sup> De güia le Jacob Tata Do Iyyabaaha, nuarca atti chi deoba gattibi nna unnababi aca len Benniha ttuttu ca xi'ini José. Labi nna iqui garroti guerbabiha uxuabi chibuca udú reabi laca ribequi xenbi Tata Do Iyyabaaha. <sup>22</sup> De güia le José Tata Do Iyyabaaha, nuarca atti chi rattibiha nna unnebi rábi eríaba ca benni Israel lo yu te láni Egiptoha, benbi mandadu bixa uncana len ca sitta guebiha lhe.

<sup>23</sup> De güiaguuba le ca tata nan gue Moisés Tata Do Iyyabaaha, nuarca atti uli bi'iniha nna becatsicabi bi'iniha tsunna beo lhe'e yo'o guecabiba, cumu biláquinbi anca bi'iniha ttu unto sipa, lacabi nna tsa läga usquinbi lo nu rinnabia gue Egipto de chi boca'an tsitsi nua tisa gatti ca unto gali anca unbiyuu. <sup>24</sup> De güiaguuba le Moisés Tata Do Iyyabaaha, nuarca atti chi ancabi nu xeni nna bitturu uca lebi gácan bi xi'ini xi'iniunná nu rinnabia gue Egipto. <sup>25</sup> Tseerla uquinbi bedhaca güe ca nu Egiptoha bi attiba rudhaca ca nua ca benni gue Tata Do Iyyabaaha, attichula dhobi edí baabi ttu satti nu lä anca tsee raca yies lo yu-ni. <sup>26</sup> Labi nna bedhaca lebi teerla lidhaca satebi loesi nu sate Cristuha attichula edí baabi nu tsee te Egiptoha. Cumu labi nna tsaba chi besía lobi nu tsee ute Tata Do Iyyabaaha len labi. <sup>27</sup> De güia le Moisés Tata Do Iyyabaaha, nuarca biríabi lo yu gue Egiptoha, labi nna tsa bittu usinbi lo nu risa'axxattani nu rinnabia gue nía. Tsitsiba udúbi cumu attisiba rilábinbi Tata Do Iyyabaaha Benni bittu rilenrie. <sup>28</sup> De güia le Moisés Tata Do Iyyabaaha, nuarca benbi mandadu ca benni Israel uncana laní te láni Pascua. Benguabi

mandadu utticana ca carne'e qui udhedhicana reni gue ca nua ro'o ca puerta gue ca yo'o atta se'ecanaha. Bencana anía qui ingeli utti ca xi'in biyuu primero gue ca benni Egiptoha, bittu bi udhaquinna ni ttu ca xi'in biyuu primero gue ca benni Israel.

<sup>29</sup> De güia le ca benni Israel Tata Do Iyyabaaha, nuarca attiba ttu nu rite lo yu bisi utecabi lhe'e Indattoo Xinaaha. Ttiaca atti ben ca nu Egiptoha tteguabacana lhe'e indattooha nna gopittebacana inda.

<sup>30</sup> De güiaguaba le ca benni Israel Tata Do Iyyabaaha, nuarca ubixxi lo de'e yequi yiesi Jericó dequide beda'a gasi (7) bisa güequicabi sabi'abana. <sup>31</sup> De güiaguaba le nuila rutesa latini lá Rahab Tata Do Iyyabaaha, nuarca bittu uttina atti utti ca nu diti bittu bedo tisa se'e lhe'e yiesiha, cumu lana nna tseeba biyúna ca benni Israel güia güelhatsi lhe'e yiesi atta donaha.

<sup>32</sup> Ixeru nu te innía, ttiaca tiempuba reasatia qui quixxi'atia le gue Gedeón lhe gue Barac lhe gue Sansón lhe gue Jefté lhe gue David lhe gue Samuel lhe gue ca benni uca profeta gue Tata Do Iyyabaaha lhe. <sup>33</sup> Ca bi'l-in-na de güia lecabí Tata Do Iyyabaaha nuarca udácabi lo ca yiesi bitilha lencabíha, ucabí nu unnabia tsee lhe uxícabi nu chi rá Tata Do Iyyabaaha utee len lacabí lhe bencabí qui ca besi bitilha lencabíha bittu uto ca nua cabi lhe. <sup>34</sup> Bodholacabí lo gui nu tsitsiba radha belha gueni lhe urecabí ulácabi bittu utticabí leni espada lhe beacacabí nu run tsitsi atti ancacabí nu bittu ra tsitsi leni lhe be'eyucabí ucacabí nu ra tsitsi leni gue lo utilha lhe bería lacabí ca soldado gue ca nu rinnabia gue ca yiesi dittu bitilha lencabíha lhe. <sup>35</sup> Use'eguaba ca nuila ca nu de güia lecabí Tata Do Iyyabaaha nuarca bedícana ca benni guecaniha atti chi beacaquinna dequide chi utticana.

Adícabi nna utticabí de bedhaca güeexxattacana cabi, cumu tsa läga uca lecabí udhancabí neda gue Tata Do Iyyabaaha qui odilácan cabi, bencabí anía de xen lecabí gatta ttu elha nabani tseeru guecabí gansi chi beacaquinbi. <sup>36</sup> Adícabi nna ulu'u ni'acan cabi aní lo benni, utíncan cabi lhe bedocan cabi cadena lhe utixxacan cabi lisiyya lhe. <sup>37</sup> Bettican cabi leni iyya lhe bencan cabi rulha leni sierra lhe ulu'u biacana cabi qui bele'e lo gansi gualíquinbi riaga lecabí Tata Do Iyyabaaha lhebettican cabi leni espada lhe na niba güequicabi nucucabí sunruba yieti xo carne'e o yieti xo chiva lhe ucacabí benni nu ttu tsaba bea gueni lhe guatecabí biyúcabí elha disa lhe bedhaca güeçan cabi lhe. <sup>38</sup> Ca bi'iniha nna tsaba niba

saro'o bittu elha ralha ca benni se'e yies lo yu-ni tse'e ca bi'iniha len lacana, cumu ancacabi benni tsee. Lo ca yu bisi atta nuttu benni se'eba güequicabi, ca i'iyattoo-naba lhe lhe'e ca belea sia lhe'e ca iyyatto-naba lhe lhe'e ca belea sia lhi'u yuba lhe use'ecabi.

<sup>39</sup> Iyába ca bi'iniha masquiba ucacabi benni be'o le Tata Do Iyyabaaha gue nu bencabi de güia lecab Ben-na, läga uxícab nu rá Ben-na utee len lacabi, <sup>40</sup> cumu chila re-ni Tata Do Iyyabaaha ri cuenta utee ttu nu tseeru gueri, larcala len ri'i liba aca ca bi'iniha nu e'eyu dhi nu chi ga'anani Tata Do Iyyabaaha utee gueri.

### Tata Do Iyyabaaha rise ca benni chi anca xi'inie

**12** De ttonáli de re ca benni se'e sabi'aba ri rule'equinbi ri gaxasná güia lecab Tata Do Iyyabaaha, larcala ri'i nna tsa oca'anri iyá nu ruqui'a gueri-na, nu lä anca tsee runi tsia nittiri na lhe. Nu unlari nna bittu satú leri, usiguiari tsiari lo neda chi boca'an Tata Do Iyyabaaha gueri. <sup>2</sup>Tsa usia lori Jesús, Ben-na anque Benni beni qui ria leri Tata Do Iyyabaaha. Laguabe runi qui e'eyuri acari nu ria tsitsi leni Ben-na lhe. Jesús uxielhabe uttie lo ya crusiba masquiba anca nua ttu elhutti nu runna retuinri, cumu yuxeabe dequide chi guate biyúe elha disaha nna lania daa edaca lee. Nnanna nna doe daca lhuitta derechu gue Tata Do Iyyabaaha rinnabie.

<sup>3</sup> Gualulaba lele gue nu guate Jesús. Benniha nna tsitsiba nu guate las ná ca nu runi nu lä anca tsee-na. Larcala lebi'i nna bittu eyadi gále lo neda gue Tata Do Iyyabaaha, lä saxxacaguabinle lhe.

<sup>4</sup> Cumu lebi'i nna läga chi use'ele ro'o iyya ro'o belha'a uxunina guele gattile de ese'e disale bittu dhielhale unle nu lä anca tsee. <sup>5</sup> ¿Si chiba bixulhinle ca tisa ruttipacana lele rulisa Tata Do Iyyabaaha le de ancale xi'inie? Lo ca sitsi gue Ben-na rinne rá:

Xi'into quia, bittu cu'u ni'alu ca tisa rudhaca disa Benni  
bananie lu-na lo ni'a gue rutsitsilu,

lä eyadi gagualu lo neda guee gansi chi rise lu lhe.

<sup>6</sup> Cumu Benni bananie ri-na rute elha disa gue ca benni  
racanie guecani,

ritse lhe'e iyába ca benni anca xi'inie lhe.<sup>a</sup>

---

<sup>a</sup> 12:5-6 Proverbios 3:11-12

<sup>7</sup> Lebi'i nna ratele lo elha disa rute Tata Do Iyyabaaha guele qui iyieninle. Runie aná len lebi'i cumu de ancale xi'inie. Gua yuxebale läganu ttu tata do bittu rutena elha disa gue xi'inniha qui iyienin nua. <sup>8</sup> Cumu Tata Do Iyyabaaha nna iyába ca benni raca xi'inie rute elha disa guecani. Larcala gansi Ben-na bittuba rute elha disa guele, lebi'i nna läga gualí ancale xi'ini Ben-na, xi'ini nu subiba le. <sup>9</sup> Anáguba beni ca tata gueri se'e yies lo yu-ni len ri'i, bedhaca disaguabacabi ri, ri'i nna upabari cabi respeto. Larcala adílabu tsee anca udori tisa gue Tata gueri do iyyabaaha qui gatta elha nabani gueri ttu dia lii lo Ben-na. <sup>10</sup> Ca tata gueriba nna bedhaca disbocababi ri ttu tiempu laca ancari güexxa attiba racaquinbi anca tsee len ri'i, ttiaca Tata Do Iyyabaaha rudhaca dise ri qui salía tseenri. Anáchu nna acari benni se'e riesi lhe'e nu lä anca tsee attiba lee. <sup>11</sup> Gualíba, ni ttu elha disa bittu ancana nu uni eyo'o leri atti rateri na, delába nua nna runla nua rise'e si'iri. Ttiaca gansi bedába iquiri atti rateri nua, dequide lania nna chi acari benni te elha xen lhasi gueni, nu runi nu anca tsee lhe.

<sup>12</sup> Denuala nna gualuttipa lele lo neda gue Tata Do Iyyabaaha, bittu ulha nále, tsitsi gualse'e, bittu unle atti runi nu bitturu ridá rea xibini. <sup>13</sup> Gualolixxa lo neda guele qui aca dha tseele, qui anáchu ca benni bittu se'e tsitsi lo neda gue Tata Do Iyyabaaha, bittu udhancana ria lecani Ben-na.

### **Gualudo cuidadu bittu cu'u ni'ale Tata Do Iyyabaaha**

<sup>14</sup> Gualun duelha tse'e tseele len iyá benni. Gualunguaba duelha acale benni gue Tata Do Iyyabaaha chi se'e riesi lhe'e nu lä anca tsee, cumu gansi bittuba nna tsa läga aca ilenri Tata Do Iyyabaaha. <sup>15</sup> Gualudo cuidadu bittu cu'u ni'a ni ttule nu tsee redá le Tata Do Iyyabaaha utee len lebi'i. Gualudoguaba cuidadu qui bittu acale attiba ttu coana ilhá runi leni nu uni tsia nitti adí benni. <sup>16</sup> Ni ttule bittu isále nu bittu anca latselale, bittuguaba cu'u ni'ale nu anca lhe'a gue Tata Do Iyyabaaha lhe unle attiba beni Esaú, lana nna lo ni'a gue ttu xiga elha gorba betto'ona derechu te gueni de ancana xi'ini primero gue tata gueniha. <sup>17</sup> Lebi'i nna gua yubale, dequide lania nna duelhaba beni Esaú unnabana lo tata gueniha qui innába bi'iniha lo Tata Do Iyyabaaha aca len Benniha na qui dhína elha tsee ralhana dhína, ttiaca bitturu uca. Masquirba tticaxa uresna rennabana nua ttiaca bitturu uca.

<sup>18</sup> Lebi'i nna läga ubigale atta do ttu i'ya nu guacaba sattanari, attiba ca benni Israel ubigacana atta do i'ya Sinaí nu rite riria belha gueniha, atta anca chulha bexculoruha lhe atta ru'u be de racaxxattaba iyya be lhe. <sup>19</sup> Bittuguaba bieninle ts'i'i trompeta lhe niguuba ts'i'i Tata Do Iyyabaaha lhe. Ca benni bienin ts'i'i Ben-na lania nna bencana ruegu lo Ben-na bitturu innee ulise cana, <sup>20</sup> cumu de bittu rdacana uchíacana lo ca tisa run Benniha mandadu uncana atti re: "Gansi nuxa ibigana udú ni'ani lati i'ya-ni, lebi'i nna uttile na len iyya, masquiba ancana ttu nimala."<sup>a</sup> <sup>21</sup> Nu bilen ca bil'iniha lania ancana ttu nu runi tsitsiba rasincabi, larcala axtaba Moisés rábi: "Attula de rixidia de rasbatia."<sup>b</sup>

<sup>22</sup> Lebi'i nna ubigabale iqui i'ya te láni Sión atta re yiesi gue Tata Do Iyyabaaha Benni do bani-na. Yiesi-na nua Jerusalén re iyyabaaha, atta se'e ixeru mil ingeli runcabi laní gue Tata Do Iyyabaaha. <sup>23</sup> Níaguaba chi se'e ca benni primero uca xi'in Tata Do Iyyabaaha, ca benni dia lácabi iyyabaaha. Lebi'i nna chi ubigale len Tata Do Iyyabaaha Benni runi elha uxtisi gue iyánea benni, chiguuba ubigale atta se'e ca espíritu gue ca benni chi utti beni nu anca tsee, ca benni chi beni Tata Do Iyyabaaha be'eyucabi ancacabi benni ida'a su. <sup>24</sup> Chiguuba ubigale len Jesús Benni ribea loe gue tisa cubi bodha'an Tata Do Iyyabaaha len ri'i, leni reni belali Benniha atti uttie lhe reniha ben-na rigúe ca tulha gueri-na. Denua nna nuarca rixuuru reni gue Ben-na atti reni gue Abel.

<sup>25</sup> Larcala nna gualudo cuidadu bittu cu'u ni'ale Tata Do Iyyabaaha benni rinnee rulise le-na. Cumu gansi ca benni Israel ca nu ulu'u ni'acani Ben-na atti belise cana yies lo yu-ni, tsa läga ulávana labíaba uxívana elha disa ralhacana dhicana, adílaba ri'i tsa läga lhári gansi cu'u ni'ari Benni rise ri do iyyabaaha li. <sup>26</sup> Atti unne Tata Do Iyyabaaha belise ca benni Israel iqui i'ya Sinaí, lania nna bexxú ttitti ts'i'e yies lo yu. Nnanna nna chi begüee tisa re: "Neti unia ixú attu libe, ttiaca bittu sunru yies lo yu, sinuqui anáguauba iyyabaaha lhe."<sup>c</sup> <sup>27</sup> Atti re: "Neti unia ixú attu libe", diabanie re, lee nna cuabe ca nu benie dica isila se'e yies lo yu, qui eya'ana ttu tsaba ca nu bittu dica isila. <sup>28</sup> Atta rinnabia Tata Do Iyyabaaha rute len ri'i nnanna läga isilana. Denua nna ugüeri Ben-na ixquixarue, cuequi xenrie lhe unbari attiba radi lee unri, de ria lerie lhe raparie

---

<sup>a</sup> 12:20 Éxodo 19:12-13    <sup>b</sup> 12:21 Deuteronomio 9:19    <sup>c</sup> 12:26 Hageo 2:6

respeto lhe <sup>29</sup> cumu Tata Do Iyyabaa gueri-na anque attiba ttu gui belha rulhuxa iyába.

### Nu daa lo ca benni ria le Jesús uncabi

**13** Bittu udhanle aquin gue loesle atti raquin gue loes ca benni ria le Jesús. <sup>2</sup> Bittu ixulhinle lä ute ganna lisle tse'e ca benni dittu atti isíacana atta se'ele, cumu ttulhe ca benni use'e atti nía de belabi lhe'e liscabi ca benni nna ni lä ute daaquinbi chi betee liscabi be'ana ingeli. <sup>3</sup> Gualodhá lele ca benni te lisiyya-na gualuni attisiba lebi'iba nua te lisiyya len lacana. Gualulaba lele gue ca benni rudhaca güe benni cabi, gualuni attisiba lebi'iba nua rudhaca güecana.

<sup>4</sup> Iyábale atta chi se'e latselale, gualgapa respeto tisa begüeеле atti betsá nále, bittu otsia latselale, cumu Tata Do Iyyabaaha unie elha uxtisi gue ca nu requi manni-na, ca nu risá nu bittu anca latselani lhe.

<sup>5</sup> Bittu dha lele belhi-na. Gualeaca xen lele leni nu te guele, cumu Tata Do Iyyabaaha re: “Tsa läga udhá iquia le, lä oca'anguuba suna lebi'iba lhe.”<sup>a</sup> <sup>6</sup> Larcala nna xen su leri innári:

Benni bananie ri-na anque benni raca lanie neti,

larcala tsa läga gastia lo bixa re le benni udhacacana neti.<sup>b</sup>

<sup>7</sup> Gualorexxa lele gue gaxasná bedú le ca benni uca nu lo gueleha, ca bi'iní utixxi'aquinbi le ca tisa gue Tata Do Iyyabaaha. Gualulaba lele gue nu tsee ben ca bi'iniha, gualusigui gualtsia lele Tata Do Iyyabaaha attiba güia le ca bi'iniha Ben-na lhe. <sup>8</sup> Jesucristuha nna ttuba anca Benniha lägabi resía Benniha. Ben-naba nua do atti nía, Ben-naba do nnanna lhe Ben-naba dho ttu dia liiba lhe. <sup>9</sup> Bittu ixúyiele tsia lele gue nuxa ule'enna le attu nu subi bittu ancabienle, nu bittu raxxína len nu bidetiri gue Jesús. Tseeru anca tse'e tsitsiri lo neda gue Tata Do Iyyabaaha cumu de raca lanie ri, attichula eguiari unri tse'e tsitsiri lo neda gue Ben-na de udori tisa gue nu rixxi'a gue bixa elha go dica gori lhe gue nu bittu dica gori lhe. Cumu ca nu rudo tisa gue nu rixxi'a gue ca elha go-na tsa lägabi ttu nu tsee chi uxícana de rudocana tisa gue ca unná.

<sup>10</sup> Atti utti Jesús lo ya crusilha qui utixe gueri, lania uque attiba ttu úna xua lo becoa gue Tata Do Iyyabaaha nu redibaari nnanna.

---

<sup>a</sup> 13:5 Deuteronomio 31:6,8    <sup>b</sup> 13:6 Salmo 118:6

Únaha nua bittu bi elha ralha ca bixxudi bixuu lhe'e yotu uca leni lariha edíbaacabi.<sup>11</sup> Cumu bixxudi xenihha nna rita'ababi lhi'u lhe'e yotuhu qui rutebi reni gue ca nimala rutticabiha lo becoa gue Tata Do Iyyabaaha, qui raxa gue ca tulha gue ca benni. Ttiaca cuerpu gue ca nimalaha nna ro'o yiesi atta se'ecabiha liba ribeacabi ca nua qui ritecana.<sup>12</sup> Larcala anáguuba Jesús, ro'o yiesiha liba uleacane betticane qui belali reni guee, cumu leni reni gue Benniha liba nna bitúa ca tulha gue ca benni.<sup>13</sup> Larcala nna anáguuba ri'i lhe labíaba iríari tsiasi sanori Jesús, masquiba sateri udhaca güe benni ri attiba bedhaca güecana Ben-na.<sup>14</sup> Cumu yies lo yu-ni nna läga ancana lasiri atta tse'eri ttu dia lii. Ri'i nna diabari reguilar yiesi gueri nu chi daba isía atta tse'eri ttu dia lii.<sup>15</sup> Larcala, de Jesucristuha nna satía tse'eri cuequi xenri lee Tata Do Iyyabaaha. Len ca tisa cuequi xenri Ben-na quixxi'ari, Ben-na anque Benni ra xxeni lee. Unnuha ancana úna uteri len Tata Do Iyyabaaha.<sup>16</sup> Bittu ixulhinle lä un tseebale len benni, o lä unbale yuda adí benni len nu te guele lhe. Cumu unná ancana attiba ttu úna radi le Tata Do Iyyabaaha rutele lenie.

<sup>17</sup> Gualudo tisa gue ca benni banquinbi le rule'equinbi le ca tisa gue Tata Do Iyyabaaha. Gualudá iquile gue bixa rácabi, cumu ca bi'in-na rapacabi le qui bittu tsia nittile, lacabi nna isía sá otecabi cuenta leni Tata Do Iyyabaaha gue sina runcabi. Gualun duelha gualuni nu rá ca bi'in-na qui bittu tse'e si'icabi, sinuqui leni elha redaca le uncabi sina-na, cumu gansi lebi'i unle tse'e si'i ca bi'in-na, lania nna läga salía tseenle.

<sup>18</sup> Gualinnaba lo Tata Do Iyyabaaha aca lanie ri'itu, cumu yuxebatu lägabi chi bentu ttu nu uni itisatu lo Tata Do Iyyabaaha, iyába nu raca letu untu nna raca letu untu-na lhatsiru.  
<sup>19</sup> Rinnabaguuba len lebi'i innábale lo Tata Do Iyyabaaha aca lanie neti qui yuba esíaya atta se'ele-na.

**Benni beni lo sitsi-ni ridhelabi ttu padiumi  
gue ca benni rulisabi lo sitsi-ni**

<sup>20</sup> Tata Do Iyyabaaha Benni runie se'eri xen su leri, benie beacani Jesucristu Benni bananie ri, belhidhe Ben-na lhe'e baa atta yu'u ca nu yatti-na lhe. Lee anque benni ra xxeni lee ruyúe ri attiba ttu benni ruyú carne'e gueni. Leni reni belali Ben-na lo ya crusiba boca'an tsitsi Tata Do Iyyabaaha tisa nu begüee len ri'i,

tisa-ni ben-ni ixuue ttu dia liiba. <sup>21</sup>Tata Do Iyyabaaha unie acale benni runi iyá nu anca tsee, qui anáchu dhalé unle nu raca lee aca. De Jesucristuha nna uni Tata Do Iyyabaaha len ri'i nu re'o lee, ¡Benniha satía cuequi xenrie! Amén.

<sup>22</sup>Ca benni ria le Jesús, rinnaba lenle dhíle elha xen lasi atti ulabale lo sitsi atta rulisa le rudúa elha rieni iquile, cumu läga ixettegá tisa diatia lo sitsi-ni. <sup>23</sup>Neti nna raca lasia unale, Timoteo bi'ini ria le ca tisa gue Jesús attiba ri'i, chiba beríabi lisiyya. Gansi esíaxxibi atta doa-ni nna güiccheba bi gansi chi daya etenalhia le.

<sup>24</sup>Natte gualgási padiuxi iyá ca benni banquinbi le rule'equinbi le ca tisa gue Tata Do Iyyabaaha, iyáguba ca benni chi se'e riesi anca gue Ben-na lhe. Ca benni daa daca Italia ridhelhacabi ttu padiuxi guele.

<sup>25</sup>Cuina Tata Do Iyyabaaha aca lanie iyáttele. Amén.

# Sitsi-ni beni Santiago

**1** Neti, Santiago, bi'ini rixuu lo sina gue Tata Do Iyyabaaha, lo sina gue Jesucristu Benni bananie ri-na lhe. Ridhelha ttu paduuxi guele, lebi'i, ca benni anca tsil'inu cue datía benniola gueri bi'ini utta lábi Israel, se'e lhe'e gattiba ca yiesi dittu.

## Bittu udhanri tsia Ieri Jesús atti ruyúri elha disa

<sup>2</sup> Ca benni ria le Jesús attiba neti, tsitsi gualebequi itta lele gansi chi ruyúle elha disa lo ni'a gue ca nu ratele. <sup>3</sup> Lebi'i nna chiba yule, gansi chi ruyúle elha disa lo ni'a gue bixa ratele, lania rule'e lo gansi gualíga ria lele Tata Do Iyyabaaha, unnuha nna runi diale rise'e tsitsile lo neda gue Ben-na qui dhale uchíale lo nu ratele. <sup>4</sup> Larcala nna gualuni duelha gualuchía lo nu ratele, cumu unná unna dhale e'eyule acale benni runi nu anca tsee, nu du lhatsiru leni lhe. Análiba nna bittu bi eyasinle, qui dhale unle iyába nu raca le Tata Do Iyyabaaha.

<sup>5</sup> Gansi nux ttule reasinle elha rieni nna gualinnaba leni Tata Do Iyyabaaha. Benniha nna gutebe elha rieni guele, cumu lee nna rerú iqui rerú lee rute gue iyábari, tsa läga ritisin Ben-na ni ttule.

<sup>6</sup> Gueba nna gualtsia lele guadibale nu rinnabaleha, tsa bittu udú chupana lele. Cumu nu rudú chupana leniha nna ancabana attiba anca inda nu ridulí lo indattoo-na, dia dedaaba leni be-na. <sup>7</sup> Benni runi anía nna tsa bittu ulaba leni dhína nu rinnabana len Benni bananie ri-na, <sup>8</sup> cumu nu rudú chupana leniha nna bitti bittiba anca nu run nua, aníaba chi labi nua runna.

<sup>9</sup> Benni ria le Jesús bittu te guebi nna eyo'ola lebi de ancabi nu bittu te gueni, cumu Tata Do Iyyabaaha nna renie bi'iniha bala'an.

<sup>10</sup> Nu te gueniha nna eyo'o leni de elhida gaa Tata Do Iyyabaaha leni, cumu ca benni te guequinna ancabacana attiba ca iyya rali gue ca ixxi-na. Ttu sattirba risácana, lenla nna rattitteba iquicani.

<sup>11</sup> Gansi chi riria tatubisa-na ralhatteba yies lo yu-ni leni xieni guee, ca ixxi ga'a-na nna ribisttebacana, atti riodhitteba ca iyya rali guecaniha. Lania nna ritúatteba nu runi rule'e tsee ca nua. Aníaguaba sate ca benni te guequinna isíaba sá gatticana, iyába nu te guecaniha nna lhuxabana.

<sup>12</sup> Carbáru benni dhabi utto uchíabi bittu ixú yiebi unbi nu bittu anca tsee ridá lebi unbi, cumu dequide chi betto bechíabi lo nua nna guaca banbabí ttu dia lii, benniha nua anca corona chi begüee Tata Do Iyyabaaha tisa utee leni ca benni racaquinbi guee. <sup>13</sup> Gansi nuxale isía dhaa lele unle nu lä anca tsee, bittu aquinle dequi Tata Do Iyyabaaha runie rulaba lele unle nua. Cumu Tata Do Iyyabaaha nna tsa läga risía aquin benniha unie nu lä anca tsee, bittuguuba runie qui isía acani ttu benni unna nua lhe. <sup>14</sup> Delaba unnuha nna cua ttu ttubari risía ridá leri raquinri unri nu lä anca tsee, cumu la nu rulaba lerihaba nua ridí yienri nna rusigana ri unri nu lä anca tseeha. <sup>15</sup> Nianna nu lä anca tsee rulaba lerihaba nna runna runri nu bittu anca tsee. Gansi chi benri nu lä anca tseeha nna ttu tsaba gattiri lo Tata Do Iyyabaaha, delába tsaba dia nittiri.

<sup>16</sup> Ca benni ria le Jesús racatia gueni, bittu dhielhale ixú yie la lebi'iba. <sup>17</sup> Iyába nu tsee lhe iyába nu anca ida'a lhe iyyabaahali daa nua. Tata Do Iyyabaahaba ridhelhe nua. Labe benie iyába ca nu rigu'u xieni sia lo bea-na. Ca unná nna rotsíaba xieni guecani, Tata Do Iyyabaaha nna satíaba anque nu anque, tsa läga rotsíaba benniha elha run guee attiba ttu xula resíana. <sup>18</sup> Labe uca lee betee elha nabani gueri atti güia leri ca tisa rixxi'a nu anca gualí-na, qui anáchu nna delo iyá nu benie se'e yies lo yu-ni nna ri'iba ancari nu primerba ulequiesie qui acari guee.

### Raca duelha unri nu rá ca tisa gue Tata Do Iyyabaaha

<sup>19</sup> Ca benni ria le Jesús racatia gueni, iyábale primera gualudo tsee nagale gue bixa rá benni. Bittu cuenta ecabixxile, bittuguuba cuenta isa'axxinle lhe. <sup>20</sup> Cumu benni risa'axxinha nna läga run nua nu radi le Tata Do Iyyabaaha. <sup>21</sup> Larcala nna gualudhequile iyárecha nu lä anca tsee lhe nu satsa dia rani xxatta yies lo yu-ni lhe. Bittu unle ttaba, gualudequile gue ca tisa gue Tata Do Iyyabaaha chi ulu'e lhe'e lastoole-na, cumu ca Ben-na anque benni dhaque odiláque le qui bittu tsia nittile.

<sup>22</sup> Gueba nna gualuni nu rá ca tisa-na, bittu sunru udo nagale Ben-na, cumu gansi sunruba rudo nagale Ben-na, lania nna la lebi'iba nua rixí yiele. <sup>23</sup> Cumu benni sunruba rudo nagani ca tisa-na, nianna bittu runna nu rá Ben-na, unnuha nna ancabana attiba ttu benni rugüia loni lo ttu iyya guana. <sup>24</sup> Lana nna sunruba gansi chi rugüiana lo nua rilenna gaxasná rmnána, cumu cuantusiba

requina deyyanaha nna rexulhattebinna gasná rnnána.<sup>25</sup> Ttiaca benni rulaba tsitsi leni gue nu dia lo ca ley gue Tata Do Iyyabaaha, nianna rudobi tisa runbi nu rá lo ca Ben-na, tseeba saliana nua cumu ca tisana ancaque ida'a lhe dhaque odiláque benni lhe.

<sup>26</sup> Gansi nuxa benni rána dequi ancana nu ria leni Tata Do Iyyabaaha, ttiaca bittu ledinna innena, unnuha nna la laba nua rixú yien, tsa lägabi ixuu nu rá nua dequi ancana nu ria leni Tata Do Iyyabaaha.<sup>27</sup> Nu gualíga anca tsee radi le Tata gueri do iyyabaaha uni ttu benni ria leni Ben-na nna ancana: unri yuda ca unto bidabi-na lhe ca nuila bidabi-na lhe atti ruyúcana elha disa lo ni'a gue bixa ratecana, bitturu unri nu lä anca tsee raca yies lo yu-ni lhe.

### Bittu ugüele lidhaca ttu benni atti attu benni

**2** Ca benni ria le Jesús racatia gueni, lebi'i ca benni chi ria lele Jesucristu Benni bananie ri-na, benni ra xxeni le na lhe bittu aquinle suntteba gue ttulhe ca benni, a ttulhecana nna bittu aca uyúle.<sup>2</sup> Cumu tirca saxxína ga'a ttu unbiyuu lhe'e yotu atta se'ele rulha le gue Tata Do Iyyabaaha nucu xo tsee gueni, yu'u xbináni ttu be'e ancana leni oro lhe nianna ga'aguuba attu unbiyuu bittu te gueni nucu xo tsuya gueni,<sup>3</sup> lebi'i nna tseeba unle leni benni nu nucu xo tsee gueniha, atti tsiattebale gále nua: "Deca ni utá ure atta anca tsee-ni." Benni bittu te gueniha nna gáttebale na: "Lu nna natte udú", o si "natte ure lo yu-na lhe."<sup>4</sup> ¿Si läba ganna lania nna runbale dequi ttu benni dacaru na atti attu benni? ¿Runbale attiba run ca xueda bittu runcana elha uxtisi lhatsiru? Cumu ttu nua ruyú tseele na attu nua nna bittu ruyú tseele na.

<sup>5</sup> Ca benni ria le Jesús racatia gueni, gualdo nagale nu upeale-ni: Tata Do Iyyabaaha chiba becuee benniha ca benni bittu te gueni se'e yies lo yu-ni qui acacabi benni ria tsitsi le cabi Ben-na, acacabi benni innabia Ben-na lhe. Unná nua anca interés chi begüee tisa ugüe ca benni racani guee.<sup>6</sup> Ttiaca lebi'i nna rigu'ula ni'ale ca benni bittu te guequinna. ¿Si läba ca nu te guequinna xunna rigúacana lo nále nu te guele, ralhu'ucana le lo ca uxtisi-na lhe?<sup>7</sup> ¿Si läba ca unná gua bunna rinne güecana gue Benni du tsee lee-na, anque Jesús, Benni bananie ri, Benni uxiele qui acale guee?

<sup>8</sup> Tseeba nua runle gansi rudole tisa gue nu rá lo ca ley bodha'an Tata Do Iyyabaaha, cumu lo ca sitsi gue Ben-na rá: "Aquinle gue adí ca benni attiba racabin guele."<sup>9</sup> Ttiaca gansi lebi'i rugüerlale

lidhaca ttu benni atti attu benni nna nu te tulha guebani ancale lo Tata Do Iyyabaaha, cumu la ca ley-naba rudelhiyyaque le de bittu rudoole tisa gue nu ráque.<sup>10</sup> Cumu gansi ttu benni rána dequi rudona tisa gue iyába nu rá ca ley-na, ttiaca bittu benna nu rá ttu ca ley-na, lania nna chiba beaca nua attiba ttu ca nu lä rudo tisa gue iyárecha ca ley-na.<sup>11</sup> Cumu la Tata Do Iyyabaa benni re: "Bittu dica isálu nu bittu anca latselalu", la benniha guaba nua re: "Bittu uttile benni." Larcala nna gansi ttu benni bittuba risána nu bittu anca latselani, ttiaca runbana elhutti, unnuha nna chiba anca nua nu bittu rudo tisa gue iyárecha ca ley gue Tata Do Iyyabaaha.

<sup>12</sup> Larcala nna lhatsiru gualudú lele lhe lhatsiru gualnne lhe gualuni atti runi benni uni Tata Do Iyyabaaha elha uxtisi gueni leni ca ley rixuunie rodile ri.<sup>13</sup> Cumu ca benni bittu guatúa lecani attu benni subi nna tsa läga satúa le Tata Do Iyyabaaha ca nua gansi chi uca elha uxtisi guecani. Ttiaca ca benni satúa lecani attu benni subi nna tseeba salíana cana atti aca elha uxtisi guecani.

### Nu anca tsee runri rule'e lo ria leri Tata Do Iyyabaaha

<sup>14</sup> Ca benni ria le Jesús, tsa lägabi te iría len ttu benni gansi rána ria leni Jesús, nianna bittu runna nu anca tsee. ¿Si gua rudhaca lele dequi care'aba rá nua chi ria leni Jesús gualábana bittu tsia nittina?

<sup>15</sup> Gansi ttu nuila o si ttu unbiyuu ria lebi Jesús, bittu xobi te qui ucubi, reasagüinbi nu gobi qui galhabi sá lhe<sup>16</sup> nianna nux ttule nna gále bi'iniha: "Lhatsiru beyya, beocu xolu qui raquinlu dilha lhe uto paparu lhe", ttiaca läga rugüele bi'iniha nu reasinbi lhe nu gobi lhe nu ucubi lhe tsa lägabi ixuu nu runleha.<sup>17</sup> Anáguuba anca len ttu benni rána ria leni Jesús. Tsa lägabi ixuu nu rinne nua, gansi biba runna nu anca tsee.

<sup>18</sup> Ttu benni nna guacaba innána: "Lu ria lelu Jesús, neti nna runia nu anca tsee." Ttiaca neti nna ria: "¿Gasná yua dequi gualígua ria lelu gansi bittuba rilátia unlu nu anca tsee?" Neti nna de runia nu tsee nuarca rule'e lo gualíba ria lasia Jesús.<sup>19</sup> Lu nna tseeba runlu de ria lelu ttuba ttu Tata Do Iyyabaa do. Anáguuba ca nu xxegüi-na riaguuba le ca unná ttuba ttu Tata Do Iyyabaa do. Denuala nna rixidinicana de rasbaquinna.

<sup>20</sup> ¡Ca ttipa chulhinlu! ¿Si bittuba yulu dequi lägabi ixuu nu rári ria leri Tata Do Iyyabaaha gansi bittuba runri nu anca tsee?<sup>21</sup> ¿Si läba de bedo Abraham benni uca benniola guericha tisa utebi xi'inbi

Isaac attiba úna lo becoha gue Tata Do Iyyabaaha nuarca rá benna uca bi'niha benni runi nu aca tsee? <sup>22</sup> Gualgüiarga, Abraham bele'e lobi len nu benbiha ancabi nu gualíni ria lebi Tata Do Iyyabaaha. Nu beni bi'niha nna benna be'leyubi ucabi nu ria lebi Ben-na ida'a su. <sup>23</sup> Anía uca nna guaxxína uca attiba rába lo ca sitsi gue Tata Do Iyyabaaha atta rá: "De güia le Abraham gue Tata Do Iyyabaaha, nuarca ulequie bi'niha bala'ana ancabi benni runi nu anca tsee." Anioca nna utta lábi benni do tsee len Tata Do Iyyabaaha.

<sup>24</sup> Gualgüiarga, Tata Do Iyyabaaha nna ribequie ca benni bala'ana ancacabi benni tsee de runcabi nu anca tsee, läga sunru de ria lecabí Ben-na. <sup>25</sup> Aníaguuba guate Rahab, nuila nu betto cuerpu gueniha. Tata Do Iyyabaaha ulequie na bala'ana ancana benni tsee de benna nu anca tsee atti betena atta eya'ana ca bi'ini dia güelhatsiha, lana nna bedhelhana ca bi'niha lo attu neda subi qui bittu biyaxxucabi. <sup>26</sup> Cumu attiba ttu cuerpu bitturu espíritu guenite, nu yattiba chi anca nua, aníagua bunna ancari gansi rári dequi ria leri Tata Do Iyyabaaha nianna bittu runri nu anca tsee.

### Lhusari-na ancana attiba ttu gui

**3** Ca benni ria le Jesús, lätteba ixele aquinle acale maestro. Cumu lebi'i nna chiba yule, ri'itu ca nu rule'entu ca benni ca tisa gue Tata Do Iyyabaaha nna tsitsirla anca elha uxtisi unie guetu atti adí benni. <sup>2</sup> Iyábari rinittiri ixe libe. Gansi ttu benni bittuba bi rinittina leni nu rinnena, unnuha ancana ttu benni gualí du lhixxana, lana nna guadábana innabia na itúba cuerpu gueni. <sup>3</sup> Ri'i nna gansi chi rigu'uri frenu ro'o ca coayu-na qui udocana tisa gueri nna guaridabari runri tsia ca unná daca atta raca leri. <sup>4</sup> Gualgüiaguuba gue ca barco-na. Masquiba tticaxa xxeni ancacana lhe masquiba tticaxa idí anca be richencana loenda lhe ttiaca nu rudhana barcoha nna gua rdábana rinnabiana nua qui tsiana daca atta raca leni, sunruba leni ttu yaga güexxa lána timón. <sup>5</sup> Anáguuba lhusari-na, ttu nu chica'aru anca unná rapa cuerpu gueri, ttiaca leni nu rinnena xxeniba anca nu runna. Attiba ttu gui chica'a ridána rugalhana ttu i'iyattoo xxeni. <sup>6</sup> Lhusari-na ancana attiba ttu gui. Ancabana attiba yies lo yuni-ni tsaba sana nu lä anca tsee, unná nna ancana ttu nu do lhe'e cuerpu gueri runna ritsigari lo Tata Do Iyyabaaha itú ttuba se'eri yies lo yu-ni. Lana nna cuinaba nu xxegüiha runna qui runi unná tsia nittiri leni nu rinneri, cumu attiba gui gue atta

lexúaha ancana.<sup>7</sup> Ca benni nna gua rdábacana ruttánacana iyáloba nimala, nu sia ttapa ni'a náni lhe nu sia xxilani lhe nu ra'aya lhe'eni lo yu lhe nu yu'u lhe'e indattoo-na lhe. Gua ritánabaquinna ca unná.<sup>8</sup> Ttiaca lhusari-ni nna niba ttu benni bittu chi udána uttánana unná. Unná nna ancana ttu nu lä anca tsee bittu ridá benni uttánana, tsaba sana venenu che elhutti.<sup>9</sup> Leni lhusari-na rulhari gue Tata do iyyabaaha, leni unnguaba rigueri iqui ca benni beni Tata Do Iyyabaaha attiba anque lhe.<sup>10</sup> Ca benni ria le Jesús, bittu unle aná, cumu läga dica iría ro'ori-ni ca tisa rulhari gue Tata Do Iyyabaaha nianna la leni ro'ori-ni guaba rigueri.<sup>11</sup> ¿Si gua dica la ttuba ro'o dina atta riyaa inda, iría inda tsee leni inda ilhá?<sup>12</sup> Ca benni ria le Jesús, ¿si gua dica cuia aceituna lo ttu ya igu, lo ttubaa gue besuli nna cuia igu? Anágua ro'o dina atta riria inda, läga aca ttuba nía iría inda tsee lhe inda ilhá lhe.

### **Tata Do Iyyabaaha rute elha rieni gueri**

<sup>13</sup> Gansi nuxa ttule ancale nu radú leni lhe nu te elha rieni gueni lhe unnuha nna acana nu runi nu anca tsee lhe nu bittu runi ttaba lhe qui ule'e lo ancana nu te elha rieni gueni.<sup>14</sup> Ttiaca gansi reba malisi lhe'e lastoole lhe rutía diba le loesle lhe läga dica unle ttaba dequi ancale nu yu, cumu runba lele, läga gualínle ancale nu te elha rieni gueni.<sup>15</sup> Cumu läga aná anca elha rieni rute Tata Do Iyyabaaha, elha rieni anca gue yies lo yu-niba unná, nu rulaba le benniba ancana, ancabana gue nu xxegüiha lhe.<sup>16</sup> Larcala nna atta re malisi lhe atta se'e nu rutía di le loesni lhe nía te elha utilha, iyáloba nu lä anca tsee lhe.<sup>17</sup> Cumu ca benni te elha rieni rute Tata Do Iyyabaaha guecani nna ancacana nu runi ttaga'a nu tsee, nu do tsee leni iyába benni lhe nu si'i le lhe nu rudequini gue nu rá benni lhe nu du tsee leni lhe nu ratúa leni adí benni lhe nu satíaba runi nu anca tsee lhe nu ttuba runna leni iyába benni lhe nu bittu ni lo ni tisaba runna ttu bixa lhe.<sup>18</sup> Ca benni runi qui tse'e tsee len loesi adí benni nna salía tseencana lo Tata Do Iyyabaaha de runcana nu anca tsee.

### **Gualibiga leni Tata Do Iyyabaaha**

**4** ¿Ga riría ca elha utilha-na lhe nu runi bittu se'e tsee len loesle-na lhe? ¿Si läba lhe'e nu lä anca tsee satíaba rulaba lele re lhi'u lhe'e lastoole-naba riria ca unná?<sup>2</sup> Lebi'i nna ridá lele

nu te gue attu benni subi, ttiaca läga ridále gatta nua guele. Lo ni'a gue unnuha nna ru'ule ritilhale, runle duelha reguila lele gaxasná unle qui gatta nua guele. Ttiaca läga rdale iselinle nua, cumu läga rinnabale nua leni Tata Do Iyyabaaha.<sup>3</sup> Atti rinnabale nua nna läga ridíle nua, cumu läga rinnabale nua qui ixuinle na lhatsiru. Rinnababale nua qui unnitti lole na attiba racaba lele.<sup>4</sup> ¡Lebi'i, ca benni dia rudhá iquile Tata Do Iyyabaaha! ¿Si bittuba yule dequi gansi racabinri gue nu lä anca tsee te yies lo yu-ni nna rigu'uba ni'ari Tata Do Iyyabaaha? Larcala nuxaba benni raca leni aquinna gue nu lä anca tsee raca yies lo yu-ni nna racana nu bittu do tsee leni Tata Do Iyyabaaha.<sup>5</sup> ¿Si rulaba lele dequi cuentaba rá lo ca sitsi gue Tata Do Iyyabaaha atta rinne rá?: “Espíritu gue Tata Do Iyyabaaha ulu'e lhe'e lastoori-na, tsitsiba racanie gueri, rdaque ttuba Tata Do Iyyabaaha aquinri guee lhe.”<sup>6</sup> Ttiaca Tata Do Iyyabaaha nna tsitsirla redá lee racanie gueri, larcala rá lo ca sitsi guee-na: “Tata Do Iyyabaaha nna redú dise lo ca nu ttaba-na, ca benni si'i le-na nna raca lanie cabi.”<sup>a</sup><sup>7</sup> Larcala nna gualudo tisa gue Tata Do Iyyabaaha, lo nu xxegüiha nna gualedú disa, unnuha nna guxunniba nua atta se'ele.<sup>8</sup> Gualibiga leni Tata Do Iyyabaaha, Benniha nna güibigabe len lebi'i. Lebi'i ca nu runi nu bittu anca tsee gualudhá iquile nu satsa runle na, lebi'i ca nu guacala aquinle gue Tata Do Iyyabaaha o guacala aquinle gue nu te yies lo yu-ni lhe ttuba nu anca gue Tata Do Iyyabaaha gualudo lele.<sup>9</sup> Gualichacha iquile, gualexiiyani lhe gualcuesi lhe. Elha güedaca lee guele-na eyacana ubesi, elha re'o le guele-na nna eyacana nu se'e si'ile.<sup>10</sup> Bittu unle dequi ancale nu ra xxeni leni lo Tata Do Iyyabaaha, Benniha nna guabequixxenbe le.

<sup>11</sup> Ca benni ria le Jesús, bittu inne güe gue loesle, cumu nu rinne güena gue ttu benni o runna unna elha uxtisi gue nua nna gue ca ley-naba benniha rinne güe nua, runna unna elha uxtisi lhe. Gansi lu runlu unlu elha uxtisi gue ca ley-na, lania nna lärga ancalu nu rudo tisa gue nu rá lo ca Ben-na, xuedaba chi beacalu gue Ben-na.<sup>12</sup> Cumu tturba benni do anque xueda, delába Tata Do Iyyabaaha, lee betee ca ley-na. Benniha liba daa loe unie elha uxtisi gueri, si odile ri lhe si udelhiyye ri lhe. Lu nna ¿nú ancalu nna rdacalu unlu elha uxtisi gue attu benni subi?

---

<sup>a</sup> 4:6 Proverbios 3:34

### Uxxen Ieri Tata Do Iyyabaaha gue nu unri

<sup>13</sup>Nnanna nna gualdo nagale, lebi'i atta rinnele rále: “Nasá o uxxedila tsiasi lhe'e attu yiesi subi, níaba tse'eri ttu ida güetto'o qui gatta xxeni belhi gueri.” <sup>14</sup>Ttiaca lebi'i nna nibala yule bixa satele uxxeha, cumu elha nabán gueri te yies lo yu-ni nna ancabana attiba upa, sattirba redána, lenruba nna chi renitti lona. <sup>15</sup>Larcala nna aníla dica innále: “Gansi Tata Do Iyyabaaha aca lanie ri aca banri nna guacaba unri unní lhe unri unná lhe.” <sup>16</sup>Ttiaca lebi'i nna tsitsiba nu runle rise'ele rinnele leni elha ttaba guele. Iyába loesi elha ttaba-na ancana nu bittu anca tsee. <sup>17</sup>Larcala nna nu gua yubana bi nua anca tsee dica unna nna nianna bittu runna nua nna ancaba nua nu te tulha gueni.

### Ca benni te guequinna ca nu bittu run tsee, uyúcana elha disa

**5** ¡Gualdo nagale nnanna lebi'i ca benni te gueni! Gualixxá ro'ole lhe gualcuesi'a laya-ni lhe cumu chi isía sá satexxattale uyúle elha disa. <sup>2</sup>Iyába nu tsee te lidhaca-ni te guele-na chi ancana yusu, chiguaba ru'uba ca xo daca guele-na lhe. <sup>3</sup>Oro guele-na lhe plata guele-na lhe chiba ritúa be ca unná. Nu ritúa be ca unná rule'e lo dequi lebi'i nna utúa tsee xxattale belhi guele-na, läga benle nu raca le Tata Do Iyyabaaha unle. Denuha nna la unnába udelhiyyanle, tsaba ulhuxanle attiba ttu gui, cumu de chi daa ribiga isía sá uni Tata Do Iyyabaaha elha uxtisi gue benni, lebi'i nna guayu'urle rodianile iqui nu te guele. <sup>4</sup>Gualúnarga, ca benni uren sina lo ca yu guele-na rinne xiyyacana gue belhi nu lä utixale cana. Benni bananie ri-na Benni ra xxeni le-na, chiba bieninie guecani. <sup>5</sup>Lebi'i nna se'ebale redí baale iyába nu te yies lo yu-ni, runbale nu racaba lele runle. Ancabale attiba ttu cu'una du reaca leni qui chi du tseena atti isía sá uttican-na, <sup>6</sup>Lebi'i nna chi unnabiale gatti ca benni runi nu anca tsee, läga bese'e disacabi lole.

### Gualgapa pasensi

<sup>7</sup>Larcala xa benni ria le Jesús, len pasensiba gualtse'e gualcueda isía sá esía Benni bananie ri-na. Gualgüia gue benni rigu'u xua-na, len pasensiba ridona ribedana isía tiempu iyya qui cu'una xua. Aníaguaba ridona ribedana qui edína lena bani utee ca lo yu gueniha lhe. <sup>8</sup>Anáguaba lebi'i, gualgapa pasensi, bittu edilrele, qui

chitte deoba isía sá esía Benni bananie ri-na.<sup>9</sup> Ca benni ria le Jesús, bittu inne bexeale gue nu rughaca la loesbale, qui bittu udelhiyya Benni bananie ri-na le gansi chi benie elha uxtisi guele. Cumu Benni bananie ri-na, benni anque xueda gueri-na, chitte deoba esié.<sup>10</sup> Lebi'i ca benni ria le Jesús, gue ca benni uca profeta güequi unne ca tisa bete Tata Do Iyyabaaha gualgüia, ca bi'iniha nna gua bego bechíabacabi lo iyába nu guatecabí.<sup>11</sup> Cumu ri'i nna rári: Carbáru ca benni ruchía lo ca elha disa ruyúcabi. Lebi'i nna chiba bieninle gue nu guate Job, bi'iniha nna bechíabacabi lo iyába nu guatebiha, anáguba chiguaba yule gue nu tsee beni Tata Do Iyyabaaha len bi'iniha dequide nu chi guatebiha. Cumu Benni bananie ri-na anque ttu benni ratúa lee ri'i, racaxxattanie gueri lhe.

<sup>12</sup> Ca benni ria le Jesús racatia gueni, larcala nna bittu udettile iyyabaaha o yies lo yu-ni, niguaba attu bixaruha lhe gansi chi rále unle ttu bixa. Cumu gansi guardhacaba lele gunbale nua nna suntteba gualná: “O”. Gansi bittuba unle nua nna suntteba gualná dequi bittu unle nua, qui bittu udelha iyya Tata Do Iyyabaaha le gansi chi uca elha uxtisi gueri.

### **Gualnnaba lo Tata Do Iyyabaaha aca lanie ca benni rani-na**

<sup>13</sup> Gansi nuxa ttule ruyúle elha disa lo ni'a gue nu ratele, gualnne len Tata Do Iyyabaaha. Gansi nuxa ttule do tseele nna gualulha gue Tata Do Iyyabaaha.<sup>14</sup> Gansi nuxa ttule tele ranile nna gualsalisa ca bi'ini teru elha rieni guecabi gue ca benni ria le Jesús, qui ca bi'iniha nna innábacabi leni Tata Do Iyyabaaha aca lanie benni raniha, atti udocabi seti iqui bi'iniha nna udetticabi Jesús.<sup>15</sup> Tata Do Iyyabaaha nna güeyonbe benni raniha, güelidhabe bi'iniha ladiba ria tsitsi le ca benni innába eyon Tata Do Iyyabaaha benni raniha. Gansi bi'iniha te tulha guebi nna guadíguabe elha xen lasi gue bi'iniha.<sup>16</sup> Larcala nna gualquixxi'en loesle gue nu lä anca tsee chi benle, gualnnaba lo Tata Do Iyyabaaha gue ttule lhe gue attule lhe qui eyacale. Cumu benni runi nu anca tsee lo Tata Do Iyyabaaha nna tsitsi daca ca tisa rinne bi'iniha rulisabi Benniha, denuala nna raca nu rinnababi.<sup>17</sup> Elías bi'ini uca profeta gue Tata Do Iyyabaaha, ucababi ttu benni attiba ri'i, ttiaca atti unnebi leni Tata Do Iyyabaaha itú iqui itú lebi qui bittur aca iyya, lania nna lärgaga uca iyya tsunna ida nalha.<sup>18</sup> Lenla nna bedennebi leni Tata

Do Iyyabaaha qui unnababi aca iyya. Lania nna bedeacatteba iyya attu libe yies lo yu-ni nna boditettebana lena bani.

<sup>19</sup> Ca benni ria le Jesús, gansi nuxa ttule udhanle tsia lele ca tisa gue Tata Do Iyyabaaha rixxi'a nu anca gualí, attule nna unna qui odaxxu nua neda gue Ben-na, <sup>20</sup> neti nna rpeale, benni unna oca'an nua nu lä anca tsee runna qui odaxxuna neda gue Tata Do Iyyabaaha attu libe, ttu benni nua chi beni nua ulá qui bittu tsia nittina, anáguba iyába ca tulha chi ben nua nna guattaba elha xen lasi guecani lo Tata Do Iyyabaaha.

# Sitsi primero beni Pedro

**1** Neti Pedro anca apóstol gue Jesucristu, ridhelha sitsi-ni guele lebi'i ca benni chi becuae Tata Do Iyyabaaha chi biría lo yies gueni se'e-na niba lhe'e ca yies dittu lo yu gue Ponto, gue Galacia lhe Capadocia lhe Asia lhe Bitinia lhe. <sup>2</sup>Lebi'i nna axta ttuali chi becuae Tata gueri do iyyabaaha le attiba chi ga'ananie unie. Lee nna leni Espíritu guee-na ulequiesie le qui acale benni rudo tisa guee, anáguaba qui cua reni gue Jesucristuha ca tulha guele lhe. Cuina laque aca tsitsia lenque le lhe unque tse'e le xen su lee lhe.

## Tata do Iyyabaaha godilee ri'i

<sup>3</sup>Benni ra xxeni leni anca Tata Do Iyyabaaha, Tata gue Jesucristu Benni bananie ri, Ben-na nna de ratúaba lee ri nna benie beacari benni cubi attisiba ulbari attu libe de beacani Jesucristuha berié lhe'e baa atta yu'u ca nu yatti-na. Unní rute ttu elha xen lhasi gualí lenri, <sup>4</sup>ri'i nna guadíbari interés nu tua tsee-ni Tata Do Iyyabaaha utee gueri iyyabaaha, unnuha nna läga ise'elona, lä itsigaguabana lhe lä usuguabana lhe. <sup>5</sup>Lebi'i nna de ria lele Tata Do Iyyabaaha nuarca Ben-naba rape le leni elha ra xxen le guee, qui galhale lhále attiba chi ga'ananie unie atti isía ca sá lhuxa.

<sup>6</sup>Denua nna gualedaca lele, masquiba nnanna atti se'ele ttu satti yies lo yu-ni nna lebi'i nna satele uyúle ixeloba ca elha disa. <sup>7</sup>Ca elha disa uyúle-na uncana ule'e lo gansi gualí ria tsitsi lele Tata Do Iyyabaaha. Attiba oro-na masquiba ancana nu rise'elo, ttiaca labíaba riana lo gui qui rería ttaga'a nu anca oro, larcala nna nu ria tsitsi leri Tata Do Iyyabaaha ancana nu tseerla atti oro, denua nna dequide chi betto bechíale lo nu satele, de ria tsitsi lele Tata Do Iyyabaaha nna ralhale cue xenle lhe dhi lidhacale lhe iyapale respeto lhe atti eyacaxxe Jesucristu esíe.

<sup>8</sup>Lebi'i nna raquinle gue Jesucristu masquiba nuttu Ben-na biyúle, nuttube rilenle nnanna ttiaca gua riaba le lee. Denua nna attulade re'o lele, unní ancana tu elha redaca lee nu bittu aca guele quixxi'ale gue gaxasná ancana. <sup>9</sup>Redaca lele de chi diale e'eyule dhíle nu xen lele dhíle de ria lele Tata Do Iyyabaaha, delába odilá Ben-na le.

<sup>10</sup> Ca profeta utixxi'a ca tisa bete Tata Do Iyyabaaha len lacabi use'e atti nía, utsatsa ni'acabi lhe unnaba tisacabi lhe gue gaxasná odilá Tata Do Iyyabaaha ca benni, utixxi'aguabacabi gue elha tsee chi bedále Ben-na betee len lebi'i lhe. <sup>11</sup> Espíritu gue Cristu, benni yu'u lhe'e lastoo ca bi'inihaba rixxi'enie ca bi'iniha gue iyába nu sate Cristuha, gue iyába nu tsee aca dequide lania de gatti Benniha lhe. Ca bi'iniha nna bencabi duelha utsatsa ni'acabi nuxa benni nua sate anía, nucaxa aca nua lhe. <sup>12</sup> Ttiaca Tata Do Iyyabaaha nna utixxi'abanie ca bi'iniha läga aca nua tiempu atti se'ecabi yies lo yu-ni, sinuqui tiempu se'eri nnanna liba aca nua. Nnanna nna iyyabaaha li udhelha Tata Do Iyyabaaha Espíritu guee qui raca lanie ca benni requi rixxi'a ca tisa gue Jesús, ca tisaha ben-na chi utixxi'encabi lebi'i. Unní nna axta ca ingeli-na ridá lecabí ilencabi-na.

### Tata Do Iyyabaaha raca lee acari nu se'e riesi anca nari

<sup>13</sup> Denua nna gualulaba tsee lele gue nu unle, gualunna leni elha rieni lhe. Itú iqui itú lele gualuxxen lele gue nu redá le Tata Do Iyyabaaha utee len lebi'i atti eyacaxxe Jesucristuha attu libe. <sup>14</sup> Gualeaca attiba ttu xi'ini rudo tisa gue tata gueni, kitturu tse'ele unle ca nu ridá lele runle atti ancale nu chulha leni kittu chi yu nu anca gue Tata Do Iyyabaaha. <sup>15</sup> Sinuqui gualtse'e la gualuni nu anca tsee qui acale nu se'e riesi lhe'e nu lä anca tsee, cumu Tata Do Iyyabaaha benni uxie le-na anque benni do riesi lhe'e nu lä anca tsee. <sup>16</sup> Cumu lo ca sitsi gue Ben-na rá: “Acale nu se'e riesi lhe'e nu lä anca tsee, attiba neti anca Benni do riesi lhe'e nu lä anca tsee.”<sup>a</sup>

<sup>17</sup> Gansi lebi'i rále raca Tata guele Tata Do Iyyabaaha Benni runi ttu ttulapaba elha uxtisi gue coa nu runba ttuttu benni, lebi'i nna gualgape respeto itú iqui itú lele laca se'ele yies lo yu-ni. <sup>18</sup> Cumu chiba yule, Ben-na bodile le lo nu lä anca tsee se'ele runleha nu bidetile gue ca benniola gueleha, anáguba gua yuxebale läga len oro o len plata nu risíaba rise'elona utixa Ben-na qui ulále kittu dia nittile, <sup>19</sup> sinuqui leni reni ga'ana tsee gue Cristuha bodilá Ben-na le, Benniha uttie, uque attiba ttu carne'e tsee nu tsa kittu bixa anquinna qui uyu'e úna lo becoa gue Tata Do Iyyabaaha. <sup>20</sup> Atti deobali cue yies lo yu-ni chi bodú Tata Do Iyyabaaha Cristuha qui

---

<sup>a</sup> 1:16 Levítico 11:44-45; 19:2

unie len Ben-na nu chi benie-ni, ttiaca tiempu se'eri nnanna liba bisíe qui unie salía tseen le.<sup>21</sup> Lebi'i nna de Cristuha nna ria lele Tata Do Iyyabaaha Benni beni beacani Cristu dequide uttie, leni unnuha nna benie ure xen Cristuha, qui anáchu lebi'i nna tsia lele Tata Do Iyyabaaha, uxxen lele gue nu chi re unie lhe.<sup>22</sup> Lebi'i nna de rudole tisa gue ca tisa rixxi'a nu anca gualí-na, nuarca chi beni Espíritu gue Tata Do Iyyabaaha beaca nari lastoole qui anáchu gualíga e'eyule acaguinle gue ca benni ria le Jesús. Larcala nna itú iqui itú lele aquin gue loesle.<sup>23</sup> Lebi'i nna chi ulile attu libe, ttiaca bitturu ca xxudi xnale ca nu rattibana ulu'ucana le, sinuqui ca tisa gue Tata Do Iyyabaaha benni anca bani tsa bittu lhuxa-na benie ulile nnanna attu libe.<sup>24</sup> Cumu lo ca sitsi gue Tata Do Iyyabaaha rá:

Iyába ca benni se'e yies lo yu ancacana attiba ixxi.

Nu ra xxeni lecani nna ancana attiba ca iyya daa lhe'e ixxi-na. Ixxi-na ribisbana, iyyaha nna riyinnibana.

<sup>25</sup> Ttiaca ca tisa gue Benni bananie ri-na ttu dia liiba ruchíe.<sup>a</sup> Ca tisa-na ben-na anque ca tisa rodiláque le chi utixxi'entu le.

**2** Larcala nna gualcua iyánea nu lä anca tsee runle-na, nu run lele-na lhe nu ridiyiele-na lhe nu rapale malisi-na lhe nu rinne güee gue loesle-na lhe.<sup>2</sup> Nu unlale nna gualuni attiba ttu unto chi ulba, reasinna gasná nu anca ttaga'a xisi, anía gualdhá lele ca tisa anca ttaga'a gue Tata Do Iyyabaaha, cumu ca tisa-na unque tse'e tsitsile lo neda gue Ben-na, anía liba nna lhále bittu tsia nittile,<sup>3</sup> cumu lebi'i nna chiba yule, Benni bananie ri-na anque Benni du tsee lee.

### Lebi'i ancale benni chi becuee Tata Do Iyyabaaha

<sup>4</sup> Larcala nna gualibiga gaxxa taa len Jesús, Ben-na anque attiba ttu iyya bani. Ca benni se'e yies lo yu-ni nna ulu'u ni'acani Ben-na, ttiaca len Tata Do Iyyabaaha, Ben-na anque attiba ttu iyya becuee texxatta lidhacani ga'ana tsee.<sup>5</sup> Anáguaba lebi'i, ancaguabale attiba iyya bani, ca nu rixuu dia ricoa qui aca yotu anca le'a gue Ben-na, qui acale bixxudi chi se'e riesi rixuu lo sina gue Tata Do Iyyabaaha, de ria lele Jesucristuha nna lebi'i unle nu ru'u le Tata Do Iyyabaaha dhie baneda unnuha ancana attiba ttu úna.<sup>6</sup> Cumu anába dia lo ca sitsi gue Benna atta rá:

---

<sup>a</sup> 1:24-25 Isaías 40:6-9

Gualgüiarga, neti cuequia ttu iyya lhe'e yiesi Sión-na,  
 iyyaha anque iyya nu ribe ridentsitsi yo'o, anque iyya nu  
 texxatta lidhaque lhe

iyya nu chi becueea lhe

benni tsia leni Ben-na nna delába Jesús, tsa läga ettuinna.<sup>a</sup>

<sup>7</sup> Len lebi'i ca benni ria le Jesucristuha, nu te xxeni lidhacani  
 anca iyya-na. Ttiaca len ca nu bittu ria le Ben-na nna raxxíbana len  
 lacana attiba rá lo ca sitsi gue Tata Do Iyyabaaha:

Iyya ulu'u ni'a ca benni rucua yo'o-na, delába Jesús,

be'eyue uque attiba ttu iyya nu ribe rideñ tsitsi-na yo'o.<sup>b</sup>

<sup>8</sup> Ráguba lo ca sitsi-na:

Iyya-na ancana nu runi richecucana, iyyattoo-na rurixxiettan  
 cana.<sup>c</sup>

Lacana richecucana de bittu rudocana tisa gue ca tisa gue Tata Do  
 Iyyabaaha, anába ga'ana sate ca nu bittu rudo tisa gue Ben-na.

<sup>9</sup> Ttiaca lebi'i nna ancane ca benni chi becuee Tata Do Iyyabaaha,  
 ancane bixxudi gue Benni rinnabie ri-na lhe ancane yiesi chi  
 ulequiesie lhe Benni guee lhe qui quixxi'enle ca benni gue nu xxeni  
 reban leri run Ben-na. Denuala nna uxie le, eríale lhe'e chulha-na  
 qui uta'ale lhe'e xieni ga'ana tsee guee. <sup>10</sup> Lebi'i ca tu ttua nna läga  
 ancane benni lo yiesi gue Tata Do Iyyabaaha, ttiaca nnanna chi  
 ancane benni lo yiesi gue Ben-na. Ca tu ttua nna tsa läganu ratúa  
 len le, ttiaca nnanna nna Tata Do Iyyabaaha ratúa lee le.

### Gaultse'e gualuni nu raca le Tata Do Iyyabaaha

<sup>11</sup> Ca benni ria le Jesús racatia gueni, lebi'i ancane attiba ttu  
 benni dittu yu'u neda, neti rinnaba lole bittu dhielhale unle nu lä  
 anca tsee ridá le cuerpu guele-na unna cumu unnonna ritilha len  
 lastoole-na. <sup>12</sup> Lhatsiru gualudú lele len ca benni bittu ria le Tata  
 Do Iyyabaaha se'e atta se'ele-na. Aná nna ca nu rinne güe guele  
 nnanna attisiba lebi'i ancane nu runi nu lä anca tsee, gansi chi bisía  
 sá atti uni Tata Do Iyyabaaha elha uxtisi gue iyába benni nna lania  
 nna cuequi xencana lee Ben-na de iláquinna lebi'i nna tseeba anca  
 nu benle.

<sup>13</sup> Qui nuttu nu inne güena gue Benni bananie ri-na, gualudo  
 tisa gue iyába ca uxtisi gue yies lo yu-ni, anáguaba nu rinnabia

<sup>a</sup> 2:6 Isaías 28:16

<sup>b</sup> 2:7 Salmo 118:22

<sup>c</sup> 2:8 Isaías 8:14-15

anca nu lo-na lhe cumu lana ancana nu rinnabia xeni.<sup>14</sup> Anáguaba gualudoguaba tisa gue ca uxtisi rose'e nu rinnabia anca nu lo-na lhe cumu bese'e ca unná qui ugüecana elha disa ca nu runi nu lä anca tsee-na. Ca benni runi nu anca tsee-na nna gapacana respeto.<sup>15</sup> Cumu Tata Do Iyyabaaha raca lee unle nu anca tsee, qui bittu bi te ni ca nu lä caa elha rien gueni rinne güee-na innecana guele.

<sup>16</sup> Lebi'i nna gualtse'eba gualuni atti runi benni nu nuttu nu rinnabian na, ttiaca bittu aquinle de ancale nu nuttu nu rinnabiana le nna guacaba unle nu racaba lele. Nu unlale nna gualtse'e gualuni nu anca tsee de ancale benni rixuu lo sina gue Tata Do Iyyabaaha.<sup>17</sup> Gualgapa respeto iyába benni, aquinle gue ca benni ria le Jesús lhe gatta elha rasi guele lo Tata Do Iyyabaaha lhe gualgapa nu rinnabia-na respeto lhe.

<sup>18</sup> Lebi'i ca benni tto'o lo sina gue benni, gualgapa respeto ca benni banquinna le-na, bittu sunru ca nu ruyú tseecan le-na lhe rapacana pasensi guele lhe sinuqui anáguaba ca nu lä ruyú tseecan le-na lhe.<sup>19</sup> Cumu tseerla anca len Tata Do Iyyabaaha gansi lebi'i rugo ruchíale lo elha disa ruyúle masquiba bittu benle nu lä anca tsee, sinuqui de runbale nu anca tsee lo Tata Do Iyyabaaha.<sup>20</sup> Cumu gansi de benbale nu lä anca tsee nuarca rugüe benni le, lania nna tsa lägabi bala'ana rele rutto ruchíale lo nu rateleha. Ttiaca gansi lo ni'a gue de runbale nu anca tsee nna rudhaca güee benni le, lebi'i nna guaridibale elha xen lasi lhe guaruchiabale lo nua lhe lania nna guarebani Tata Do Iyyabaaha le bala'ana.<sup>21</sup> Denuala nna uxi Tata Do Iyyabaaha le acale benni guee, cumu anába guate Cristuha biyúe elha disa lo ni'a queri. Gue atti ben Benniha ugüiale qui anáchu lebi'i nna anáguaba usiguile unle.<sup>22</sup> Benniha nna tsa läga benie ni ttu nu lä anca tsee, lä uxi yieguabe lhe.<sup>23</sup> Atti bedhaca disacan Benniha nna tsa läga bequi Benniha ecabie len tisa idí, atti ruttecana Benniha elha disa nna tsa läga bequi Benniha un dise, sinuqui las ná Tata Do Iyyabaaha Benni runi elha uxtisi tseehaba boca'ane nua.<sup>24</sup> La laba Cristuha bedelha cu'e yua gue ca tulha gueriha atti uttie lo ya crusicha, qui ri'i nna tsa oca'anri nu lä anca tsee runriha attisiba chiba uttiri, ttiaca nnanna se'erí anca banri qui anáchu ri'i nna tse'erí unri nu anca lhatsiru. Ca güee uca Cristuha nna benie qui beacale.<sup>25</sup> Cumu lebi'i nna requibale ttua attiba requi carne'e biganna ttiaca nnanna nna chiba besíale len Cristuha, Benniha ruyúe le attiba ttu benni re lo carne'e, qui bittu bi dhacale.

### Lhatsiru tse'e ca benni len latselacani

**3** Anáguaba lebi'i ca nuila chi betsá náni, gualudá iqui le gue ca unbiyuu guele-na, cumu gansi nuxa ttu ca unná bittu ria lecani ca tisa gue Jesús, atti iláquinna nu runle nna oquinna iquicani tsia lecani ca tisa gue Jesús, läga de quixxi'attiguinle cana ca tisa gue Ben-na,<sup>2</sup> sinuqui de ilábaquinna lebi'i nna tseeba anca nu runle, de gua rapabale Tata Do Iyyabaaha respeto lhe.<sup>3</sup> Bittu aquinle dequi nu tse'e tseerle-na, uni ule'e tseerle de gacaxasná eyon tseexxatta iquile lhe de egu'u yienle lhe egu'u nále ca nu anca len oro lhe de eyocuxxatta xo tsee guele lhe<sup>4</sup> sinuqui lhi'u lhe'e lastoolale unná unle aca le benni du tsee leni, benni du pasensi leni lhe unna ancana ttu nu rule'e tsee bittu lhuxa, nu teru lidhacani lo Tata Do Iyyabaaha lhe.<sup>5</sup> Cumu unnaba uca nu benni bele'e tsee ca nuila güia le Tata Do Iyyabaaha use'e atti nía, lacabi nna bexxenbale cabi Tata Do Iyyabaaha lhe bedába iquicabi gue ca unbiyuu guecabihalhe.<sup>6</sup> Anába beni Sara, labi nna bedobabi tisa gue Abraham, labi nna rábi bi'iniha "benni banani neti". Lebi'i ancale attiba xi'iniunná bi'iniha gansi tse'ele unle nu anca tsee, tsa lägabi te bixa lo ni'a gue gasinle.

<sup>7</sup> Anáguaba lebi'i ca unbiyuu chi betsá náni, lhatsiru gualudú lele len ca nuila guele-na, gua yubale lacana läga anca tsitsittecacana, gualute lidhacacani cumu anáguaba lacana lhe uxíguabacana loesi elha nabani beda le Tata Do Iyyabaaha betee len lebi'i. Aná gualuni qui iyienini Tata Do Iyyabaaha guele atti rinnele rulisale Ben-na.

### Lhatsiru gualudú lele atti ratele ruyúle elha disa

<sup>8</sup> Qui ulhuxa gue nu ria-ni nna ttuba gualulaba lele, lhatsiru gualtse'e len loesle, gualgapa pasensi gue loesle lhe aquin gue betsloesle lhe. Gualaca benni si'ile lhe benni bittu runi ttaba lhe.<sup>9</sup> Bittu aquinle eyequile unle nu lä anca tsee len nuxa uni nu lä anca tsee len lebi'i, lä eyequiguale udhaca disale nu udhaca disan lebi'i lhe. Nu unlale nna gualnnaba aca len Tata Do Iyyabaaha unnuha, cumu lebi'i nna uxiba Tata Do Iyyabaaha le qui dhíle elha tsee ralhale dhíle.<sup>10</sup> Cumu:

nuxaba benni raca leni dho tseena yies lo yu-ni lhe  
raca leni salía tseenna lhe  
ucuedatti lhusa-ni qui bittu cuenta innena nu lä anca tsee,

bittuguaba un leni lhe.

<sup>11</sup> Nu unlale nna gualudhán nu lä anca tsee runle-na,  
gualuni nu anca tsee lhe gualun duelha tse'e tseele len iyába  
benni lhe

unnuha gualusigui gualuni.

<sup>12</sup> Cumu ca nu runi nu anca tsee-na,  
Benni bananie ri-naba rape cana, rieninie guecani atti  
rinnecana rulisacane lhe

ttiaca ca nu runi nu lä anca tsee-na, redú disabe locani.

<sup>13</sup> Läganu dhana bixa udhacan le gansi lebi'i nna satíaba se'ele  
runle nu anca tsee. <sup>14</sup> Ttiaca carbárule gansi bixa ratele de se'ele  
runle nu anca tsee. Larcala tsa nuttu nu gasinle, lä rixidiguale lhe.

<sup>15</sup> Nu unlale nna itú iqui itú lele gualnna: "Cristuha anque Benni ra  
xxeni lee", cumu Ben-na anque Benni bananie ri. Satía gualtse'e  
tsee qui lhatsiru ecabile gue ca nu innába tisacan le bixa lo ni'a gue  
xen lele Cristuha. <sup>16</sup> Ttiaca lhatsiru gualdú lele qui bittu bi te bixa  
lo ni'a gue tse'ele eleninle, qui ca nu rinne güe gue nu tsee runle de  
ancale benni ria le Jesús, ettúquinna gue nu rinnecana. <sup>17</sup> Cumu  
adílaba de tsee anca satele de se'ele runle nu anca tsee gansi anía  
raca le Tata Do Iyyabaaha, attichula de unle nu lä anca tsee.

<sup>18</sup> Cumu Cristuha nna anáguaba guate Benniha, lo ni'a gue ca  
tulha gueri, ttu libeba uttie qui utixe gue iyábacana. Benniha anque  
ttu Benni bittu tulha guee te, ttiaca chi uttie lo ni'a gueri nu te tulha  
gueni, anía liba nna eche Ben-na ri len Tata Do Iyyabaaha. Cuerpu  
gueeba Benniha utti, ttiaca atti beacanie nna anca banba espíritu  
gue Benniha do lhe'e cuerpu cubi guee. <sup>19</sup> Atti anque Espíritu nna  
güie ugüixxi'ani ca espíritu yaya atta bittu dica eríacana. <sup>20</sup> Ca  
unnuha nua bittu bedo tisa atti nía atti udo Noé, lania nua leni  
pasensiba uleda Tata Do Iyyabaaha cana oduxiyyancana laca raca  
barco xeniha, lhe'e nua nua ulá lo elhuttia sunruba xxunu ca benni  
gopi lhe'e nua, atti besá inda yies lo yu-ni. <sup>21</sup> Inda gue lania nna  
ancana attiba nu radiri inda nnanna qui rilári bittu dia nittiri, nu  
readiri inda-na nna läga dia le unná innána rearí cuerpu gueri,  
sinuqui innábari aca len Tata Do Iyyabaaha ri qui ttua nu uni  
eleninri atti esínri lo Ben-na, Ben-na nna odilábe ri de beacani  
Jesucristuha. <sup>22</sup> Benniha nna beopie iyyabaaha bedoe daca derechu  
gue Tata Do Iyyabaaha, ca ingeli-na lhe ca nu rinnabia-na lhe ca nu  
ra tsitsi lequinna lhe se'ecana rudá iquicani guee.

### Gualuni nu raca le Tata Do Iyyabaaha

**4** Larcala attiguaba guate Cristuha biyú cuerpu guee elha disa lo ni'a gueri, aníaguaba lebi'i gualese'e tsee lo nu daa satele. Cumu benni chi guatena biyúna elha disa leni cuerpu gueni nna chiba boca'an nua nu lä anca tsee runna,<sup>2</sup> qui itúttuba dona yies lo yu-ni nna unna nu anca tsee lo Tata Do Iyyabaaha, bitturu unna nu ridá lee cuerpu gueni.<sup>3</sup> Care'aba nu chi benle ca tu ttuha, lebi'i nna güequibale benle nu re'o le ca nu bittu anca biani Tata Do Iyyabaaha, use'ebale benle nu ucaba lele lhe nu satsa udába lele lhe güiabale ca atta raca ca laní satsa lhe ute bedále u'uya utole lhe bedú xibile lo ca diosi rigu'u ni'a Tata Do Iyyabaaha lhe.<sup>4</sup> Ca nu bittu ria le Tata Do Iyyabaaha nna raca guatequinna de bitturu ruxunnibale dia lenle cana unle nu lä anca tsee ridá lele, de unnuha nna nuarca rinne güecana guele.<sup>5</sup> Ttiaca ca unná nna chi otecaná cuenta lo Benni chi do tsee unie elha uxtisi gue ca benni se'e bani lhe ca nu yatti lhe.<sup>6</sup> Cumu de unnuhala nna anáguaba ca nu chi uttiha nna binaguabacana ca tisa gue Jesús, qui aca elha uxtisi guecani gue nu bencana, anáchu dho ban espíritu guecani attiba raca le Tata Do Iyyabaaha.

<sup>7</sup> Chi daa ribiga lhuxa iyába nu te yies lo yu-ni, denuala nna gualtse'e yanlee, itú iqui itú lele gualudo lele innele len Tata Do Iyyabaaha.<sup>8</sup> Delo iyátte nna tsitsi aquin gue loesle, cumu nu raquin gue loesri-na runi ridíri elha xen lhasi gue loesri gue ixeba ca tulha.<sup>9</sup> Gualute ganna lhe'e lisle tse'e ganna benni, bittu inne güele.<sup>10</sup> Coa ttuttule gualun yuda loesle len coa ancaba elha tsee bete Tata Do Iyyabaaha lenle, qui acale benni rixuuni lhatsiru elha tsee betee Tata Do Iyyabaaha lenle.<sup>11</sup> Benni rixxi'a ca tisa gue Jesús, labi nnainnebi ca tisa ute Tata Do Iyyabaaha lenbi. Benni runi yuda attu benni subi nna unbi na leni itú fuerza rute Tata Do Iyyabaaha len lana, qui anáchu nna iyába nu unle de Jesucristuha nna cuequi xen ca benni Tata Do Iyyabaaha. Ben-na anque Benni ra xxeni lee lhe Benni rinnabia xení ttu dia lii lhe. Amén.

### Rateri de ria Ieri Jesús

<sup>12</sup> Ca benni ria le Jesús racatia gueni, bittu udú guatenle gue ca elha disa xení ruyúle, aquinle biaca aníla ratea, attisiba unnuha ancana ttu nu bittu anca bienle.<sup>13</sup> Delaba unnuha nna eyo'ola lele

de satele attiba guate Cristuha, qui anáguuba nna eyo'o tsitsia lele atti ilenle dedaa Benniha lhe'e xieni ga'ana tsee guee.<sup>14</sup> Carbárule gansi usiale can le lo ni'a gue de ria lele Cristu, cumu Espíritu ga'ana tsee gue Tata Do Iyyabaaha satíaba doe len lebi'i. [Gualígala ca unná nna rinne güecana gue Ben-na, ttiaca lebi'i nna rapale Ben-na respeto.]<sup>15</sup> Gansi nuxale ancale nu lä duta leni o nu rutti benni lhe nu runi ubana lhe nu raga'a gueni leni nu anca gue nu subi lhe ralhabale satele uyúle elha disa.<sup>16</sup> Ttiaca gansi nuxale ratele ruyúle elha disa de ancale benni ria le Cristuha, bittu ettuinle, sinuqui gualcuequi xen le Tata Do Iyyabaaha de ratele aná.

<sup>17</sup> Cumu chiba bisía tiempu dhulo uyúri elha disa, unní nna dhulona primerba len ri'i ca benni gue Tata Do Iyyabaaha, ttiaca gansi len ri'i dhulo aca aná, ¿galigasná te saliana ca benni bittu rudo tisa gue nu rá ca tisa gue Tata Do Iyyabaaha?<sup>18</sup> Gansi benni runi nu anca tsee-na penaba lhána, ¿titialiga anca nu sate ca nu runi nu lä anca tsee-na, ca nu lä dutalequinna lhe?<sup>19</sup> Larcala nna gansi Tata Do Iyyabaahaba raca lee ratele ruyúle elha disa, gualusigui gualuni nu anca tsee, las ná Ben-na gualoca'ana elha naban guele cumu Ben-naba benie le, bittuguuba runnitti tisa guee lhe.

### Gaxasná udú le ca bi'ini anca nu lo gue ca benni ri lee Jesús

**5** Nnanna nna rulisa ca benni chi teru elha rieni guecabi anca nu lo gue ca benni ria le Cristu se'e len lebi'i. Cumu anáguuba neti ancaguuba nu lo gue ca benni ria le Cristu attiba lacabi. Neti anca benni begüia loa iyá nu guate Cristu, selaguuba len ca bi'in-na edíbaaya nu ra xxen lee ga'ana tsee gue Ben-na gansi chi besié.<sup>2</sup> Lhatsiru gualuyú ca benni gue Tata Do Iyyabaaha rixxi'enle ca tisa gue Ben-na, attiba ttu benni ruyú lhatsiru-na carne'e, itú iqui itú lele gualule'equinbi attiba rába Tata Do Iyyabaaha unle, bittu unle sina-na re atti acaba lele. Bittuguuba de ridá lele dhíle belhi lhe sinuqui de anába redá lele unle.<sup>3</sup> Bittutte lo bedále innabiale ca benni baninle-na, sinuqui gualtse'ela gualuni nu anca tsee raca lele un benni.<sup>4</sup> Aná nna gansi chi besía Jesús Benni anque nu rinnabia xení anca nu lo gue ca benni rule'eni adí benni nna lebi'i nna dhíle ttu nu unna cue xen lhe anca attiba corona ga'ana tsee bittu ise'elona.

<sup>5</sup> Anáguaba lebi'i ca uncuti, gualudo tisa gue ca benni teru elha rien gueni anca nu lo gue ca benni ria le Tata Do Iyyabaaha. Iyábale gualudo tisa gue loesle len si'ile, cumu:

Ca nu runi ttaba-na redú disaba Tata Do Iyyabaaha locani, ttiaca ca benni bittu runi ttaba-na gua racaba lanie cana.<sup>a</sup>

<sup>6</sup> Gualeaca benni rudá iquini bittu runi ttaba lo Tata Do Iyyabaaha, qui gansi chi bisía sá chi ga'anani Ben-na lania nna cuequi xenie le. <sup>7</sup> Gualodha'ana iyárecha elha richacha iqui guele las ná Ben-na, cumu gua rapaba Ben-na le.

<sup>8</sup> Gaultse'e yanlee, satía gualse'e tsee cumu nu xxegüi bittu raca uyún le-na attiba requi besi rutuxxu requina reguilana nuxa gona. <sup>9</sup> Gualese'e tsitsi loni, tsitsi gualtsia lele Tata Do Iyyabaaha lhe guayúbale nna adí ca benni ria le Jesús attiba lebi'i se'e gatti laduba nna attiguaba ratele ruyúle elha disa anáguaba ratecabi. <sup>10</sup> Ttiaca dequide chi guatele ttu satti nna de chi ancale benni gue Jesucristuha, Tata Do Iyyabaaha Benni rute iyá lo nu tsee len ri'i, Benni uxie ri qui tse'eri atta ttu dia liiba ru'u xieni ga'ana tsee doe, lee unie acale nu chi beda'ani, nu se'e tsitsi lhe nu runi tsitsi lhe nu chi ria tsitsi leni Ben-na lhe. <sup>11</sup> Ben-na cuequi xenrie ttu dia lii, lee anque Benni rinnabia ttu dia lii lhe. Amén.

### Pedro rulhuxabi rinnebi

<sup>12</sup> Silvano, bi'ini xen lasia ancabi ttu benni gualígua ria le Jesús, benbi neti yuda uca sitsi atta rulisale lhe rixxi'atia le lhe gue elha tsee chi uxíle-na, unná ancana nu rule'e lo gualíba racani Tata Do Iyyabaaha gueri, denuala nna tsitsi gaultse'e len nu chi ria lele.

<sup>13</sup> Ca benni ria le Jesús se'e lhe'e yiesi Babilonia chi becuae Tata Do Iyyabaaha aca guee attiba lebi'i, ridhelhacabi ttu padiuxi guele, anáguaba bi'ini lá Marcos bi'ini raca attiba xi'inia-na lhe ridhelhabí ttu padiuxi guele. <sup>14</sup> Gualgás loesle padiuxi len utsá lo xxaga loesle attiba labi ca benni anca gue Tata Do Iyyabaaha runcabi.

Iyáxeale ca benni gue Jesucristu, xen su lee gaultse'e.

## Sitsi berupa beni Pedro

**1** Neti Simón Pedro benni rixuu lo sina gue Jesucristu, anca apóstol, nu chi ga'ananie iche ca tisa guee. Ridhelha sitsi-ni guele lebi'i ca benni ria lele Jesús attiba ri'itu, cumu Tata Dios gueri Jesucristu Benni bodile ri anque Benni ttu dia liiba runi nu anca tsee.

<sup>2</sup> De chi anca bienle Tata Do Iyyabaaha, anáguaba Jesús Benni bananie ri-na lhe cuina laque acachatti lenque le lhe unque tse'ele xen su lee lhe.

### Gualtse'e gualuni nu raca lee Tata Do Iyyabaaha

<sup>3</sup> Tata Do Iyyabaaha, leni elha ra tsitsi le guee chi betee iyá nu reasinri qui tse'eri unri nu radi lee. Iyába nu bete Ben-na len ri'i nna uxíri-na de chi anca bienri Jesucristu. Benna uxie ri lo neda guee cumu de anque Benni ra xxeni lee lhe de anque Benni du tseeru lee lhe. <sup>4</sup> De nua nna chi begüee Tata Do Iyyabaaha tisa len ri'i, utee ttu nu ga'ana tsee nu texxatta lidhacani len ri'i, qui de nu chi re utee len ri'i nna e'eyuri acari benni runi nu anca tsee, attiba Tata Do Iyyabaaha anque Benni runi nu anca tsee. Anía nna lhári lo nu tsiga te yies lo yu-ni lhe nu ridá leri runri lhe. <sup>5</sup> Larcala nna gualuni duelha tsiaru lele Tata Do Iyyabaaha, dequide nu chi riaru lele Ben-na, lania nna acale benni runi nu anca tsee, dequide acale benni runi nu anca tsee nna acale benni te elha rieni gueni, <sup>6</sup> de chi ancale nu te elha rieni gueni nna nuarca chi ancale nu ridána rinnabia elha rieni gueni, cumu de chi anca le nu ridána rinnabia elha rieni gueni nna nuarca ancale nu rebesi'i leni, cumu de chi ancale nu rebesi'i leni nna nuarca ancale nu runi nu anca tsee lo Tata Do Iyyabaaha, <sup>7</sup> cumu de chi ancale nu runi nu anca tsee lo Tata Do Iyyabaaha nna nuarca ancale nu raca si'in loesni, cumu de chi ancale nu raca si'in loesni nna nuarca raquin gue loesle.

<sup>8</sup> Cumu gansi lebi'i se'ele runle aná, rudona lele rusiguile runtseerle lhe lania nna guancabale benni rixuu, bittuguuba cuenta benbiale Jesucristu Benni bananie ri-na lhe. <sup>9</sup> Ttiaca ca nu bittuba se'e runi aná nna attiba ttu nu xua loni anca ca nua, attiba ttu nu bittu rilátseeni lhe cumu de chi bixulhaquinna Tata Do Iyyabaaha nna chiba uxie elha xen lasi gue ca tulha bencana ttuha. <sup>10</sup> Larcala

nna ca benni ria le Jesús, gualun duelha gualule'e lo chatti lebi'i nna gua liba chi ancale benni uxi Tata Do Iyyabaaha lhe benni chi becuee aca guee lhe cumu gansi se'ele runle aná nna tsa läga iriesle lo neda gue Tata Do Iyyabaaha.<sup>11</sup> Aná nna yaliru lo neda guele eta'ale atta tsa bittu lhuxa rinnabia Jesucristuha, Ben-na anque Benni rinnabie ri, anque Benni bodile ri lhe.

<sup>12</sup>Larcala neti nna usiguba orexxalele gue nu ria-ni, masquiba chi yule na lhe chi se'e tsitsile len nu ria lele anca gualí yule nnanna lhe.<sup>13</sup>Neti nna racatia, tseeba anca laca do bania nna ulisa chattia le len ca tisa-ni,<sup>14</sup> cumu Jesucristu Benni bananie ri-na chiba utixxi'anie neti dequi attu sattirba doa yies lo yu-ni.<sup>15</sup>Ttiaca gunba duelha qui eya'an tsitsi nu ria-ni lhe'e iquile, qui anáchu dequide chi uttia nna lebi'i nna satía exxa lele gue nu ria-ni.

### **Ca apóstol biláquinbi anca Cristuha benni ra xxeni lee**

<sup>16</sup>Cumu nu bele'entu le gue edesia Jesucristu Benni bananie ri-na Benni ra xxeni lee-na, läga anca unná nu besi'inutu bexxe letu utixxi'entu le, sinuqui len cuinaga lotu begüiatu anca Benni bananie ri-na Benni ra xxeni lee.<sup>17</sup>Ri'itu nna aníga bilentu atti betee Dios Benni anque Tata gue Ben-na lidhaca xen gue Jesús, ulu'e Ben-na lhe'e xieni ga'ana tsee guee lhe nianna bieni tsi'li Tata Do Iyyabaaha re: "Benni anque Xi'inia, Benni racatia guee, neti doa redaca lasia len lee."<sup>18</sup>Ri'igatu bienintu tsi'e biríe dee iyyabaaha, atti use'etu len Jesús lo lhilhi anca le'aha.<sup>a</sup>

<sup>19</sup>Anáguaba teeguaba len ri'i ca sitsi dia ca tisa rixxi'aga gue nu unne ca benni uca profetaha. Lebi'i nna tseeba runle rudá nagale gue nu rá ca tisa-na, cumu ca tisa-na ancaque attiba ttu gui rudani atta anca chulha, axta liba tsani nna lania liba iría beli güedíla-na qui udanie lhi'u lhe'e lastoole.<sup>20</sup>Gueba nna rdaca sadú lele, ni ttu ca tisa dia lo ca sitsi gue Tata Do Iyyabaaha bittu ancaque nu guaca gue ttu benni quixxi'ana nu dia lee leni nunca elha rieni gueni.<sup>21</sup>Cumu ca profetaha nna ni ttu libe bittu unnecabi nu yu'uba iquicabi, delába unnuha nna lacabi nna unnebacabi ca tisa betee Espíritu gue Tata Do Iyyabaaha len lacabi.

---

<sup>a</sup> **1:17-18** Mateo 17:5; Marcos 9:7; Lucas 9:35

**Pedro rixxi'abi gue ca nu run leni requi rixxi'a ca tisa gue Jesús**  
*(Jud 4-13)*

**2** Ttiaca anáguaba use'e ca güen lasi rá dequi ancacana profeta gue Tata Do Iyyabaaha len ca benni Israel, anáguaba nnanna tse'equuba ca maestru güen lasi len lebi'i. Ca unná nna sigába ule'ecana nu uni tsia nitti benni, aná nna rigu'u ni'acani Benni bananie ri-na, Benni bodile cana qui bittu tsia nitticana, unnuha uni nna sattitte dia nitti la labacana. <sup>2</sup>Ixe benni sanona ca unná uncana nu lä anca tsee ridále ca unná runcana, lo ni'a guecani nna inne güe ca benni gue nu gualí anca neda gue Tata Do Iyyabaaha. <sup>3</sup>De ridáxxatalecani belhiu nna bixaba otsi'inu lecani ule'equinna le gue nu bittu anca gualí qui aca ilhupicana belhiu cu'ele, ttiaca tsa läga lhácana, chiba dana ribigana guecani tsia nitticana, cumu axta ttuali chi boquinna iqui Tata Do Iyyabaaha tsiacana atta lexúa.

<sup>4</sup>Cumu Tata Do Iyyabaaha tsa läga uxie elha xen lasi gue ca ingeli beni nu lä anca tsee, sinuqui bedelhale cana atta lexúa, lhe'e atta anca chulha, nía guayacana qui ttua tseecana aca elha uxtisi guecani gansi chi bisía sá uni Tata Do Iyyabaaha elha uxtisi. <sup>5</sup>Niguuba ca benni use'e atti nía lä uxí Tata Do Iyyabaaha elha xen lasi guecani, sinuqui benle bisá inda yies lo yu-ni qui bija inda ca benni runi nu lä anca tsee se'e lania. Sunruba Noé bi'ini utixxi'aní ca benni uncana nu anca tsee lo Tata Do Iyyabaaha lenbi a gasi ca benni ulá.

<sup>6</sup>Aníaguaba beni Tata Do Iyyabaaha leni yiesi lá Sodoma lhe yiesi lá Gomorra lhe atti boquinna iquie ancacana nu te tulha gueni nna bettee cana leni gui, axta beacacana te, iyába unní uca qui ixuuna ugüia benni bixanca nu sate ca benni runi nu lä anca tsee se'e yies lo yu-ni. <sup>7</sup>Ttiaca bodilábe Lot, bi'iniha ucabi ttu benni tsee, labi nna tsitsiba udo si'ibi de rilenbi nu satsa ridá le ca nu lä duta lenia runcana. <sup>8</sup>Lot bi'ini beni nu anca tseeha nna atti udobi len ca unnuha nna ttuttu sába biyú lhi'u lhe'e lastoobi elha disa de rilenbi lhe rieninbi lhe iyába nu satsa run ca benni se'e lhe'e yiesi atta dobiha. <sup>9</sup>Iyá bunni rule'e lo Tata Do Iyyabaaha guayúbe gaxasná unie odile ca benni rudo tisa guee lo nu ratecana, ca nu runi nu lä anca tsee-na nna chi se'e tseenie cana qui ugüe cana elha disa ralhacana dhicana gansi chi bisía sá aca elha uxtisi.

<sup>10</sup> Ca nu rulaba leni ridá lecani runi nu lä anca tsee, anágua ba rigu'u ni'acani elha rinnabia gue Benni bananie ri-na lhe chi dhicana elha disa, de ancacana nu diti bittu rieni ni lhe nu reaxani runi ttu bixa lhe, lacana nna tsa bittu rasquinna rese'e disacana lo ca nu run tsitsi ra xxeni lee requi iyyabaaha. <sup>11</sup> Inqui ca ingeli-na masquiba ancacabi nu raru tsitsi leni lhe benni ra xxeni leni lhe bittu reaxquinbi innee dicabi udelha iyyacabi ca unná lo Tata Do Iyyabaaha.

<sup>12</sup> Ca nu güen lasi-na nna ancabacana attiba ca nimala chulha leni lä caa elha rien guecani, sunruba ralicana qui iyaxxuni elhuttiha cana ulhuxancana. Lacana nna cuentaba rinne güecana gue nu lä radú lecani, ttiaca gattibacana attiba ratti ttu nimala, <sup>13</sup> dhibacana elha disa ralhacana dhicana. Resá do bisaba runcana nu lä anca tsee, lacana nna ancacana attiba ttu nu satsa nu runi rettuinle lhe nu runi rinne güe benni guele lhe laca yu'ucana gü'i'ya go len lebi'i nna tsapaba re'o lecani gue nu lä anca tsee runcana.

<sup>14</sup> Nuxaba nuila riláquinna ridá lecani, tsaba bittu rudú sicana runcana nu lä anca tsee. Chi ridiyiecanca ca benni bittu chi ria tsitsi le Jesús, ancacana nu chi yu gaxasná uncana qui aca dhicana nu raca lecani, ca unná nna nu chi dia nittiba ancacana. <sup>15</sup> Lacana nna bedhanbacana neda tsee gue Tata Do Iyyabaaha, chiba bigannacana. Neda gue Balaam xi'ini benni lá Beor la chi bedaxxucana, unnuha nua udá leni dhína belhi gue nu lä anca tsee benna. <sup>16</sup> Ttiaca bitisabana lo ni'a gue nu lä anca tsee re leni unna, burru gueni nu bittu dica innea, unnena attiba ttu benni belisan-na, bittu begüeelhana usiguina leni nu bittu diquixuu rulaba leniha.

<sup>17</sup> Ca maestru runi aná nna ancacana attiba ttu pozo bittu inda te lhe'eni, attiba ttu bea nu che be-na gatti laduba dia lenna na lhe. Ca unná nna chiba ga'ana tsiacana ttu tsaba atta anca chulha bexcoloru. <sup>18</sup> Lacana nna runcana ttaba rinnecana ca tisa elha bittu dica ixuu, ttiaca tsa lägabi ixuu nua. Leni nu lä anca tsee runcana lhe nu satsa ridá lecani lhe runcana rixúyie ca benni ca nu penaba urecana biriescana ca nu runi nu lä anca tsee-na, <sup>19</sup> lacana nna rávana ca unna dequi gualábacana lo ca ley, ttiaca la labacana ancacana attiba nu tto'o lo sina gue nu lä anca tsee se'ecana runcana, cumu iyába benni nu bittu ridána udhanna nu lä anca tsee runna ancana attiba ttu nu tto'o lo sina gue nua. <sup>20</sup> Cumu ca benni chi benbiacana Jesucristu Benni bananie ri-na, Benni bodile

ri-na lhe chiba ulácana lo nu lä anca tsee raca yies lo yu-ni, ttiaca gansi dequide lania nna eyequicana edeoncana nu lä anca tsee attu libe nna nu lä anca tseeha nna dhana edennabian cana, lania nna adílaba nu runi nu lä anca tsee acacana attichula primera.

<sup>21</sup> Denuala nna tseerla anca ttirca bittuba benbiacana neda gue Tata Do Iyyabaaha, attichula dequide chi benbiacana Ben-na nna nianna eyequicana udhancana udocana tisa gue nu beni Tata Do Iyyabaaha mandadu uncana. <sup>22</sup> Leni unní raxxína nu dia le ttu tisa chi tee rinne benni: “Becuha nna bequibana beona nu beabi-na.” Chi te attu nu rá: “Cutsi nu chi udibaha nna bedequi dacabana bedetubina lo guna attu libe.”

### Gasná aca gansi chi dabiga esía Jesús

**3** Ca benni ria le Jesús racatia gueni, unní ancana sitsi berupa ridhelha guele. Lo irpaba ca sitsi-na rulisale rudúa elha rieni iquile, runia qui anáchu ulaba lhatsiru lele. <sup>2</sup> Gualorexxa lele gue nu chi rá ca profeta gue Tata Do Iyyabaaha atti nía. Gue nu beni Jesús, Benni bodile ri-na mandadu, ca apóstol-na ule'equinbi ri'i. <sup>3</sup> Gueba nna neti nna raca lasia unale, gansi chi deoba isía sá lhuxa yies lo yu-ni, tse'e ca benni uni nu lä anca tsee ridá lecani uncana, lacana nna redaculaquinna innába tisacana innáca: <sup>4</sup> “¿Núcala esía Cristu Benni rále anca esié? Cumu desde atti utti ca benniola guerihha ttuba anca axtaba nnanna ancaba attiba anca desde atti ureli yies lo yu-ni.” <sup>5</sup> Cumu ca unná nna tsa läga raca lecani orexxa lecani, atti nía nna lo bea-na lenna yies lo yu-ni nna ucacana atti unne Tata Do Iyyabaaha benie mandadu acacana. Yies lo yu-ni nna lhe'e indaba benie biríana, lo indaba xuanie-na lhe <sup>6</sup> anáguaba yiesi ure ttuha, leni indaguaba bise'e lona. <sup>7</sup> La len tisa unne Tata Do Iyyabaaha lania, anáguaba inne gansi chi bisía sá unie elha uxtisi, lania nna utte leni gui yies lo yu-ni lhe lo bea-na lhe unguabe tsia nitti ca nu runi nu lä anca tsee-na lhe.

<sup>8</sup> Anáguaba lebi'i ca benni ria le Jesús racatia gueni, bittu ixulhinle, ttu sá nna ancana attiba ttu mil ida len Tata Do Iyyabaaha. Ttu mil ida nna ancana attiba ttu sá len lee. <sup>9</sup> Läga rutsá Tata Do Iyyabaaha unie nu chi re unie, attiba rulaba le ttu chupa benni, sinuqui de rapaba Ben-na pasensi gueri, cumu läga raca le Ben-na tsia nitti ni ttu benni, iyába benni raca le Ben-na oduxiyyancana udaxxucana neda guee.

<sup>10</sup> Ttiaca la sá atti chi ga'ana esía Benni bananie ri-na, chi isíana atti bittu leda leri, attiba ttu ubana iyyaba le benni risinna lo rela rilána-na. Lania nna attulade tsu'u be ise'elo lo bea-na. Lo bea-na lenna iyába ca nu sia lo-ni utteba guicana, anáguauba yies lo yu-ni itebana lenna iyába nu se'e lo-ni.

<sup>11</sup> Cumu ise'eloba lo bea-na lhe yies lo yu-ni lhe denua nna lebi'i nna gualeriesi lhe'e nu lä anca tsee, ¡gualudo tisa gue Tata Do Iyyabaaha lhe! <sup>12</sup> Gualudo lele gualuni nu raca le Tata Do Iyyabaaha qui udhiubale esíe. La sá nna utse'e lo gui lo bea-na leni iyába nu sia lo-ni, iyábacana eyalhicana gansi chi bitecana. <sup>13</sup> Ttiaca ri'i nna ribedabari ttu lo bea cubi leni ttu yies lo yu cubi, nu chi rá Tata Do Iyyabaaha utee len ri'i, unnuha ancana ttu yiesi atta tse'e benni unna nu tsee raca le Tata Do Iyyabaaha.

<sup>14</sup> Larcala nna ca benni ria le Jesús racatia gueni, laca se'ele ribedale aca unní nna gualun duelha tse'e tseele len Benni, bittu unle nu lä anca tsee lhe qui bittu acale nu te tulha gueni atti esía Ben-na. <sup>15</sup> Gualorexxa lele, Benni bananie ri-na len pasensiba ribeda Ben-na cumu raca le lhá iyá benni. Anáguauba rá lo ca sitsi udhelha betsiri Pablo bi'ini raquinri guebi len lebi'i, ca nu benbi locani leni elha rieni bete Tata Do Iyyabaaha lenbi. <sup>16</sup> Lo iyába ca sitsi beni bi'in-na rinnebi rulisabi le gue unní, gua liba nna se'e ttulhe ca tisa unnebi nu bittu cuenta anca tedeenri nu dia leque, denuala nna ca nu bittu gualíni chi ria lecani Tata Do Iyyabaaha ca nu rudú chupana lecani chi rotsíacana nu dia le ca tisa-na, attiguuba rotsíacana nu dia le adí ca tisa dia lo ca sitsi atta dia ca tisa gue Tata Do Iyyabaaha, de runcana aná nna la labacana rila guecani qui tsia nitticana.

<sup>17</sup> Larcala nna ca benni ria le Jesús racatia gueni, lebi'i nna chiba yuxaabale gue nu ria-ni, gualudo cuidadu qui bittu dhielhale dhiyie ca nu lä dutalequinna le, nianna udhanle ria tsitsi lele Tata Do Iyyabaaha. <sup>18</sup> Nu unlale nna gualunbia tsee chatti Jesús benni bodile ri-na lhe Benni bananie ri-na lhe gualuni tse'e tsitsi chattile adí len elha tsee betee Ben-na len lebi'i. ¡Benna cuequi xenrie nnanna lhe ttu dia liiba lhe! Amén.

# Sitsi primero beni Juan

**1** Runtu lo sitsi-ni rixxi'entu le gue benni chila do atti udulo ure yies lo yu-ni. Ri'itu bienintu nu re, aníga begüia lotue lhe benbiatue lhe utana gatue len ca nátu-n lhe. Benniha nua anque tisa rute elha nabani ttu dia lii gueri. <sup>2</sup>Benni anca elha nabaniha nna bisíe yies lo yu-ni qui bele'e loe len benni. Ri'itu nna bilentue, rixxi'atu guee lhe. Rixxi'entu le gue Benni rute elha nabani ttu dia lii-na. Benniha nna leni Tatahaba doe, lenla nna bisíe yies lo yu-ni qui bele'e loe len ri'itu. <sup>3</sup>Ri'itu nna rixxi'abintu le gue nu bilentu lhe bienintu lhe qui anáchu lebi'i nna acale benni se'e len ri'itu, attiba ri'itu ancatu benni se'e len Tata gueri do Iyyabaaha, leni Xi'inie Jesús Benni anque Cristu lhe. <sup>4</sup>Runtu unní lo sitsi, qui anáchu lebi'i nna edaca lele itú iqui itú lele.

## Ri'i nna raca duelha tsequiri lhe'e xieni

<sup>5</sup>Ca tisa-ni benniha bele'en Jesús ri'itu, ri'itu nna rixxi'atue len lebi'i. Tata Do Iyyabaaha anque xieni, ni saro'o chulha bittu te len Benniha. <sup>6</sup>Gansi ri'i innári: "Ri'itu se'etu len Tata Do Iyyabaaha, nianna requirbari lhe'e chulha nna nu run lebani ancari lania, cumu läga ancari nu runi nu anca gualí." <sup>7</sup>Ttiaca gansi se'ebari lhe'e xieni attiba Tata Do Iyyabaaha doe lhe'e xieni, lania nna guase'e tseeba len loesri. Reni gue Xi'inie Jesucristuha nna cue itú recha nu bittu anca tsee runri lo Tata Do Iyyabaaha.

<sup>8</sup>Gansi ri'i innári dequi lägabi nu lä anca tsee runri, la ri'iba nua rixú yieri. Lania nna läga ancari nu runi nu raxxína leni nu anca gualí. <sup>9</sup>Ttiaca gansi ri'i ridí ro'ori lo Tata Do Iyyabaaha ancari nu runi nu lä anca tsee, lee nna guadíbe elha xen lasi gueri, guaguabe iyánea nu lä anca tsee runriha lhe. Cumu anque Benni runie nu chi re, anque Benni runie ttaga'a nu anca tsee lhe. <sup>10</sup>Gansi innári dequi lägabi nu lä anca tsee chi benri, lania nna runbari dequi Tata Do Iyyabaaha anque Benni run lee. Leni unnuha nna rule'e lori läga gualí chi yu'u ca tisa gue Benniha lhe'e lastoori.

**2** Lebi'i, ca benni raca attiba xi'inia, runia unní lo sitsi qui bittu unle nu lä anca tsee lo Tata Do Iyyabaaha. Ttiaca gansi nux ttule uni nu lä anca tsee, gua doba Benni edí edenie le lo Tata gueri do Iyyabaaha. Benniha nua Jesucristu benni runi ttaga'a nu

anca tsee.<sup>2</sup> Lee nna berú iqui berú lee uttie, cumu leni elhutti gue Benniha liba nna bebe nu risa'ani Tata Do Iyyabaaha, anía liba nna dhie elha xen lasi gue ca tulha gueri. Bittu sunru ri'i dhie elha xen lasi gueri, anáguba dhie elha xen lhasi gue ca tulha gue ca bennise'e yies lo yu lhe.

**Raca duelha udori tisa gue nu beni  
Tata Do Iyyabaaha mandadu unri**

<sup>3</sup>Gansi gua rudori tisa gue nu beni Tata Do Iyyabaaha mandadu unri, laniarguaba nna yuri gualíba anca bienri Benniha.<sup>4</sup> Nu rána: "Neti anca biatia Benniha", nianna bittu rudona tisa gue nu beni Benniha mandadu unna nu run lebani anca nua, läga anca nua nu runi nu anca gualí.<sup>5</sup> Ttiaca benni rudo tisa gue nu beni Benniha mandadu unna unnuha rguaba nna gualínna raquinna gue Benniha. Anía liba nna yuri, ri'i nna guancabari benni du len Tata Do Iyyabaaha.<sup>6</sup> Benni rána duna len Benniha nna raca duelha unna atti ben Cristu atti güequie yies lo yu-ni.

<sup>7</sup> Ca benni ria le Jesús, racatia guele, benni runia lo sitsi-ni nna läga anca ben-na attu tisa cubi runia mandadu unle, la tisa-nba benniha bieninle primera. Tisa racale mandadu unle-ni nna anque tisa chi bieninle axta ttuha li.<sup>8</sup> Ttiaca nna benni runia lo sitsi-ni nna anque ttu tisa cubi runia mandadu aca, cumu Jesucristuha nna bele'e loe nu gualíga runi ca tisa-na mandadu aca, anáguba lebi'i lhe se'eguabale rule'e lole nu gualíga runi ca tisa-na mandadu aca. Cumu nu anca chulhaha nna chiba dia nua ritena, xieni benni anca gualíha nna chi rudanie.<sup>9</sup> Benni rána dequi gua dubana lhe'e xieni nna ttiaca rutía dirba leni benni nna unnuha nna atta chulhaba sna duba nua.<sup>10</sup> Benni raquinna gue adí benni nna unnuha duna lhe'e xieni. Larcala nna tsa lägabi te bixa unna ichecu nua qui unna nu bittu anca tsee.<sup>11</sup> Ttiaca nu rutía di leni adí benni nna lhe'e atta chulhaba du nua lhe requina lhe. Tsa läga yu nua gaxa diana cumu chulhaba chi benna nua attiba nu xua loni.

**Bittu unle nu lä anca tsee raca yies lo yu-ni**

<sup>12</sup>Guele unni runia lo sitsi-ni, lebi'i ancale attiba xi'into quia. De nu beni Jesucristuha nna chiba uxí Tata Do Iyyabaaha elha xen lasi gue ca tulha guele.<sup>13</sup> Runia lo sitsi-ni guele, lebi'i ca benni xeni, cumu lebi'i chi anca bienle Benni chi do atti chi dhu lola cue yies lo

yu-ni. Runia lo sitsi-ni guele lebi'i ca uncuiti cumu chi udále lo nu xxegüiha. Runia lo sitsi-ni guele, lebi'i ancale attiba xi'into quia, cumu chi anca bienle Tata gueri do iyyabaaha.<sup>14</sup> Benia lo sitsi-ni guele lebi'i ca benni xeni, cumu lebi'i chi anca bienle benni chi do atti chi dhu lola cue yies lo yu-ni. Benia lo sitsi-ni guele lebi'i ca uncuiti, cumu chi ancale nu re tsitsi leni. Lebi'i nna chi begüeelhale uta'a ca tisa gue Tata Do Iyyabaaha lhe'e lastoole, chi udále lo nu xxegüiha lhe.

<sup>15</sup> Bittu aquinle gue nu anca gue yies lo yu-ni, lä acaguabinle gue nu bittu anca tsee raca yies lo yu-ni lhe. Nu raquinna gue nu anca gue yies lo yu-ni nna läga raquin nua gue Tata gueri do iyyabaaha.<sup>16</sup> Cumu nu bittu anca tsee ridá lee cuerpu gueri-na unna nu ridá lee ca iyya lori-na iláquinna lhe nu runri ttaba len nu te gueri lhe iyába unní nna gue yies lo yu-ni bunni, läganu anca gue Tata gueri do iyyabaaha unní, nu anca gue yies lo yu-niba unní.<sup>17</sup> Yies lo yu-ni lenna iyába nu bittu anca tsee ridá le benni unna diaba na riluxana, ttiaca benni runi nu ru'u le Tata Do Iyyabaaha nna aca banba nua ttu dia lii.

### Gualdo cuidadu len ca nu bittu raca uyúcana Cristu

<sup>18</sup> Lebi'i ancale attiba xi'into quia, ura bunni chi daa isía. Lebi'i nna chiba binale dequi isía nu bittu raca uyúcana Cristuha. Gualíbña nna ixe ca nu bittu raca uyúcana Cristuha chi biría runcana dequi lacana ancacana Cristu. Denuala nna nuarca yuri chi daa isía ura.<sup>19</sup> Ca unná nna ri'iba biselacana, lenla nna beriescan ri, cumu läga gualí ucacana benni sela len ri'i. Ttirca gualíga ucacana benni baba len ri'i nna sa se'ebacana len ri'i nnanna. Anába uca qui bele'e lo läga iyá ca nu sela len ri'i ancacana benni baba len ri'i.<sup>20</sup> Ttiaca lebi'i nna chiba ulequiesi Cristuha le atti betee Espíritu gue Tata Do Iyyabaaha len lebi'i, larcala nna iyábale chi yule gue nu anca gualí.<sup>21</sup> Neti nna läga runia lo sitsi-ni guele de bittu anca bienle nu anca gualí, sinuqui runia lo sitsi-ni guele de chi yule gue nu anca gualí. Lebi'i nna gua yubale, tsa lägabi ttu nu bittu anca gualí riría lhe'e tisa anca gualí.

<sup>22</sup> ¿Nú nua anca nu run leni? Nu rána dequi Jesús, läga gualí anque Cristu. Unnuha nua ancana nu bittu raca uyúcana Cristu, lana nua rigu'u ni'ani Tata gueri do iyyabaaha lhe Xi'in Benniha lhe.

<sup>23</sup> Iyába ca nu rigu'u ni'acani Xi'ini Tata Do Iyyabaaha, läga se'e ca

nua len Tata Do Iyyabaaha. Nu ridí ro'oni anca bienna Xi'ini Tata Do Iyyabaaha nna duguaba nua leni Tata Do Iyyabaaha.<sup>24</sup> Larcala lebi'i nna gualorexxa lele ca tisa bieninle primera. Gansi nu rá ca tisa bieninle primera eya'an tsitsique lhe'e lastoole nna lania nna gua se'ebale len Tata gueri do iyyabaaha, leni Xi'ini Benniha lhe.<sup>25</sup> Benni nua tisa chi begüee Cristuha len ri'i, lee nna utee elha nabani gatta ttu dia lii gueri.

<sup>26</sup> Runia unní lo sitsi-ni atta rixxi'atia le gue ca nu requi rdacacana dhi yiecana le.<sup>27</sup> Ttiaca lebi'i nna yu'uba Espíritu gue Tata Do Iyyabaaha lhe'e lastoole, Benni bete Cristuha len lebi'i. Larcala nna lägabi reasinle nuxa ule'enna le, cumu Espíritu-nba rule'enie le iyába. Nu rule'e Ben-na ancana nu gualí, läga run le Ben-na. Larcala nna gualusigui gualtse'e len Cristu attiba chi bele'eni Espíritu gue Tata Do Iyyabaaha le.

<sup>28</sup> Nnanna nna lebi'i ancale attiba xi'into quia, gualtse'e len Cristuha, qui gansi chi beacaxxe Benniha nna ri'i nna xen su lee se'eri lania, qui bittu ettuinri atti utsá duri lo Benniha gansi chi besié.<sup>29</sup> Lebi'i nna chiba yule Jesucristuha nna anque Benni runi ttulapa nu anca tsee. Gua yuguabale nna iyába ca benni runi nu raxxína leni nu anca tsee runie, ancacana xi'ini Tata Do Iyyabaaha.

### Ri'i chi ancari xi'ini Tata Do Iyyabaaha

**3** Gualugüiarga, análirba de racani Tata Do Iyyabaaha gueri,  
axtaba xi'ini Tata Do Iyyabaaha chi teni Benniha lári. Gualíba chi ancari xi'inie. Denuala nna bittu radú le ca benni se'e yies lo yu-ni nuxa ancari, cumu bittu ancibiaquinna Tata Do Iyyabaaha.<sup>2</sup> Ca benni ria le Jesús, racatia guele, ri'i nna chi ancari xi'ini Tata Do Iyyabaaha, masquiba bittu chi yuri gattigasná eyacari, ttiaca ri'i nna chiba yuri gansi chi besía Cristuha, lania nna eyacari attiba anca Benniha, cumu lania nna ilenrie attiga anque.<sup>3</sup> Larcala nna iyába ca benni xen lecani Jesucristuha eyacacana anía, ca unnuha nna runcana qui acacana nu nari lo Benniha cumu Benniha nna anque Benni nari.

<sup>4</sup> Ttiaca iyába ca nu runi nu lä anca tsee ritsaba ca nua tisa gue nu beni Tata Do Iyyabaaha mandadu unri, cumu atti ritsari tisa gue nu beni Benniha mandadu unri nna tulhaba nua runri.<sup>5</sup> Lebi'i nna chiba yule Cristuha bite yies lo yu-ni qui utúe ca tulha gueri. Benniha nna tsa lägabi anque Benni te tulha guee.<sup>6</sup> Larcala

nna iyába ca benni se'e len Cristuha nna lärga run ca nua nu lä anca tsee, ttiaca iyába ca nu runi nu lä anca tsee nna läga chi yucana nuxa anca Benniha, niguaba lä ancabiaquinna Benniha lhe. <sup>7</sup>Lebi'i ancale attiba xi'into quia, bittu ugüelhale nuxa dhi yiena le: benni runi nu anca tseeha nna nu runi nu anca tsee lo Tata Do Iyyabaahaba anca nua, attiba Cristuha anque Benni runi ttulapa nu anca tsee. <sup>8</sup>Ttiaca nu runi nu lä anca tseeha nna gue nu xxegüihaba anca nua, cumu nu xxegüihaba nna desde primera roha li udulona runna nu lä anca tsee. Denuala nna bita Xi'ini Tata Do Iyyabaaha yies lo yu-ni bette tse'e loe nu runi nu xxegüihaba.

<sup>9</sup>Ni ttu ca benni chi ancacana xi'ini Tata Do Iyyabaaha bitturu rudona lecani uncana nu lä anca tsee, cumu elha nabani gue Benniha nna chi yu'e lhe'e lastoocani. Bitturguaba aca usiguicana uncana nu lä anca tsee lhe cumu chi ancacana xi'ini Tata Do Iyyabaaha. <sup>10</sup>Iyába ca benni bittu runi nu anca tsee lhe bittu racaquinna gue adí benni lhe läga anca ca nua gue Tata Do Iyyabaaha. Aná nna rule'e lo gaxa se'e ca benni anca xi'ini Tata Do Iyyabaaha, gaxa se'e ca benni anca xi'ini nu xxegüihaba lhe.

### **Ca benni ria lecani Jesús raquin gue loescani**

<sup>11</sup>Ca tisa-ni nua bieninle desdeba primera roha, ca tisa-ni nna ráque: aquin gue loesri tturi lhe atturi lhe. <sup>12</sup>Bittu acate attiba benni utá lani Caín. Lana nna bettina betsiniha cumu Caín ucana gue nu xxegüihaba. Nianna, ¿bi lo ni'a gue bettina nua? Bettina nua cumu lana nna ucana nu runi nu lä anca tsee, betsiniha nna benna nu anca tsee. <sup>13</sup>Ca benni ria le Jesús, bittu ebaninle gansi ca benni se'e yies lo yu-ni bittu raca uyúcan le. <sup>14</sup>Ri'i nna chiba yuri, chiba ulári lo elhuttiha, nnanna nna chi te elha nabani gueri ttu dia lii, cumu raquinri gue ca benni ria le Jesús. Ca nu bittuba racaquinna gue ca benni ria le Jesús, attiba nu yattiba anca ca nua lo Tata Do Iyyabaaha. <sup>15</sup>Iyába ca benni rutía di lecani ca benni, nu runi elhuttiha anca ca nua. Lebi'i nna gua yubale, ni ttu nu runi elhutti bittu aca banna ttu dia lii lo Tata Do Iyyabaaha. <sup>16</sup>Cristuha betee elha nabani guee qui uttie cuenta gueri. Anioca nna yuri gasná anca aquin gue loesri. Anáguaaba ri'i nna daa lori edí edenri ca benni ria le Jesús, masquiba gattiri cuenta guecabi. <sup>17</sup>Ttiaca gansi nux ttu benni gua te lenba guebi nna nianna rilenbi ttu benni ria le Jesús risá lobi, labi nna bittu satúa lebi bi'iniha utebi nu reasin

bi'iniha, bi'iniha nna läga gualínbi raquinbi gue Tata Do Iyyabaaha atti raquin Benniha gueri.<sup>18</sup> Lebi'i ancale attiba xi'into quia, bittu ni lo ni tisaba innári dequi raquinri gue ca loesri-na, sinuqui leni nu runri ule'e lori gualíguinri raquin gue loesri.

<sup>19</sup> Ganna unri aná, lania nna yu tseeri ancari benni baba len Tata Do Iyyabaaha benni rule'enie ri nu anca gualí, qui gansi chi betsá duri lo Benniha nna xen suba leri bittu bi te bixa lo ni'a gue udú xiyyan ri,<sup>20</sup> masquiba lastoori-na ruedelha iyyan ri dequi bittu run tseeri, ttiaca Tata Do Iyyabaaha la anque Benni ra xxeni ru lee atti lastoori-ni, Benniha anque benni yu iyárechatté.<sup>21</sup> Ca benni ria le Jesús, racatia guele, gansi lastoori-ni bittuba ruedelha iyyan ri nna guateba elha xen lasi lenri gansi chi betsá duri lo Tata Do Iyyabaaha.<sup>22</sup> Benniha nna gutebe iyába bixa innábari lenie gansi rudori tisa unri nu chi benie mandadu unri, gansi gua runri nu ru'u lee lhe.<sup>23</sup> Nu benie mandadu unri nna ancana: tsia leri xi'inie Jesucristu, aquin gue loesri lhe attiba chi benie mandadu unri.<sup>24</sup> Ca benni rudo tisa gue nu beni Benniha mandadu aca nna ca unnuha se'ecana len Tata Do Iyyabaaha, Benniha nna due len lacana. Ri'i nna yuri lee nna due len ri'i de do Espíritu guee-na lhe'e lastoori.

### Gaxasná unri qui tte deenri ga du nu run leni

**4** Ca benni ria le Jesús, racatia guele, bittu tsia lele gue iyá ca nu rávana dequi rixxi'acana ca tisa rute Espíritu gue Tata Do Iyyabaaha len lacana. Primer xa gualuni qui ttedeenle gansi gualí quin ca unnuha Espíritu gue Benniha nua yu'u lhe'e lastoocani, cumu ixeru ca nu run lecani chi requi yies lo yu-ni rávana dequi ancacana profeta gue Tata Do Iyyabaaha.<sup>2</sup> Aní unle qui ttedeenle ga du nu gualínna du Espíritu gue Tata Do Iyyabaaha len lana: Iyába ca nu ridí ro'ocani rávana Jesucristuha bite yies lo yu uque benni attiba ri'i, ca unnuha nua gualíba yu'u Espíritu gue Benniha lhe'e lastoocani.<sup>3</sup> Nu bittuba ridí ro'oni gualí uca Jesucristuha benni attiba ri'i atti bite yies lo yu-ni nna lägabi Espíritu gue Tata Do Iyyabaaha yu'u lhe'e lastoo nua, espíritu gue nu lä raca uyúna Cristuhaba yu'u lhe'e lastoo nua. Lebi'i nna chiba bieninle dequi isía nu lä raca uyúna Cristu, nnanna nna chiba requi nua yies lo yu-ni.

<sup>4</sup> Lebi'i ancale attiba xi'into quia, lebi'i nna ancale benni gue Tata Do Iyyabaaha. Chiba udále lo ca nu run lecani rávana dequi rixxi'acana ca tisa rute Tata Do Iyyabaaha len lacana, cumu Espíritu

do lhe'e lastoole-na nna xxenru ra lee atti nu xxegüi requi yies lo yu-ni.<sup>5</sup> Ca nu run leni requi-na nna benni gue yies lo yu-niba ancacana. Larcala nna nu anca gue yies lo yu-niba rinnecana. Ca benni anca gue yies lo yu-ni nna rudo nagacani guecani.<sup>6</sup> Ri'i nna ancabari gue Tata Do Iyyabaaha. Ca benni ancabiaquinna Benniha nna gua rudoba nagacani gueri, ttiaca ca benni bittu ancacana gue Tata Do Iyyabaaha nna läga rudo naga ca nua gueri. Aná nna ritedeenri ga duu nu chee Espíritu gue Tata Do Iyyabaaha rixxi'a nu anca gualí, ga duu nu chee be xxegüi rinne nu bittu anca gualí lhe.

### **Tata Do Iyyabaaha anque benni racanie gue ca benni**

<sup>7</sup> Ca benni ria le Jesús, racatia guele, aquin gue loesri tturi lhe atturi lhe cumu Tata Do Iyyabaaha runie aquin gue loesri. Iyába ca benni racaquinna gue adí benni nna ancacana xi'ini Tata Do Iyyabaaha, ancabiaquinna Benniha lhe.<sup>8</sup> Nu bittuba raquinna gue nuxaba benni nna läga ancabien nua Tata Do Iyyabaaha, cumu Tata Do Iyyabaaha anque benni racani gue ca benni.<sup>9</sup> Benniha nna bele'e loe racanie gueri atti udhelhe yies lo yu-ni Benni tturbe do anque Xi'inie qui gattie cuenta gueri. Anía liba nna gatta elha nabani gueri ttu dia lii.<sup>10</sup> Leni unní bele'e lo Tata Do Iyyabaaha racanie gueri. Läga ri'i udulori uquinri gue Tata Do Iyyabaaha, sinuqui Ben-naba ucanie gueri primero. Denuala nna udhelhe Xi'inie yies lo yu-ni qui uttie cuenta gueri, anía liba nna bebe nu risa'ani Tata Do Iyyabaaha qui ridíe elha xen lasi gue ca tulha gueri.

<sup>11</sup> Ca benni ria le Jesús, racatia guele, gansi análi raquin Tata Do Iyyabaaha gueri, anáguaba ri'i raca duelha aquin gue loesri tturi lhe atturi lhe.<sup>12</sup> Tsa läganu chi bilenna Tata Do Iyyabaaha. Ttiaca gansi ri'i raquin gue loesri tturi lhe atturi lhe lania nna gua duba Benniha len ri'i, nu racani Benniha gueri nna gualíga yu'e lhe'e lastoori.

<sup>13</sup> De chi bete Ben-na Espíritu guee len ri'i, nuarca chi yuri, lee due len ri'i, ri'i nna se'eri len lee.<sup>14</sup> Ri'itu nna begüiaga lotu, larcala nna rixxi'atu, Tata gueri do iyyabaaha udhelhe Xi'inie yies lo yu-ni qui odile ca benni se'e-ni, bittu tsia nitticana.<sup>15</sup> Nuxaba benni ridí ro'oni rána Jesús anque Xi'ini Tata Do Iyyabaaha, unnuha duna len Tata Do Iyyabaaha, Benniha nna due len lana.

<sup>16</sup> Ri'i nna chi yuri lhe chi ria leri lhe Tata Do Iyyabaaha racanie gueri. Tata Do Iyyabaaha anque Benni racanie gue ca benni ttu dia lii. Benni rusiguina raquinna gue adí benni, unnuha nua duna leni

Tata Do Iyyabaaha, lee nna due len lana. <sup>17</sup> Unní rule'e lo ri'i nna chi ancari benni gualígani racani gue ca benni, qui anáchu nna gansi chi bisía sá un Benniha elha uxtisi gueri nna bittu bi te bixa lo ni'a gue gasinri, cumu guase'ebari runri attiba beni Jesús atti udoe yies lo yu-ni. <sup>18</sup> Cumu Tata Do Iyyabaaha racanie gueri, nuarcala bittu rasinri. Nu yuna raquin Tata Do Iyyabaaha gueni nna läga rasin nua. Ca benni rasini rulaba lecani ute Tata Do Iyyabaaha elha disa guecani, cumu läga chi yu ca nua racani Tata Do Iyyabaaha guecani.

<sup>19</sup> Ri'i nna raquinri gue Tata Do Iyyabaaha, cumu Benniha ucanie gueri primero. <sup>20</sup> Gansi nuxa benni rána: "Neti racatia gue Tata Do Iyyabaaha", ttiaca rutía diba leni ca benni, unnuha nna nu güen lasiba nua. Cumu nu bittuba raquinna gue ca benni rilenna, ¿gasná aquin nua gue Tata Do Iyyabaaha benni bittu rilenna? <sup>21</sup> Unní beni Benniha ri mandadu unri: Benni raquinna gue Tata Do Iyyabaaha, anáguaba aquinna gue ca benni ria le Jesús.

### Ca benni xen suba lecani Jesús

**5** Iyába ca benni ria lecani Jesús anque Cristu, ca unnuha ancacana xi'iní Tata Do Iyyabaaha. Ca benni racaquinna gue Tataba nna racaguabaquinna gue ca xi'in Benniha. <sup>2</sup> Gansi ri'i raquinri gue Tata Do Iyyabaaha, runri nu benie mandadu unri lhe lania nna chi yuri ri'i nna gua racabinri gue ca benni anca xi'inie. <sup>3</sup> Atti rudori tisa gue Benni benie mandadu unri nna lania rule'e lori raquinri gue Ben-na. Nu benie mandadu unri nna läga anca ben-na ttu nu tsanni disinri unri. <sup>4</sup> Cumu iyába ca benni chi anca xi'iní Tata Do Iyyabaaha, rdacana ruchíacana bitturu runicana nu lä anca tsee te yies lo yu-ni. Cumu de ria leri Jesús, nuarcra rdári ruchíari bitturu runri nu lä anca tsee te yies lo yu-ni. <sup>5</sup> Sunruba benni ria leni gualí anca Jesús xi'iní Tata Do Iyyabaaha, rdana ruchíana bittu runna nu lä anca tsee te yies lo yu-ni.

### Espíritu gue Tata Do Iyyabaaha rixxi'e nuxa anca Jesús

<sup>6</sup> Jesús Benni anque Cristu bisíe yies lo yu-ni. Leni inda udi Benniha nna reni belali Benniha atti uttie nna bele'e lo nuxa anque. Läga sunru atti udi Benniha inda bele'e lo nuxa anque, anáguaba leni indaha lhe leni reni guee belalie atti uttie lhe. Espíritu gue Tata Do Iyyabaaha rixxi'e nu ria-ni, cumu Ben-na anque Benni rixxi'a nu

anca gualí.<sup>7</sup> Tsunna ca Benni se'e iyyabaaha rixxi'a gue Benni<sup>a</sup>: [Tataha lhe Xi'inie Benni anque tisaha lhe Espírituha lhe. Iyunnaba ca Ben-na ttuba ancaque.]<sup>8</sup> Iyunnaba ca Ben-ni rixxi'a yies lo yu-ni Jesús anque xi'ini Tata Do Iyyabaaha: Espíritu-na lhe atti udie inda lhe reni belalie lo ya crusiha lhe ttuba anca nu rá iyunnaque.<sup>b</sup> <sup>9</sup> Ri'i nna gua rutebari lidhaca nu rá ca benni se'e yies lo yu-ni, ttiaca dacaru nu rá Tata Do Iyyabaaha, cumu de cuinaga lee utixxi'e gue Xi'inie.<sup>10</sup> Benni ria leni Xi'ini Tata Do Iyyabaaha, unnuha yu'u ca tisa utixxi'a Benniha lhe'e lastooni. Nu bittuba ria leni gue nu rá Tata Do Iyyabaaha nna unnuha runna dequi anca Benniha nu run leni, cumu de bittu ria leni gue nu rixxi'a Benniha gue Xi'inie.<sup>11</sup> Ca tisa-ni benniha rixxi'a Tata Do Iyyabaaha: Lee nna chi bete elha nabani gatta ttu dia lii gueri. Elha nabaniha nua utee Xi'ini Benniha len ri'i.<sup>12</sup> Benni du Xi'ini Tata Do Iyyabaaha len lana, gua teba elha nabani gatta ttu dia lii gueni. Nu bittuba duna len Ben-na, lägabi elha nabani gatta ttu dia lii te gueni.

### Ni riluxa run Juan lo sitsi-ni

<sup>13</sup> Runia iyonni lo sitsi-ni guele lebi'i ca benni ria lele Xi'ini Tata Do Iyyabaaha qui chi yule gua teba elha nabani gatta ttu dia lii guele, [qui anáchu tsiaru lele Xi'ini Tata Do Iyyabaaha].<sup>14</sup> Ri'i nna xenba leri Tata Do Iyyabaaha, cumu gua yubari nna gansi innábari lenie nu radi lee dhíri nna güiyienbanie gueri.<sup>15</sup> Attiba chi yuri Benniha nna gua rienbanie gue bixa rinnabari loe, anáguaba chi yuri lee nna gunnabe nu chi unnabari lenie.

<sup>16</sup> Gansi nuxa ttule rilenle runi ttu ca benni ria le Jesús ttu nu lä anca tsee nu bittu quilana elhutti gueni lo Tata Do Iyyabaaha, lana nna innábana lo Benniha dhie elha xen lasi gue nu runi nu lä anca tseeha, Benniha nna gutebe elha nabani gue nua gansi bittuba anca nu lä anca tsee run nua nu quilana elhutti gueni. Cumu te ttu nu bittu anca tsee run benni nu bittu rilána elhutti gueri lo Tata

<sup>a</sup> 5:7 Lo yitsi-ni dia rá: “Tsunna ca benni runna lique nuxa anca Cristuha”, lo attu yitsi nna rá: “Tsunna ca benni se'e iyyabaaha riguixxi'aque nuxa anca Cristuha, delába Tataha lhe Tisaha lhe Espírituha lhe.”

<sup>b</sup> 5:8 Lo yitsi-ni dia rá: “Delába Espírituha lhe indaha lhe reniha lhe. Iyunnaba ca benni-ni ttuba riguixxi'aque gue Cristuha”, lo attu yitsi nna rá: “Tsunna ca benni se'e iyyabaaha riguixxi'aque nuxa anca Cristuha, delába Espírituha lhe indaha lhe reniha lhe. Iyunnabaque ttuba riguixxi'aque guebie.”

Do Iyyabaaha. Teeguaba nu bittu anca tsee run benni nu rilána elhutti gueni lhe. Neti nna läga rpea le gualinnaba len Tata Do Iyyabaaha dhie elha xen lasi gue ca nu runi nu bittu anca tsee rila elhutti guecani.<sup>17</sup> Iyába nu lä anca tsee runri ancana tulha lo Tata Do Iyyabaaha, ttiaca se'e ca nu lä anca tsee runri lägabi ancacana nu rila elhutti gueri.

<sup>18</sup> Ri'i nna gua yubari, iyába ca benni chi anca xi'ini Tata Do Iyyabaaha, lärga rusigui ca unnuha runcana nu lä anca tsee, cumu Jesús Xi'ini Tata Do Iyyabaahaba rape ca unnuha, nu xxegüihha nna lärgabi ridí yienca ca unnuha. <sup>19</sup> Ri'i nna yubari, ancabari gue Tata Do Iyyabaaha. Iyába ca benni se'e yies lo yu-ni ca nu bittu ria lecani Benniha nna nu xxegüihaba rinnabian cana. <sup>20</sup> Gua yuguabari nna Xi'ini Tata Do Iyyabaaha bisíe yies lo yu-ni qui betee elha rieni gueri qui benbiari Benni gualíga anca Tata Do Iyyabaaha. Ri'i nna se'eri leni Benni gualíga anca Tata Do Iyyabaaha cumu se'eri leni Xi'inie Jesús Benni anque Cristu. Lee anque Benni gualíga anca Dios, anque Benni rute elha nabani gatta ttu dia lii gueri lhe.

<sup>21</sup> Lebi'i ancale attiba xi'into quia, cuidadu gualdo. Bittu tsia lele ca nu bittu gualí anca diosi-na.

# Sitsi berupa beni Juan

**1** Neti, Juan bi'ini chi anca benniola, ridhelha sitsi-ni guelu xa nuila chi becuae Tata Do Iyyabaaha acalu guee lenlu ca xi'inlu-na. Neti nna gualíga racatia guele. Läga sunru neti racatia guele, anáguaba raquin iyába ca benni guele, ca bi'ini chi yu ca tisa gue Tata Do Iyyabaaha rixxi'a nu anca gualí. <sup>2</sup>Racatia guele de chi yu'u lhe'e lastoori ca tisa rixxi'a nu anca gualí gue Tata Do Iyyabaaha. Ca tisa rixxi'a nu anca gualí-na tsaba tsu'e lhe'e lastoori ttu dia liiba. <sup>3</sup>Tata gueri do iyyabaaha lenie Xi'inie Jesús Benni anque Cristu edá leque aca lenque le, esil'i leque le lhe uteque elha xen lasi lenle lhe. Unque aná len lebi'i cumu de ria lele gue nu anca gualí, de raquin gue loesle lhe.

## Usiguiri udori tisa gue nu bele'e Cristu

<sup>4</sup>Be'olhaba lasia atti guatti'aya ttulhe ca xi'inlu-na se'ecana runcana nu raxxína leni ca tisa rixxi'a nu anca gualí, attiba chi beni Tata gueri Benni do iyyabaaha mandadu unri. <sup>5</sup>Nnanna nna ca benni ria le Jesús, racatia guele, rinnaba lole, aquin gue loesle ttule lhe attule lhe. Unní läga ancana attu nu cubi runia mandadu unle, la ca tisa-nba benniha bieninri primeraha li. <sup>6</sup>Atti se'eri rudori tisa runri nu beni Tata Do Iyyabaaha mandadu unri, lania rule'e lori raquin gue loesri. Nu benie mandadu unri nna ancana: tse'eri aquin gue loesri. Ca tisa-nba benniha bieninri primeraha li.

<sup>7</sup>Cumu ixeru ca güen lasi chi requi yies lo yu-ni, bittu ria lecani uca Jesús Benni anque Cristu ttu benni attiba ri'i atti bite yies lo yu-ni. Ca nu rinne aná nna nu güen lasiba anca ca unná, nu lä raca uyú Cristuhaba ancacana. <sup>8</sup>Gualudo cuidadu qui lä unnnittle sina runle gue Tata Do Iyyabaaha, qui anáchu nna dhíle ida'a nu ralhale dhíle utee benniha len lebi'i.

<sup>9</sup>Nuxaba bittu rule'ena nu bele'e Cristu, lana nna attu nu subi la diana runna läganu Tata Do Iyyabaaha du len unnuha. Nu rusiguina rule'ena nu bele'e Cristuhu liba nna du lenna Tata gueri do iyyabaaha, du lenna Xi'in Benniha lhe. <sup>10</sup>Gansi nuxa ita ro'o yo'o atta se'eleha nna bittu rixxi'ana ca tisa bele'e Jesús, bittu ulabile nua lhe'e lisle, lä gaguale nua: "Daca aníla ute udo", <sup>11</sup>cumu

nu gána nua: “Daca aníla ute udo”, lania nna racana nu sela lhe'e nu bittu anca tsee runi unnuha.

### **Ni riluxa run Juan lo sitsi-ni**

<sup>12</sup>Ixeru nu racatia upea le, ttiaca bittu raca lasia unia na lo sitsi, cumu chi xen lasia ita atta se'ele-na, qui cuinaga neti inne lania lebi'i. Lania nna edaca leri itú iqui itú leri.

<sup>13</sup>Ca xi'ini xilalu, delába ca bi'ini chi becuee Tata Do Iyyabaaha acacabi benni guee, ridhelhacabi ttu padiuxi guele. Amén.

# Sitsi beyonna beni Juan

**1** Neti Juan bi'ini chi anca benniola, ridhelha sitsi-ni guelu, xa bi'ini lá Gayo. Neti nna gualíga racatia guelu.

## **Gayo ancabi bi'ini du tsee lebi**

<sup>2</sup>Xa benni ria le Jesús, racatia guelu, rinnaba len Tata Do Iyyabaaha qui attiba do tseelu len Benniha nna aníaguaba salía tseen lu leni iyába nu runlu, dho tseelu bittu bi dhacalu lhe.

<sup>3</sup>Be'olhaba lasia atti utixxi'en ca benni ria le Jesús bita-ni neti, lu nna gualíba du tsitsi lu lo neda gue Tata Do Iyyabaaha, rudolu tisa gue nu anca gualí rixxi'a ca tisa gue Ben-na lhe. <sup>4</sup>Bitturu attu bixa te unna eyo'oxxatta lasia, atti re'o lasia runa ca benni ancacana attisiba xi'inba, se'ecana rudocana tisa gue nu anca gualí rixxi'a ca tisa gue Tata Do Iyyabaaha.

<sup>5</sup>Benni ria le Jesús, racatia guelu, tsee juisionna runlu runlu yuda adí ca benni ria le Jesús. Lu nna chi rerlu bala'ana runlu aná leni ca benni dittu bittu anca bienlu. <sup>6</sup>Lacabi nna chi utixxi'acabi lo iyába ca benni ria le Jesús ritupa-ni, lu nna ancalu ttu benni racaxxattinlu gue ca benni. Benchicabi yuda leni nu reasaquinbi qui usiguicabi neda guecabi. Aná beni attiba re'o le Tata Do Iyyabaaha. <sup>7</sup>Cumu lacabi nna biríacabi diacabi rixxi'acabi ca tisa gue Jesucristu. Ca bi'in-na nna bittu ridícabi ni saro'o nu te gue ca benni dittu bittu ria lecani Tata Do Iyyabaaha. <sup>8</sup>Denua nna ri'i daa lori uteri nu reasaquinbi. Aná nna riselari lhe'e sina runcabi-na requicabi rixxi'acabi nu anca gualí gue Tata Do Iyyabaaha.

## **Nu beni Diótrefes**

<sup>9</sup>Neti nna chi benia lo ttu sitsi udhelha gue ca benni ria le Jesús ritupa naa, ttiaca Diótrefes-na de rdacaxxattana acana nu lo qui innabiana, nuarca bittu rudo nagani guetu. <sup>10</sup>Larcala nna gansi neti ita atta se'ele-na, lania nna quisaba na de biaca runna aná, cumu de requina rinne güena guetu. Lana nna bittu raca xen leni runna aná, bittuguuba rulabina ca benni ria le Jesús requi rixxi'a ca tisa gue Ben-na risina lhe'e lisni lhe lä rugüelhaguabana ca benni echecabi ca bi'in-na lhe'e liscabi lhe lana nna ruríalattebana ca bi'ini reche ca bi'in-na, bitturu rugüelhana iselacabi ca benni ria le Jesús.

<sup>11</sup> Xa benni ria le Jesús, racatia guelu, bittu unlu nu lä anca tsee run attu nu subi, beni nu anca tsee. Cumu nu runi nu anca tsee nna gue Tata Do Iyyabaahaba anca unnuha. Nu runi nu lä anca tseeha nna läga chi anca bien nua Tata Do Iyyabaaha.

### **Demetrio ancabi ttu benni runi nu anca tsee**

<sup>12</sup> Bi'ini lá Demetrio nna iyába ca benni rinnetseecana guebi. La nu tsee runbi naba rule'e lo ancabi benni tsee. Anáguaba ri'itu, ráguabatu, labi ancabi benni tsee. Lebi'i nna gua yubale ri'itu nna rinnebatu nu anca gualí.

### **Ni riluxa run Juan lo sitsi-ni**

<sup>13</sup> Ixeru nu racatia upea lu, ttiaca bittu raca lasia unia na lo sitsi,  
<sup>14</sup> cumu neti nna xen lasia gaxa uyúba loesri, qui inne lania cuinaga luu.

<sup>15</sup> Ca benni ancabienlu se'e-ni ridhelhacabi ttu padiuxi guelu. Anáguaba luu, bete ttu padiuxi guetu len ttuttu ca benni ancabienri se'e atta dolha. Tata Do Iyyabaaha aca lanie lu qui dholu xen su lee.

# Sitsi beni Judas betsi Jacobo

**1** Neti Judas betsi Jacobo, anca benni rixuu lo sina gue Jesucristuha. Ridhelha sitsi-ni guele lebi'i ca benni racani Benni anque Dios gueri-na guele lhe Benni anque Tata gueri lhe do iyyabaaha, ca benni chi uxie lo neda guee lhe. Anáguuba Jesucristuha, rapaguuba benniha le. <sup>2</sup>Cuina laque satúa chatti leque le, aca chaticanie guele lhe unque tse'ele xen su lee lhe.

## Bittu tsia lele gue ca nu run leni requi-na

(2 P 2:1-17)

<sup>3</sup>Ca benni ria le Jesús racatia gueni, neti nna tsitsiba chi re lasia unia lo sitsi qui quixxi'atia le gue gaxasná uca bodilá Tata Do Iyyabaaha iyáxeabari qui bittu tsia nittiri. Nnanna nna racatia raca duelha unia lo sitsi-ni qui idhelha na atta se'ele-na, atta rulisa le tse'e tsitsile len ca tisa chi ria leri-na, tsitsi gualedí gualedeni nu bodilá Ben-na ri bittu ugüelhale cu'u ni'a ca benni ben-na. Ca tisa-na ben-na nu desdeba ttua chi boca'ana Tata Do Iyyabaaha len ri'i ca benni chi anca guee. <sup>4</sup>Cumu sigába chi uta'a ttulhe ca benni runi nu lä anca tsee len lebi'i, ca unná nna desdeba atti nía chi rá lo ca sitsi gue Tata Do Iyyabaaha ralhabacana tsia nitticana. Lacana ancacana ca nu lä duta leni, chi rinnecana rácana: Tata Do Iyyabaaha chiba bodile ri. Denuala nna runri nu racaba leri. Nuarcala rigu'uguuba ni'acani Tata Do Iyyabaaha Benni tturbe doe anque Benni rinnabie ri lhe anáguuba runcana leni Jesucristu Benni bananie ri-na lhe.

<sup>5</sup>Lebi'i nna masquiba chi yule gue nu beni Tata Do Iyyabaaha, ttiaca neti nna raca lasia orexxa lele gue nu benie, lee nna dequide bebequie ca benni Israel lhe'e yiesi Egipto, belhuxaguabe ca benni bittu güia lecani guee. <sup>6</sup>Aníaguuba guate ca ingeli ca nu bittu begüee lidhaca ladicani begüee Tata Do Iyyabaaha cana, sinuqui bedhala iquicani atta begüee Benniha cana tse'ecana. Larca bedhea Tata Do Iyyabaaha cana ttu tsaba atta anca chulha, nía guayacana qui ttua tseecana aca elha uxtisi guecani gansi chi bisía sá uni Tata Do Iyyabaaha elha uxtisi gue ca benni se'e yiesi lo yu-ni. <sup>7</sup>La unnuha guaba guate ca benni use'e lhe'e ca yiesi lá Sodoma leni yiesi Gomorra, adí ca benni use'e lhe'e ca yiesi use'e gaxxaba

nía lhe. Ca unnuha nna tsaba bedona lecani güequi mannicana, bencana nu satsa bittu dica un benni len la loesi unbiyuuba cani lhe len la loes nUILABA cana lhe. Lo ni'a gue nua nna betee Tata Do Iyyabaaha ttu elha disa tsitsi guecani, bedelhe cana lo gui nu ttu dia liiba ralha-na. Unní nna ancana ttu nu ugüia iyába benni qui bittu uncana atti ben ca unnuha.

<sup>8</sup> Anágua sate ca benni rulisa-ni, ca nu sigába biselacana lebi'i. Lacana nna bitti bittiba runcana, cumu de bitsiequinna yielá uncana anía. Ca unná nna rutsiga cuerpu guecani leni nu satsa runcana, rigu'u ni'acani elha rinnabia gue Tata Do Iyyabaaha lhe riguecana iqui ca nu ra xxeni leni se'e iyyabaaha lhe. <sup>9</sup> Ni ingeli lá Migueli bi'iní anca nu lo gue ca ingeli se'e iyyabaaha, atti ritilhabí len nu xxegüiha qui nuxa leni eya'ana cuerpu gue Moisés bitti beaxinbi innábabi dhi nua elha disa ute Tata Do Iyyabaaha, sinuqui suntteba rábi nu xxegüiha: "Tata Do Iyyabaaha dhaca lanie lu." <sup>10</sup> Ttiaca gue ca benni rulisa le-ni, gue iyába nu bittu radú lecani rinne güecana. Lacana nna attiba runi ttu nimala nu bittu elha rieni gueni te runcana, suna nu racaba le cuerpu guecani runcana. Unnuha nna sunruba rixuu nua runna qui tsia nitticana.

<sup>11</sup> ;Carusí'irucana cumu diacana runcana attiba beni Caín! De dhicana belhi nna runcana nu lä dica uncana attiba Balaam, lacana nna gattibacana attiba utti Coré, unnuha nna uluxabana de bittur bedona tisa gue Tata Do Iyyabaaha, <sup>12</sup> Ca unná nna sunruba runcana rettuinle lo ca laní runle gue de se'e tsee len loesle. Tsaba bittu rapacana respeto, ladiaba ru'ucana ri'a rocana attiba racaba lecani. Lacana nna ancacana nu rulaba leni suntteba gue nu anca guecani. Ancabacana attiba ttu bea bisi bittu chee iyya nu gatti laduba che be-na, attiba ttu yaga nu bittu ribía gueni atti dica cuia gueni lhe attiba ttu yaga nu chi ilupilana nucala ubisi itupa lhu-ni lhe. <sup>13</sup> Lacana ancacana attiba inda run disa xatta ridú lí lo indattoo-na, nu lä anca tsee runcana ancana attiba besina gue nu satsa rettelequi nu ridú lí lo indattoo-na ro'o indattoo-na. Ancabacana attiba beli biganna nu bittu anca lo ga ladu diana, lacana chiba ga'ana tsequicana ttu tsaba atta anca chulha bexcu gue atta chulha-na.

<sup>14</sup> Anágua Enoc, bi'iní uca nu gasi libixxi uli dequide Adán, utixxi'aguabi gue ca unní len ca tisa bete Tata Do Iyyabaaha len labi, atti unnebi rábi: "Gualgüiarga, chi dedaa Benni bananie ri-na leni ixe mili ca ingeli guee, <sup>15</sup> qui unie elha uxtisi gue iyába ca

benni, utee elha disa ralha ca nu lä duta leni gue iyá nu satsa runcana lhe gue iyába ca tisa idí unne ca nu lä du ta leni runi nu lä anca tsee-na atti unne güecana gue Ben-na lhe.”<sup>16</sup> Lacana nna ancacana nu iyába bittu ru'u leni, gue iyába rinne güecana lhe suna nu re'oba lecani raca lecani aca, ttaba lhabacana len ca tisa rinnecana lhe ocadiba lhe'e lhaba daa ro'ocani rinnecana gue ca benni qui ridacana ridícana nu raca lecani dhicana.

### **Tsitsi gualtse'e lo neda gue Tata Do Iyyabaaha**

<sup>17</sup> Ttiaca lebi'i ca benni ria le Jesús racatia gueni, gualorexxa lele gue nu chi rá ca bi'ini bedheti ca tisa bele'e Jesucristu Benni bananie ri-na.<sup>18</sup> Lacabi nna rácabi le: “Atti isía ca sá lhuxa, tse'e ca benni edacalaquinna gue Tata Do Iyyabaaha, tsequicana uncana nu lä anca tsee racaba lecani lhe.”<sup>19</sup> Ca unnonna rilácana elha utilha gue ca benni qui rilha'acana lhe'e loescani, suna gue nu anca gue yies lo yu-niba do lecani runcana, cumu bittu yu'u Espíritu gue Tata Do Iyyabaaha lhe'e lastoocani.

<sup>20</sup> Ttiaca lebi'i ca benni ria le Jesús racatia gueni, gualusigui gualtsia tsitsi chatti lele gue nu chi ria lele anca gue Tata Do Iyyabaaha. Attiinnele len Ben-na, Espíritu gue Ben-na quixxi'enie le bixanca nu innále.<sup>21</sup> Satía gualtse'e gualuxxen lele gua racabani Tata Do Iyyabaaha guele, gualtse'e gualcueda isía sá atti utee Jesucristu Benni bananie ri-na elha nabani gatta ttu dia lii guele de guatúa le Ben-na le.

<sup>22</sup> Gualuse'e tsitsi lo neda gue Tata Do Iyyabaaha ca benni rudú chupana lequinna.<sup>23</sup> Adícana nna gualodilá cana, qui bittu tsiacana lo gui gue atta lexúaha, attu lhecania nna gualsatúa lele cana, gueba nna gualdo cuidadu qui lä iyietile unle atti run ca unná, lebi'i nna axta xocani bitsiga gue nu satsa runcana ixxinle.

### **Tata Do Iyyabaaha anque benni ra xxeni lee**

<sup>24</sup> Xxeni ra lee Tata Do Iyyabaaha. Lee uyúe le qui bittu inittile lo neda guee, aná nna attulade redaca lele atti utsadúle lo atta ga'ana tsee do Ben-na bitturu ancale tsiga lo Ben-na.<sup>25</sup> Tturba Ben-na do anque Dios te elha rieni guee. Lee bodile ri de nu guate Jesucristuha. Tata Do Iyyabaaha anque Benni ra xxeni lee, Benni ru'u xieni ga'ana tsee guee lhe Benni ra tsitsi lee lhe Benni rinnabia lhe. Anába anque atti deobali cue yies lo yu-ni, anába anque nnanna lhe anába aque ttu dia liiba lhe. Amén.

# **Ca tisa-ni riguixxi'aque gue nu chi dabigana aca**

**1** Ca tisa dia lo sitsi-ni rixxi'a gue nu beni Tata Do Iyyabaaha bele'eni Jesús, qui lee nna unie ule'eni ca benni rixuu lo sina guee gue nu chi daa ribiga aca. Jesucristuha nna udhelhe ttu ingeli guee qui bele'e lobi iyá unní len neti Juan bi'ini rixuu lo sina guee.<sup>2</sup> Neti nna rixxi'aba gue iyába nu bele'etia. Lo sitsi-ni runia ca tisa unne Tata Do Iyyabaaha, nu beni Jesucristuha bele'etia. <sup>3</sup> Carbáru ca benni rulabacabi ca tisa dia lo sitsi-ni, ca tisa rixxi'a gue nu chi daa aca. Carbáru ca benni rudo nagacabi Ben-ni lhe rudocabi tisa gue nu dia lo sitsi-ni lhe cumu chi daa ribiga aca nu rá loe.

## **Juan ridhelhabi sitsi gasi re atta se'e ca benni ria le Jesús**

<sup>4</sup> Neti Juan ridhelha sitsi-ni gasi re atta se'e ca benni ria le Jesús lo yu gue Asia. Tata Do Iyyabaaha Benni do nnanna lhe Benni ttu dola lhe Benni dho tiempu chi daba lhe anáguaba a gasi ca espíritu se'e daca lo xxila atta doe rinnabie lhe cuina laque aca lenque le, uteque elha xen lasi lenle lhe. <sup>5</sup> Anáguaba uni Jesús Benni anque Cristu len lebi'i. Lee anque benni rixxi'a nu anca gualí, anque Benni primerba beadhe lhe'e baa atta yu'u ca nu yatti-na lhe anque Benni rinnabia ra xxeni lee gue de lo iyá ca nu rinnabia se'e yies lo yu-ni lhe. Lee nna racanie gueri. Leni reni guee bilali atti utee lo ya crusiha nna bodile ri lo ca tulha gueriha. <sup>6</sup> Lee nna benie acari nu rinnabia, bixxudi lhe qui ixuuri lo Tata Do Iyyabaaha Benni anca Tata guee. Jesucristuha satía gárie: “¡Lu ancalu Benni ra xxeni lee ttu dia lii, Benni rinnabia xeni lhe!” Amén.

<sup>7</sup> ¡Gualúnarga ni, Jesucristuha dedee lhe'e bea-na!

Iyá recha benni iláquinna Benniha.

Ca nu betticana Benniha lhe iláguabaquinne.

Iyába ca benni se'e yies lo yu-ni

cuescana de elenquinna gansi chi biláquinna Benniha.

Gualíba aníaba aca. Amén.

<sup>8</sup> “Neti anca Benni du atti udulo lhe Benni du atti lhuxa lhe attiba letra A lenna letra Z”, aná rá Tata Do Iyyabaaha Benni bananie ri. Lee anque Benni do nnanna Benni ttu dola lhe Benni dho tiempu chi daba lhe anque Benni raxxatta tsitsi lee lhe.

### Juan bilenbi Cristu benni ra xxeni lee

<sup>9</sup> Neti Juan, anca benni ria le Jesús attiba lebi'i. Rugo ruchíaya lo elha disa ruyúa attiguaba lebi'i de ria leri Jesús, anáguaba ttuba se'eri ribedari isía sá innabia Tata Do Iyyabaaha. Níaba doa lo yu nu te láni Patmos re lagüi indattooha atta guaca'ancana neti lo ni'a gue de requia rixxi'aya ca tisa gue Tata Do Iyyabaaha, de rixxi'aya gue nu beni Jesús lhe. <sup>10</sup> Atti bisía anca sá gue Benni bananie ri-na, Espíritu gue Tata Do Iyyabaaha bisíattebe uyu'e itúba lhe'e cuerpu quia, nianna bienttebatia tsi'i ttu benni daca cu'ela unnee idisa attiba ttu atta rigu'u tsi'i ttu trompeta. <sup>11</sup> Benni unneeha nna re neti:

[—Neti nua anca Benni du atti udulo lhe Benni du atti lhuxa lhe attiba letra A lenna letra Z.] Beni lo sitsi nu rilenlu-ni, nianna udhelha na gasi re atta se'e ca benni ria le neti lo yu te láni Asia, delába lhe'esi Éfeso lhe Esmirna lhe Pérgamo lhe Tiatira lhe Sardis lhe Filadelfia lhe Laodicea lhe.

<sup>12</sup> Atti bodequi loa qui ilátia nux benni nua rinnee len neti nna bele'ettebatia gasi ca candeleru ancacana leni oro ralha gui lhe'ecani. <sup>13</sup> Lagüi gue gasi ca candeleruha nna bilátia du ttu benni rule'e attiba rule'e Benni unbiyuu daa iyyabaaha. Nucue ttu xalhoo risíana axtaba lo ni'e, ro'o lastooe nna xica ttu cinchu ancana leni oro. <sup>14</sup> Iquie leni itsiquie nna ancana sitsi chabeatto nisiha attiba itsa xo carne'e sitsi, attiba beya lhe. Ca iyya loe nna ancacana attiba belha gue gui. <sup>15</sup> Ca ni'e nna ru'uni xieni guecani de racalaabacana attiba ttu iyya te láni bronce nu chi güia lhe'e ornu chi bixí tulapa qui beacana taga'a iyya tsee. Tsi'i Benniha nna rienie idisa attiba rieni tsi'i ttu yoo atta daxxatta idila inda. <sup>16</sup> Leni ná derechu guee nna denie gasi ca beli. Ro'e nna riría ttu espada ttutsi ria irupa laduba ro'oni. Loe nna raca la attiba lo tatubisa-na gansi chi rutie idí.

<sup>17</sup> Atti bilátia Benni nna attiba binna ttu nu yatti biyinna loe. Ttiaca Benni nna bexxúatteba ná derechu guee iquia, nianna re neti:

—Bittu gasinlu. Neti nua anca Benni do primero, Benni do ttu dia liiba lhe <sup>18</sup> anca Benni do baniha lhe. Neti nna uttiba, ttiaca nnanna nna anca Benni anca bani ttu dia lii. Neti denia ca yagüi gue elhuttiha, gue atta se'e ca nu yatti-na lhe. <sup>19</sup> Beni lo sitsi nu chi bilenlu, nu raca nnanna lhe nu chi acala lhe. <sup>20</sup> Unní diani gasi ca beli bilenlu denia leni ná derechu quia, a gasi ca candeleru anca

leni oro-na lhe. Gasi ca beli-na ancacana gasi ca ingeli ruyúcabi ca benni ria lecani neti se'e lhe'e gasi ca yies-na, gasi ca candeleru-na nna ancacana ca benni ria lecani neti se'e lhe'e gasi ca yies-na.

**Sitsi-ni nua udhelha Juan atta se'e ca benni  
ria lecabí Jesús se'e lhe'esi Éfeso**

**2** <sup>3</sup>Beni lo sitsi-ni udhelha gue ingeli rapa ca benni ria lecani neti se'e lhe'e yiesi Éfeso, gus cana: “Aní rá Jesús Benni deni gasi ca beliha leni ná derechu guee, Benni requie lagüi gasi ca candeleru anca leni oroha lhe. <sup>2</sup>Neti nna yuxeba gue iyába nu runle. Gua yuguaba, lebi'i nna tsitsiba ratele runle sina gue Tata Do Iyyabaaha, anáguaaba gua ruchíabale lo nu ratele lhe. Gua yuguaba nna lebi'i nna bittu ruchíale lo nu runi ca nu runi nu lä anca tsee-na. Lebi'i nna chi ulu'ubiale ca nu rácana ancacana apóstol gue Tata Do Iyyabaaha, ttiaca läga gualíquinna, biexxubinle cana run lecani. <sup>3</sup>Anáguaaba chi bechíale lo nu ratele lhe chi biyúle elha disa lhe lo ni'a quia. Lebi'i nna bittu bedhanle ria lele neti. <sup>4</sup>Ttiaca te ttu nu bittu radi lasia runle, lebi'i nna lärgaga raquinle quia nnanna atti uquinle quia atti chi udulobale ria lele netiha. <sup>5</sup>Larcala nna gualodhá lele, galiga unná chi besinle deyyale readi gále lo neda quia. Gualodú xiyyanle nna gualodaxxu neda gue Tata Do Iyyabaaha, gualedú lo gualuni gaxasná benle primera. Gansi bittuba odú xiyyanle nna itaba ettettuaya candeleru guele-na atta dona. <sup>6</sup>Ttiaca te ttu nu re'o lasia runle, lebi'i nna bittu raca uyúle nu runi ca benni te lácani nicolaítas-na, nu bittuguaba raca uyúa. <sup>7</sup>Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti. Ca benni dhacana uchíacana lo iyá nu satecana lo ni'a quia nna ca unnuha nua ugüea cana nu xixxi sia lo ya ga'a rute elha nabani ttu dia lii qui gocana. Ya ga'aha nua duna salhe gue lo yu ga'ana tsee gue Tata Do Iyyabaaha.”

**Sitsi-ni nua udhelha Juan atta se'e ca benni ria  
lecabí Jesús se'e lhe'e yiesi Esmirna**

<sup>8</sup> ‘Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Esmirna, gus cana: “Aní rá Benni udo primerba lhe Benni do ttu dia liiba lhe Benni uttie nna beacanie attu libe. <sup>9</sup>Neti nna gua yuba gue iyába nu runle, gue chi ratele ruyúle elha disa lhe gue ancale benni bittubi te gueni lhe ttiaca lo

Tata Do Iyyabaaha nna ancale benni te gueni. Gua yuguaba nna ca nu rácana ancacana benni Israel-na, rinne güecana guele. Ca unná nna läga ancacana benni gue Tata Do Iyyabaaha, benni gue nu xxegüihaba anca ca unná.<sup>10</sup> Bittu gasinle lo nu satele, cumu nu xxegüiha nna unna udelhacana ttu chupale lisiyya quini tsu'ubia le, delo tsii (10) ubisa satele uyúle elha disa. Lebi'i nna tsitsi gualtse'e, masquiba uttican le, neti nna guteba elha nabani gatta ttu dia lii guele, Benniha anque corona utea guele.<sup>11</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti. Ca benni dhacana uchíacana lo iyá nu satecana lo ni'a quia nna tsa läga uyú ca nua elhutti berupaha, nu uni gatti ca benni ttu tsaba.”

**Sitsi-ni nua udhelha Juan atta se'e ca benni ria  
lecabi Jesús lhe'e yiesi Pérgamo**

<sup>12</sup> 'Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Pérgamo, gus cana: “Aní rá benni deni espada ttutsi ria irpa ladu ro'oniha.<sup>13</sup> Neti nna gua yuba gue nu runle, gue gaxunna se'ele lhe. Lebi'i nna se'ele atta du xxila rido nu xxegüiha rinnabiana. Läquiga de unnuha, lebi'i nna tsitsiba se'ele len neti. Läga rudhanle ria lele neti, ni atti betticana Antipas bi'ini uca nu rudo tisa utixxi'a ca tisa quia-na. Labi nua betticana lo yu atta se'ele-na atta rinnabia nu xxegüi-na.<sup>14</sup> Ttiaca se'e ttu chupa nu bittu radi lasia runle. Len lebi'i se'e ttu chupa ca nu bittu raca lecani odha'ancana nu bele'e Balaam. Lana nua ulu'u tisana Balac. Unnuha nna benna beni ca benni Israel nu bittu anca tsee de utocana bela gue ca nimala betticana betecana úna lo ca nu bittu gualí anca diosi, uxí yiena ca nua betsá ro'ocani nutti nuttiba lhe.<sup>15</sup> Se'eguaba len lebi'i ttu chupa ca nu rudocana tisa gue nu rule'e ca nu te lácani nicolaíta-na, [nu bittu raca uyúa].<sup>16</sup> Denuala nna gualodú xiyyanle gualequi gualodaxxu neda gue Tata Do Iyyabaaha, gansi bittuba nna guadá tte gaba atta se'ele-na qui itilha lania ca unná leni espada riría ro'a-ni.<sup>17</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti. Ca benni dhacana uchíacana lo iyá nu satecana lo ni'a quia nna neti nna ugüea cana elha go te láni maná te gatsiha. Ugüeguaba cana ttu iyya sitsi chica'a. Lo iyyaha nna dia ttu lá cubi nu tsa nuttu nu chi ancabiani, sunruba nu dhína nua yuna bixa dia loni.”

**Sitsi-ni nua udhelha Juan atta se'e ca benni  
ria lecabí Jesús lhe'e yiesi Tiatira**

<sup>18</sup> 'Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Tiatira, gus cana: "Aní rá Xi'ini Tata Do Iyyabaaha, Benni anca ca iyya loe attiba belha gue gui, ca ni'e nna ru'uní xieni gueque de racalaabaque, attiba ttu iyya te láni bronce de chi bixína ttulapa. <sup>19</sup> Neti nna yuxeba gue iyába nu runle. Gua yuba lebi'i nna ancale benni racani gue ca benni, tsitsiba ria lele neti lhe runle yuda ca benni lhe ruchíale lo nu ratele lhe. Guayúguaba nna lebi'i nna tseeru runle nnanna attí atti chi udulobale ria lele neti. <sup>20</sup> Ttiaca te ttu nu bittu radi lasia runle. Lebi'i nna rugüelhabale selá nuila lá Jezabel nu rána dequi ancana profetisa gue Tata Do Iyyabaaha len lebi'i. Unná nna leni nu rule'ena ridí yiena ca benni runi sina quia-na utsá ro'ocani nutti nuttiba, gocana bela gue ca nimala rutticana rigu'ucana úna gue ca nu bittu gualí anca diosi-na lhe. <sup>21</sup> Neti nna isá chi uca ribeda na qui odú xiyyanna udaxxuna neda gue Tata Do Iyyabaaha, ttiaca lana nna bittu raca leni, bittuguaba rodha'anna nu risána nutti nuttiba lhe. <sup>22</sup> Lo ni'a gue unnuha nna unia gani Jezabel-na gattana lo ta'a isá. Ca nu runi nu satsa runi unná nna utea ttu elha disa lä tsu'ubia guecani gansi bittuba odú xiyyancana udhancana uncana nu runi nuila-na. <sup>23</sup> Uttiguaba ca xi'ini Jezabel-na lhe delába ca nu bideti runi atti runi unná. Anía liba nna qui ttedaani iyáxea ca benni ria lecani neti, neti nna anca nu yu iyáxeaba bixa rulaba lecani lhe bixa racaquinna lhe. Larcala nna cua ttuttubale utea nu ralhale dhíle gue nu benle. <sup>24</sup> Adíle ca benni se'e lhe'e yiesi Tiatira-na, ca nu bittu rudo tisa gue nu rule'e Jezabel-na, bittuguaba chi yule gue nu rá ca unná anca elha rieni gue nu xxegüiha lhe. Neti nna lärgabi rinnaba unle attu bixarua, <sup>25</sup> suntteba gualusigui gualtsia tsitsi lele neti, axta liba atti esíaya. <sup>26</sup> Ca benni dhacana uchíacana lo iyá nu satecana lo ni'a quia, ca nu usigicana udocana tisa quia uncana nu raca lasia axta atti isía sá lhuxa, neti nna utea derechu guecani acacana nu innabia ca benni se'e lhe'e ca yiesi se'e yies lo yu-ni. <sup>27</sup> Attiba neti bete Tata quiaha derechu quia anca nu rinnabia, anáguauba lacana tsitsiba uncana innabiacana ca benni, attiba ttu nu ruduya yedhu yu uduyacana ca unná. <sup>28</sup> Ugüeguaba cana beli

güedíla-na lhe. <sup>29</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti.”

**Sitsi-ni nua udhelha Juan atta se'e ca benni  
ria lecabí Jesú's lhe'e yiesi Sardis**

**3** 'Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Sardis, gus cana: “Aní rá Jesú's Benni bananie gasi lo nu anca Espíritu gue Tata Do Iyyabaaha, Benni denie gasi ca beli lhe. Neti nna yuxeba gue iyába nu runle. Ca benni nna rácana dequi lebi'i nna ancale benni yu'u elha nabani gueni, ttiaca neti nna yua lebi'i nna nu yattiba ancale. <sup>2</sup> Gualebani, tsitsi gualse'e, gualedulo gualeoni attu libe nu tsee tsaba chi diale rudhequile na, cumu neti nna chi bilátia, läga anca nu runle-na nu radi lee Tata Do Iyyabaaha. <sup>3</sup> Gualorexxa lele gue nu rá ca tisa chi bieninle-na lhe gue nu chi bidetile lhe. Unnuha gualusigui gualuni. Gualodú xiyyanle gue nu runle-na, gualequi gualodaxxu neda gue Tata Do Iyyabaaha. Gansi bittuba tse'ele tennále nna iyyaba lele esíaya guele attiba ttu ubana, bittu yule nucaxa isíana guele. <sup>4</sup> Ttiaca gua se'erba attu chupa ca benni sela len lebi'i lhe'e yiesi Sardis-na bittu chi bitsigacabi cumu bittu runcabi nu lä anca tsee. Ca bi'in-na nna ralhacabi tsequicabi len neti nucu xo sitsi guecabi de bencabi nu anca tsee. <sup>5</sup> Ca benni dhacana uchíacana lo iyá nu satecana lo ni'a quia nna ugucuacana xo sitsi, tsa bittu oxía lácani lo libro atta dia lá ca benni gatta elha nabani guecani ttu dia lii. Neti nna dhi ro'a ancabiati cana lo Tata quiaha lhe lo ca ingeli gue Benniha lhe. <sup>6</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti.”

**Sitsi-ni nua udhelha Juan atta se'e ca benni ria  
lecabí Jesú's lhe'e yiesi Filadelfia**

<sup>7</sup> 'Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Filadelfia, gus cana: “Aní rá Jesú's Benni do riesi anca gue Tata Do Iyyabaaha, Benni gualíga anque Cristo. Lee denie yagüi gue David bi'ini uca nu rinnabia. Benniha nna nuttu nu te dhana idhalna atta rottoe, nuttuguaba nu te dhana ottona atta ridhalie lhe. <sup>8</sup> Neti nna yuxeba gue iyába nu runle. Gualgüiarga, neti nna chi udhalia puerta guele nu nuttu nu te dhana odheana. Masquiba bittu runle tsitsi de bittu raca ixele, ttiaca bedobale tisa

gue nu rpeale, bittuguaba chi bedhea lele lä dhi ro'ole ancabienle neti lhe.<sup>9</sup> De unnuha nna ca nu anca gue nu xxegüiha ca nu run lecani rávana ancacana benni Israel, ttiaca läga gualíquinna ancacana benni becuae Tata Do Iyyabaaha, neti unia itacana ettedú xibicani lole qui tti ugüiacana lebi'i ancale ca nu racatia gueni.<sup>10</sup> De bedole tisa gue nu benia mandadu unle bego bechiale lo nu guatele, bittu bedhanle ria lele neti lhe denua nna neti nna guapaba le gansi chi bisía sá uyú ca benni se'e yies lo yu-ni elha disa qui tsu'ubiacana.<sup>11</sup> Neti nna ya mertte eta. Gualudo lele gualtse'e tsitsi lo neda quia-na qui bittu ettettua attu nu subi nu tsee ralhale dhile-na.<sup>12</sup> Ca benni dhacana uchíacana lo iyá nu satecana lo ni'a quia, neti unia acacana attiba ca pilari gue yotu gue Tata Do Iyyabaaha benni anque Dios quia. Lacana nna tsa lärgaga eríacana lhe'e yotuha. Lastoocani nna unia lá Tata Do Iyyabaa quiaha, lá yiesi gue Benniha lhe delába Jerusalén cubi daa iyyabaaha, yiesi nu idhelha Benniha yies lo yu-ni. Unguaba lá cubi quia lastoocani lhe.<sup>13</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti.”

**Sitsi-ni nua udhelha Juan atta se'e ca benni ria  
lecabí Jesú斯 lhe'e yiesi Laodicea**

<sup>14</sup> 'Benguaba lo sitsi-ni udhelha gue ingeli rapa ca benni ria lecani neti se'e lhe'e yiesi Laodicea, gus cana: “Aní rá Jesú斯 Benni lá Amén. Benni rixxi'a nu anca gualí gue Tata Do Iyyabaaha, Benni rinnee nu anca gualí lhe. Benni beni leni Tata Do Iyyabaaha iyáxeaba nu se'e yies lo yu-ni lhe iyyabaaha lhe.<sup>15</sup> Neti nna yuxeaba gue iyába nu runle. Gua yuba, lebi'i nna lä rise'e tsitsiguale itú iqui itú lele lo neda gue Tata Do Iyyabaaha, lä readi gaguale ttu tsala lo neda gue Ben-na lhe. ¡Locala ttirca ttu tsala eyadi gále o ttu tsala tse'e tsitsile itú iqui itú lele lo neda gue Ben-na!<sup>16</sup> Ttiaca cumu de ancale nu guacala tse'e tsitsile, nu guacala bittu lhe de ancale nu yu'u ttu caaba leni, nuarca cu'unaba le nnanna.<sup>17</sup> Lebi'i nna rále: Ri'itu ancatu nu te gueni. Tsapa tsee ralíana ri'itu. Tsa lägabi reasintu. Ttiaca bittu ritedeenle, lo Tata Do Iyyabaaha nna ancale nu bittu se'e tsee, nu rigu'u ni'a benni lhe benni di lhe nu xua loni lhe nu ttunntu lhe.<sup>18</sup> Larcala nna neti rpea le, gualtá len neti gualgo'o oro nu chi beoni gui taga'a nu tsee, qui acale nu gualígiga te gueni. Anáguba gualtá len neti gualgo'o xo sitsi guele ucule

qui eyaya lo nu rettuinle de ancale nu ttunttu. Len neti gualtá gualgo'o ramedi ca'a lole qui ilenle lhe.<sup>19</sup> Neti nna iyába ca nu racatia guecani nna rísa cana lhe rose'e lhixxa cana lhe. Larcala nna gualequi gualtsia lele Tata Do Iyyabaaha itú iqui itú lele, gualodú xiyyanle gue nu lä anca tsee runle-n lhe.<sup>20</sup> Gualgüiarga, neti nna dua ro'o puerta-ni rinnea. Gansi nuxa iyieninna tsi'a nna idhalna puerta-na, neti nna ga'aya atta donaha qui ttulapaba go rse lania na.<sup>21</sup> Ca benni dhacana uchícana lo iyá nu satecana lo ni'a quia, neti nna unia qui cuiacana len neti lo xxila atta doa rinnabiaya, attiba neti chi udáya, denuala nna doa lenia Tata quia-ni lo xxila atta doe rinnabie.<sup>22</sup> Atta rieninle nu ria-ni, gualdo nagale gue nu rá Espíritu gue Tata Do Iyyabaaha ca benni ria lecani neti.”

### **Juan bele'enbi iyyabaaha atta do Tata Do Iyyabaaha rinnabie**

**4** Dequide unnuha nna begüiatteba nianna bele'etia ttu puerta du yali-na iyyabaaha. Tsi'i Benni unnee len neti primera, Benni bieni tsi'e attiba tsi'i ttu trompeta, Benniha unnee re neti:

—Gopi nii. Neti nna ule'etia lu nu labíaba aca dequide nu chi bilenlu-na.

<sup>2</sup> Laniatteba nna bisía Espíritu gue Tata Do Iyyabaaha uyu'e lhe'e itúba cuerpu quia. Neti nna bele'ettebatia ttu xxila du iyyabaaha, lo nua nna do ttu Benni rinnabia.<sup>3</sup> Benni do lo nua nna rule'e attiba iyya xcaragalha te láni jaspe lhe cornalina lhe. Sa bi'aba xxilaha nna yequi ttu arco iris raca galhana attiba ttu iyya te láni esmeralda.

<sup>4</sup> Bele'eguabatia a ttapa erúa (24) xxila se'e sabi'aba xxila atta do Benni rinnabiah. Lo ca nua nna sia ttapa erúa ca benniola nucu xo sitsi guecabi yu'u corona anca leni oro iquicabi lhe.<sup>5</sup> Atta du xxila do benni rinnabiah nna riría edha lhe ru'u be lhe ratsa lhe. Daca lo xxila atta do Benniha nna sia gasi ca yanalha gui ralha. Ca guiha nna ancaque gasi espíritu rixuuque lo sina gue Tata Do Iyyabaaha.<sup>6</sup> Daca lo xxila atta do Benni rinnabiah nna re attiba ttu indattoo, de ancaba indattooha yaa nna rilá sába lhe'eni attiba lhe'e ttu iyya guana.

Rulha gue atta du xxila do Benni rinnabiah nna se'e sa bi'aba xxilaha ttapa ca nu bani, itúba daca locani lhe daca cu'ecani lhe sia ca iyya lo.<sup>7</sup> Nu bani do primera nna ancana attiba besi, nu berupaha nna ancana attiba u'una, nu beyonnaha nna anca loni attiba lo benni, nu betapaha nna ancana attiba bedhía daa lo be.

<sup>8</sup> Coa ttuttuba ca nu baniha nna sia xxupa xxilacani. Itúba lo cu'e ca xxilacaniha nna sia ca iyya lo. Rela resába nna tsa bittu redí lecani rácana:

¡Tata Do Iyyabaa, Benni bananie ri'itu.

¡Lu ancalu Benni nari do riesi!

¡Lu ancalu Benni nari do riesi!

¡Benni nari do riesi ancalu, xa Tata Do Iyyabaa benni raxxatta tsitsi lee!

¡Lu ancalu benni dolu nnanna lhe

benni ttu dola lhe benni dho tiempu chi daba lhe!

<sup>9</sup> Gansi chi rá ca nu baniha Benni do lo xxilaha, Benni ttu dia liiba anca banie: “¡Xquixabalú xa tata, lu ancalu Benni ra xxeni leni lhe Benni satía gapatu respeto lhe!” <sup>10</sup> Iyába ttapa erúa (24) ca benniolaha rudú xibicabi lo Benni do lo xxilaha Benni ttu tsaba anca banie, qui rutsá locabi Benniha. Atti ribeattebacabi ca corona guecabicha ruelhacabi ca nua lo Benniha, nianna rácabi:

<sup>11</sup> Tata guetu do iyyabaa Benni bananie ri'itu,

lu ancalu Benni ralhalu gátu lu Benni ra xxeni lee lhe Benni

ra tsitsi lee lhe Benni ralha gapatu respeto lhe

cumu cuinalu benlu iyába nu se'e.

Cuinalu uca lelu use'ecana lhe ucacana lhe.

### Benni anque Carne'eha elha ralhe idhalie lo sitsi tubiha

**5** Neti nna bele'etia ttu sitsi tubi deni Benni rinnabia do lo xxilaha leni ná derechu guee. Sitsiha nna lo cu'ebe anca letra, ro'o atta riluxa tubi sitsiha nna re gasi sellu qui nuttu nu idhalna loni.

<sup>2</sup> Bele'eguabatia attu ingeli ra xxeni lebi, unnebi idisa rábi:

—¿Nú elha ralhana cuana ca sellu re ro'o sitsi-na qui idhalna loni?

<sup>3</sup> Ttiaca ni ttu ca nu se'e iyyabaaha lhe ni ttu ca nu se'e yies lo yu lhe ni ca nu se'e lhi'u yu lhe bittu elha ralhacana idhalcana lo sitsiha, niguaba de ulabacana loni lhe. <sup>4</sup> Neti nna uresixxatta, cumu nuttu nu benni bisela te elha ralhabi idhalbi lo sitsiha, ni de ulababi nu dia lo nua lhe. <sup>5</sup> Laniala nna rá ttu ca benniola sela ca benni ttapa erúa (24) neti:

—Bitturu cueslu. Begüiarga, Benni ra xxeni lee te lee Besi gue ca benni datía bi'ini lá Judá, benni datíaguaba David, Ben-na chi ude

lo ca nu lä raca uyúcane. Lee elha ralhee cue gasi ca sellu re ro'o sitsi-na, idhalie loni lhe.

<sup>6</sup> Nianna bele'etia rulha gue atta du xxila do Benni rinnabiahia, rulha gue ttapa ca nu baniha lhe rulha gue ttapa erúa (24) ca benniolaha lhe du ttu carne'e rule'e chi betticane, sia gasi sittiquie, gasi iyya loe lhe. Ca gasi iyya lo Benniha nna ancaque gasi ca espíritu rixuu lo sina gue Tata Do Iyyabaaha udhelhe itúba yies lo yu. <sup>7</sup> Benni anque Carne'eha nna güiattebe guadaxxue sitsi deni deca ná derechu gue Benni rinnabia do lo xxilaha. <sup>8</sup> Atti bedaxxu Benni anque Carne'eha sitsiha nna itapaba ca nu baniha lencabi ttapa erúa (24) ca benniolaha nna bedútteba xibicabi lo Benni anque Carne'eha. Iyába ca bi'iniha dencabi nu rulha lencabi te láni arpa, denguabacabi ttuttu copa ancacana leni oro, sa ticana yala. Yalahaa nna ancana ca tisa gue ca benni chi anca gue Tata Do Iyyabaaha rulisacabi Benniha. <sup>9</sup> Lacabi nna rulhacabi ttu cantu cubi rácabi benni anque Carne'eha:

Lu ancalu Benni elha ralhalu udaxxulu sitsi-na, cualu ca sellu re ro'o sitsi-na lhe.

Cumu lu nna bettican lu,  
leni reni gueluha nna bodilálú iyáxeaba ca benni se'e lhe'e  
iyába ca yiesi se'e itúba yies lo yu,  
iyáloba benni lhe  
ca benni rinne iyáloba tisa lhe  
qui acacana gue Tata Do Iyyabaaha.

<sup>10</sup> Lu nna chi benlu acacana nu rinnabia lhe bixxudi lhe  
qui ixuucana lo Tata Do Iyyabaa gueri-na,  
innabiacana yies lo yu lhe.

<sup>11</sup> Atti begüiaya nna bienttebatia ts'i'i ixe juisiaba ca ingeli se'ecabi sabi'aba cu'e xxila atta do Benni rinnabiahia, cu'e ca nu baniha lhe cu'e ttapa erúa (24) ca benniolaha lhe. Ixe lha ixe juisiaba ca ingeliha raca, <sup>12</sup> nianna rinnecabi idisa rácabi:

Benni anque Carne'e betticanaha,  
Ben-na elha ralhe cuequi xenri lee  
cumu anque Benni ra tsitsi lee,  
anque Benni uxí elha tsee te gue Tata Do Iyyabaaha lhe  
anque Benni te elha rieni guee lhe  
anque Benni te fuerza guee lhe.  
Ben-na elha ralhe gaparie respeto,

gárie:

“Lu ancalu Benni ra xxeni lee lhe Benni udú xibitu lolu lhe.”

<sup>13</sup> Bienguabatia rinne iyába ca nu beni Tata Do Iyyabaaha se'e iyyabaaha lhe ca nu se'e yies lo yu lhe ca nu yu'u lhi'u yu lhe ca nu requi lhe'e indattoo-na lhe. Iyábacana rácana:

Benni rinnabia do lo xxila-na lenie Benni anque Carne'e-na,  
ralhaque cuequi xenri leque,  
gapari que respeto lhe.

Ralhaque gári que laque ancaque benni ra xxeni lee lhe  
Benni rinnabia xeni ttu dia liiba lhe.

<sup>14</sup> Itapaba ca nu baniha nna rácabi:

—¡Amén!

Iyába ttapa erúa (24) ca benniolaha nna biachuttebacabi bedú xibicabi lhe ribequi xencabi lhe ca Benniha.

### **Benni anque Carne'eha rigúe xxupa ca sellu re ro'o sitsiha**

**6** Neti nna bele'etia atti betse'e lo Benni anca Carne'eha  
sellu primero gue delo gasi ca sellu re ro'o sitsiha. Nianna  
bienttebatia tsi'i ttu ca nu delo ttapa ca nu baniha rábi:

—¡Utá, begüia!

Tsi'ibiha nna bienina attiba rieni atti ru'u be. <sup>2</sup> Atti begüiaya nna  
bele'ettebatia ttu coayu sitsi. Nu do cu'e nua nna denna ttu arco.  
Unnuha nna uxína ttu corona. Tsitsiba run nua biríana de ancana  
nu ridá lo ca nu ritolha lenna. Lana nna diana qui dhana lo adí ca  
nu itilha lenna.

<sup>3</sup> Atti betse'e lo Benni anca Carne'eha berupa sellu re ro'o sitsiha  
nna bienttebatia tsi'i nu bani berupaha rábi:

—¡Utá, begüia!

<sup>4</sup> Nianna biríatteba attu coayu xinaa. Nu do cu'e nua nna uxína  
ttu espada xxeni. Lana nna uxína derechu qui unna bitturu aca uyú  
loes ca benni se'e yies lo yu-ni, qui unna utti loescani lhe.

<sup>5</sup> Atti betse'e lo benni anca Carne'eha nu beyonna sellu re ro'o  
sitsiha nna bienttebatia tsi'i nu bani beyonnaha rábi:

—¡Utá, begüia!

Atti begüiaya nna bele'ettebatia ttu coayu yadhi. Nu do cu'e nua  
nna denna ttu xia libra. <sup>6</sup> Lagüi gue ttapa ca nu baniha nna bientia  
tsi'i ttu benni re:

—Sunruba ttu kilo xua xuxtila gaxa ca benni gue ttu sá sina, o tsunna kilorba cebada lhe, ttiaca vinu-na leni seti-na nna bittubi udhaquinlu cana.

<sup>7</sup> Atti betse'e lo benni anca Carne'ha nu betapa sellu re ro'o sitsiha nna bienttebatia ts'i'i nu bani betapaha rábi:

—¡Utá, begüia!

<sup>8</sup> Atti begüiaya nna bele'ettabatia ttu coayu yatsi chulha. Nu do cu'e nua nna lána Elhutti. Cu'e elhuttiha nna denalha nu te láni atta yu'u ca nu yatti-na. Ca nua nna uxívana derechu qui utticana ca benni se'e yaba salha'a gue salhe yies lo yu. Utticana ca benni leni espada lhe leni ubina lhe leni isagüe lhe leni ca nimala runi lisía se'e ca i'iyattoo lhe.

<sup>9</sup> Atti betse'e lo Benni anque Carne'eha nu gayu sellu re ro'o sitsiha nna bele'ettabatia becoa do iyyabaaha. Xani'a becoha nna se'e ca benni betticana de güequicabi utixxi'acabi ca tisa gue Tata Do Iyyabaaha, de ucacabi benni bedo tisa utixxi'a nu anca gualí gue Jesús lhe. <sup>10</sup> Ca bi'iniha nna ribesi'acabi idisa rácabi:

—Tata Do Iyyabaaha benni ra xxeni lee, lu ancalu Benni nari do riesi lhe ancalu Benni gualí runi nu rinnelu lhe. ¿Núcala unlu elha uxtisi gue ca nu betticana ri'itu se'e yies lo yu-na, qui quixacana gue elhutti guetu?

<sup>11</sup> Lania la nna uxí coa ttu ttu ca bi'iniha xo sitsi qui ucucabi. Nianna rá Tata Do Iyyabaaha ca bi'iniha cuedacabi attu satti, axta liba eda'a ca benni loes lacabi ria le Jesús runguaba sina gue Ben-na, uttican cabi attiguaba bettican cabi.

<sup>12</sup> Atti betse'e lo Benni anca Carne'eha nu xxupa sellu re ro'o sitsiha nna bele'ettabatia bixú idíru. Tatubisa-na nna beacattebe yadhi attiba ttu lari yu. Nanto beo-na nna beacatteba itúbe xinaa attiba reni, <sup>13</sup> ca beli sia lo bea-na nna binnattecacana yies lo yu attiba rinna igu sia lo ttu yaga gansi chi riría ttu be idí rucuabin na.

<sup>14</sup> Lo bea-na nna benitti lottebe attiba retúbi ttu sitsi betubie, iyába ca i'iya-na lhe ca yu bisi se'e lagüi indatoo-na lhe bisílacana atta siacana. <sup>15</sup> Ca nu rinnabia ca yiesi se'e yies lo yu nna becatsitteba locani lhe'e ca belea, lati ca iyyattoo-na lhe lencana ca nu ra xxeni lecani lhe ca nu texxatta guecani lhe ca nu lo gue ca soldado-na lhe ca nu ra tsitsi lecani lhe iyába ca nu tto'o lo sina lhe ca nu bittu tto'o lo sina lhe becatsi locani, <sup>16</sup> Atti rulisacana ca i'iya-na lhe ca iyyattoo-na lhe rácana ca unná:

—¡Gualiyinna iquitu, gualucatsi ri'itu lhe lo Benni rinnabia do lo xxila-na, lo elha disa lä tsu'ubia utte Benni anque Carne'e-na ri'itu lhe.<sup>17</sup> Cumu chiba bisía sá xení atti ga'ana ute Ben-na elha disa gue ca benni. Tsa läganu te dhana dhuna lo nu un Ben-na.

**Ttu gayua yu'u chua bixxi ttapa  
mil (144.000) benni Israel cue sellu xeacabi**

**7** Dequide unnuha nna bele'etia ttapa ingeli se'ecabi itapa laduba gue yies lo yu, dencabi itapaba ca be riría itapa laduba gueni qui bittu iría be yies lo yu lhe lo indattoo-na lhe lo ni ttu ca yaga-na lhe.<sup>2</sup> Bele'eguabatia attu ingeli dabi daca atta riría tatubisa-na denbi sellu gue Tata Do Iyyabaaha Benni doe banie. Ingeli-ni nna uresi'enbi idisa itapaba ca ingeli chi uxícabí derechu qui bixa udhacacabi yies lo yu lhe indattoo-na lhe nianna rábi cabi:

<sup>3</sup>—¡Bittubi udhacaxxinle yies lo yu-na lhe indattoo-na lhe niguaba ca yaga-na lhe! Dequide liba chi ulequiri sellu lo xea ca benni runi sina gue Tata Do Iyyabaa gueri-na, lania liba unle aná.

<sup>4</sup> Nianna bienttebatia balhaxacabi nua cue sellu xeacabi: ttu gayua yu'u chua yu'u ttapa mil (144.000) delo iyába ca benni tsil'inu (12) datía Israel cue sellu xeacabi.

<sup>5</sup> Tsil'inu mil (12.000) ca benni datía Judá cue sellu xeacani, a tsil'inu mil ca benni datía Rubén,  
<sup>6</sup> a tsil'inu mil ca benni datía Gad,  
<sup>7</sup> a tsil'inu mil ca benni datía Aser,  
<sup>8</sup> a tsil'inu mil ca benni datía Neftalí,  
<sup>9</sup> a tsil'inu mil ca benni datía Manasés,  
<sup>10</sup> a tsil'inu mil ca benni datía Simeón,  
<sup>11</sup> a tsil'inu mil ca benni datía Leví,  
<sup>12</sup> a tsil'inu mil ca benni datía Isacar,  
<sup>13</sup> a tsil'inu mil ca benni datía Zabulón,  
<sup>14</sup> a tsil'inu mil ca benni datía José,  
<sup>15</sup> a tsil'inu mil ca benni datía Benjamín.

**Ca benni daa bi'a canaba gue yies lo yu se'ecabi lo  
Tata Do Iyyabaaha nucu xo sitsi guecabi**

<sup>9</sup> Dequide unnuha nna begüiatteba, nianna bele'etia ixe lha ixe juisiaba benni, tsaba nuttu nu benni te dhana ulabancabi de yatterba de recabi. Ca bi'inha nna ancacabi benni se'e lhe'e iyába

ca yiesi se'e itúba yies lo yu, iyáloba benni lhe ca benni rinne iyáloba tisa lhe se'ecabi lo atta du xxila do Benni rinnabiahia, lo Benni anque Carne'eha lhe nucu xo sitsi guecabi dencabi dina.

<sup>10</sup> Lacabi nna ribesi'acabi idisa rácabi:

¡Tata Do Iyyabaa gueri Benni rinnabia do lo xxila-na lenie

Benni anque Carne'eha

bodiláque ri lo elha disa dica uyúri!

<sup>11</sup> Iyába ca ingeliha se'ecabi sabi'aba atta do Benni rinnabiahia, atta se'e ca benniolaha lhe atta se'e ttapa ca nu baniha lhe atti bedútteba xibicabi lo Tata Do Iyyabaaha, axta binna xeacabi lo atta du xxila do Benniha, nianna ribequixxencabi Benniha. <sup>12</sup> Lacabi nna rácabi:

¡Amén!

Lu ulhatu guelu lhe

innátu:

“Lu ancalu Benni ra xxeni leni lhe  
ancalu Benni te elha rieni gueni yulu iyánea lhe  
len cuinalu rutetu xquixaru lhe  
lu ancalu benni gapatu respeto lhe  
ancalu benni ra tsitsi leni lhe  
benni runi tsitsi lhe.

Aná cuequixxentu lelu ttu dia lii.”

¡Amén!

<sup>13</sup> Ttu ca benniolaha nna unnaba tisabi neti rábi:

¿Núnna ca nu nucu xo sitsi guequinna?

¿Ga ladu daa ca unná?

<sup>14</sup> Neti nna becabia guebi rpea bi:

Lu gua yulu, xa Tata.

Labi nna rábi:

Ca unní ulá lo elha disa la tsu'ubia raca yies lo yu.

Lacana nna chi utí xocani nna botsitsican cana leni reni gue  
Benni anque Carne'eha.

<sup>15</sup> Denuala nna se'ecana lo Tata Do Iyyabaaha atta doe  
rinnabie.

Rela resába rixuuni Ben-na cana lhe'e yotu guee-na.

Benni doe lo xxila-naba due lencana. Labe rape cana.

<sup>16</sup> Lacana nna lärga satecana ttuncana, lä ebisirguabacana  
inda lhe

lä utterguaba ubisa-na cana lhe

lä acarguaquinna lisí'i lhe.

<sup>17</sup> Cumu Benni anque Carne'e du rulha gue atta du xxila do benni rinnabia-naba aque benni gape cana attiba ttu benni ruyú carne'e.

Ben-na ichee cana ro'o dina atta riyaa inda rute elha nabani ttu dia lii qui i'iyacana.

Tata Do Iyyabaaha uxíe ro'o locani inda ribesicana.

### Benni anque Carne'eha rutse'e loe nu gasi sellu re ro'o sitsiha

**8** Atti betse'e lo benni anque Carne'eha nu gasi sellu re ro'o sitsiha nna síba beaca iyyabaaha attiba tu salhe ura. <sup>2</sup> Nianna bele'etia gasi ca ingeli se'e lo Tata Do Iyyabaaha. Ca bil'iniha nna uxícabi gasi trompeta. <sup>3</sup> Dequide unnuha nna bisía attu ingeli udúbi atta do becoaha denbi ttu besíu ancana leni oro. Labi nna uxíbi xxeniru yala qui utseelabi nua ca tisa gue iyába ca benni chi anca gue Tata Do Iyyabaaha rulisacabi Benniha qui uttebi na lo becoa anca leni oro do daca atta du xxila do Benni rinnabiah. <sup>4</sup> Las ná ingelihaba yu'u besíuha riría seni gue yala yu'u lhe'eniha ropina risinna lo atta do Tata Do Iyyabaaha, itupa lenna ca tisa gue ca benni chi anca gue Ben-na rulisacabi Ben-na. <sup>5</sup> Ingeliha nna bedaxxuttebabí besíuha bodisábi na bexura gui re lo becoaha, atti bedelhabí nua yies lo yu. Nianna utsá teba lhe uyu'u betteba lhe gopitteba edha lhe bixútteba lhe yies lo yu.

### Ca ingeliha becues ca bi primerba ttapa ca trompetaha

<sup>6</sup> Iyába gasi ca ingeli deni ca trompetaha bese'e tseecabi qui ucuescabi cana. <sup>7</sup> Atti becuesi ingeli primeraha trompeta denbiha nna biyinnatteba iyya leni gui selana reni yies lo yu. A saro'oba la uca yaba salhe gue yies lo yu bettecana, anágua a saro'oba la uca salhe ca yaga lhe ixxi ga'a lhe bite.

<sup>8</sup> Atti becuesi ingeli berupaha trompeta denbiha nna biyinnatteba ttu nu anca attiba ttu i'iya ritena lo indattoo-na. Lania nna a saro'oba la uca yaba rulha indattoo-na beacana reni. <sup>9</sup> A saro'oguaba lä uca yaba salhe iyába nu bani yu'u lhe'e indattoo-na utti lhe a saro'oguaba la uca yaba salhe ca barco dia lo indattoo-na bise'e lo lhe.

<sup>10</sup> Atti becuesi ingeli beyonnaha trompeta denbiha nna birátteba ttu beli xxeni lo bea-na attiba ralha ttu yanalha gui. A saro'oba la

uca yaba salhe ca yoo-na lhe ca atta sia ca ro'o dina-na lhe binnana.  
<sup>11</sup> Beliha nna te láni Nu Ilhá. A saro'oba lä uca yaba salhe ca inda te yies lo yu beacacana ilhá. Ixeru benni utti lo ni'a gue de u'uyacana inda beaca ilháha.

<sup>12</sup> Atti becuesi ingeli betapaha trompeta denbiha nna a saro'oba la uca rulha gue tatubisa-na lhe nanto beo-na lhe bechulha locani, a saro'oguaba la uca yaba salhe ca beli-na lhe bitturu bedáni. Larcala nna a saro'oba la uca rulha gue nu anca resá-na bechulha, aníaguaba rela-na lhe.

<sup>13</sup> Laca dua nía rugüiaya nna bele'ettebatia ttu bedhía diana rulha xeaba gue lo bea-na rinnena idisa rána:

—¡Gualichiaru le ca benni! ¡Gualichiaru le ca benni! ¡Gualichiaru le ca benni se'e yies lo yu gansi chi uresi ca trompeta ucuesi a tsunna ca ingeli-na!

### Unní uca atti becuesi ingeliha nu uca gayu trompetaha

**9** Nu uca gayu ingeliha nna becuesibi trompeta denbiha. Neti nna bele'ettebatia ttu beli do iyyabaaha biríana binnana yies lo yu. Unnuha nna uxína yagüi qui idhalna ro'o belea nu anca chulha lhe'eniha. <sup>2</sup> Atti udhali nua ro'o beleaha nna biríatteba seni ro'o nua attiba seni riría iqui ttu ornu xeni. Seni biría lhe'e beleaha nna ttuttíru bochulha nua lo tatubisa-na lhe bochulha nua be-na lhe. <sup>3</sup> Lhe'e seniha nna biría ca nu anca attiba uxxaru ure yies lo yu. Ca unnuha nna uxícana derechu qui quisicana attiba risi ca lacrana-na. <sup>4</sup> Ca nu anca attiba uxxaruha nna ucacana mandadu bittu bi udhacacana ixxi te yies lo yu, ni ttu ca ya ga'a-na lhe ni ttu nu ya'a daa yies lo yu lhe. Suna ca benni bittu re sellu gue Tata Do Iyyabaaha lo xeacaniba quiscana. <sup>5</sup> Ttiaca bittu uxicana derechu utticana ca benni quiscanaha, suntteba elha disa uttecana ca nua delo gayu beo. Elha disa uyú ca nua nna ancana attiba elha disa ruyú ttu benni gansi chi risi lacrana na. <sup>6</sup> Lania nna tsitsiba eguila le ca benni gaxasná uncana qui gatticana, ttiaca bittu aca, dharu lecani gatticana lhe ttiaca läga isía elhuttiha guecani.

<sup>7</sup> Ca nu anca attiba anca uxxaruha nna rule'ecana attiba coayu chi yu'u xocani se'e tseecana qui tsiacana lo utilha. Iquicani nna yu'u ca nu anca attiba corona anca leni oro, locani nna anca attiba lo benni. <sup>8</sup> Itsiquicani nna ancana attiba itsiqui ca nuila-na, ca layacani nna ancacana attiba laya besi. <sup>9</sup> Ro'o lastoocani nna ta ttu

iyya bata ancana tsitsi. Ca xxilacaniha nna ru'u becana attiba ru'u be atta daa ca carreta na'aya ixeru ca coayu dia utilha.<sup>10</sup> Doguaba xubancani attiba do xubana lacrana. Lo xubancaniha nna do xlhutsacani. Leni unnuha uttecana ca benni elha disa delo gayu beo.<sup>11</sup> Ingeli banani belea anca chulha lhe'eniha nna ancana nu rinnabia gue ca nu anca attiba uxxaruha. Unnuha nna te láni leni tisa hebreo Abadón, leni tisa griego nna te láni Apolión.

<sup>12</sup> Chiba ute elha disa primera, ttiaca chi dala a chupa ca elha disa.

### Unní uca atti becuesi ingeliha nu uca xxupa trompetaha

<sup>13</sup> Atti becuesi nu uca xxupa ingeliha trompeta denbiha nna bienttebatia tsi'i ttu benni dabi daca atta sia ttapa ca sittiqui sia itapa ladu squina gue becoa anca leni oro do lo Tata Do Iyyabaaha.<sup>14</sup> Tsi'i benni rinneha nna re ingeli becuesi nu uca xxupa trompetaha:

—Udhasi itapaba ca ingeli xica ro'o yoo xeni lá Éufrates-na.

<sup>15</sup> Laniala nna udhasie itapaba ca ingeli chi se'e tsee ribeda isía ura lhe sá lhe beo lhe ida lhe qui utticana a saro'oba la aca salhe ca benni se'e yies lo yu.<sup>16</sup> Bienguatia balha xa ca soldado gue ca nua raca chupa gayua millón ca nua sia cu'e ca coayu.

<sup>17</sup> Aní bele'etia ca coayuha lhe ca nu do cu'e ca nua lhe: Ca soldadoha nna ta ro'o lastoocani iyya ancana xinaa attiba gui, azul attiba iyya nu te láni jacinto lhe yatsi attiba azufre lhe. Ca coayuha nna anca iquicani attiba iqui besi, ro'ocani nna riría gui belha lhe seni lhe azufre lhe.<sup>18</sup> Lo elha disa bete gui belha biría ro'o ca coayuha lhe seniha lhe azufreha lhe a saro'oba la uca yaba salhe ca benni se'e yies lo yu utti.<sup>19</sup> Cumu ro'o ca coayuha leni lo xubancaniha do fuerza guecani, leni ca unnuha rutticana benni. Ca xubancaniha nna ancacana attiba belha. Leni iqui ca belhaha nna ro ya'acana ca benni.

<sup>20</sup> Ca benni be'ana bittu utti lo ca elha disa-ni nna läga bodú xiyyancana gue nu lä anca tsee runcana, lä bedú siguacana udú xibicani lo ca be xxegüi lhe lo ca nu bittu gualí anca diosi anca leni oro lhe leni plata lhe leni bronce lhe leni iyya lhe leni yaga lhe. Ca diosi-ni nna läga rienquinna lä riláguaquinna lhe bittuguuba ridacana lhe.<sup>21</sup> Bittuguuba bedhancana utticana benni lhe uncana

gue güesaa lhe lä bedú siguabacana rutsá ro'ocani nutti nuttiba lhe lä bedú siguabacana runcana ubana lhe.

### Ingeli deni sitsi güexxaha

**10** Bele'eguabatia attu ingeli ancabi benni ra xxeni lee biríabi iyyabaaha dabi guadibi tubibi ttu bea. Iquibi nna du ttu arco iris, lobi nna rigu'una xieni attiba tatubisa-na, ca ni'abi nna ancacana attiba belha gue gui.<sup>2</sup> Las nábi nna yu'u ttu sitsi güexxa du yali loni. Ni'a derechu guebi nna bedúbi lo indattoo-na, ni'a rabesa guebi nna bedúbi lo yu.<sup>3</sup> Bi'in-ni nna uresi'abi idisa attiba ts'i'i ttu besi gansi chi rutuxxuna. Atti uresi'abi nna bieni gasi ca ts'i'i diu.<sup>4</sup> Dequide chi ute bieni ca ts'i'iha nna neti nna bedo tseetteba qui unia lo sitsi nu bientiaha, nianna bienttebatia ts'i'i ttu benni unnee iyyabaaha re neti:

—Bittu quixxi'alu nu bieninlu atti unne gasi ca diu, bittu unlu na lo sitsi.

<sup>5</sup> Ingeli bele'etia du ttu lha'a ni'abi lo indattooha nna attu lha'a ni'abi du lo yu nna ulhidhatteba ná derechu guebi daca lo bea-na,<sup>6</sup> atti bodha'an tsitsitbabí tisa lo Benni do ttu tsaba, Benni beni lo bea-na lhe yies lo yu lhe indattoo-na lhe iyába nu se'e locani lhe rábi:

—Lärga birua isá reasa isía sá aca unní.<sup>7</sup> Gansi chi bisía sá ucuesi nu aca gasi ingeliha trompeta denbiha nna lania nna uni Tata Do Iyyabaaha nu chi ga'ananie aca, nu bittu chi yu benni, attiba chi re ca profeta bixuu lo sina guee.

<sup>8</sup> Nianna bedeyien dacabatia ts'i'i benni unnee iyyabaaha belise neti attu libe re:

—Güia guadaxxu sitsi yali loni deni ingeli du ttu lha'a ni'abi lo indattoo-na attu lha'a ni'abi nna du lo yu.

<sup>9</sup> Neti nna güiatteba atta du ingeliha guayúa bi utebi sitsi güexxaha len neti. Labi nna rábi neti:

—Nina te-ni. Bedaxxu na nna utotte na. Ro'olu nna ettinlu na xixxi attiba besintoo, lhi'u lhe'elu nna eyacana ilhá yatoo.

<sup>10</sup> Laniala nna bedaxxua sitsi güexxa deni ingeliha utoa. Ro'a nnabettitiana xixxi attiba besintoo, ttiaca dequide chi utoa nua nna beacatteba nua ilhá yatoo lhi'u lhe'a.<sup>11</sup> Nianna bientia rá ttu benni neti:

—Raca duelha quixxi'alu attu libe gue nu chi ga'ana sate ixeru ca benni se'e lhe'e ca yiesi se'e yies lo yu, ca benni rinne iyáloba tisa lhe ca nu rinnabia se'e yies lo yu lhe.

### Tata Do Iyyabaaha idhelhe chupa ca benni quixxi'a ca tisa guee

**11** Dequide unnuha nna uxítteba las náya ttu iyyaxtila. Unnuha ancana nu rixuu ribixxibia. Nianna bientia ts'i'i Tata Do Iyyabaaha re neti:

—Udulí nna güia guarixxibia yotu quia-na, lo becoa-na lhe. Belabaguaba balhaxa ca benni se'e ribequixxencabi lhe'e yotu-na lhe.<sup>2</sup> Ttiaca bittu urixxibialu lhe'eli'a gue yotu-na, cumu chiba betea unná leni ca benni bittu ria lecani neti. Ca unná utsutsa uleacana yies quia-na chua yu'u chupa (42) beo.<sup>3</sup> Neti nna idhelhaguuba chupa ca benni qui quixxi'acabi ca tisa quia-na delo ttu mil yu'u chupa gayua yu'u gayuna (1.260) ubisa. Ca bi'iniha nna ucu xo ttipa guecabi.

<sup>4</sup> Irupaba ca bi'ini quixxi'a ca tisaha ancacabi attiba chupa ca yaga gue olivo lhe attiba chupa ca candeleru sia lo Tata Do Iyyabaah Benni banani yies lo yu lhe.<sup>5</sup> Gansi nuxa unna bixa udhaquinna ca bi'in-ni nna iríatteba gui belha ro'ocabi qui tsaba uttecabi cana. Aná gatti nuxaba unna bixa udhaquinna ca bi'in-ni.<sup>6</sup> Ca bi'in-ni nna ancacabi nu ra xxeni leni. Lacabi nna guacaba guecabi ottocabi lo bea-na qui bittu aca iyya ittúttuba atti tsequicabi quixxi'acabi gue Tata Do Iyyabaaha. Dhaguabacabi eyoncabi inda-na reni lhe utecabi ixe loba elha disa gue iyába nu se'e yies lo yu lhe balhaxaba libe raca lecabí.

<sup>7</sup> Ttiaca gansi chi uluxa guecabi utixxi'acabi nna nimala xeni nu guatelaba ancana iría lhe'e belea chulhaha nna ttilha lena cabi. Unnuha nna dhaba nua locabi, nianna utti nua cabi.<sup>8</sup> Ca cuerpu gue ca benni yattiha nna níaba dhu'uya ca nua lo neda te lhe'e yiesi ra xxeni leniha atta betácana lo ya crusí Benni bananie cabi. Yies-ni nna rutácanie na Sodoma nna Egipto nna.<sup>9</sup> Delo tsunna ubisa nalha nna iyáloba benni lhe ca benni rinne iyáloba tisa lhe iyáxeaba ca benni se'e lhe'e iyába ca yiesi se'e itúba yies lo yu lhe iláquinna ca benni yattiha. Lacana nna bittu uguelhacana igatsi ca bi'iniha.<sup>10</sup> Ca benni se'e yies lo yu nna tsitsiba edaca lecani de utti ca bi'iniha. De eyo'oba lecani nna cuentaba ute leni loescani ttu bixa te guecani cumu irpaba ca profeta ucacabi nu bete elha disa guecani.

<sup>11</sup> Ttiaca dequide ute tsunna ubisa nalha nna benitteba Tata Do Iyyabaaha beacani ca bi'iniha. Ca bi'iniha nna guadhattebacabi bese'e racabi. Iyába ca nu biláquinna ca bi'iniha nna usilha usi juisiabaquinna. <sup>12</sup> Ca bi'iniha nna bienttebaquinbi tsi'i ttu benni unnee idisa iyyabaaha li re cabi:

—Gualtsopi nii.

Ca bi'iniha nna gopittebacabi iyyabaaha lhe'e ttu bea, aníba lo ca nu bittu uca uyúcan ca bi'iniha. <sup>13</sup> La uratteba nna bixú lha bixú juisiaba, larcala nna tsii gue delo ttu ttu gayua ca yo'o sia lhe'e yiesiha bise'e lo. Gasi mil benni utti. Iyába ca nu be'ana bittu uttiha nna rasi juisiabaquinna rácana Tata Benni Do Iyyabaaha: “¡Lu ancalu Benni ra xxeni leni!”

<sup>14</sup> Chiba ute elha disa berupaha, nnanna nna chi tte daa ribiga isía elha disa beyonna.

### Unní uca atti becuesi attu ingeliha nu uca gasi trompetaha

<sup>15</sup> Atti becuesi nu uca gasi ingeliha trompeta denbiha nna bientteba tsi'i ca benni unne idisa iyyabaaha ráque:

Yies lo yu-ni nna bisíaba sá acana atta innabia Tata Do Iyyabaaha Benni bananie ri,  
lenie Cristu benni chi ga'ananie odile ca benni.  
Labe innabie ttu dia lii.

<sup>16</sup> Lania nna iyába ttapa erúa (24) ca benniola sia lo xxila se'e lo Tata Do Iyyabaaha, biachucabi axta liba binna lo xeacabi lo yu, nianna ulequi xencabi le Ben-na, <sup>17</sup> atti rácabi:

Xquixabalu xa Benni bananie ri'itu, lu ancalu Tata Do Iyyabaa Benni ra tsitsi lelu.

Ancalu Benni ttu dola lhe benni do nnanna lhe.  
Lu nna chiba bedí ladilu qui acalu nu rinnabia ra tsitsi leni,  
chiba udú lolu rinnabialu lhe.

<sup>18</sup> Ca benni se'e lhe'e ca yiesi se'e itúba yies lo yu  
bisa'axxattaquinna len luu,  
ttiaca chiguaba bisía sá atti utelu elha disa ralhacana dhicana,  
atti unlu elha uxtisi gue ca nu yatti-na lhe.

Lania nna utelu nu tsee ralha ca profeta bixuu lo sina guelu dhicabi,  
uteguabalu nu tsee ralha ca benni chi se'e riesi anca guelu dhicabi lhe

ca benni rapacabi lu respeto lhe  
 si ancacabi nu ra xxeni leni o si nu bittu ra xxeni leni lhe.  
 Lania nna ulhuxalu ca nu rutse'e lo nu te yies lo yu.

<sup>19</sup> Nianna bealitteba yotu gue Tata Benni Do Iyyabaaha. Lhe'e yotuha bilá xua i'ina atta yu'u ca sitsi atta dia ca tisa bodha'an tsitsie leni ca benni Israel. Lania nna gopitteba edha, uyu'u be lhe utsá lhe bixú lhe urexxatta iyya lhe.

### Nuilaha lenna nimala xxegüiha

**12** Lo bea-na ucaxxe ttu senni xeni. Nía biría ttu nuila tsaba tubina tatubisa-na attisiba ben-naba anca xoni nucuna. Xa ni'ani nna do nanto beo-na, iquini nna yu'u ttu corona ancana leni ts'i'inu beli. <sup>2</sup>Nuila-ni nna nuja xi'inni. Lana nna ribesi'anina de ratena rutía lhe'eni cumu ruyúna elha disa cu'u xi'inni. <sup>3</sup>Ucaxxeguaba attu senni lo bea-na. Nía biría ttu nimala xxegüi xeni, ancana xinaa, sia gasi iquini, sia tsii sittiquini lhe. Ttuttu ca iquiniha nna todhi ttuttu corona. <sup>4</sup>Leni xubbanniha nna ure na'ayana a saro'oba la uca yaba salhe ca beli sia lo bea-na, atti bedelhan cana lo yu. Nimala xxegüiha nna udúttebana lo nuila cu'u xi'inniha qui gona xi'ini nua cuantusi galna. <sup>5</sup>Nuilaha nna ulu'una ttu unbiyuuto. Unbiyuutoha nna ancana nu tsitsiba unna innabiana ca benni se'e lhe'e ca yiesi se'e yies lo yu. Ttiaca cuantusiba uli untoha nna bitúatteba nua deyyana besinna lo Tata Do Iyyabaaha, lo xxila atta doe rinnabie lhe. <sup>6</sup>Nuilaha nna bexunnittebana diana lo yu bisi, atta chi ancani Tata Do Iyyabaaha dhona. Cumu nía utecana nu gona itúba ttu mil yu'u chupa gayua yu'u gayuna (1.260) sá.

<sup>7</sup> Lenla nna ucatteba ttu utilha iyyabaaha. Ingeli anca nu lo lá Miguel lenbi ca ingeli guebiha nna bitilhatteba lencabi nimala xxegüiha. Nimala xxegüiha lenna ca ingeli gueniha nna bitilha lencana Miguel, <sup>8</sup>ttiaca läga udá nimala xxegüiha lo ca bi'iniha, bennittibacana. Lania nna lärga bisela gaxa tse'ecana iyyabaaha. <sup>9</sup>Larcala nna uleaque nimala xxegüiha nía. Unnuha nua anca belha do axta ttuali, nu teeguaba láni nu xxegüi lhe Satanás lhe nu ridí yie iyába ca benni se'e yies lo yu. Lana lenna ca ingeli gueniha nna biru'unabacana yies lo yu.

<sup>10</sup> Laniala nna bientia ts'i'i ttu benni unnee idisa iyyabaaha re:  
 Chi bisía sá odilá Tata Do Iyyabaa gueri-na ca benni,  
 ule'e lo lee anque nu ra tsitsi lee lhe Benni rinnabia lhe.

Chiguaba bisía sá ule'e lo, Cristu anque Benni te derechu  
guee innabie lhe  
cumu nu rüdelhiyyana lo Tata Do Iyyabaa gueri-na rela  
resába ca benni ria lee Jesús,  
chiba biru'una nua yies lo yu.

<sup>11</sup> Ca benni ria le Jesús nna bixuuquinbi reni belali Benni  
anque Carne'eha,  
ca tisa utixxi'acabi gue Ben-na lhe qui udácabi loni.  
Lacabi nna tsa bittu usquinbi gatticabi,

berú iqui berúba lecabí elha nabani guecabi gatticabi.

<sup>12</sup> Larcala nna:

“¡Bedaca lelu iyyabaa, lebi'i ca nu se'e-na lhe guale'o lele!  
Ttiaca carusi'iru lebi'i ca nu se'e yies lo yu, lenle ca nu yu'u  
lhe'e indattoo-na,  
cumu nu xxegüiha nna tsitsiba rise'enna guadina atta se'ele-na  
de chi yuna bitturu isá reasa gueni.”

<sup>13</sup> Atti utedaani nimala xxegüiha chiba biyinnana yies lo yu  
nna guanottebana nuila ulu'u unto unbiyuuh. <sup>14</sup> Ttiaca nuilaha  
nna uxíttebana irupaba ca xxila ttu bedhía xeni qui aca dhuna  
uxunnina lo nimala xxegüiha, lana nna tsiana lo yu bisi atta chi  
ga'ana isínna. Nía gutebacana nu gona delo tsunna ida nalha dhona  
nía. <sup>15</sup> Nimala xxegüiha nna beabittebana idilaru inda qui uca ttu  
yoo ujana nuilaha, <sup>16</sup>ttiaca yies lo yu-ni nna bodilábana nuilaha.  
U'uyaba yies lo yu-ni inda beabi nimala xxegüiha. <sup>17</sup> De unnuha  
nna bisa'axxattani nimala xxegüiha leni nuilaha. Nianna diattebana  
itilha lenna ca benni datía nuilaha. Ca bi'iniha nua rudo tisa gue nu  
runi Tata Do Iyyabaaha mandadu aca, den tsitsicabi ca tisa utixxi'a  
Jesús lhe.

### Nimala nu guatelaba ancana biría lhe'e indattooha

**13** Neti nna udútteba lo yuxi re ro'o indattooha. Nianna  
bele'etia biría lhe'e indattooha ttu nimala xeni sia gasi  
chuettuiquini, a tsii sittiquini lhe. Iqui ttuttu ca sittiquiniha nna  
yu'u ttuttu corona. Lo xea ca choettuiquiniha nna dia ca tisa rinne  
güecana gue Tata Do Iyyabaaha. <sup>2</sup> Nimala xeni nu bele'etia biría  
lhe'e indattooha nna ancana attiba ttu besi te láni leopardo. Ca  
ni'a nániha nna ancacana attiba ni'a ná osu, ro'oni nna ancana  
attiba ro'o besi. Nimala xxegüiha nna benna aca nua nu ra tsitsi

leni attiba lana, begüeena nua xxila atta ridona rinnabianaha lhe betena derechu len nua qui aca nua nu tsitsiba innabia lhe.<sup>3</sup> Iqui ttu ca choettuiqui nimala biría lo indattooha nna rule'e anca ttu güee xeni, nu uni qui gattina, ttiaca beacaba güee nu anca uttin nua. Nianna iyába ca benni se'e yies lo yu bebanxxattaquinna gue nu ucaha, atti guanottebacana nua.<sup>4</sup> Ca benni nna bedútteba xibicani lo nimala xxegüiha de bete nua derechu leni nimala biría lhe'e indattooha qui uca nua nu innabia, bedúguaba xibicani lo nimala biría lhe'e indattooha lhe. Nianna rácana:

—Lärga nurua attu nimala do raru xxeni leni atti ra xxeni lee nimala biría lhe'e indattoo-na, nuttuguaba nu te dhana loni lhe.

<sup>5</sup>Tata Do Iyyabaaha nna begüeelhabe nimala biría lhe'e indattooha benna ttaba lhe unne güena gue Benniha lhe. Uxíbana derechu unna anía chua yu'u chupa (42) beo. <sup>6</sup>Lana nna aníaba benna. Unne güena gue Tata Do Iyyabaaha lhe utúana bala'ana gue Benniha lhe gue atta do Benniha lhe gue iyába nu se'e iyyabaaha lhe. <sup>7</sup>Uxíguana derechu itilhana lenna ca benni gue Tata Do Iyyabaaha, dhana locabi lhe. Uxíguabana derechu acana nu innabia iyáxeaba ca benni se'e lhe'e iyába ca yiesi se'e itúba yies lo yu, iyáloba benni lhe ca benni rinne iyáloba tisa lhe. <sup>8</sup>Iyába ca benni se'e yies lo yu udú xibicani lo nimala biría lhe'e indattooha. Ca unnuha nua desdeba atti ure yies lo yu bittu dia lácani lo libro gue benni anca Carne'e betticanaha. Lo libroha nua dia lá ca benni gatta elha nabani guecani ttu dia lii.

<sup>9</sup>Atta rieninle nu ria-ni, gualudo nagale.

<sup>10</sup>Ca benni ga'ana tsiacana lisiyya nna labíaba tsia ca nua lisiyya,  
ca benni ga'ana gatticana leni espada nna labíaba gatti ca nua leni espada.

Larcala nna ca benni gue Tata Do Iyyabaaha raca duelha tse'etsitsicabi, bittu udhancabi ria lecabí Jesús lhe.

### Nimala nu guatelaba ancana biría lhi'u yuha

<sup>11</sup>Dequide unnuha nna bele'etia a ttu nimala xeni nu guatelaba ancana biríana lhi'u yu. Unnuha nna sia chupa sittiquini ancacana attiba sittiqui carne'e, ttiaca tsil'ini nna rienina attiba rieni tsil'i ttu nimala xxegüi. <sup>12</sup>Nimala biría lhe'e indattooha nna betena itúba derechu te gueni rinnabiana leni nimala biría lhi'u yuha qui

ixuu nua loni. Nimala biría lhi'u yuha nna runna qui iyárecha ca benni se'e yies lo yu udú xibicani lo nimala biría lhe'e indattooha, nu beaca güee xeni anca iquiniha, güee nu anca uttina unnuha.

<sup>13</sup> Runguana ca milagru xeni runi reban leri lhe axtaba runna riría gui lo bea-na riyinnana yies lo yu aní lo benni. <sup>14</sup> Leni ca milagru begüeelha Tata Do Iyyabaaha na benna lo nimala biría lhe'e indattooha nna uxí yiena ca benni se'e yies lo yu. Lana nna benna mandadu un ca nua ttu mentu anca atti anca nimala biría lhe'e indattooha nu uca güee iquini leni espada, ttiaca beacabana.

<sup>15</sup> Begüelhaguuba Tata Do Iyyabaaha nimala biría lhi'u yuha unna qui eyaca mentu anca attiba nimala biría lhe'e indattooha nu bani, qui innee mentuha lhe unna gatti iyába ca nu bittu udú xibicani loni lhe. <sup>16</sup> Benguana mandadu cue senni ná derechu gue iyába ca benni se'e yies lo yu, o si lo xeacani lhe. Si ancacana nu ra xxeni leni lhe nu bittu ra xxeni leni lhe nu te gueni lhe nu bittu te gueni lhe nu tto'o lo sina lhe nu bittu tto'o lo sina lhe. <sup>17</sup> Unna qui tsa nuttu nu aca gueni utto'ona lhe go'ona lhe gansi bittuba checana senni gue lá nimala biría lhe'e indattooha o númeru gue lá nua lhe.

<sup>18</sup> Ni reasa elha rieni. Nu te elha rieni gueni nna ebeana cuenta númeru gue nimala biría lhe'e indattooha. Númeru gue unnuha nna ancana nu raxxína lá ttu benni. Númeruha nna ancana xxupa gayua yu'u gayuna yu'u xxupa (666).

### **Benni anque Carne'eha lenie ttu gayua yu'u chua yu'u ttapa mil (144.000) benni**

**14** Lenla nna begüiaya, nianna bele'etia Benni anca Carne'eha due lo lhilhi lá Sión. Len Benniha nna se'e ttu gayua yu'u chua yu'u ttapa mil (144.000) ca benni. Lo xea ca bi'iniha nna dia lá Benni anca Carne'eha, lá Tata gue Benniha lhe. <sup>2</sup> Neti nna bienttebatia ts'i'i ttu benni unnee iyyabaaha. Ts'i'i Benniha nna bieni idisa attiba rieni ts'i'i ttu yoo atta daxxatta idila inda, attiba atta ru'u be idisa lhe. Ts'i'i bientia nna ancana attiba ts'i'i ca arpa rulha leni ixeru ca benni. <sup>3</sup> Lacabi rulhacabi ttu cantu cubi lo atta du xxila do Benni rinnabiah, lo ttapa ca nu baniha lhe lo ca benniolaha lhe. Tsa läganu te aca gueni cantuha. Sunruba ttu gayua yu'u chua yu'u ttapa mil (144.000) ca benni bodilá Tata Do Iyyabaaha atta se'e ca benni se'e yies lo yu, raca guecabi cantuha. <sup>4</sup> Ca bi'iniha nna ancacabi nu tsa nuttu nu nuila belisacabi, denua nna ancacabi

benni nari. Lacabi nna diacabi gaxaba dia Benni anca Carne'eha. Ca bi'iniha nua ulá atta se'e ca benni se'e yies lo yu qui ucacabi úna primerba uxí Tata Do Iyyabaaha lenie Benni anca Carne'eha.<sup>5</sup> Ni ttu libe bittu ben lecabí. Benni nariba ancacabi lo Tata Do Iyyabaaha.

### Tsunna ca ingeli rixxi'acabi nu aca

<sup>6</sup> Bele'eguabatia ttu ingeli requibi lo be rulha xeaba gue lo bea-na, chebi ca tisa gue Jesús ca benni ttu dia liiba te lidhacaque qui quixxi'enbi ca benni se'e yies lo yu, iyáxeaba ca benni se'e lhe'e iyába ca yiesi lhe iyáloba benni lhe ca benni rinne iyáloba tisa lhe.  
<sup>7</sup> Ingeliha nna rinnebi idisa rábi:

—Gualgapa Tata Do Iyyabaaha respeto, gualcuequi xeni lee lhe cumu chi bisía sá unie elha uxtisi. Gualudú xibile lo Benni benie iyyabaaha lhe yies lo yu lhe indattoo-na lhe ca ro'o dina atta riyaaninda lhe.

<sup>8</sup> Nu berupa ingeliha nna denottebabí rábi:

—¡Chi bise'e lo yiesi Babilonia! ¡Chi uluxa yiesi nu ra xxeni leniha! Anába te guatena cumu ca benni gueni beni biyieti iyáxeaba ca benni se'e lhe'e ca yiesi se'e itúba yies lo yu nu satsa runna. Lana beni bedhá iqui ca benni Tata Do Iyyabaaha qui bedú xibicani lo ca nu bittu gualí anca diosi.

<sup>9</sup> Denotteba ingeli beyonnaha rinnebi idisa rábi:

—Gansi nuxa udú xibini lo nimala biría lhe'e indattoo-na lenimentu anca attiba unná lhe dhielhana cue senni gue unná ná derechu gueni o lo xeani lhe<sup>10</sup> unnuha nna dhína elha disa ute Tata Do Iyyabaaha de chi bisa'axxattanie, attisiba nu taga'a ta'a lhe'e copa den Ben-naba nua i'iyana. Tsitsiba satena uyúna elha disa tsiana lo gui, xxuana lo azufre qui itena lhe aní lo ca ingeli gue Ben-na, lo Benni anque Carne'e-na lhe.<sup>11</sup> Seni riría gue atta yu'u ca nu yu'u lo elha disaha nna tsaba riría nua ttu dia liiba. Ttu tsaba bittu edí le ca nu uxí senni gue lá nimala biría lhe'e indattooha, ca nu udú xibicani lo nua lhe lo mentu anca attiba unnuha lhe rela resába itecana.

<sup>12</sup> Larcala nna ca benni se'e riesi anca gue Tata Do Iyyabaaha, ca bi'ini rudocabí tisa gue nu rá Ben-na lhe ca bi'ini bittu rudhancabíria lecabí Jesús lhe raca duelha tse'e tsitsicabí lo neda gue Ben-na.

<sup>13</sup> Laniala nna bientia ts'i'i ttu benni unnee iyyabaaha re neti:

—Beni lo sitsi nu innía-ni: “Bedá nnanna carbáru ca benni se'e leni Jesucristuha atti gatticana.” Espíritu gue Tata Do Iyyabaaha

nna re: "Gualí galá, ca unná nna edí lecani gue sina bencana, lärgabi satecana. Gaxasná bedú lecani use'ecana yies lo yu-ni nna deyyaba nua lencana."

### **Juan bele'enbi chupa ca benni redícabi lena te yies lo yu**

<sup>14</sup> Atti begüiaya nna bele'ettabatia ttu bea sitsi. Lo beaha nna do ttu benni rule'e attiba rule'e Benni unbiyuu daa iyyabaaha yu'u ttu corona anca leni oro iquie, denie ttu iyyarsela riaru ro'oni. <sup>15</sup> Lhe'e yotu do iyyabaaha nna biría attu ingeli ribesi'enbi idisaru benni do lo bea sitsiha, rábi benniha:

—Bega'a iyyarsela guelha lhe'e xua xuxtila-na, chinca bedí Ben-na, cumu chiba bisía ura erú Ben-na. Lena bani te yies lo yu nna chiba ubisi ben-na.

<sup>16</sup> Benni do lo bea sitsiha nna bega'attebe iyyarsela gueha yies lo yu qui bechúe lena bani te loni.

<sup>17</sup> Lenla nna biría attu ingeli lhe'e yotu do iyyabaaha, denguabi ttu iyyarsela ria ro'oni. <sup>18</sup> Atta do becoaha nna biría attu ingeli banani gui. Bi'in-ni nna unnebi idisa belisabi ingeli deni iyyarsela ria ro'oniha rábi bi'iniha:

—Bedaxxu iyyarsela ria ro'oni guelha nna uchú ca resimu nalha lo ca ya besuli daa yies lo yu, cumu chiba ancacana ya. <sup>19</sup> Ingeliha nna bega'attebabí iyyarselaha lhe'e ca ya besuli daa yies lo yu, atti uchúttebabí ca besuliha, nianna bedelhattebabí ca nua lhe'e ttu yieru xeni atta ridí ca nua. Unní raxxína leni elha disa la tsu'ubia ugüe Tata Do Iyyabaaha ca benni beni nu bittu anca tsee de risa'axxattanie. <sup>20</sup> Ca besuliha nna bidícana ro'o yiesiha. Lhe'e yieru atta bidí ca nua nna biría ttu yoo reni be'eyuna axta atta yu'u frenu yu'u ro'o ca coayu. Attiba tu tsunna gayua (300) kilómetro udá lo reniha.

### **Gasi ingeli dencabi gasi loo elha disa daa uyú ca benni**

**15** Bele'eguabatia iyyabaaha attu senni xeni nu rebaninri atti rilenri na. Lhe'e nu bele'etia nna bilátia gasi ingeli dencabi gasi lo elha disa daa uyú ca benni. Bedá ca elha disa-ni ute Tata Do Iyyabaaha leni ca benni qui lhuxa nu risa'anie.

<sup>2</sup> Bele'eguabatia ttu indattoo ancana attiba iyya guana selana gui. Ro'o indattooha nna bele'etia se'e ca benni udácabi lo nimala biría lhe'e indattooha, lo mentu anca attiba unnuha lhe lacabi nua

bittu unnácabi tsia númeru gue lá nua lhe senni gue nua lhe cuerpu guecabi. Ca bi'iniha nna dencabi ca arpa bete Tata Do Iyyabaaha len lacabi.<sup>3</sup> Nianna rulhacabi cantu bilha Moisés bi'ini bixuu lo sina gue Tata Do Iyyabaaha, cantu bilha Benni anque Carne'eha lhe rácabi:

Xxeniba anca ca nu runlu, tsitsiba rebanintu atti rilento cana  
xa Tata Do Iyyabaa Benni ra tsitsi leni,

Lu ancalu Benni rinnabia ca benni se'e lhe'e ca yiesi se'e yies  
lo yu,

ancalu Benni runi nu anca lhixxa lhe nu anca gualí lhe.

<sup>4</sup>Iyá rechaba ca benni gapacana lu respeto, xa Tata,  
iyárechaba ca benni cuequi xencana lelu lhe.

Cumu sunruba lu ancalu Benni nari do riesi.

Iyába ca benni se'e lhe'e ca yies se'e itúba yies lo yu itacana  
udú xibicani lolu,

cumu chiba bele'e lolu lu ancalu Benni runi elha uxtisi tsee.

<sup>5</sup>Dequide unnuha nna begüiatteba, nianna bele'etia beali Atta Anca Le'aru do axta lhi'u gue yotu do iyyabaaha. <sup>6</sup>Lhe'e yotuha nna biría gasi ingeli dencabi gasi lo elha disa nu uyú ca benni. Lacabi nna nucucabi ca lari tsee nu te láni lino ancana nari lhe ru'u xieni gueni lhe. Ro'o lastoocabi nna xica ttu cinchu ancana leni oro. <sup>7</sup>Ttu ca nu delo ttapa ca nu baniha nna betebi len iyába gasi ca ingeliha ttutu copa anca leni oro, sa ttiticana elha disa dhi ca benni de bisa'axxattani Tata Do Iyyabaaha, Benni ttu tsaba doe. <sup>8</sup>Lhe'e yotuha nna bisá tie seni gue nu ra xxeni lee gue Tata Do Iyyabaaha, gue nu ra tsitsi lee lhe. Tsaba nuttu nu te dhana ga'ana lhe'e yotuha axta liba chi guate ca benni iyá gasi ca elha disa che ca ingeliha.

## 16 Neti nna bientia ts'i'i ttu Benni unnee idisa lhi'u lhe'e yotu, re gasi ca ingeliha:

—Gualtsia nna gualsalali nu risa'a iqui gue Tata Do Iyyabaaha ta'a lhe'e gasi ca copa denle-na yies lo yu.

<sup>2</sup>Ingeli primeroha nna güiattebabí gualalbi nu ta'a lhe'e copa denbiha yies lo yu. Nianna iyába ca benni renanca senni gue nimala biría lhe'e indattooha, ca nu rudú xibicani lo mentu anca attiba unnuha lhe gualitteba lhe'e cuerpu guecani yiesu satsa bixínani nu racaxxatta.

<sup>3</sup> Ingeli berupaha nna belalittebabí nu ta'a lhe'e copa denbiha lo indattoo-na. Indattoo-na nna beacattebana attiba reni gue ttu nu betticana. Lania nna iyába ca nu bani yu'u lhe'eni utti.

<sup>4</sup> Ingeli beyonnaha nna belalittebabí nu ta'a lhe'e copa denbiha lhe'e ca yoo-na, ca ro'o dina atta riyaa ca inda-na lhe nianna beacatteba ca inda-na reni. <sup>5</sup> Neti nna bientia unnee ingeli banani inda-na rábi:

Lu, Tata Do Iyyabaaha Benni nari do riesi,  
Benni ttu dola lhe  
Benni do nnanna lhe  
lhixxaba runlu elha uxtisi  
atti ridhelhalu ca elha disa-ni yies lo yu.

<sup>6</sup> Cumu ca nu run nu lä anca tsee-na belalicana reni gue ca  
benni betticanaha,  
delába ca bi'ini se'e riesi anca guelu,  
ca profeta guelha lhe.  
Nnanna nna rugüi'al cana reni.  
¡Lacana nna unnába ralhacana!

<sup>7</sup> Bienguatia ts'i'i ttu benni unne daca atta do becoaha rábi:  
—Gualíbinlu, xa Benni bananie ri'itu, Tata Do Iyyabaa Benni tsitsi ra xxeni lee. Elha disa rutelu gue ca benni se'e yies lo yu nna ananca nu ralhacana dhicana cumu runbalu elha uxtisi guecani lhixxa suba attiba raxxína.

<sup>8</sup> Nu betapa ingeliha nna belalittebabí nu ta'a lhe'e copa denbiha lo tatubisa-na. Tata Do Iyyabaaha nna begüeelhabe tatubisa-na bettee ca benni leni gui guee. <sup>9</sup> Iyába ca benni attulade bitecana leni lha gue tatubisa-na, ttiaca tsa läga bodú xiyyancana, lä ulequi xen guabacana Tata Do Iyyabaaha Benni udhelha elha disa guecaniha lhe. Lacana nna utelacana iqui Benniha.

<sup>10</sup> Nu gayu ingeliha nna belalittebabí nu ta'a lhe'e copa denbiha lo xxila atta do nimala biría lhe'e indattoo-na rinnabiana. Lania nna bechulhatteba itúba atta rinnabiana. Ca benni nna roya'ani lhusacani de yatterba de nu ratecana. <sup>11</sup> Ttiaca tsa läga bodú xiyyancana gue nu bittu anca tsee runcana. Lacana nna utelacana iqui Tata Dios Benni do iyyabaaha de biaca raya rilá cuerpu guecani, de racacana yiesu rixinaniha lhe.

<sup>12</sup> Nu xxupa ingeliha nna belalittebabí nu ta'a lhe'e copa denbiha lo yoo xeni lá Éufrates. Yooha nna bebisi'attebana qui beali neda tte ca nu rinnabia se'e daca atta riría ubisa-na.

<sup>13</sup> Nianna bele'etia tsunna ca be satsa ancacana attiba culhusu biría ro'o nimala xxegüiha, ro'o nimala biría lhe'e indattooha lhe ro'o nimala biría lhi'u yuha nu ridí yiena ca benni len nu rinnenaha lhe. <sup>14</sup> Ca nu ancacana attiba culhusuha nna ancacana be xxegüi gue nu lexúaha. Lacana runcana ca milagru xxeni. Anáguaba biríacana diacana sattúpacana iyába ca nu rinnabia gue yies lo yu qui chi se'e tsee ca nua itilhacana gansi chi bisía sá xeni gue Tata Do Iyyabaaha benni tsitsi ra xxeni lee-na.

<sup>15</sup> Cristuha nna re: "Gualuyú guele, cumu neti nna esíaya attiba ttu ubana iyyaba le benni risinna guecani. Carbáru ca benni tenná lania, lacana nna guanucuba xocani de se'ecana ribedacana neti, qui bittu ettúquinna ttunttucana." <sup>16</sup> Ca be xxegüiha nna bottupacana ca nu rinnabia lo yu nu te láni Armagedón leni tisa hebreo.

<sup>17</sup> Nu beda'a gasi ingeliha nna belalittebabí nu ta'a lhe'e copa denbiha lo be. Nianna bieni tsi'i ttu benni unnee idisa lhi'u lhe'e yotu do iyyabaaha daca atta du xxila do Benni rinnabiha. Benniha nna re:

—Chi uluxa iyá.

<sup>18</sup> Nianna gopitteba edha, uyu'u betteba lhe utsátteba lhe. Yies lo yu nna bixútteba idíru. Ni ttu libe bittu chi bixú ituttu se'e benni yies lo yu atti bixú lania.

<sup>19</sup> Yiesi ra xxeni leni lá Babilonia nna bila'a lhe'eni ucana tsunna lila'a. Ca yiesi se'e yies lo yu nna bitapacana. Tata Do Iyyabaaha nna läga bixulhanie Babilonia yiesi ra xxeni leniha. Lee nna begüi'iye na nu ta'a lhe'e copa denie, unnuha anca elha disa tsitsi begüeena gue nu bisa'axxattanie. <sup>20</sup> Iyába ca yu bisi se'e lagüi indattoo-na lhe ca i'iya-na lhe benitti locana. <sup>21</sup> Ureguaba iyya elha daa iyyabaaha iqui ca benni. Ca iyyaha nna di'icana attiba tu chua (40) kilo. Ca benni nna utelacana iqui Tata Do Iyyabaaha de biaca ure iyyaha, cumu uca nua ttu elha disa xeni biyúcana.

### Nuila rutesa latiniha dona cu'e ttu nimala xinaa

**17** Ttu ca nu gasi ingeli deni ca gasi copaha nna bisíabi atta duha rábi neti:

—Utá qui ule'etia lu elha disa dhi nuila ra xxeni leni requi rutesa latini do lo atta te idila inda-na.<sup>2</sup> Ca nu rinnabia gue yies lo yu-ni nna betsá ro'ocani nuila rutesa latin-na. Ca benni se'e yies lo yu nna biyeticana nu satsa runi unná, lacana nna bedhá iquicani Tata Do iyyabaaha qui bedú xibicani lo ca nu bittu gualí anca diosi. Attisiba vinu gue nu requi satsa unnába nua u'uyacana.

<sup>3</sup> Nianna bisíatteba Espíritu gue Tata Do Iyyabaaha ute'e lhe'e cuerpu quia, atti uchetteba ingeliha neti daca lo yu bisiba. Nía bele'etia ttu nuila dona cu'e ttu nimala xinaa nu guatelaba ancana sia gasi choettuiquini, a tsii sittiquini nna. Itúba cuerpu gue nimalaha nna dia ca tisa rigúa bala'ana gue Tata Do Iyyabaaha.

<sup>4</sup> Xo nuila do cu'e nua nna ancana xinaa leni muradu. Itúba cuerpu gueni nna ga'ana tsee leni oro lhe perla lhe leni ca iyya raca galha daca yaxi lhe. Las náni nna yu'u ttu copa anca leni oro sa tina nu tsiga rixxini benni gue nu satsa benna betesa latini.<sup>5</sup> Lo xeani nna dia ttu lá nu bittu yu benni bixa dia leni. Aní rá nu dia lo xea nua:

Babilonia ra xxeni leni,  
nan gue ca nuila requi rutesa laticani lhe  
nan gue iyá nu tsiga rixxini benni raca yies lo yu-ni lhe.

<sup>6</sup> Neti nna bele'etia nuilaha dusinna de u'uyana reni gue ca benni se'e riesi anca gue Tata Do Iyyabaaha, ca benni betticana de utixxi'acabi ca tisa gue Jesús. Neti nna tsitsiba bebantia atti bele'etia nua.

<sup>7</sup> Ingeliha nna rábi neti:

—¿Biaca reban xxattinlu? Neti quixxi'atia lu bixa dia-ni nu bittu yu ca benni gue nuila-na, gue nimala nu do nuila-na cu'eni nu sia gasi choettuiquin-na, a tsii sittiquini lhe.<sup>8</sup> Nimala xinaa bilenlu-na, lana nua udo ttuha, nnanna nna lärga nuna do, ttica chi tte deoba eríana lhe'e belea nu anca chulha lhe'enih, qui lenla nna tsiana atta tsaba inittina. Ca benni se'e yies lo yu bittu dia lácani lo libro atta dia lá ca benni gatta elha nabani guecani ttu dia liiba desdeba atti deobali cue yies lo yu, lacana nna tsitsiba ebanquinna gansi chi biláquinna eyacaxxe nimala udo ttuha, nu nnanna nna lärga nuna do.

<sup>9</sup> 'Nii reasa elha rieni qui ttedeen benni gue unní. Ca gasi choettuiqui nimala-na ancacana ca gasi i'iya do nuila-na iquicani,<sup>10</sup> anáguba ancacana gasi ca nu rinnabia lhe. Gayu ca unná nna bitturu rinnabiaciona, nu xxupa-na ancana nu rinnabia nnanna nu

gasiha nna chi isíala nua. Gansi chi bisía nua nna ttu sattirba dho nua innabiana.<sup>11</sup> Nimala nu udo ttuha, nu do nnanna nna lärga nuna do, unnuha ancana nu xxunu innabia. Lana nna selana ca nu gasi rinnabiahia, dequide chi unnabiana nna tsiaguabana atta ttu tsaba inittina.

<sup>12</sup>'Ca tsii sittiqui bilenlu-na, ancacana tsii ca nu innabia. Ca unná nna läga chi udulocana innabiaca. Lacana nna ttu sattirba dhicana derechu qui innabiaca leni nimala xeniha.<sup>13</sup> Iyába tsii ca nu innabiha nna ttuba ese'ecana oquinna iquicani utecana nu ra tsitsi le guecani lhe derechu te guecani rinnabiaca lhe las ná nimala xeniha.<sup>14</sup> Lacana nna ttilha lencana Benni anca Carne'eha, ttiaca dhaba Ben-na locani cumu lee anque Benni bananie ca nu ra xxeni lequinna anque Benni rinnabia gue ca nu rinnabia-na lhe. Dhaba Benni anque Carne'e-na locani itupa lenie ca benni se'e len lee, ca bi'in-ni nna tsa bittu rudhancabi ria lecabí Ben-na, ancacabi benni uxi Tata Do Iyyabaaha lhe benni becuae Ben-na lhe.

<sup>15</sup> Ráguba ingeliha neti:

—Ca inda nu bilenlu do nuila requi rutesa latin-na locani nna ancacana iyáxeaba ca benni se'e lhe'e iyába ca yiesi se'e itúba yies lo yu, iyáloba benni lhe ca benni rinne iyáloba tisa lhe.<sup>16</sup> Iyába tsii sittiqui bilenlu-na lencana nimala-na bittu aca uyúcana nuila requi rutesa latin-na, lacana nna tsaba uttuntucan na, a suna anába udúcan na, gocana bela gueni lhe uttecan na lo gui lhe.<sup>17</sup> Tata Do Iyyabaaha nna chiba benie qui uncana nu raca lee uncana. Lacana nna ttuba ese'ecana oquinna iquicani qui utecana leni nimalahia itúba derechu te guecani rinnabiaca, axta liba sadona gue nu chi ga'anani Tata Do Iyyabaaha aca.<sup>18</sup> Nuila bilenlu-na ancana yiesi ra xxeni leni rinnabia ca nu rinnabia se'e lhe'e iyába ca yiesi se'e yies lo yu.

### Yiesi lá Babilonia bise'e lona

**18** Dequide unnuha nna bele'etia attu ingeli guadibi dabi iyyabaaha, labi nna ancabi ttu ingeli begüeelhe bi rinnabiabi. Yies lo yu-ni nna bele'ettaba yani de uyu'u xieni guebi.<sup>2</sup> Ingeli-ni nna uresi'abi idisa rábi:

- ¡Chi bise'e lo yiesi Babilonia!
- ¡Chi uluxa yiesi nu ra xxeni leniha!
- Lisi ca be xxegüiba chi beacana,

lisi iyáloba ca be satsa lhe  
 atta reta'a iyáloba ca nu sia xxilacani anca tsiga rixxini benni  
 lhe.

<sup>3</sup> Cumu lo ni'a gue yiesiha biyieti iyáxeaba ca benni se'e lhe'e  
 ca yiesi se'e itúba yies lo yu nu satsa runna leni  
 nu subi subi, attisiba len vinuba nua udusiquinna.  
 Ca nu rinnabia se'e yies lo yu-ni nna betsá ro'ocani unná,  
 bencana nu satsa lenna lhe  
 ca nu rutto'o se'e yies lo yu-ni nna chi ucacana nu te xxatta  
 gueni de uyo'o yiesi-na iyába nu ridá leni  
 rutto'ocana.

<sup>4</sup> Bienguatia ts'i attu benni iyyabaaha re:

Lebi'i, ca benni chi anca quia, gualiría lhe'e yiesi-na  
 qui bittu iyetile unle nu satsa run ca nu se'e naa,  
 qui bittu uyúle ca elha disa uyú ca unná lhe.

<sup>5</sup> Cumu nu satsa run ca unná chi guanixxattana, axtaba lo  
 bea-ni chi be'eyuna.

Neti nna läga chi bixulhatia gue nu lä anca tsee runcana,

<sup>6</sup> gualudhaca yies-na attiba bedhacan leha,  
 chupa libe loesi nu bedhacan leha, gualudhaca na.

Gualuchixxi loesi nu i'iyana chupa libe leni nu anca taga'aru  
 tsitsi atti nu betena u'uyaleha.

<sup>7</sup> Attiba bedí baana nu utta gueni, benna ttaba leni unnuha lhe  
 aníaguaba gualuni len lana qui satexxata-na lhe uyúna elha  
 disa lhe

cumu unnenä lhi'u leni rána:

“Neti nna doba attiba nu rinnabia.

Läga nuila bidabi neti, tsa läga isía sá elentia lhe.”

<sup>8</sup> Denua nna lhe'e ttu sába isía iyáloba ca elha disa uyúna:

nu uni eleninna lhe

gattina ubina lhe

tsiana lo gui lhe elhutti gueni lhe

cumu xxeni ra lee Tata Do Iyyabaaha Benni bananie ri.

Lee nna chi benie elha uxtisi gueni qui cu'u quixa gueni.

<sup>9</sup> Ca nu rinnabia se'e yies lo yu nna betsá ro'ocani unná, bencana  
 nu satsa lenna lhe bedí baacana leni unná nu te gueni lhe lacana  
 nna elenquinna lhe cuescana lhe gueni gansi chi biláquinna radha

seni gueni ritena lo gui. <sup>10</sup> Idittu liba tse'ecana de gasquinna lo elha disa uxí nua. Nianna innávana:

¡Carusi'irulu, xa yiesi Babilonia nu ra xxeni leni!  
 ¡Gualichiaru lelu, xa yiesi nu ra tsitsi leni!  
 Ttu ca lha lo nedaba bisía elha disa guelu.

<sup>11</sup> Ca nu rutto'o se'e yies lo yu nna elenquinna lhe cuesicana lhe gue yiesiha, cumu nutturu nu te go'ona nu rutto'ocana. <sup>12</sup> Nu rutto'ocana ancana: oro lhe plata lhe ca iyya daca yaxi lhe perla lhe lari tsee nu te láni lino lhe lari seda nu anca muradu lhe xinaa lhe iyáloguaba ca yaga rure ixixxi lhe iyáloba nu anca leni sitta te láni marfil lhe nu anca leni ca yaga tsee daca yaxi lhe nu anca leni iyya te láni bronce lhe nu anca leni iyya lhe nu anca leni iyya raca galha te láni mármol lhe. <sup>13</sup> Rutto'oguabacana canela lhe iyáloba nu rure ixixxi lhe yala lhe vinu lhe seti lhe yiedi lhe xua xuxtila lhe u'una lhe carne'e lhe coayu lhe carreta lhe axtaba ca benni betto'ocana qui cuen ca nua sina gue ca nu uyo'ocan cana.

<sup>14</sup> Nianna gácana yiesi Babilonia:

¡Garua te iyába ca nu tsee ridáxxatta leluha,  
 ttu tsaba bennittilu iyába nu daca te gueluha lhe  
 nu ru'uxxatta leluha lhe!

<sup>15</sup> Ca nu rutto'o uttaxxatta guecani de uyo'ocana lhe betto'ocana lhe leni yiesi Babiloniahha nna idittu liba tse'ecana de gasquinna lo elha disa ruyú nua, elenquinna lhe cueseana lhe. <sup>16</sup> Nianna innávana:

¡Carusi'iru yiesi ra xxeni leniha!  
 ¡Gualichiaru le yiesi rucu lari tsee te láni lino,  
 nu rucu lari muraduha lhe lari xinaa lhe  
 nu ga'ana tsee cuerpu gueni leni oro lhe perla lhe leni ca iyya  
 raca la daca yaxi lhe!

<sup>17</sup> ¡Ttu ca lha lo nedaba bise'e lo iyárechaba nu daca te gueni!

Iyába ca nu banquinna ca barcoha lhe ca nu reopi lhe'e ca nua deyyacana attu atta subi lhe ca nu riben sina lhe'e ca nua lhe iyába ca nu riben sina lo indattoo-na lhe idittu liba se'ecana. <sup>18</sup> Gansi chi biláquinna seni riría gue yiesiha ritena, ribesi'attebacana rávana:

—¡Tsa lärga nurua attu yiesi te ra xxeni leni atti ra xxeni le yies-ni!

<sup>19</sup> Atti bedelhatteba biste iquicani, ribescana lhe ribesi'anicana de re lenquinna lhe. Nianna rávana:

Carusi'iru yiesi ra xxeni len-ni!

¡Gualichiaru leni!

Leni nu te gue yies-naba uca ca nu se'e barco guecani lo  
indattoo-na nu texxatta gueni.

¡Nnanna nna ttu ca lha lo nedaba bise'e lona!

<sup>20</sup> Gualedacani gueni, lebi'i ca nu se'e iyyabaaha, gualedacani  
lebi'i ca nu se'e riesianca gue Tata Do Iyyabaaha lhe lebi'i ca benni  
bedheti nu bele'e Jesús lhe ca profeta gue Tata Do Iyyabaaha lhe  
cumu chi beni Tata Do Iyyabaaha elha uxtisi gueni qui cu'u quixana  
gue iyá nu bedhacana lebi'i.

<sup>21</sup> Nianna ttu ingeli ra xxeni lebi nna ulhidhabi ttu iyya nu  
ancana attiba ttu iyya gue ttu mulinu xeni, uru'unabi na lhe'e  
indattooha, atti rábi:

Aníba iru'unalu liree, yiesi Babilonia ra xxeni leni,  
qui tsa ttualu nutturu nu ilenna lu yies lo yu-ni.

<sup>22</sup> Ttu tsa bitturu iyieni ulha ca benni leni arpa lhe flauta lhe  
trompeta lhe lo ca neda guelha.

Nutturguaba nu ca nu runi iyáloba ca nu rixuuni benni lhe  
ts'e'e guelu,

lä iyienruguba uttu ca mulinu-na xua lhe.

<sup>23</sup> Ni ttu gui bitturu udani lo ca neda guelha,  
lä iyienruguba edacacani ca nu utsá nácani lhe  
cumu ca nu rutto'o gueluhaba uca ca nu ra xxeni leni gue  
yies lo yu-ni,

lu nna uxí yielu iyába ca benni se'e lhe'e ca yies se'e itúba  
yies lo yu leni elha güesaa guelu.

<sup>24</sup> Cumu lo ca neda guelha bilali reni gue ca profeta gue Tata  
Do Iyyabaaha,  
reni gue ca benni se'e riesi anca gue Ben-na lhe  
reni gue iyába adí ca benni betticana yies lo yu lhe.

**Ca benni se'e iyyabaaha ribequi xencabi Tata Do Iyyabaaha**

**19** Dequide unnuha nna bientia ts'i'i ixe lha ixe huisia ca benni  
se'e iyyabaaha unnecabi idisa rácabi:

¡Aleluya!

Lu rodilálu ri'itu.

Ancalu benni ra xxeni leni lhe benni ra tsitsi leni lhe

<sup>2</sup> cumu lu ancalu Benni runi elha uxtisi lhixxa gue ca benni,

gue nu anca gualí lhe.

Lu nna chiba benlu elha uxtisi gue nuila requi rutesa latiniha,  
nu ancana yiesi ra xxeni leniha,  
qui cu'u quixa gueni.

Lana benna güia nitti ca benni se'e yies lo yu leni nu satsa  
benna.

Tata Do Iyyabaaha nna chi bequixe na gue elhutti gue ca  
benni bixuu lo sina guee, bettina.

<sup>3</sup> Ca benni se'e iyyabaaha nna unnecabi attu libe rácabi:  
¡Aleluya!

Yiesiha nna tsaba ttu dia liiba dho seni gueni itena.

<sup>4</sup> Iyába ttapa erúa (24) ca benniolaha lencabi ttapa ca nu  
baniha nna bedú xibicabi lo Tata Do Iyyabaaha benni do lo xxila  
rinnabie, axta liba binna lo xeacabi lo atta se'ecabiha, nianna  
rácabi Benniha:

¡Amén! ¡Aleluya!

<sup>5</sup> Nianna bien ts'i'i ttu benni unnee daca atta du xxila do Benni  
rinnabia, rábi:

¡Gualcuequi xen Tata Do Iyyabaa gueri-na,  
iyábale atta rixuule lo sina gue Ben-na  
atta rapale Ben-na respeto lhe  
nu ra xxeni leni lhe nu bittu ra xxeni leni lhe!

<sup>6</sup> Bienguabatia attiba ts'i'i ixe lha ixe huisiaba benni, attiba rieni  
ts'i'i ttu bennunni atta daxxatta idila inda lhe attiba rieni atta uyu'u  
be idisa lhe. Nianna rábi:

¡Aleluya!

Cumu Tata Do Iyyabaa benni tsitsi ra xxeni lee-na,  
Benni bananie ri-na lhe  
chi uduloe rinnabie!

<sup>7</sup> Edáquinri lhe eyo'o leri lhe góri Ben-na:

“Lu ancalu Benni ra xxeni lelu  
cumu chi bisía sá utsá ná Benni anca Carne'e-na.

Nuila dhi Ben-na nna  
chi bedú tseena.

<sup>8</sup> Nuilaha nna begüeelhe na ucuna ttu lari tsee te láni lino, nu  
nari xuu ru'uni xiensi gueni.

Lari nucu nuilaha nna dienna nu tsee runi ca benni se'e riesi  
anca gue Tata Do Iyyabaaha.”

<sup>9</sup> Ingeliha nna rábi neti:

—Beni lo sitsi:

Carbáru ca benni biyaxi go elha go tsee gue laní gue utsá ná  
Benni anque Carne'e-na.

Nianna rábi neti:

—Ca tisa-ni anque cuinaga tisa gue Tata Do Iyyabaaha.

<sup>10</sup> Neti nna bedútteba xibia lo ingeliha qui utsá loa bi, ttiaca  
ingeliha nna ráttebabí neti:

—Bittu unlu aná, lo Tata Do Iyyabaaha bedú xibilu, cumu nu  
runi sina gue Ben-naguuba anca neti, attiba luu lhe attiba adí ca  
benni ria le Jesús den tsitsicabi ca tisa utixxi'a Ben-na lhe.

Cumu ca tisa utixxi'a Jesús anque ca tisa nu ruttipaque le ca  
benni qui usiguicabi quixxi'acabi ca tisa rute Tata Do Iyyabaaha len  
lacabi.

### Benni do cu'e coayu sitsiha

<sup>11</sup> Nianna bele'etia iyyabaaha du yalie. Nía ucaxxe ttu coayu  
sitsi. Benni do cu'e nua nna lee Benni rinne nu dica uxxen leri, nu  
anca gualí lhe cumu anque Benni runie elha uxtisi lhixxa, anque  
Benni ria ritilha attiba raxxíbana anca tsee lhe. <sup>12</sup> Ca iyya loe nna  
anque attiba belha gue gui, iquie nna yu'u ixeru corona, diaguuba  
lo xea Benniha ttu lá nu nuttu nu yu, sunruba lee yue bixa lá nua  
dia lo xee. <sup>13</sup> Xo Benniha nucue nna tsaba chi bitiechuna reni. Lee  
nna te lee Tisa gue Tata Do Iyyabaaha. <sup>14</sup> Ca benni anca soldado  
gue iyyabaaha nna denocabi Benniha docabi cu'e ca coayu sitsi.  
Xocabi nucucabihha nna ancana leni lari tsee te láni lino, ancana  
sitsi lhe nari lhe. <sup>15</sup> Ro'o Benniha nna ria ttu espada ria ro'oni. Leni  
unnuha unie güee ca benni se'e lhe'e ca yiesi se'e itúba yies lo yu.  
Lee nna tsitsiba unie innabie cana. Attiba rudú ni'acani iqui besuli  
qui idína iría inda xixxi gueni, aníaba udhaque cana qui dhicana  
elha disa lä tsu'ubia de risa'axxattani Tata Do Iyyabaaha Benni tsitsi  
ra xxeni lee. <sup>16</sup> Lo lari nucu Benniha lhe lo xiche lhe dia lee, nu rá  
aní: “Benni rinnabia gue ca nu rinnabia-na; Benni banani ca nu ra  
xxeni lequinna lhe.”

<sup>17</sup> Bele'eguabatia attu ingeli dubi lo tatubisa-na. Ingeliha nna  
uresi'enbi idisachiga iyánea ca nu sia xxilani ro bela requi rulha  
xeaba gue lo bea-na, rábi cana:

—¡Gualtá. Gualetupa qui gole elha go xxeni utee Tata Do Iyyabaaha! <sup>18</sup>Nu ute Ben-na gole nna ancana bela gue ca nu rinnabia-na lhe gue ca nu lo gue ca soldado-na lhe gue ca benni ancacana nu run tsitsi lhe bela gue ca coayu lhe gue ca nu do cu'e ca unná lhe bela gue iyába benni lhe gue ca nu ra xxeni lequinna lhe ca nu bittu ra xxeni lequinna lhe si ancacana nu tto'o lo sina lhe si nu bittu tto'o lo sina lhe.

<sup>19</sup>Neti nna bele'etia nimala nu guatelaba ancana biría lhe'e indattooha, ca nu rinnabia gue yies lo yu lencana ca soldado guecaniha lhe. Iyábacana ttuba chi bese'ecana qui ttilha lencana Benni do cu'e coayu sitsiha lenie ca soldado guee. <sup>20</sup>Nimala xeni biría lhe'e indattooha nna biaxxubana itupa lenna nimala biría lhi'u yuha nu ridí yiena ca benni len nu rinnena. Lana nua beni ixe lo ca milagru lo nimala biría lhe'e indattooha. Leni ca milagru bennaha nna uxí yiena ca nu uxielha uxí senni gue nimala biría lhe'e indattooha, bedú xibicani lo mentu anca attiba unnuha lhe. Irpabacana biru'unacana dia banbacana lo gui xeni ralhaxxatta leni azufre. <sup>21</sup>Adí ca nu deno ca unnuha nna utticana leni espada riría ro'o Benni do cu'e coayu sitsiha. Iyába ca nu sia xxilani ro bela requi lo bea-na nna belarabaquinna de utocana bela gue ca nua.

### Bixa aca delo ttu mil ida

**20** Dequide unnuha nna bele'etia ttu ingeli biríabi iyyabaaha dabi denbi yagüi gue belea nu anca chulha lhe'eniha, denbi ttu cadena xeni lhe. <sup>2</sup>Ingeliha nna bedaxxubi nimala xxegüiha, delába belha nu do axta ttua li nu te láni nu xxegüi lhe Satanás lhe bexxicabi na ttu mil ida. <sup>3</sup>Lhe'e belea nu anca chulha lhe'eniha nna nía bedelhabí na, atti betto tsitsibi ro'o beleaha, begüeabi sellu ro'o nua lhe qui bitturu aca tsequi nua dhi yiena ca benni se'e lhe'e ca yiesi se'e yies lo yu, axta liba lhuxa mil ida. Dequide lania liba nna labíaba eyasi nua attu satti.

<sup>4</sup>Bele'eguabatia ca xxila atta ribía ca nu rinnabia. Lo ca unnuha nna usia ca bi'ini chi begüeelha Tata Do Iyyabaaha cabi uncabi elha uxtisi. Bele'eguabatia ca benni uchecucana iquicabi de den tsitsicabi ca tisa utixxi'a Jesús, lo ni'a gue ca tisa gue Tata Do Iyyabaaha lhe. Ca bi'in-ni nna läga bedú xibicabi lo nimala biría lhe'e indattooha, niguaba lo mentu anca attiba unnuha lhe lä uxielhaguabacabi cue senni gue nua nácabí o lo xeacabi lhe. Ca bi'in-ni nna bele'etia

beacaquinbi, nianna unnabiacabi leni Benni anque Cristu ttu mil ida.<sup>5</sup> Ca bi'in-ni nua ca benni yatti beacani primerba. Adí ca nu yattiha nna läga beacattequin ca unnuha. Dequide liba ute mil ida nna beacaquinna.<sup>6</sup> Carbáru ca benni eyacani primero atti eyacani ca benni chi utti, cumu ancacabi benni se'e riesi anca gue Tata Do Iyyabaaha. Ca bi'in-ni nna lärga dha elhutti berupaha bixa udhaquinna cabi. Lacabi acacabi bixxudi ixuu lo Tata Do Iyyabaaha, lo Cristu lhe innabiacabi len Benniha mil ida lhe.

### **Nu xxegüiha biru'unana lo gui**

<sup>7</sup> Dequide lhuxa mil ida, nu xxegüiha nna eyasina eríana atta yayana,<sup>8</sup> atti iríana tsiana saxxí yienca benni se'e lhe'e ca yiesi se'e itapa ladu gue itúba yies lo yu. Ca yiesiha nua lá Gog lhe Magog lhe. Lana ottupana iyá ca nua qui itilhacana. Ixe lha ixe juisia ca nua raca, merba re yuxi re ro'o indattoo-na recana.<sup>9</sup> Ca unnuha nna biráttebacana itúba yies lo yu, atti bebi'attecacana lo yu atta se'e ca benni anca gue Tata Do Iyyabaaha, yiesi nu racani Ben-na gueni. Ttiaca lee nna benttebe biría gui iyyabaaha qui ttu tsaba bettena cana.<sup>10</sup> Nu xxegüi nu uxí yienca nna nna biru'unabana lo gui xeni ralhaxxatta leni azufre, attaguuba chi dia nimala xeni biría lhe'e indattooha, nimala biría lhi'u yuha nu ridí yienca benni leni nu rinnenaha lhe. Níaba tsu'ucana uyúcana elha disa la tsu'ubia ttu dia lii rela resába.

### **Ca benni yatti aca elha uxtisi guecani lo Tata Do Iyyabaaha**

<sup>11</sup> Dequide unnuha nna bele'etia Tata Do Iyyabaaha doe rinnabie lo ttu xxila sitsi xeni. Aníba lo Benniha benitti lo yies lo yu leni lo bea-na, tsaba nutturucana bilá.<sup>12</sup> Neti nna bele'etia ca nu yattiha, ca nu bittu ra xxeni lecani lhe ca nu ra xxeni lecani lhe se'ecana lo Benni do lo xxilaha. Nianna bealitteba lo ca libro se'e atta do Benniha, bealiguuba lo attu libro lhe. Lo benniha nua dia lá ca benni gatta elha nabani guecani ttu dia lii. Ca nu yattiha nna ucaba elha uxtisi guecani attiba rába lo ca libroha, cua nu benbacana lhe.<sup>13</sup> Indattoo-na botena ca nu yatti utti lhe'eni qui uca elha uxtisi guecani. Elhutti-na lenna atta se'e ca nu yatti-na botecana ca nu yatti se'e len lacana. Iyába ca nu yattiha uca elha uxtisi guecani cua nu benbacana.<sup>14</sup> Elhuttiha lenna atta se'e ca nu yattiha biru'unacana lo gui xeni ralhaxxattaha. Lo gui atta biru'una ca nua

ancana elhutti berupa.<sup>15</sup> Níaguaba biru'una ca nu bittu besela lácani lo libro atta dia lá ca benni gatta elha nabani guecani ttu dia lii.

### Yiesi Jerusalén cubi

**21** Dequide unnuha nna bele'etia ttu yies lo yu cubi lenna ttu lo bea cubi. Cumu yies lo yu ure primeraha lenna lo bea nu ure primeraha nna benitti lobacana, bitturguaba indatoo-na te lhe.<sup>2</sup> Neti, Juan, bele'etia Jerusalén cubiha, yiesi gue Tata Do Iyyabaaha, birié atta do Benniha iyyabaaha guadie dee. Yiesiha nna chi ga'ana tsee, attiba ttu nuila chi bedú tseena qui dhína unbiyuu.<sup>3</sup> Nianna bientia ts'i'i ttu benni unnee idisa iyyabaaha re:

—Gualgüiarga. Niba do Tata Do Iyyabaaha atta se'e ca benni. Len labacana dhoe nnanna lacana nna acacana benni guee. Cuinaba lee dhoe len lacana, aque Dios guecani lhe.<sup>4</sup> Lee nna uxíe locani inda ribesicana. Tsa lärga nurua gatti lhe nutturguaba nu cuesi lhe lä elenruguabaquinna lhe lä uyúrguabacana elha disa lhe cumu iyába nu uca ttuha nna chiba ute nua.

<sup>5</sup> Benni rinnabia do lo xxilaha nna re:

—Neti rocubia iyába.

Rágube neti:

—Beni lo sitsi nu ria-ni, cumu ca tisa-ni nna ancaque nu gualí, ancaque tisa dica uxten le benni gue nu ráque lhe.

<sup>6</sup> Dequila nna re neti:

—Chiba uluxa iyá. Neti anca Benni du atti udulo lhe Benni du atti lhuxa lhe attiba letra A lenna letra Z. Nuxa benni rebisna inda, neti utea inda riyaa ro'o dina rute elha nabani ttu dia lii i'iyana. Lana nna tsa lägabi dhaquinna indaha.<sup>7</sup> Benni dhana uchíana lo iyá nu satena lo ni'a quia nna dhína iyá nu tsee utea-ni. Neti nna aca Dios gueni, lana nna acana xi'inia.<sup>8</sup> Ttiaca ca nu rasini bittu reaxani, ca nu bittu ria lecani neti lhe ca nu runi nu satsa rixxin ca benni lhe ca nu rutti benni lhe ca nu rutsá ro'ocani nutti nuttiba lhe ca nu runi gue güesa lhe ca nu rudú xibicani lo ca nu bittu gualí anca diosi lhe iyába ca nu run lecani lhe ca unná nna ralhacana tsiacana lo gui xeni ralhaxxatta leni azufre. Lo gui atta tsiacanaha ancana elhutti berupa.

<sup>9</sup> Ttu ca nu gasi ingeli deni ca gasi copa nu sa ti elha disa daa xubana dhi ca benni se'e yies lo yu, bisíabi atta duha rábi neti:

—Utá qui ule'etia lu nuila utsá ne nna nuila dhi Benni anque Carne'e-na.

<sup>10</sup> Nianna Espíritu gue Tata Do Iyyabaaha nna uyu'uttebe itúba lhe'e cuerpu quia, atti uchetteba ingeliha neti iqui ttu i'iya xeni yadha. Nía bele'enbi neti Jerusalén, yiesi xeni anca le'a gue Tata Do Iyyabaaha birié atta do Benniha dee guadie. <sup>11</sup> Yiesiha nna raca galhe leni xieni gue Tata Do Iyyabaaha attiba raca galha ttu iyya ga'ana tsee daca yaxi, attiba iyya raca galha te láni jaspe nu rilá saba lhe'eni. <sup>12</sup> Sa bi'aba yiesiha du ttu de'e xeni yadha. Sia ts'i'inu puerta gueni. Ro'o ttuttu ca puertaha nna se'e ttuttu ingeli. Lhe'e ttuttu ca puertaha nna dia lá ttuttu ca cue gue ca benni ts'i'inu (12) datía Israel. <sup>13</sup> Daca atta riría ubisa-na sia tsunna puerta, daca norti-na sia a tsunna puerta, daca sur-na sia a tsunna puerta, daca atta radi bisa-na sia a tsunna puerta. <sup>14</sup> Xana de'e du bi'aba yiesiha nna yu'u ts'i'inu iyya cimientu. Lo ttuttu ca iyyaha nna dia lá ttuttu ca benni uca ts'i'inu ca bi'ini bedheti nu bele'e Benni anque Carne'eha.

<sup>15</sup> Ingeli rinne len netiha nna denbi ttu iyyaxtila ancana leni oro. Leni unnuha nna urixxibiabi yiesiha lhe ca puerta gue benniha lhe de'e yequi itúba ro'o yiesiha lhe. <sup>16</sup> Yiesiha nna anque cuadradu, ttuba anque de bata lhe de ttuni lhe. Ingeliha nna berixxibiattebabí yiesiha leni iyyaxtila anca leni oro denbiha. Yiesiha nna rena chupa mil chupa gayua (2.200) kilómetro, ttuba anque de bata lhe de ttuni lhe de dhue lhe. <sup>17</sup> Dequila nna berixxibiattebabí de'e du sabi'aba yiesiha. De'a nna yadhe attiba gayuna yu'u gayu metro (65). Ingeliha nna berixxibiabi de'eha leni medida rurixxibia ca benni se'e yies lo yu. <sup>18</sup> De'e du ro'o yiesiha nna anque leni iyya xcaragalha te láni jaspe. Yiesiha nna anque leni ttaga'a oro, chi ancana yani rilá saba lhe'eni attiba lhe'e ttu iyya guana. <sup>19</sup> Ca ts'i'inu iyya cimientu yu'u xan de'eha nna ga'ana tseeque leni iyáloba ca iyya daca yaxi.

Nu primeroha nna anque leni iyya jaspe,  
 nu berupaha nna anque leni iyya zafiro,  
 nu beyonnaha nna anque leni iyya ágata,  
 nu betapaha nna anque leni iyya esmeralda,  
<sup>20</sup> nu gayuaha nna anque leni iyya ónica,  
 nu xxupaha nna anque leni iyya cornalina,  
 nu gasiha nna anque leni iyya crisólito,

nu xxunuha nna anque leni iyya berilo,  
 nu jaaha nna anque leni iyya topacio,  
 nu tsiiha nna anque leni iyya crisopraso,  
 nu siniaha nna anque leni iyya jacinto,  
 nu ts'i'inuha nna anque leni iyya amatista.

<sup>21</sup> Iyába ts'i'inu ca puertaha nna ancaque leni ts'i'inu perla. Ttuttu ca puertaha nna ancaque ttu perla. Neda xeni te salhe lhe'e yiesiha nna anque leni ttaga'a oro. Ancana yani, rilá saba lhe'eni attiba ttu iyya guana.

<sup>22</sup> Ni ttu yotu bittu bilátia lhe'e yiesiha cumu Tata Do Iyyabaaha Benni bananie ri-na, Benni tsitsi ra xxeni lee-na lenie Benni anque Carne'eha ancaque yotu gue yiesiha. <sup>23</sup> Yiesiha nna lägabi reasanie xieni gue tatubisa-na, niguaba gue nanto beo-na lhe cumu xieni gue Tata Do Iyyabaahaba rudani lhe'e yiesiha, Benni anque Carne'ehaba anque gui gue yiesiha lhe. <sup>24</sup> Xieni gue yiesihaba udani gue ca benni se'e lhe'e ca yiesi se'e yies lo yu tse'e lhe'e yiesiha qui iláquinna dhacana. Ca nu rinnabia se'e yies lo yu nna itacana qui utecana iyába nu te guecani runi ra xxeni lecani len yiesiha. <sup>25</sup> Etú sába dhu yali ca puerta gue yiesiha, lärgabirua aca lo rela nía. <sup>26</sup> Ca benni se'e lhe'e ca yiesi se'e yies lo yu utecana iyába nu ga'ana tsee te guecani leni yiesiha. <sup>27</sup> Ni ttu benni runi nu lä anca tsee bittu aca ga'ana lhe'e yiesiha, lä ga'aguuba benni runi nu rixxinri lhe nu run leni lhe. Sunruba ca benni dia lácani lo libro gue Benni anque Carne'eha atta dia lá ca benni gatta elha nabani guecani ttu dia lii, guaca ga'acana lhe'e yiesiha.

**22** Ingeliha nna bele'enbi neti ttu yoo nari che inda rute elha nabani ttu dia lii. Indaha nna anque yaa rilá saba lhe'e attiba lhe'e tu iyya guana, benniha nna riríe atta du xxila do Tata Do Iyyabaaha rinnabie, atta do Benni anque Carne'eha lhe. <sup>2</sup> Rulha xeaba gue neda xeni te lhe'e yiesiha ridá inda. Ladu laduba gue ro'o yooha nna daa ca yaga rute elha nabani ttu dia lii. Ca unnuha nna daa beoba ribía guecani, ts'i'inu libe ribía guecani ttu ida. Ca lhaga gue ca yagaha nna rixúcana raca ca benni se'e lhe'e ca yiesi se'e yies lo yu ramedi. <sup>3</sup> Lhe'e yiesiha nna tsa lärgabi nu bittu anca tsee la raca uyú Tata Do Iyyabaaha aca nía. Xxila atta do Tata Do Iyyabaaha rinnabie lenie Benni anque Carne'ehaba tse'e lhe'e yiesiha. Ca benni rixuu lo sina gue Benniha nna cuequixxencane. <sup>4</sup> Lania nna aníga iláquinbi Benniha, tsia lá Benniha lo xeacabi

lhe.<sup>5</sup> Tsa lärgaga aca rela nía. Ca benni tse'e nía nna lärgabirua eyasaquinbi gui udani guecabi, niguaba xieni gue tatubisa-na lhe cumu Tata Do Iyyabaaha Benni bananie ca bi'inhaba udanie guecabi. Lacabi nua innabiacabi ttu dia liiba.

### **Jesús re: Neti nna chi tte deoba esíaya**

<sup>6</sup> Ingeliha nna rábi neti: “Ca tisa-ni nna ancaque nu gualí, ancaque tisa dica uxxen le benni gue nu ráque lhe. Tata Do Iyyabaaha Benni bananie ri, Benni rute Espíritu guee leni ca profeta rixxi'a ca tisa guee-na lhe lee udhelhe ingeli guee-na qui ule'enbi ca benni rixuu lo sina guee nu chi daa ribiga aca.”

<sup>7</sup> Jesús re: “¡Chi tte deoba esíaya! ¡Carbáru ca benni udocana tisa gue nu rixxi'a lo libro-ni chi daa ribiga aca!”

<sup>8</sup> Neti Juan anca benni bilátia lhe bientia lhe ca unní. Dequide bilátia lhe bientia lhe ca unní nna bedútteba xibia lo ingeli beni bele'enbi neti iyá ca unní qui utsá loa bi. <sup>9</sup> Ttiaca labi nna ráttebabí neti: “Bittu unlu aná cumu nu runi sina gue Tata Do Iyyabaaha guaba anca neti attiba luu lhe attiba ca profeta raca betsi loeslu utixxi'a ca tisa bete Tata Do Iyyabaaha len lacabi lhe attiba iyába ca bi'ini rudo tisa gue nu rá lo libro-ni lhe. Lo Tata Do Iyyabaaha bedú xibilu, Benniha ulequi xxenie.”

<sup>10</sup> Rágubi neti: “Bittu aquinlu aca silu lä quixxi'abalu ca tisa rixxi'a gue nu chi daaba aca dia lo libro-ni, cumu chiba daa ribiga aca nu rá loe. <sup>11</sup> Begüelha nu runi nu lä anca tsee-na, usiguina unna nu lä anca tsee, begüelha nu runi nu anca tsiga lo Tata Do Iyyabaaha, usiguina unna nu anca tsiga, begüelha nu runi nu anca tsee na, usiguina unchiettina nu anca tsee, nu chi ancana nu do riesi anca gue Tata Do Iyyabaaha nna usiguichattina acana nu do riesi anca gue Ben-na.”

<sup>12</sup> Jesús re: “Gualíba. Neti nna chi tte deoba esíaya, denoja ttu nu utea len lebi'i nu ralhale dhíle cua ancaba nu benle. <sup>13</sup> Neti anca Benni du atti udulo lhe Benni du atti lhuxa lhe attiba letra A lenna letra Z, anca Benni udo primerba lhe Benni do ttu dia liiba lhe.”

<sup>14</sup> Carbáru ca benni rii xocani qui acacana nari lo Tata Do Iyyabaaha. Anía liba nna gatta derechu guecani gocana nu sia lo yaga rute elha nabani ttu dia lii. Lania nna guacaba eta'acana ro'o ca puerta sia gue yiesiha. <sup>15</sup> Ttiaca ca benni runi nu lä anca tsee-na lhe ca nu run gue güesa-na lhe ca nu rutsá ro'ocani nutti nuttiba

lhe ca nu rutti benni-na lhe ca nu rudú xibicani lo ca nu bittu gualí anca diosí-na lhe ca nu ridá lecani run lequinna lhe ca unnuha nna tsa bittu eta'acana lhe'e yiesiha.

<sup>16</sup> “Neti, Jesús, udhelha ingeli quia-ni qui quixxi'enbi le, lebi'i ca benni ria lele neti iyá unní. Neti anca Benni datía David. Anca attiba beli raca galha riria ca dila-na lhe.” <sup>17</sup> Espíritu gue Tata Do Iyyabaaha lenie benni utsá náque leni Benni anque Carne'eha, ráque Benniha: “¡Betaal!” Ca benni iyienini ca tisa-ni nna innágubacana: “¡Betaal!” Benni rebisi inda nna gansi raca leni nna itana i'iyana inda rute elha nabani ttu dia lii. Lana nna tsa lägabi dhaquinna inda-na.

<sup>18</sup> Iyába ca benni rienini ca tisa rixxi'a gue nu chi daa aca dia lo libro-ni, neti nna rixxi'atia cana, gansi nuxa udianna nu rixxi'a lo libro-ni, Tata Do Iyyabaaha udianie ca elha disa daa lo libro-ni qui ugüe unnuha. <sup>19</sup> Gansi nuxa cuana ttu ca tisa rixxi'a gue nu chi daa aca dia lo libro-ni, Tata Do Iyyabaaha cuee derechu te gueni edí baana nu ralhana dhína sia lo yaga rute elha nabani ttu dia lii, bittu ugüelhe na eta'ana lhe'e yiesi gue Benniha lhe. Gue unnuha unní dia lo libro-ni.

<sup>20</sup> Jesús benni rixxi'a unní nna re: “¡Gualíba, neti nna chi tte deoba esíaya!”

Amén. ¡Betaa Jesús Benni bananie ri'itu! <sup>21</sup> Jesús Benni bananie ri-na aca lanie iyá rechale. Amén.